


Jusiñamui uai:  
Jusiñamui jito rafue  
illa rabenico



New Testament in Huitoto, Murui (PE:huu:Huitoto, Murui)

# **Jusiñamui uai: Jusiñamui jito rafue illa rabenico**

## **New Testament in Huitoto, Murui (PE:huu:Huitoto, Murui)**

copyright © 2008 Wycliffe Bible Translators, Inc.

Language: Huitoto, Murui

Translation by: Wycliffe Bible Translators, Inc.

Huitoto, Murui [huu], Peru

### **Copyright Information**

© 2008, Bible League International. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

#### **The New Testament**

in Huitoto, Murui

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

---

PDF generated using Haiola and XeLaTeX on 11 Nov 2022 from source files dated 29 Jan 2022  
145a1f66-dca1-5de3-9c00-4e533605e488

## Contents

MATEO . . . . .	1
MARCOS . . . . .	46
LUCAS . . . . .	73
JUAN . . . . .	117
HECHOS . . . . .	148
ROMANOS . . . . .	184
1 CORINTIOS . . . . .	200
2 CORINTIOS . . . . .	219
GÁLATAS . . . . .	229
EFESIOS . . . . .	235
FILIPENSES . . . . .	241
COLOSENSES . . . . .	245
1 TESALONICENSES . . . . .	249
2 TESALONCENSES . . . . .	252
1 TIMOTEO . . . . .	254
2 TIMOTEO . . . . .	259
TITO . . . . .	262
FILEMÓN . . . . .	264
HEBREOS . . . . .	265
SANTIAGO . . . . .	280
1 PEDRO . . . . .	284
2 PEDRO . . . . .	289
1 JUAN . . . . .	292
2 JUAN . . . . .	296
3 JUAN . . . . .	297
JUDAS . . . . .	298
APOCALIPSIS . . . . .	300

## MATEO JESUCRISTO ENIRUEMO ILLA RAFUE CUIAFUE

*Jesucristo ie usumatiai*  
(Lc 3.23-38)

<sup>1</sup> Jesucristo rafuena omoimo cue lloiacana jira, naimie cominina nano lloiticue. Jesucristo usumatiai micoriai mameciaina omoimo lloiticue. Naimie usumadi David micori. Jiaie usuma Abraham micori. <sup>2</sup> Abraham micori jitodi Isaac micori. Isaac micori jitodi Jacob micori. Jacob micori jitodi Judá micori. Judá micori amatiai micoriai moo jiai Jacob micori. <sup>3</sup> Judá micori jitodi Fares micori. Jiaie jitodi Zara micori. Iaimaiai micori eidi Tamar micori. Fares micori jitodi Esrom micori. Esrom micori jitodi Aram micori. <sup>4</sup> Aram micori jitodi Aminadab micori. Aminadab micori jitodi Naasón micori. Naasón micori jitodi Salmón. <sup>5</sup> Salmón micori jitodi Booz micori. Booz micori eidi Rahab micori. Booz micori jitodi Obed micori. Obed micori eidi Rut micori. Obed micori jitodi Isai micori. <sup>6</sup> Isai micori cai illaima David micori moo. David micori jitodi Salomón micori. Salomón micori eidi Urías micori ai. Naiñaiñona ollena, David micori Urías micorina jobaimemo orede. Jobaimemo naimie fiodailla mei, naiñaiñona ote. <sup>7</sup> Salomón micori jitodi Roboam micori. Roboam micori jitodi Abías micori. Abías micori jitodi Asa micori. <sup>8</sup> Asa micori jitodi Josafat micori. Josafat micori jitodi Joram micori. Joram micori jitodi Uzías micori. <sup>9</sup> Uzías micori jitodi Jotam. Jotam micori jitodi Acáz. Acáz micori jitodi Ezequías micori. <sup>10</sup> Ezequías micori jitodi Manasés. Manasés micori jitodi Amón. Amón micori jitodi Josías. <sup>11</sup> Josías micori jitodi Jeconías micori. Jeconías micori amatiai micoriai jiai itimaci. Naie facaiseconi Babilonia railla nairai dine naie nairai soldaduai cai cominina uitimaci. <sup>12</sup> Naie meinomo Jeconías micori Salatiel micorina comuitate. Salatiel micori jitodi Zorobabel micori. <sup>13</sup> Zorobabel micori jitodi Abiud micori. Abiud micori jitodi Eliaquim micori. Eliaquim micori jitodi Azor micori. <sup>14</sup> Azor micori jitodi Sadoc micori. Sadoc micori jitodi Aquim micori. Aquim micori jitodi Eliud micori. <sup>15</sup> Eliud micori jitodi Eleazar micori. Eleazar micori jitodi Matán. Matán micori jitodi Jacob micori. <sup>16</sup> Jacob micori jitodi José micori. José micoridi María ini. Naiñaiñodi Jesús ei. Naimie mameci jiaicidi Cristo.

<sup>17</sup> Abraham micori illa facaisecona David micori jeicia facaisemo Jesús ie catorce nanoramaci mameci jai ite. David micori facaisecona Babiloniamoo ite nairai anamo cai jaiagai illa facaisemo catorce nanoramaci mameci jiai ite. Babiloniamoo ite nairai anamo cai jaiagai illa facaisecona Jesús jeicia facaisemo catorce nanoramaci mameci jiai ite.

*Jesús jeicia rafue*  
(Lc 2.1-7)

<sup>18</sup> Jesucristo comuilla rafuena lloiticue. Jesús eidi María. Naiñaiñona jicanotimiedi José micori. Naimie micori diga naiñaiño nia iñenia, Jesiñamui Joreño ie uaido naiñaiñona uruesitate. <sup>19</sup> José micori maremie. María jai uruesillana naimie micori fidianona, naiñaiñona meidaitañellena jira, naiñaiñona bainino dotaacade. Jiaimie diga illamona urueside raillanona comecina facajanona, naiñaiñona dotaacade. <sup>20</sup> Naimie micori comecina iemo facaia, naimie micori nicañillanona, naimie micorimo Jusiñamui jaienici bairiano raite:

—José, David micori jito, Maríana jaciruiñeno ono, o aina illena. Jusiñamui Joreño naiñaiñona jai uruesitate. <sup>21</sup> Imana jocoite. Ie comini naimaci jeacinomona naimie jilloitajabilla jira, Jesúsna o jitalle naimie mamecidi —raite. <sup>22</sup> Bie rafue suide, Jusiñamuidi ie lloraima micori jaiie llotataga uaina suillena. <sup>23</sup> Jaiie llotatate:

Imana uifioñediñaiño comuite uruedi.

Imana jocoite.

Emanuel ie mameci jitalle.

Bie mameci oni dobaiñuamona raite: “Jusiñamui cai diga ite”.

<sup>24</sup> José micori casidemo, Jusiñamui jaienici lloga uaina finode. Maríana ote, ie aina illena; <sup>25</sup> iadedi nai jitona naiñaiño nia jocoñenia, naiñaiño diga naimie micori nia iniñede. Naiñaiño jito jeicia mei, José micori jitade naimie mamecina Jesúsna.

## 2

*Monamo ite ramo comeciaina facauidino rafue*

<sup>1</sup> Judea railla eniruemo Jesús jeiciga. Naimie jeicianodi Belén. Naie facaiseconi ite illaimadi Herodes micori. Monamo ite ramo comeciaina facauidino naie facaiseconi Jerusalémo jítoma billafo dinena bitimaci. Jerusalémo itinomo jicauinotimaci:

<sup>2</sup>—¿Ninomo como jeiciga omoi judíuái illaimadi? Jitoma bisoillafo como bairede ucuduna ciodicai. Naimona naimie jeicana jai uñotícaí. Naimiemo iobillacinona fecallena biticai.

<sup>3</sup> Herodes micorídi naicinona cacajanona, ie começi jarire ite. Jiaimie naimie meifomo illana jitaiñede. Jerusalémo itinodí jiaí jarire itimaci. <sup>4</sup> Ie facaise Herodes micorí judíuái illaicominina uaiduanona, naimacimo Cristo raillamie jeicana jicanote. <sup>5</sup> Uai otimaci:

—Judea railla eniruemo. Belémo. Iena Jusiñamui facaina micorídi jaie cuega:

<sup>6</sup> Judea eniruemo Belén nairai ite; ia naie nairai eo janorede.

Naie nairaimona damie jeiciamona, omoi illaimana jaite.

Naimiedi cue Israel railla cominina sedaite.

Iemona Belén nairai Judea illaicomini baifemo faite

cuega. <sup>7</sup> Iena cacaja mei, Herodes micorídi monamo ite ramo começiai facauidino bainino uaidote. Naie ucudu bairia facaise raise uñollena jicanote. <sup>8</sup> Naimacina Belémo orede. Llote:

—Naie uruena raise jeno. Naimiena omoi ciua mei, cuemo lluaibi, naimie dine cue jaillasa. Naimiemo iobillacinona jiaí feaacadicue —llote.

—Jii —fairiotimaci. <sup>9-10</sup> Iena naimie micorí llua mei, jaidimaci. Ucuduna naimaci dane ciuamona, eo iobidimaci. Naimaci ciua ucududi naimacina ifuanona, monamo naie urue afemo ride. <sup>11</sup> Fo jaillano uruena, ie ei María diga, ciodimaci. Naimiemo iobillacinona fecallena, cañici ifodo ana rainadatimaci. Naimaci bolsas sebiñuanona, naimiemo rana jamai fecadimaci. Oro fecadimaci. Caimare sorirede rana jiaí fecadimaci. <sup>12</sup> Naimaci inia anamo naimaci nicañillanona, Jusiñamui llote:

—Herodes dine abido jaiñeno —llote. Ie jira Jerusalémo jaiñeno abido naimaci eniruemo jaidimaci.

### *Egiptomo Jesús jailla rafue*

<sup>13</sup> Naimaci jailla mei, José micorí inia anamo nicañirite. Nicañillanona, Jusiñamui jaienicídi naimiemo bairiano raite:

—Egiptomo nai o urue diga, ie ei diga, mai jai. Omo cue llua ñinori nainomo i. O abido billirui lloiticue. Herodedi nai uruena jenoite, naimiena meinellena —raite.

<sup>14</sup> José micorí raire casillano, nai urue diga, Jesús ei diga, Egiptomo ñaiona jaide. <sup>15</sup> Herodes micorí fiodaille ñinori nainomo ite. Ie muidona Jusiñamui ie facaina lloraima micorí llotataga uai jai suide. Jaie lloga: “Egiptomona cue jítona jai uaidoticue”.

### *Mena años itisaiai ñerisedena faia rafue*

<sup>16</sup> Egiptomo Jesús jaillana Herodes micorí fidiñede. Monamo ite ramo começiana facauidino naimaci eniruemo abido jaillana naimie micorí jiaí fidiñede. Naimie micorí ñine naimaci abido ñiñena jira, naimie micorina naimaci jifua jira, naimie micorí eo icirite. Ie jira mena años itisaiai ñerisedena faetate. Nana Belémo ite itisaiai ñiese faetate. Belén ecimo itino uruina jiaí faetate. Naie ucudu mena años jaie nano bairena jira, mena años itisaiai ñerisedena faetate. <sup>17</sup> Raquel micorí jaie eia isoí, Belén itino birui eedimaci. Jeremías micorí iena jaie cuega:

<sup>18</sup> Ramá railla nairai ñinena Raquel micorí eo eiana cacadicue.

Caí usuño Raquel micorí eede.

Naiñaiño micorí uruiai micoriai facaina eede.

Jiaie cominimona firaduacinona jitaiñede, naiñaiño uruiai micoriai jai fiodailla jira.

<sup>19</sup> Digarui illanona, Herodes micorí fiodailla mei, Egiptomo José micorí dane nicañillanona, Jusiñamui jaienicí naimiemo bairede. <sup>20</sup> Llote:

—O comini eniruemo na o urue diga, ie ei diga, abido mai jai. Nai o uruena meinea-cadimie jai fiodaite.

<sup>21</sup> Ie jira ie eniruemo naie urue diga, ie ei diga, abido jaide. <sup>22</sup> Herodes micorí jítodi ie moo ifomo jai illana José micorí fidiño, jaciruite. Herodes micorí jito mamecidi Arquelao. Nainomo José jiaicaiñede. José micorí dane nicañillanona, Jusiñamuidi Galilea railla eniruemo naimie jaillena naimiemo llote. <sup>23</sup> Nazaret railla nairai ñine jaide, nainomo illena. Iemona Jusiñamui facaina lloraini micoriai jaie cuegafuaí jai suide. Cristona jaie cuetimaci: “Naimiedi Nazaret imie”.

## 3

### *Jofue iñenanomo Juan Bautista micorí illa rafue*

(Mr 1.1-8; Lc 3.1-9, 15-17; Jn 1.19-28)

<sup>1</sup> Diga años illanona, Juan Bautista raillamie micorídi jofue iñenanomo illanona, cominina dafaña, Jusiñamui rafuena naimacina llofueuide. <sup>2</sup> Comini naimie micorí ñine billanona, naimacimo llote:

—Omoi jeacinona fainonocaida, omoi comeciai iuailai meido. Jusiñamui dibeimo omoi i. Naimie anamo omoi illana naimie jitailla jira, omoimo iena lloiticue —llote. <sup>3</sup> Isaías micoridi Jusiñamui facaina lloraima. Juan Bautista micori nia iñenia, Isaías micoridi naimie micorina jaie cuete:

Jofue iñenanomo damie jidai-jidaillana cacadicue.

Naimie llote: “Cai Nama biite.

Naimie naiso atona raise fino” llote.

Iese llote; iadedi naimie uaina naimaci feiñollena, naimaci comeciai marena finuana ñaite. <sup>4</sup> Juan micoridi camello itirai ai ie nilla iniroina jitade. Igoi iena ie moilligaina jitade. Fioduaina rite. Ciifona mete. Jamai rana guite. <sup>5</sup> Diga comini naimie micori dine jai jaisoidimaci. Jerusalémona, nana Judeamon, nana Jordán fuemona jai jaisoidimaci. <sup>6</sup> Jusiñamui naimaci jeacinona naimaci llua meino, naimacidi Juan micori bautizaga. <sup>7</sup> Bautizallena, diga fariseuai, diga saduceuai, naimie micori dine bitimaci; iadedi naimaci billana naimie micori ciuano llote:

—Maraiñede rafuena finocana omoi jailla jira, jaio nairai isoidomoi. ¿Ñiese Jusiñamui riicailifuemona jilloitomoi? Cue dine omoi billena, ¿bu omoimo llua? <sup>8</sup> Omoi comeciai iuailai meido. Omoi jeacinona fainonocai. Iemona Jusiñamui jitaillacinona fino. Mare rafuena finocana jai. Naimona omoi comeciai iuailai meiduana uiñoiticaí. Ie mei omoi bautizallomoi. <sup>9</sup> Omoi comeciaina facañeno: “¿Bue ñellena o llua isoi finoiticaí? Jusiñamui Abraham micorina jaie eo raise nabaide. Abraham micori cai moo illamona, Jusiñamui riicailifuemona jilloiticaí”. Ero, omoimo lloiticue: Cue llua isoi omoi finoñenia, naimie riicailifuemona jilloñeitomoi. Abraham micori uruiaidomoi; iadedi Jusiñamui jitaillacinodo jaiacañedomoi. Naimie jitaia, naimie jitaillacinona naimaci finollena, bene ite noficimona naimiedi Abraham micori facaina uruiaina comuitarede. <sup>10</sup> Ero, llisiñede riana tiedomoi. Tiia mei, maraiñena jira, iena jobaidomoi. Ie isoidomoi. Omoi maraiñena jira, Jusiñamui omoina jai duere finoacade. Ie riicailafue anamo jai itomoi. Omoi comeciai iuai omoi meidoñenia, omoina duere finoite. <sup>11</sup> Jusiñamui dibeimo omoi comeciai iuai omoi meidoia, jinui diga omoina bautizaiticue. Cue baifemo faitimie bie facaise biite. Naimie cue ifo meidoite. Jamai bue cue isoilla jira, naimiena cue canuana uiñoñedicue. Naimie bia, naimie dibeimo omoi jaillamona, Jusiñamui Joreño omoimo itataite. Omoi comeciai iuai omoi meidoñenia, omoina duere finoite. <sup>12</sup> Trigona omoi betaia, mare trigona eenotomoi. Maraiñede ra oni dotajanona, iena jobaitomoi. Ie isoide. Naimie rafuena lluanona, comeciai iuailai meidotinona ie moo illanomo naimiedi ofitaite; iadedi jiaie cominana duere finoite. Iramo dotaita. Naie irai jaca duñede —llote.

#### *Jesús bautizaja rafue*

(Mr 1.9-11; Lc 3.21-22)

<sup>13</sup> Juan micori Jordán dine nia ia, Galileamon Jesús bite. Naimiena bautizallena, Juan micori dine bite. <sup>14</sup> Juan dinena naimiemo llote:

—Bautizallena cuemo bitio; ia dama ite. Cuena o bautizaia, cuemona mare.

<sup>15</sup> Jesús uai ote:

—Cuena mai o bautiza. Nana Jusiñamui jitailla rafue coco finoia, mare.

Juan:

—Jee —raite. Ie facaise naimiena bautizade. <sup>16</sup> Jesús bautizaja mei, jinui mona bite. Mona bojodena ciode. Jusiñamui Joreño, ucugi isoi, naimie emodomo ana billana ciode.

<sup>17</sup> Ie facaise monamona Jusiñamui llote:

—Bimie cue eo isiruiga Jito. Naimieri iobidicue.

## 4

#### *Jesúna Taife ramo faia rafue*

(Mr 1.12-13; Lc 4.1-13)

<sup>1</sup> Naie facaise nainomo naimiena ramo Taife faillena, jofue iñenanomo Jusiñamui Joreño Jesús uite. <sup>2</sup> Cuarenta digarui Jesús guñede. Naie facaise fuilla mei, guñeno illamona, aimetaite. <sup>3</sup> Ie facaise Taife naimie dine bite. Jesús aimetaillana naimie uiñuamona llote:

—Jusiñamui Jitodiodena, naimiemo llono: “Ore Moo, cue guillesa, bie nofici llomenicono jaita”. <sup>4</sup> Jesús uai ote:

—Dama ite. O lluana finoñeiticue. Jusiñamui facaina lloraima micori iena jaie cuega: “Jiaie rafuedi llomenico guilla baifemo faite. Dama guillemo comecina facañeno; iadedi Jusiñamui lloga uaimo cai comeci facajamona, ie uaido cai jailla” cuega.

<sup>5</sup> Ie mei Jerusalémo Jusiñamui jofu muidomo Taife Jesús uite. <sup>6</sup> Raita:

—Jusiñamui Jitodiodena, eniruemo mai ana uai. David micori ona jaie cuega: Ona eenollena, Jusiñamuidi ie jaienaisaimo lloite.

Eniruemo o uaiñellena, o abi bofedaiñellena, ona feiñoitimaci cueda. Naie lloga uai suillena, bie jofo muidomona mai ana uai. Naimie ie lloga uaina finorede; ia iena cue uifollena, mai ana uai.

<sup>7</sup> Jesús uai ote:

—Dama ite. Ana uaiñeiticue. Ero, ie cominimo Moisés micori jaie cueda: “Cai Nama Jusiñamuina facaciñeno”. Naimie cuena raise eenuana jai uifotucue. Jamai ebena naimiena facaciñeiticue. O lluaña finoñeiticue.

<sup>8</sup> Ie mei a ite anedumo Taife naimiena uite, naie anedumona nana nairaiaina cioillena. Naie nairaiaí eo ebire eruaide. <sup>9</sup> Naimiemo llote:

—Nana bie nairaiaí cue anamo birui illamona, cuena o sedaia, nana bie nairaiaí omo ititicue. O caiñici ifodo ana rainada, cuemo iobillacino o fecallena.

<sup>10</sup> Jesús uai ote:

—Dama ite. Ona sedañeiticue. Ie cominimo Moisés micori jaie cueda: “Cai Nama Jusiñamuina seda. Dama naimiemo iobillacinona feca”. Taife, mai cuemona oni jai. <sup>11</sup> —Ie facaise naimiemo Taife jaide. Naimie jailla mei, Jusiñamui jaienisaí Jesús dine bitimaci. Naimiena ecallena bitimaci.

*Galileamo Jesús illa rafue  
(Mr 1.14-15; Lc 4.14-15)*

<sup>12</sup> Naie facaise Juan Bautista micorina Herodes gaitajana naimie fidiano, Galilea railla eniruemo Nazaretmo Jesús jaide. <sup>13</sup> Nainomo rilla mei, Capernaumo jaide. Capernaum nairai jorai fuemo ite. Nainomo Zabulón railla enirue ite. Neftalí railla enirue jai ite. <sup>14</sup> Nainomo Jesús jailla jira, Isaías micori jaie cuedafuiaí jai suide. <sup>15</sup> Naimie micori naie cominina jaie cueda:

Bie eniruemo diga nairai ite.

Zabulón ite. Neftalí ite.

Monailalai fuemo nairai ite. Jordán ruicafebeimo nairai ite.

Galileamo nairai jiaí ite. Nainomo judíuainedino jai itimaci.

<sup>16</sup> Jeacino anamo naimaci illamona, naga naie eniruemo ite comini jitiredinomo itimaci isoidimaci

Jusiñamuina uifñoñeno fiodaicana jaidimaci; iadedi eo mare rafue birui cacaitimaci.

Naie rafue naimaci comeciaina lligaiñote. Naie rafuena uitimie bairenite

cueda. Jusiñamuina naimaci uifñoñena jira, naimacina iese cueda. Jesús nainomo birui llofuia jira, mare rafuena jai cacadimaci. <sup>17</sup> Galileamo rilla mei, Jesús llocana jaide. Llofueite:

—Jusiñamui dibeimo illena, omoi jeacinona fainonocaida, omoi comeciái uaina meido. Ie cominina omoi jaillena birui jitaide.

*Ie llofueoicaiganona jaillena, Jesúsdi nagaamagamiña fetua rafue  
(Mr 1.16-20; Lc 5.1-11)*

<sup>18</sup> Jaiiruido Galilea railla jorai fuemo Jesús macaritemo, menamiña ciode. Naga ie ama iaimaiaí. Damié Simón. Jiaici naimie mamecidi Pedro. Ie ama Andrés diga ite. Llojjina fairaima iaimaiaí. Iese jaca naie iaimaiaídi maijuidiaíaimaiaí. <sup>19</sup> Iaimaiaimo llote:

—Cue diga omico jaoicaillena, cue diga mai bi. Cue llofueganona omico jaillena jitaidicue. Lliciaína birui ocabitomico; iadedi cominina oitomico, cue dibeimo naimaci illena.

<sup>20</sup> Tena cacajanona, ieconi iaimaiaí llojjina fainonocaida, naimie diga jaidiaíaimaiaí. Ie llofueganona jaillena, jaidiaíaimaiaí. <sup>21</sup> Lliaí bai Jesús jaidemo, jiaie menamiña ciode. Naga ie ama iaimaiaí. Damié Jacobo. Jaimie Juan Iaimaiaí moodi Zebedeo. Naimie diga botemo itiaíaimaiaí. Llojjina sigaidimaci. Jesús iaimaiaína uaidote, naimie llofueganona jaillena. <sup>22</sup> Ieconí iaimaiaí mooná fainonocaida, botemona arí billanona, Jesús diga jaidiaíaimaiaí.

*Jesús ailluena cominina llofuia rafue  
(Lc 6.17-19)*

<sup>23</sup> Nana Galileamo Jesús jaide. Judíuái ofiracuaímo llofueuide. Naimie anamo comini illana Jusiñamui jitailla jira, Jesúsdi Jusiñamui dibeimo naimaci comeciái uaina meiduana llofueite. Ie cominina naimaci illena llofueite. Naga isoide duiconá duidinona jillotate.

<sup>24</sup> Iemona nana Siria railla eniruemo naimie mameci soride. Naie comini naga isoide duiconá duidinona naimie dine atidimaci. Abi isiredinona atidimaci. Jananiaí anamo illa cominina atidimaci. Naillidinona atidimaci. Niraídanidinona atidimaci. Nana naimacina jillotate. <sup>25</sup> Ailluena comini naimiña racadimaci. Galileamona, Decápolimona, Jerusalémona, Judeamona, Jordán ruica dibeimona comini bitimaci.

## 5

*Anedumo naimie ia, Jesús lloga rafue  
(Lc 6.20-23)*

<sup>1-2</sup> Ailluena cominina Jesúsna racadimaci. Naimacina Jesús ciuanona, anedu muidomo jaide. Ie llofueoicaigano naimie diga jaidimaci. Nainomo ana raita, Jesús naimacimo llote: —Omoína Jusiñamui ie cominina sedaacana rafuena ja llofueitícue. Naimie anamo naimaci illena llofueitícue. <sup>3</sup> Ero, Jusiñamui naimiena jitaidinona sedaite. Comeciaina facadimaci: “Naimie jitaillacinona dani finonidicai; ia naimie caina canuanona, iena finoitícai”. Naimie cominina naie isoidino illamona, naimie naimacina canoite. Iemona caimare iitimaci. <sup>4</sup> Jusiñamui sunaitinona sedaite. Ailluena comini jeacino finocana jaidimaci. Iena uñuamona, damierie sunaitimaci. Naimie cominina naie isoidino illamona, Jusiñamui naimaci comeciaina ocuñotaitaite. Iemona caimare iitimaci. <sup>5</sup> Jusiñamui abina iedoñedinona sedaite. Naimie cominina naie isoidino illamona, Jusiñamui nana enirue naimacimo iite. Eniruemo cominina ico cue sedaia, iese iite. Iemona caimare iitimaci. <sup>6</sup> Jusiñamui naimie jitaillacino finodinona sedaite. Jusiñamui mare rafuena naimaci finuana canoite. Iemona caimare iitimaci. <sup>7</sup> Jusiñamui cominina duenaitinona sedaite. Naimacina naimie duenailamona, Jusiñamui naimacina ico duere finoñeite. Iemona caimare iitimaci. <sup>8</sup> Jusiñamui jeanide começiredinona sedaite. Naimie cominina naie isoidino illamona, naimie diga jaca iitimaci. Iemona caimare iitimaci. <sup>9</sup> Jusiñamui naimie diga uri itinona sedaite. Naimie cominina naie isoidino illamona, jiaie cominina uri itataitimaci. Naie isoidino naimie cominina jaca mameçirenitimaci. Iemona caimare iitimaci. <sup>10</sup> Jusiñamui jitaillacinona finuamona, damierie duere sefuitimaci. Jusiñamui naie isoidinona sedaite. Naimie cominina naimaci illamona, naimie sedajanomo jaca jainaitimaci. Iemona caimare iitimaci. <sup>11</sup> Cuemo omoi duia, duere sefuitomoi. Jiaie comini omoína jeare ñaitimaci. Omoína duere finoitimaci. Omoi joreña tainona lloitimaci. Duere sefuitomoi; iadedi Jusiñamui omoína caimare itataite. <sup>12</sup> Omoi isoi omoi jaiagaimona Jusiñamui facaina lloraini micoríai jaié duere sefuidimaci. Iena omoi uñuamona, monamo Jusiñamuimona ailluena ibana ico omoi feñña jira, birui omoi duere sefuaia, iocire omoi jai.

*Jesús comini illa rafue  
(Mr 9.50; Lc 14.34-35)*

<sup>13</sup> Jesús llote:

—Jusiñamui ie cominina sedaacalle rafue nia llofueitícue. Llicisi rifaia, jai marañede. Iena rifañellena, llicisimo sal joneticai. Sal isoidomoi. Jusiñamui jitailla isoi omoi illamona, jiaie comini marañede rafuena eo finoñedimaci. Sal ie caimano jai iñenia, çniese dane nibaiamona caimarenite? Jai marañede. Jitañña jira, iena oni faiga. Ie isoide. Jusiñamui jitailla isoi omoi iñenia, naimie omoína duere finoite.

<sup>14</sup> “Cuemo omoi duilla jira, jiaie cominina Jusiñamuina omoi uñotajamona, lligañora isoidomoi. Anedumo ite nairai jaca bairede. Ie illanona jaca uñotícai. Jusiñamui jitailla isoi omoi illamona, jiaie comini naimiena uñoitimaci. <sup>15</sup> Lamparín unia mei, cirigai anamo buna rainañega. Jaca ie rainarafomo rainaca, nana jofo jeraina lligañollena. <sup>16</sup> Ie isoide. Cue rafuena jamañeno; iadedi omoi marena illamona, cominina Jusiñamuina uñota. Omoi marena illamona, comini omoi mare finoca rafuena uñoitimaci. Iemona: “Jusiñamui mareniena” raitimaci.

*Jesúdi Moisés micorína llofuaia rafue*

<sup>17</sup> Jesús llote:

—Jusiñamui ie cominina sedaacalle rafue nia llofueitícue. Iena cue llofuaia jira, omoimona damierie começina facade: “Bimie Moisés micorí lloga rafuedo jañede”. Ero: “Moisés micorí llogacinuai marañede” raiñedicue. “Jusiñamui facaina lloraini micoríai jaié llogacinuai marañede” jai raiñedicue; iadedi omoína naie llogacinaina raise uñotaadicue. <sup>18</sup> Biero omoi começina faca. Mona, enirue diga, nia ia, nana naie llogacinuai jaca suite. <sup>19</sup> Omoi einamaci raitimaci: “Dajerie llogacino jiaie llogacino baifemo faite”. Cue raitícue: Naga llogacino omoi iñoñenia, naga omoi llofueñenia, nana Jusiñamui jitaillacinona finoñedomoi. <sup>20</sup> Ero, Jusiñamui jitailla rafuedo judíuai illaicomini baifemo omoi jañenia, Jusiñamui sedajanomo jaca iñeitomoi. Naimaci naie jaié llogacinuai uñoitimaci; iadedi naimaci começiai Jusiñamui díbeimo iñedimaci.

*Jesúdi icirñena llofuaia rafue  
(Lc 12.57-59)*

<sup>21</sup> Jesús llote:

—Omoi llofuerainimona bie jai cacadomoi. Moisés micorí omoi jaiagaimo llote: “Comena meineño. Comena bu meinea, jeacino jai finode. Naimie fiodaillena juez llua”. <sup>22</sup> Naie



llogacinodo jai jaicabidomoi. Omoimo birui jiaie rafue lloiticue. Jiaimie diga bu iciria, jeacino jai finode. Naimie duere sefullena, juez dine naimie uiga. Jiaimiena bu jeare ñaia, jeacino jai finode. Naimie duere sefullena, illaicomini dine naimie uiga. Jiaimiena bu faidoia, jeacino jai finode. Jusiñamui naimiena duere finoite. Iraimo jaita.

<sup>23-24</sup> 'Jerusalémo Jusiñamui jofomo omoi jeacino facaina naimiemo ra fecallena omoi jiaia, omoi comini diga uri nano i. Jiaimie omoi diga icirillana omoi uibiñoia, omoi ra faionocaida, naimie dine nano mai jai. Naie rafue raise finollena, naimie dine jai. Ie mei Jusiñamuimo omoi rana feca.

<sup>25</sup> 'Omoina bu llogidoia, juez dine nia omoi riñenia, omoina llogidotimie diga naie rafuena raise fino. Iena raise finoñenia, juez dine omoi ria, nainomo duere sefuitomoi. Calabozomo omoina oretaita. <sup>26</sup> Nana raise ibañenia, juez llua isoi, jino jaiñeitomoi. Iese omoimo suiñellena, jiaimie diga rafuena comuitaño. Jeacino finoñellena, jiaimie diga iciriño.

*Jesúdi iima ie añede riño diga illa llua rafue*

<sup>27</sup> Jesús llote:

—Omoi llofuerainimona bie jai cacadomoi. Moisés micori jai llote: “Omoi añede riñoñia diga iño. Omoi iniñede iñiaia diga iño”. “Iena bu finoia, jeacino jai finode” raitomoi. <sup>28</sup> Jiaie rafue birui lloiticue. Ie añede riñoemo eruailamona naiñaiño bu nicidoia, naiñaiño diga jamai iniacananona naimie comeci facajamona, jeacino jai finode. Naiñaiño diga iñede; ia naiñaiño diga jamai iniacananona naimie comeci facajamona, jeacino jai finode. <sup>29-30</sup> Biena ñaiticue. Ie isoide rafue omoina jeacino finotaia, iemo eruaiño. Iena llinoño. Iemo comecina facaño. Omoi ciua rana jira, omoi jitaillamona jeacino finodomoi. Rana omoi jetaja jira, omoi jitaillamona jeacino finodomoi. Omoi abina omoi namatañenia, omoi uisina juicono. Omoi onolli jaita. Omoi comecina ñaiticue. Omoi abina omoi raise namatallena, omoi comeci nano raise fino. Jeacino omoi finoia, iraimo jaitomoi. Nana omoi abi diga iraimo jaitomoi. Iraimo omoi jaiñellena, jeacino finoño.

*Jesúdi iima ie aina dotaja llua rafue*

(Mt 19.9; Mr 10.11-12; Lc 16.18)

<sup>31</sup> Jesús llote:

—Omoi llofuerainimona bie jai cacadomoi. Moisés micori jai llote: “Ie aina bu dotaacania, naiñaiñoemo dotajacanabena fecaja”. Iedo jai jaicabidomoi. Iena bu finoia, omoimona mare. <sup>32</sup> Jiaie rafue birui lloiticue. Jiaimie diga naiñaiño iñenia, ie aina bu dotaja, marañede. Jaiiruido jiaimie diga naiñaiño ia, nanodi ie ini muidona naiñaiño jeacino jai finode. Dotaca riñoia ie aina illena bu ua mei, naimiedi jeacinona jai finode. Jeacino finoñellena, aina dotaño.

*Jesúdi Jusiñamui mameci jamai ebena llinoñenana llua rafue*

<sup>33-35</sup> Jesús llote:

—Omoi llofuerainimona bie jai cacadomoi. Moisés micori omoi jaiagaimo llote: “Taino lloño; ia Jusiñamuimo omoi lloga uaina fino”. Iedo jai jaicabidomoi. Omoi lloga uai omoi finollena jiaie comini uñollena, Jusiñamui mamecina llinotomoi. “Iena cai llinoia, cai lloga uaina cai finoñenia, Jusiñamui caina duere finoite” raitomoi. Jusiñamui mameci omoi llinoñenia, omoi lloga uai omoi finoñenia, omoimona mare. “Jusiñamui caina duere finoite” raitomoi. Iemona monamo ite ra mamecina jamai ebena llinotomoi. Eniruemote ite ra mamecina jamai ebena llinotomoi. Jerusalén railla nairai mamecina jamai ebena llinotomoi. Omoi ifogi mamecina jamai ebena jai llinotomoi. Jusiñamui mamecina jamai ebena llinoñedomoi; ia jiaie ra mamecina jamai ebena llinotomoi. Ero, monamo ite ra mamecina omoi llinoia, Jusiñamui mamecina jai llinotomoi, nainomo ie illano illa jira. Eniruemote ite ra mameci omoi llinoia, iena Jusiñamui finua jira, iena naimie sedaja jira, naimie mamecina jai llinotomoi. Jerusalén railla nairai mamecina omoi llinoia, Jerusalén naimie nairaina jira, naimie mamecina jai llinotomoi. <sup>36</sup> Omoi jitirede ifotiraina usere omoi jaitanina jira, omoi userede ifotiraina jitire omoi jaitanina jira, omoi ifogi mameci jai llinoño. Dama Jusiñamui iena usere itataja jira, dama naimie iena jitire itataja jira, ifotirai mamecina omoi llinoia, Jusiñamui mamecina jai llinotomoi. <sup>37</sup> Ie jira Jusiñamui mameci jamai ebena llinoño. Jiaie ra mameci jamai ebena llinoño; iadedi nie isoide rafuena omoi finoia, omoi lloga uaina taino lloño fino. Uanaicinona jaca llono. Uanaicinona omoi lloñenia, Taifemona omoi uaina otomoi.

*Jesúdi iba oñenana llofuia rafue*

(Lc 6.29-30)

<sup>38</sup> Jesús llote:

—Omoi llofuerainimona bie jai cacadomoi. Moisés micori jai llote: “Fuirillamona o uisina jiaimie jino juiconoia, juez naimie uisina juiconuana llua. O isidona jiaimie oni

tainoia, juez naimie isidona oni tainuana llua. Jiaimie ona duere finoia, o duere sefuilla isoi, juez naimiena duere finua". Iedo birui jai jaicabidomoi; <sup>39</sup> iadedi birui omoimo lloticue: f̄bana oñeno. Maraiñede rafue finodimiemona omoi abina riidoñeno. Omoi cacaina naimie dutallesa. Naimie digá iciriñeno. Enefebeimo omoi uieco dobaiño, enefebei omoína naimie dutallesa. Naimie omoína duere finoia, ibana oñeno. <sup>40</sup> Omoi iniroi bairollena omoína bu llogidoia, juez nia omoimo lloñenia, naimie jitailla iniroi baifemo naimiemo feca. <sup>41</sup> Daje kilómetro naimaci raruiaí omoína uillana illaicomini ocuia, iena uifño. Nibai omoi comeci jitaifede; ia naimacina canollena, iena mena kilómetros uifño. Naimaci ocuilla baifemo uifño. <sup>42</sup> Omoimo ite rana bu jicaia, iena caidiñeno. Omoi rana bu jamai jicuaño uia, abido atillena, iena caidiñeno feca.

*Jesúdi omoína gaiñenano isiruillena llua rafue*  
(Lc 6.27-28, 32-36)

<sup>43</sup> Jesús llote:

—Omoi llofuerainimona bie jai cacadomoi. Llotimaci: “Omoi cominina isirui; iadedi omoi nairaiñedinona enoi”. Iedo jai jaicabidomoi. <sup>44</sup> Omoimo birui lloticue: Omoi nairaiñedinona isirui. Omoi gaiñenanona isirui. Omoína duere finodino facaina Jusifamui jii. Naimaci comeciai uai meiduana naimiemo jicano. <sup>45</sup> Jusifamui cominina omoi illamona, naimaci facaina jii. Ero, Jusifamui nana cominina daje isoi canode. Nana cominina daje isoi isiruilla jira, naimiedi jitomana maraiñedinona lligaiñotade. Mareuidinona jai lligaiñotade. Maraiñedino dine noci deitate. Mareuidino dine jai noci deitate. <sup>46</sup> Naimie comini omoi illamona, nana comini daje isoi isirui. Omoína isiruitinona omoi isiruia, mare; iadedi omoína gaiñenanona omoi isiruiñenia, Jusifamui omoína: “Mare” raiñeite. Maraiñede finoraini baifemo faiñedomoi. Naimaci isoi itomoi. <sup>47</sup> Dani omoi cominina omoi uaidoia, mare; ia omoína gaiñenanona omoi uaidoñenia, naimaci baifemo faiñedomoi. Jusifamuina iinoñedino baifemo faiñedomoi. Naimaci isoi itomoi. <sup>48</sup> Iena omoi uifñuamona, omoi Moo Jusifamui finua isoi, mare rafuena finocana omoi jai.

## 6

*Jesúdi mare rafue fñuana llua rafue*

<sup>1</sup> Jesús llote:

—Omoína nia llofueiticue. Jiaie comini iena cioillena, mare rafuena omoi finoiadedi, omoína: “Mareuidinodimaci” naimaci raillena, Jusifamui mona ibana feiñoñeitomoi. Ie jira mare rafuena finoñeno, iena jiaie comini jamai cioillena. Iena ja ñaiticue. <sup>2</sup> Dueredinomo rana omoi jamai fecaia, iena uainino feca. Jiaie cominimona iobillacinona omoi feiñollena, iena fecañeno. Ofiracomo maredinona abi caitadino isoi omoi iñeno. Naisomo maredino abi caitadino isoi iñeno. Iena comini cioillena, dueredinomo rana marefodo fecacabidimaci. Cominimona naimaci iobillacino birui jai feiñotimaci. Jusifamui mona ico feiñoñeitimaci. <sup>3</sup> Dueredinomo rana omoi fecaia, jiaie cominimo iena lloñeno. <sup>4</sup> Iena bainino feca. Bainino iena omoi fecaia, Jusifamui iena uifñote. Naimiemona ibana feiñoñeitomoi. Omoína: “Mare” raite.

*Jesús Jusifamui jia rafue*  
(Lc 11.2-4)

<sup>5</sup> Jesús llote:

—Jusifamui omoi jiaia, maredinona abi caitadino isoi omoi iñeno. Ofiracomo naimacina comini cioillena, marefodo jiidimaci. Jicabilla facaiseconi naisomo naimaci ia, naimacina comini cioillena, marefodo jai jiidimaci. Naimacina: “Jusifamuina eo sedadimaci” comini raillana jitaidimaci. Cominimona iobillacinona birui jai feiñotimaci. <sup>6</sup> Omoi jiacania, omoi jofomo fo jai. Nainomo Jusifamui anado omoi jii. Iena Jusifamui uifñuamona, omoi jicaca rafue naimiemona feiñoñeitomoi.

<sup>7</sup> Jusifamui omoi jiaia, naimiena iinoñedino isoi jamaicinona ñaiñeno. Naimaci comecina facadimaci: “Daje jiracinona diga icaiño cai jia jira, ja muidomo cai Moo caina raise cacaité”. <sup>8</sup> Naimaci isoi iñeno. Nia omoi jicañenia, naimie omoi jitaill rafuena uifñote. <sup>9</sup> Naimiemo omoi jiacania, iese jii:

Ore Moo, monamo itio.

Comini ori iobidesa.

<sup>10</sup> O illaimana jira, nana cominina o anamo raire itata.

O jaienisai o jitaillacinona finua isoi, cominina o jitaillacinona finota.

<sup>11</sup> Nagarui guille caimo itata.

<sup>12</sup> Caina jeare jiaño finoia, iena caimona feilla isoi, cai jeacinona omona feilla jira, cai jeacinona oni dota.

<sup>13</sup> Caimo ramo bu faia, caina cano, iena cai #noi raillano. Jeacinona finuamona caina jillota. Iese omoi jii. <sup>14</sup> Omoina jiaie comini jeare finoia, iena omoi feitaia, omoi monamo ite Moo omoi jeacinona iena faitajanona, jiai oni dotaite; <sup>15</sup> iadedi jiaie comini finoca jeacinona omoi feitañenia, omoi Moo Jusiñamui omoi jeacinona feitañeite. Iena oni dotañeite.

*Jesús guiñenaruina llua rafue*

<sup>16</sup> Jesús llote:

—Omoina nia llofueiticue. Raitomoi: “Jusiñamuina eo raise cai sedajanona, birui cai guiñeiticai. Iemona naimie caina eo duenaite” raitomoi. Iese Jusiñamuina omoi sedajia, sunaiñeno, mareuidinona abi caitadino isoi. Sunaitimaci. Naimaci uieco finobicabiside. Naimaci guiñenarui facaise illana comini uifollena, naimacina comini cioillena, iese itimaci. Naimacina: “Mare” comini raillamona, iobillacinona birui jai feiñotimaci. Jusiñamuimona ico iena feiñoñeitimaci. <sup>17</sup> Ero, naimaci isoi omoi iñeno; iadedi omoi guiñenarui ia, omoi abiai raise fino. <sup>18</sup> Iemei cominidi omoi guiñenarui illana uifñoñeitimaci. Naimacimona iobillacinona feiñoñeitomoi. Dama Jusiñamui iena uifñoite. Bainino omoi finoca rafue naimie uifñua jira, naimiemona iba feiñoñeitomoi.

*Jesúsdi Jusiñamuimo comecina facaja rafue*

*(Lc 12.33-34)*

<sup>19</sup> Jesús llote:

—Omoi jofomo ailluena rana eenocana uifñeno. Gireco iena guicabite. Dajerie ra nemuide. Omoi jofomona jiaie comini iena fiacadimaci. Ailluena ra eenuamo omoi comeciaina facañeno; <sup>20</sup> iadedi Jusiñamui dine monamo omoi ra illa isoi, iemo omoi comeciaina faca. Naimiemo comeciaina cai facajamona, nainomo cai iobillacino iite. Girecuaimona, nemuillamona, firirainimona, iena nainomo faifiñeitomoi. <sup>21</sup> Aillue ra omoimo ia, Jusiñamuimo comeciaina facañedomoi; iadedi naimie jitaillacinona omoi finoia, naimiemo comeciaina facadomoi.

*Jesús cai comecina llua rafue*

*(Lc 11.34-36)*

<sup>22-23</sup> Jesús llote:

—Cai uisi diga rana ciodicai. Cai uisi marañenia, rana raise cioñedicai. Ie isoide. Cai comeci marañenia, marañedicinona finocana jaidicai. Jusiñamuina uifñoñedicai. Ie rafuena jiai uifñoñedicai. Naimiena nabaiñedicai.

*Jesús raruiaina llua rafue*

*(Lc 16.13)*

<sup>24</sup> Jesús llote:

—Mena patrones diga daruido buna jaca maijinide. Mena diga bu maijiacania, damiëna jiaimie baifemo gaiite. Ie gaiamie ocuica rana finoite. Jiaimie ocuica rana raise finoñeite. Ie isoide. Raruiaí ollemo comecina omoi eo facaia, Jusiñamui jitaillacinomo comecina raise facañeitomoi.

*Jesúsdi Jusiñamui cai sedajana llua rafue*

*(Lc 12.22-31)*

<sup>25</sup> Jesús llote:

—Jusiñamui jitaillacinomo omoi comecina facaia, omoi illamo omoi comecina jarire facañeitomoi. Bue omoi guillemo jarire comecina facañeno. Omoi jitalle iniroimo jarire comecina facañeno. Jusiñamui omoina itataja muidona, guille omoimo iite. Naimie omoi abi finua muidona, iniroidi omoimo iite. <sup>26</sup> Silliñaimo comecina faca. Buena riñedimaci. Nie isoide guillena eenoñedimaci; iadedi omoi Moo Jusiñamui naimacina sedajamona, naimaci guille iite. Naimaci baifemo omoi faia jira, naimie omoina canoite. <sup>27</sup> Omoimona, ¿bu ie comeci jarire facajamona a sairite? Iese jaca buna a sairifñede. Dama Jusiñamui omoina a sairitarede. <sup>28</sup> ¿Bue ñellena iniroimo jarire comecina facadomoi? Safiamo omoi comecina faca. ¿Niese sicodimaci? Maijiñedimaci. Iniroina tiforiñedimaci; <sup>29</sup> iadedi Salomón micori naimaci isoi jiaie iñede. Naimie illaimana jira, naimie micori iniroi eo ebirede; iadedi safia naimie iniroi baifemo ebire eruaide. <sup>30</sup> Jusiñamui safiana ebiretacabide. Dallu facaise illanona, safadi duide. Safia baifemo omoi uaila jira, Jusiñamuidi iniroina omoimo jaca iite. Safiana naimiedi ebiretaja muidona, omoimo iniroidi jaca iite. Omoi ra omoimo illena, naimiëna ino. <sup>31</sup> Omoi comeci jarire finoñeno. “¿Buena guiticaí? ¿Buena jitaiticaí?” raiñeno. Iemo comeciaina eo facañeno. <sup>32</sup> Jusiñamuina inoñedino iemo comecina facacabidimaci. Nana omoi jitaillacinona omoi Moodi uifñua jira, naimaci isoi iñeno. <sup>33</sup> Jusiñamui anamo raise omoi i. Naimie jitaillacinona finocana omoi jai. Naimiemo omoi comeci facaia, omoi illamo omoi comecina jarire facañeitomoi. Iemona guille omoimo iite. Iniroi omoimo iite.

<sup>34</sup> Jusiñamui omoi birui jitailla ra omoimo iite. Iena uiñuamona, jiairuido suille rafuemo jarire comecina facañeno. Ico omoi jitailla ra omoimo jai iite.

## 7

*Jesúdi jiaie cominina mameriñenana llua rafue*  
(Lc 6.37-38, 41-42)

<sup>1</sup> Jesús llote:

—Omoína nia llofueiacadicue. Jiaie cominina mameriñeno. Jiaie cominina omoi mamerilla, omoimo ite maraiñede rafue facaina Jusiñamui omoína duere finoite. <sup>2</sup> Jiaie cominina omoi mamerilla diese Jusiñamui omoína duere finoite. <sup>3</sup> Omoi ecimo itimiemo janore maraiñedicino illana omoi uiñoia, iemo comecina facañeno; iadedi omoimo ailluena ite maraiñedicinomo nano omoi comecina faca. <sup>4</sup> Omoimo maraiñedicino illamona, ¿niese omoi ecimo itimiema mameritomo? <sup>5</sup> Omoimo ite maraiñedicinomo omoi comecina facacañena jira, maredinona abi caitadinodomo. Omoi começaina nano raise fino. Iemei omoi ecimo itimiema canorenitomo. Naimie começina raise canorenitomo.

<sup>6</sup> 'Ero, eo mare rana omoi jiconiaimo fecañeno. Eo raifide rana omoi chanchuaimo fecañeno. Naimacimo omoi fecaiadedi, iena feiñoñeitimaci. Omoína gaiñenamona, jiconiaimo omoína ainitimaci. Chanchuai iena jamaillamona, iena saitaítimaci. Ie isoide. Damierie Jusiñamui uaina uaitacabitimaci. Iena naimaci jaca feiñoñena jira, naie rafue naimacimo llocabiñeno. Naimacimo omoi llocabia, omoína duere finoítimaci. Omoi rafuena jamaítimaci.

*Jesúdi cai jitailla ra jicaja llua rafue*  
(Lc 6.31; 11.9-13)

<sup>7-8</sup> Jesús llote:

—Daje ra omoi faifia, iena jenodomo. Raise jenoia, iena baitomo. Damiena omoi jenoia, naimie illanomo jaidomo. Nainomo naimiema baillamona, omoína feiñoite. Ie isoide. Buena omoi jitaia, Jusiñamuimo jica. Iena omoi jicaja jira, iena naimie cacajamona, omoimo iite. <sup>9</sup> Ero, omoimona naimiemo llomeniconia ie moomo ie jito jicaia, noficina fecañede. <sup>10</sup> Lliciaina jicaia, jaiona fecañede. <sup>11</sup> Jeacinona finocabidomo; iadedi mare ra omoi uruiaimo fecacabillana uiñotomo. Cai Moo Jusiñamuidi jaca mareuidimie. Cai baifemo naimie faite. Ie muidona naimiemo jicanotinomo mare rana fecaite.

<sup>12</sup> Jusiñamui jitaillacinona omoi finuamona, jiaie cominina marena fino. Jiaie comini omoína finuana omoi jitailla isoi, naimacina fino. Naimaci omoína marena finuana omoi jitaia, naimacina marena fino. Naimaci omoína maraiñeno finuana omoi jitaia, naimacina ie isoi maraiñeno fino. Moisés micori ie isoidicinona jaiie llofue. Jusiñamui facaina lloraini micorai ie isoidicinona jaiie jaii llofuetimaci.

*Jesúdi Jusiñamui dine rille llua rafue*  
(Lc 13.24)

<sup>13-14</sup> Jesús llote:

—Jusiñamui dine omoi rillena, janorede naisodo omoi jailla isoi isoilla. Naisomo ite nasedi janorede isoide. Naimie dine naie rilla jira, naiedo omoi jai. Nainomo jaidino jaca iítimaci. Naimie dine rillena eo sefuirena jira, janore comini naiedo jaidimaci. Jiaie naiso ite. Naie naisodi aillue. Naie naisomo ite nasedi jai aillue. Naiedo jaidino faifitimaci. Jusiñamui dine riñeitimaci. Sefuinina jira, ailluena comini naiedo jai jaidimaci.

*Jesúdi abi caitadinomona abi rairuillana llua rafue*  
(Lc 6.43-44)

<sup>15</sup> Jesús llote:

—Jusiñamui facaina llorainina abi caitadinomona abina rairui. Mare lloraini isoi bitimaci; iadedi Jusiñamui rafuedo omoi raise jaiñellena, omoína jifueiacadimaci. Naimaci llofuaciado omoi jai, Jusiñamui rafuedo raise jaiñeitomo. <sup>16</sup> Naimaci lloga rafuemonona naimaci Jusiñamui llorainiñenana uiñoitomo. Ero, eecuaimona uvas railla riar oñega. Eecuaimona higos railla riar jai oñega. <sup>17</sup> Mare riaromona mare llisilla comuide. Maraiñede riaromona maraiñede llisilla comuide. <sup>18</sup> Mare riaromona maraiñede llisilla comuiñede. Maraiñede riaromona mare llisilla comuiñede. <sup>19</sup> Mare llisilla comuitañena jira, naga maraiñede riar jaitaca, iena jobaillena. <sup>20</sup> Ie isoide. Naimaci finoca rafuemonona ie isoide lloraini naimacina uiñoitomo. Jusiñamui llorainidena uiñoitomo. Jusiñamui lloraiñedinodena uiñoitomo. Naimaci maraiñena jira, Jusiñamui naimacina duere finoite.

*Jesúdi ie Moo ie comini sedajanomo ille llua rafue*  
(Lc 13.25-27)

<sup>21</sup> Jesús llote:

—Naga cuemo: “Odi cue Namadio” raitimiedi Jusiñamui ie cominina sedajanomo iñeite; iadedi dama cue Moo jitaille rafue finodimiedi nainomo iite. <sup>22</sup> Cominimo juez isoi Jusiñamui ico llua facaiseconi, diga cominidi cuemo lloitimaci: “Nama, caina o oretatio cai raillamona, o rafuena llocabiticai. O uaido jananiaina oni oredicai. O uai diga siño rafuena finodicai” lloitimaci. <sup>23</sup> Uai oiticue: “Omoina uifioñedicue. Cue cominiñedomoi. Jecino omoi cocomimo nia illa jira, cuemona oni omoi jai. Cue Moo ie comini sedajanomo jaca iñeitomoi”.

*Jesúdi naimiena inuana ñaia rafue*  
(Lc 6.47-49; Mr 1.22)

<sup>24</sup> Jesús llote:

—Cue lluaana cacadomoi; iadedi omoimona nana inoñedomoi. Cue lluaana inotimiedi abi uifioñemie. Jofona raise finodimie isoide. Jofona raise finodimiedi ie jofona finodemo, jofona goñellena, nofici illa dinori eo ana raite. <sup>25</sup> Noci deidemo, eo jinuidemo, jofomo ille toia, aifi bitemo, jofu raise finua jira, jofu goñede. Iena faifioñede. Ie isoide. Cue lluaana inotimie faifioñeite. <sup>26</sup> Cue lluaana inoñedimiedi abi uifioñedimie. Jofona raise finoñedimie isoide. Jofona raise finoñedimiedi ie jofona finodemo, conillie emodomo iena finode. Ana raifñede. <sup>27</sup> Noci deidemo, eo jinuidemo, jofomo ille toia, aifi bitemo, jofu goillamona, jai eo judaisite. Iena faifide. Ie isoide. Cue lluaana inoñedimie faifite —llote.

<sup>28-29</sup> Moisés micori rafue uifioraini isoi naimie llofueñena jira, illaimamo ite uai itimie isoi naimie llofuia jira, nainomo ite cominidi naimie luari rajjicadimaci.

## 8

*Jesúdi efonaitimiena jillotaja rafue*  
(Mr 1.40-45; Lc 5.12-16)

<sup>1</sup> Naimie llofuia mei, anedumona Jesús ie llofueoicaigano diga ana bite. Ailluena comini naimiena racadimaci. <sup>2</sup> Efonaitimie naimie dine billanona, naimiena raise uaiduamona, caiñici ifodo ana rainadate. Raite:

—Maestro, o jitaadedi, cuena jillotaredio.

<sup>3</sup> Jesús ie onolli naimiemo oni ñuitajanona, naimiena jetade. Raite:

—Ona jillotaiacadicue. Mai o jillo. —Iecon naimie jillode. <sup>4</sup> Jesús naimiemo llote:

—O jilluana bummo lloñeno; iadedi Jerusalémo, Jusiñamui jofomo, Jusiñamui diga ñairaima dine mai jai. O jilluana comini raise uifioñella, naimiemo o abina acatajai. Moisés micori jaiie lloga rana Jusiñamuimo fecu. —Iemei Jesús oni jaide.

*Jesúdi capitán mullaimana jillotaja rafue*  
(Lc 7.1-10)

<sup>5</sup> Capernaum railla nairaimo Jesús ria, capitán raillamie naimie dine bite. Naie capitán Roma railla nairai imie. Judíuñedimie. Billanona, duere llote:

<sup>6</sup> —Maestro, cuena cano. Cue jofomo cue mullaima ite. Ie abina niraídanide. Naimie abi eo isirede. Naimiena jillota.

<sup>7</sup> Jesús uai ote:

—Naimie dine jaiticue, naimiena cue jilloitallena.

<sup>8</sup> Naie capitán dane llote:

—Jaiñeno. Jamai bue isoidicue. Iemo, ¿niese cue jofomo biitio? O uaido bene lluaana cue mullaima jilloite. <sup>9</sup> Jiaie illaicomini anamo iticue. Naimaci lloga uaina inoticue. Cue anamo jiaie soldaduai illanona, cue uaina inotimaci. Cue anamo cue mullaima illa jira, naimiedi cue uaina inote. O anamo naie duico illa jira, o uaina o lloia, cue mullaima jilloite.

<sup>10</sup> Iena cacajanona, Jesús rajjicaide. Naimie diga jaidinomo llote:

—Bie isoi cue uaina inotimiena jaca baiñedicue. Cai judíuai cominimona biesedimiena jaca iñede. <sup>11</sup> Ero, Jusiñamui ie cominina sedajanomo naimaci illena, diga judíuaiñedino cue llua uaina inoitimaci. Naga nairaiaimona inoitimaci. Jusiñamui cominina Abraham micori, Isaac micori, Jacob micori illamona, naimaci diga Jusiñamui ie cominina sedajanomo bie judíuaiñedino iitimaci. Nainomo caimare nabaitimaci. <sup>12</sup> Ailluena judíuaiñedino inoitimaci. Jusiñamui ie cominina sedajanomo duillanodi omoi judíuai. Naimiena omoi inoñena jira, omoina oni dotaite. Dotaja mei, eo duere sefuillamona eitomoi.

<sup>13</sup> Capitámo Jesús llote:

—Mai jai. Cue uai siñonana o inua jira, o jitailla rafue omoi jai suide. —Iecon naimie mullaima jillode.

*Jesús Pedro jifaiñona jillotaja rafue*  
(Mr 1.29-31; Lc 4.38-39)

<sup>14</sup> Oni jaillanona, Pedro jofomo Jesús ridemo, Pedro jifaiño duillana ciode. Naiñaiño abi cuaride. <sup>15</sup> Naiñaiño dine jaillanona, naiñaiñoña jetade. Jetajamona ieconí naiñaiño jillode. Abi cuariñede. Naiñaiño naidacaillanona, guille finuanona, ie jofomo itinona ecade.

*Jesús: ailluena duidinona jillotaja rafue*  
(Mr 1.32-34; Lc 4.40-41)

<sup>16</sup> Naie naiona naimie dine comini ailluena jananiai anamo itinona atidimaci. Ie uaido naimiedi jananiaina oni oretate. Nana atica duidinona jiai jillotate. <sup>17</sup> Naimacina Jesús jillotajamona, Isaías micori jaiie cuegafuiai iese jai suide. Naimie micori jaiie cuega: “Caina jilloitajanona, cai duicono oni oretate”.

*Jesús ie llofuegamiena damie jaillana ie rafue*  
(Lc 9.57-62)

<sup>18</sup> Ailluena comini naimie ecimo illana Jesús cuanona, ie llofueoicaiganomo ruica dine jaillena llote. <sup>19</sup> Ieconí Moisés micori rafue llofueraima naimie dine billanona, llote:

—Maestro, o jaillinomo o diga jaiacadicue. O llofuegamiena jaiacadicue.

<sup>20</sup> Jesús uai ote:

—Janorede ocainaiaidi joforedimaci. Silliñiai jillainiairedimaci; iadedi jofonidicue. Monamona billanona, imana jaidicue; iadedi buenidicue. Jofonidicue. Cue diga o jaiacania, bue isoidena cuemona oñeitio. Iemo o comequina raise faca.

<sup>21</sup> Ie facaise jiaie llofuegamie Jesúsno llote:

—O diga jaiticue; ia cue moo nia fiodiañena jira, o diga nia jaiñeiticue.

<sup>22</sup> Jesús naimie uai ote:

—Cue diga idai mai bi. Cuena inoñedinodi o moona canoredimaci. Naimie fiodaia, naimiena naimaci raille. Cue rafue jiaie rafue baifemo faite. Cue diga mai bi.

*Jesús: joraina llucaitaja rafue*  
(Mr 4.35-41; Lc 8.22-25)

<sup>23</sup> Naie llofuegamie diga Jesús ñaia mei, ruica dine jaillena, botemo jaide. Ie llofueoicaigano jiai jaidimaci. <sup>24</sup> Botemo jailla mei, Jesús inide. Bai jorai motomo jaidimacimo, eo riire aifi billamona, joraidi eo bagode. Baguamona botemo jinui a uaide. Bote oruiacana jira, <sup>25</sup> jaciruillamona, Jesúsna casitatimaci. Raitimaci:

—Maestro, caina cano. Jai buisaidicai. Jai corobaisaidicai.

<sup>26</sup> Jesús uai ote:

—¿Bue fiellena jacinaitomoi? Cuena raise inoñedomoi. Jacinañeno.

Iemei Jesús naidacaillano, aifina lletade. Joraina jiai llucaitade. Ieconí llucaide. Bagoñede. <sup>27</sup> Naimie llofueoicaigano iemona rajjicaidimaci. Iemona raitimaci:

—Bimiedi, ¿nie isoidimie? Aifi naimie uaina inote. Jorai naimie uaina jiai inote.

Bai jaillanona, ruica dine ridimaci.

*Jesús: Gadara railla eniruemo illa rafue*  
(Mr 5.1-20; Lc 8.26-39)

<sup>28</sup> Ruica dine naimaci ridemo, Gadara railla eniruemo sijidimaci. Ieconí menamie Jesús dine bitiaimaiai. Jananiai anamo ite iaimaiai. Comini raioillanomo nofie moto ifuaimona bitiaimaiai. Nai iaimaiai eo riirena jira, jaca bu nainomo jainide. <sup>29</sup> Jesúsna iaimaiai ciua facaise jananiai iaimaiaina cuiroitate:

—Jusiñamui Jitodio. ¿Niese cocona nibaiacadio? Coco duere sefuelle facaise nia iñede; iadedi birui cocona duere finuaibidio —cuiroidiaimaiai.

<sup>30</sup> Naie bai iaie ailluena chanchuai guillano itimaci. <sup>31</sup> Jananiai Jesúsno duere llotimaci:

—Oni caina o oretajanona, chanchuai abimo caina oreta.

<sup>32</sup> Jesús uai ote:

—Mai jai.

Ieconí nai iaimaiaimona jananiai oni jaillanona, chanchuai abimo jaide. Iemona iconaido chanchuai joraimo aisicana jaillanona, corobaiside.

<sup>33</sup> Iena cuanona, chanchuai sedaraini imaci nairai dine aisicana jaidimaci. Nana naie rafuena llotimaci. Jaive jananiai anamo illa iaimaiai rafuena llotimaci. <sup>34</sup> Ie jira ailluena comini Jesús dine bitimaci. Naimiena cuano, naimiemo duere llotimaci, naimaci illanomona naimie jaillena. Naimaci jitailla jira, Jesús oni jaide.

## 9

*Jesús tisitaitimiena jillotaja rafue*  
(Mr 2.1-12; Lc 5.17-26)

<sup>1</sup> Botemo ie llofueoicaigano diga Jesús jaillano, ruica dine abido jaide. Capernaumo ie illanomo ride. <sup>2</sup> Nainomo rilla mei, naimie dine comini ie biiramo biide tisitaitimiena atide.

Naimiēna atidinodi Jesús naimiēna jillotajana ñnote. Iēna Jesús uifuanona, tisitaitimiemo llote:

—Moo, o comecina ocuifño. O jeacino cue feitaja jira, iēna jai oni dotadicue. Ie facai ñbana jai ofeiticue.

<sup>3</sup> Jesús dine ofidinomona dajerie Moisés micori llogacinona llofuerañi itimaci. Jesús lluaña naimaci cacajano, Moisés micori llogacinona llofuerañi comecina facadimaci: “Dama Jusifñamui jeacina dotarede. Bimie Jusifñamuiñede; ia Jusifñamui ifomo iacade. Jusifñamuina jai jeare ñaite”. <sup>4</sup> Naimaci começiaña facajacinona Jesús uifuanona, Jesús ñina jicanote:

—¿Bue ñellena omoi comecina jeare facadomoi? <sup>5</sup> Bimiemo: “O jeacina jai oni dotadicue” cue lloia, cue uai siñonana uifñoñeitomoi; ia bimiemo: “Mai naidacaillana macari” cue lloia, cue uai siñonana uifñoitomoi. <sup>6</sup> Monamona jaie cue billanona, ñmana jaidicue. Ie jira jeacino oni dotaja uai cuemo ite. Iēna omoi uifñollena, tisitaitimiemo lloiticue: “Mai naidacai. O ñira ferianona, o jofomo mai jai”.

<sup>7</sup> Iese naimie raillamona, tisitaitimie jillode. Naidacaida, ie jofomo jaide. <sup>8</sup> Comini iēna cianona, jacinaitimaci. Bimiemo ie uaina Jusifñamui fecajana naimaci uifuanona, Jusifñamuimo iobillacina fecadimaci.

*Jesúdi Mateona fetua rafue*

*(Mr 2.13-17; Lc 5.27-32)*

<sup>9</sup> Jesús bai macaritemo, cuēna ucubena oranomo cue raillana ciode. Mateodicue. Gobierno ucube orañmadicue. Jesús cuemo llote:

—Cue llofuegamieña o jaillena, cue diga bi.

Naidacaida, naimie diga jaidicue.

<sup>10</sup> Naillie cue jofomo Jesús ie llofueoicaigano diga guite. Diga gobierno ucube orañi jiaie guisaibitimaci. Diga Moisés micori llogacinodo jaiñedino jiaie guisaibitimaci. <sup>11</sup> Nainomo fariseuai comini jamai bitimaci. Moisés micori llogacinodo eo jaidimaci. Jesúsna cianona, naimie llofueoicaiganomo jicanotimaci:

—¿Bue ñellena omoi maestro ucube orañi diga guite? Marañede comini diga naimie guite.

Moisés micori llogacinodo ucube orañi raise jaiñenamona, ñaie isoidino diga, fariseuai comini nabairiñena jira, iese jicanotimaci.

<sup>12</sup> Iēna cacajano, Jesús llote:

—Ecairedinodi médicona jitañedimaci; ia ñuidinodi médicona jitañedimaci. Ie isoide. Mareuidino cuēna jitañedimaci; ia marañedino cuēna jitañedimaci. <sup>13</sup> Jusifñamui facaina lloñaima micori jaie cuela rafuemo omoi começiaña faca: “Jusifñamui llote: ‘Rana cuemo omoi fecajana jitañedimaci; ia comina omoi ñueruillana jiaie jitañedimaci’ llote”. Comina cue ñueruilla jira, Jusifñamui ñibeimo naimaci illena, mareuidinona itatajañedimaci; iadedi Jusifñamui ñibeimo naimaci illena, marañedina itatajañedimaci. Omoimona marañedino diga nabairiticue; ia naimacina uañedimaci.

*Jesús ñine Juan Bautista llofueoicaigano billa rafue*

*(Mr 2.18-22; Lc 5.33-39)*

<sup>14</sup> Naie facañe Juan Bautista llofueoicaiganodi Jesús ñine bite. Naimiemo llote:

—Cai einamaci llua isoi, Jusifñamuina cai raise iobitallena, guifñenaruillai illa facañeseñi guifñedimaci. Cai jeacino facañe sunañabiticai. Fariseuai comini jiaie guifñedimaci; iadedi o llofueoicaigano guifñedimaci. Cai einamaci llogacinodo jaidicai. ¿Bue ñellena o llofueoicaigano iedo jaiñedimaci?

<sup>15</sup> Jesús uai ote:

—Jiaie rafuēdo iēna lloiticue. Coniruedi ie aña uarui ia, iobilla jira, ie nabairiñai sunañedimaci. Iobillamona guifñedimaci. Jiairuido jai aireiacade conirue naimaci diga ñena, naimaci começ sunañellamona, naimaci jitaie, guifñenaruillai ñite. Ie isoide. Cue comini diga birui cue illa jira, iocire itimaci. Ico cue jaille me, sunañedimaci. Ie muidona birui cue llofueoicaigano guifñedimaci. <sup>16</sup> Jiaie rafuēdo iēna lloiticue. Nia jocoñega comue ñinoroi; jacaie ñinoroi jillifñega. Jillaie, jocaie me, comue ñinoroi jacaie ñinoroi fo llirite. Eo fodo cuararite. Jai marañeno cioite. <sup>17</sup> Jacagomona finoca bolsa como finoca vino joneñega. Jonegadana, marañena jira, sirillamona, igoi raie cuararite. Vino faifite. Igoi jiaie faifite. Como finoca vino comogomo jonelle. Iemei iēna faifiteite. Ie isoide. Omoi einamaci rafue ifomo jiaie rafue birui ite. Iēna omoimo llocabiticue. Iedo jaidicai —llote.

*Jesúdi mena ñine ñona jillotaja rafue*

*(Mr 5.21-43; Lc 8.40-56)*

<sup>18</sup> Juan Bautista llofueoicaigano diga Jesús llotemo, jiaimie naimie ñine bite. Naimiedi judiñai ofiraco sedaraima. Jesúsna ñue ñicanollena, cañiñi ifodo rainadacaida llote:

—Cue jisa como fiodaite. O onolli naiñaiño como o jonellesa, naiñaiño jilloillesa, cue jofomo cue diga mai bi.

<sup>19</sup> Iena cacajano, Jesús naimie diga jaide. Ie llofueoicaigano jiaí jaidimaci. <sup>20</sup> Bai jaillanona, duidiñaiño jinafona jaide. Naimie iniroina jetallena, naimie dine bite. Ie jeraimona doce años jaca diaide. Billanona naimie iniroina jetade. <sup>21</sup> “Naimie iniroi cue jetajamona jilloiticue” comecina facajamona, naiñaiño naimie iniroina jetade. <sup>22</sup> Ieconí Jesús dobaidacaida, abido erodatemo, naiñaiñoña ciode. Raite:

—Ñoo, o comecina ocuiño. Cuen a inua jira, jai jillodio.

Ieconí naiñaiño jillode.

<sup>23</sup> Ofiraco sedaraíma jofomo Jesús rillano, naie jofa nama jisa jai fiodailla jira, comini merire fillana cacade. Ailluena failliñaiñana cacade. <sup>24</sup> Jesús dinena raite:

—Jofomona nana omoi jino jaillana jitaidicue. Cuemona biñaiño fiodañedes. Jamai inide.

Iena cacajano, naiñaiño jai fiodaite uiñuamona, Jesúsri jaisitimaci. <sup>25</sup> Comini jino oretaja mei, naiñaiño onollina naimie linuano, fiodaillamona naiñaiño jillode. Jillua mei, naiñaiñodi naidacaide. <sup>26</sup> Naie rafue nana naie enirue itinomo llocana jaide.

*Jesúdi uisínide iaímaiaína jillotaja rafue*

<sup>27</sup> Ofiraco sedaraíma jofomona Jesús bai jaidemo, uisínide iaímaiaí naimie jinafona jaidiaímaiaí. Jesúna ado uaidotiímaiaiaí:

—Cai illaíma David micorí jítodio. Jusiñamuimona o billa jira, cocona duenai.

<sup>28</sup> Uai oñeno Jesús Capernaumo jaide. Naimie fo jailla mei, naimie dine bitiaímaiaiaí. Iaímaiaímo Jesús jicanote:

—¿Omicona cue jillotajana inotómico?

Fairiotiaímaiaiaí:

—Jii.

<sup>29</sup> Iaímaiaí uisína Jesús jetajano raite:

—Cuen a omico inua diese jilloitómico.

<sup>30</sup> Ieconí iaímaiaí uisidi ciode. Jesús naie rafuena lluaña eo janotade.

—Bumo lloñeno —lote; <sup>31</sup> iadedi iena llocana jaidiaímaiaiaí. Iemona Jesús mameci nana naie eniruemo itinomo soride.

*Jesús ñañedimiena jillotaja rafue*

<sup>32</sup> Capernaumona Jesús bai jaidemo, naimie dine Janaba anamo illamiña jiaie comini atidimaci. Janaba anamo naimie illa jira, naimie ñañide. <sup>33</sup> Jesús Janabana oni orede. Oretaja mei, naie iima ñaite. Nainomo ite comini rajicaiñanona raitimaci:

—Cai comini dine bie isoide iima jilluaña jaca cioñedicaí.

<sup>34</sup> Ie jira fariseuai comini dinena raitimaci:

—Taife dibeimo Janaba illamona, Jesúdi Taife uaido Janabana oni orede —raitimaci.

*Jesúdi cominina duenailla rafue*

<sup>35</sup> Diga nairaímaie ie llofueoicaigano diga Jesús llocana jaide. Nainomo judíuai ofiracuáimo llofueuide. Naimie anamo comini illana Jusiñamui jitailla jira, Jesúdi Jusiñamui dibeimo naimaci comeciaí iuaina meiduana llofuetete. Ailluena duidinona jillotate. Naga isoide duicomona jillotate. <sup>36</sup> Naimacina duenaite. Naimaci comeciaí iticino oni duíñoitimie iñena jira, naimacina duenaite. Ailluena cominina ciode. Toica lladaiaí isoí ebe isoí jaidimaci. Naimaci comeciaí ocuiñonidimaci. Jusiñamui naimacina sedaacana uiñoñedimaci. <sup>37</sup> Naimacina duenaillamona, ie llofueoicaiganomo lote:

—Illimo ailluena trigo ia, iena ollena, ailluena maijirañina jitailla. Ie isoide. Ailluena comini ite naimacimo Jusiñamui rafuena cai lollena; iadedi naie rafuena lloraini eo iñedimaci. <sup>38</sup> Ie rafue naimaci lollena, ailluena cominina raie naimie oretallena Jusiñamuimo jicano.

## 10

*Jesúdi ie doce llofueoicaiganona fetua rafue*

(Mr 3.13-19; Lc 6.12-16)

<sup>1</sup> Ie doce llofueoicaiganona Jesús uaiduanona, naimacimo ie uai iñonocaide, jananiaí anamona cominina jilloitallena. Duicon a oni oretallena, iena jiaí iñonocaide. <sup>2</sup> Ie llofueoicaiganodi iese mamecidimaci: Simón. Naimie mameci jiaicidi Pedro. Andrés. Naimiedi Simón ama. Jacobo. Juan. Iaímaiaí Zebedeo jito iaímaiaí. <sup>3</sup> Felipe. Bartolomé. Tomás. Cuen a jiaí uaidote. Mateodicue. Gobierno ucubena oraímadicue. Jiaie Jacobo. Naimiedi Alfeo jito. Tadeo. <sup>4</sup> Jiaie Simón. Naimiedi cananista comini facaisemo duide. Judas Iscariote micorí. Naimiedi Jesúna gaítatate.



*Jesúdi ie llofueoicaiganona oretaja rafue*  
(Mr 6.7-13; Lc 9.1-6)

<sup>5</sup> Jesús ie llofueoicaiganona oni oretajanona, raite:

—Judúaiñedino dine jaiñeno. Samaritano railla comini dine jaiñeno; <sup>6</sup> ia cai judúai comini dine jai. Naimacimona ailluena comini Jusiñamui rafuena nia ñnoñedimaci. Faificana nia jaidimaci. <sup>7</sup> Omoi jaillanona, cominimo llono: “Jusiñamui facaina jaie lloraini micoriai llogamie jai bene ite. Naimie anamo omoi illana Jusiñamui jitailla jira, naimie dibeimo omoi comeciai iuaina meido”. <sup>8</sup> Duidinona jillota. Fiodaitinona jillota. Efonaitinona jillota. Jananiaina oni oreta. Cue uaina jamai omoi feiñua jira, cominina jilloitajana ibatañeno. <sup>9</sup> Ucubena uiñeno. Guille ifo meidollena, rana uiñeno. <sup>10</sup> Ailluena rana omoi uiñellena, bolsana uiñeno. Abi meidolle iniroina uiñeno. Meidolle zapatona uiñeno. Omoi abi riidollena, jiguidana uiñeno. Jiaie cominina omoi canua isoi, omoina naimaci canua. Naimacimona omoi jitailla rana omoi ono. Ie jira ailluena rana uiñeno. <sup>11</sup> Nie nairaimo omoi ria, omoi rafuena jitaidimena jeno, naimie jofomo omoi illena. Naie jofomo omoi i, naie nairaimo omoi ille dinori. <sup>12</sup> Naie jofomo omoi rillanona, naie cominina marena uaido. <sup>13</sup> Omoina naimaci raise feiñoia, naimaci uri illena, naimacimo marecinona llono; iadedi omoi rafuena naimaci jitañenia: “Jusiñamui omoina canoite” naimacimo lloñeno. <sup>14</sup> Omoina bu feiñoiacañenia, omoi uaina bu cacarefiacañenia, naie nairaimona omoi jaillanona, omoi eilliamio ite jearacuaina jaidino. Maraiñede rafuena naimaci finuana naimaci uiñollena, omoi eilliaina jaidino. <sup>15</sup> Omoimo uanaicinona lloticue. Omoina naimaci feiñoñenia, Jusiñamuidi naimacina duere finoite. Sodoma railla nairai jaie jeacinona eo finodimaci. Gomorra railla nairai jaie jeacinona eo finodimaci. Ie jira Jusiñamui naimacina jaie duere finode. Omoina comini birui feiñoñenia, Jusiñamuidi naimacina Sodoma nairai baifemo duere finoite. Gomorra nairai baifemo duere finoite.

*Jesús duere sefuillfuenta llua rafue*

<sup>16</sup> Jesús ie llofueoicaiganomo nia llote:

—Naimacina janallari fañellena, naimaci duere sefuñellena, toica llaudaijai raise sedajana jitaidimaci. Ie isoide. Eo maraiñede comini motomo omoina oretaiticue. Omoina duere finoacanitimaci. Raise sedajana jitaidomoi. Jaiio fiodaiñellena, aiside. Naimiena bu meineñellena, ie abina eenollena, jaiio aiside. Ie isoi omoi abi uiñocana omoi jai. Ucugidi buena jeare finoñede. Ie isoi omoi illa. Jeacino finuamona eneno omoi i. <sup>17</sup> Abina rairui. Dajerie omoina llogidoitimaci. Omoina gaitaja mei, naimaci ofiracomio omoina faitimaci. <sup>18</sup> Cue rafue omoi llua muidona, omoina gaitajanona, illaicomini dine omoina uitimaci. Omoina llogidoitinomo cue rafuena lloitomoi. Naie illaicominimo iena jiaie lloitomoi. <sup>19</sup> Naie illaicomini dine omoi ia, omoi riidollicinomo omoi comeciaina jarire facañeno. Naie facaise omoi ñaillicinona uiñoitomoi. <sup>20</sup> Dani omoi comeciai icinodo ñaiñeitomoi; ia Jusiñamui Joreño uaido ñaitomoi. <sup>21</sup> Cuen a ñnotomoi; ia ailluena cuena ñnoñeitimaci. Cuen a omoi ñnua jira, omoina enoitimaci. Iemona dajerie ie amana meinetalena, naimiena llogidoite. Dajerie moodi ie uruena meinetalena, naimiena llogidoite. Dajerie uruiaidi naimaci moona, naimaci aina meinetalena, naimacina llogidoitimaci. <sup>22</sup> Cue muidona ailluena comini omoina enoitimaci; iadedi cue uaina fainonocañedimie cue Moo diga monamo ja muidomo jaca iite. Naimiena jillotaiticue. <sup>23</sup> Cue rafue naimaci jitañenamona, omoina nie nairai duere finoia, dinomona cue rafuena llollena, jiaie nairaimo raire jai. Cue rafuena omoi llollena, diga judúai illanuaimo nia jaitomoi. Nana naie comini nia ñnoñenia, Jusiñamui dinena dane abido biiticue. <sup>24</sup> Ero, ie llofueraima duere sefuia, ie llofuegamie daje isoi duere sefuite. Ie eci illamie duere sefuia, ie mullaíma daje isoi duere sefuite. <sup>25</sup> Ie isoide. Cue cominina omoi jaillamona, cue duere sefuia, jiaie duere sefuitomoi. Taife mameci jiaici llinuanona, “Beelzebúdi” jiaino cuena raitimaci. Iese cuena naimaci jeare ñaia jira, cue cominina omoi illa jira, omoina jiaie jeare ñaitimaci.

*Jesúdi jaciruiñeno llofuia rafue*  
(Lc 12.2-9)

<sup>26</sup> Jesús nia llote:

—Cuen a ñnoñedino omoina jeare ñaitimaci; ia nana cue rafuena llocana omoi jailla jira, naimacina jaciruiñeno. <sup>27</sup> Omoimo rafuena anado jai lloticue. Iena nana cominimo marefodo llono. Ado llono. <sup>28</sup> Omoi abina meineredimaci; ia omoi joreñoña meineredimaci. Omoina naimaci meinea, omoi joreño Jusiñamui dine jaite. Iena uiñuamona, omoi meinea-cadinona jaciruiñeno. Cue rafuedo omoi raise jaiñenia, Jusiñamuina jacirui. Naimiedi omoi abina, omoi joreño diga, iraimo dotarede. <sup>29</sup> Omoina duere finoacadinona jaciruiñeno. Ero mena janorede sillina fecadomoina, eo janore ibaca; iadedi cai Moo Jusiñamui jitañenia, naimacimona daje fiodaiñede. <sup>30</sup> Ero, niga ifotirai omoimo illana Jusiñamui uiñote.

<sup>31</sup> Naimiedi omoína sedajana jiai uiñote. Silliñiai baifemo Jusiñamui isirugaomoi. Omoi duere finoacadinona jaciruiñeno. Jusiñamui jitañenia, omoímo jaca buena suñeite.

*Jesús naimiena janoñenana llofuia rafue*  
(Lc 12.8-9)

<sup>32</sup> Ie llofueoicaiganomo Jesús nia llote:

—Cue rafuena omoi llumona, jiaíno omoína duere finoitimaci. Cuen a birui omoi janoñenia, nana comini Jusiñamui uicomo ico ia, nainomo omoína janoñeiticue. “Cue cominidomoi” omoína raiticue. <sup>33</sup> Cuen a birui omoi janoía, nana comini Jusiñamui uicomo ico ia, nainomo omoína janoñeiticue. “Cue cominiñedomoi” omoína raiticue.

*Jesús muidona nana comini uri iñena rafue*  
(Lc 12.51-53; 14.26-27)

<sup>34</sup> Ie llofueoicaiganomo Jesús nia llote:

—Nana cominina uri itatallena enruemo biñedicue. Cuen a ñnoñedinodi cuena ñnotinona enoitimaci. Enoillamona cuena ñnotinona duere finoitimaci. <sup>35</sup> Cue lloga rafuena damierie ñnua muidona, ie moo illa ñibeimo ie jito iñeite. Ie ei illa ñibeimo naiñaiño jisa iñeite. Ie jifaiño illa ñibeimo naiñaiño mio iñeite. Iese cominina uri itatañedicue. <sup>36</sup> Omoi comini coninina enoitomoi. Iemona duere sefuitomoi. <sup>37</sup> Ero, ie moon a cue baifemo bu isirua, ie eina cue baifemo bu isirua, cue jitailla ra naimie finoacaiñena jira, cuemo raise ñuñede. Ie uruiái cue baifemo bu isirua, cuemo raise ñuñede. <sup>38</sup> Cue facaina bu fodiaacaiñenia, cuemo raise ñuñede. Naimiedi cue comini naimiena lloiacaiñedicue. <sup>39</sup> Cue facaina fodiaacaiñedimie ja muidomo faifite. Cue diga jaca iñeite; iadedi cue facaina fodiañimie monamo cue diga jaca iite.

*Jesús Jusiñamuimona ibana feñua llua rafue*  
(Mr 9.41)

<sup>40</sup> Jesús llote:

—Cue rafuena omoi llocana jiaia, diga jofuemo riitomoi. Cue cominina omoi illamona, omoína feñotino cuena jiai feñotimaci. Omoína bu feñoía, cuane jiai feñote. Cuen a feñotimiedi cuena oretatimiena jiai feñote. <sup>41</sup> Naimie cue comini illamona, damierie Jusiñamui facaina lloaímana feñoitimaci. Jusiñamui facaina lloaímana bu feñoía, Jusiñamuimona ibana feñote, naie lloaíma Jusiñamuimona feñua isoi. Cue jitaillacinona finodinona bu feñoía, naimaci Jusiñamuimona feñua isoi, Jusiñamuimona ibana feñote. <sup>42</sup> Cue ñibeimo itinona bu janore canoía, Jusiñamuimona ibana feñote. Naimacimo ñibai jamai jinuina fecade; iadedi naimacina canuamona, Jusiñamuimona ibana feñote —llote. Iemei Jesús ie llofueoicaiganona, ie rafuena lllena, orede.

## 11

*Jesús dine Juan Bautista micori ie llofueoicaiganona oretaja rafue*  
(Lc 7.18-35)

<sup>1</sup> Ie doce llofueoicaiganona Jesús oretaja mei, iairei ite comini illanuaimo naimiedi ie rafuena llocana jaide.

<sup>2</sup> Ie facaiseconi cárcelmo Juan Bautista micori Jesús finoca rafuena fidiano, iena raise uiñollena, Jesús dine ie llofueoicaiganona orede. <sup>3</sup> Jesús mo llotimaci:

—Juan Bautistamona biticai. Jofue iñenanomo navui naimie ia, “Jusiñamuimona damie biite” naimie llofuecabite. Juan llofuegamiena o illana uiñoacadicai. Imieñediodena, jiaimie billemo nia ocuridicai.

<sup>4</sup> Jesús uai ote:

—Cue lluaana cacadomoi. Cue finoca rafuena ciodomoi. Juan dine abido omoi jaillanona, iena naimiemo llono. <sup>5</sup> “Uisinidino jai ciodimaci. Ñuja-ñujacaida jaidinodi jai raise macaritimaci. Efonaitino jai jillodimaci. Jefona cacaiñedinodi jai jefona cacasite. Fodiaillamona damierie jai jillodimaci. Dueredino mare rafuena jai cacadimaci” naimiemo llono. <sup>6</sup> Jiai llono: “Ñibai nana cue rafuena raise cacaiñedio; ia cuena jaca nia ñnocana o jaia, caimare iitio”.

<sup>7</sup> Juan llofueoicaigano abido jailla mei, naimie ecimo ailluena ite cominimo Jesús: Juan rafuena llote:

—Jofue iñenanomo naimie navui ia, naimie dine jaidomoi. ¿Ñie isoidimiena ciodomoi? Daje uaido rafuena comequina facadimiena ciodomoi. Ero, fuirina aifi billamona, raitire afai bijide. Afaina aifi billamona, raitire fuiri bijide. Naimie ie isoñede. Nie isoide rafue naimiemo ia, cue rafuena llocana jaide. <sup>8</sup> ¿Bue ñellena naimie dine jaidomoi? Mare iniroina jitañimiena cioñedomoi. Mare iniroina jitañinona omoi cioacaniadedi, illaicomini dine jaidomoi. <sup>9</sup> Jusiñamui facaina lloaímana ciodomoi. Naimie Jusiñamui facaina llocabite.

Jiaie lloraini baifemo faite, cue billena omoimo naimie llua jira. <sup>10</sup> Malaquíás micori naimiena jaie cueda:

Jusiñamui raite: “Ero, o uicodo cue rafuena llolena, damiena oretaiticue, comini comeciaina marecinona duiñollena”

cueda. Malaquíás Juan Bautistana cuete. <sup>11</sup> Juan Bautista nana Jusiñamui facaina lloraini baifemo faite; iadedi Jusiñamui cominina birui bu illamona, Juan baifemo birui faite. Juan cue billena llofuete; ia naimie cue lloga rafuena omoi isoi cacaiñede. Naimie cue lloga rafue omoi isoi suillana cioñede. Iemona naimie baifemo faitomoi. <sup>12</sup> Juan llofua tainiamona ailluena comini cue rafuena ñnuamona, Jusiñamui ñibeimo birui duere iacadimaci. <sup>13</sup> Nana Jusiñamui facaina lloraini micoriaidi cue billena jaie llotimaci. Moisés micori iena jiaie llote. Juan facaise naie llogacino jai suide. <sup>14</sup> Jusiñamui facaina lloraima jaie llote: “Bie rafue suille facaise Elías isoidimie biite”. Naimie rafuena ñnotomoidena, Juandi naimiena uñnotomoi. <sup>15</sup> Omoi jeforena jira, raise fueollena, cue llamo cacarei.

<sup>16</sup> Jesús nia llofuete:

—Ero, omoina ñaiticue. Jifanote uruiaí isoidomoi. Uruiaí jifanoiacania, naimaci nabaiñaina uaiduanona, raitimaci: <sup>17</sup> “Omoi diga jifanoiacadicaí; iadedi caí diga jifanoiacañedomoi. Caimarede rafuena caí jifanoiacania, sunailla rafuena jifanoiacadomoi. Sunailla rafuena caí jifanoiacania, caimarede rafuena jifanoiacadomoi. Coninina nabairiñedicaí” raitimaci. <sup>18</sup> Ie isoidomoi. Juan jirorainide. Caimare guñede; ia naimie diga nabairiñedomoi. Naimiena gaiñedomoi. Ie jira omoimona dajerie naimiena raitimaci: “Janaba anamo naimie illamona, naimie uairico isoi ite” raitimaci. <sup>19</sup> Monamona billanona, ñmana jaidicue. Omoi isoi guiticue. Caimataidicue; ia cue diga nabairiñedomoi. Cuenajai gaiñedomoi. Ie jira cuena jeare ñaitomoi. Raitomoi: “Guillaredimie. Jiroruidimie. Jearede rafue finodino diga nabairitimiedio”. Iese raitomoi; iadedi Jusiñamuina ñnotinodi cue finoca rafuena marenana uñnotimaci.

*Dajerie nairai Jesúsna ñnoñena rafue*

*(Lc 10.13-15)*

<sup>20</sup> Ailluena comini Jesús dina nia ia, naimacimo ie navui jailla nairaiaina ñaite. Naimie siño finoca rafuena uñnotimaci; iadedi naimaci comeciái uai meidoñedimaci. Ie jira naimacina ñaite. <sup>21</sup> Llote:

—Omoimona damierie Corazín railla illanomona bitomoi. Omoimona damierie Betsaida railla illanomona bitomoi. Cue rafuena omoi ñnoñena jira, duere sefuitomoi. Omoi dine cue navui siño finoca rafuena Tiro railla nairaimo jaie finodicuena, Sidón railla nairaimo jaie finodicuena, naimaci comeciái eo isinotaillamona, naimaci comeciái uai meidotimaci. Naimaci comeciái uaina meiduana uñnotallena, ebinide ñiroina jitajanona, naimaci ifogaiimo jusefona jonetimaci. <sup>22</sup> Jusiñamui uicomo nana comini ico ia, Tiro nairai baifemo duere sefuitomoi. Sidón nairai baifemo duere sefuitomoi. <sup>23</sup> Omoimona damierie Capernaum railla illanomona bitomoi. Birui abina iedoiacadomoi; iadedi jiairuido sunaitomoi. Omoi dine navui cue siño finoca rafuena Sodoma railla nairaimo jaie finodicuena, naie nairaidi birui ñadedi nia ite. Omoi comeciái uai omoi meidoñenia, monamo cue Moo diga jaca ññeitomoi; iadedi naimie omoina duere finollemona sunaitomoi. <sup>24</sup> Jusiñamui uicomo nana comini ico ia, cue rafuena omoi ñnoñena jira, Sodoma railla nairai baifemo duere sefuitomoi —llote.

*Jesús ie Moo diga ñaia rafue*

*(Lc 10.21-22)*

<sup>25-26</sup> Ie facaiseconi Jesús ie Moo diga ñaianona raite:

—Ore Moo, oca mona Namadio. Oca enirue Namadio. Abina uñnotinona bie isoidie rafuena uñnotañedio; iadedi jamai bue isoidinona iena uñnotadio. O jitailla jira, iese uñnotadio. Ie jira iobillacinona omo feaacadicue. Mai.

<sup>27</sup> Jesús dinena naimie ecimo ite cominimo dane llote:

—Cue Moomona nana cue rafuena oticue. Dama cue Moo cuena raise uñfote. Dama cue Moona raise uñoticue. Cue jitaille diese omoina naimiena uñnotadicue. Ie muidona naimiena uñnotomoi. <sup>28</sup> Omoi jeacinomona omoi jillobillena, duere jaidomoi. Omoi comeciái marena uri illena, cue ñibeimo mai omoi i. <sup>29</sup> Cue llucino anamo omoi i. Cue rinina jira, cuemona omoi fueo. Iemei omoi comeciái marena uri iite. <sup>30</sup> Omoina cue canua jira, cue llucino anamo omoi iacanano ia, sefuinide. Omoina cue canolle jira, cue llucino finuana sefuinide.

## 12

*Sábadoruimo Jesús llofueoicaigano maija rafue*  
*(Mr 2.23-28; Lc 6.1-5)*

<sup>1</sup> Ie rafue llumona, ie llofueoicaigano jai abido bitimaci. Ie facaiseconi sábadoruimo Jesús ie llofueoicaigano diga, trigo motodo joido naido jaide. Ie llofueoicaigano aimetailla jira, trigona tijiano, golluano, guicana jaidimaci. <sup>2</sup> Dajerie fariseuai iena ciuano, llotimaci:

—Ero, o llofueoicaigano rairuica rana finosite. Moisés micori rairuilla jira, sábadoruimo majinidicai; iadedi trigona naimaci tijiamona, caimona jai majjidimaci. Iese cai abimo jeacinona jai finodimaci.

<sup>3</sup> Ie llofueoicaiganona riiduano, Jesús uai ote:

—Cuemona jeacino finoñedimaci. David micori jaie finoca rafuemo omoi comečiai raise facañedomoi. David micori guille iñenia, naimie aimetaia, ie nabaiñiai diga, Jusiñamui jofomo fo jaide. <sup>4</sup> Jusiñamui fecaca llomeniconu uanona, guitimaci. Jamai bue isoidino naie llomeniconu guillana Jusiñamui rairuide. Dani Jusiñamui diga ñairaini iena guiredimaci. Ie nabaiñiai diga David micori iena guite; ia Jusiñamui naimacina duere finoñede. <sup>5</sup> Moisés micori llogacinomo jiai raise comečiai facañedomoi. Moisés micori jaie llua isoi, sábadoruimo Jusiñamui jofomo Jusiñamui diga ñairaini majiuidimaci. Jusiñamui naimaci sedallena, ocañana fatimaci. Iraña bonodimaci. Iese majiuidimaci; iadedi Jusiñamui jeacino finoñedimaci. Moisés micori jaie ciegafuina raise cacañedomoi. Iena raise facañedomoi. <sup>6</sup> Omoimo ñia lloiticue. Jusiñamui jofomo finoca rafue baifemo faiticue. <sup>7</sup> Jusiñamui facaina lloraíma iena jaie cuela: “Cuemo rana omoi fecajana jitaidicue; ia omoi jitaillamona, jaie cominina omoi duenailacinodi rana cuemo fecajacino baifemo faite”. Iena omoi uiñotomoidena, cue llofueoicaiganomo: “Maraiñedicinona finodomo?” lloñedomoi. Cuemona cue llofueoicaigano jeacino finoñedimaci. <sup>8</sup> Monamona billanona, imana jaidicue. Ie muidona sábadoruimo finolle rafuena rairuiredicue. Nairuimo finoñelle rafuena jiai rairuiredicue.

*Jesúdi onollina idisarodimiena jillotaja rafue*  
(Mr 3.1-6; Lc 6.6-11)

<sup>9</sup> Bai jaillanona, nairai ñine rillanona, naimaci ofiracomo Jesús fo jaide. <sup>10</sup> Nainomo onollina idisarodimie illanona, fariseuai ñinena Jesús mo jicanotimaci:

—¿Sábadoruimo bimiena o jilloitajana mare? —jicanotimaci. Sábadoruimo duidimiena bu jillotaia, naimacimona naimie jai majjide. Uai uanona: “Mare” Jesús raiadedi, naimacimona naimie jai majjacana jira, naimiena llogidoiacadimaci. <sup>11</sup> Jesús uai ote:

—Sábadoruimo omoimona damie ie toica lauda ifomo uaidena, nairuado ari iena ote. Naimiemo buena lloñedomoi. <sup>12</sup> Ero, cominidi lauda baifemo faite. Sábadoruimo mare rafuena finuadi mare. Bimiena cue jillotaia, mare rafuena finodicue.

<sup>13</sup> Onollina idisarodimiemo llote:

—O onolli mai oni ñuita.

Iena ñuitajamona jillode. <sup>14</sup> Iena ciuanona, fariseuai jino jaidimaci. Naimiema meinellena, coniniri siadotimaci.

*Isaías micori jaie Jesúna ñaia rafue*

<sup>15</sup> Naimiema naimaci meineacanana Jesús uiñuamona, nainomona oni jaide. Diga comini naimie diga jaidimaci. Naimacimona nana duidinona jillotate.

<sup>16</sup> —Cueno llocana jaiñeno —naimacimo llote. Naimie mameci are sorillana jitañede. Fariseuai diga ie uai uaitaicañede. <sup>17</sup> Iemona Isaías micori jaie ciegafuiai jai suide. Jusiñamui Isaías micorina jaie cuetataga:

<sup>18</sup> Ero, cue fetoca mullaima ite.

Naimiedi cue isiruigamie. Naimieri iobidicue.

Cue Joreño naimiemo cue fecajanona, judiuañedinomo naimacina cue jilloitaacanana llote.

<sup>19</sup> Uai uaitañeite. Ie rafuena ado lloñeite.

Nairai illano motomo naimie rafue llocabiñeite.

<sup>20</sup> Comečiai ocuinidinona canoite.

Dueredinona canoite. Naimacina duere finoñeite; ia naimacina canoite.

Ie mare rafue llumona, naimiema ñnotinona canoite.

Nana comini naimie anamo ille ñinori iese naimie canoite.

<sup>21</sup> Naimaci jillobillena, ie rafue cacajanona, ailluena judiuañedinomo naimiema ñnoitimaci.

*Fariseuai Jesúna jeare ñaia rafue*  
(Mr 3.19-30; Lc 11.14-23; 12.10)

<sup>22</sup> Jesús ñine damieredi Janaba ie anamo illamiena atidimaci. Janaba anamo naimie illa jira, naie aticamiedi cioñede. Jiai ñaiñede. Jesús Janabana oni oretajanona, naimiema jillotate. Naimie uaina botade. Ñaite. Ciode. <sup>23</sup> Naiena ciodino rajicaillanona raitimaci:

—Ñibai bimiedi David micori jito. Cai illaimana naimie illena, naimie micori jito mo ocuridicai.

<sup>24</sup> Iena damierie fariseuai cacajano, raitimaci:

—Beelzebúdi Janaba comini. Beelzebú anamo naimie illamona, Beelzebú uaido Janaba illa cominimona Jesús Janabana oni oretate —raitimaci.

<sup>25</sup> Naimiena naimaci enoillana Jesús uiñuanona, naimacimo llote:

—Daje isoi comeciaina lloillamo daje nairai facañena, danomo majinidimaci. Oni jaidimaci. Daje isoi comeciaina lloillamo daje jofomo itino facañena, danomo jainaiainidimaci. Oni jaidimaci. <sup>26</sup> Te isoide. Beelzebú uaido jananiaina omoi llua isoi cue oretai, Janaba ie dibeimo itino diga jai nabairiñede. Iemona naimie comini danomo iñeitimaci. <sup>27</sup> Omoi comini jananiaina oni oretacabitimaci; iadedi naimaci finoca rafuena uaitañedomoi. Naimacimo jicano, bie isoide rafuena omoi raise uiñollena. Iemei cue finoca rafuena uaitañeitomoi. <sup>28-29</sup> Ero, mañidimie ie jofomo ite rana nibai fiñacado moi. Iena fiñllena, naimiena nano raise omoi maiga. Raise maia mei, ie rana fiñredomoi. Te isoide. Janaba anamona cominina jillotacabitimaci. Naimie afemo nano cue iñenia, cominina jillotanidicue. Naimie afemo cue illa jira, iena finoredicue. Jusiñamui Joreño uaido naimiena anafetitacue. Iemona Jusiñamui rafuena cue llua jai uiñotomoi. <sup>30</sup> Cue dibeimo iñedimie cuena enoide. Cue dibeimo cominina itañedimiedi naie cominina cuena iñotañede. <sup>31</sup> Ie jira omoi mo llotimaci: Jusiñamui nana comini jeaconi dotarede. Naimiedi comini marañedicinona dotarede; iadedi naimiedi ie Joreñoa jeare ñaiacinona dotañeite. <sup>32</sup> “Jusiñamui Joreño uaido siño rafuena finoñedio; ia Janaba uaido siño rafuena finodio” cuena raitomoi. Jusiñamui mona biticue. Cuena omoi jeare ñaia, Jusiñamui iena feitarede; iadedi naimie Joreñoa omoi jeare ñaia, Jusiñamui iena birui feitañeite. Iena ico jaca feitañeite.

*Jesúdi riana llisilla llua rafue*  
(Lc 6.43-45)

<sup>33</sup> Jesús llote:

—Llisillamona nie isoide riana illana uiñotica. Amena ie llisilla llillamona, amena marena uiñoga. Llillamona, amena marañenana jai uiñoga. <sup>34</sup> Te isoide. Omoi ñaiamona omoina uiñotica. Cuena omoi marañeno ñaia jira, omoi comeciaino iticinona uiñotica. Omoi marañena jira, jai nairaidomoi isoidomoi. <sup>35</sup> Mareuidimie mare ie comecimona ñaite; iadedi marañedimie marañede ie comecimona ñaite. <sup>36</sup> Jamai ebena birui omoi ñaia, Jusiñamui uicomo nana comini ico illa facaiseconi Jusiñamui iba oite. <sup>37</sup> Omoi jeare ñaiaconi duere sefuitomoi; iadedi omoi mare ñaiaconi duere sefuiñeitomoi. Ie jira Jusiñamui dibeimo omoi comeciaino iuai meido.

*Dajerie Jesús siño rafuena finuana jitailla rafue*  
(Mr 8.12; Lc 11.29-32)

<sup>38</sup> Naie facaiseconi dajerie Moisés micori llogacinona llofueraini dajerie fariseuai diga Jesús mo llotimaci:

—Maestro, o lloga uaina cai iñollena, siño rafuena o finuana cioacadica.

<sup>39</sup> Jesús uai ote:

—Marañedicinona finocabitomoi. Jusiñamui dibeimo iacaiñedomoi; iadedi siño rafuena cioacadomoi. Iena omoi jamai cioillena, siño rafuena finoñeiticue. Ero, Jonás micori jai ite rafuena uiñotomoi. Naiemo omoi comeciaina omoi faca. <sup>40</sup> Darui amani aillue lliciai jeraimo naimie illamona jillode. Te isoite. Cue fiñdilla mei, darui amani raiafomo iiticue. Iemei naiemona jilloitacue. <sup>41</sup> Lliciai jeraimona naimie jillua mei, Nínive railla nairai dine Jonás micori jai. Nainomo Jusiñamui rafuena llote. Naie comini iena cacajano, naimaci comeciaino icinuaina meidotimaci. Cue rafuena omoi cacajamona, omoi comeciaino icinuaina birui omoi meidoñena jira, Jusiñamui uicomo ico nana comini illa facaiseconi: “Cue cominidomoi?” omoina rañeiticue. Jonás micori baifemo birui uaidicue; iadedi cuena iñofedomoi. <sup>42</sup> Ero, Saba railla nairai ie illaño micoridi Salomón micori dine jai aarena jai. Naimie micori uiñuacinona naiñaiño micori cacareillena, aarena jai. Salomón micori baifemo birui uaidicue; iadedi cuena iñofedomoi. Omoi comeciaino icinuaina birui omoi meidoñena jira, Jusiñamui uicomo nana comini ille facaiseconi naiñaiño micori omoina ico ñaite: “Naimiedi siño rafue finuana cioodomoi. ¿Bue fiñllena naimiena iñofedomoi?” omoina ico ñaite.

*Janaba anamo illamie rafue*  
(Lc 11.24-26)

<sup>43</sup> Jesús naimacimo nia llote:

—Birui bene ite marañede cominidi Janaba anamo illamie isoidimaci. Naimiemona Janaba oni jaia, jiaie illanona baillena, jofue iñenanomo jaide; iade baiñede. <sup>44</sup> Baiñena jira, naimie comecina facade: “Navui cue anamo illamie dine abido jaiticue”. Abido naimie bia, naie iima comeci namanidena naimie baite. <sup>45</sup> Temei oni jaillanona, jiaie siete jananiaina naimie diga atide, naimaci anamo naie iima illena. Naie siete jananiái naimie baifemo marañedimaci. Iemona naie iima eo fodo jaide. Ie isoide birui ite marañede comini. Cue rafue naimaci iinoñena, eo fodo jaitimaci.

*Jesús ie comini*

(Mr 3.31-35; Lc 8.19-21)

<sup>46</sup> Jofomo comini diga Jesús nia ñaia, naimie ei, ie amatiai diga, bite. Naimie diga ñaiacanano, jino naidaide. <sup>47</sup> Damie Jesúsno llote:

—O ei, o amatiai diga, jino ite. O diga ñaiacade.

<sup>48</sup> Naimiemo Jesús dinena jicanote:

—¿Bu cue ei? ¿Bu cue amatiai?

<sup>49</sup> Ie llofueoicaigano dine ie onolli ñuitajanona, raite:

—Jadi, cue ei, cue amatiai. <sup>50</sup> Cue Moo monamo ite. Naimie jitailacinona finodimiedi cue amana, cue miriñona, cue eina. Imaci ua cue cominina.

## 13

*Trigo judaidimie rafue*

(Mr 4.1-9; Lc 8.4-8)

<sup>1</sup> Nai jofomona nairui Jesús jaillanona, jorai fue dine jaide. <sup>2</sup> Ailluena comini nainomo ofilla jira, botemo Jesús jaillano, ana raide; iadedi comini jorai fuedo itimaci. <sup>3</sup> Ailluena rafue naimacimo llote:

—Jusiñamui omoína sedaacana omoi fueollena, bie rafuena lloiticue. Damie trigona judaiáide. <sup>4</sup> Naimie judaiámona, naisomo janore iduai juide. Naimie bai jailla mei, silliñai iena guisaibitimaci. Ie jira sicoñede. <sup>5</sup> Nofiemo jiaie iduai juide. Nainomo enirue raise iñede. Sicode; iadedi enirue raise iñena jira, <sup>6</sup> raise jainañena jira, ecasillamona duide. Ie jira llisiñede. <sup>7</sup> Eecuai illanomo jiaie iduai juide. Eecuai sicuamona, riará eecuai ibaica. Ie jira llisiñede. <sup>8</sup> Mare eniruemo jiaie iduai juide. Sicode. Llisillamona danademo cien diga llisillana ote. Jiaínamona sesenta diga llisillana ote. Jiaínamona treinta diga llisillana ote. <sup>9</sup> Omoi jeforena jira, raise fueollena, cue luamo cacarei. Iena iño.

*Jesús ie como lloga rafuena llofuiá rafue*

(Mr 4.10-12; Lc 8.9-10)

<sup>10</sup> Ie llofueoicaigano Jesúsno jicanuaibiside:

—¿Bue ñellena bie isoide rafuedo cominina llofuetio?

<sup>11</sup> Uai ote:

—Jusiñamuidi omoína ie sedaacana rafuena jai uiñotade. Jaie iena uiñoñedomoi. Jiaie cominina iena nia uiñotañede. <sup>12</sup> Jusiñamuina iñotimie Jusiñamui rafuena iñocana jaite. Jusiñamui naimiena uiñotaite; iadedi Jusiñamuina iñoñedimie Jusiñamui rafuena uiñoñecana jaite. <sup>13</sup> Ie jira bie isoidicinodo naimacimo lloticue. Cue siño finoca rafuena cioñimaci; iadedi iena naimaci iñoñena jira, uiñoñeno jaitimaci. Cue llofuiána jamai cacadimaci; iadedi naimaci iñoñena jira, raise cacaiñedimaci. Uíñoñedimaci. <sup>14</sup> Isaías micori naimacina jaie cuega rafue birui jai suide. Jaie raite:

Jusiñamui llote: “Cue rafuena cacaitomoi; iadedi iena cacaiñeitomoi.

Rafuena cioitomoi; iadedi iena uiñoñeitomoi.

<sup>15</sup> Omoi comeciai jai tainomo ite isoide.

Omoi jefona jai cacaiñedomoi isoidomoi. Cue rafuena jai cacacaiñedomoi.

Jai uisínidomoi isoidomoi. Siño rafuena jai cioiacaiñedomoi.

Iena jai uiñoiacaiñedomoi.

Cue dibeimo iacaiñedomoi, omoína cue jilloitai raillanona”.

Isaías micori Jusiñamuina iñoñedinona iese jaie cuete; <sup>16</sup> iadedi bie siño rafuena birui omoi jai ciua jira, cue lloga rafue omoi jai cacaja jira, iena birui omoi iñua jira, ni ua omoi marena ille jillaci. <sup>17</sup> Jusiñamui facaina jaie lloraini micoriai omoi siñona ciua rafuena jaie cioacadimaci; iadedi cioñedimaci. Iena cacacadimaci; ia cacaiñedimaci. Jusiñamuina jaie iñotino micoriai iena cioacadimaci; iadedi cioñedimaci. Iena cacacadimaci; iadedi cacaiñedimaci.

*Jesúdi trigo judaidimiéna llua rafue*

(Mr 4.13-20; Lc 8.11-15)

<sup>18</sup> Jesús llote:

—Ero, omoína trigo iduaina judaidimie rafuena llofueiticue. <sup>19</sup> Dajerie iduai naisomo juide. Dajerie comini comeciai naie naiso isoidimaci. Jusiñamuidi ie cominina sedaja rafuena cacadimaci; iadedi iena cacañedimaci. Ie jira Taifedi naimaci comeciaino cacaia uaina ñnotañede. <sup>20</sup> Jiaie iduai nofimo juide. Dajerie comini comeciai naie nofie isoidimaci. Jusiñamui uai nano naimaci cacaia, iena caimare feñnotimaci. <sup>21</sup> Nofimo riga iduai jainaonidedi raise sicoñede. Naie comini janore ñnuua jira, ie isoidimaci. Dallu nano ñnotimaci. Jusiñamui uai muidona duere naimaci sefuia, abido danomo uaidimaci. <sup>22</sup> Jiaie iduai eecuai illanomo juide. Naie iduai sicua mei, iena eecuai ibaila jira, raise llisñede. Dajerie comini comeciai naie illano isoidimaci. Jusiñamui uaina cacadimaci. ñnotimaci; iadedi naimaci comeciai jarire illamona, naimaci raruiaina eburuillamona, naie uai naimaci comeciaino itabiñede. Jusiñamui jitaile rafuena finocana jaiñedimaci. <sup>23</sup> Jiaie iduai mare eniruemo juide. Dajerie comini comeciai naie enirue isoidimaci. Jusiñamui uaina cacajano, iena raise cacadimaci. Eo lliside isoidimaci. Jusiñamui jitailla rafuena finocana jaidimaci. Dajerie janore jaidimaci. Dajerie eo jaidimaci. Dajerie ua eo raise jaidimaci. Iese omoi jai.

*Raiticiai trigo motomo illa rafue*

<sup>24</sup> Jesús jiaie rafuena llote:

—Jusiñamui ie cominina sedaacana rafuena lloiticue. Naimie ñibeimo comini jaillena, naimie rafue llocana jaidicue. Jiaie uaido iena omoimo lloiticue. Damie trigona judaiaide. Ie illimo mare iduaina judaide. <sup>25</sup> Naimie ñia mei, ie enoidimie trigona eruaiide raiticiaina bainino judaiaide. Iemei oni jaide. <sup>26</sup> Trigo sicuamona lliside. Naie facaise naie raiticiai como raise bairedo. <sup>27</sup> Judaídímie majiraini iena cuanona, naimiemo llote: “Mare iduai navui rítio. ¿Ñiesedeta raiticiai eo sicode?” <sup>28</sup> Uai ote: “Cueno enoidimie iese finoca”. Naie majiraini naimiemo jicanotimaci: “¿Birui nai raiticiai cai raitiana jitaído?” <sup>29</sup> Uai ote: “Dama ite. Raiticiai omoi raitia, trigona jai jaitaitomoi. Dama iesede. <sup>30</sup> Danomo sicoite. Ua facaiseconí cue majirainimo lloiticue: “Raiticiai nano jaita. Danomo ofita, jobaillena. Trigo uanona, cue jofomo atianona, eeno”.

*Jesúdi mostaza ido llua rafue*

(Mr 4.30-34; Lc 13.18-19)

<sup>31</sup> Jesús jiaie rafue llote:

—Jusiñamui ñibeimo comini jailla rafuena lloiticue. Jiaie uaido iena omoimo lloiticue. Damie mostaza idona rillamona, naiemona eo aillue riará sicode. <sup>32</sup> Mostaza ido eo janorede; iadedi sicua mei, eo aillue riará jaillamona, nainomo sillíñiai jicaiciaina finodimaci. Ie isoide. Jusiñamui rafuena janore comini birui cacajamona, ailluena comini naimie cominina ico jaitimaci.

*Jesús siritate rana llofuia rafue*

(Mr 4.33-34; Lc 13.20-21)

<sup>33</sup> Jesús jiaie rafuena llote:

—Jusiñamui ñibeimo comini jailla rafuena lloiticue. Jiaie uaido iena omoimo lloiticue. Daje cirigai raifi coremo siritate ra faianona, namo tameia siritate. Ie isoide. Ailluena comini iena cacaillena, Jusiñamui rafue llocana jaite.

<sup>34</sup> Naie isoide rafuedo Jusiñamui ie cominina sedaacana rafuena cominimo Jesús llote. Jiaie rafuedo iena lloñede. <sup>35</sup> Jusiñamui facaina lloraima micori iena jaie cueda: Jusiñamui llote: “Jiaie isoide rafuedo cominimo lloiticue. Comini ñia uññoñega rafuena lloiticue. Enirue finua facaisemona jaca bu iena uññoñede. Birui naimaci uññollena, iena lloiticue”.

*Jesús trigo motomo riga raiticiaina llofuia rafue*

<sup>36</sup> Comini jino fainonocaida, Jesús ie risoilla jofomo abido jaide. Ie llofueoicaigano naimiemo llotimaci:

—Iena raise cai uññollena, trigo motomo riga raiticiai rafuena caimo llono.

<sup>37</sup> Uai ote:

—Mare iduai judaidimiedi cue. Jusiñamui rafuena lloticue. <sup>38</sup> Naie illidi nana comini. Mare iduaidi Jusiñamuimo duide comini. Raiticiaidi Taifemo duide comini. <sup>39</sup> Naie marañede iduai judaidimiedi Taife. Ua facaisedi cue abido bille facaise. Trigo otinodi Jusiñamui jaenísai. Trigodi cuena ñnotino. <sup>40</sup> Jobaillena raiticiai ofitaja isoi, ico abido cue bia, daje isoi iite. <sup>41</sup> Cue jaenisaina oretaiticue, nana jeacinona finoraini diese ofitallena, cue illanomona iraimo dotallena. <sup>42</sup> Nainomo eo duere sefuillamona, eetitimaci. Subcaitimaci. <sup>43</sup> Iemei jítoma lligañua isoi, Jusiñamui sedajanomo naimiema ñnotinodi marena bairenitimaci. Omoi jeforena jira, raise fueollena, cue llamo cacarei. Bie isoi omoi duere sefuiñellena, cue lluaña ñno.

*Jesúdi eniruemo isiruiga reica rana llofuia rafue*

<sup>44</sup> Jesús llote:

—Jusiñamui díbeimo comíni jailla rafuena lloiticue. Jíaié uaido iena omoímo lloiticue. Eniruemo isiruiga raífide ra bu baía, ie nama jai íñena jira, naie eniruena uainino íbacade, naie ra ollena. Ucube ollena, naie rari íobilla jira, nana naimíemo ite raruaiána fecaite. Iemei eniruena íbaite. Ie ísoide. Jusiñamui íllanomo omoí íllena, jíaié rafue uanona jáiñeno. Dani Jusiñamui rafuena uanona jai. Dani íemo omoí comeciána faca.

*Perlas railla rafue*

<sup>45</sup> Jesús llote:

—Jusiñamui díbeimo comíni jailla rafuena lloiticue. Iena omoí raise uíñollena, perlas railla rana íbaraimana lloiticue. Eo mare perlas íballena jenocabide. <sup>46</sup> Eo raífide perla naimíe baía, naie perlana íballena, nana íe raruaiána fecaite. Ie ísoide. Jusiñamui íe comínina sedaacaja rafuena omoí cacaja jira, iena ocana jai.

*Jesús llojjina ñaia rafue*

<sup>47</sup> Jesús llote:

—Jusiñamui díbeimo comíni jailla rafuena lloiticue. Iena omoí raise uíñollena, llojjina lloiticue. Joraimo llojjina comíni faianona, naga ísoide líliciána otímaci. <sup>48</sup> Ari sonua meí, mare líliciái díese fetodímaci. Maraiñede líliciái díese oní faitímaci. <sup>49</sup> Ie ísoide. Íco abído cue bíá, íese íite. Jusiñamuina ínotinomona naimíena íñoñedino díese oní fetollena, Jusiñamui jáienisái bíitímaci. <sup>50</sup> Iemei íraimo Jusiñamuina íñoñedínona dotaitímaci. Nainomo eo duere sefuíllama eéitímaci. Subicaitímaci.

*Jesús llofueoicaiganodí mare rafuena jai uíñua rafue*

<sup>51</sup> Ie llofueoicaiganomo Jesús jícanote:

—¿Nana cue lluaana cacadomoi?

Uai otímaci:

—Jíi, nana cacadicaí.

<sup>52</sup> Naimacimo llote:

—Ie jofomo comíni bíá, naimacína raise nafuellena, naimacína caimare ítatallena, jofó nama íe mare raruaiámona naimací jítailla ra naimacímó fecade. Comíni comeciána lloiticue. Jusiñamui facána llorainí micoríai llogacínona uíñotomoi. Cuemona Jusiñamui íe comínina sedaja rafuena fueocana jíai jai jáidomoi. Comíni comeciána caimare ítatallena, bírui llofueredomoi.

*Nazaretmo Jesús ílla rafue*

(Mr 6.1-6; Lc 4.16-30)

<sup>53</sup> Naie rafuena Jesús llua meí, nainomona Nazaretmo jáide. <sup>54</sup> Ie eniruemo ríllanona, Nazaretmo íte ofíracomo llofueite. Naiemona comínidí raíjicaíllamona raítímaci:

—¿Níese naimíedí eo abína uíñote? ¿Níese síño rafuena naimíedí finode? Naimíedí jamái bue ísoídímíe. <sup>55</sup> Naimíe amederaima jíto. Naimíe eídí María. Naimíe amatiáidí Jacobo, José, Simón, Judas. <sup>56</sup> Naimíe miríñotíaidí caí motomó jíai íte. Naimací díga nagarui nabairíticái. Naimíeorí caí nabairícabilla. Ie jira, ¿nínena íe síño uaina ote?

<sup>57</sup> “Caí comena naimíe íte” raíllanona, naimíe uaina jamáidímaci. Jesús naimacímó llote:

—Naga íllanomo comínidí Jusiñamui facána lloraima uaina feíñotímaci; íadedí naimíe nairáimo naimíe ía, íe rísoílla jofomo naimíe ía, íe comíni naimíe uaina feíñoiacásíñede. Jamáísíte. Ie ísoide. Cue comínidomóina jira, cue uaina íñoñedomoi.

<sup>58</sup> Naimíe uaina naimací íñoñena jira, Jesús ailluena síño rafue finóñede.

## 14

*Juan Bautista micorí fiodailla rafue*

(Mr 6.14-29; Lc 9.7-9)

<sup>1</sup> Naie facáiseconí Herodes railla gobernador Jesús mamecína cacade. <sup>2</sup> Naimíe ecímó maíjuidínomo llote:

—Fiodaíllamona Juan Bautista micorí jai jíllode. Jesús raíllamíedí naimíe. Ie jira naimíedí síño rafuena finocabide.

<sup>3-4</sup> Íese raíte, Herodes Juan micorína navuí meínetaja jira. Juan Bautista micorína nía meínetañenia, Herodedí íe ama Felipe aína ote. Naiñaiño mamecídí Herodías. Ie jira Juan micorí naimíemo llote:

—O ama aí díga ítío. Maraiñede rafuena finodío. Jusiñamui íena rairuíde.

Herodes Juan micorí lluaana gaíñenano, naimíena duere finode. Herodes Juan micorína gaítatajanona, cárcelmo jonetade. <sup>5</sup> Naimíe micorína meínetacade; íadedí Herodes dínena comínina jacírúite. Juan micorídí Jusiñamui facána lloraimána naimací raíllanona, naimíe



micorina jaciruite. <sup>6</sup> Iemei Herodes cumpleaños ie rafuena finode. Nainomo jiaie cominina uaidote. Rafuemo Herodías jisa naimaci uicomo saillamona, Herodena iobitade. <sup>7</sup> Ie jira naiñaiño mo llote:

—Nie isoide rana o jitaialedi, omo iiticue. Illaima uai cuemo illa jira, iena ua finoiticue.

<sup>8</sup> Naiñaiño ei naiñaiño mo lluanona, naiñaiño uai ote:

—Juan Bautista ifogi bandejamo jonecaida, cuemo ine.

<sup>9</sup> Iena cacajano, naimie sunaite; iadedi naimie jino ie llua uaina jira, nainomo naimie uaidogano jiai jai cacaja jira, Juan micorina meinetajana llote. <sup>10</sup> Ie lloga uaina finollena, cárcelmo soldadona orede. Nainomo Juan micori ifogina jaitade. <sup>11</sup> Bandejamo naimie micori ifogi jonecaida, soldado atiano, Herodías jisamo fecade. Iecon i eimo fecade. <sup>12</sup> Iena fidiana, Juan micori llofueoicaigano naimie micori abina uaibitimaci. Iena naimaci raia mei, Jesúmo lluauidimaci.

*Jesús cinco mil iñiaina ecaja rafue*

(Mr 6.30-44; Lc 9.10-17; Jn 6.1-14)

<sup>13</sup> Juan micori meiniana Jesús fidiano, nainomona comini iñenanomo ie llofueoicaigano diga botedo jaide; iadedi naimie jaillana comini fidiano, naimiena racadimaci. Diga comini illanuaimona eillido bitimaci. <sup>14</sup> Eniruemo Jesús sijia, ailluena cominina dafaifide. Naimacina cuanona, naimacina duenaillanona, duidinona jillotate. <sup>15</sup> Jitoma ana itemo, ie llofueoicaigano naimie dine lluaibitimaci. Raitimaci:

—Jofue bene iñede. Jaca buedi iñede. Jai navuiacade. Cominina mai abido oreta. Ianori ite nairaimo naimaci guille ollena, naimacina oreta.

<sup>16</sup> Uai ote:

—Naimacina oretañeiticue. Naimacina omoi eca.

<sup>17</sup> Uai onaisite:

—Dani caimo ite cinco llomenico, mena lliciai diga.

<sup>18</sup> Uai ote:

—Iena cuemo ati. <sup>19</sup> Raitie illanomo comini ana raillesa llono —raite.

Naie cinco llomenicon naie mena lliciai diga uanona, nomamo eruaillanona, Jusiñamui iobillacinona fecade. Iemei taillude. Ie llofueoicaigano fecade, cominina ecallena. <sup>20</sup> Nana guillanona monidimaci. Monillamona, fiebide guillena iraidimaci. Doce cirigaiaimo oruitatimaci. <sup>21</sup> Cinco mil iñiaie diese guitimaci. Naimaci aitiai jiai guitimaci. Naimaci uruai jiai guitimaci.

*Jesús jinui emododo macarilla rafue*

(Mr 6.45-52; Jn 6.16-21)

<sup>22</sup> Guilla mei, botedo ie llofueoicaigano ruica dine jaillena llote. Naie facaiseconi naimie cominina nia facadote. <sup>23</sup> Cominina facadua mei, aneduaimo dane jaide, Jusiñamui diga ñaillena. Jitibicaidemo nainomo dama ite. <sup>24</sup> Naie facaiseconi ie llofueoicaigano jorai motomo itimaci. Aifi billamona, eo bagode. Naimacimo riire aifi rilla jira, riire jaitimaci. <sup>25</sup> Nia monaiñedemo, jinui emododo naimaci dine Jesús bite. <sup>26</sup> Naimiena naimaci cuanona, jacinaillamona, raitimaci:

—¿Bue joreño caimo billana ciodicai? —Jacinaillamona cuiriidimaci. <sup>27</sup> Naie dacaño Jesús naimacimo llote:

—Omoi joreñonicañeno. Cuesa. Jaciruiñeno.

<sup>28</sup> Pedro uai ote:

—Uanai cai Namadio. O dine cue billesa cuemo llono.

<sup>29</sup> Jesús uai ote:

—Cue dine bi. —Ie jira botemona jinui emodo Jesús dine Pedro macarite; <sup>30</sup> iadedi aifi billana naimie cuanona, jainaite. Jinuimo anabaiacade. Ado cuiriioide:

—Nama, cuena cano.

<sup>31</sup> Jesús ie onolli oni ñuitajanona, naimiena llinuanona, raite:

—Eo janore cue uaina iñotio. ¿Bue ñellena eo iñofñedio? Cuena iñotiodena, jinui emododo cue dine niadedi ridio.

<sup>32</sup> Botemo a iaiaiaiai jaillamona, ie facaise aifi llucaide. <sup>33</sup> Ie jira botemo itino Jesúmo iobillacinona fecadimaci.

—Odi ua Jusiñamui Jitodio —raitimaci.

*Jesúdi duidinona Genesaret eniruemo jillotaja rafue*

(Mr 6.53-56)

<sup>34</sup> Ruica dine jaillanona, Genesaret railla eniruemo ridimaci. <sup>35</sup> Jesúsna nainomo itino uiñuamona, naimie dine duidinona atillena, nana nairaimo jiaie cominina oredimaci. <sup>36</sup> Naimie dine billanona, dani ie iniroi fuedamo jutadallena naimiemo jicanotimaci.

“Naimie iniroimo cai jutadallemona jilloiticaí” raillamo comeciaina facadimaci. Nana jutadate diese jillodimaci.

## 15

*Jesúdi comini comeciaina ñaia rafue*

(Mr 7.1-23)

<sup>1</sup>Jerusalémona fariseuai comini Jesús dine bitimaci. Moisés micori llogacinona llofueraini jiai bitimaci. <sup>2</sup>Naimiemo jicanotimaci:

—¿Bue ñellena o llofueoicaigano cai einamaci rafuedo jaiñedimaci? Naimaci guiacania, naimaci onolli cai einamaci llua isoi raise jocoñedimaci. Ie jira cai abimo jeacino finodomoí.

<sup>3</sup>Jesús uai ote:

—¿Bue ñellena nana Jusiñamui llogacinodo jaiñedomoí? Omoí einamaci llogacinodo jaidomoí; iadedi nana Jusiñamui llogacinodo raise jaiñedomoí. <sup>4</sup>Jusiñamui jaiie llote: “O moo uai ñuanona, naimiëna cano. O ei uai ñuanona, naiñaiñoa cano. Ie moori jeare ñaitimie, ie eiri jeare ñaitimie meinelle”. <sup>5</sup>Iese Jusiñamui llote; iadedi omoí einamaci llotimaci: “Jusiñamuimo cai ucubena cai fecajamona, cai moona, cai eina jai canonicadicaí”. <sup>6</sup>Iese omoí fnocabilla jira, omoí einamaci llogacinodo omoí jaillamona, Jusiñamui uaina jamaidomoí. <sup>7</sup>Mareuidinona abi caitauidinodomoí. Isaías micori omoína jaiie raise llote. Naimiedi Jusiñamui lluaa cuete:

<sup>8</sup>Bimaci naimaci uaido marecinona cuemo llote; iadedi cue rafuedo raise jaiacaiñedimaci. “Ona isiruiticaí” llotimaci. “Ona sedadicaí” llotimaci.

Jamai ñaitimaci. Naimaci comeciái cue dibeimo raise iñede.

<sup>9</sup>Cue uai itena, jamai comini lluacinona naimaci llofuecabilla jira, tainona cuena sedadimaci.

<sup>10</sup>Fariseuai diga iese llua mei, naimie ecimo ailluena comini dane ofillanona, naimacimo llote:

—Iena raise omoí uifollena, cue llua mo cacarei. <sup>11</sup>Omoí einamaci isoi omoí guiñenia, naimaci isoi omoí onollina omoí jocoñenia, omoí comeciaina jearetañedomoí. Omoí guigamona, omoí onollina jocuamona, Jusiñamuina nabaiñedomoí. Omoímo jeacino illa jira, Jusiñamuina nabaiñedomoí. Omoí comeciái jearena jira, jeacinona fnocabidomoí.

<sup>12</sup>Ie llofueoicaigano naimiemo lluaibitimaci:

—O llua muidona, fairseuai cominina icidio.

<sup>13</sup>Naimie dinena uai ote:

—Dama ite. Nana cue Moomona oñega rafuedi jai ieconí duite. Naimaci rafue cue Moomona oñenia, ja muidomo ieconí duite. <sup>14</sup>Naimacina fainonocai. Uanaicinona naimaci uifollena jira, uisinidino isoidimaci. Jaiimiená uisinidimie ifoia, dafomo uaidiaimiai. Ie isoide. Uanaicinona fariseuai uifollena jira, uanaicinona llofuenidimaci. Uanaicinodo jaiñedimaci. Ja muidomo faifitimaci.

<sup>15</sup>Pedro naimiemo llote:

—Aillinano o llua caimo raise llono.

<sup>16</sup>Uai ote:

—¿Ñiese cue lluaa jiai nia cacaiñedomoí? <sup>17</sup>Ñie isoide ra guitomoina, omoí jebemo jaide. Ie mei omoí abiaimona jino bite; <sup>18</sup>iadedi omoí comeciaino iticinomona jeare-dena ñaitomoí. Omoí comeciái jearena jira, jearede rafuena fnocabidomoí. <sup>19</sup>Omoí comeciái jearena jira, jeare comeciaina facacabidomoí. Comena meinecabitomoí. Omoí aifede riño diga icabitomoí. Omoí iniñede iima diga icabitomoí. Firicabitomoí. Tainona llogiricabitomoí. Jaiie comini joreñoa jeare ñacabitomoí. <sup>20</sup>Bie isoidicinuai omoí comeciaino illa jira, jearede rafuena fnocabidomoí; iadedi omoí einamaci llua isoi, omoí onolli jocoñenamona jeacino comuiñede.

*Jesúdi judío iñaiñoñediñaiñoa jillotaja rafue*

(Mr 7.24-30)

<sup>21</sup>Genesaret railla eniruemona ie llofueoicaigano diga Jesús jaillanona, Tiro railla eniruemo jaide. Sidón railla eniruemo jiai jaide. <sup>22</sup>Ie facaiseconí naie eniruemona judiñediñaiñoí billanona, raite:

—Maestro, David micori jitudio. Jusiñamuimona o billa jira, cuena duenai. Cue jisa Janaba anamo ite. Naiñaiño eo duere sefuicabide.

<sup>23</sup>Jesús uai oñede. Ie jira ie llofueoicaigano naimie dine billanona, duere llote:

—Naiñaiñoa abido ie jofomo oreta. Caímo duere jicanuabitesa.

<sup>24</sup>Jesús uai ote:

—Faificana jaillana naimaci jai jailla jira, daní cai judiúi cominimo cue Moo cuena oretate. Naimiedi judiñediñaiñoímo cuena oretañede.

<sup>25</sup> Ie facaise naimie dine naiñaiño billanona, naimiemo iobillacinona fecallena, caiñici ifodo ana rainada raité:

—Maestro, cuena cano.

<sup>26</sup> Judíuaiñedinona naimie canoñenana naiñaiño uñollena, naiñaiñomo Jesús llote:

—Uruiaí guillamona jiconiaina ecadicaídena, maraiñede.

<sup>27</sup> Naiñaiño dinena uai ote:

—Jii, maestro; iadedi jiconiaidi imaci nama guillamona fiebide guillemona guitimaci. —Iese llote; ia jiaie rafuemo comequina facade. Uruiaina llote; iadedi judíuaimo comequina facade. Jiconiaina llote; ia judíuaiñedinomo jiaí comequina facade. Comequina facade: “O cominimo o rafue duide; ia cai Namana o illa jira, nibai o rafue caimo janore duide”.

<sup>28</sup> Jesús uai ote:

—Cue uaina o inua jira, o jitailla rafuena finoiticue. —Ieconí naiñaiño jisa jillode. Janaba naiñaiñomona oni jaide.

### *Jesús ailluena duidinona jillotaja rafue*

<sup>29</sup> Nainomona Jesús bai jaillanona, Galilea railla jorai fuedo jaide. Iemei aneduaimo jaillanona, nainomo ana raide. Nainomo rilla mei, <sup>30</sup> ailluena comini naimie dine bitimaci. Ailluena duidinona atidimaci. Ñuja-ñujacaida macaritinona, onollina idisaruaidinona, uisininonona, uainidinona atidimaci. Diga duidinona naimie dine atidimaci. Iemei naimacina jillotate. <sup>31</sup> Ailli uainidino jai ñaiana cacajamona, ailli onollina idisaruaidino onolli jai marenana illana ciuamona, ailli ñuja-ñujacaidino macaritino jai marena macarillana ciuamona, ailli uisininidino jai ciuana ciuamona, nainomo ite comini eo rajicaidimaci. Cai Jusíñamuimo iobillacinona fecadimaci.

### *Jesúdi cuatro mil iñiaina eaja rafue*

(Mr 8.1-10)

<sup>32</sup> Jesús ie llofueoicagano naimie dine uaiduanona, raité:

—Bie comini darui amani bene cue diga illa jira, naimacimo guille jai iñede. Naimacina aimeri oretaiacaiñedicue, naisomo naimaci bai raillanona. Naimacina cue duenailla jira, naimacina canoacadicue.

<sup>33</sup> Jicanotimaci:

—¿Ninomona guille oiticaí, naimacina cai ecallena? Ailluena comini ite; iadedi jofue iñenanomo iticaí.

<sup>34</sup> Jesús jicanote:

—¿Niga llomenico omoimo ite?

Uai otimaci:

—Siete. Janorede llicisiriaí caimo jiaí ite.

<sup>35</sup> Comini ana raillena Jesús llote. <sup>36</sup> Naie llomenico llicisiriaí diga uanona, Jusíñamuimo iobillacino fecade. Tailluanona, ie llofueoicaganomo fecade, naie cominimo fecallena. <sup>37</sup> Nana guitimaci. Monidimaci. Monillamona, fiebide guillena iraidimaci. Siete cirigaiaimo oruitatimaci. <sup>38</sup> Nainomo cuatro mil iñiaí guitimaci. Naimaci ainiaí jiaí guitimaci. Naimaci uruiaí jiaí guitimaci. <sup>39</sup> Iemei cominina naimaci jofuemo orede. Naimacina oretaja mei, botodo Magdala railla eniruemo Jesús jaide.

## 16

### *Fariseuai comini Jesúmo siño rafuena finuana jicanuano billa rafue*

(Mr 8.11-13; Lc 12.54-56)

<sup>1</sup> Dajerie fariseuai comini Jesús dine bitimaci. Naimiema facacillena, dajerie saduceuai comini jiaí bitimaci. Siño rafuena naimie finuana jicaacadimaci. Iena naimie finoñedena, naimie ie llua isoi iñenana uñoitimaci. Naimiema duere finoacadimaci. Llotimaci:

—Iena cai cioillena, Jusíñamuina siño rafuena finota.

<sup>2</sup> Jesús uai ote:

—Jitoma sojcaidemo, mona jiairenia, raitomoi: “Ico are maremonanite”. <sup>3</sup> Jiaí raitomoi: “Jitiramo mona jiairenia, ja noci deite”. Monamo omoi eruailamona, marena monaillana uñotomoi; iadedi birui cue finoca rafuena raise uñoiacaiñedomoi. Omoi motomo birui suide rafuena raise cacaiñedomoi. Abina uñotinona abi caitadomoi. <sup>4</sup> Jecinona finocabidomoi. Jusíñamui dibeimo raise iacaiñedomoi. Siño rafuena finoñeiticue. Jonás micorimo jaie suide rafuena uñotomoi. Jusíñamui naimiemo siño rafuena finode. Naiemo comequiaina omoi faca. Fiodaillamona naimie jillode. Ie isoi cue jiaí jilloiticue. —Ie llua mei, naimacimona Jesús ie llofueoicagano diga oni jaide.

### *Jesús siritate rana llofuia rafue*

(Mr 8.14-21)

<sup>5</sup> Ruica dñe naimaci rillanona, ie llofueoicaigano llomeniconna feillana uibiñotimaci. <sup>6</sup> Iena naimie uñuamona, naimacimo Jesús llote:

—Fariseuai siritate ramona abina rairui. Saduceuai siritate ramona abina rairui. —Iese Jesús llote; iadedi naimaci llofuiacinomona abi rairuillena ñaite. <sup>7</sup> Jesús iese llua jira, iena naimaci raise cacaiñena jira, dani coniniri siadotimaci:

—Llomeniconna cai atañena jira, caimo iese llote.

<sup>8</sup> Naimaci siaduana Jesús uñña jira, naimie llua naimaci nia raise cacaiñena jira, naimacimo llote:

—Cue uaina nia raise iñoñedomoi. Omoína canoredicue. ¿Bue ñellena dani omoi llomenico iñenana siadotomoi? <sup>9</sup> ¿Niese iñoñedomoi? ¿Niese cue navui siño finoca rafuemo comeciaina facañedomoi? Navui cinco mil iññai cinco diganicodemo guitimaci. Monillamona, guigamona fiebillamona, doce cirigaiaimo iraidomoi. <sup>10</sup> Jiaicaiño cuatro mil iññai siete diganicodema guitimaci. Monillamona guigamona fiebillamona, siete cirigaiaimo iraidomoi. <sup>11</sup> Omoína cue ecallena, ¿niese cuena birui iñoñedomoi? Llomeniconna ailli ñañedicue. Fariseuai siritate ramona abina rairuillena ñaiticue. Saduceuai siritate ramona abina rairuillena ñaiticue.

<sup>12</sup> Ie facaise naimie llua jai cacadimaci. Llomenico siritate rana naimie ñañede; iadedi fariseui llofuiacinomona naimaci abina rairuillena ñaite. Saduceuai llofuiacinomona naimaci abina rairuillena ñaite.

*Pedro Jesúsna llua rafue*  
(Mr 8.27-30; Lc 9.18-21)

<sup>13</sup> Cesarea Filipo railla eniruemo Jesús jaidemo, ie llofueoicaiganomo jicanote:

—¿Niese jiaie comini cuena raitimaci?

<sup>14</sup> Uai otimaci:

—Damierie raitimaci: “Odi Juan Bautista micoridio”. Damierie raitimaci: “Odi Elías”. Jiaino raitimaci: “Jeremías micoridio”. Jiaino raitimaci: “Jusiñamui facaina lloraima micoridio”.

<sup>15</sup> Jesús dane jicanote:

—¿Niese omoi cuena raitomoi?

<sup>16</sup> Pedro uai ote:

—Odi cai jilloitaraimadio. Cristodio. Jusiñamui facaina lloraini micoriai o billena jaiel llotimaci. Cai cajede Jusiñamui Jitodio.

<sup>17</sup> Jesús dinena uai ote:

—Simón Pedro, Jonás jitodio. Marena llotio. Comini ona iena uññotañede; iadedi cue Moo Jusiñamui ona iena uññotade. <sup>18</sup> Pedro, o comecina uññotacue. Cuena como o lloga uaina meidoñeio. Bie rafuena jiaie cominimo o lluaamona, jai iñoitimaci. Cuena ñuamona, cue cominina jaitimaci. Cue dibeimo iñedino iena itatanidimaci. <sup>19</sup> Ailluena cominimo Jusiñamui ie cominina jailla rafuena nano lloraimana jaitio. O lluaicnodo jaitino cue cominina jaitimaci. O lluaicnodo jaiñeio cue cominina jaiñeioimaci

<sup>20</sup> Iena llua mei, ie llofueoicaiganona rairuide:

—Cue Cristonana bumo nia lloñeno.

*Jesús ie fodaillena llofui rafue*  
(Mr 8.31–9.1; Lc 9.22-27)

<sup>21</sup> Naie facaisemona ie llofueoicaiganomo Jerusalémo naimie jaillena marefodo llote:

—Nainomo cai judiaiai illai comini cuena eo duere finoitimaci. Cuena meineitimaci; iadedi darui amani illanona, fodaillamona jilloitacue.

<sup>22</sup> Pedro dinena lletade:

—Nama, ¡Jusiñamui iena jitañede! Bie isoide rafue omo suiñeite.

<sup>23</sup> Jesús jinafo dine naimiemo erodate. Raite:

—Cuemona oni jai. Iese ñañeno, Taife isoi o comecina o facaja jira. Jusiñamui isoi cuemo comecina facañedio. Comini isoi cuemo comecina facadio. Iese o comecina facañeno.

<sup>24</sup> Ie llofueoicaiganomo llote:

—Cue cominina bu jaiacania, ie jitaile rafuedo jaiñena. Cue dibeimo naimie jaillamona, duere sefuicana jaitie. Nibai naiemona fodaite. Bu iese jaiacania, cue dibeimo naimie iite.

<sup>25</sup> Duere sefuillana jaciruillamona cue cominina bu jaiacaiñena, ja muidomo faifite; iadedi duere sefuillana jaciruñenamona cue cominina bu jai, jaca faifñeite. <sup>26</sup> Cue cominina bu jaiñena, nibai eo duere sefuñeite. Nibai ailluena ra naimiemo iite; ia, ¿niese cue Moo dine riite? Nainomo naimie riñeno faifite. <sup>27</sup> Cue jaienisaí diga cue Moo dinena monamona íco biitacue. Cue Moo uai cuemo illanona, ebirena biitacue. Nagamie imaci finoca rafue diese cue iba ollena biitacue. Cue cominiñedinona duere finoitacue. <sup>28</sup> Uanaicnona omoimo lloitacue. Omoimona dajerie nia fodañeioimoimo, illamana cue bairrellena cioitomoi.

## 17

*Jesús abi meidocailla rafue**(Mr 9.2-13; Lc 9.28-36)*

<sup>1</sup> Seis digarui illanona, anedumo comini iñenanomo Jesús jaide. Naimie diga jaillena, Pedrona uite. Jacobona jiai uite. Jacobo ama, Juan, jiai uite. Jiaie llofueoicaiganona uifede. <sup>2</sup> Nainomo rilla mei, naimaci uicomo naimie abi meidocaide. Jitoma isoi naimie uieco bairecaide. Naimie iniroi naie daciaño eo userecaide. <sup>3</sup> Naie facaise naimacimo Moisés micori joreño, Elías diga bairede. Eliadi Jusiñamui facaina jaie lloraima. Jesús diga ñaitiiaimai. <sup>4</sup> Jesúsno Pedro llote:

—Nama, bene cai illana mare. O jitaia, daje amani bisaini fnoiticue. Daje oue; jiaie Moisés micori ie; jiaie Elías ie.

<sup>5</sup> Iena naimie nia lluanona, quenirede uillie billanona, naimacina ibaide. Uillie motomona Jusiñamui naimacimo llote:

—Bimie cue isiruiga Jito. Naimieri iobidicue. Naimie llamo cacareillanona, iena iño — llote. <sup>6</sup> Jesús llofueoicaigana iena cacajanona, eo jaciruillanona, naimaci uieco dinena ana bitadatimaci. <sup>7</sup> Jesús naimaci dine billano, naimacina jetajanona, raite:

—Mai jaciruiño naidacai.

<sup>8</sup> Naimaci erorillanona, dama Jesúsna ciodimaci. <sup>9</sup> Anedumona bitimacimo, naimacimo Jesús llote:

—Omoi ailli cúa rafuena bummo lloño, cue fiodaillanona cue jillua dinori.

<sup>10</sup> Naimiemo llotimaci:

—Moisés micori llogacina llofuerañi birui raicabitimaci: “Elías raillamie dane biite. Ie mei cai jilloitarama biite” raitimaci. Jusiñamuimona o billana iñoticai. Odi cai jilloitaramana iñoticai. Odi cai jilloitaramadiomo, ¿bue ñelli iese raitimaci?

<sup>11</sup> Uai ote:

—Raise iñotomoi. Elías isoidimie jai bite, nana Jusiñamui jitailla rafue raise llollena. Jusiñamui dibeimo naimaci illena, comini imaci comeciai meiduana llote. <sup>12</sup> Ero, naimie jai bite; iadedi bie comini naimiena raise uifnoedimaci. Naimaci jitailla jira, naimiena jai meinetimaci. Ie isoide. Naimacimona duere sefuiticue. Monamona biticue, iimana cue jaillena; iadedi duere sefuiticue.

<sup>13</sup> Ie muidona Jesús llofueoicaigano naimiedi Juan Bautista micorina ñaiana jai uifnotimaci.

*Jesúdi Janaba anamo itimiena jillotaja rafue**(Mr 9.14-29; Lc 9.37-43)*

<sup>14</sup> Ie jiaie llofueoicaigano dine Jesús abido ria, nainomo ailluena comini itimacimo ride. Jesús dine damie billanona, naimiena raise uaiduanona, cañici ifodo rainadacaída raite:

<sup>15</sup> —Maestro, cue jitona duenai. Janaba anamo naimie ite. Iemona naillcabide. Duere sefuide. Uai-uacabide. Jiaicaiñodedi iraimo uailanona, uside. Jinuimo jai uailanona, niadedi corobaite. <sup>16</sup> Naimiena jilloitallena o llofueoicaigano dine naimiena atidicue; iadedi naimiena jillotanidimaci.

<sup>17</sup> Iena cacajanona, Jesús ie llofueoicaiganomo llote:

—Cue uai siñonana nia iñnoedomoi. Cue mare rafuedo nia raise jiacaiñedomoi. Omoi diga are iticue. Raise omoi iñollena, ¿nie dinori omoi diga iticue?

Naie duidimie moomo llote:

—O jito cue dine mai ati.

<sup>18</sup> Naimiena atiamona, Jesús naimiemo Janaba illana uifnote. Janabana Jesús lletaja jira, naie uruemona Janaba oni jaide. Ieconia naie urue jillode.

<sup>19</sup> Ie mei ie llofueoicaigano Jesúsno anado jicanotimaci:

—¿Bue ñellena Janabana oni oretanidicai?

<sup>20</sup> Uai ote:

—Raise nia omoi iñnoñena jira, uanaicina omoimo lloiticue. Janaba oni oretallena, cue uai navu omoimo iticue. Birui raise cuena omoi iñnoñena, bie Janaba oni oretanidomoi. Jusiñamuina eo janore iñotomoidena, diga rana finodomoi. “Oni bai jai” bie anedumo llotomoidena, omoina naimie canuamona, bie anedu oni liai bai jaite. Jusiñamuina omoi iñoia, naga rana finoredomoi. <sup>21</sup> Jusiñamuimo omoi comeciaina facallena omoi guiñenamona, Jusiñamui diga omoi ñaiamona, bie isoide Janabana oni oretaredomoi.

*Jesús ie fiodaillena dane llofua rafue**(Mr 9.30-32; Lc 9.43-45)*

<sup>22</sup> Galileamo ie llofueoicaigano diga danomo itemo, Jesús naimacimo llote:

—Monamona billanona, iimana jaidicue. Jusiñamui jitailla jira, cuena jiaie comini gaitajanona, illaicominimo fecaitimaci. <sup>23</sup> Naie illaicomini cuena meineitimaci; iadedi darui amani illamona, cue Moo cuena jillotaite. —Iena cacajanona, ie llofueoicaiganodi sunaitimaci.

*Jesúmo Jusiñamui jofu facaina damie ibataja rafue*

<sup>24</sup> Capernaumo naimaci rilla mei, Jusiñamui jofu ucube oraini Pedro dine jicanuaibite:

—Moisés micori llua isoi, ¿o llofueraima Jusiñamui jofomo ucubena fecacabide?

<sup>25</sup> Pedro dinena uai ote:

—Jii, fecacabide. —Ucube oraini jailla mei, jofomo Pedro billanona, Jesúmo iena nia lloñedemo, Jesús dinena naimiemo jicanote:

—Simón Pedro, ¿niese o comecina raitio? ¿Bumona illaicominidi imaci ucubena ocabitimaci? Imaci jitonaiimona ocabiñedimaci; ia naimacimo duide cominimona otimaci.

<sup>26</sup> Uai ote:

—Raise llotio. Naimacimo duide cominimona ocabitimaci.

Ie jira Jesús raite:

—Naimaci jitonaiaina ibatañede. Ie isoide. Naie ucube Jusiñamui jofomo comini fecajamona, Jusiñamuimo duide. Jusiñamui Jitona cue illa jira, naimie jofu facaina naimie cuena ibatañede; <sup>27</sup> iadedi Jusiñamui jofu ucube orainina coco icinellera, ucubena jenuai. Joraimo aimajaitosa jai. Nano o olle lliciai fuena jibui. Nainomo ucubena baitio. Iena uanona, Jusiñamui jofomo coco facaina feca. —Pedro iena finode.

## 18

*Jesús ie llofueoicaigano moto imiēna ille rafue*

(Mr 9.33-37; Lc 9.46-48)

<sup>1</sup> Naie facaiseconi naimie dine ie llofueoicaigano jicanuaibitimaci:

—Jusiñamui ie cominina sedajanomo ico cai ia, ¿bu cai moto imiēna ille?

<sup>2</sup> Iena cacajanona, Jesús daje urue uaiduanona, naimaci motomo jonete. <sup>3</sup> Uai ote:

—Uanaicinona omoimo lloiticue. Jusiñamui dibeimo omoi illena, jeacinona omoi fainonocaiñenia, bie urue isoi omoi moto imieñedimena illanona, Jusiñamui sedajanomo iñetomoi. Cue cominina omoi ia, bie urue isoi iitomoi. <sup>4</sup> Bie urue isoi abi iedoñedimedi Jusiñamui ie cominina sedajanomo imie moto naimiēna ille. <sup>5</sup> Bie isoidimie cuemo duillamona, naimiēna feiñotimiedi cuena jai feiñote; <sup>6</sup> iadedi cuena iñotimienajaecinona finotaiacadimie iena finoñellena, jeacinona finotaiacadimie cimaioimo aillue nofici maianona joraimo corobaillena, naimiēna dotacadena, cuemona mare.

*Jesúdi jeacinona finoñenana llofuia rafue*

(Mr 9.42-48; Lc 17.1-2)

<sup>7</sup> Jesús llote:

—Ramo faitino duere sefuillea. Diga ramo omoi faicana uitinomo riitomoi; iadedi Jusiñamui omoi ramo faitimienana duere finoite. <sup>8-9</sup> Biena ñaiticue. Nie isoide rafue omoina jeacino finotaia, iena llinoñeno. Naie rafue dine jaiñeno. Iemo eruaiñeno. Rana omoi jetaja jira, omoi ciua rana jira, omoi jitaillamona jeacino finodomoi. Omoi abina omoi namatañeniadedi, omoi onolli jaita. Omoi uisina juicono. Iemona jeacinona finoñellena, Jusiñamui dine daje onolli diga, daje eilli diga, daje uisi diga riitomoi; ia jeacinona omoi finoia, iraimo jaitomoi. Omoi comecina ñaiticue. Omoi abina omoi raise namatallena, omoi comeci nano raise fino. Jeacino omoi finoia, iraimo jaitomoi. Nana omoi abi diga iraimo jaitomoi. Iramo omoi jaiñellena, jeacino finoñeno.

*Jesúdi naimiēna iñotinomona damie faifillana jitañena rafue*

(Lc 15.3-7)

<sup>10</sup> Jesús llote:

—Urue isoi omoi illena como lloticue. Iena dane lloiticue. Cue Moo naimacina uifña jira, bie urue isoidinona jamaiñocaiñeno. Monamo cue Moo ecimo naimaci jaienisai jaca ite, naimacina canollena. <sup>11</sup> Jusiñamuimona cue billanona, naimiēna iñofedinona naimaci jeacinomona jilloitallena biticue. <sup>12</sup> Ero, omoimo iena jiaie rafuedo lloiticue. Damiemo cien diga toica llauda ite. Naiemona daje feiraite. Iena faifiñellena, jiaie llaudaiaina fainonocaida, iena jenuaite. <sup>13</sup> Iena baillanona, ieri iobite. Baillari oni jaiñedinori baiñemo iobite. <sup>14</sup> Ie isoide. Jusiñamui naimiēna iñotinomona damie faifillana jitañede. Ie jira naimacina jeacinona finotañeno.

*Jesús omoi ecimo itimie omoina jeare finuana llofuia rafue*

(Lc 17.3)

<sup>15</sup> Jesús nia llote:

—O ecimo itimie ona jeare finoia, naimie dine iena lluai. Daímaia: iena omico llono. O uai naimie fairioia, naimie o dibeimo jai iite. <sup>16</sup> O uai naimie fairioñenia, jai menamienua uiño, o llua mo iaimaia: cacareillesa. <sup>17</sup> O uai naimie fairioñenia, omoi ofiracomo bicabitinomo iena llono. Naimaci uai naimie fairioñenia, Jusiñamuina iñoñedimiena omoi nabaiñena isoi, Moisés llogacinodo raise jaiñedino omoi nabaiñena isoi, naimiena nabaiñeno. Omoi ofiracomo naimiena feiñoño. <sup>18</sup> Iese omoi finoia, omoi comecia: daje isoi lloillamona, Jusiñamuimona mare.

<sup>19</sup> Omoi nia lloiticue. Daje isoi comecina cue Moo Jusiñamuimo jicallena menamaia: facajamona, cue Moomo iaimaia: jianona, cue Moo iaimaia: jitaile rafuena finoite. <sup>20</sup> Menamie cue dibeimo illamona, damie amani cue dibeimo illamona, naimaci motomo iticue.

<sup>21</sup> Pedro naimiemo jicanuaibite:

—Nama, cue ecimo itimie cuena jeare finoia, ¿niga icaño ibana cue oño iena feitaiticue? Nibai siete digacaiño.

<sup>22</sup> Jesús dinena uai ote:

—“Nibai siete digacaiño” raitio. Ona jeare finodimie ie finoca rafuena naga icaño feita. Iena omoi raise uiñollena, bie rafuena lloiticue.

<sup>23-24</sup> Jusiñamui ie dibeimo itinona iese sedaite: Daje nairai illaimadi ie maijirainina uaidote, naimaci cuentas iballena. Damie eo debede. Diez mil ucubena debede. <sup>25</sup> Naimie ucube iñena jira, naie illaimadi ie cuenta iballena, naimie ai, ie uruai diga, nana ie raruai diga, fecallena llote. <sup>26</sup> Iena cacajano, ie illaima uicomo cañici ifodo raita duere jicade: “Nama, dama ite. Fecuisse omoi ibaiticue”. <sup>27</sup> Naimie duenailamona, naie illaima llote: “Ibatañeiticue. Cuemo jai debeñedio. Mai jai”. <sup>28</sup> Ie mei naimie jaide. Bai jaillanona, jiaie maijiraima diga dafafide. Jai debeñedimieo janore debede. Cien ucubena debede. Jai debeñedimie dinena ie cimaina llinuana llote: “O debia cuemo mai iba”. <sup>29</sup> Ie jira debedimie cañici ifodo ana rainadacaida, duere jicade: “Ucube cuemo iñede; iadedi cuena dueni. Fecuisse omoi ibaiticue”. <sup>30</sup> Uai ote: “Ja raire jitaideici”. Naimiena duenaiñena jira, cárcelmo naimiena jonetade, ie cuenta iballe dinori. <sup>31</sup> Naimie nabaiñia: iena fidianona, sunaitimaci. Ie jira naimaci illaima dine nana naie rafuena lluidimaci. <sup>32</sup> Naie illaimadi nano debedimiena abido uaiduano, naimiemo llote: “Maraiñedio. Navui o cuentana ibatañedicue, cuemo o duere jicanua jira. <sup>33</sup> ¿Bue ñe o nabaina duenaiñedio, ona cue duenaila isoi?” <sup>34</sup> Icirillamona, naie illaima naimiena cárcelmo jonetade, nainomo duere sefuillena, nana ie cuenta iballe dinori. <sup>35</sup> Ie isoide. Cue Moo Jusiñamui omoi duere finoite, omoi comecia: jitaillamona omoi ecimo itimie ie maraiñede finoca rafuena omoi feitañenia —llote.

## 19

*Jesús iima ie aina dotaja rafuena llofua rafue  
(Mr 10.1-12; Lc 16.18)*

<sup>1</sup> Ie llofueoicaigano diga Galileamona jaillanona, Jordán railla ille ruica dibeimo Judeamo Jesús jaide. <sup>2</sup> Ailluena comini naimiena racadimaci Nainomo duidinona jillotate. <sup>3</sup> Naimiena facacillena, dajerie fariseuai naimie dine bitimaci. Rafuena jicanoiacadimaci. Naimaci uai naimie raise oñenia, naimiena duere finoacadimaci. Jicanotimaci:

—¿Iima ie aina dotajana rairuidio? ¿Nie isoide rafue muidona damie ie aina dotarede?

<sup>4</sup> Jesús dinena uai ote:

—Moisés micori jaie cuete: “Enirue finua facaiseconi Jesiñamuidi come iaimaiaina finode. Iimana finode. Riñoa jia: finode”. <sup>5</sup> Ie jira Jusiñamuidi jaie llote: “Ie ai diga illena, iima ie moona fainonocaita. Ie aina jia: fainonocaita. Ie ai diga illamona, menade comedi daamienua jai jaide” llote. <sup>6</sup> Menade come jai damiena jai ite. Jusiñamui iese iaimaiaina itataja jira, iima ie aina dotañellesa. Riño ie inina dotañellesa.

<sup>7</sup> Dane jicanotimaci:

—¿Bue ñe Moisés micori cuete: “Iima ie aina dotaacania, dotalle rabena nano cuete. Ie mei naiñañona dotaite?”

<sup>8</sup> Jesús uai ote:

—Jusiñamui uaina raise omoi iñoñena jira, Moisés micori iima ie aina dotajana rairuidie; iadedi nano dofoconi iese iñede. <sup>9</sup> Jiaie riño diga naimie illena, ie aina bu dotaia, jiaie iima diga naiñaiño iñenia, naimiedi jeacinona jai finode. Ie aina dotajana rairuidicue.

<sup>10</sup> Naimiemo ie llofueoicaigano dinena llotimaci:

—Iese ia, cai jitaillamona aina jamai cai dotanina jira, damamei ainidicaí.

<sup>11</sup> Naimacimo Jesús llote:

—Nana comini omoi como llucinodo jainidimaci. Dani Jusiñamuina jitaiddino iedo jairedimaci. <sup>12</sup> Dajerie naimaci jeiciamona aireiacaiñedimaci. Dajerie naimaci abina diamona aireiacaiñedimaci. Dajerie Jusiñamuina eo sedaacanano aireiacaiñedimaci.

*Jesús; naimie dine urui; billana jitailla rafue*  
(Mr 10.13-16; Lc 18.15-17)

<sup>13</sup> Jesús dine comini naimaci jesanidena atisite. Ie onolli naimacimo naimie joniamona, naimaci facaina naimie Moo diga naimie ñaillena atisite. “Naimacina raise cano” ie Moomo llollena jitaiddimaci. Ie llofueoicaigano iena rairuidimaci; <sup>14</sup> iadedi Jesús raite:

—Urui; cue dine billesa. Naimacina rairuiñeno. Cuen a bie isoide inotinodi Jusiñamui ie cominina sedajanomo jainaiddimaci.

<sup>15</sup> Ie jira ie onolli naimacimo jonete. Naimie facaina Jusiñamui diga ñaite, naimaci marena illena. Ie mei ie llofueoicaigano diga naimie oni jaide.

*Ucuberedimie Jesús diga ñaia rafue*  
(Mr 10.17-31; Lc 18.18-30)

<sup>16</sup> Jesús oni jaillanona, conirue Jesús dine bite. Jicanote:

—Maestro, Jusiñamui diga cue jaca illena, ¿nie isoide mare rafuena finoiticue?

<sup>17</sup> Jesús dinena uai ote:

—¿Bue ñe cuemo mare rafuena finuana jicanotio? Dama damie maremie. Naimiedi Jusiñamui. Naimiemo jicano; ia jaca o illena, Jusiñamui jai llogacinuaina inocana jai.

<sup>18</sup> Uai ote:

—¿Nie llogacinuaina inoiticue?

Jesús dinena uai ote:

—Comena meineño. O aiñede riño diga iñeno. Fiiñeno. Jiaimiena o llogidoia, tainona lloñeno. <sup>19</sup> O moo uaina ino. O ei uaina ino. O abina o isiruilla isoi, nana cominina isirui.

<sup>20</sup> Naie conirue uai ote:

—Nana iena jai inoiticue. ¿Nie isoide rafuena nia finoiticue?

<sup>21</sup> Jesús dinena uai ote:

—Jusiñamui jitaillacinodo o jaiacania, o raise marebicaiacania, omo ite raruiaina feca. Naie ucubena dueredinomo feca. Cuen a o inuamona, monamo ico jaca iitio. Cue llofuegamiena o illena, mai cue diga bi.

<sup>22</sup> Iena naimie cacajano, sunaite. Naimiemo eo ailluena ra illa jira, iena fecaacaiñede.

<sup>23</sup> Jesús ie llofueoicaiganomo lote:

—Uanaicinona omoimo lloiticue. Ucuberedimiedi Jusiñamui cominina jaillena eo sefuirute. <sup>24</sup> Iena nia lloiticue. Igado ifodo camello jaca jainide. Ie isoide. Ie ra isiruillamona, ucuberedimiedi Jusiñamui ie cominina jai raise jainide.

<sup>25</sup> Iena ie llofueoicaigano cacajano, Jusiñamui cominina ucuberedino raise jainina jira, “¿Nie se dueredinodicaidi Jusiñamui cominina jaitica?” raillamo comeciaina facadimaci. Rajjicaillanona, raitimaci:

—Nana comini rana jitailla jira, buca jillobiti.

<sup>26</sup> Naimacimo eruailanona, Jesús raite:

—Nana comini dani jillobinidimaci; iadedi Jusiñamuidi naimacina jillobitarede.

<sup>27</sup> Pedro uai ote:

—Ero, o llua isoi nana cai rana fainonocaida, o diga jaicabidicai. ¿Nie se Jusiñamuimona ibana feiñoiticai?

<sup>28</sup> Jesús dinena uai ote:

—Illaimana ico cue ia, eo ebirede illanomona cominina sedaiticue. Cue diga omoi jaicabilla jira, nainomo omoi illanuai jai iite, nainomona omoi judiua; doce nairaiaina omoi sedallena. <sup>29</sup> Cuen a naimie isiruillamona, ie jofona bu fainonocaia, ie amatiaina bu fainonocaia, ie miriñuaina bu fainonocaia, ie moona bu fainonocaia, ie eina bu fainonocaia, ie uruiaina bu fainonocaia, ie eniruena bu fainonocaia, Jusiñamuimona ailluena ibana feiñoite. Monamo ico caimare iocire jaca iite. Nainomo benomo baifemo iocire caimare iite. <sup>30</sup> Jamai bue isoidomoi. Omoimona jaino jamai bue isoiñedimaci; ia naimie cominina naimaci jaillamona, Jusiñamuimona naimaci diga daje isoidomoi. Naimie diga jaca iitomoi.

## 20

*Jesús Jusiñamui ie cominina sedaacana llua rafue*

<sup>1</sup> Jesús llote:

—Jusiñamui dibeimo comini jailla rafuena lloiticue. Naimie cominina naimaci jaillamona, Jusiñamuimona nana naimie comini daje isoidimaci. Iena raise omoi uñollena, bie rafuedo iena lloiticue. Jitiramo daje patrón ie illimo majillena, majiuidinona jenuaide.

<sup>2</sup> Dajerierna baillanona, “Omoimo daberie ibaiticue” llote. “Jee” raitimaci. Iecon iie illimo



majjillena, naimacina orede. <sup>3</sup>Jitoma nia oni daidemo, mercadomo naimie jiañona ciode. Jamai itimaci. <sup>4</sup>Ie jira naimacimo lloste: “Cue illimo majjiai. Raise ibaiticue” lloste. <sup>5</sup>Ie mei jaidimaci. Jitoma naidai ia, jiañona ciuanona, naimacimo majjillena lloste. Jitoma oni caidemo, jiañona ciuanona, naimacimo majjillena jai lloste. <sup>6</sup>Jitoma jasici muido itemo, jiañona ciuanona, jicanote: “¿Bue ñellena namonana jamai itomo?” <sup>7</sup>Uai otimaci: “Jaca caimo majjille rana budi lloñede”. Ie jira naimacimo lloste: “Mai. Cue illimo majjiai” lloste. <sup>8</sup>Jitoma edaciidemo, naie patrón ie mullaímamo lloste: “Majjirainina uaido. Jinafona majjiaidinona raire nano iba. Ie mei jítiramo majjiaidinona jinafo iba” lloste. <sup>9</sup>Ie jira jinafona majjiaidinona nano ibade. Dabe ibade. <sup>10</sup>“Naimaci baifemo feiñoiticai” raillamo jítiramo majjiaidino comeciaina facadimaci; iadedi iese feiñoñedimaci. Nana daberie feiñoitimaci. <sup>11</sup>Ie jira naie patrón joreña jeare ñaitimaci: <sup>12</sup>“Jinafona majjiaidino dallu majjidimaci. Ecasilla facaise majjñedimaci; iadedi namonana majjidicai. Dani cai ibaja isoi ibadio” ñaitimaci. <sup>13</sup>Naimacimona damiemo naie patrón lloste: “Ero, ona jeare finoñedicue. ‘Omo daberie facaiticue’ omo lloticue. O dinena: ‘Jee’ raitio. <sup>14</sup>O ucubena jai o feiña jira, mai jai. Cue jitailla jira, da o ibaja isoi dallu majjidinona ibadicue. <sup>15</sup>Cue ucubena jira, cue jitailla isoi cue ibaia, ¿niese cuena jeare ñaitomo? Jiañona cue duenaillanona, ¿bue ñellena uradoidomo? Mai jai” lloste. Jusiñamui ie cominina sedaacana omoi raise uñollena, bie rafue jai lloticue. <sup>16</sup>Jamai bue isoidomoi. Omoimona jiaño jamai bue isoñedimaci; ia naimie cominina naimaci jaillamona, Jusiñamuiomona naimaci diga daje isoidomoi. Naimie diga jaca iitomoi.

*Jesúdi ie fiodaillena dane llua rafue*  
(Mr 10.32-34; Lc 18.31-34)

<sup>17</sup>Jerusalémo ie llofueoicaigano diga Jesús jaidemo, dani naimaci diga ñaillena, naimacina oni uite. <sup>18</sup>Raite:

—Ero, Jerusalémo jai jaidicai. Monamona billanona, iimana jaidicue; iadedi omoi illaicomini cuena gaitaitimaci. Gaitaja mei, cue meinellena lloitimaci. <sup>19</sup>Judiuañedino illaicominimo cuena fecaitimaci. Cueri jifanoitimaci. Cuena faitimaci. Ie mei cuena coraitimaci; iadedi cue fiodailla mei, darui amani illanona, Jusiñamui cuena jillotaite.

*Jesús dine Jacobo Juan iaímaiaí ei billa rafue*  
(Mr 10.35-45)

<sup>20</sup>Naie facaise Jesús dine Jacobo, Juan iaímaiaí ei diga, bitiaímaiaí. Iaímaiaí moodi Zebedeo. Jesús dine iaímaiaí ei rillanona, naimiena raise uaidollena, cañici ifodo ana rainadacaida lloste:

—Omo daje rafue jicanoiacadicue.

<sup>21</sup>Naiñaiño mo Jesús dinena jicanote:

—¿Bue ñaibitio?

Naiñaiño uai ote:

—Illaimana o jailla mei, cue jito iaímaiaí o ecimo illana o lluaña jitaidicue. Damie o nabeimo. Jiaimie o jarifebeimo. —Jiaino baifemo iaímaiaí illena, naiñaiño iese lloste.

<sup>22</sup>Naimacimo eruailanona, Jesús dinena uai ote:

—O jitaillacinona raise uññoñedicue. Cue duere sefuiticue.

Naiñaiño jito iaímaiaímo jicanote:

—¿Ie isoi duere sefuiacadomico?

Uai otiiaímaiaí:

—Jii.

<sup>23</sup>Jesús dinena raite:

—Cue isoi duere sefuitomico; iadedi cue nabeimo omico illena, cue jarifebeimo omico illena itatanidicue. Naie illano jai cue Moo finoca, nainomo iitino iena.

<sup>24</sup>Iena jaiie llofueoicaigano cacajano, naie iaímaiaíri iciritimaci. <sup>25</sup>Jesús nana naimacina uaiduanona, raite:

—Nana illaicominidi naimaci anamo itinona ocuicabidimaci; <sup>26</sup>iadedi omoi dine iese iñena. Omoimona bu imienu iacania, omoi mullaimana naimie jaisoillasa. <sup>27</sup>Omoimona bu imienu iacania, omoimona naimie canocana jaisoillasa. <sup>28</sup>Cuemona fueo. Biñedicue cominina cue ocuillena; iadedi cominina canuaibidicue. Cue jitailla jira, nana comini facaina fiodaisaibiticue. Naimaci jeacinomona naimaci jillobillena, fiodaisaibiticue. Ailluena comini cuena inuamona jilloitimaci. Cominina omoi canua —lloste.

*Jesús mena uisindiaímaiaína jillotaja rafue*  
(Mr 10.46-52; Lc 18.35-43)

<sup>29</sup> Jericó railla nairaimona jaidimacimo, ailluena comini naimaci jinafona racadimaci.  
<sup>30</sup> Te facaiseconi mena uisindiaimaiai nai fuemo raidiaimaiai. Jesús naiedo jaillano cacajano, naimiena ado uaidotiaimaiai:

—David micori Jitona o illamona, Jusiñamumona o billa jira, cocona duenai. Cocona cano.

<sup>31</sup> Iaimaiai llicaillena, Jesús diga jaidino iaimaiaina lletade; iadedi eo cuirioidiaimaiai:

—Maestro, David micori Jitona o illamona, cocona duenai.

<sup>32</sup> Iaimaiaina Jesús cacajano, ieconi naidadajanona, iaimaiaina uaidote. Jicanote:

—¿Niese omicono cue nibaiana jitaidomico?

<sup>33</sup> Uai otiaimaiai:

—Maestro, coco uisina o cioitajana jitaidicoco.

<sup>34</sup> Iaimaiaina duenaillanona, iaimaiai uisina jetade. Ieconi iaimaiai uisidi ciode. Iaimaiai jai cuanona, ie llofueganona iaimaiai jaillena, Jesús diga jaidiaimaiai.

## 21

*Jesús illaima isoi Jerusalémo jailla rafue*

(Mr 11.1-11; Lc 19.28-40; Jn 12.12-19)

<sup>1</sup> Oni jaillanona, Jerusalémo iaieicaidimacimo, Betfagé railla nairaimo Jesús ie llofueoicaigano diga ridimaci. Olivos railla anedumo ite. Ie llofueoicaiganomona Jesús menamiena orede. <sup>2</sup> Raite:

—Bie nairai illa uicomo mai omico jai. Nainomo cuinaca burrana baitomico. Ie ecimo ie uruena baitomico. Naie iaimaiaina suiñuano bene ati. <sup>3</sup> Omicomo “¿Bue ñellena bie suiñodomico?” bu jicanoia, llono: “Coco Nama naie iaimaiaina jitaide. Nailli naimie iaimaiaina raire abido oretaita” —raite.

<sup>4</sup> Jusiñamui facaina lloraima micori jaie llua isoi, bie rafue suide. <sup>5</sup> Naimie micori jaie cuete:

Jerusalén itinomo llono:

“Ero, omoi illaima omoina sedallena biite.

Abi iedoñeno biite.

Burra urue emododo naimie biite”

cuete. <sup>6</sup> Iaimaiai jaillanona, Jesús llua isoi finodiaimaiai. <sup>7</sup> Burra ie urue diga atidiaimaiai. Burra urue emodomo naimie llofueoicaigano naimaci iniroina joblanona, ie emodomo Jesús rainadate. <sup>8</sup> Naimiena iobitallena, illaima isoi naimie jaillena, ailluena comini imaci iniroi diga, naiso motomo jobedimaci. Jiaino raforono uanona, naiso motomo jobedimaci. <sup>9</sup> Dajerie Jesús uicomo jaidimaci. Dajerie naimie jinafona jaidimaci. Ado cuiriisite:

—¡Cai Jilloitaraima billa! ¡Naimiedi David micori Jito! ¡Jusiñamui mamecido bitimie eo mare! ¡Jusiñamui caina jilloitajasa!

<sup>10</sup> Jerusalémo naimie ridemo, nana nainomo itino naie rafuena uñioiacadimaci.

—¿Buta bite? —jicanotimaci. <sup>11</sup> Jesús diga bitino dinena uai otimaci:

—Jesús bite. Naimiedi Jusiñamui facaina lloraima. Galileamo ite Nazaret imie.

*Jesúdi Jusiñamui jofomona damierena dotaja rafue*

(Mr 11.15-19; Lc 19.45-48; Jn 2.13-22)

<sup>12</sup> Jerusalémo Jesús rilla mei, Jusiñamui jofomo naimie jaide. Naie jofu eo aillue. Diga cuartos nainomo ite. Jusiñamui ofomaiaina fecallena, naimiemo toica llaudaiaina fecallena, nainomo comini jaisoidimaci. Naie cominina ibatajanona, ofomaiaina, toica llaudaiaia diga, damierie fecauidimaci. Iena Jesús cuanona, naimaci mesaiaina oni caicode. Ucugina fecauidino rairacuai jiaí oni caicode. <sup>13</sup> Naimacimo llote:

—Ie facaina lloraima Jusiñamui llogacino jaie cuega: “Cue jofu ite, nainomo cuemo comini jillena” cuega. Ero, ailluena omoi ibataja jira, naimie jofona firiruidino jofona omoi finoca.

<sup>14</sup> Ie facaise uisindino Jusiñamui jofomo naimie dine bitimaci. Ñuja-ñujacaida macaritino jai bitimaci. Naimaci billanona, Jesús naimacina jillotate. <sup>15</sup> Nainomo Jesúdi diga mare rafuena finode. Diga cominina jillotate. Iena cuanona, nainomo ite uruaiaí ado cuiriisite:

—David micori Jitori iobidicai. Jusiñamui lloraini micoriai jaie llua isoi, cai Jilloitaraima jai ite.

Iena cuanona, iena cacajanona, judiaiaí illaicomini iciritimaci. <sup>16</sup> Naimiemo jicanotimaci:

—¿Bie uruaiaí cuiriillana cacadio?

Jesús dinena uai ote:

—Jii, cacadicue. David micori iena jaie cuete. ¿Niese iena cacaiñedomoi? Naimie cuete:

Naimiemo Jusiñamuidi uruaiaina mare iobillacinona fecataite.

<sup>17</sup> Naimacina fañonocaida, Betaniamo Jesús jaide, nainomo inillena.

*Jesús higuera railla riarana faidua rafue**(Mr 11.12-14, 20-26)*

<sup>18</sup> Ie areruido Jerusalémo abido ie llofueoicaigano diga Jesús bia, aimetaité. <sup>19</sup> Nai fuemo higuera railla riarana ciuanona, iena jibuide. Naiemo naie llisilladi iñede. Dama ie ibena ciode. Ie jira naie amenana llote:

—Biemona jaca llisiñeite. —Iese railla dacaño naie riaradi duide. <sup>20</sup> Ie llofueoicaigano iena ciuanona, rajijcaillamona raitimaci:

—¿Ñiese naie riará raire duide?

<sup>21</sup> Jesús dinena uai ote:

—Uanaicinona omoimo lloiticue. Cue Moona raise omoi ñnoia, bie isoide rafuena finoitomoí. Raise omoi ñnoia, omoi comeci igireñenia, bene ite anedumo omoi lloia: “Monailaimo o illena, benomona mai jai”, Jusiñamui o jitaile rana finoite. <sup>22</sup> Naimie iena finuana omoi ñnuamona, nie isoide rafue cue Moomo omoi jicajia, iena naimie finoite.

*Jesúdi ie siño uaina llua rafue**(Mr 11.27-33; Lc 20.1-8)*

<sup>23</sup> Jerusalémo rillanona, Jusiñamui jofomo Jesús fo jailla mei, nainomo ite cominina llofueite. Judíuai illaicominí naimie dine billanona, jicanotimaci:

—¿Ñie isoide uaido o finoca rafuena finodio? ¿Bu omo iga uai diga o finoca rafuena finodio?

<sup>24</sup> Jesús dinena uai ote:

—Omoimo daje rafuena nano jicanoitícue. Raise omoi fairioia, omoimo cue uaido cue finoca rafuena lloiticue. <sup>25</sup> Juan Bautista micorídi cominina navui bautizade. ¿Bu naimie micorina orede, cominina bautizallena? ¿Jusiñamui? ¿Cominí? Cuemo llono —llote.

Dani coniniri iena siaduanona, anado raitimaci:

—“Jusiñamui” cai fairioia, caimo jicanoite: “¿Bue ñllena naimie micorí lluana ñnoñedomoí?” <sup>26</sup> “Cominí” cai fairioia, bene itino caina ñbai meineitimaci, Juan micorídi Jusiñamui facaina lloraíma naimaci railla jira.

<sup>27</sup> Ie jira fairiotimaci:

—Uiñoñedicaí.

Jesús dinena raite:

—Ie muidona cuemo nie isoide uai illana omoimo llofeitícue.

*Jesúdi mena jito iaímaiaí illa llua rafue*

<sup>28</sup> Judíuai illaicominímo Jesús llote:

—Bie rafuemo omoi comeciaina faca. Damiemo mena jito ite. Nano doforamiemo llote: “Moo, cue illimo birui maijiaí”. <sup>29</sup> Uai ote: “Jaiacaiñedicue” llote. Dally illanona, ie comecina dane facajano, maijaide. <sup>30</sup> Jiaie jítomo daje isoi llote. Naimie uai ote: “Jii, maijaitícue” llote. Iese llote; iadedi maijaiñede. <sup>31</sup> ¿Ñie jítoca ie moo jitailla rana finode? —jicanote.

Uai otimaci:

—Nano doforamie.

Jesús dinena naimacimo llote:

—Uanaicinona omoimo lloiticue. Omoina ñaitícue. Omoimona marañedimaci; iadedi Jusiñamui cominina naimaci jaillamona, gobierno ucube orainí Jusiñamui illanomo iitimaci. Callirediñaiñuaidi nainomo jiaí iitimaci; iadedi nainomo jaca iñeitomoí. <sup>32</sup> Marena omoi comeciaina itatallena, Juan micorí navui bite; iadedi naimie micorína ñnoñedomoí. Ucube orainí naimie micorí rafuena ñnotimaci. Callirediñaiñuaidi naimie micorí rafuena ñnotimaci. Iena uiñotomoí; iadedi omoi comeciái iuaillaina meidoñedomoí. ñnoñedomoí.

*Jesúdi marañede majirainí rafuena llua rafue**(Mr 12.1-12; Lc 20.9-19)*

<sup>33</sup> Judíuai illaicominímo Jesús llote:

—Jiaie rafuena omoimo lloiticue. Iemo cacarei. Daje patrón uvas railla riaraiaina rite. Naie abi llaité. Jiairuido uvas ijina eenollena, enruemo ifona raite. Naie illina raise eruallena, tidacana finode. Iena sedallena, ibatajanona jiaínomo fecade. Ie mei jiaie enruemo jaide. <sup>34</sup> Uvas jai einaila facaise riaraiaina sedarainí dine naie patrón janore mullaíaina orede, naimie facaise iedínona naimie feiñollena; <sup>35</sup> iadedi naie sedarainídi ie mullaíaina duere finosite. Daje mullaímana fatimaci. Jiaímienna meinetimaci. Jiaímienna noficina fairínotimaci. <sup>36</sup> Ie mei patrón jiaie mullaíaina orede. Naimacina jiaí duere finodimaci. <sup>37</sup> Ja muidomo ie jítona orede. “Cue jítona jaciruitimaci. Naimie uaina ñnoitimaci” comecina facade. <sup>38</sup> Riaraiaina sedarainí naimienna ciuanona, coniniri raitimaci: “Bimiemo bie illí fiebiite, naimie moo fiodailla mei. Naimienna cai meinelli, bie illí

caimo fiebillesa” raitimaci. <sup>39</sup> Naimiena jino dotajanona, naimiena meinetimaci. <sup>40</sup> Naie illi nama ico abido bille mei, ¿nie isoide rafuena naimie naie illina sedarainina finoite? Cuemo llono —llote.

<sup>41</sup> Judíuai illaicomíni uai otimaci:

—Naie marañedínona dueruifíeno meineite. Ie mei jiaie comínimo naie illi fecaite, iena sedallena, naiemona riarana feiñollena.

<sup>42</sup> Naimacimo Jesús llote:

—Naie illi sedaraini isoidomoi. Jusiñamui facaina lloraima micori omoina jaie cuete. Ie cuegafuena raise facañedomoi. Naimie micori cuega:

Jofo finoraini jitaifíena noficidi nana naie jofomo ite nofici baifemo jai uaide.

Jusiñamui iena finotate.

Iena cai uifíuamona, “Eo mare” raiticai

cuega. Jusiñamui comínina damierie jaillana naimie micori cuete. Jusiñamui oretagamiena damierie jitaifíenamona, naimie comínina jaiñeitimaci; iadedi Jusiñamui oretagamiena ail-luena ñnuamona, naimie comínina jaitimaci. Ero, naimie micori caina cuete. Naie jofona finoraini isoidomoi. Naie nofici isoidicue. Cue rafuena omoi jitaifíena jira, naimie comínina jaiñeitomoi. <sup>43</sup> Jusiñamuidi ie comínina sedajanomo omoina itatañeite; iadedi jiaie comínina nainomo itataite, naimie jitailla rafuena naimaci finua jira.

<sup>44</sup> Jesús llote:

—Naie noficina dane ñaiticue. Noficimo bu eicaitaia, bofedate; ia naie nofici bumona ana uai, naimiena saitaite. Ie isoide. Cue lluana omoi jamaia, duere sefuitomoi. Iena omoi ñnoñena, ja muidomo faifítomoi.

<sup>45</sup> Jesús lluana naie judíuai illaicomíni cacajanona, naimiedi naimacina ñaiana jai uifíotimaci. <sup>46</sup> Icirillamona, naimiena gaitaacadimaci; iadedi comínina jaciruitimaci, comínidi naimie Jusiñamui facaina lloraimana raillanona.

## 22

### *Jesúdi illaíma ie jito aina ua llua rafue*

<sup>1</sup> Jusiñamui jofomo Jesús nia illanona, nainomo itinona llofueite:

<sup>2</sup> —Jusiñamui díbeimo comíni jailla rafuena omoimo lloiticue. Iena omoi uifíollena, bie rafuedo iena lloiticue. Illaímadi ie jito ai ua rafue finode. <sup>3</sup> Naimie ie mullaini orede, rafuemo llogano uaidollena; iadedi nai llogano biacañedimaci. <sup>4</sup> Dane jiaie mullaini oretajano llote: “Nai lloganomo llono: ‘Rafue guille jai finocasa. Iretaiaí, farediretaiaí diga, jai faga. Jai nana fuite. Rafuemo mai bi’”. <sup>5</sup> Naimaci cacarefiacañede. Damie ie illimo jaide. Jiaimie ie chinganamo jaide. <sup>6</sup> Jiaimo mullainina gaitadimaci. Gaitajanona naimaciri jifanotimaci. Ja muidomo naimacina meinetimaci. <sup>7</sup> Ie jira naie illaíma eo icirite. Naimie soldadauí oretate, naimie mullaini meinetinona meinellena. Naimie naimaci illano jobaitate. <sup>8</sup> Ie meinocóni ie fiebide mullainimo llote: “Rafue guille jai nana finoca; ia llogano marañedimaci. <sup>9</sup> Naiso bojicaillanomo jai. Nana o ciolle diese llono: ‘Rafuemo bi’ llono”. <sup>10</sup> Ie jira ie mullaini jai naisona jaide. Marañedino baillanona diese ofitatimaci. Jiaí maredino diese ofitatimaci. Rafue finua jofo naie llogano diga oruide. Illaíma nainomo fecaca iniroina jitaídimaci. <sup>11</sup> Illaíma fo bla, mesamo itino jibuillena, dinomo daje íma rafue ie mare iniroina jitaíeno bitio?” jicanote. Naimie uainicaide. <sup>12</sup> Ie jira naie illaíma ie mullaíaimo llote: “Naimie cuena ñnoñena jira, naimie onolli dajemo nitaicaida maino. Ie eillina daje isoi maino. Cuemona naimie jino dota. Nainomo itino diga duere sefuite. Jiaí sunaite” llote. <sup>14</sup> Ero, naie rafuemona omoi fueo. Illaíma ailluena uaidote; ia nana biñedimaci. Ie isoide. Jusiñamui ailluena comínina uaidote; iadedi naimacimona janore fetode.

### *Jesúmo gobiernomo ucubena fecajana jicanua rafue*

(Mr 12.13-17; Lc 20.20-26)

<sup>15</sup> Naimacimo Jesús llua mei, fariseuai comíni abido jaillanona, comíniri siadotimaci. Naimie raise uai oñedena, naimiena duere finollena, Jesúsna facaciacadimaci. <sup>16</sup> Ie jira naimie देने naimaci comínimona dajerie oredimaci. Herodianuai railla comínina jiaí jaidimaci. Jesús dine rillanona, raitimaci:

—Maestro, uanaicóna llofuecabitio. Jusiñamui rafuedo cai marena jaillana raise llofuetio. Nana comíni dauaido llofuetio. Comínina iobitallena llofueñedio. <sup>17</sup> Omo rafuena jicanoiacadicaí. Dani Jusiñamuina sedadicaí; iadedi romanos railla nairaí anamo birui cai illa jira, ¿naimaci illaíma Césarmo ucubena cai fecajana rairuidio? Caimo llono —llotimaci.

<sup>18</sup> Naimaci comeciaina marañedicinona facajana Jesús uifíuamona, uai ote:

—¿Bue ñellena cuena facacitomoi? Maredinona abí caitadomoi. <sup>19</sup> Ucube cuemo acata —llote. Ie jira acatatimaci.

<sup>20</sup> Jesús dinena jıcanote:

—¿Bu ie joreño nainomo ite? ¿Bumo jainaiide bie cuega radi?

<sup>21</sup> Uai otımacı:

—César.

Jesús dinena raite:

—César iena itedi Césarmo ille. Jusiñamui iena itedi Jusiñamuimo ille —raite.

<sup>22</sup> Naimie lluana cacajano, rajıcaıdımacı. Naimie jeare uai oñena jira, naimie dinomona onı jaidımacı.

*Jesús dine saduceuai railla comını billa rafue*

(Mr 12.18-27; Lc 20.27-40)

<sup>23</sup> Naie facaise saduceuai railla comını naimie dine bitımacı. Fiodaıllamona jaca buna jilloñellena inotımacı. Jesúmo llotımacı:

<sup>24</sup> —Maestro, Moisés micorı jaie cuega: “İima fiodaılla meinoconı, naimie urue inena, ie ama naie feciño olle. Naimiedi uruiaina ie ama facaina comuitaite” cuega. <sup>25</sup> Ero, caı motomo siete amataıa ite. Nano doforamie ie aina ote. Naimie nıa uruiainide fiodaılla. İe emodo imie ie ama feciñona ote. Uruıainide jıaı fiodaılla. <sup>26</sup> Naie siete digamiedemona iese sefuide. <sup>27</sup> Ja muidomo naie riño jıaı fiodaite. <sup>28</sup> Fiodaıllamona, ico naimacı jilloıadedı, ¿bu naie riño lenite? Naiñaiño siete digamiena inirede —llotımacı.

<sup>29</sup> Jesús uai ote:

—Moisés micorı cuegafuiaina raise omoi uıñoñena jira, Jusiñamui uaina raise omoi uıñoñena jira, bie isoide rafuena raise uıñoñedomoı. <sup>30</sup> Fiodaıllamona jıllua mei, Jusiñamui diga ite comını ainıtımacı. İnııtımacı. Monamo Jusiñamui jaienisaı ainıdımacı. İnııdımacı. İe isoı itımacı. <sup>31</sup> Fiodaitno jıllua omoımo lloıtıcue. Jusiñamui omoi jaiagaimo jaie llogacinona inoñedomoı. Naimie llote: <sup>32</sup> “Abraham ie Jusiñamuidıcue. Isaac ie Jusiñamuidıcue. Jacob ie Jusiñamuidıcue” llote. Jai fiodaitımacı; ia naimacı joreñuıaı nıa itımacı. Jusiñamuidı danı cajedıno imacı Jusiñamuına jira, naimacı joreñuıaı naimie dine itımacı. İco naimacı abıaina jıaı jıllotaite —llote. <sup>33</sup> Nainomo ite comını iena cacajano, naimie llofuiarı rajıcaıdımacı; ia saduceuai dinena uainıcaıdımacı.

*Jesús nanoca llogacinona llofuiıa rafue*

(Mr 12.28-34)

<sup>34</sup> Saduceuai comını uainıcaıllana farıseuadı jai fidiano, Jesús dine ofıdımacı. <sup>35</sup> Naimacımona damiedi Moisés micorı jaie llogacinona eo uıñote. Jesúna facacıllena, naimiemo jıcanote:

<sup>36</sup> —Maestro, Moisés micorı jaie llogacınuaımona, ¿nie llogacino ua nanoca llogacinona?

<sup>37</sup> Jesús dinena uai ote:

—Moisés micorı jaie cuega: “Omoi jıtaılla jira, nana omoi comeımona caı Nama Jusiñamuına ısırui. Naimiemo omoi comeımona eo faca”. <sup>38</sup> Bie ua nanoca llogacino. <sup>39</sup> İe emodomo ite llogacino janore daje isoide: “Danı omoi abı omoi ısıruiılla isoı, omoi ecımo itınona jıaı ısırui”. <sup>40</sup> Bie mena llogacınomona nana jıaie llogacınuaı comuide. Nana Moisés micorı llogacınuaı naimemona comuide. Nana Jusiñamui facaina llorainı micorıaı llogacınuaı naimemona comuide —llote.

*Jesús dinena farıseuai comınımo jıcanua rafue*

(Mr 12.35-37; Lc 20.41-44)

<sup>41</sup> Naimie dine nıa farıseuai comını ia, Jesús naimacımo llote:

<sup>42</sup> —Jusiñamui llorainı micorıaı jaie raitımacı: “Jusiñamuidı Cristo raıllamiena oretaite, ie comınına sedallena”. ¿Niese naimiena raitomoi? ¿Bu jıto naimiedi?

Uai otımacı:

—David micorı jıto. David micorı isoı Cristo ie comınına sedaite.

<sup>43</sup> Jesús dinena jıcanote:

—Naimiedi David micorı isoıdena, ¿bue ñellena David micorı “Cristodi cue Nama” llote? Jusiñamui Joreñodi David micorı ñaitatajanona, David micorı llote:

<sup>44</sup> Jusiñamuidı cue Namamo llote:

“İllaimana o illamona, cue nabei dine ana raı.

Ona inoñedıno o anamo itataıtıcue”.

<sup>45</sup> “Cristodi cue Nama” David micorı raite. İese naimie micorı raılla jira, Cristo David micorı afemo faite. Naimiedi jamaı David micorı jıtoñede; ia jıaı ie Nama.

<sup>46</sup> Uaina onıdımacı. Naie facaisemona Jesús ie uaina dane uaitañedımacı.

## 23

*Jesúdi judtúai illaicomínina ñaia rafue  
(Mr 12.38-40; Lc 11.37-54; 20.45-47)*

<sup>1</sup> Jusiñamui jofomo Jesús nia illanona, naimie ñine ailluena comíni bitimaci. Ie llo-  
fueoicaigano nainomo jiaí illanona, nana naimacimo llote:

<sup>2</sup> —Moisés micori llogacinuaina llofuerainidi naie rafuedo jai jaicabidimaci. Fariseuai  
comíni iedo jiaí jaicabidimaci. <sup>3</sup> Naimaci llofuiacinodo omoi jai. Naimaci llofuiana omoi  
cacarefi; iadedi naimaci illa isoi omoi iñeno, naimaci llofuiacinodo naimaci jaiñena jira.  
<sup>4</sup> Omoi einamaci llogacinuaido raise omoi jaillena, diga rafuena omoi finuana jitaídímaci;  
iadedi iedo omoi jaillena, omoína jaca canoñedimaci. “Jusiñamuina eo raise sedadici”  
comecina facadimaci. Iemo naimaci comeцина facajamona, <sup>5</sup> iena omoi cioillena, nana  
naimaci finua rafuena marefodo finodimaci. Jiaie comínimo ite Jusiñamuimo jirabe  
baifemo faitibena uiacacabidimaci. Miñoi fuedadi aillofena jonegana gaidimaci. <sup>6</sup> Rafue ia,  
naimaci jamai bue isoñedimodo comeцина facajamona, rafue nama ecimo raicadimaci.  
Ofiracomo uicomo raicadimaci, comíni naimaciri acarillena. <sup>7</sup> Ñine naimaci jai,  
nana comíni naimacina uaiduana gaidimaci. Maestrodicinona uaiduana jiaí gaidimaci.  
<sup>8</sup> Jusiñamuina eo raise naimaci sedajana omoi uiñuana jitaídímaci. Naimaci isoi iñeno.  
Omoi damacina jira, omoimona damie omoi baifemo faiamo comeцина facañeno. Naimiena  
maestrona raiñeno. Omoi baifemo cue illanona, omoi maestrodicue. <sup>9</sup> Omoi Moo Jusiñamui  
monamo illanona, dama naimiena seda. Jiaimiena sedañeno. Jusiñamui isoi jiaimiena  
“Moo” raiñeno. <sup>10</sup> Omoi damacina jira, omoimona damiena “Cai illaíma” raiñeno. Omoi  
illaímana jai iticue. <sup>11</sup> Omoimona bu imiena jaicania, omoi mullaímana naimie nano  
jaillamona, omoína naimie canua. <sup>12</sup> Jusiñamuidi “Jiaíno afemo iticue” raillano comeцина  
facadimiena jamai bue isoidimiena itataite; ia Jusiñamuidi “Jiaíno afemo iñedicue” raillano  
comeцина facadimiena jamai bue isoñedimiena itataite.

<sup>13</sup> Naie facaise Moisés micori llogacinona llofuerainidi fariseuai comíni diga illanona,  
Jesús naimacimo llote:

—Jusiñamui omoína duere finoite. Mareuidinona abi caitadinodomoí. Jusiñamui  
dibeimo comíni illana jitaíñedomoí. Naimie dibeimo omoi illana jiaí jitaíñedomoí. Ie  
muidona Jusiñamuimona duere sefuitomoí. <sup>14</sup> “Jusiñamuina eo sedadimaci” omoímo comíni  
comecina facajana jitaídimoí. Ie jira are jiidomoí; iadedi iese iñedomoí. Maraiñede  
rafuena finocabidomoí. Jifuianona feciñuái rana bairocabidomoí. Ie jira Jusiñamui omoína  
eo duere finoite. <sup>15</sup> Damiena omoi dibeimo itatallena, omoi isoi Jusiñamui rafuedo naimie  
jaillena, diga rafuena finodomoí. Omoi dibeimo illa mei, omoi baifemo omoi einamaci  
llogacinodo naimie jaillana jitaídimoí. Omoi diga ico naimie ua faifite. Comínina ua-  
naiñedicinodo jaitatomoí. Iese omoi illa jira, duere sefuitomoí.

<sup>16</sup> ‘Omoi llofuiacino diga comínina canoñedomoí. Mareuidinona abi caitadinodomoí.  
Raicabitomoí: “Cai lloga uai cai finollena jiaí comíni uiñollena, Jusiñamui jofomo ite oro  
mamecina llinotici; iadedi Jusiñamui jofo mamecina cai llinoia, cai lloga uaina cai finoñenia,  
caimona mare. Jusiñamuimona duere sefuiñeiticai” raicabitomoí. <sup>17</sup> Abi uiñoñedomoí. Omoi  
llofuiacino diga comínina canoñedomoí. Jusiñamui jofomo naie oro jainaiáilla jira, naie  
orodi mare; iadedi naie oro naie jofo baifemo uaiñede. Abina omoi uiñoñena jira, Jusiñamui  
omoína duere finoite. <sup>18</sup> Jiaí raitomoí: “Jusiñamuimo faga toica ocaina jobaisoillano  
mamecina cai llinoia, cai lloga uaina cai finoñenia, caimona mare; iadedi Jusiñamuimo  
fecaca toica ocaina mamecina cai llinoia, cai lloga uaina jaca finoitici”. <sup>19</sup> Abi uiñoñedomoí.  
Omoi llofuiacino diga comínina canoñedomoí. Naie jobaisoillanomo naie ocaina illa  
jira, naie ocaina mare; iadedi naie ocaina naie jobaisoillano baifemo uaiñede. <sup>20</sup> Ero,  
Jusiñamuimo ocaina jobaisoillano mamecina omoi llinoia, nainomo ite ocaina mamecina  
jiaí llinotomoí. <sup>21</sup> Jusiñamui jofo mamecina omoi llinoia, Jusiñamui nainomo illa jira,  
naimie mamecina jiaí llinotomoí. <sup>22</sup> Monamo ite ra mamecina omoi llinoia, Jusiñamui  
illano nainomo illa jira, nainomona comínina naimie sedaja jira, naimie mamecina jiaí  
llinotomoí. Omoi lloga rafuena omoi finoñenia, Jusiñamui omoína duere finoite.

<sup>23</sup> Mareuidinona abi caitadinona omoi illamona, omoímo nia lloiticue. Nana omoi illimo  
ite ramona, nana omoímo ite ucubemona Jusiñamuimo janore jisa fecacabidomoí. Nana  
comíni omoi isoi illena jitaídimoí. Mare; iadedi nanoca rafuena jaca finoñedomoí. Jiaie  
comínimo omoi comeцина facañedomoí. Jiaie comínina duenaiñedomoí. Omoi lloga uaina  
finoñedomoí. Nana naie isoide rafuena omoi jiaí finua. Iena omoi finoñenia, Jusiñamui  
omoína duere finoite. <sup>24</sup> Abina uiñoñedomoí. Jallecima jiroracomo ia, iena oni faiga; ia  
aillue ra nainomo ia, iena cioñeno namo gutadomoí. Ie isoide. Omoi llofuiacino diga  
comínina canoñedomoí. Jusiñamui ie eo jitailla rafuedo comíni jaillana llofueñedomoí.

Nanocafueñededo comini jailla rafuena llofuetomoi. Nanoca rafuedo comini jaillana llofueñedomoi.

<sup>25</sup>Omoimo nia lloiticue. Omoi einamaci llogacinodo eo jaidomoi; iadedi omoi comeciaina raise finoñedomoi. Eo fiidomoi. Jifuianona comini rana bairodomoi. Jeacinona finocana jaidomoi. <sup>26</sup>Abina uiñofedomoi. Da pocillos jinafo, da platos jinafo jocodino isoidomoi. Pocillos jerai, platos jerai jocoñedino isoidomoi. Omoi abina finodomoi; iadedi omoi comeciaina raise finoñedomoi. Nano omoi comecina raise fino. Mare rafue finocana jai. Omoi einamaci rafuemo comecina facañeno; ia Jusiñamui rafuemo comecina faca. Iese omoi jañenia, Jusiñamui omoina duere finoite.

<sup>27</sup>Omoimo nia lloiticue. Marena finoca raiafo isoidomoi. Jinofe marena eruaid; iadedi nainomo mare ra iñede. Comini illaici jamai ite. Jai marañede. <sup>28</sup>Ie isoidomoi. Marena eruaidomoi; iadedi maredinona abi eo caitadomoi. Omoi comeciai eo maraisiñede. Omoi comecina raise omoi finoñenia, Jusiñamui omoina duere finoite.

<sup>29</sup>Omoimo nia lloiticue. Naimacimo birui omoi comeciaina raise facallena, Jusiñamui facaina lloraini micoriai raiafona marena eruaillena finodomoi. Mareuidino micoriai raiafo emodo marena eruaillena finodomoi, <sup>30</sup>raillano: “Cai jaiagai Jusiñamui facaina lloraini micoriaina meinetimaci. Naie facaiseconi iticaidena, naimaci isoi finoñedica. Cai jaiagai isoi birui iñedica” raitomoi; <sup>31</sup>iadedi omoi llua mona Jusiñamui facaina lloraini micoriai meinetino urui ai omoina uiñotica. <sup>32</sup>Omoi jitailla jira, omoi jaiagai isoi jeacinona eo finocana mai jai. Naimaci jai taineca rafuena mai omoi finocana jai. <sup>33</sup>Omoi marañena jira, jai nairai isoidomoi. Ja muidomo iraimona jillobiñeitomoi. Nainomo duere sefuitomoi. <sup>34</sup>Cue rafuena llollena, cue facaina llorainina omoi dine oretaiticue. Cue rafuena eo uiñotinona omoi dine oretaiticue. Cue rafuena omoi raise uiñollena, llofueraini omoi dine jai oretaiticue. Dajeriena meinetomoi. Naimacina coraitomoi. Omoi ofiracomo dajeriena faitomoi. Diga nairaimo naimacina duere finoitomoi. <sup>35</sup>Abel micori jai ite. Naimie maremie. Ie ama naimiena meinete. Naimie facaisemona omoi jaiagai ailluena mare cominina meinetimaci. Ie mei omoi jaiagai Zacariana meinetimaci. Naimiedi Berequias jito. Jusiñamui jofomo Jusiñamui mo toica ocaina jobaisoillano ecimo naimiena meinetimaci. <sup>36</sup>Uanaicino omoimo lloiticue. Naimacina omoi jaiagai meina muidona, omoimona Jusiñamui birui ibana oite. Naimaci isoi marañede rafuena finocana jaidomoi. Jusiñamui omoina duere finoite.

*Jesús Jerusalémo itinomo llua rafue*  
(Lc 13.34-35)

<sup>37</sup>Jesús llote:

—Jerusalémo itino, omoimo rafuena lloiacadicue. Jusiñamui facaina llorainina jaiie meinetomoi. Naimie omoi dine oretaganona noficina fairinuano, naimacina meinetomoi. Omoina cue sedallena, atava ie urui ai sedaja isoi, diga icaño cue anamo omoina uaidoia-cadicue; iadedi omoi dinena cuena jitañedomoi. <sup>38</sup>Iemona Jusiñamuidi omoi illanona jai fañonocaide. <sup>39</sup>Cue Moo dine jaiticue. Cue jailla mei, cuena cioñeitomoi. Ico abido cue bia, omoi comini cuena lloitimaci: “Jusiñamui oretagamie eo mare. Naimiedi cai Nama” lloitimaci

## 24

*Jesúdi Jerusalémo ite Jusiñamui jofu judaiana llua rafue*  
(Mr 13.3-23; Lc 17.22-24; 21.5-24)

<sup>1</sup>Jusiñamui jofomona ie llofueoicaigano diga Jesús jino jaidemo, Jesúna nai jofona eruaitatimaci. <sup>2</sup>Jesús dinena llote:

—Bie jofona ciodomoi. Uanaicinona omoimo lloiticue. Nana bie jofomo ite nofici ai ico judaisite —llote. <sup>3</sup>Ie mei Olivos railla anedu dine rillanona, Jesús naie muidomo raidemo, ie llofueoicaigano naimiemo iena anado llotimaci:

—Jusiñamui jofu judaiana omo jicanoiacadica. ¿Niruido iena suite? Caimo llono. O abido billirui iaie ia, ¿nie isoide rafue suite, o abido billiruina cai uiñollena?

<sup>4</sup>Uai ote:

—Omoina bie rafuena bu jifueñellena, omoi abina rairui. <sup>5</sup>Ailluena comini cue mamecido billanona: “Cristodicue” raitimaci. Diga cominina jifueñitimaci. Iemona omoi abina rairui. <sup>6</sup>Jobaimia illena fidiitomoi; iadedi jaciruiñeno. Iese suite; iadedi abido nia biñeiticue. <sup>7</sup>Daje nairai jiaie nairai diga jobairitimaci. Daje gobierno jiaie gobierno diga jobairite. Diga illanuaimo comini aime guitimaci. Diga illanuaimo ñuisañuaie suite. <sup>8</sup>Iese suia, omoi duere sefuillifue omoimo suite.

<sup>9</sup> Cuen a ñnoñedino omoína gaitatajanona, omoína meineitimaci. Cue cominina omoí illamona, nana nairaiái omoína enoítimaci. <sup>10</sup> Naie facaise cue dibeimo itinomona ail-luena abido danomo jaitimaci. Iemona duere omoí sefuillena, omoína janoféitimaci; iadedi omoína enoillamona, omoína llogidoítimaci. <sup>11</sup> Naie facaise diga comini raitimaci: “Jusiñamui facaina llorainídicaí”; iadedi Jusiñamui facaina llorainíñedimaci. Uanaicinona lloñeitimaci. Diga comini naimaci dibeimo itataitimaci. <sup>12</sup> Jeacino eo comucana jailla jira, ailluena comini conini isiruiñéitimaci; <sup>13</sup> iadedi cuena fainonocaiñedimie ja muidomo monamo jaca iite. Naimiena jillotaiticue. <sup>14</sup> Diga cominidi Jusiñamui dibeimo comini ille rafuena nana nairaiái lloítimaci, nana nairaiái iena cacaillena. Ie mei abido biíticue.

<sup>15</sup> Cúe lluomo cacarei. Daniel micori Jusiñamui facaina lloraima. Naimie micoridi jaiámie jearede rafue finollena jaié llote. Naie rafue suía, Jusiñamui jofomo Jusiñamuina sedañeitomoi. Nainomo naie jearede rafue finuana omoí ciuanona, <sup>16</sup> naiemona omoí jillobillena, duere omoí sefuíñellena, Judeamo omoí illamona, aneduái dine omoí aisi. <sup>17</sup> Jofó emodomo omoí ia, ana billanona, aneduái dine raire rillena, jofomo jaiñeno. Nainomo ite rana omoí diga uíñeno. <sup>18</sup> Aneduái dine raire rillena, illimo omoí ia, abido jofomo biñeno, omoí iniroi omoí diga uillena. <sup>19</sup> Naie rafuemono jillobillena, naie facaise urueside riño duere sefuite. Uruena nia jirode riñodi jaié duere sefuite. <sup>20</sup> Eo duere sefuíñellena, Jusiñamuimo omoí jicano, rollime facaiseconi bie rafue suiñellena. Moisés micori sábadomo are jaillana jaié rairuide. Sábadoruimo bie rafue suiñellena, Jusiñamuimo jicano. <sup>21</sup> Naie facaise comini eo duere sefuitimaci. Enirue finua facaise mona iese comini nia duere sefuíñedimaci. Ico iese eo duere sefuíñeitimaci. <sup>22</sup> Naie facaise ianori fo Jusiñamui oñeitena, buna jaca jillobiñeite. Naimie fetocano muidona, naie facaise Jusiñamui ianori fo oite.

<sup>23</sup> Te facaise omoímo bu raía: “Jai, Jusiñamui facaina lloraima benomo birui bairede. Naimiedi Cristo”, iena ñnoñeno. Jaiámie raía: “Oni batine Cristo birui bairede”, iena ñnoñeno. <sup>24</sup> Cristona abi caitadino biítimaci. Jusiñamui facaina llorainina abi caitadino jaié biítimaci. Siño rafuena finuanona, cominina jifueitimaci. Jusiñamui fetoca cominina ua jifueitimaci. <sup>25</sup> Ero, bie rafue nia suiñenia, iena omoímo jaié llotícue. <sup>26</sup> Omoímo naimaci raía: “Ero, batine jofue iñenanomo Cristodi ite”, nainomo jaiñeno. Naimaci raía: “Ero, bene bie jofomo Cristo ite”, iena ñnoñeno. <sup>27</sup> Mona borillamona mona jillacidi usere ciode. Nana cominimo bairede. Ie isoide. Cue abido bia, nana comini iena uíñoítimaci. <sup>28</sup> Urujaisai rifaide ramo ofillana uíñua isoi, nana cuena ñnotino cue billena uíñoítimaci.

*Jesús abido ie bille rafue*

*(Mr 13.24-37; Lc 17.26-30, 34-36; 21.25-33)*

<sup>29</sup> Jesús llote:

—Naie duere sefuilla facaise meinoconi jítoma lligaiñoñeite. Fivui jaié lligaiñoñeite. Monamona ucuai llujite. Nana naie radi jaidisite. <sup>30</sup> Ie mei monamo baireiticue. Ieconí nana nairaiái jarire íitimaci. Jacinaitimaci. Uillie motodo cue billena cioítimaci. Ebire biíticue. Naimacina cue sedallena, illaimana biíticue. <sup>31</sup> Cue jaienisaina cue ecimona oretaiticue. Ado trompeta ficiretájano, cue fetocano diese naganomona ofitaitimaci.

<sup>32</sup> Higuera railla riaramona omoí fueo. Bie eniruemo naie riará firuillamona, fiemona raire illana uíñotomoi. <sup>33</sup> Ie isoide. Bie rafue ico suía, cue billirui iairei illena uíñoítomoi. <sup>34</sup> Uanaicinona omoímo lloíticue. Nana bie rafue suille facaiseconi bie nairai nia iite. <sup>35</sup> Mona enirue diga fuite; iadedi cue lloga uai jaca suite. <sup>36</sup> Cue abido billirui jaca bu uíñoñede. Jusiñamui jaienisai iena uíñoñedimaci. Jusiñamui Jitodicue; iadedi cue abido billiruina jaié uíñoñedicue. Dama cue Moo iena uíñote. <sup>37</sup> Abido cue billirui iairei ia, Noé micori facaiseconi itino isoi comini íitimaci. Naimaci duere sefuillemo Noé micori facaise itinodi comeciaina facañedimaci. <sup>38</sup> Naie facaiseconi nia eo noci deñenia. Noé micori ecimo itino naimaci isoilla isoi icana jaidimaci. Jamai guicana jaidimaci. Aina ua mei, inina ua mei, jebuicana jaca jamai jaidimaci. Dani iemo comeciaina facauídimaci. Jusiñamuimo comeciaina facañedimaci. Iese íitimaci, Noé micori ie balsamo fo jailla dinori. <sup>39</sup> Nia noci deñenia, Noé micori lloga uaina ñnoñedimaci. Noci deilla mei, ebena nana faifidimaci. Cue abido bia, ie isoite. Ebena biíticue. <sup>40</sup> Naie facaiseconi menamie ílímio danomo íitíaiamaíai. Damie Jusiñamui dine jaié. Jaiámie fiebillanona, Jusiñamuimona duere sefuite. <sup>41</sup> Mena riño danomo doberitíaiñuái. Dañaiño Jusiñamui dine jaié. Jaiñaiño fiebillanona, Jusiñamuimona duere sefuite. <sup>42</sup> Cue billirui omoí uíñoñena jira, iemo ocuiri. <sup>43</sup> Bie rafuemo omoí comeciaina omoí faca. Jofó namadi firiraima nie naiona billena uíñoñena, ie rana faifíñellena, ie jofona raise sedade. <sup>44</sup> Ie isoi cue billemo ocuiri. Monamona ico abido biíticue. Omoí ocuiriñena facaisemo riíticue. Ie jira cue billemo nagarui ocuiri.

*Jesús patrón ie mullaimana ie jofona sedataja llua rafue*

*(Lc 12.41-48)*

<sup>45</sup> Jesús llote:



—Cue billena omoi raise cacaillena, jiaie rafuedo iena lloiticue. Patrón daje mullaïmana ie jofona sedatate. Naie mullaïmana ïnogamie. Abina uiñotimie. Nainomo itnona raise eacabide. Naie mullaïmana ie jofona sedataja mei, naie patrón oni jaide. <sup>46</sup> Patrón ico abido bia, ie jofona ie mullaïmana raise sedaia, mullaïmari naimie iobillamona, ie mullaïmana marena iite. <sup>47</sup> Iobillamona, patrón ie mullaïmana nana ie raruiaina sedatataite; <sup>48</sup> iadedi ie mullaïmana marañena, ie comecina facaite: “Cue patrón are biñeite. Naimie lloga uaina finoñeiticue”. <sup>49</sup> Ie comecina iese facaja jira, naimie anamo ite mullaïaina faite. Ie jitaille rafue ñnuamona, jifairuidino diga jirocabite. Naimacina nabaillamona, naimaci diga guite. Naimaci isoi jearede rafuena finoite. <sup>50</sup> Ie ocuriñena facaie ie patrón abido billanona, naimiena duere finoite. <sup>51</sup> Ie isoide. Cue abido bia, cuena ïnotinori iobiticue; ia cuena ïnotinona abi caitadino dine cuena ïnoñedinona dotaiticue. Nainomo duere sefullano eeditimaci.

## 25

### *Jesúdi diez jitaiñuaina llua rafue*

<sup>1</sup> Jesús llote:

—Abido cue bia, Jusiñamui ie cominina sedaite. Cue billemo ocuritnona sedaite. Naie facaie ite cominidi diez jitaiñuaimo ite rafue isoidimaci. Naiñaiñuái lamparíniai llinuanona, ïma ie aina ua meinomo finoca rafuemo jaiacadimaci. <sup>2-4</sup> Lamparíniai unellena, farena naiñaiñuái uilla jira, cinco diga abina uiñotimaci. Farena naiñaiñuái uiñena jira, cinco diga abina uiñoñedimaci. <sup>5</sup> ïma diga ie rafue dine jaillemo ocuridimaci. ïma are biñena jira, inidimaci. <sup>6</sup> Daje dberuice damie ado lluaa cacadimaci. Llote: “Jai, naie ïmadi jai bite. Mai bi, naimie uicomo naimiemo cai dafañillesa”. <sup>7</sup> Casillanona, naie jitaiñuái lamparíniai unedimaci. <sup>8</sup> Abi uiñoñediñaiñuái dinena abi uiñotiñaiñuaimo jicadimaci: “Farena caimo feca. Cai lamparíniai boacañedesa”. <sup>9</sup> Uai otimaci: “Fecaacañedicaí. Omoimo cai fecaiadedi, caimo baiñeite. Omoi jitaia, chinganomo ibajai”. <sup>10</sup> Naiñaiñuái ibajaila mei, naie ïma ride. Naimiemo ocuridíñaiñuái diese naimie diga nainomo guillena, rafuemo jaidimaci. Naimaci fo jailla mei, nase naie ïma ibaide. <sup>11</sup> Ie mei naie farena ibajaidíñaiñuái abido billano, raitimaci: “Nase econo”. <sup>12</sup> Naie ïma uai ote: “Uanaicnona omoimo lloiticue. Omoina uiñoñedicue. Econoñeiticue”. <sup>13</sup> Ie isoide. Cue billirruina omoi uiñoñena jira, nagarui cuemo omoi ocuri.

### *Jesúdi patrón ie mullaïaimo ucubena fecaja llua rafue*

<sup>14</sup> Jesús llote:

—Abido cue bia, Jesiñamui ie cominina sedaite. Naie facaie ite comini daje patróno ite rafue isoide. Patrón jiaie enirue jaiacana jira, ie mullaïaina ie ucubena eenotade. <sup>15</sup> Damieomo cinco diga ucubena fecade. Jiaimieomo menacubena fecade. Jiaimieomo dacubena fecade. Nagamie ie maijille dinori fecade. Ie mei oni jaide. <sup>16</sup> Cinco diga ucubena feiñotimie jaillanona, iena fecallena, rana ibade. Iemona jiaie cinco diga ucubena ote. <sup>17</sup> Menacubena feiñotimie iena fecallena, rana ibade. Iemona jiaie menacubena ote. <sup>18</sup> Daucubena feiñotimie eniruemo naie ucube eenote. Iena fecallena, rana ibañede. Iemona buena oñede. <sup>19</sup> Digarui illanona, naie patrón abido bite. Naimaci cuentas siadollena, ie mullaïaina uaidote. <sup>20</sup> Cinco diga ucubena feiñotimie bite. Ie ucube atiano raite: “Patrón, cinco diga ucubena cuemo fecadio. Jiaie cincona oticue”. <sup>21</sup> Patrón uai ote: “Raise marena maijidio. Eo mare mullaïmadio. Janore ucube o raise sedaja jira, ona ailluena rana sedataiticue. Cue diga caimare jaca iitio”. <sup>22</sup> Menacubena feiñotimie bite. Raite: “Patrón, cuemo menacubena fecadio. Iemona jiaie menacube oticue”. <sup>23</sup> Naimie patrón uai ote: “Raise marena maijidio. Eo mare mullaïmadio. Janore ucube o raise sedaja jira, ona ailluena rana sedataiticue. Cue diga caimare jaca iitio”. <sup>24</sup> Daucubena feiñotimie bite. Raite: “Patrón, o riirenana uiñoticue. O mullaïai maijiamona ganacabidio. <sup>25</sup> Ucubena cue faifiñellena ona jaciruiticue. Ie jira eniruemo o cuemo iga ucubena eenoticue. Jai, iena jai abido atidicue”. <sup>26</sup> Patrón uai ote: “Marañedio. Rairañedio. Cue mullaïai maijiamona cue ucube uana uiñotio. <sup>27</sup> Bancomo naie ucubena jonetodena, naie ucubemona jiaie ucube janore uamona, abido cue bia, iena feiñoticue”. <sup>28-30</sup> Ie mullaïaimo llote: “Naimiemona ie ucubena bairo. Diez ucube illamiemo iena feca. Bie marañede mullaïma jitreidinomo cuemona oni dota. Nainomo comini duere sefullanona eeditimaci”. Jusiñamui ie jitaille rafuena finodinona: “Mare” raite; iadedi ie jitaille rafuena finoñedinona duere finoite. Jusiñamui omoina duere finoñellena, cue abido billirui omoi uiñoñena jira, Jusiñamui jitailacinona finocana omoi jai.

### *Jesúdi cominina duere finolle llua rafue*

<sup>31</sup> Jesús llote:

—Omoina nia llofueiticue. Abido cue bia, nana cue jaienisaí diga biiticue. Illaïmana ico cue bia, illaïma illa ifomo iiticue. Eo ñño uaido biiticue. <sup>32</sup> Cue uicomo nana nairaiái

ofitimaci. Toica llaudaia sedaraima ie chivos motomona ie llaudaia oni fetua isoi, naimacina fetoiticue. <sup>33</sup> Cue jitaillacinona finodino diese cue fetuanona, cue nabeimo itataiticue. Cue jitaillacinona finoñedino diese cue fetuanona, cue jarifebeimo itataiticue. <sup>34</sup> Cue illaimana jira, cue nabeimo itinomo lloiticue: “Cue Moo omoiri iobillanona, omoina jai caimare itatate. Cue Moo cominina omoi illa jira, cue sedajanomo mai bi. Nainomo duidomoi. <sup>35</sup> Cue jitaillacinona omoi finuamona navui aimetaiticue, cue nabeimo ecadomoi. Jiroacadicuemo, jinui cuemo fecadomoi. Omoi nairai dine cue macaria, cuena omoi uifioñeno omoi jofomo cuena feiñotomoi. <sup>36</sup> Iniroinidicue, iniroi cuemo fecadomoi. Duidicue, cuena canollena, cuena jibuisaibidomoi. Cárcelmo iticue, cuena canollena, cuena jibuisaibidomoi”. <sup>37</sup> Cue jitaillacinona finodino dinena cuemo jicanoitimaci: “Nama, ¿Niruido aimetaitiomo, ona ecadica? ¿Niruido jiroacadiomo, jinui omo fecadica? <sup>38</sup> ¿Niruido ona ciodicai, cai jofomo ona feiñollena? ¿Niruido iniroina omo fecadica? <sup>39</sup> ¿Niruido duidiomo, ona jibuisaidica? ¿Niruido cárcelmo itiomo, ona jibuisaidica?” <sup>40</sup> Uai oiticue: “Uanaicinona omoimo lloiticue. Cuena inotinomona jamai bue isoidimiena canodomoimo, cuena jai canodomo” lloiticue.

<sup>41</sup> Iemei cue jarifebeimo itinomo lloiticue: “Cue mona oni mai jai. Cue cominiñedomoi. Jai faifidomoi. Duere omoi sefuillena, iraimo mai jai. Naie irai jaca duifede. Jusiñamuidi naena Taife iena jai finode. Jusiñamuidi Taife comini iena jai jai finode. <sup>42</sup> Cue jitaillacinona omoi finoñenamona, navui aimetaiticue, cuena ecañedomoi. Jiroacadicuemo, jinui cuemo fecañedomoi. <sup>43</sup> Omoi nairai dine cue macaria, omoi jofomo cuena feiñedomoi. Iniroinidicue, iniroi cuemo fecañedomoi. Duidicue, cuena canollena, cuena jibuisaibiñedomoi. Cárcelmo iticue, cue canollena, cuena jibuisaibiñedomoi”. <sup>44</sup> Cuemo jicanoitimaci: “¿Niruido aimetaitiomo, ona ecañedica? ¿Niruido jiroacadiomo, jinui omo fecañedica? ¿Niruido ona ciodicai, cai jofomo ona feiñollena? ¿Niruido iniroinidomoi, omo fecañedica? ¿Niruido duidiomo, ona jibuisaibiñedica? ¿Niruido cárcelmo itiomo, ona jibuisaibiñedica?” <sup>45</sup> Uai oiticue: “Uanaicinona omoimo lloiticue. Diga comini cuena inotimaci. Naimacimona jamai bue isoidimiena omoi canoñena jira, cuena canoñedomoi” lloiticue. <sup>46</sup> Naimaci jaca isi cacaitimaci; iadedi cue jitaillacinona finodino cue Moo sedajanomo jaca iitimaci.

## 26

*Judiuai illaicomini Jesúna gaitallena siadua rafue*  
(Mr 14.1-2; Lc 22.1-2; Jn 11.45-53)

<sup>1</sup> Ie llofueoicaiganona llofua mei, naimacimo Jesús llote:

<sup>2</sup> —Pascua railla rafue illena, menarui fiebide. Iena uifiotomoi. Monamona jaie cue billamona, imana jaidicue. Cue fiodaillena cue Moo cuena oretate. Illaicomini cuena coraillena, birui cuena gaitaitimaci —llote. <sup>3</sup> Naie facaiseconi Jusiñamui diga nanoca ñairainidi, jaie illaicomini diga, nanoca ñairaima jofomo ofdimaci Nanoca ñairaimadi Caifás. <sup>4</sup> Jesúna jifuiano gaitallena coniniri siadotimaci. Naimiena meinellena jai siadotimaci. <sup>5</sup> Raitimaci:

—Pascua railla facaise naimiena nia gaitañeiticai. Naie facaise naimiena cai gaitataia, iena gaitañenamona, comini cai diga fuitimaci. Nia sedaiticai.

*Jesúmo riño caimare soride ra totaja rafue*  
(Mr 14.3-9; Jn 12.1-8)

<sup>6</sup> Betania railla nairaimo Jesús jaillanona, Simón jofomo jaide. Simódi jaie efonaitimie.

<sup>7</sup> Naifomo mesamo Jesús guitemo, daje riñodi noficimona finoca frasco atiano, naie frasco llaillanona, nainomo ite caimare soride ra naimie ifogimo totade. Naie ra eo raifide. <sup>8</sup> Jesús llofueoicaigano iena cuanona, iciritimaci. Coniniri dani ñaitimaci:

—Naie caimare soride ra jamai dotade. Jai faifide. <sup>9</sup> Iena fecacadena, eo ailluena raifide. Naie ucube dueredinomo fecadena, caimona mare.

<sup>10</sup> Naimaci ñaiana Jesús uifua jira, naimacimo llote:

—¿Bue ñellena naifañona jeare ñaitomoi? Mare rafuena cuemo finode. <sup>11</sup> Omoi diga dueredino jaca itimaci; iadedi omoi diga jaca iñeiticue. <sup>12</sup> Cue abimo bie caimare soride ra naifañito totajamona, cue fiodaillruí facaina naifañito lese finode. <sup>13</sup> Omoimo uanaicinona lloiticue. Ninomo cue mare finoca rafuena bu lloia, naifañona uibiñollena, nana cominimo naifañito finoca rafuena lloite.

*Judas micori raillamie Jesúna gaitataiacana rafue*  
(Mr 14.10-11; Lc 22.3-6)

<sup>14</sup> Ie facaise Jesús llofueoicaiganomona Judas Iscariote micori raillamiedi Jusiñamui diga nanoca ñairaini dine jaide. <sup>15</sup> Naimacimo jicanote:

—Omoimo Jesúna cue fecaia, ¿niga ucubena cuemo fecaitomoi? —jicanote. Naimaci siadua mei, treinta ucubena naimiemo fecadimaci. <sup>16</sup> Naie facaiseconimona Jesúna gaitatalliruimo naimie ocurirde.

*Jesúdi ie fiodaille rafuena llua rafue*

(Mr 14.12-25; Lc 22.7-23; Jn 13.21-30; 1 Co 11.23-26)

<sup>17</sup> Pascua railla rafue ia, siritaga rana guñedimaci. Dani llomenicon guitimaci. Egiptomona cai jaiagai jillobillana comecillena, naie rafue ite. Naie rafue tainiaruimo ie llofueoicaigano Jesús dine billano, jicanotimaci:

—¿Ninomo pascua railla rafue ie guille finuana jitaidio?

<sup>18</sup> Uai ote:

—Jerusalémo omoi jaillanona, omoimo cue llogamiéna omoi cianona, naimiemo llono: “Cai llofueraima fiodaille facaise iairei ite. O jofomo ie llofueoicaigano diga pascua rafuena finoacade” llono.

<sup>19</sup> Te muidona ie llofueoicaiganodi ie llua finodimaci. Pascua railla rafue guille finodimaci. <sup>20</sup> Nairui jitoma ana itemo, Jesús ie doce llofueoicaigano diga nainomo guisaie. <sup>21</sup> Naimaci mesamo guitimacimo, Jesús llote:

—Omoimona damie cuena gaitataite —llote. <sup>22</sup> Iena cacajanona, eo sunaitimaci. Damierie naimiemo jicanoside:

—¿Cuena ñaitio?

<sup>23</sup> Uai ote:

—Omoimona damie bie platomo cue diga llomenico diga mutade. <sup>24</sup> Jusiñamui facaina lloraima cuega isoi, monamona jai billamona fiodaiticue; iadedi cuena gaitataitímie eo duere sefuite. Naimie jeiciñegadena, cuemona mare.

<sup>25</sup> Jesúna gaitataitímiedi Judas micori. Naimie jicanote:

—Maestro, ¿ona iese finotaiticue?

Uai ote:

—Jii, iese finotaitio.

<sup>26</sup> Naimaci nia guitimacimo, llomenicon Jesús llinuanona, Jusiñamuimo iobillacinona fecaja mei, llomenicon tairude. Naimacimo fecajano raite:

—Iena llinuano guño. Bie llomenicodi cue abi facai ie. Cue abimo omoi comecina fecajano, iena guño.

<sup>27</sup> Te mei naimie jiroracona jiai llinote. Jusiñamuimo iobillacinona llua mei, naie jiroracom omoi jai totaca vino naimacimo fecajano, raite:

—Biemona nana omoi jiro. <sup>28</sup> Cue fiodaillamona, dama cue diaillamona, naimaci jeacino anamona ailluena biruimona jilloitimaci. Jusiñamuidi omoimo jiaie rafue birui itatajanona, omoi jeacino oni dotajana jai llote. Bie vinodi naie rafue facai ie. Cue llua isoi bie vinona omoi jiruamona, cue fiodaillamo omoi comeci. <sup>29</sup> Omoina bene dane iese caimare nabaiñeiticue. Cue Moo sedajanomo omoi diga cue ia, nainomo omoina dane iese caimare marena nabaiticue. —Iena jirodimaci.

*Jesúdi Pedro naimiéna januana llua rafue*

(Mr 14.26-31; Lc 22.31-34; Jn 13.36-38)

<sup>30</sup> Naimaci guilla mei, Jusiñamuimo iobilla ruana rotimaci. Ie mei Olivos railla anedumo jaidimaci. <sup>31</sup> Jesús naimacimo llote:

—Cuemo suille rafue muidona, ja naio cuena fainonocaitomoi. Jusiñamui facaina lloraima micori iena jaiie cuega: “Toica llaudaiaie sedaraimana meinetaiticue. Naimie toinaia uaficaida jaitimaci” cuega. Naimie micori caina cuete. <sup>32</sup> Ero, fiodaillamona cue jillua mei, omoi uicodo Galileamo jaiticue, nainomo omoi diga dafaiifllena.

<sup>33</sup> Pedro uai ote:

—O finolle rafue muidona nana jaiino ona fainonocaia, ona jaca fainonocaiñeiticue.

<sup>34</sup> Jesús dinena raite:

—Unai omo lloiticue. Ja naio itava nia ñaiñenia, daciaño amani cuena janoitio.

<sup>35</sup> Pedro uai ote:

—O diga cue fiodaiadedi, ona janoñeiticue.

Nana ie llofueoicaigano daje uaido jiai raitimaci.

*Jesúdi Getsemanímo Jusiñamuimo jia rafue*

(Mr 14.32-42; Lc 22.39-46)

<sup>36</sup> Oni jaillanona, Getsemaní railla illanomo jaidimaci. Ie llofueoicaiganomo Jesús llote:

—Beno ana rai. Omoimona oni bai janore jaiticue. Cue Moo diga ñaillena, jaiticue.

<sup>37</sup> Pedrona uite. Zebedeo ie jito iaiaiaia nia jiai uite. Naimie sunaicaide. Ie comeci uri iñede. <sup>38</sup> Naimacimo llote:

—Cue comeci sunaicaide. Niadi fioidaiticue. Benomo fiebi; ia nia iniñeno cue facaina omoi jii.

<sup>39</sup> Naimie janore bai jaillanona, eniruemo bitadate. Jiide:

—Ore Moo, o jitaia, cuena duere finoñeno; iadedi cue comeci jitaillacinona finoñeno. Cuemo o jitaillacino fino —jiide. <sup>40</sup> Te mei ie llofueoicaigano dine abido billanona, naimaci inisitemo ride. Naimacina casitajano, Pedromo jicanote:

—¿Niese raire inidio? daje hora nia iñedemo. <sup>41</sup> Iniñeno. Taife ramo omoina fai raillano, iena omoi inoñellena, Jusiñamui jii. Omoi comeci mare rafuena finoacade; iadedi omoi comeci dani ocuiñoñede. Te muidona Jusiñamui jii, omoina naimie ocuiñoñotallena —llote. <sup>42</sup> Te mei dane jaillena jaide. Raite:

—Ore Moo, o jitaia, cue duere sefuillamona cuena jillota. Cue fiodaillana o jitaia, o jitailla rafuena finoiticue.

<sup>43</sup> Te llofueoicaigano dine dane billanona, naimaci uisi llirioilla jira, naimaci inisitemo ride. <sup>44</sup> Abido jaillanona dane jiide. Ailli daje isoidiuidado jiide. <sup>45</sup> Te mei ie llofueoicaigano dane billanona, llote:

—Nia inidomoi. Jafaici nia otomoi. Monamona jaie billanona, imana jaidicue; ia ja fioidaiticue. Cuena ja gaitajanona, Jusiñamui jitailla jira, naimiena inoñedino anamo ja iiticue. <sup>46</sup> A naidacai. Maiña. Cue gaitataitimie jai bite.

### *Jesúna gaitalle rafue*

(Mr 14.43-50; Lc 22.47-53; Jn 18.2-11)

<sup>47</sup> Jesús nia ñaitemo, ieconi Judas micori bite. Naimie ie llofueoicaigamie. Diga comini naimie diga bitimaci. Naimaci lloebina atidimaci. Butaralluna jiai atidimaci. Jusiñamui diga nanoca ñairainimona bitimaci. Einamaci dinena jiai bitimaci. <sup>48</sup> Jesús dine naimaci nia riñenia, Judas micori naimie diga bitinomo jai llote:

—Jesúna omoi uiñollena, naimiena llibanoiticue. Ie mei naimiena gaita —llote. <sup>49</sup> Jesús dine naimaci rillanona, Judas micori Jesús dine raire jaide. Naimiena uaidote:

—Maestro, jai biticue. —Ieconi naimiena llibanote. <sup>50</sup> Jesús dinena raite:

—¿Bue ñiaibitio?

Ie mei Judas micori diga bitinodi Jesúna gaitadimaci. <sup>51</sup> Iena ciuanona, Jesús diga itinomona damie ie lloebi llinuana, Jusiñamui diga nanoca ñairaima ie mullaima jefona jaibonote. <sup>52</sup> Jesús naimiemo llote:

—O fuiriacania, o jiai fioidaitio. O lloebi dane eeno. Cue riiduanona, fuiriñeno. <sup>53</sup> Cuena riidollena, cue Moomo cue jicaia, eo ailluena jaienisai cue dine naimie oretaitaite; <sup>54</sup> iadedi iese cuena riidoia, Jusiñamui facaina lloraini micoriai cuegafuiai suiñeite. Cue fioidaille rafuena cuetimaci —llote. <sup>55</sup> Ieconi naimie dine bitinomo Jesús llote:

—Omoi butaralluna uitomoi. Omoi lloebi diga jiai bitomoi. Fuiriraimadicueta cuena omoi gaitajaiBILLA. Jusiñamui jofomo nagarui llofuecabiticue; iadedi cuena gaitañedomoi. <sup>56</sup> Nana bie rafue suide, Jusiñamui facaina lloraini micoriai cuegafuiai suillena —llote. Ie facaise nana naimie llofueoicaigano naimiena faionocaillano, aisidimaci.

### *Jesúdi judúai illaicomini dine illa rafue*

(Mr 14.53-65; Lc 22.54-55, 63-71; Jn 18.12-14, 19-24)

<sup>57</sup> Jesúna gaitadinodi Caifás jofomo Jesúna uitimaci. Caifás Jusiñamui diga nanoca ñairaima. Naimie jofomo jiaie illaicomini jai ofidimaci. Moisés micori llogacinona llofueraini ofidimaci. Einamaci jiai ofidimaci. <sup>58</sup> Jesús jinafona Pedro aarena jaide. Caifás jofonairairimoi jaide. Naie rafue fuiduana naimie uiñollena, nainomo ite jofomo maijiraini diga raide.

<sup>59</sup> Naimiena meinellena, nana naie illaicomini Jesúmo nicino illana uiñoiacadimaci. <sup>60</sup> Iena coniniri siadotimaci; iadedi naimiemo jaca nie isoide marañede rafue illana uiñoñedimaci. Diga comini Jesúna ñaitimaci; iadedi taino llotimaci. Ie mei menamie bitiaimaiaia. <sup>61</sup> Raitiaimaiaia:

—Bimie llote: “Jusiñamui jofona judairedicue. Judaia mei, darui amani illanona, iena dane finoredicue” —llotiaimaiaia.

<sup>62</sup> Jusiñamui diga nanoca ñairaima Jesúmo jicanote:

—¿Niese iaimaiaia uai otio? ¿Nie isoide rafue ona llogidotiaimaiaia?

<sup>63</sup> Jesús uai oñede. Naie ñairaima dinena llote:

—Cai Jusiñamui cajede. Naimie caina uiñua jira, uanaicinona cai lloñenia, caina duere finoite. Uanaicinona caimo llono. “¿Odi Cristodio?” omo jicanoticue. “¿Odi Jusiñamui Jitodio?” omo jicanoticue.

<sup>64</sup> Jesús dinena uai ote:

—Jii, naimiedicue. Iena raise llotio. Monamona jaie cue billamona, iimana jaidicue;; iadediico jiairuido illaimana cue illena, Jusiñamui ecimo cue raillana omoi nairai cioitimaci. Mona uillie motodo cue abido billena jai cioitimaci.

<sup>65</sup> Iena cacajanona, naimiemona Jusiñamuina Jesús jeare ñaia jira, naie nanoca ñairaima dama ie iniroina cuaranote. Raite:

—Naimiedi Jusiñamuina jeare ñaite. Jiaie naimiena llogidotinona jai jitaiñedicai. Ie ñaiaomona dama naimie abina llogidote. <sup>66</sup> ¿Niese naimiena raitomoi?

Jiai illaicomini dinena uai otimaci:

—Naimie fiodaillasa.

<sup>67</sup> Ie mei naimie uiecona tuallaitimaci. Naimiena ducoidimaci. Jiai bucoidimaci. <sup>68</sup> Raitimaci:

—O Cristodiodena, ¿bu o bucoia? caimo llono.

Jesús uai oñede.

*Pedrodi Jesúsna janua rafue*

(Mr 14.66-72; Lc 22.56-62; Jn 18.15-18, 25-27)

<sup>69</sup> Naie facaise Pedro naie jofo nairai birimo ite. Naie jofo nama mullaiño naimie dine billanona raite:

—Galileamona Jesús bite. Odi ie cominidio. Naimie diga jaicabidio —raite. <sup>70</sup> Nana nainomo itinomo Pedro llote:

—O lluana uiñoñedicue.

<sup>71</sup> Nase fueomo Pedro jaidemo, naimiena jiaie mullaiño cuanona, nainomo itinomo llote:

—Bimiedi Nazaret ie Jesús comini imie.

<sup>72</sup> Pedro uai ote:

—Uanaicinona cue lluana Jusiñamuidi uiñote. O llogamiëna uiñoñedicue.

<sup>73</sup> Dallu illanona, nainomo itino Pedro dine billano, naimiemo llotimaci:

—Ua Jesús comini imiedio, o uai bairia jira. Naimie isoí ñaitio.

<sup>74</sup> Uai ote:

—Uanai cue lloñenia, Jusiñamui cuena duere finoite. Uanaicinona cue lluana naimie uiñote. Ero, Jesúsna uiñoñedicue. —Ieconí itava ñaite. <sup>75</sup> Iena cacajano, Pedro Jesús lluana ubiñote. Jaive Jesús Pedromo llote: “Itava ña ñaiñenia, dacaño amani cuena janoitio” llote. Iena ubiñuanona, Pedro jino jaillano, sure eede.

## 27

*Pilato dine Jesús illa rafue*

(Mr 15.1; Lc 23.1-2; Jn 18.28-32)

<sup>1</sup> Monaidemo, nana Jusiñamui diga nanoca ñairainidi, nana einamací diga, Jesúsna siadotimaci. Naimiena meinellena siadotimaci. <sup>2</sup> Siadua mei, Jesúsna maianona, Poncio Pilatomo uitimaci. Romanuai railla nairai anamo naimaci illa jira, Pilatodi naimaci gobernador.

*Judas micori fiodailla rafue*

<sup>3</sup> Judas micori Jesúsna jai gaitatate. Naie illaicomini Jesúsna meiniana lluana naimie micoridi uiñuamona, ie comeci iuaina meidote. Illaicominimo ie treinta diga ucubena abido atide. <sup>4</sup> Raite:

—Jesús maraiñede rafuena jaca finoñede. Naimie fiodaiñeite. Naimiena cue gaitatajamona, maraiñedicinona jai finodicue.

Uai otimaci:

—¿Bue ñe caimo lluaibitio? O rafue caimo duiñede.

<sup>5</sup> Ie mei Judas micori Jusiñamui jofo jeraimo naie ucubena fo jamai faite. Jino jaillanona, oni jaide. Dama naimie abina meinellena, cimaio llirinote raona. <sup>6-7</sup> Jusiñamui diga nanoca ñairaini naie ucubena irai mei, iena siadotimaci. Coniniri raitimaci:

—Naie isode ucube nainomo joniana Moisés micori jai rairuilla jira, Jusiñamui jofomo ite ucube ocabiranomo jonenidicai. Naie ucube diga damie meinellena ibadici. —Ie jira naie ucube diga eniruena ibadimaci. Naie illanodi jiñora ouilla enirue. Jiaie nairaimona bu bia, naimie fiodaia, naie eniruemo naimiena raillena, iena ibadimaci. <sup>8</sup> Naie ucube muidona damie fiodailla jira, birui naie enirue mamecidi dirue ie enirue. <sup>9</sup> Iemona Jeremías micori jaiie cuega rafue jai suide. Naimie micoridi Jusiñamui facaina lloraima. Naimie micori cuega: “Cai Israel railla cominimona damierie railla jira, naimiena meinellena, treinta ucubena fecaitimaci. <sup>10</sup> Naie ucube diga jiñora ocabilla eniruena ibaitimaci, cai Nama Jusiñamui llua isoí” cuega.

*Pilato dine Jesús illa rafue*  
(Mr 15.2-5; Lc 23.3-5; Jn 18.33-38)

<sup>11</sup> Pilato railla gobernador uicomo Jesúsna atia mei, Pilato Jesúsno jicanote:

—¿Judúai comini illaimadio?

Jesús uai ote:

—Jii. Raise llotio.

<sup>12</sup> Ie mei Jusiñamui diga nanoca ñairainidi, einamaci diga, naimiena llogidote; iadedi naimie dinena uai ofiede. Ie abina riidoñede. <sup>13</sup> Ie muidona Pilato naimiemo lloste:

—Diga rafuena ona llogidotimaci. ¿Niese uai ofiedo?

<sup>14</sup> Jesús nia uai ofiede. Ie jira Pilato uainicaide.

*Pilatodi Jesús fiodaillana llua rafue*  
(Mr 15.6-20; Lc 23.13-25; Jn 18.38-19.16)

<sup>15</sup> Naga año pascua railla rafue facaiseconi cárcelmo itinomona Pilatodi comini jicacamierna jamai jino orede. <sup>16</sup> Bie año cárcelmo Barrabás raillamie ite. Naimie mameci eo are soride. <sup>17</sup> Naie rafue illa jira, ailluena comini naimie dine ofillano, naimacimo Pilato jicanote:

—Bie año cárcelmona, ¿bumie jino cue oretajana jitaidomoi? Barrabás raillamie ite. Jesús raillamie jiai ite. Naimiedi Cristona jiai mameciredede.

<sup>18</sup> Iese jicanote; iadedi naimiedi Jusiñamui diga nanoca ñairaini Jesúsri uradoillana uifnote. Naimaci Jesúsna meineiacanana jiai uifnote. <sup>19</sup> Ie maijiracomo naimie nia illanona, naie facaise Pilato ai naimie dine rabe orede. Cuete: “Bimiedi marañede rafuena jaca finoñede. Naimiena duere finoñoeno. Jaive naio cue nicairillano, naimie muidona cue comece jarire ite”. <sup>20</sup> Ailluena comini Pilato dine ofillanona, Jusiñamui diga nanoca ñairainidi, einamaci diga, cominimo llotimaci:

—Pilato caimo jicanoia, Barrabás jino oretallena jica. Jesús meinellena jica —llostimaci.

<sup>21</sup> Comini ofilla mei, naimacimo Pilato dane jicanote:

—¿Nimie cue jino oretajana jitaidomoi?

Uai otimaci:

—Barrabás.

<sup>22</sup> Pilato dinena jicanote:

—¿Niese Jesúsna cue finuana jitaidomoi? Naimiedi Cristona jiai mameciredede.

Nana uai otimaci:

—Naimiena cruzmo corai.

<sup>23</sup> Pilato dane jicanote:

—¿Nie isoide marañede rafuena finode?

Naimaci dinena ado ibi llonoidimaci:

—Naimiena corai.

<sup>24</sup> Jesúsna jino oretajana jitaiñedimaci. Iena Pilato uifnamona, comini jai uri ifnenana naimie cianona, jinui diga ie onollina jocuanona raite:

—Bimie fiodaillana cue muidonañede. Bie rafue cuemo jai duifñede. Naimie fiodaite omoi muidona.

<sup>25</sup> Uai otimaci:

—Dama iesede. Naimie fiodaite cai muidona. Jiai cai uruai muidona.

<sup>26</sup> Ie mei Pilatodi Barrabás naimaci jitailla jira, jino orede; iadedi Jesúsna sechedotajanona, naimiena coraillena orede. <sup>27</sup> Dajerie soldaduaidi Pilato jofomo Jesúsna uite. Nana soldaduai nainomo ofidimaci. <sup>28</sup> Naimie iniroi duifnuano, naimiemo jiduirede iniroina jitadimaci. <sup>29</sup> Eecuaimona niga nuiciraina naimie ifogimo jitadimaci. Ie nabeillimo radosina jonete, illaimana naimie illa isoi. Caiñici ifodo raidimaci, illaimana naimie illa isoi. Raitimaci:

—Jadi, judúai illaima. —Iese raillanona naimiena jifanododimaci. <sup>30</sup> Naimiena tuallaitimaci. Naimie onollimo ite radosina naimaci llinocaida, naiedo naimie ifogina buta-butadimaci. <sup>31</sup> Jesúsna naimaci jifanodua mei, naimie jiduirede iniroina duifnodimaci. Nano naimie iniroina dane abido naimiemo jitadimaci. Ie mei naimiena coraillena oni uitimaci.

*Jesúsna coraia rafue*  
(Mr 15.21-32; Lc 23.26-43; Jn 19.17-27)

<sup>32</sup> Jerusalémna naimaci jaillanona, Cirene railla eniruemona bitimiemo dafañidimaci. Naimie mameci Simón. Naimiena Jesús uiga cruzna rocatatimaci. <sup>33</sup> Gólgota raillanomo jaidimaci. Ifocoraia eruailla jira, iese mameciredede. <sup>34</sup> Nainomo rillanona, ie abi isirena cacañellena, vinomo ererede rana faianona, naimiemo fecadimaci; iadedi iena naimie facajano, iena jiroñede. <sup>35</sup> Naimie coraia mei, cruzna naidania mei, naie soldaduai naimie iniroi dani coninimo fecasite. Naie iniroi bu uille raillanona uifnollena, jifanododimaci.

36 Ie mei ana raidimaci, naimiemo eruaillena. 37 Naimie ifogi afebeimo ie llogiduafulena jonetimaci. Iese cuega: “Bimiedi Jesús. Judíuai comini illaíma”. 38 Ie mei mena firiruide iaimaína coraidimaci. Damie Jesús nabeimo coraica. Jiaimie Jesús jarifebeimo coraica. 39 Naisodo jamai jaidino Jesúsna mameritimaci. Mamerillamona, ifogiaina jaididimaci. 40 Raitimaci:

—Navui raisoidio: “Jusiñamui jofona judaíticue. Darui amani illanona, iena dane finoíticue” raisoidio. Ie muidona dama o abina mai jilloita. Jusiñamui Jitodiodena, cruzmona ana bi.

41 Ie facaise Jusiñamui diga nanoca ñairaini naimiema mameritimaci. Moisés micori llogacino llofueraini naimiema jiai mameritimaci. Einamaci naimiema jiai mameritimaci. Raitimaci:

42 —Jiaie cominina jillotate; iadedi dama naimie abina jilloitanide. Naimiedi cai judíuai comini illaíma raillamiedena, cruzmona naimie ana niade billasa. Ie mei naimiema ñinoíticai. 43 “Jusiñamui Jitodícue” naimie railla jira, naimiedi Jusiñamuina ja ñinotena, Jusiñamui jitaia, Jusiñamui naimiema jillotaite. —Iese naimiema mameritimaci. 44 Naimie diga coraica iaimaiaí daje isoi naimiema mameritíaimaiaí.

### *Jesús fiodailla rafue*

(Mr 15.33-41; Lc 23.44-49; Jn 19.28-30; Heb 9)

45 Jitoma naidai itemona, daje amani horas mona jitibicaide. 46 Ie meinomo judíuai railla uaido Jesús ado jidaioide:

—Elí, Elí, ¿lama, sabactani? —jidaioide. Iena oni dobañuamona raite: “Cue Jusiñamui, cue Jusiñamui, ¿bue ñellena cuena fainonocaidio?” raite.

47 Iena cacajano, nainomo jamai itinomona damierie raitimaci:

—Naimie jaie Jusiñamui facaina lloraima Elíana uaidote —raitimaci. 48 Naimacimona damie jarire jaillanona, fibecode ramo vinona faite. Radosimo jillillano jiröllena, naimiemo a fecade. 49 Teconi jiaino raitimaci:

—Ina nai. Dallu seda. Elías naimiema jilloitajaíbillena sedaiticai.

50 Teconi Jesús dane ado cuirioita, fiodaite.

51 Naie facaise Jusiñamui jofomo ie fetaca iniroife ana anaba jillacimo motodo menafe cuararide. Teconi ñuisaño suide. Iemona nofie oni bojode. 52 Diga raiafuaí econote. Jesús jillua mei, raiafomona, fiodaillamona, ailluena Jusiñamuina ñnotinodi jillodimaci. 53 Ie mei Jerusalémo naimaci jaillanona, diga comini naimacina cidimaci. 54 Nainomo ite capitán, ie soldaduai diga, Jesús fiodaillana eruaidimaci. Ñuisaño ñuillana cacadimaci. Nana suide rafuena cuanona, eo jacinailamona, naimie raite:

—Uanai bimiedi Jusiñamui Jito.

55 Ailluena riñoniaí naie rafuena aarena cidimaci. Naimiema canöllena, Galileamona Jesús diga navui bitimaci. 56 Naimaci motomo María Magdalena ite. Jiaie María jiai ite. Naiñaiñodi Jacobo ei. Naiñaiño jiai José ei. Zebedeo uruaí ei jiai ite.

### *Jesús raiafomo jonia rafue*

(Mr 15.42-47; Lc 23.50-56; Jn 19.38-42)

57 Jitoma ana ítemo, eo ucuberedimie Pilato dine jaide. Naimiedi Arimatea naírai imie. Naimie mameci José. Iese dibeimo jaidimie. 58 Jesús abina jicallena, Pilato dine jaide. Pilato “Jee” raillanona, Jesús abina naimie ollena llote. 59 Ie mei Jesús abina cruzmona ana José uanona, jeanide mare userede iniroi diga naimie abina ferinote. 60 Nofici ie raiafomo jonete. Naie raiafo dama José jaie finoca, naimie iena. Jesús abi nainomo jonia mei, José naifomo noficina ñuitade. Naifo ibaide. Ie mei oni jaide. 61 María Magdalena raiafo uico dine jiaie María diga rainadatiñaiñuai.

### *Soldaduai Jesús raiafo sedaja rafue*

62 Ie areruido, pascua railla rafue illarui, dajerie judíuai illaicomini Pilato dine jaidimaci. 63 Raitimaci:

—Ero, naie abi caitadimie nia fiodañenia, navui llote: “Cue fiodaillamona, darui amani illanona, jilloíticue”. 64 Ie jira o uai oreta, darui amani raifi naie raiafo raise íballena, naimie llofueoicaigano nainomo jaillanona, naimie abi ari oi raillano. Naimie abina naimaci fíañona lloítimaci: “Naimie jai jillode”. Iese sua, cominina eo jifueitimaci.

65 Pilato uai ote:

—Soldaduai omoído oreíticue, naie raiafo raise sedallena.

66 Ie jira jaidimaci. Raona nitajano, raiafo raise íbaidimaci. Naiena sedallena, soldaduana nainomo fainonocaidimaci.

## 28

*Jesús fiodaillamona jillua rafue**(Mr 16.1-8; Lc 24.1-12; Jn 20.1-10)*

<sup>1</sup> Sábado fuilla mei, monaicania, María Magdalena, jiaie María diga, raiafona jibuisaidiaifua. <sup>2</sup> Ieconí ñuisaño suide. Monamona billanona, Jusiñamui jaienicí raiafomo ibaica noficina oní ñuitade. Naie noficimo raide. <sup>3</sup> Eo queniredena eruaide. Naimie iniroi eo userede. <sup>4</sup> Nainomo ite soldaduai naimiena eo jacinailamona, abi docaidimaci. Iemona fiodaitino isoi dallu itimaci. <sup>5</sup> Ie facaise naie jaienicidi ñinena naie riño iaifuaimo llote:

—Jaciruiñeno. Coraica Jesúna omuiño jenuana uiñoticue. <sup>6</sup> Naimie bene ifede. Naimie llua isoi, fiodaillamona naimie jai jillode. Naimie ifo jeraimo biillano mai jibuisaibi. <sup>7</sup> Ie mei ie llofueoicaigano ñine raire omuiño jai. Fiodaillamona naimie jilluana naimacimo llono. “Galileamo omoi uicommo naimie jaité” llono. Bie rafue omuiño jai lloticue —llote. <sup>8</sup> Ie jira raiafomona rajicaillanona, eo iobillanona, raire jaidiaifua. Ie llofueoicaigano ñine aisidiaifua. <sup>9</sup> Ie llofueoicaigano ñine iaifua nia riñenia, Jesús iaifuaimo dafaifillano, raite:

—Itomuiño. —Naimie ñine iaifua rillanona, naimiena sedallena, naimie eillana llinotiaifua. <sup>10</sup> Jesús ñinena raite:

—Jaciruiñeno. Cue llofueoicaiganomo llono: “Galileamo jai. Nainomo omoina cioiticue” llono.

*Soldaduai raiafona sedademo suide rafue*

<sup>11</sup> Jaidiaifuaimo, nainomo ite soldaduaimona dajerie Jerusalémo jaide, nanoca Jusiñamui diga ñairainimo nana naimacimo suide rafue lollena. <sup>12</sup> Iena cacajano, einamací diga iena siadotimaci. Ie mei naie soldaduaimo ucubena fecadimaci. <sup>13</sup> Raitimaci:

—Jiaie cominimo llono: “Cai inia mei, ie llofueoicaigano ie abina ñiano uitimaci” llono. <sup>14</sup> Iena cai gobernador fidiia, naimie diga ñaiticai, omoina naimie duere finoñellena —raitimaci. <sup>15</sup> Ie jira naie ucubena feiñuanona, cominimo illaicomini llua isoi llotimaci. Naie rafue uiñocana jaide. Birui nia iena uiñocana jaide.

*Jesús ie llofueoicaiganomo iraicaiño lloga rafue**(Mr 16.14-18; Lc 24.36-49; Jn 20.19-23)*

<sup>16</sup> Ie mei Galileamo naie once llofueoicaigano jaidimaci. Jesús lloga anedumo jaidimaci. <sup>17</sup> Naimiena naimaci cuanona, naimiena sedadimaci; iadedi dajerie Jesús jilluana raise nia ñinoñedimaci. <sup>18</sup> Jesús ñinena raite:

—Cue Moo cue uai cuemo iga, monamo cue jitailla rafue cue finollena, eniruemo cue jitailla rafue cue finollena. <sup>19</sup> Ie jira naga nairaimo jai, cue ñibeimo naie cominina itatallena. Cue ñibeimo naimaci jailla mei, cue Moo ñibeimo naimacina illamona, naimaci cue ñibeimo illamona, ie Joreño anamo naimaci illamona, naimacina bautiza. <sup>20</sup> Nana omoimo cue lloga rafuena naimaci iena ñnollena, llofue. Nia abido cue biñenia, omoina canollena, omoi diga cue Joreño jaca iite —llote. Mai. Macaibaite. Mateodicue.



## MARCOS JESUCRISTO ENIRUEMO ILLA RAFUE CUIAFUE

*Jofue iñenanomo Juan Bautista micori illa rafue*

*(Mt 3.1-12; Lc 3.1-9, 15-17; Jn 1.19-28)*

<sup>1-2</sup> Jesucristo rafuena omoimo lloiacadicue. Naimiedi Jusiñamui Jito. Naimie rafue mare. Isaías micori Jusiñamui facaina jaié llumona, Juan Bautista micori llofuellena lloste. Iena suillamona, Jesucristo eniruemo ite rafue tainede. Iena nano lloiacadicue. Isaías micori cuete:

“Ero, o uicodo cue rafuena llolena, damiena oretaiticue” Jusiñamui raite.

<sup>3</sup> Jofue iñenanomo damie jidai-jidaillana cacadicue.

Naimie lloste: “Cai Nama biite. Naimie naiso atona raise fino” lloste.

Naisona lloste; iadedi naimie uaina naimaci feñollena, naimaci comeciai marena finuana ñaite.

<sup>4</sup> Isaías micori llua isoi, Juan Bautista raillamie micoridi Jusiñamui rafuena jofue iñenanomo llofuecana jaide. Cominina dafaifia, naimacimo lloste:

—Omoi jeacinona fañonocaida, Jusiñamui dibeimo omoi comeciai iuailai meido. Iemona omoi jeacinona feitaite. Omoi comeciai iuailai omoi meidoia, cominina iena uñotallena, mai omoi bautizalloomi.

<sup>5</sup> Diga comini naimie micori dine jai jaisoidimaci. Jerusalémona, nana Judeamoná, nana Jordán fuemona jai jaisoidimaci. Jusiñamuimo naimaci jeacinona naimaci llua meino, naimacidi Juan micori bautizaga.

<sup>6</sup> Juan micoridi camello itiraiái ie nilla iniroina jitade. Igoi iena ie moilligaina jitade. Fioduaina rite. Cifona mete. Jamai rana guite. <sup>7</sup> Cominimo lloste:

—Cue baifemo faitimie bie facaise biite. Jamai bue cue isoilla jira, naimiena cue canuana uñofedicue. <sup>8</sup> Jusiñamui dibeimo omoi illamona, jinui diga omoina bautizadicue; ia naimie bia, naimie dibeimo omoi jaillamona, Jusiñamui Joreño omoimo itataite.

*Jesús bautizaja rafue*

*(Mt 3.13-17; Lc 3.21-22)*

<sup>9</sup> Jordán dine Juan micori nia ia, Galileamoná, Nazaretmoná naimie dine Jesús bite. Nainomo Jesúsdi Juan bautizaga. <sup>10</sup> Bautizaja mei, jinui mona billanona, ieconí mona bojodena ciode. Jusiñamui Joreño, ucugi isoi, naimie emodomo ana billana ciode. <sup>11</sup> Monamoná Jusiñamui lloste:

—Cue isiruiga Jitodio. Ori iobidicue.

*Jesúna Taife ramo faia rafue*

*(Mt 4.1-11; Lc 4.1-13)*

<sup>12</sup> Jesús bautizaja mei, Jusiñamui Joreño jofue iñenanomo naimiena uite. <sup>13</sup> Comini nainomo iñede. Difai ocainaiái itimaci. Nainomo cuarenta digarui ite. Ie facaise Taife naimiena ramo faite; ia Jusiñamui jaienisaí naimiena sedadimaci.

*Galileamo Jesús illa rafue*

*(Mt 4.12-17; Lc 4.14-15)*

<sup>14</sup> Naie facaise Juan Bautista micorina Herodes gaitaja mei, Galilea railla eniruemo Jesús jaide. Jusiñamui ie mare rafuena llocana jaide. <sup>15</sup> Lloste:

—Jusiñamui birui omoína sedacade. Ie cominina omoi jaillena birui jitaide. Jusiñamui dibeimo illena, omoi jeacinona fañonocaida, omoi comeciai iuaina meido. Bie rafuena mai omoi iino.

*Ie llofueoicaigano jaillena, Jesúsdi nagaamagamiéna fetua rafue*

*(Mt 4.18-22; Lc 5.1-11)*

<sup>16</sup> Jaiiruido Galilea railla jorai fuemo Jesús macaritemo, menamiéna ciode. Naga ie ama iaimaiái. Damie Simón. Jiaimie Andrés. Llojjina fairaima iaimaiái. Iese jaca naie iaimaiái maijuidiiaimaiái. <sup>17</sup> Iaimaiáimo lloste:

—Cue diga omico jaoicaillena, cue diga mai bi. Cue llofueganona omico jaillena jitaidicue. Llícíaina birui ocabitomico; iadedi cominina oitomico, cue dibeimo naimaci illena.

<sup>18</sup> Iena cacajanona, ieconí iaimaiái llojjina fañonocaida, naimie diga jaidiiaimaiái. Ie llofueganona jaillena, jaidiiaimaiái. <sup>19</sup> Lliaí bai Jesús jaidemo, jaié menamiéna ciode. Naga ie ama iaimaiái. Damie Jacobo. Jiaimie Juan. Iaimaiái moodi Zebedeo. Botemo iaimaiái llojjina sigaidiiaimaiái. <sup>20</sup> Jesús iaimaiáina uaidote, ie llofueganona jaillena. Ie maijirainí diga iaimaiái moona fañonocaida, botemona ari billanona, Jesús diga jaidiiaimaiái.

*Jesúdi Janaba anamo itimie jillotaja rafue*  
(Lc 4.31-37)

<sup>21</sup> Bai jaillanona, Capernaumo ie llofuegano diga Jesús ride. Nainomo naimie ia, sábadoruimo judíuai ofiracomo jaide. Nainomo llofujete. <sup>22</sup> Moisés micori llogacino llofueraíni isoi llofueñede. Illaíma uai isoi naimie llofuia jira, nainomo ite comíni naimie llofuíamona rajicaidimaci. <sup>23</sup> Janaba anamo illamie nainomo ite. <sup>24</sup> Jesús llofuiana cacaíta, Janabadi íimana ado cuirioitate:

—Odi Nazaret ie Jesús. ¿Bue ñeacadio cai diga? Caina duere finuaíbidio. Ona uíñoticue. Odi Jusiñamui ie mare fetocamiedio.

<sup>25</sup> Jesús naimiena lletade:

—Lliúcai. Naimiemona oni jai.

<sup>26</sup> Janaba naimiena docaitajanona, ado cuirioillanona, naimiemona oni jaide. <sup>27</sup> Iena ciuanona, nana nainomo itino rajicaidimaci. Coniniri siadotimaci:

—¿Niese ite? Bimie jieie uaido llofujete. Janabamo naimie lua mei, íimamona Janaba oni jaide. Janaba Jesús uaina ínote.

<sup>28</sup> Iemona nana Galilea eniruemo Jesús mameci are soride.

*Jesús Pedro jifaiñona jillotaja rafue*  
(Mt 8.14-15; Lc 4.38-39)

<sup>29</sup> Ofiracomona Jesús jaillanona, ie llofuegano diga, Simón jofomo jaide. Andrés nainomo jiai jainaiáide. Jacobo, Juan diga jiai fo jaide. <sup>30</sup> Ie facaise Simón jifaiño duide. Abi cuaride. Nainomo itino Jesúmo naiñaiño duillana llotte. <sup>31</sup> Iena cacajanona, naiñaiño dine jaillanona, Jesús naiñaiño onollina llinote. Naiñaiñona naidacaitade. Ieconí abi cuarilla faínonocáide. Guille finuanona, ie jofomo itinona ecade.

*Jesúdi ailluena duidinona jillotaja rafue*  
(Mt 8.16-17; Lc 4.40-41)

<sup>32</sup> Navuída, jítibicáidemo. Jesús dine comíni ailluena duidinona atidimaci. Janaba anamo itinona jiai atidimaci. <sup>33</sup> Nana Capernaum comíni naie jofo nasemo ofidimaci. <sup>34</sup> Jesúdi diga duiconona ailluena duidinona jillotate. Ailluena comíni Janaba anamona jillotate. Naimiena jananiai uíñua jira, Jesús naimiaci ñaiana rairuide.

*Galileamo Jesús llofuia rafue*  
(Lc 4.42-44)

<sup>35</sup> Ie areruido nia monaiñenia, Jesús casillanona, Capernaumona comíni íñenanomo Jesús jaide. Nainomo Jusiñamuimo jíde. <sup>36</sup> Monaia, casidemo, jofomo Jesús íñena jira, Simón, ie nabaiñiai diga, Jesúna jenuaíde. <sup>37</sup> Baillanona, raite:

—Nana comíni ona jenodimaci.

<sup>38</sup> Jesús uai ote:

—Jíaiie nairaiaí dine mai cai jailli. Nainomo llofueiacadicue. Ie jira Capernaumona jino biticue.

<sup>39</sup> Nana Galileamo Jesús jaide. Judíuai ofiracuaimo llofuecana jaide. Ailluena cominimona jananiaina oni oretate.

*Jesúdi efonaitimiena jillotaja rafue*  
(Mt 8.1-4; Lc 5.12-16)

<sup>40</sup> Ie facaise efonaitimie Jesús dine billanona, naimiena raise uaiduamona, caiñici ifodo ana rainadate. Raite:

—O jítaiadedi, cuena jillotaredio.

<sup>41</sup> Naimiena duenaillamona, Jesús ie onolli naimiemo oni ñuitajanona, naimiena jetade. Raite:

—Ona jillotaiacadicue. Mai o jillo. <sup>42</sup> —Ieconí naimie jillode. <sup>43</sup> Ie facaise Jesús naimiena oretaiacanano, naimiemo riire llotte:

<sup>44</sup> —O jilluana bumó lloñeno; íadedi Jerusalémo Jusiñamui jofomo Jusiñamui diga ñairaima dine mai jai. O jilluana comíni raise uíñollena, naimiemo o abina acatajai. Moisés micori jaié lloga rana Jusiñamuimo fecá.

<sup>45</sup> Iese Jesús naimiemo llotte; íadedi Jesús finoca rafue llocana eo uite. Ie muidona ailluena comíni Jesúna cioacana jira, Jesús marefodo comíni illanomo jaisoñede; ía comíni íñenanomo jaisoide. Iese jaisoide; ía naganomona naimie dine bíñoidimaci.

## 2

*Jesús tisítaitimiena jillotaja rafue*  
(Mt 9.1-8; Lc 5.17-26)

<sup>1</sup> Nigarui illanona, Capernaumo Jesús dane abido ride. Comini iena fidianona, <sup>2</sup> ie risoillacomo naimie dine ofidimaci. Ailluena billa jira, fo illino ifede. Nasemo jiai eo ofidimaci. Jesús naimacimo Jusiñamui rafuena llofuete. <sup>3</sup> Cominina Jesús llofuetemo, naimie dine nagaamagamie ie biiramo biide tsitaitimiena atidimaci. <sup>4</sup> Ailluena comini illa jira, Jesús dine naimaci rinidimaci. Naie jofo bibanilla jira, jofo emodomo a jaidimaci. Jofo beicimo ite tidabacuido a jaidimaci. Jofo emodo econuano, Jesús ecimo naimiena ie biiramo biide diga, rao diga, ana ñuitadimaci. <sup>5</sup> Iena Jesús ciuanona, tsitaitimie jilluana naimaci ñuana Jesús uñote. Tsitaitimiemo llote:

—Nabai, o jeacino cue feitaja jira, iena jai oni dotadicue. Ie facai ibana jai ofeiticue.

<sup>6</sup> Nainomo itinomona damierie Moisés micori llogacinona llofueraini nainomo raidimaci. Comecina facadimaci: <sup>7</sup> “¿Niese bimiedi iese llote? Dama Jusiñamui jeacino dotarede. Bimie Jusiñamuiñede; ia Jusiñamui ifomo iacade. Jusiñamuina jai jeare ñaite”. <sup>8</sup> Naimaci comechiai facajacinona Jesús uñuanona, naimacimo jicanote:

—¿Bue ñellena omoi comechiai iese facadomo? <sup>9</sup> Bimiemo: “O jeacino jai oni dotadicue” cue lloia, cue uai siñonana uñofeitomoi; ia bimiemo: “Mai naidacaillanona, o biira ferinocaida, mai macari” cue lloia, cue uai siñonana uñofeitomoi. <sup>10</sup> Monamona jaie cue billanona, imana jaidicue. Ie jira jeacino oni dotaja uai cuemo ite. Iena omoi uñollena, tsitaitimiemo lloiticue: <sup>11</sup> “Mai naidacai. O biira ferianona, o jofomo mai jai”.

<sup>12</sup> Iese naimie raillanona, tsitaitimie jillode. Naidacaida, ie biira feria mei, naimacimona jino jaide. Nana nainomo itino rajicadimaci. Iemona Jusiñamuimo iobillacinona fecadimaci. Raitimaci:

—Bie isoide siño comena jaca cioñedicaí.

*Jesúdi Levína fetua rafue*  
(Mt 9.9-13; Lc 5.27-32)

<sup>13</sup> Jiairuido jorai fuemo Jesús dane jaide. Ailluena comini naimie dine ofillanona, naimacina llofuete. <sup>14</sup> Llofuia mei, Jesús bai macaritemo, Leví raillamiena ciode. Levídi Alfeo jito. Gobierno ucube ouillanomo naimie maijuiide. Nainomo raidena Levína ciode. Naimiemo llote:

—Cue llofuegamiena o jaillena, cue diga bi. —Naidacaida, Jesús diga jaide.

<sup>15</sup> Ie mei Leví jofomo Jesús ie llofueoicaigano diga guisaide. Naie facaise ailluena comini naimie diga jaisoidimaci. Naimacimona diga gobierno ucube oraini nainomo guisaibitimaci. Moisés micori llogacinodo raise jaiñedino jiai guisaibitimaci. <sup>16</sup> Ie facaise fariseuai comini, Moisés micori llogacinona llofueraini diga, nainomo jamai bitimaci. Jesúsna ciuanona, naimie llofueoicaiganomo jicanotimaci:

—¿Bue ñellena omoi maestro ucube oraini diga guite? Maraiñede comini diga naimie guite.

Naie isoidino diga fariseuai comini nabairiñena jira, iese jicanotimaci. <sup>17</sup> Iena cacajano, Jesús llote:

—Ecairedinodi médiconna jitañedimaci; ia duidinodi médiconna jitañedimaci. Ie isoide. Mareuidino cuena jitañedimaci; ia maraiñedino cuena jitañedimaci. Jusiñamui díbeimo mareuidinona uaibitidicue; iadedi maraiñedinona uaibitidicue. Omoi mona maraiñedino diga nabairitidicue; ia naimacina uaibitidicue.

*Jesúmo comini guiñenana jicanua rafue*  
(Mt 9.14-17; Lc 5.33-39)

<sup>18</sup> Ie facaise Jusiñamuina raise iobitallena, Juan Bautista llofueoicaigano guiñenaruillai ite. Ie facaise fariseuai comini jiai guiñenaruillai ite. Jesús dine comini billanona, naimiemo llote:

—Cai einamací llua isoi, Jusiñamuina naimaci raise iobitallena, guiñenaruillai illa facaiseconí Juan Bautista llofueoicaigano guiñedimaci. Naimaci jeacino facaina sunaicabitimaci. Fariseuai llofueoicaigano iedo jiai jaidimaci; ia o llofueoicaigano jaca guitimaci. ¿Bue ñellena cai einamací rafuedo jaiñedimaci?

<sup>19-20</sup> Jesús uai ote:

—Jiaie rafuedo iena lloiticue. Coniruedi ie aina uarui ia, iobilla jira, ie nabairiñai sunañedimaci. Iobillamona guitimaci. Jiairuido jai aireiacade conirue naimaci diga iñenia, naimaci comece sunaillanona, naimaci jitaia, guiñenaruillaidi iite. Ie isoide. Cue comini diga birui cue illa jira, iocire itimaci. Ico cue jaille mei, sunaitimaci. Ie muidona birui cue llofueoicaigano guicabitimaci.

<sup>21</sup> Jiaie rafuedo iena lloiticue. Nia jocoñega comue iniroidi jacaie iniroimo jilliñega. Jilliadi jocua mei, comue iniroi jacaie iniroimona fo llirite. Eo fodo cuararite. Jai maraiñeno cioite. <sup>22</sup> Jacagomona finoca bolsa como finoca vino joneñega. Jonegadana, mairiñena jira, sirillamona igoi raire cuararite. Vino faifite. Igoi jiai faifite. Como finoca vino comogomo

jonelle. Iemei iena faifñeite. Ie isoide. Omoi einamací rafue ifomo jiaie rafue birui ite. Iena omoimo llocabitícue. Iedo jaidicái —llote.

*Sábadoruimo Jesús llofueoicaigano majia rafue*  
(Mt 12.1-8; Lc 6.1-5)

<sup>23</sup> Jiairuido sábadoruimo Jesús, ie llofueoicaigano diga, trigo illa illi motodo joide naisoná jaide. Ie llofueoicaigano trigona tijiano, guicana jaidimací. <sup>24</sup> Dajerie fariseuái iena ciuano, llotimací:

—Rairuica rana finosite. Moisés micorí rairuilla jira, sábadoruimo majinidicái; iadedi trigona naimací tijiamona, caimona jai majidimací. Iese caí abímo jeacinona jai finodimací.

<sup>25</sup> Ie llofueoicaiganona riđuano, Jesús uai ote:

—Cuemona jeacino finoñedimací. David micorí jaie finoca rafuemo omoí comecíai raise facañedomoí. David micorí guille iñena, naimie aimetaia, ie nabaiñiaí diga, Jusiñamui jofomo fo jaide. <sup>26</sup> Naie facaise Jusiñamui diga nanoca ñairaimadí Abiatar. Jusiñamui jofomo naimací fo jailla mei, Jusiñamuimo fecaca llomeniconá uanona, guitimací. Jamái bue isoidino naie llomeniconá guillana Jusiñamui rairuide. Daní Jusiñamui diga ñairainí iena guiredimací. Ie nabaiñiaí diga, David micorí iena guite; ia Jusiñamui naimacina duere finoñede. <sup>27</sup> Jusiñamui sábadona finuamona, sábadó ite, nairuí illamona cominí caimare illena; ia omoí llofuiamona, iese iñedimací. Nairuimo rairuica rana finoñellena, cominí iese illena llofuecabitomó. <sup>28</sup> Monamona cue billamona, iimána jaidicue. Ie jira sábadoruimo cominí finolle rafuena rairuiredicue. Nairuimo finoñelle rafuena jiaí rairuiredicue. Ie jira nairuimo cue jitailla rafuena finoredicue.

### 3

*Jesúdi onollina idisarodimiena jillotaja rafue*  
(Mt 12.9-14; Lc 6.6-11)

<sup>1</sup> Jiaie sábadoruimo judíuai ofiracomo Jesús dane jaide. Ie facaise onollina idisarodimie nainomo ite. <sup>2</sup> Nainomo itino Jesús eruaidimací, sábadoruimo Jesús naimie raabaca ie segoitái. Iena Jesús finoia, naimacimona sábadoruimo naimie jai majia jira, naimiena llogidoiacadimací. Sábadoruimo bu majia, naimacimona jeacino finode. <sup>3</sup> Onollina idisarodimie Jesús llote:

—Cue ecimo mai baí bi.

<sup>4</sup> Jesús nainomo itinomo jicanote:

—¿Nie isoide rafue sábadoruimo finuadí mare? Bimie biruí cue jillotaiadedi, biruí mare rafuena finodicue. Cuena biruí omoí meineiadedi, biruí marañede rafue finodomoí. Sábadoruimo, ¿nie isoide rafue finuana rairuidomó?

Cominí dinena uai oñedimací. <sup>5</sup> Naimie uaina naimací iñoñena jira, riicaillanona, Jesús naimacimo erodate. Duidimie llote:

—O onollí mai oní ñuita.

Iena oní ñuitajamona jillode. <sup>6</sup> Iena ciuanona, fariseuái jino jaidimací. Naimiena meinellena, illaima Herodes díbeimo itinona baillanona, naimací diga coniníri siadotimací.

*Jorai fuemo Jesúdi ailluena cominina llofuiá rafue*

<sup>7</sup> Naie nairaimona jorai fuemo Jesús, ie llofueoicaigano diga, oní jaide. Galilea railla eniruemona ailluena cominí naimie dine bitimací. Judeamona jaino bitimací.

<sup>8</sup> Jerusalémóna, Idumeamona, Jordán ruicafabellemona, Tiro jinofemo ite eniruemona, Sidón jinofemo ite eniruemona ailluena bitimací. Nana naimie siño finoca rafuena cacajanona, naimiena cioacadimací. <sup>9</sup> Cominí naimiena meetasi raillanona, ie llofueoicaiganomo daje botemo naimie jaillena eenogana llote. <sup>10</sup> Ailluena duidinona naimie jai jillotaja jira, nana duidino naimie riacadimací. Jilloillena naimiena jetaacadimací. Iemona naimie illa bote eenuana jitaide. <sup>11</sup> Jananiaí anamo itino Jesúsna cioía, Jesús uicomo ana bitadajanona, jananiaí naimacina ñaitatajamona, raitimací:

—Jusiñamui Jitodio. <sup>12</sup> —Ia Jesús naimiena naimací lluaana rairuide.

*Jesúdi ie doce llofueoicaiganona fetua rafue*  
(Mt 10.1-4; Lc 6.12-16)

<sup>13</sup> Naie facaise anedumo Jesús jaide. Ie jitaillano díese naimie dine uaidote. Naimie dine billa mei, <sup>14</sup> doce digamiena fetode. Naimie diga jaicabillena, naimacina fetode. Ie rafuena llollena, naimacina oretaiacade. <sup>15</sup> Janaba anamo itinomona Janabana oní oretallena, ie uai naimacimo ite. <sup>16</sup> Iese mameciredimací: Simón; naimie mamecí jiaicidí Jesús jítaca Pedrona. <sup>17</sup> Jacobo, Juan; iaímaiaí Zebedeo jito iaímaiaí. Jiaie mamecí iaímaiaína Jesús jonete Boanergesna. Naie mamecí oní dobaiñuamona mona guruama. Iciriruilla jira, iese mamecirediímaiaí. <sup>18</sup> Andrés, Felipe, Bartolomé, Mateo, Tomás, jiaie Jacobo; naimiedi

Alfeo jito. Tadeo, jiaie Simón; naimiedi cananista comini facaisemo duide. <sup>19</sup> Judas Iscariote micori; naimiedi Jesúna gaitatitimie.

*Fariseuai Jesúna jeare ñaia rafue*  
(Mt 12.22-32; Lc 11.14-23; 12.10)

<sup>20</sup> Ie llofueoicaiganona fetua mei, ie risoilla jofomo naimaci diga Jesús abido jaide. Ailluena comini naimie dine billa jira, naimie guillena, naimie abi juanide. <sup>21</sup> Naimiena ie comini fidiano: “Naimiedi jai uairico isoi iacade” raillanona, comecina facadimaci. Ie jira naimiena ie ei jofomo isaibiacadimaci. <sup>22</sup> Jerusalémóna Moisés micori llogacinona llofueraini naie facaise billanona, raitimaci:

—Beelzebúdi Janaba comini. Beelzebú anamo Jesús illamona, Beelzebú uaido Janaba illa cominimona Jesúdi Janabana oni oretate —raitimaci.

<sup>23</sup> Naimaci raillana naimie cacajanona, naimie dine Jesús naimacina uaidote. Llote: —Janaba díbeimo Beelzebú illamona, dama ie abina oretanide. <sup>24</sup> Ero, daje isoi comeciaina lloñenamo daje nairai facañenia, danomo maijinidimaci. Oni jaidimaci. <sup>25</sup> Daje isoi comeciaina lloñenamo daje jofomo itino facañenia, danomo jainaiainidimaci. Oni jaidimaci. <sup>26</sup> Ie isoide. Beelzebú uaido jananiaina omoi llua isoi cue oretai, Janaba ie díbeimo itino diga jai nabairiñede. Iemona naimie comini danomo iñeitimaci. Ie uai ieconi saite. <sup>27</sup> Ero, mairidimie ie jofomo ite rana ñibai fiacadomoi. Iena fiillena, naimiena nano raise omoi maiga. Raise maiga mei, ie rana fiiredomoi. Ie isoide. Janaba anamona cominina jillotacabiticue. Naimie afemo nano cue iñenia, cominina jillotanidicue. Naimie afemo cue illa jira, iena finoredicue. <sup>28</sup> Ie jira bie omoimo lloiticue. Jusiñamui nana comini jeacinona dotarede. Naimiedi naimaci jeare ñaiacinona dotarede; <sup>29</sup> iadedi naimiedi ie Joreñoña jeare ñaiacinona jaca dotañeite. Jusiñamui iena jaca feitañeite —llote.

<sup>30</sup> —Beelzebú anamo Jesús ite. Jusiñamui Joreño uaido siño rafuena finoñede; ia Janaba uaido siño rafuena finode —Jesúna raitimaci. Iese naimaci railla jira, “Jusiñamui naie isoide ñaiacinona jaca dotañeite” iese Jesús llote.

*Jesús ie comini*  
(Mt 12.46-50; Lc 8.19-21)

<sup>31</sup> Jesús comini naimie dine rillanona, naimie diga ñaiacanano jino naidaidimaci. <sup>32</sup> Ie facaise ailluena comini naimie ecimo raidimaci. Naimie comini rillana naimaci cacajano, naimiemo llotimaci:

—O ei, o amatiai diga jino ite. O diga ñaiacade.

<sup>33</sup> Jesús dinena uai ote:

—¿Bu cue ei? ¿Bu cue amatiai?

<sup>34</sup> Naimie ecimo itinomo erodajanona, llote:

—Jadi, cue ei, cue amatiai. <sup>35</sup> Jusiñamui jitaillacinona finodimie cue amana, cue miriñoña, cue eina. Imaci ua cue cominina.

## 4

*Jesúdi trigona judaidimiena llua rafue*  
(Mt 13.1-9; Lc 8.4-8)

<sup>1</sup> Jiairuido jorai fuemo dane jaillanona, ailluena comini naimie dine ofillamona, Jesús naimacina llofujete. Ailluena comini nainomo ofilla jira, botemo Jesús jaillano, ana raide; iadedi comini jorai fuemo itimaci. <sup>2</sup> Ailluena rafuena naimacina llofujete. Raite:

<sup>3</sup> —Omoi fueollena, bie rafuemo raise cacarei. Damie trigona judaiaide. <sup>4</sup> Naimie judaiamona, naisomo janore iduai juide. Naimie bai jailla mei, silliñai iena guisaibitimaci. Ie jira scoñede. <sup>5</sup> Nofiemo jiaie iduai juide. Nainomo enirue raise iñede. Sicode; iadedi enirue raise iñena jira, <sup>6</sup> raise jainañena jira, ecasillamona duide. Ie jira llisiñede. <sup>7</sup> Eecuai illanomo jiaie iduai juide. Eecuai sicuamona riarra eecuai ibaica. Ie jira llisiñede. <sup>8</sup> Mare eniruemó jiaie iduai juide. Sicode. Llisillamona danademo treinta diga llisillana ote. Jaiamona sesenta diga llisillana ote. Jaiamona cien diga llisillana ote. <sup>9</sup> Omoi jeforeña jira, raise fueollena, cue lluomo cacarei. Iena ñino.

*Jesús ie como lloga rafuena llofuia rafue*  
(Mt 13.10-23; Lc 8.9-15)

<sup>10</sup> Ailluena cominimona jailla mei, naimie diga jaisoidinodi, ie doce llofueoicaigano diga, Jesúsimo ie llofuiana jicanotimaci. <sup>11</sup> Uai ote:

—Jusiñamuidi omoína ie sedaacana rafuena jai uiñotade. Jaié iena uiñoñedomoi. Jiaie cominina iena nia uiñoñañede. <sup>12</sup> Ie jira bie isoidicinodo naimacimo lloticue. Cue siño finoca rafuena ciodimaci; iadedi iena naimaci ñinoñena jira, uiñoñoño jaitimaci. Cue llofuiana jamai cacadimaci; iadedi naimaci ñinoñena jira, raise cacaiñedimaci. Uiñoñedimaci. Jusiñamui

dibeimo naimaci jaiacaiñena jira, Jusiñamui naimaci jeacinona oni dotañeite. Iena feitañeite. <sup>13</sup> Cue como llofuiacinona omoi raise cacaiñenia, dane cue llofua, iena jiai raise nibai cacaiñeitomoi; <sup>14</sup> ia iena omoina llofueitice. Trigona judaidimiedi Jusiñamui rafue lloaia isoide. <sup>15</sup> Dajerie iduai naisomo juide. Dajerie comini comeciai naie naiso isoidimaci. Jusiñamui uaina cacadimaci; ia Taife naimaci comeciaino cacaja uaina inotañede. <sup>16</sup> Jiaie iduai nofiemo juide. Dajerie comini comeciai naie nofie isoidimaci. Jusiñamui uai nano naimaci cacaja, iena caimare feiñotimaci. <sup>17</sup> Nofiemo riga iduai jainaonidedi raise sicoñede. Naie comini janore inua jira, ie isoidimaci. Dallu nano inotimaci. Jusiñamui uai muidona duere naimaci sefua, abido danomo uaidimaci. <sup>18</sup> Jiaie iduai eecuai illanomo juide. Naie iduai sicua mei, iena eecuai ibailla jira, raise llisiñede. Dajerie comini comeciai naie illano isoidimaci. Jusiñamui uaina cacadimaci. inotimaci; <sup>19</sup> iadedi naimaci comeciai jarire illamona, naimaci raruaiaina ebiruillamona, naie uai naimaci comeciaino itabiñede. Jusiñamui jitaill rafuena finocana jaiñedimaci. <sup>20</sup> Jiaie iduai mare enruemo juide. Dajerie comini comeciai naie enruemo isoidimaci. Jusiñamui uaina cacajano, iena raise feiñotimaci. Eo lliside isoidimaci. Jusiñamui jitailla rafuena finocana jaidimaci. Dajerie janore jaidimaci. Dajerie eo jaidimaci. Dajerie ua eo raise jaidimaci. Iese omoi jai.

*Jesúdi lamparina ñaia rafue*  
(Lc 8.16-18)

<sup>21</sup> Jorai fuedo Jesúdi cominina nia llofueite:

—Jai ueca lamparin jiaie illanomona atia mei, jiaie ra biide anamo rainañega; iadedi jofa jeraimo lligaiñollena, nainomo bite comini raise cioillena, ie rairanomo rainade. <sup>22</sup> Ie isoide. Cue rafue llocana jai, comini comeciai iticinona uñotade. Uanaicino naimaci cacajamona, damierie inotimaci. Damierie inoñedimaci. <sup>23</sup> Omoi jeforena jira, raise fueollena, cue llamo cacarei. Iena ino.

<sup>24</sup> Cue llamo raise cacarei. Omoi cacaja diese Jusiñamui omoina uñotaita. <sup>25</sup> Iena omoi inoia, Jusiñamui omoina canoite. Omoina uñocana jaitaite. Jaiamie iena janore cacajamona, iena inoñenia, Jusiñamui naimiena faifaitaite.

*Jesúdi Jusiñamui ie cominina sedaacana llofua rafue*

<sup>26</sup> Jesús llote:

—Jusiñamui dibeimo comini jailla rafuena nia lloiticue. Naimie dibeimo comini jaillena, naimie rafue llocana jaidicue. Jiaie uaido iena omoimo lloiticue. Damie ie illimo judaiaide. <sup>27</sup> Judaia mei, ie illimo nagarui ie majicabilla isoi naimie jaide. Niese iduai denuana naimie raise uñoñede; <sup>28</sup> ia enruemona nano sicode. Monalla mei, lliside. Iemona naicuai comuide. <sup>29</sup> Jai einaia, iena ote. Ie isoide. Jusiñamui rafuena raise cacaiñedomoi; ia iena inocana jaidomoi.

*Jesúdi mostaza ido llua rafue*  
(Mt 13.31-35; Lc 13.18-19)

<sup>30</sup> Jesús jiaie rafuena llote:

—Jusiñamui dibeimo comini jailla rafuena nia lloiticue. Jusiñamui rafuena janore comini birui cacajamona, ailluena comini naimie cominina ico jaitimaci. <sup>31</sup> Jiaie rafuedo iena omoimo lloiticue. Damie mostaza idona rillamona, naiemona eo aillue riarari sicode. Mostaza ido eo janorede; <sup>32</sup> iadedi sicua mei, eo aillue riarari jaillamona, ie onogaillai jegairiena jira, icairo anamo manaidinomo silliniñai jicaiciaina finodimaci. Ie isoide. Jusiñamui rafuena janore comini birui cacajamona, ailluena comini naimie cominina ico jaitimaci.

<sup>33</sup> Naie isoide rafuiaido Jesúdi Jusiñamui ie cominina sedaacana rafuena cominimo llote. <sup>34</sup> Naimaci cacaja diese llote. Naimacimo jiaie rafuedo lloñede; ia ie llofueoicaiganomo iena eneno llofueite.

*Jesúdi jorai baguana llucaitaja rafue*  
(Mt 8.23-27; Lc 8.22-25)

<sup>35</sup> Ailluena comini llofua mei, jitoma jai sojicaidemo, ie llofueoicaiganomo Jesús llote:

—Ruica enefebeimo mai cai jailli.

<sup>36</sup> Cominina fañonocaida, botemo naimie jai illamona, naimie llua isoi, oni jaidimaci. Jiaie botes jiai jaide.

<sup>37-38</sup> Bai jaillanona, jillacimo Jesús inide. Ie ifogí almohadamo biide. Ie facaise aifi eo riire bite. Joraidi eo bagode. Baguamona, botemo jinui a uaide. Oruiacana jira, jacinailamona, Jesúna casitatimaci. Raitimaci:

—Maestro, ¿niese itio inoilla? Caina cano. Jai buisaidicai. Corobaisaidicai.

<sup>39</sup> Naimie casillano, aifina lletade. Jinui baguana llucaitade. Ieconí aifi llucade. Bagoñede. <sup>40</sup> Ie llofueoicaiganomo jicanote:

—¿Bue ñellena jacinautomoi? ¿Niese cuena raise iñoñedomoi?

<sup>41</sup> Uai ofieno eo rajjicaidimaci. Coniniri ñaitimaci:

—Bimiedi ¿nie isoidimie? Aifi naimie uaina iñote. Jorai naimie uaina jiai iñote. —Bai jaillanona, ruica dine ridimaci.

## 5

*Jesúdi Gadara railla eniruemo illa rafue*

(Mt 8.28-34; Lc 8.26-39)

<sup>1</sup> Ruica dine naimaci ridemo, Gadara railla eniruemo sjjidimaci. <sup>2</sup> Botemona ari Jesús jaidemo, naimie dine damie bite. Naimiedi Janaba anamo itimie. <sup>3</sup> Comini raioillanomo nofie moto ifuaimo naimie i-isoide. Janaba anamo naimie illamona, comini diga marena jaca irainide. <sup>4</sup> Diga icaíño lloeo diga ie onollidi maiga; iadedi oni ecocaida, lloeona ticonote. Ie eilli jiai maiga; iadedi saitaicaida, lloeona ticonote. Ie jira buna naimiena raise mainide. <sup>5</sup> Nagarui nofie motomo ite. Anedumo jaisoide. Cuiri-cuirisoide. Dama ie abina nofici diga jaidode. Iese naimie isoide. <sup>6</sup> Nofiemona Jesúna cianona, aisicana Jesús dine bite. Naimiena sedallena, ie caíñici ifodo ana rainadate. <sup>7-8</sup> Jesús llote:

—Janaba, bimiemona oni jai.

Janabadi iimana ado llotatate:

—Nanoca Jusiñamui Jitodio. ¿Niese cuena nibaiacadio? Jusiñamui mamecido cuena duere finoñeno.

<sup>9</sup> Jesús Janabamo jicanote:

—¿O mameci bu?

Uai ote:

—Aillosiedicai.

<sup>10</sup> Bie illanomona naimacina oretañellena Jesúmo duere jicanotimaci. <sup>11</sup> Naie facaise nainomo ite anedumo ailluena chanchuai itimaci. <sup>12</sup> Chanchuai abimo naimaci jaillena Jesúmo duere jicanotimaci. <sup>13</sup> Jesús dinena:

—Jee —raite. Ieconí iima abimona oni jaillanona, chanchuai abimo jaidimaci. Dos mil chanchuai nainomo itimaci. Iena suidemo, iconí jillacimo joraimo chanchuai aisiano corobaisidimaci.

<sup>14</sup> Iena cianona, chanchuai sedaraini naimaci nairai dine aisicana jaidimaci. Naie rafuena llocana jaidimaci. Ie jira diga comini jaide, naie rafuena raise fidillena. <sup>15</sup> Jesús dine naimaci ridemo, jaive Janaba anamo illamiéna Jesús ecimo raillana ciodimaci. Naimie iniroina jai jítade. Naimie jai uairicoñede. Iena cianona, Jesúna jaciruitimaci. <sup>16</sup> Naie rafuena ciodino jaive Janaba anamo illamié jilluana llotimaci. Chanchuaimo suide rafuena jiai llotimaci. <sup>17</sup> Naie enirue itinodi; Jesúmo naimaci eniruemona oni jaillena duere jicanotimaci.

<sup>18</sup> Botemo Jesús jaiacania, jaive Janaba anamo illamié Jesúsmo jicanote, naimie diga jaillena; <sup>19</sup> ia Jesús raite:

—Dama ite. O nabaiñiai dine jai. Nana Jusiñamui omo finoca rafuena naimacimo llono. Jusiñamui ona duenailana naimacimo llono.

<sup>20</sup> Ie jira oni jaide. Nana Decápolis railla eniruemo Jesús nana naimiemo finoca rafuena llocana jaide. Iena cacajamona, nana comini rajjicaidimaci.

*Jesúdi mena duide riñona jillotaja rafue*

(Mt 9.18-26; Lc 8.40-56)

<sup>21</sup> Ruica díbeimo ie llofueoicaigano diga Jesús abido rilla mei, ailluena comini naimie dine ofidimaci. Jorai fuedo naimie nia ia, <sup>22</sup> Jairona mameciredimiedi Jesús dine bite. Naimiedi judíuai rafue ofraco sedarima. Jesúmo duere jicanollena, ana bitadate. <sup>23</sup> Duere jicanote:

—Cue jisa jai fiodaiacade. Cue jofomo cue diga bi, o onollí naiñaiñomo o jonellena, naiñaiño jilloillena.

<sup>24</sup> Iena cacajano, ie llofueoicaigano diga, naimie diga Jesús jaide. Ailluena comini Jesúmo ñajjillanona jaidimaci. <sup>25</sup> Bai jaillanona, duidiñaiño Jesús jinafona jaide. Naiñaiño jeraimona doce años jaca diaide. <sup>26</sup> Diga manorainimona duere sefuide. Jilloñede; ia fodo jaide. Nana ie ucube jiai fuite. <sup>27</sup> Jesús duidinona jilluana naiñaiño fidiamona, jinafo dinena billanona, naimie iniroina jetade. <sup>28</sup> “Naimie iniroi cue jetajamona jilloiticue” comecina facajamona, naiñaiño naimie iniroina jetade. <sup>29</sup> Ieconí diailladi fainonocaiide. Ie abi jilluana naiñaiño jai uiñote. <sup>30</sup> Ie abimona ie uai oni jaillana Jesús uiñuanona, dobaicaide. Cominimo jicanote:

—¿Bu cue iniroina jetade?

<sup>31</sup> Ie llofueoicaigano dinena uai otimaci:

—Ailluena comini o ecimo jaidimaci. Omo ñajjidinona: “¿Bu cue iniroi jetade?” raitio.

<sup>32</sup> Raise uifollena, Jesús ie ecimo itinomo erodate. <sup>33</sup> Duidifiaño ie jilluana uifua jira, Jesús dine jacirucana bite. Naimie uicomo ana bitadajanona, nana naifiaño iite rafuena llote.

<sup>34</sup> Naifiaño Jesús llote:

—Ñoo, cuena o inua jira, jai jillodio. Mai marena o jai. O duicomona jai jillobidio.

<sup>35</sup> Naifiaño diga Jesús nia ñaitemo, Jairo jofomona jiaño bite. Jairomo llote:

—O jisa jai fodaite. Maestrona ñaidoñeno.

<sup>36</sup> Iena cacajano, Jairomo Jesús llote:

—O comeci jarire iñeno; ia cuena nia ino.

<sup>37</sup> Ailluena comini naimie diga jaillana rairuide. Dani diese jaillana jitaide: Pedro, Jacobo, Juan. Juandi Jacobo ama. <sup>38</sup> Jairo jofomo rillanona, nainomo itino eecuinaillana cacade. Failliaillana cacade. <sup>39</sup> Jesús fo jailla mei, nainomo itinomo jicanote:

—¿Niese itomoi eecuinailla? Cuemona naifiaño fodiañedes. Jamai inide.

<sup>40</sup> Iena cacajano, naifiaño jai fodaite uifuaomona, Jesúri jaisitimaci. Naimacina Jesús jino oretaja mei, nai jitaño moo diga, naifiaño ei diga, ie llofueoicaigano diga, naifiaño ecimo Jesús jaide. <sup>41</sup> Naifiaño onollina llinocaida, judiuaí uaido raite:

—Talita, cumi. —Iena oni dobaifuaomona: “Jitaibici, mai naidacai” raite.

<sup>42</sup> Teconi jilluanona naidacaide. Jai jilluano macarite. Naifiaño doce años jai ite. Nana nainomo itino ieri eo rajicaidimaci.

<sup>43</sup> —Bumo bie rafuena lloñeno —naimacimo Jesús llote. Guillena naifiaño eajana jiai llote.

## 6

### *Nazaretmo Jesús illa rafue* (Mt 13.53-58; Lc 4.16-30)

<sup>1</sup> Naie illanomona Jesús oni jailla mei, ie llofueoicaigano diga Nazaretmo ride. <sup>2</sup> Rilla mei, sábadoruimo nainomo ite ofiracomo llofue. Iena cacajanona, nainomo itino rajicaidimaci. Raitimaci:

—¿Niese eo abina uifote? ¿Bumona ie uaina ote? ¿Niese siño rafuena naimiedi finode? Naimiedi jamai bue isoidimie. <sup>3</sup> Naimiedi amederaima. María jito. Ie amatiadi Jacobo, José, Judas, Simón. Naimie miriñotiaidi cai motomo jiai ite. —“Cai comena naimie ite” raillanona naimie uaina jamaidimaci.

<sup>4</sup> Jesús naimacimo llote:

—Naga illanomona cominidi Jusiñamui facaina lloraima uaina feifnotimaci; iadedi naimie nairaimo naimie ia, ie jofomo naimie ia, ie comini naimie uaina feiñoiacasiñede. Jamaisite. Ie isoide. Cue cominidomoina jira, cue uaina inoñedomoi.

<sup>5</sup> Ie muidona nainomo siño rafuena eo finonide. Damierie duidinona jetajamona, naimacina jillotate; <sup>6</sup> ia naimaci inoñenari rajicaide. Ie mei diga nairaimo Jesús llofuecana jaide.

### *Jesúdi ie llofueoicaiganona oretaja rafue* (Mt 13.53-58; Lc 4.16-30)

<sup>7</sup> Ie doce llofueoicaiganona Jesús uaiduanona, naimacimo ie uai iñonocai, jananiai anamona cominina jilloitallena. Ie rafuena lloñena, jiaie illanuaimo naimacina menamierie oretaiacade. <sup>8</sup> Raite:

—Ailluena rana uifeno. Omoi abi riidollena, jiguidana uifio. Llomenicono uifeno. Ailluena rana omoi uifellena, bolsana uifeno. Ucubena uifeno. <sup>9</sup> Zapatona jitajano jai. Abi omoi meidolle iniroina uifeno. <sup>10</sup> Nie nairaimo omoi jai, daacomo omoi ri. Naie nairaimo omoi ille dinori, daacomo omoi i. <sup>11</sup> Omoina bu feiñoiacaiñenia, omoi uaina bu cacarefacaiñenia, naie nairaimona omoi jaillanona, omoi eilliamio ite jearacuaina oni jaidino. Maraiñede rafuena naimaci finuana naimaci uifollena, omoi eilliaina jaidino.

<sup>12</sup> Jesús naimacimo lua mei, jaidimaci.

—Omoi jeacinona fañonocaiñanona, Jusiñamui dibeimo omoi comeci i uai meiduana omoi jai —llofuecana jaidimaci. <sup>13</sup> Janaba anamo ite cominimona Janabana oredimaci. Duidino abimo farena gia mei, naimacina jillotate.

### *Juan Bautista micori fodailla rafue* (Mt 14.1-12; Lc 9.7-9)

<sup>14</sup> Jesús mameci are sorilla jira. Herodes railla gobernador Jesús finoca rafuena fidade. Naimie raite:

—Fodaillamona Juan Bautista micori jai jillode. Jesús raillamiedi naimie. Ie jira naimie siño rafuena finocabide.

<sup>15</sup> Jiaie comini raisoidimaci:

—Elías jai bairede.



Jiaino raisoidimaci:

—Fiodaillamona Jusiñamui facaina jaie lloraima micori jai jillode.

<sup>16</sup> Jesúna fidiano, Herodes comecina facade: “Juan micori ie ifogina navui jaitataticue. Fiodaillamona naimie jai jillode”.

<sup>17-18</sup> Iese comecina facade, Herodes Juan micorina navui meinetaja jira. Juan Bautista micorina nia meinetañenia, Herodes ie ama Felipe aina ote. Naiñaiño mamecidi Herodías. Ie jira Juan micori naimiemo llote:

—O ama ai diga itio. Maraiñede rafuena finodio. Jusiñamui iena rairuide.

<sup>19</sup> Ie muidona Herodías dinena Juan Bautista micorina jearuite. Naimiena meinetaiacade; <sup>20</sup> ia finonide, Juan Bautista micorina Herodes jaciruilla jira. Naimiedi Juan micorina mareuidimiena uifñote. Naimie Juan micori Jusiñamui rafuedo jaillana jiai uifñote. Ie muidona naimie Juan micorina raise eenote. Diga icaíño naimie micori lluaana cacade. Iena gaide; ia iena raise cacaiñede. Ie muidona Herodías naimie micorina meinetañide; <sup>21</sup> ia ja muidomo naiñaiño sedallirui ride. Herodes cumpleaños ie rafuena finode. Ailluena illaicomina ie rafuemo uaidote. Eo ucuberedinona jiai uaidote. <sup>22</sup> Rafuemo Herodías jisa saillamona, Herodena iobitade. Ie uaidoganona jiai iobitade. Iobillamona, Herodes naiñaiñomo llote:

—O jitailla ra cuemo jica. Iena omo fecaiticue. <sup>23</sup> Illaíma uai cuemo illa jira, iena ua finoiticue. Nie isoide rana o jitaia, omo iiticue. Cue anamo ite nairai o jicadiodena, atuedo omo iiticue.

<sup>24</sup> Iena cacajano, naiñaiño ie ei dine jino jaide.

—¿Buena jicaiticue? —ie eimo jicanote.

Ie ei uai ote:

—Juan Bautista ifogina jica.

<sup>25</sup> Herodes dine raire abido billanona, llote:

—Juan Bautista ifogi bandejamo ja jonecaida, cuemo ine.

<sup>26</sup> Iena cacajano, Herodes sunaite; iadedi naimie llua jira, nainomo naimie uaidogano jiai illa jira, ie lloga uaina janoiacaíñede. <sup>27</sup> Ie facaise ie soldaduaimona Herodes damie cárcelmo orede. Juan ifogina atillena ocuide. Herodes ocuilla isoi finode. Juan ifogina jaitade. <sup>28</sup> Bandejamo naimie ifogi jonecaida, iena atiano, Herodías jisamo fecade. Ieconí ie eimo fecade. <sup>29</sup> Iena fidiana, Juan micori llofueoicaigano naimie micori abina uaibitimaci. Iena raitimaci.

*Jesús cinco mil iñiaína ecaja rafue*

*(Mt 14.13-21; Lc 9.10-17; Jn 6.1-14)*

<sup>30</sup> Jesús llofueoicaigano abido bia, Jesúmo nana naimaci finoca rafuena llotimaci. <sup>31</sup> Ie facaise ailluena comini naimaci dine biñoidimaci. Ie jira jafaici ollena abi juanide. Guillena jiai abi juanide. Ie jira Jesús ie llofueoicaiganomo llote:

—Jafaici cai ollena, eneno oni mai cai jailli. Comini iñenanomo mai cai jailli.

<sup>32</sup> Ie muidona botedo comini iñenanomo dani jaidimaci. <sup>33</sup> Ailluena comini naimaci oni jaillana ciodimaci. Naimacina uifñuamona, diga nairaiaimona aisicana jaidimaci. Jesús nia rñenia, uicodo ie jaillanomo ridimaci. <sup>34</sup> Jesús sijianona, ailluena cominina ciode. Naimacina sedallena bu iñena jira, toica llaudaiaina sedaraima iñena isoi, isoidimaci. Iena uifñuamona, Jesús naimacina duenaite. Ailluena rafuena naimacina llofueite. <sup>35</sup> Jitoma ana ítemo, ie llofueoicaigano naimie dine lluaibitimaci. Raitimaci:

—Jofue bene iñede. Jaca buedi iñede. Jai navuiacade. <sup>36</sup> Comini mai abido oreta. Ianori ite nairaiaimo, ianori ite jofuemo naimaci guille ollena, bie cominina abido oreta.

<sup>37</sup> Jesús uai ote:

—Naimacina bene eca.

Uai onaisite:

—Naimaci guillena doscientos ucube raifi llomenico cai uana nibai jitaideo.

<sup>38</sup> Naimacimo jicanote:

—¿Niga llomenico omoimo ite? Mai jibuisai.

Jibuisailla mei, raitimaci:

—Cinco llomenico mena lliciai diga.

<sup>39</sup> Iena cacajano, cominimo raitie illanomo dajerise ana raillena Jesús llote. <sup>40</sup> Naimaci cien digamierie ana raisite. Jiaino cincuenta digamierie ana raisite. <sup>41</sup> Naie cinco llomeniconna, naie mena lliciai diga, Jesús uanona, monamo eruailanona, Jusiñamuimo iobillacinona fecade. Iemei taillude. Ie llofueoicaiganomo fecade, cominina ecallena. Iese naie mena lliciai nana cominimo fecade. <sup>42</sup> Nana guillanona monidimaci. <sup>43</sup> Monillamona, fiebide guillena iraidimaci. Doce cirigaíaimo oruitatimaci. <sup>44</sup> Cinco mil iñiaí diese guitimaci. Naimaci ainiaí, imaci uruiaí diga, jiai guitimaci.

*Jesús jinui emododo macarilla rafue*

*(Mt 14.22-27; Jn 6.16-21)*

<sup>45</sup> Guilla mei, botedo ie llofueoicaigano ruica dine Betsaidamo jaillena llote. Naie facaiseconi cominina naimie nia facadote. <sup>46</sup> Cominina facadua mei, aneduaimo dane jaide, Jusiñamui diga ñaillena. <sup>47</sup> Jitibicaidemo, nainomo dama ite. Ie llofueoicaigano jorai motomo jai itimaci. <sup>48</sup> Aifi naimacimo riire rilla jira, riire jaitimaci. Iena Jesús cuanona, jinui emododo naimaci dine bite. Naimaci ecido naimie jaisaide; <sup>49</sup> ia naimiena naimaci ciuanona, comecina facadimaci: “¿Bu joreño caimo billana ciodicai?” <sup>50</sup> Naimiena ciuamona, nana jacinaillamona cuirioidimaci. Naie dacaiño Jesús naimacimo llote:

—Omoi joreñoncaifeno. Cuesa. Jaciruiñeno.

<sup>51</sup> Botemo Jesús jaide. Ie facaise aifi lliicaide. Ieri eo rajicaidimaci. <sup>52</sup> Janore guillemona ailluena cominina naimie eajana jaive ciodicimaci; ia naimie uai siñonana nia raise uiñoñedimaci. Naimiena nia raise iñoñedimaci.

*Jesúdi duidinona Genesaret eniruemo jillotaja rafue*

*(Mr 14.34-36)*

<sup>53</sup> Ruica dine jaillanona, Genesaret railla eniruemo ridimaci. Nainomo sijidimaci. <sup>54</sup> Botemona ari jaidemo, nainomo itino Jesúsna uiñotimaci. <sup>55</sup> Nana naie eniruemo aisicana jaidimaci, duidino naimie dine atillena. Naimaci biira emododo duidinona atisite. Jesús illana naimaci fidiano, iese atiuuidimaci. <sup>56</sup> Diga nairaiaimo naimie jaide. Nie nairaimo Jesús ria, naimaci illano motomo duidinona atisite. Jilluana jitaidimaci. Ie iniroi fueda jetallena naimiemo duere jicanotimaci. Nana naimie iniroina jetadino diese jillodimaci.

## 7

*Jesúdi comini comeciaina ñaia rafue*

*(Mt 15.1-20)*

<sup>1</sup> Naie facaise fariseuai cominidi Jesús dine bitimaci. Moisés micori llogacinona llofuerañi Jerusalémona jai bitimaci. <sup>2</sup> Jesús llofueoicaiganomona damierie naimaci isoi guiñenana ciodicimaci. <sup>3-5</sup> Fariseuai dinena Jesúsno jicanotimaci:

—¿Bue ñellena omoi llofueoicaigano cai einamaci rafuedo jaiñedimaci? Naimaci guiacania, naimaci onolli cai einamaci llua isoi, raise jocoñedimaci. Ie jira cai abimo jeacino finodomoí.

Iese jicanotimaci, naimaci einamaci rafuedo naimaci jailla jira. Maraiñede rafue naimacimo suiñellena, iese ailluena judiuai jaidimaci. Naimaci guiacania, naimaci einamaci llua isoi, onollina diga icaíño jocuano, guitimaci. Mercadomona bia, naimaci einamaci llua isoi, abina lleredimaci. Naimaci einamaci llua isoi, tazones, ollas, bandejas jiai jocodimaci. Iese jaisoidimaci. Comecina facadimaci: “Iese cai finoia, Jusiñamuimona mare. Iese cai finoñenia, Jusiñamuimona maraiñede. Naimie caina duere finoite”. Jearede rafue naimaci abimo oñellena, iese finouidimaci.

<sup>6</sup> Jesús uai ote:

—Mareuidinona abi caitauidinodomoí. Isaías micori jaie omoina raise llote. Naimiedi Jusiñamui llua cuete:

Bimaci naimaci uaido marecinona cuemo llote; iadedi cue rafuedo raise jaiacaiñedimaci.

“Ona isiruiticaí” llotimaci.

“Ona sedadicaí” llotimaci.

Jamai ñaitimaci. Naimaci comeciái cue dibeimo raise iñede.

<sup>7</sup> Cue uai itena, jamai comini llucinona naimaci llofuecabilla jira, tainona cuena sedadimaci

cuete. <sup>8</sup> Isaías micori llua isoi itomoí. Jusiñamui llogacinona fañonocaida, omoi einamaci rafuedo jaidomoí. <sup>9</sup> ¿Bue ñellena nana Jusiñamui llogacinodo jaiñedomoí? Omoi einamaci llogacinodo jaidomoí; iadedi nana Jusiñamui llogacinodo raise jaiñedomoí. <sup>10</sup> Moisés micori jaie llote: “O moo uai ñnuanona, naimiena cano. O ei uai ñnuanona, naiñaiñona cano. Ie moori jeare ñaitimie, ie erí jeare ñaitimie meinelle”. <sup>11-12</sup> Iese Moisés micori llote; iadedi omoi einamaci llotimaci: “Jusiñamuimo cai ucubena cai fecajamona, cai moona, cai eina jai canonicai”. <sup>13</sup> Iese omoi finocabilla jira, omoi einamaci llogacinodo omoi jaillamona, Jusiñamui uaina jamaidomoí. Bie isoide rafuedo jaca jaidomoí.

<sup>14</sup> Fariseuai diga iese llua mei, naimie ecimo ailluena comini dane ofillanona, naimacimo llote:

—Iena raise omoi uiñollena, cue llua mo cacarei. <sup>15</sup> Omoi einamaci isoi omoi guiñenia, naimaci isoi omoi onollina omoi jocoñenia, omoi comeciaina jearetañedomoí. Omoi guillamona, omoi onollina jocuamona. Jusiñamuina nabaiñedomoí. Omoimo jeacino illa jira,

Jusiñamuina nabaiñedomoi. Omoi comeciai jearena jira, jeacinona finocabidomoi. <sup>16</sup> Omoi jeforena jira, raise fueollena, cue lluamo cacarei. Tena iino.

<sup>17</sup> Cominimona oni jaillanona, Jesús ie risoilla jofomo jaide. Nainomo ie llofueoicaigano aillinano ie lluaana jicanotimaci. <sup>18</sup> Uai ote:

—¿Niése cue lluaana jiai nia cacaiñedomoi? Níe isoide ra guitomoina, omoi comeciaino jeare iñede. <sup>19</sup> Omoi comeciaino jaiñede; ia omoi jebemo jaide. Te mei omoi abiaimona jino bite.

Jesús lluaamona, nana guille radi mare uiñoticaí. <sup>20</sup> Jesús llote:

—Omoi comeciai jearena jira, jearede rafuena finocabidomoi. <sup>21</sup> Omoi comeciai jearena jira, jeare comeciaina facacabidomoi. Omoi aiñede riño diga icabitomoi. Omoi iniñede iima diga icabitomoi. Fñricabitomoi. Cominina meinecabitomoi. <sup>22</sup> Jiai comini rana nicidocabitomoi. Jearede rafuena finocabidomoi. Tena eburitomoi. Jifuericabitomoi. Abina uradoicabitomoi. Jiaie comini joreñona jeare ñaicabitomoi. Abina iedocabitomoi. Ebena jaicabitomoi. <sup>23</sup> Bie isoidicinuai omoi comeciaino illa jira, jearede rafuena finocabidomoi; iadedi omoi einamací llua isoi, omoi onolli jocoñenamona jeacino comuiñede.

*Jesúdi judío iñaiñoñediñaiñoña jillotaja rafue*  
(Mt 15.21-28)

<sup>24</sup> Nainomona Jesús jaillanona, Tiro railla eniruemo jaide. Sidón railla eniruemo jiai jaide. Nainomo jofomo jaillanona, iena buna fidiana jitañede; ia iena janonide. <sup>25-26</sup> Ie facaise judío iñaiñoñediñaiño ñaño bite. Naiñaiñodi sirofenicia nairai iñaiño. Ie jisa Janaba anamo ite. Jesúna fidianona, naimie dine bite. Naimiena raise uaiduanona, naimie ecimo ana bitadate. Ie jisamona Janabana oni oretallena Jesúsno duere jicade. <sup>27</sup> Judíuainiñedinona naimie canoñenana naiñaiño uiñollena, naiñaiñoimo Jesús llote:

—Uruiaí guillamona jiconiaina ecadicaidena, maraiñede. Uruiaí nano ecadicaí.

<sup>28</sup> Naiñaiño ñinena uai ote:

—Jii, maestro; iadedi jiconiaidi uruiaí guillamona fiebide guillemona guitimaci. —Iese llote; ia jiaie rafuemo comecina facade. Uruiaína llote; iadedi judíuaino comecina facade. Jiconiaina llote; ia judíuainiñedinomo jiai comecina facade. Comecina facade: “O cominimo o rafue duide; ia cai Namana o illa jira, ñibai o rafue caino janore duide”.

<sup>29</sup> Jesús uai ote:

—Raise llotio. O jofomo mai abido jai. O jisamona Janaba oni jaide.

<sup>30</sup> Naimie llua isoi jofomo jaide. Ie jisa biramo biidena ciode. Janaba naiñaiñomona oni jaillana jai uiñote.

*Jesúdi jefona cacaiñedimiena jillotaja rafue*

<sup>31</sup> Tiro railla eniruemona Jesús oni jaide. Jaillanona, Sidón railla eniruemo jaide. Decápolis railla eniruemo jiai jaide. Ja muidomo Galilea railla jorai fuemo ride. <sup>32</sup> Iena fidiano, naimie dine comini jefona cacaiñedimiena atide. Naimie gogoma. Naimiena jilloitallena, naimiemo ie onolli jonellena Jesúsno jicadimaci. <sup>33</sup> Ailluena comini naimie dine jai billa jira, jefona cacaiñedimiena eneno oni uite. Nagafebe jefomo onocai ñuitade. Ie onocaino tuajanona, iima iifena jetade. <sup>34</sup> Jusiñamui dine monamo eruaíta, naimiena duenaillamona, jafaicina faite. Judíuaino uaido naimiemo llote:

—¡Efata! —Oni dobañuamona: “¡Ecoricaí!” raite.

<sup>35</sup> Teconi ie jefodi ecoricaide. Jai raise cacade. Jai raise ñaite. <sup>36</sup> Cominimo:

—Bimie jai jilluana burno lloñeno —Jesús diga icaíño llote; ia naimie uaina iñoñedimaci. Tena llocana uitimaci. <sup>37</sup> Naimieri eo raijicaidimaci. Cominina naimiena raitimaci:

—Naga rafuena raise finode. Jefona cacaiñedimiena jai jillotate. Gogonaitimiena jai jillotate.

## 8

*Jesúdi cuatro mil iñiaina ecaja rafue*  
(Mt 15.32-39)

<sup>1</sup> Naie facaise naimie dine ailluena comini illanona, naimaci guille jai iñena jira, Jesús ie llofueoicaigano naimie dine uaidote. Raite:

<sup>2-3</sup> —Bie comini darui amani bene cue diga illa jira, naimacimo guille jai iñede. Damierie eo aarena bitimaci. Naimacina aimeri oretaiacaiñedicue, naisomo naimaci baii raillano. Naimacina cue duenailla jira, naimacina canoiacaducue.

<sup>4</sup> Jicanotimaci:

—¿Niése naimacina bene ecaiticaí? Jofue iñenanomo iticaí.

<sup>5</sup> Jesús jicanote:

—¿Níga llomenico omoimo ite?

Uai otimaci:

—Siete.

<sup>6</sup> Comini ana raillena Jesús llote. Naie llomeniconu uanona, Jusiñamuimo iobillacinona fecade. Tailluanona, ie llofueoicaiganomo fecade, naie cominimo fecallena. Iena finodimaci. <sup>7</sup> Naimacimo janore llicisiriai jiai ite. Ie facaina Jusiñamuimo iobillacinona fecaja mei, cominimo fecallena Jesús llote. <sup>8</sup> Nana guitimaci. Monidimaci. Monillamona, fiebide guillena iraidimaci. Siete cirigaiaimo oruitatimaci. <sup>9</sup> Nainomo cuatro mil iñiaiai guitimaci. Naimaci ainiai, imaci uruiaiai diga, jiai guitimaci. <sup>10</sup> Guilla mei, cominina naimaci jofuemo Jesús orede. Ie llofueoicaigano diga, botemo jaillanona, Dalmanuta railla eniruemo jaide.

*Fariseuai comini Jesúmo siño rafuena finuana jicanuano billa rafuena*  
(Mt 16.1-4; Lc 12.54-56)

<sup>11</sup> Dajerie fariseuai comini Jesús dine bitimaci. Naimie uaina uaitaiacadimaci. Naimiena facacillena, siño rafuena finuana jicanoiacadimaci. Iena naimie finoñedena, naimie ie llua isoi iñenana uñotimaci. Naimiena duere finoacadimaci. Llotimaci:

—Iena cai cioillena, Jusiñamuina siño rafuena finota.

<sup>12</sup> Sunaillanona, Jesús jafaici faite. Raite:

—¿Bue ñellena siño rafuena finuana cioiacadomoi? Omoi facaina iena finoñeiticue.

<sup>13</sup> Ie llua mei, naimacimona oni jaidimaci. Ie llofueoicaigano diga, botemo dane jaillanona, ruica dine Jesús jaide.

*Jesús siritate rana llofuia rafue*  
(Mt 16.5-12)

<sup>14</sup> Ruica dine rilla mei, Jesús llofueoicaigano llomeniconu feillana uibiñotimaci. Naimacimo daje llomenico ite. <sup>15</sup> Iena naimie uñuamona, naimacimo Jesús llote:

—Fariseuai siritate ramona abina rairui. Illaia Herodes siritate ramona abina rairui.

—Iese Jesús llote; iadedi naimaci llofuiaicimona abi rairuillena ñaite.

<sup>16</sup> Jesús iese llua jira, iena naimaci raise cacaiñena jira, dani coniniri siadotimaci:

—Llomeniconu cai atiñena jira, caimo iese llote.

<sup>17</sup> Naimaci siaduana Jesús uñua jira, naimie lluanu naimaci raise nia cacaiñena jira, naimacimo jicanote:

—¿Bue ñellena iese siadotomoi? ¿Niese cuenu iñoñedomoi? Cuemo siño uai illana nia raise cacaiñedomoi. <sup>18</sup> Uisiredomoi. Jeforedomoi. ¿Niese cue navui siño finoca rafuemo comeciaina facañedomoi? <sup>19</sup> Navui cinco mil iñiaiai cinco diga llomeniconu guitimaci. Monillamona, guigamona fiebillamona, ¿niga cirigaiaimo iraidomoi?

Uai otimaci:

—Doce.

<sup>20</sup> Jesús llote:

—Jiaicaiño cuatro mil iñiaiai siete diga llomeniconu guitimaci. Monillamona, guigamona fiebillamona, ¿niga cirigaiaimo iraidomoi?

Uai otimaci:

—Siete.

<sup>21</sup> Jesús dinena jicanote:

—¿Niese cuenu nia raise iñoñedomoi? Siño uai cuemo illana nia raise iñoñedomoi.

*Jesús uisnidimiena jillotaja rafue*

<sup>22</sup> Oni macarillanona, Betsaidamo Jesús, ie llofueoicaigano diga, ride. Ie facaise naimie dine comini uisnidimiena atide. Naimiena jilloitallena, naimiena jetallena, Jesúmo jicanote. <sup>23</sup> Iena Jesús cacajanona, ie onollina llinuanona, nairai illa jinofemo uisnidimiena uite. Ie mei ie uisina tuade. Ie uisina jiai jetade. Naimiemo jicanote:

—¿Buena ciodio?

<sup>24</sup> A eruailanona, uai ote:

—Comini macarillana ciodicue; ia amena isoi eruaidimaci. Nia raise cionidicue.

<sup>25</sup> Ie uisina Jesús dane jetade. Iemona oni erocaillamona, jai jillode. Jai raise ciode. <sup>26</sup> Jai jillua jira, ie jofomo naimiena abido orede. Jesús llote:

—Betsaidamo itino o jilluanu lloñeno; ia nainomo jaiñeno o jofomo mai abido jai.

*Pedro Jesúna llua rafue*  
(Mt 16.13-20; Lc 9.18-21)

<sup>27</sup> Cesarea Filipo eniruemo ite nairaiaimo Jesús jaidemo, ie llofueoicaiganomo jicanote:

—¿Niese jiaie comini cuenu raitimaci?

<sup>28</sup> Uai otimaci:

—Damierie raitimaci: “Juan Bautista micoridio”. Damierie raitimaci: “Odi Elíadio”. Jiaino raitimaci: “Jusiñamui facaina jaiie ite llorainimona damie jai jillode. Imiedio”.

<sup>29</sup> Jesús dane jicanote:

—¿Ñiese omoi cuena raitomoi?

Pedro uai ote:

—Odi cai Jilloitaraimadio. Jusiñamui facaina lloraini micoriai o billena jaiie llotimaci

<sup>30</sup> Jesús iena bummo lluana rairuide.

*Jesús ie fiodaillena llofuia rafue*

(Mt 16.21-28; Lc 9.22-27)

<sup>31</sup> Ie facaise ie llofueoicaiganona ie duere sefuillena llofue. Llote:

—Cai judíuai illaicomini cuena eo duere finoitimaci. Cuena jitaiñellemona, cuena meineitimaci; iadedi darui amani illanona, fiodaillamona jilloiticue.

<sup>32</sup> Iena marefodo naimacimo llote. Iena cacajano, Pedro dinena lletade:

—Dama ite. Iese lloñeno. Bie isoide rafuena lloñeno.

<sup>33</sup> Ie llofueoicaiganomo erodajanona, Jesús Pedromo riire llote:

—Cuemona oni jai. Iese ñaiñeno, Taife isoi o comecina o facaja jira. Jusiñamui isoi cuemo comecina facañedio. Comini isoi cuemo comecina facadio.

<sup>34</sup> Naimie dine ailluena comini uaidua mei, ie llofueoicaigano nainomo jiai illanona, naimacimo llote:

—Cue cominina bu jaiacania, ie jitaille rafuedo jaiñena. Cue dibeimo naimie jaillamona, duere sefuicana jaiete. Nibai naiemona fiodaite. Bu iese jaiacania, cue dibeimo naimie iite. <sup>35-37</sup> Duere sefuillana jaciruillamona, cue cominina bu jaiacañenia, ja muidomo faifite; iadedi duere sefuillana jaciruñenamona, cue cominina bu jaija, jaca faifñeite. Cue cominina bu jaiñenia, nibai eo duere sefuñeite. Nibai ailluena ra naiemio iite; ia, ¿ñiese cue Moo dine riite? Nainomo naimie riñeno faifite. <sup>38</sup> Birui ite comini Jusiñamuina jitaiñedimaci. Naimiena jai faionocaidimaci. Jeacinona finocana jaidimaci. Cuena bu meiruia, cue rafuena bu meiruia, dane cue bia, naimiena meiruiticue. Cuena meiruillamona: “Cristomo duidicue” bu lloiacañenia, ico cue bia: “Naimiedi cue comini” lloñeiticue. Jusiñamui jaienisai diga, cue Moo dinena, monamona ico biititcue. Cue Moo uai cuemo illanona, ebire biititcue.

## 9

<sup>1</sup> Omoimo uanaicinona lloticue. Omoimona dajerie nia fiodañeitomoimo, illaimana ebire cue bairellena cioitomoi.

*Jesús abi meidocailla rafue*

(Mt 17.1-13; Lc 9.28-36)

<sup>2</sup> Seis digarui illanona, anedumo comini iñenanomo Jesús jaiete. Naimie diga jaillena, Pedrona uite. Jacobo jiai uite. Juan jiai uite. Jiaiie llofueoicaiganona uñede. Nainomo rilla mei, naimaci uicomo naimie abi meidocaide. <sup>3</sup> Naie dacaño naimie iniroi eo quenirecaide. Eo userecaide. Cai iniroimo jitoma lligaiñuamona ie isoi usere jaca jaiñede. <sup>4</sup> Naie facaise naimacimo Moisés micori joreño, Elías diga, bairede. Eliadi Jusiñamui facaina jaiie lloraima. Jesús diga ñaitiaimaia. <sup>5</sup> Iaimaia jaiacania, Pedro Jesúsno llote:

—Maestro, bene cai illana mare. Daje amani bisaini cai finollena, mare. Daje oie, jiaie Moisés micori ie, jiaie Elías ie.

<sup>6</sup> Eo jaciruilla jira, naimie ñaia rafuena raise uñeñeno jamai ebena ñaite. <sup>7</sup> Ie facaise uillie billamona, naimacina ibaide. Uilliemona Jusiñamui llote:

—Bimie cue isiruiga Jito. Naimie lluaamo cacarellanona, iena iino —llote.

<sup>8</sup> Iecononi erodajanona, dama Jesúsna ciodimaci. Jiaionona cioñedimaci.

<sup>9</sup> Anedumona bitimacimo, naimacimo Jesús llote:

—Omoi ailli cúa rafuena bummo lloñeno, cue fiodaillamona cue jillua dinori. <sup>10</sup> Jesús llua isoi finodimaci. Tena bummo lloñedimaci; ia fiodaillamona naimie jilluana naimaci raise nia cacañena jira, iemo comecina facadimaci. <sup>11</sup> Naimiemo llotimaci:

—Moisés micori llogacinona llofueraini birui raicabitimaci: “Elías raillamie dane biite. Ie mei cai Jilloitaraima biite” raitimaci. Jusiñamuimona o billana inoticaí. Odi cai Jilloitaraimana inoticaí. Odi cai Jilloitaraimadiomo, ¿bue ñelli iese raitimaci?

<sup>12</sup> Uai ote:

—Raise inotomoi. Elías isoidimie jai bite, nana Jusiñamui jitaille rafue raise llollena. Jusiñamui dibeimo naimaci illena, comini imaci comeciaí meiduana llote. Jusiñamui facaina lloraini micoriai cue eo duere sefuillena cuetimaci. Comini cue jeare finollena cuetimaci. Iemo omoi comeciaina jiai faca. <sup>13</sup> Elías isoidimie jai bite; iadedi Jusiñamui facaina lloraima micori jaiete cuega isoi, naimaci jitaille jira, naimiena jai meinetimaci.

*Jesúdi Janaba anamo itimiēna jillotaja rafue*  
(Mt 17.14-21; Lc 9.37-43)

<sup>14</sup> Ie jiaie llofueoicaigano dīne Jesús abido ria, nainomo ailluena comīni itīmacīmo ride. Moisés micorī llogacinona llofuerainī dinena ie llofueoicaigano uaina uaitaside. <sup>15</sup> Jesús billana comīni ciuanona, jacīnaisīdīmacī. Naimiēna feiñollena, naimie dīne aisida jaidīmacī. <sup>16</sup> Moisés micorī llogacinona llofuerainīmo Jesús jīcanote:

—¿Nīese cue llofueoicaigano uaina uaitatomoī?

<sup>17</sup> Uai oñedīmacī; ia comīnimona damīe uai ote:

—Maestro, Janaba anamo cue jito illa jira, o dīne naimiēna atīdīcūe. Cue jito Janaba anamo illamona ñainide. <sup>18</sup> Nagarui Janaba bille dieše, naimiēna enīruemo uaitate. Iemona fueđī mullede. Ie isidodī murude. Ie abī jaiaire jaide. O llofueoicaiganomo jīdīcūe, Janabana oni oretallena; ia oretanidīmacī. Ie jira Moisés micorī llogacinona llofuerainī bie rafuena, o llofueoicaigano dīga, uaina uaitatīmacī.

<sup>19</sup> Iena cacajanona, Jesús ie llofueoicaiganomo lote:

—Cue uai siñonana nīa iñoñedomoī. Omoī dīga are itīcūe. Raise omoī iñollena, ¿nīe dīnori omoī dīga iitīcūe?

Naie dūidīmīe moomo llote:

—O jito cue dīne mai atī.

<sup>20</sup> Naie urue Jesús dīne atianona, Janaba naimiēna naillitate. Iemona urue enīruemo uaide. Jabī-jabīde. Fue mullede. <sup>21</sup> Jesús dinena naie urue moomo jīcanote:

—¿Nīe dīnori o jītodi bie isoī ite?

Uai ote:

—Naimie uruenamona. <sup>22</sup> Janabadi, dīga icañño iraimo usillena, naimiēna uaitate. Corobaillena, dīga icañño jīnuimo jīaī uaitate. Janaba oni o oretarenia, cocona duenaillamona, cocona cano.

<sup>23</sup> Jesús uai ote:

—“O oretarenia” raitio. Ero, o jito jillotaredīcūe. Cuena o iñnoia, o jito jilloite.

<sup>24</sup> Naie urue moo ieconī llote:

—Ona iñotīcūe. Raise nīa cue iñoñēnia, cuena raise iñnota.

<sup>25</sup> Naie facaise ailluena comīni naimie dīne raire ofillana naimie ciuanona, Jesús Janabana lletade:

—Bie uruena ñaitatañedio. Naimiēna cacaitañedio. Naimiemona oni jai. Naimie dīne dane biñeno.

<sup>26</sup> Ado cuiroiillanona, naimiēna eo riire naillitajanona, Janaba oni jaide. Iemona naie urue fiōdaitīmīe isoī eroacide. Naimiēna ciuanona, nainomo itīno raitīmacī:

—Naimie jai fiōdaite; <sup>27</sup> —ia Jesús naimie onollina llinocaida, naimiēna a naidanete.

<sup>28</sup> Iemona oni jaillanona, damīe jofomo Jesús naillī ria, naimiemo ie llofueoicaigano anado jīcanotīmacī:

—¿Bue ñellena Janabana oni oretanidīcaī?

<sup>29</sup> Jesús uai ote:

—Jusiñamūimo omoī jīamona, naimiēna raise omoī iñnuamona, bie isoīde Janabana oretaredomōī. Naimiēna omoī raise iñnoñēna jira, bie uruemona Janabana oni oretañedomōī.

*Jesús ie fiōdaillena dane llofūia rafue*  
(Mt 17.22-23; Lc 9.43-45)

<sup>30-31</sup> Ie llofueoicaigano dīga Jesús oni jaillanona, Galilea railla enīruemo jaide. Ie llofueoicaiganona naimie llofueiacana jira, naimie ie jaillana jīaie comīni fidīana jītañēde. Naimacimo lote:

—Monamona billanona, iimana jaidīcūe. Jusiñamūi jītailla jira, cuena jīaie comīni gaitajanona, illaīcomīnīmo fecaitīmacī. Naie illaīcomīnī cuena meīneitīmacī; iadedī darūi amani illanona, jilloitīcūe.

<sup>32</sup> Ie llofueoicaigano iēna raise cacaiñēdīmacī; ia naimiemo iēna jīcanuana meiruitīmacī.

*Jesús ie llofueoicaigano moto imiēna ille rafue*  
(Mt 18.1-5; Lc 9.46-48)

<sup>33</sup> Capernaumo Jesús rilla meī, ie risoilla jofomo naimie ia, ie llofueoicaiganomo jīcanote: —Naīsona caī bīa, ¿nīe isoīde rafuena conīnīri siadotomōī?

<sup>34</sup> Uai oñedīmacī. Naimacī moto imiēna illena, naisodo siadocana bitīmacī. Meiruilanona, uai oñedīmacī.

<sup>35</sup> Naimie ana rainadaja meī, ie ecimo naimacina uaidote. Raite:

—Omoī moto imiēna bu iacania, jamai bue isodīmīēna naimie illa. Omoī muillaīmana naimie jailla isoilla.

<sup>36</sup> Iena naimaci raise uifollena, nainomo ite cominimona daje urue bai jainnocaida, naimaci motomo naimiena jonete. Naimiena menioita, naimacimo llote:

<sup>37</sup> —Jusiñamuimona bie urue jamai bue isoide. Abina iedoñede. Bie isoidimie cuemo duillamona, naimiena feiñotimiedi cuena jai feiñote. Cuena feiñotimie Jusiñamuina jiai jai feiñote, Jusiñamui cuena oretaja jira.

*Jesúdi ie dibeimo itinona llua rafue*

(Mt 10.42; Lc 9.49-50)

<sup>38</sup> Naie facaise ie llofueoicaiganomona Jesúmo Juan llote:

—Maestro, o mamecido jananiaina oretacabitimiena ciodicai. Cai diga naimie jaicabiñena jira, iena finuana rairuidicai.

<sup>39</sup> Jesús uai ote:

—Naimiena rairuiñeno. Cue mamecido siño rafuena bu finoia, cuena jeare raire ñaifeite. <sup>40</sup> Cai dibeimo itimiedi cai facaisena ite. <sup>41</sup> Ero, cuemo omoi duillamona, omoína bu janore canoia, Jusiñamuimona ibana feiñoite. Omoimo nibai jamai jinuína fecajte; iadedi omoína naimie canuamona, Jusiñamuimona ibana feiñoite. Ie jira naimie isoidino siño rafuena finuana rairuiñeno.

*Jesúdi jeacinona fñoñenana llofuia rafue*

(Mt 18.6-9; Lc 17.1-2)

<sup>42</sup> Jesús nia llofuate:

—Cuena como inotinona jeacinona finotaiacadimie iena finoñellena, naimie cimaomoi aillue nofici maianona, joraimo corobaillena naimiena dotacadena, mare. <sup>43-48</sup> Biena ñaiticue. Nie isoide rafue omoína jeacino finotaia, iena linoñeno. Naie rafue dine jaiñeno. Iemo eruaiñeno. Rana omoi jetaja jira, omoi ciua rana jira, omoi jitaillamona jeacinona finocabidomoi. Omoi abina omoi namatañenia, omoi onollina jaita. Omoi eillina jaita. Omoi uisina juicono. Iemona jeacinona finoñellena, Jusiñamui dine daje onolli diga, daje eilli diga, daje uisi diga riitomoi; ia jeacino omoi finoia, iraimo jaitomoi. Nana omoi abi diga iraimo jaitomoi. Omoi comecina ñaiticue. Omoi abina omoi raise namatallena, omoi comeci nano raise fino. Iraimo omoi jaiñellena, jeacino finoñeno. Naimacimo ite aiai fiodaiñena jira, naie irai jaca duiñenamona, nainomo itino jaca duere sefuitimaci.

<sup>49</sup> Ero, birui omoi duere sefuillamona, cue comina jai jaidinona uifñotitcue. <sup>50</sup> Guille caimaretallena, sal mare; iadedi ie caimano jai iñenia, iena dane caimaretañedicai. Ie isoide. Jeacino omoi finoia, omoi comeciai caimare iñede. Jusiñamui jitaillacinona omoi finuamona, coniniri caimare omoi i. Coniniri uri omoi i.

## 10

*Jesús iima ie aina dotaja rafuena llofuia rafue*

(Mt 19.1-12; Lc 16.18)

<sup>1</sup> Capernaumona ie llofueoicaigano diga, Jesús oni jaillanona, Judea railla enirue dine jaide. Jordán railla ille ruica dibeimo jaide. Ailluena comini naimie dine ofillamona, naimie llofueuilla isoi, naimacina llofuate. <sup>2</sup> Naimiena facacillena, dajerie fariseuai naimie dine bitimaci. Rafuena jicanoiacadimaci. Naimaci uai naimie raise oñenia, naimiena duere finoacadimaci. Jicanotimaci:

—¿Iima ie aina dotajana rairuidio?

<sup>3</sup> Uai ote:

—¿Ñiese Moisés micori llote?

<sup>4</sup> Uai otimaci:

—Moisés micori jaie cuete: “Iima ie aina dotaacania, dotalle rabena nano cueite. Ie mei naiñaiñona dotaite”.

<sup>5</sup> Jesús uai ote:

—Jusiñamui uaina raise omoi inoñena jira, Moisés micori iima ie aina dotajana rairuiñede; <sup>6</sup> iadedi nano dofoconi iese iñede. Enirue finua facaiseconi Jusiñamuidi come iaímaiaína finode. Imana finode. Riñona jiai finode. <sup>7</sup> Ie jira Jusiñamuidi jaie llote: “Ie ai diga illena, iima ie moona faínonocaite. Ie eina jiai faínonocaite. Ie ai diga illamona, menade comedi daamiena jai jaide” llote. <sup>8</sup> Menade come jai daamiena jai ite. <sup>9</sup> Jusiñamui iese iaímaiaína itajaja jira, iima ie aina dotajana rairuidicue. Riño ie inina dotajana rairuidicue.

<sup>10</sup> Jofomo ie llofueoicaigano diga, naimie nailli illanona, naimiemo bie rafuena jicanotimaci. <sup>11</sup> Jesús dinena llote:

—Jaiie riño diga naimie illena, ie aina bu dotaia, naimiedi jeacinona jai finode. Ie aina jeare jiai finode. <sup>12</sup> Ie inina faínonocailanona, jiaimiena nie riño uamona, naiñaiño jeacino jai finode.

*Jesúdi naimie dine uruiái billana jitailla rafue*

*(Mt 19.13-15; Lc 18.15-17)*

<sup>13</sup> Naie facaise Jesús dine comini naimaci jesanide diese atidimaci. Ie onolli naimacimo naimie joniana jitauidimaci. “Naimacina raise cano” ie Moomo lollena jitauidimaci. Ie llofueoicaigano iena rairuidimaci; <sup>14</sup> iadedi iena cacajano, Jesús icirite. Jesús raite:

—Uruiaí cue dine billesa. Naimacina rairuiñoeno. Cuená bie isoi ñnotinodi Jusiñamui cominidimaci. <sup>15</sup> Bie uruiaí abina iedoñedimaci. Einamacimona jamai bue isoidimaci. Naimaci isoi bu iñenia, Jusiñamui cominina jaiñeitimaci. Jusiñamui naimiena sedallena, Jusiñamui cominina naimie jaiñeite.

<sup>16</sup> Naie uruiaí dasarie meni-meniocaida, naimaci ifogimo ie onollina joneta:

—Jusiñamui omoína canoite —llote.

*Ucuberedimie Jesús diga ñaia rafue*

*(Mt 19.16-30; Lc 18.18-30)*

<sup>17</sup> Ie llofueoicaigano diga Jesús oni jai jaillanona, aisicana damie naimie dine bite. Naimiena raise uaidollena, ie caiñici ifodo rainadate. Raite:

—Maestro, odi maremiedio. Jusiñamui diga ico cue jaca illena, ¿buena finoiticue?

<sup>18</sup> Jesús uai ote:

—¿Bue ñellena odi: “Mare” cuena raitio? Dama damie maremie. Naimiedi Jusiñamui. Naimiemo jicano. <sup>19</sup> Moisés micori llogacinuaina ñnocana jai. Jaie cuete: “Comena meineño. O añede riño diga iñoeno. Fiiñoeno. Jiaimiena o llogidoia, tainona lloñoeno. O mo uaina ñno. O ei uaina ñno”.

<sup>20</sup> Uai ote:

—Maestro, uruena cue illa facaisemona nana bie llogacinuaina ñnoticue.

<sup>21</sup> Jesús dinena naimiemo eruailanona, naimie ie comecido jaide. Naimiemo llote:

—Omo daje rafue fiebide. Jusiñamui jitaillacinodo o jaiacania, o raise marebicaiacania, omo ite raruiaína feca. Naie ucubena dueredinomo feca. Cuená o ñnuamona, monamo ico jaca iitio. Cue llofuegamiena o illena, mai cue diga bi.

<sup>22</sup> Iena cacajano, naimiedi sunaite. Eo aillue ra naimiemo illa jira, iena naimie fecacaiñena jira, sure jaide. <sup>23</sup> Naimie jailla mei, ie llofueoicaiganomo eruailanona, naimacimo llote:

—Ucuberedinodi Jusiñamui cominina jaillena eo sefuiruitimaci.

<sup>24</sup> Iena cacajano, iena naimaci raise cacaiñena jira, Jesús dane llote:

—Cue cominidomoi. Ero, ucuberedimiedi Jusiñamui cominina jaillena eo sefuiruite.

<sup>25</sup> Igido ifodo camello jaca jainide. Ie isoide. Ie ra isiruillamona, ucuberedimiedi Jusiñamui ie cominina jiai raise jainide.

<sup>26</sup> Iena ie llofueoicaigano cacajano, Jusiñamui cominina ucuberedino raise jainina jira, “¿Ñiese dueredinodicaídi Jusiñamui cominina jaiticaí?” raillamo comeciaina facadimaci. Raijcaillanona, cominiri raitimaci:

—Nana comini rana jitailla jira, ¿buca jillobiti?

<sup>27</sup> Naimacimo eruailanona, Jesús raite:

—Nana comini daní jillobinidimaci; iadedi Jusiñamuidi naimacina jillobitarede.

<sup>28</sup> Pedro dinena llote:

—O llua isoi jai finodicaí. Nana cai rana fainonocaida, o diga jai jaicabidicaí.

<sup>29</sup> Jesús uai ote:

—Uanaicino lloiticue. Cuená naimie isiruillamona, cue rafuena naimie llamona, ie jofona bu fainonocaia, ie amatiaina bu fainonocaia, ie miriñuaina bu fainonocaia, ie eniruena bu fainonocaia, <sup>30</sup> Jusiñamuimona birui ailluena ibana feiñoite. Duere sefuite; ia naimie isoi cue cominina ailluena jaillamona, naimie jofue iite. Ie amatiái, ie miriñuái, ie eitiai, ie uruiaí, ie enirue birui iite. Monamo naimie ico caimare iocire jaca iite. <sup>31</sup> Birui damieriemo ailluena ra illamona, Jusiñamuimo eo comecina facañedimaci. Naimacimona jamai bue isoñedimaci; ia Jusiñamuimona ico jamai bue isoitimaci jainomo ailluena ra birui iñede; ia Jusiñamuimo comecina facadimaci. Naimacimona jamai bue isoidimaci; ia Jusiñamuimona ico jamai bue isoñeitimaci.

*Jesús ie fodaillena dane llua rafue*

*(Mt 20.17-19; Lc 18.31-34)*

<sup>32</sup> Jerusalémo nia jaillanona, Jesús uicodo jaide. Nainomo naimie jaciruiñoeno jaillamona, ie llofueoicaigano rajicaidimaci. Naimaci diga jaidino jaciruoicaida jaidimaci. Naimacina jiai meiniana jaciruitimaci. Ie llofueoicaigano diga ñaianona, naimiemo suille rafuena llote:



<sup>33</sup> —Ero, Jerusalémo jai jaidicai. Monamona billanona, imana jaidicue; iadedi omoi illaicomini cuena gaitaitimaci. Gaitaja mei, cue meinellena lloitimaci. Juduaidedino illaicominimo cuena fecaitimaci. <sup>34</sup> Cueri jifanoitimaci. Cuena tuallaitimaci. Cuena faitimaci. Cuena meineitimaci; iadedi cue fiodailla mei, darui amani illanona, jilloiticue —llote.

*Jesús dine Jacobo Juan iaímaiaí billa rafue*

(Mt 20.20-28)

<sup>35</sup> Naie facaise Jesús dine Jacobo, Juan diga bitiaímaiaí. Iaímaiaí moodi Zebedeo. Raitiaímaiaí:

—Omo coco jicalle rafue cocoena finuana jitaídico.

<sup>36</sup> Jesús uai ote:

—¿Nie isoide rafuena jitaídico?

<sup>37</sup> Uai otiaímaiaí:

—Illaimana o jailla mei, o ecimo coco illena o llwana jitaídico. Damie o nabeimo. Jiaímie o jarifebeimo. —Jiaino afemo iaímaiaí illena, iese llotiaímaiaí.

<sup>38</sup> Jesús dinena llote:

—Omico jicanuana raise uíñoedico. Cue eo duere sefuiticue. Llegi cacaiticue. ¿Ie isoi duere sefuiacadomico? ¿Ie isoi llegi cacaiacadomico?

<sup>39</sup> Uai otiaímaiaí:

—Jii. Sefuiacadico.

Jesús dinena raite:

—Cue isoi duere sefuitomico. Llegi cacaitomico; <sup>40</sup> iadedi cue nabeimo omico illena, cue jarifebeimo omico illena itatanidicue. Naie illano jai cue Moo finoca, nainomo iitino iena.

<sup>41</sup> Iena jiaíe llofueoicaigano cacajano, naie iaímaiaíri iciritimaci. <sup>42</sup> Jesús nana naimacina uaiduanona, raite:

—Nana illaicominidí naimaci anamo itinona ocuicabidimaci; <sup>43</sup> iadedi omoi dine iese íñena. Omoimona bu imiēna iacania, omoi mullaímana naimie jaisoillasa. <sup>44</sup> Omoimona bu imiēna iacania, omoína naimie canocana jaisoillasa. <sup>45</sup> Cuemona fueo. Biñedicue, cominina cue ocuillena; iadedi cominina canuaibidicue. Cue jitailla jira, nana comini facaina fiodaisaibiticue. Naimaci jeacinomona naimaci jillobillena, fiodaisaibiticue. Ailluena comini cuena inuamona, jilloitimaci. Coninina omoi canua —llote.

*Jesús dí Bartimeona jillotaja rafue*

(Mt 20.29-34; Lc 18.35-43)

<sup>46</sup> Oni jaillanona, Jericó railla nairaimo Jesús ride. Naiemona ie llofueoicaigano diga jaillanona, ailluena comini Jesús jinafona racadimaci. Naie facaise nai fuemo uisindimie raide. Naimie mameci Bartimeo. Timeo jito. Nainomo jamai raide, ucubena jamai jicacallena. <sup>47</sup> Nazaret ie Jesús jaillana naimie cacajano, ado cuirioide:

—David micorí Jitona o illamona, Jusiñamuimona o billa jira, cuena duenai. Cuena cano.

<sup>48</sup> Naimie llícaillena, Jesús diga jaidino naimiēna lletade; iadedi eo cuirioide:

—Maestro, David micorí Jitona o illamona, cuena duenai.

<sup>49</sup> Naimiēna cacajano, Jesús naidadajanona, llote:

—Naimiēna cue dine uaido.

Bartimeona uaiduanona, raitimaci:

—O comecina ocuíño. Mai naidacai. Jesús ona uaidote.

<sup>50</sup> Iena cacajano, ie emodomo itiroina duiñuanona, raire naidacaida, Jesús dine bite.

<sup>51</sup> Naimiemo Jesús jicanote:

—¿Niese ona cue nibaiana jitaídico?

Uai ote:

—Maestro, cioacadico.

<sup>52</sup> Jesús dinena uai ote:

—Cuena o inua jira, jai jillodico. Mai jai. —Ieconí naimie jai cide. Jesús diga jaidino diga naimie jai jaido.

## 11

*Jesús illaíma isoi Jerusalémo jailla rafue*

(Mt 21.1-11; Lc 19.28-40; Jn 12.12-19)

<sup>1</sup> Oni jaillanona, Jerusalémo iaícaidimacimo, Betfagé railla nairaimo ie llofueoicaigano diga Jesús ride. Betania nainomo jiaí ite. Olivos railla anedumo naga nairai iaímaiaí ite. Ie llofueoicaiganomona Jesús menamiēna orede. <sup>2</sup> Raite:

—Bie nairai illa uicomo mai omico jai. Nainomo omico ria, cuinaca burritona baitomico. Ie emodomo nia buna jaiñede. Iena suiñuanona bene ati. <sup>3</sup> Omicommo: “¿Bue íñellena iena

suiñodomico?” bu jicanoia, llono: “Coco Nama iena jitaide. Nailli iena raire abido oretaite lloste”.

<sup>4</sup> Naimie llua isoi, jaidiaimaia. Naisomo jofo nasemo burritona baillanona, iena suiñodiaimaia. <sup>5</sup> Ie facaise nainomo itino jicanote:

—¿Bue ñellena burritona suiñodomico?

<sup>6</sup> Jesús llua isoi uai otiaimaia. Ie muidona:

—Jee —raitimaci.

<sup>7</sup> Burritona atidiaimaia. Ie emodomo naimie llofueoicaigano naimaci iniroi jobianona, ie emodomo Jesús rainadate. <sup>8</sup> Naimiena iobitallena, illaima isoi naimie jaillena, diga comini, imaci iniroi diga, naiso motomo jobedimaci. Jiaño nai fuemona raforona uanona, naiso motomo jobedimaci. <sup>9</sup> Dajerie Jesús uicomo jaidimaci. Dajerie naimie jinafona jaidimaci. Ado cuiirisite:

—¡Cai Jilloitaraima billa! Jusiñamui mamecido bitimie eo mare. <sup>10</sup> Cai illaima David micori ifomo caina sedallena, damie billemo birui occuridicai. Jusiñamui caina jilloitajasa.

<sup>11</sup> Iese Jerusalémo naimie jaide. Nainomo rillanona, Jusiñamui jofomo jaide. Nainomo eruaide. Jitoma ana illa jira, ie doce llofueoicaigano diga, Betaniamo inillena jaide.

*Jesús higuera railla riarana faidua rafue*

(Mt 21.18-19)

<sup>12</sup> Ie areruido Betaniamona Jerusalémo abido ie llofueoicaigano diga Jesús bia, aimetaite. <sup>13</sup> Arena higuera railla riarana cianona, iena jibuide. Como firuide; ia naie llisilladi ñede. Ie llisilla facaise nia ñede. <sup>14</sup> Ie jira naie riarana lloste:

—Biemona jaca llisiñeite. —Ie llofueoicaigano naimie lluaña cacadimaci.

*Jesúdi Jusiñamui jofomona damieriena dotaja rafue*

(Mt 21.12-17; Lc 19.45-48; Jn 2.13-22)

<sup>15</sup> Jerusalémo Jesús rilla mei, Jusiñamui jofomo naimie jaide. Naie jofo eo aillue. Diga cuartos nainomo ite. Jusiñamuimo ofomaiaña fecallena, naimiemo toica llaudaiaña fecallena, nainomo comini jaisoidimaci. Naie cominina ibatajanona, ofomaiaña, toica llaudaiaña diga, damierie fecauidimaci. Iena Jesús cianona, naimaci mesaiaña oni caicode. Ucugina fecauidino rairacuai jiañi oni caicode. <sup>16</sup> Jofo facaimo marena tuilla jira, comini rana jamai uillanona, iedo jaisoidimaci. Atona tuidifodo jaisoidimaci. Iena Jesús rairuide. <sup>17</sup> Naimacina llofuete:

—Ie facaina lloraia micori Jusiñamui llogacino jaie cuega: “Cue jofo ite, nainomo nana comini cuemo jillena” cuega. Ero, ailluena omoi ibataja jira, naimie jofona firiruidino jofona omoi finoca.

<sup>18</sup> Judúuai illaicomini naimie finoca rafuena fidianona, naimiena meinellena, coniniri siadotimaci. Ailluena comini naimie llofuiana ebiruillanona, rajicaidimaci. Ie jira judúuai illaicomini naimiena jaciruillanona, naimiena nia meinendidimaci. <sup>19</sup> Nairui navuida ie llofueoicaigano diga, Jerusalémona Jesús oni jaide.

*Jesús faidoca riaru duilla rafue*

(Mt 21.20-22)

<sup>20</sup> Ie are ie llofueoicaigano diga, Jerusalén dine Jesús jaillanona, higuera railla riaru duillana ciodimaci. Nana ie jainao diga duillana ciodimaci. <sup>21</sup> Jesús navui are lluaña Pedro uibiñuanona, naimiemo lloste:

—Maestro, ero. O faidoca higuera jai duide.

<sup>22</sup> Jesús uai ote:

—Jusiñamuina inocana jai. <sup>23</sup> Unaicinona omoi lloiticue. Jusiñamui lluaña raise bu inoia, naimie comeci igireñenia, bene ite anedumo naimie lloia: “Monailaimo o illena, benomona mai jai”, Jusiñamui ie jitaille rana finoite. <sup>24</sup> Nie isode rafue Jusiñamuimo omoi jicajja, naimie iena finuana omoi inuamona, iena naimie finoite. <sup>25</sup> Jusiñamuimo o jiacania, jiaimie diga o rafue ia iena feita. Ie isoi cai Moo Jusiñamui omoi ite jeacino jiañi feitaite; <sup>26</sup> iadedi jiañe comini finoca jeacinona omoi feitañenia, omoi Moo Jusiñamui omoi jeacinona feitañeite. Iena oni dotañeite.

*Jesúdi ie siño uaina llua rafue*

(Mt 21.23-27; Lc 20.1-8)

<sup>27</sup> Jerusalémo naimaci rillanona, Jusiñamui jofomo Jesús fo jailla mei, judúuai illaicomini naimie dine bitimaci. Naimacidi Jusiñamui diga nanoca ñairaini. Naimacidi Moisés micori llogacino llofueraini. Naimacidi einamaci. Diese billanona, <sup>28</sup> jicanotimaci:

—¿Nie isode uaido o finoca rafuena finodio? ¿Bu omo iga uai diga o finoca rafuena finodio?

<sup>29</sup> Jesús dinena uai ote:

—Omoimo daje rafuena nano jicanoitucue. Raise omoi fairioia, omoimo cue uaido cue finoca rafuena lloiticue. <sup>30</sup> Juan Bautista micoridi cominina navui bautizade. ¿Bu naimie micorina orede, cominina bautizallena? ¿Jusiñamui? ¿Comini? Cuemo llono —llote.

<sup>31</sup> Dani coniniri iena siaduanona, anado raitimaci:

—“Jusiñamui” cai fairioia, caimo jicanoite: “¿Bue ñellena naimie micori lluna ñnoñedomoi?” <sup>32</sup> “Comini” cai fairioia, bene itino caina nibai meinetimaci, Juan micoridi Jusiñamui facaina lloraíma naimaci railla jira.

<sup>33</sup> Te jira fairiotimaci:

—Uiñoñedicaí.

Jesús dinena raite:

—Te muidona cuemo nie isoide uai illana omoimo lloñeiticue.

## 12

*Jesúdi marañede majiraini rafuena llua rafue*

(Mt 21.33-46; Lc 20.9-19)

<sup>1</sup> Judíuai illaicominimo Jesús llote:

—Jiaie rafuena omoimo lloiticue. Iemo cacarei. Daje patrón uvas railla riaraiaina rite. Naie abi laite. Jaiaruido uvas ijina eenollena, eniruemo ifona raite. Naie illina raise eruaillena, tidacana finode. Iena sedallena, ibatajanona, jainomo fecade. Te mei jiaie eniruemo jaide. <sup>2</sup> Uvas jai einaila facaise riaraiaina sedaraini dine naie patrón ie mullaimana orede, naie illimona dajerie riará llisilla ollena; <sup>3</sup> iadedi naie sedarainidi ie mullaimana fatimaci. Te mei naimiemo riará fecaño naimiema abido oredimaci. <sup>4</sup> Te mei patrón jiaie mullaimana orede. Naimie ifogina bofedimaci. Naimiema jeare finodimaci. <sup>5</sup> Te mei patrón jiaimiena orede. Naimiema meinetimaci. Te mei ailluena mullaiaína orede. Damieriena fatimaci. Damieriena meinetimaci. <sup>6</sup> Patrómo ie isiruga jito ite. “Cue jitona jaciruitimaci. Naimie uaina ñnoitimaci. Naimiema oretaitucue” patrón comecina facade. <sup>7</sup> Riaraiaina sedaraini naimiema cuanona, coniniri raitimaci: “Bimiemo bie illi fiebiite, naimie moo fiodailla mei. Naimiema cai meinelli, bie illi caimo fiebillesa” raitimaci. <sup>8</sup> Naimaci dine naimie rilla mei, naimiema meinetimaci. Te mei ie abina illimona jino dotadimaci. <sup>9</sup> Iena fidia mei, ¿niese naie patrón nibaiite? Ero, naimie billanona, ie illina sedarainina fuidoite. Te mei jiaionna ie illina sedataite.

<sup>10-11</sup> Naimacimo Jesús llote:

—Naie illi sedaraini isoidomoi. Jusiñamui facaina lloraíma micori omoína jaie cuete. Te cuegafuena raise facañedomoi. Naimie micori cuega:

Jofo finoraini jitaíñena nofici di nana naie jofomo ite nofici baifemo jai uaide.

Jusiñamui iena finotate.

Iena cai uiñuamona: “Eo mare” raiticaí

cuega. Jusiñamui cominina damierie jaillana naimie micori cuete. Jusiñamui oretagamiema damierie jitaíñenamona, naimie cominina jaiñeitimaci; iadedi Jusiñamui oretagamiema ailluena ñnuamona, naimie cominina jaitimaci. Ero, Jusiñamui facaina lloraíma micori caina cuete. Naie jofona finoraini isoidomoi. Naie nofici isoidicue. Cue rafuena omoi jitaíñena jira, naimie cominina jaiñeitomoi.

<sup>12</sup> Judíuai illaicomini iena cacajanona, Jesús naimacina ñaiana naimaci uiñuamona, naimiema gaitaacadimaci; ia cominina jaciruitimaci. Te jira naimiema oni jaidimaci.

*Jesúmo gobiernomo ucubena fecajana jicanua rafue*

(Mt 22.15-22; Lc 20.20-26)

<sup>13</sup> Judíuai illaicomini jailla mei, dajerie fariseuai cominina Jesús dine oredimaci. Illaíma Herodes dibeimo itinona oredimaci. Naimie raise uai oñenia, naimiema duere finollena, Jesúna facaciadimaci. <sup>14-15</sup> Naimiemo llotimaci:

—Maestro, uanaicinona llofuecabitio. Jusiñamui rafuedo cai marena jaillana raise llofuetio. Nana comini dauaido llofuetio. Cominina iobitallena llofueñedio. Omo rafuena jicanoíacadicai. Dani Jusiñamuina sedadicai; iadedi romanuai railla nairai anamo birui cai illa jira, ¿naimaci illaíma Césarmo ucubena cai fecajana rairuidio? Caimo llono —llotimaci.

Naimaci mareuidinona abina caitadinona naimie uiñuamona, naimacimo llote:

—¿Bue ñellena cuena facacitomoí? Ucube cuemo acata.

<sup>16</sup> Te jira acatatimaci. Naimacimo jicanote:

—¿Bu ie joreño nainomo ite? ¿Bumo jainaiaide bie cuega radi?

Uai otimaci:

—César.

<sup>17</sup> Jesús dinena raite:

—César iena itedi, Césarmo ille. Jusiñamui iena itedi, Jusiñamuimo ille —raite.

Naimie lluana cacajano, naimie raise uai ua jira, ieri rajijcaidimaci. Naimie iese llua jira, naimiena duere fanonidimaci.

*Jesús dine saduceuai railla comini billa rafue*  
(Mt 22.23-33; Lc 20.27-40)

<sup>18</sup> Naie facaise saduceuai railla comini naimie dine bitimaci. Fiodaillamona jaca buna jillohellena innotimaci. Jesúmo llotimaci:

<sup>19</sup> —Maestro, cai facaina Moisés micori jaie cuega: “Iima fiodailla meinoconi, naimie urue inenia, ie ama naie feciño olle. Naimiedi uruiaina ie ama facaina comuitaite” cuega. <sup>20</sup> Bie rafuena uiñoiacadicai. Siete amatiai ite. Nano doforamie ie aina ote. Naimie nia uruiainide fiodailla. <sup>21</sup> Ie emodo imie ie ama feciño ote. Naimie uruiainide jiai fiodailla. Naie siete digamiedemona iese sefuide. <sup>22</sup> Uruaiainide nana fiodailla. Ja muidomo naie riño jiai fiodaite. <sup>23</sup> Fiodaillamona, ico naimaci jilloiadedi, ¿bu naie riño ienite? Nainaiño siete digamiena inirede —llotimaci.

<sup>24</sup> Jesús uai ote:

—Moisés micori cuegafuiaina raise omoi uiñoñena jira, Jusiñamui uaina raise omoi uiñoñena jira, bie isoiderafuena raise uiñoñedomoi. <sup>25</sup> Fiodaillamona jillua mei, Jusiñamui diga ite comini ainitimaci. Ininitimaci. Monamo Jusiñamui jaienisaí ainidimaci. Ininidimaci. Ie isoi naie siete amatiai iitimaci. <sup>26</sup> Fiodaitino ico jilloillena omoimo lloiticue. Moisés micori jofue inenanomo illa facaise, amena boode motodo Moisés micorimo Jusiñamui ñaia facaise, naimie micorimo comini ico jilloillena Jusiñamui lloite: “Abraham ie Jusiñamuidicue. Isaac ie Jusiñamuidicue. Jacob ie Jusiñamuidicue” lloite. <sup>27</sup> Jai fiodaitimaci; ia naimaci joreñuai nia itimaci. Jusiñamuidi daní cajedino imaci Jusiñamuina jira, naimaci joreñuai naimie dine itimaci. Ico naimaci abiaina jiai jillotaite. Fiodaillamona jilluana omoi raise uiñoñedomoi —lloite.

*Jesús nanoca llogacinona llofua rafue*  
(Mt 22.34-40)

<sup>28</sup> Naie facaise Moisés micori llogacinona llofueraima Jesús dine billanona, naimiedi comini Jesús uaina uaitajana cacade. Jesús raise uai uana cacajano, Jesúmo jicanote:

—Moisés micori jaie llogacinuaimona, ¿nie llogacino ua nanoca llogacinona?

<sup>29</sup> Jesús dinena uai ote:

—Moisés micori jaie cuega: “Israel comini, bie rafuemo cacarei. Cai Nama Jusiñamui jaca dajede. <sup>30</sup> Omoi jitailla jira, nana omoi comeciaí diga, cai Nama Jusiñamuina isirui. Naimiemo omoi comeciaina eo facaia, cai abina cai isiruilla isoi cai ecimo itinona cai isirui. <sup>31</sup> Ie emodomo ite llogacino janore daje isoide: “Daní omoi abí omoi isiruilla isoi, omoi ecimo itinona jiai isirui”. Bie mena llogacino jiaie llogacinuai baifemo faite.

<sup>32</sup> Naie llofueraima dinena uai ote:

—Maestro, raise llotio. Jusiñamui jaca dajede. Jiaimie cai sedallena inede. <sup>33</sup> Cai jitailla jira, nana cai comeciaí diga naimiena cai isirui, naimiemo cai comeciaina eo facaia, cai abina cai isiruilla isoi cai ecimo itinona cai isirui, Jusiñamuina raise sedadicaí. Bie rafuedo naimiemo toica ocaína fecajana baifemo faite. Bie rafuedi naimiemo cai ra fecajana baifemo faite.

<sup>34</sup> Naimie raise uai ua jira, naimiemo Jesús lloite:

—Iese o inocana jaia, Jusiñamui jitailla isoi, ie cominina raire jaitio. —Ie facaisemona buna naimiena facaciaibiñede.

*Jesús dinena fariseuai cominimo jicanua rafue*  
(Mt 22.41-46; Lc 20.41-44)

<sup>35</sup> Jusiñamui jofomo Jesús jailla mei, nainomo itinomo jicanote:

—¿Niese Moisés micori llogacinona llofueraíni Cristona raitimaci? ¿Niese naimiedi David micori jítóna raitimaci? <sup>36</sup> Jusiñamui Joreñodi David micorina ñaitatajanona, David micori lloite:

Jusiñamuidi cue Namamo lloite: “Illaímana o illamona, cue nabei dine ana rai.

Ona inoñedino o anamo itataiticue”.

<sup>37</sup> “Cristodi cue Nama” David micori raite. Iese naimie micori railla jira, Cristo David micori afemo faite. Naimiedi jamai David micori jitoñede; ia jiai ie Nama. —Nainomo itino naimie llofuana iocire cacareidimaci.

*Jesúdi judíuai illaicominina ñaia rafue*  
(Mt 23.1-36; Lc 11.37-54; 20.45-47)

<sup>38</sup> Jusiñamui jofomo Jesús nia llofuianona, raite:

—Moisés micori llogacinona llofueraínimona abina rairui. Illaicominina naimaci itimacidená, naimacina comini cioillena, eo mare iniroina jitaacacabidimaci. Nine

naimaci macaria, naimaci jamai bue isoifinedinona itimacidena, comini naimacina uaiduana gaidimaci. <sup>39</sup> Comini naimacimo acarillena, ofiracomo uicomo raiacadimaci. Rafue ia: “Jamai bue isoifinedicai” raillamo comecina facajanona, rafue nama ecimo raiacadimaci. <sup>40</sup> Feciñuaimona rana ocabillanona, naiñaiñuaina duere finodimaci. Naimiena eo sedadimacidena, Jusiñamuimo are jicabidimaci. Iese naimaci icabilla jira, Jusiñamui naimacina jiaie comini baifemo duere finoite.

*Jesúdi Jusiñamui jofomo duerede feciño ucube fecajana ciua rafue  
(Lc 21.1-4)*

<sup>41</sup> Jusiñamui jofomo Jesús nia ia, ucube fecarano uicomo ana raide. Nainomo comini ucubena joniamo eruaide. Ailluena ucuberedino ailluena ucubena jonetimaci. <sup>42</sup> Ie facaise eo duerede feciño menaruñu jonete. <sup>43</sup> Iena ciuanona, naimie dine ie llofueoicaiganona uaiduanona, naimacimo llofe:

—Bie eo duerede feciño nana jiaie comini jonia baifemo jonete. <sup>44</sup> Naimacimo ailluena ite ucubemona janore fecadimaci. Naiñaiño eo duerede; iadedi nana naiñaiñoite ite ucubena jonete. Ie jira jiaino baifemo jonete.

## 13

*Jesúdi Jerusalémo ite Jusiñamui jofo judaiana llua rafue  
(Mt 24.1-2; Lc 21.5-6)*

<sup>1</sup> Jusiñamui jofomona ie llofueoicaigano diga, Jesús jino jaidemo, ie llofueoicaiganomona Jesúmo damie raite:

—Maestro, bie jofomo ite noficiai co ebirede. Bico eo ebire ciodo.

<sup>2</sup> Jesús dinena uai ote:

—Bie jofo birui eo mare; ia nana bie jofomo ite noficiai ico judaisite —llofe.

<sup>3</sup> Ie mei Olivos railla anedu dine rillanona, Jusiñamui jofo uico dine Jesús naie anedu muidomo ana raide. Ie facaise Pedro, Jacobo diga, Juan diga, Andrés diga, eneno illanona, Jesúmo lotimaci:

<sup>4</sup> —Jusiñamui jofo judaisillana omo jicanoiacadica. ¿Niruido iena suite? Nana o lloga rafue suillena, ¿nie isoide rafue nano suite? Iena caimo llono.

<sup>5</sup> Uai ote:

—Omoia bie rafuena bu jifueñellena, omoi abina rairui. <sup>6</sup> Ailluena comini cue mamecido billemona: “Cristodicue” raitimaci. Diga cominina jifueitimaci. Iemona omoi abina rairui. <sup>7</sup> Jobaimiai illena fidiitomo; iadedi jaciruiñeno. Iese suite; iadedi abido nia bifeitice. <sup>8</sup> Daje nairai jiaie nairai diga jobairitimaci. Daje gobierno jiaie gobierno diga jobairite. Diga illanuaimo ñuisañuái suite. Diga illanuaimo comini aime guitimaci. Iese suia, omoi duere sefuillifue omoimo suite. <sup>9</sup> Abina rairui. Dajerie omoia llogidoitimaci. Omoia gaitaja mei, naimaci ofiracomo omoia faitimaci. Cuemo omoi duilla jira, omoia gaitajanona, omoia duere finollena, illaicomini dine omoia uitimaci; ia naimacimo cue rafuena lloitoimo. <sup>10</sup> Diga comini cue rafuena nana nairaimo lloitoimaci, nana nairai iena cacaillena. Ie mei abido biitice. <sup>11</sup> Naie illaicomini dine omoi ia, juez dine omoi ia, omoi abi riidollicinomo omoi comeciaina jarire facañeno. Naie facaise omoi ñaillicinona uifioitomo. Dani omoi comeciai icinodo ñaiñeitomo; ia Jusiñamui Joreño uaido ñaitomo. <sup>12</sup> Cuen a ñinotomo; ia ailluena cuena ñinoñeitimaci. Cuen omoi ñinua jira, omoia enoitimaci. Iemona dajerie ie amana meinetalena, naimiena llogidoite. Dajerie moodi ie uruena meinetalena, naimiena llogidoite. Dajerie uruaiidi naimaci moona, naimaci aina meinetalena, naimacina llogidoitimaci. <sup>13</sup> Cue cominina omoi illamona, nana nairai omoia enoitimaci; iadedi cuena fainonocañedimie ja muidomo monamo jaca ite. Naimiena jillotaicue. <sup>14</sup> Cue lluamo cacarei. Jusiñamui facaina lloraimadi jiaimie jearede rafue finollena jiaie llofe. Naie rafue suia, Jusiñamui jofomo Jusiñamuina sedañeitomo. Nainomo ite jearede rafue finuana omoi ciuanona, naiemona omoi jillobillena, duere omoi sefuiñellena, Judeamo omoi illamona, aneduai dine omoi aisi. <sup>15</sup> Jofo emodomomo omoi ia, ana billanona, aneduai dine raire rillena, jofomo jaiñeno. Nainomo ite rana omoi diga uifio. <sup>16</sup> Aneduai dine raire rillena, illimo omoi ia, abido jofomo biñeno, omoi iniroi omoi diga uillena. <sup>17</sup> Naie rafuemona jillobillena, naie facaise urueside riño duere sefuite. Uruena nia jirode riñodi jiaie duere sefuite. <sup>18</sup> Eo duere sefuiñellena, Jusiñamuimo omoi jicano, rollime facaiseconi bie rafue suiñellena. <sup>19</sup> Naie facaise comini eo duere sefuitimaci. Jusiñamuidi enirue finua facaisemona iese comini nia duere sefuiñedimaci. Ico iese eo duere sefuiñeitimaci. <sup>20</sup> Naie facaise ianori fo Jusiñamui oñeitena, buna jaca jillobiñeite. Naimie fetocano muidona, naie facaise Jusiñamui ianori fo oite.

<sup>21</sup> Ie facaise omoimo bu raia: “Jadi, Jusiñamui facaina lloraima benomo birui bairede. Naimiedi Cristo”, iena ñinoñeno, Jiaimie raia: “Oni batine Cristo birui bairede”, iena

ñinoñeno. <sup>22</sup> Cristona abi caitadino biitimaci. Jusiñamui facaina llorainina abi caitadino jiai biitimaci. Siño rafuena finuanona, cominina jifueitimaci. Jusiñamui fetoca cominina ua jifueitimaci. <sup>23</sup> Ie jira omoi abina rairui. Ero, bie rafue nia suiñenia, iena omoimo jai lloticue.

*Jesús abido ie bille rafue*

*(Mt 24.29-35, 42-44; Lc 21.25-36)*

<sup>24</sup> Naie duere sefuilla facaise meinoconi, jitoma lligaiñoñeite. Fivui jiai lligaiñoñeite. <sup>25</sup> Monamona ucuai ana llujite. Nana naie radi jaidisite. <sup>26</sup> Naie facaise uillie motodo cue billena nana comini cioitimaci. Ebire biiticue. Naimacina cue sedallena, illaimana biiticue. <sup>27</sup> Cue jaienisaina cue ecimona oretaiticue. Cue fetocano diese naganomona ofitaitimaci.

<sup>28</sup> Higuera railla riaromona omoi fueo. Bie eniruemo naie riaru firuillamona, fiemona raire illana uiñotomoi. <sup>29</sup> Ie isoide. Bie rafue ico suia, cue billirui iaiei illena uiñotomoi. <sup>30</sup> Uanaicinona omoimo lloticue. Nana bie rafue suille facaiseconi bie nairai nia iite. <sup>31</sup> Mona enirue diga fuite; iadedi cue lloga uai jaca suite. <sup>32</sup> Cue abido billirui jaca bu uiñoñede. Jusiñamui jaienisai iena uiñoñedimaci. Jusiñamui Jitodicue; iadedi cue abido billiruina jiai uiñoñedicue. Dama cue Moo iena uiñote. <sup>33</sup> Abina rairuicana jai. Naimie omoimo canollena, Jusiñamuimo jiai jicabi. Cue billirui omoi uiñoñena jira, iemo ocuiri.

<sup>34</sup> Iena omoi raise uiñollena, bie rafuena lloticue. Patrón jiaie eniruemo jaide. Nia jaiñenia, ie mullaiaina ie jofona sedatate. Nagamie ie majille ocuide. Jofo nasena sedadmiemo naimie billemo raise ocuirillena llote. <sup>35</sup> Naie patrón abido billena naimaci uiñoñena jira, naga hora iemo ocuiritimaci. Nibai navuida baife biite. Nibai daferuise biite. Nibai atava ñaia facaise biite. Monaia, nibai biite. <sup>36</sup> Ebena naimie biite. Inidimacimo naimaci baisaibi raillanona, naimaci jaca ocuirilla. <sup>37</sup> Ie isoide. Ebena biiticue. Cue abido billirui omoi uiñoñena jira, iemo jaca omoi ocuiri.

## 14

*Judíuai illaicomini Jesúna gaitallena, siadua rafue*

*(Mt 26.1-5; Lc 22.1, 2; Jn 11.45-53)*

<sup>1</sup> Naie facaise pascua railla rafue illena, menarui fiebide. Naie facaise llomenico guille rafue jiai ite. Naie rafue ia, siritaga rana jaca guiñedimaci. Egiptomona naimaci jaiagai jillobillana começillena, naie rafue ite. Judíuai illaicomini Jesúna jifuiano gaitacadimaci. Naimiema meineiacadimaci. Iena siadua mei, <sup>2</sup> raitimaci:

—Pascua railla facaise naimiema nia gaitañeiticai. Naie facaise naimiema cai gaitataia, iena gaitañenamona, comini cai diga fuiritimaci. Nia sedaiticai.

*Jesúmo riño caimare soride ra totaja rafue*

*(Mt 26.6-13; Jn 12.1-8)*

<sup>3</sup> Betania railla nairaimo Jesús jaillanona, Simón jofomo jaide, Simódí jiaie efonaitimie. Naifomo mesamo Jesús guitemo, daje riñodi noficimona finoca frasco atiano, naie frasco llaillanona, nainomo ite caimare soride ra naimie ifogimo totade. Naie ra eo raifide. <sup>4</sup> Damierie iena ciuanona, iciritimaci. Coniniri dani ñaitimaci:

—Naie ra jamai dotade. Jai faifide. <sup>5</sup> Iena fecacadena, trescientos ucubena feiñote. Fecaja mei, naie ucube dueredinomo fecadena, caimona mare. —Naiñaiñona iese ñaitimaci.

<sup>6</sup> Naimaci ñaiana Jesús uiñua jira, naimacimo llote:

—Dama ite. ¿Bue ñellena naiñaiñona jeare ñaitomoi? Mare rafuena cuemo finode. <sup>7</sup> Omoi diga dueredino jaca itimaci. Niruido o jitaia, naimacina canoredomoi; ia omoi diga jaca iñeticue. <sup>8</sup> Cue facaina naiñaiño finoacana diese jai finode. Nia fiodiañedicue; ia cue fiodiañirui facaina naiñaiño iese finode. <sup>9</sup> Omoimo uanaicinona lloticue. Ninomo cue mare finoca rafuena bu lloia, naiñaiñona uibiñollena, nana cominimo naiñaiño finoca rafuena llote.

*Judas micori raillamie Jesúna gaitataiacana rafue*

*(Mt 26.14-16; Lc 22.3-6)*

<sup>10</sup> Ie facaise Jesús llofueoicaiganomona Judas Iscariote micori raillamiedi Jesúna gaitatallena, Jusiñamui diga nanoca ñairaini dine jaide. <sup>11</sup> Iena cacajano, iobidimaci.

—Iena o finoia, omo ucubena fecaiticai —llotimaci. Iemona Jesúna gaitatallirumo Judas ocuiride.

*Jesúdi ie fiodaille rafuena llua rafue*

*(Mt 26.17-29; Lc 22.7-23; Jn 13.21-30; 1 Co 11.23-26)*

<sup>12</sup> Llomenico guille rafue illanona, judíuai comini toica llaudaiaina fajarui illanona, Jesúmo ie llofueoicaigano jicanote:

—¿Ninomo pascua railla rafue ie guille finuana jitaideo?

<sup>13</sup> Naimacimona menamiema oretajanona raite:

—Jerusalémo omico jaillanona, nogodo jinuina uitimiena cioitomico. Naimiena raca. <sup>14</sup>Naimie jailla jofu namamo llono: “Coco llofueraima cocona omo jicanotade: ‘¿Nimai cue guiraco? ¿Ninomo guiticue, cue llofueoicaigano diga?’ ” <sup>15</sup> Ie mei omicomu afebebamo ite aillue cuartona acataite. Na raruiaí diga ite. Nainomo cai guille fino.

<sup>16</sup> Jesús llua isoi jaidiaímaiaí. Jerusalémo rilla mei, naimie llua isoi baitiaímaiaí. Pascua rafue guille finodiaímaiaí. <sup>17</sup> Nairui jitoma ana ítemo, ie llofueoicaigano diga, Jesús nainomo guisaide. <sup>18</sup> Mesamo guitimacimo, Jesús llote:

—Omoimona damie cuena gaitataite. Naimie cue diga bene jai guite.

<sup>19</sup> Iena cacajanona, sunaitimaci. Damierie naimiemo jicanoside:

—¿Cuena ñaitio?

<sup>20</sup> Uai ote:

—Omoimona damie bie platomo cue diga llomenico diga mutade. <sup>21</sup> Jusiñamui facaina lloraima micori cuega isoi, monamona jai billamona, fiadaiticue; iadedi cuena gaitataitimie eo duere sefuite. Naimie jeiciñegadena, cuemona mare.

<sup>22</sup> Naimaci nia guitimacimo, llomenicono Jesús llinuanona, Jusiñamuimo iobillacinona fecaja mei, llomenicono tairude. Naimacimo fecajano raite:

—Iena llinuano guiño. Bie llomenicodi cue abi facai ie. Cue abimo omoi comecina facajano, iena guiño.

<sup>23</sup> Ie mei naimie jiroracona jiai llinote. Jusiñamuimo iobillacinona llua mei, naie jirora-como jai totaca vino naimacimo fecade. Iemona nana jirodimaci. <sup>24</sup> Naimie raite:

—Cue fiadallamona, dama cue diallamona, jeacino anamona ailluena jillotaiticue. Jusiñamui jiaie rafue birui itatajamona, naimaci jeacino oni dotajana jai llote. Bie vinodi naie rafue facai ie. <sup>25</sup> Omoína bene dane iese caimare nabaiñeiticue. Cue Moo sedajanomo omoi diga cue ia, nainomo omoína dane iese caimare marena nabaiticue.

*Jesúdi Pedro naimiena januana llua rafue*

*(Mt 26.30-35; Lc 22.31-34; Jn 13.36-38)*

<sup>26</sup> Iobilla rua Jusiñamuimo naimaci rua mei, Olivos railla anedumo Jesús ie llofueoicaigano diga jaide. <sup>27</sup> Naimacimo llote:

—Cuena fainonocaitomoi. Jusiñamui facaina lloraima micori iena jaiie cuega: “Toica llaudaiaí sedaraimana meinetimaci. Naimie toiniaí uaficaida jaitimaci” cuega. Naimie micori caina cuete. <sup>28</sup> Ero, fiadallamona cue jillua mei, omoi uicodo Galileamo jaiticue, nainomo omoi diga dafaiifillena.

<sup>29</sup> Pedro uai ote:

—Nana jiaíno ona fainonocaiia, ona jaca fainonocaiñeiticue.

<sup>30</sup> Jesús dinena raite:

—Uanai omo lloiticue. Ja naio itava menacaiño nia ñaiñenia, dacaiño amani cuena janoitio.

<sup>31</sup> Pedro dinena riire llote:

—O diga cue fiadaiadedi, ona janoñeiticue.

Nana ie llofueoicaigano daje uaido jiai raitimaci.

*Jesúdi Getsemanímo Jusiñamuimo jia rafue*

*(Mt 26.36-46; Lc 22.39-46)*

<sup>32</sup> Oni jaillanona, Getsemaní railla illanomo jaidimaci. Ie llofueoicaiganomo Jesús llote:

—Beno ana rai. Omoimona oni bai janore jaiticue. Cue Moo diga ñaillena jaiticue.

<sup>33</sup> Naimie diga Pedrona uite. Jacobona uite. Juan jiaí uite. Naimie sunaicaide. Ie comeci uri iñede. <sup>34</sup> Naimacimo llote:

—Cue comeci sunaicaide. Niadi fiadaiticue. Benomo fiebi; ia nia iniñeno cue facaina omoi jii.

<sup>35</sup> Naimie janore bai jaillanona, eniruemo bitadate. Naimie duere sefuiñellena, Jusiñamuimo jüde:

<sup>36</sup> —Ore Moo, nana rana finoredio. Cuena llegi cacaitañeno. Cue jitaila isoi cuena fiñoño; iadedi o jitailla isoi cuena fino.

<sup>37</sup> Ie mei ie llofueoicaigano dine abido billanona, naimaci inisitemo ride. Naimacina casitajano, Pedromo jicanote:

—Simón, ¿niese raire inidio? daje hora nia iñedemo. <sup>38</sup> Iniñeno. Taife ramo omoína fai rail-lano, iena omoi iñoñellena, Jusiñamuimo jii. Omoi comeci mare rafuena finoacade; iadedi omoi comeci daní ocuiñoñede. Ie muidona Jusiñamuimo jii, omoína naimie ocuiñoñellena — llote.

<sup>39</sup> Ie mei dane jüllena jaide. Ailli naimie jia isoi, dane jüde. <sup>40</sup> Ie llofueoicaigano dine dane billanona, naimaci uisi lliñoilla jira, naimaci inisitemo ride. Naimacina casitajano,

Jesús naimaci diga ñaite; ia naimaci dinena uai uana uiñoñede. <sup>41</sup> Dane jüa mei, ie llofueoicaiganomo dane billanona, naimacina casitajano, lloste:

—¿Ñiese nia inidomoi? ¿Ñiese jafaici nia otomoi? Jai macaibaite. Cue fiódaille facaise jai ite. Jusiñamui jitailla jira, cuena ja gaitajanona, naimiena ñnoñedino anamo ja iiticue. <sup>42</sup> A naidacai. Maiña. Cue gaitataitimie jai bite.

*Jesúna gaitalle rafue*

(Mt 26.47-56; Lc 22.47-53; Jn 18.2-11)

<sup>43</sup> Jesús nia ñaitemo, ieconi Judas bite. Naimie ie llofueoicaigamie. Diga comini naimie diga bitimaci. Naimaci lloebina atidimaci. Naimaci butaralluna jiai atidimaci. Jusiñamui diga nanoca ñairainimona bitimaci. Moisés micori llogacinona llofuerainimona bitimaci. Naimaci einamacimona bitimaci. <sup>44</sup> Jesús dine naimaci nia riñenia, Judas naimie diga bitinomo jai lloste:

—Jesúna omoi uiñoñolla, naimiena llibanoiticue. Ie mei naimiena gaita. Naimiena raise maianona, naimiena oni uiño.

<sup>45</sup> Jesús dine naimie rillanona, Judas Jesús dine raire jaide. Naimiena uaidote:

—Maestro, jai biticue. —Ieconí naimiena llibanote. <sup>46</sup> Ie jira Jesúna gaitadimaci.

<sup>47</sup> Iena ciuanona, Jesús diga itinomona damie ie lloebi llunuanona, naimiedi nanoca ñairaima ie mullaíma jefona jaíbonote. <sup>48</sup> Naimiena gaitadinomo Jesús lloste:

—Omoi lloebina atidomoi. Omoi butaralluna atidomoi. Cuena gaitallena, firiraimadicueta cuemo omoi billa. <sup>49</sup> Jusiñamui jofomo nagarui llofuecabiticue. ¿Bue ñe nainomo cuena gaitañedomoi? Cuena jai omoi gaitajamona, Jusiñamui facaina lloraini micoriai ciegafuiai suite.

<sup>50</sup> Ie facaise nana naimie llofueoicaigano naimiena fainonocailano, aisidimaci.

*Jesús jinafona conirue racaja rafue*

<sup>51</sup> Ie facaise daje conirue Jesús jinafona racade. Jamaí abímo iniroi ferinocaida racade. Naimiena ciuanona, comini naimiena gaitadimaci; <sup>52</sup> ia ie iniroina fainonocailanona, taimiena aiside.

*Jesúdi judíuai illaicomini dine illa rafue*

(Mt 26.57-68; Lc 22.54, 55, 63-71; Jn 18.12-14, 19-24)

<sup>53</sup> Jesúna gaitaja mei, Jusiñamui diga nanoca ñairaima dine naimiena uitimaci. Nana judíuai illaicomini itimaci. Nanoca ñairaini itimaci. Einamací jiai itimaci. Moisés micori llogacinona llofueraini jiai itimaci. <sup>54</sup> Pedro naimaci jinafona aarena racade. Jusiñamui diga nanoca ñairaima nairairibirimo jaide. Jofono sedadino diga nainomo ite iraimo agaide.

<sup>55</sup> Naimiena meinellena, nana naie illaicomini Jesúmo nicino illana uiñoiacadimaci. Iena coniniri siadotimaci; iadedi naimiemo jaca nie isoide marañede rafue illana uiñoñedimaci.

<sup>56</sup> Diga comini Jesúna llogidotimaci; ia tainona llotimaci. Daje isoi lloñedimaci. <sup>57</sup> Damierie billanona, tainona llogiduanona, raite:

<sup>58</sup> —Bimie lluana cacadicai. Jusiñamui jofona jeare ñaite. Naimie lloste: “Jusiñamui jofona comini finodimaci; ia iena cue judaiana, darui amani illanona, jiaie finoiticue. Comini iena finoñeitimaci”. <sup>59</sup> —Iese llotimaci; ia daje isoi lloñedimaci.

<sup>60</sup> Naimaci motomo Jusiñamui diga nanoca ñairaima naidadajanona, Jesúmo jicanote:

—¿Ñiese uai oitio? ¿Nie isoide rafue ona llogidotimaci?

<sup>61</sup> Jesús dinena uai oñede. Naie ñairaima jicanote:

—¿Odi Cristodio? ¿Odi Jusiñamui Jitodio?

<sup>62</sup> Jesús uai ote:

—Jüi, naimiedicue. Monamona jaie cue billamona, imana jaidicue; ia íco jiairuido illaimana cue illena, Jusiñamui ecimo cue raillena, omoi nairai cioitimaci. Mona uilliemo cue abido billena jiai cioitimaci.

<sup>63</sup> Iena cacajanona, icirillanona, naie nanoca ñairaima dama ie iniroina cuaranote. Raite: —Jiaíno naimiena llogidollena jai jitañedicai. <sup>64</sup> Jusiñamuina naimie jeare ñaiana jai cacadomoi. ¿Ñiese naimiena raitomoi?

Jiaie illaicomini dinena:

—Naimie fiódaillesa —llotimaci.

<sup>65</sup> Ie facaise damierie naimiena tuallaítimaci. Ie uiecona íbailla mei, naimiena ducoídimaci. Raitimaci:

—Bu o ducoia caimo llono.

Naimiena gaitadino dinena naimiena jiai ducoídimaci.

*Pedrodi Jesúna janua rafue*

(Mt 26.69-75; Lc 22.56-62; Jn 18.15-18, 25-29)



<sup>66</sup> Naie facaise Pedro nairai birimo ite. Naie nanoca ñairaima mullaifuaïmona dañaiño nainomo billanona, <sup>67</sup> Pedro agaillana ciode. Raite:

—Nazaret ie Jesús cominidío.

<sup>68</sup> Pedro iena januano, raite:

—O lluana uiñoñedicue. Iena raise cacaiñedicue.

Ie mei nase fuedo jaide. Naie facaise iitava dacaiño ñaite. <sup>69</sup> Naie mullaifño naimiena dane cianona, nainomo jamai itinomo llote:

—Bimiedi Jesús ie llofueoicaigano imie.

<sup>70</sup> Iena Pedro dane janote. Dallu illanona, nainomo jamai itino Pedromo llote:

—Odi Galilea imiedío. Jesús diga jaicabidío.

<sup>71</sup> Uai ote:

—Uanai cue lloñenia, Jusiñamui cuena duere finoite. Uanaicinona cue lluana naimie uiñote. Ero, omoi llogamiëna uiñoñedicue.

<sup>72</sup> Ieconí iitava dane ñaite. Iena cacajano, Pedro Jesús lluana uibiñote. Jaive naio Jesús Pedromo llote: “Itava menacaiño nia ñaiñenia, dacaiño amani cuena janoitío”. Iena uibiñuamona, Pedro eo eede.

## 15

### *Pilato dine Jesús illa rafue*

(Mt 27.1, 2, 11-14; Lc 23.1-5; Jn 18.28-38)

<sup>1</sup> Jitiramó monaidemo, judíuai illaicomini danomo siadotimaci. Jusiñamui diga nanoca ñairaini itimaci. Naimaci einamací jiai itimaci. Moisés micorí llogacinona llofueraini jiai itimaci. Siadua mei, Jesúsna maianona, Pilatomo uitimaci. Romanuai railla nairai anamo naimaci illa jira, Pilatodi naimaci gobernador. <sup>2</sup> Pilato naimiemo jicanote:

—¿Judíuai comini illaimadio?

Jesús uai ote:

—Jii.

<sup>3</sup> Ie muidona Jusiñamui diga nanoca ñairaini Jesúsna llogídotimaci:

—Naimie diga marañede rafuena finode —llotimaci.

<sup>4</sup> Pilato dinena naimiemo jicanote:

—¿Ñiese uai oñedio? Ona eo llogídotimaci.

<sup>5</sup> Jesús nia uai oñena jira, Pilato uainicaide.

### *Pilatodi Jesús fiodaillana llua rafue*

(Mt 27.15-31; Lc 23.13-25; Jn 18.38-19.16)

<sup>6</sup> Naga año pascua railla rafue facaiseconi cárcelmo itinomona Pilatodi comini jicacamiëna jamai jino orede. <sup>7</sup> Bie facaise cárcelmo Barrabás raillamie ite. Gobierno diga naimie navui jobairilla jira, naie facaise comena naimie meinia jira, cárcelmo ite. <sup>8</sup> Ie facaise ailluena comini Pilato dine ofillanona, cárcelmona naimie finocabilla isoi, damie jino jamai oretallena jicadimaci. <sup>9</sup> Pilato jicanote:

—¿Bu jino cue oretallena jitaidomoi? Omoi judíuai railla illaimana ñibai jitaidomoi.

<sup>10</sup> Iese jicanote; iadedi naimiedi Jusiñamui diga nanoca ñairaini Jesúsni uradoillana uiñote. Naimaci Jesúsna meiniacanana jiai uiñote. <sup>11</sup> Jusiñamui diga nanoca ñairaini naimacina llotataja jira, comini dinena Barrabás jino jamai oretallena jicadimaci. <sup>12</sup> Iena cacajano, Pilato naimacimo jicanote:

—¿Ñiese bimiena cue finuana jitaidomoi? Naimiedi omoi judíuai illaima raillamie.

<sup>13</sup> Ado llotimaci:

—¡Naimiena corai!

<sup>14</sup> Pilato dane jicanote:

—¿Ñie isoide marañede rafuena finode? —Iena cacajano, ado ibi llonoidimaci:

—¡Naimiena corai!

<sup>15</sup> Naimacina iobitallena, naimaci jitailla jira, Barrabás jino orede; iadedi Jesúsna sechedotaja mei, naimiena coraillena orede.

<sup>16</sup> Soldaduai naimiena gobernador jofo fo uillanona, nana soldaduai nainomo ofidimaci.

<sup>17</sup> Jiduirede iniroi naimiemo jitadimaci. Eecuaimona niga nuiciraina naimie ifogimo jitadimaci. <sup>18</sup> Naimiena jifanoduanona, naimiena uaidotimaci:

—¡Jadi, judíuai illaima!

<sup>19</sup> Radosi diga ie ifogimo buta-butadimaci. Naimiena tuallaítimaci. Naimie illaimana itena, naimiena sedallena, cañici ifodo raiedimaci. <sup>20</sup> Jesúsna naimaci jifanodua mei, naimie jiduirede iniroina duiñodimaci. Nano naimie iniroina dane abido naimiemo jitadimaci. Ie mei naimiena coraillena oni uitimaci.

*Jesúna coraia rafue**(Mt 27.32-44; Lc 23.26-43; Jn 19.17-27)*

<sup>21</sup> Jerusalémona naimaci jaillanona, jamai bitimiemo dafaifidimaci. Naimiedi Simón. Cirene railla enirue imie. Naimie jito iaiaiaidi Alejandro iaiaiaia Rufo diga. Jerusalén onifemona naimie billanona, naimiemo dafaifidimaci. Naimiena Jesús uiga cruzna ro-catatimaci. <sup>22</sup> Gólgota raillanomo jaidimaci. Ifocoraina eruaila jira, iese mameciredede. <sup>23</sup> Nainomo rillanona, ie abi isirena cacaiñellena, vinomo erirede rana faianona, Jesúmo fecadimaci; iadedi naimie iena jiroñede. <sup>24</sup> Te mei naimie cruzmo coraia mei, cruzna naidania mei, naie soldaduai naimie iniroi dani coninimo fecasite. Naie iniroi bu uille raillanona uifollena, jifanododimaci.

<sup>25</sup> Jitoma nia fuiri daidemo, naimiena coraidimaci. <sup>26</sup> Cruzmo ie llogiduafuena jonetimaci. Jai cuega: “Judíuai comini illaia”. <sup>27</sup> Te mei mena firiruide iaiaiaia coraidimaci. Damie Jesús nabeimo coraica. Jiaimie Jesús jarifebeimo coraica. <sup>28</sup> Iemona Jusíñamui facaina lloraima micori jaiie cuegafue suide. Cuega: “Maraiñedino isoi naimie jai ite”.

<sup>29</sup> Naisodo jamai jaidino Jesúna mameritimaci. Mamerillamona, ifogaiina jaididimaci. Raitimaci:

—Navui raisoidio: “Jusiñamui jofona judaiticue. Darui amani illanona, iena dane finoiticue” raisoidio. <sup>30</sup> Te muidona dama o abina mai jillota. Cruzmona ana bi.

<sup>31</sup> Ie facaise Jusíñamui diga nanoca ñairaini naimiena jifanododimaci. Moisés micori llogacino llofueraini naimiena jiai jifanododimaci. Raitimaci:

—Jiaie cominina jillotate; ia dama naimie abina jillotanide. <sup>32</sup> Naimiedi Cristodena, naimiedi cai judíuai comini illaia raillamiedena, dama niadedi cruzmona ana ie billa. Iena cai cioia, naimiena inoiticai. —Iese naimiena jifanododimaci. Naimie diga coraicamie iaiaiaia naimiena jiai jeare ñaitiaiaiaia.

*Jesús fiodailla rafue**(Mt 27.45-56; Lc 23.44-49; Jn 19.28-30)*

<sup>33</sup> Jitoma naidai itemona, daje amani horas mona jitibicaide. <sup>34</sup> Te meinomo judíuai railla uaido Jesús ado jidaioide:

—Eloi, Eloi, ¿lama, sabactani? —jidaioide. Iena oni dobañuamona raite: “Cue Jusíñamui, cue Jusíñamui, ¿bue ñellena cuena fañonocaidio?” raite.

<sup>35</sup> Iena cacajano, nainomo jamai itinomona damierie raitimaci:

—Naimie jaiie Jusíñamui facaina lloraima Eliana uaidote —raitimaci. <sup>36</sup> Naimacimona damie jarire jaillanona, fibecode ramo vinona faite. Radosimo jillillano jirrollena, naimiemo a fecade. Raite:

—Dallu sedaiticai. Elías naimiena jillotajabillena uifoiacadicai.

<sup>37</sup> Ie facaise ado curioita fiodaite. <sup>38</sup> Naie facaise Jusíñamui jofomo ie fetaca iniroife ana anaba jillacimo motodo menafe cuararide. <sup>39</sup> Jesúna sedallena, nainomo capitán ite. Jesúmo eruailanona, Jesús fiodaillana ciode. Raite:

—Uanai bimiedi Jusíñamui Jito.

<sup>40</sup> Dajerie riñoniai naie rafuena aarena cioidimaci. Naimaci motomo María Magdalena ite. Jiaie María jiai ite. Naiñaiñodi Jacobo ei. Naimiedi jamamie. Naiñaiñodi jiai José ei. Salomé jiai ite. <sup>41</sup> Galileamo Jesús navui illa facaise naie riñoniai naimie diga jaisoidimaci. Naimiena canouidimaci. Jerusalémo Jesús billanona, ailluena riñoniai naimie diga jiai bitimaci. Ie fiodaillana jiai cioidimaci.

*Jesús raiafomo jonia rafue**(Mt 27.57-61; Lc 23.50-56; Jn 19.38-42)*

<sup>42</sup> Jitoma ana itemo, sábado rille jai iairei illanona, <sup>43</sup> Arimatea nairai imie Pilato dine jaiide. Naimiedi José. Naimiedi illaicomini. Maremie. Naimie Jusíñamui ie cominina ico sedajanomo illemo ocuridre. Ie comecina ocuifocaida, Pilato dine jaiide. Iena raillena, Jesús abina jicade. <sup>44</sup> Iena cacajano, Pilato Jesús fiodaillana raise uifoiacade. Ie fiodaillana nia fidiñede. Jesúna sedade capitána uaiduanona, naimiemo Jesús fiodaillana jicanote.

<sup>45</sup> —Jesús jai fiodaite —capitán railla mei, Pilato Jesús abina Josémo fecallena llote. <sup>46</sup> José mare userede iniroi ibaja mei, cruzmona Jesús abi ana ua mei, naie iniroi diga ie abina ferinate. Nofici motomo finoca raiafomo jonete. Naifona ibaillena, aillue nofici nainomo bai ñuitade. <sup>47</sup> María Magdalena, jiaie María diga, naimie raiana ciode. María José ei.

*Jesús fiodaillamona jillua rafue**(Mt 28.1-10; Lc 24.1-12; Jn 20.1-10)*

<sup>1</sup> Sábadoruimo jítoma sojicaidemo, María Magdalena caimare soride rana ibade. Jacobo ei, María jiai ibade. Salomé jiai ibade. Jesús abimo jonellena, ie abina raise finollena naimaci einamaci finocabilla isoi, naiñaiñuái iena ibade. <sup>2</sup> Domingo jítiramo jítoma como bairedemo, Jesús raiafo dine naiñaiñuái jaide. <sup>3</sup> Jaillanona, conifñuáimo jicanote:

—¿Bu noficina caina oni ñuitalle raiafomona?

<sup>4</sup> Raiafo dine rillanona, iemo eruailanona, nofici oni ñuitacana ciode. Naie nofici eo aillue. <sup>5</sup> Raiafomo jaillanona, naiñaiñuái coniruena eruaidimiena nabeimo raillana ciode. Naimie are userede iniroina jítade. Naimiedi Jusiñamui jaienici. Naiñaiñuái jacinaita. <sup>6</sup> Nainomo itimie dinena raite:

—Jacinañeno. Nazaret ie Jesúsna jenodomoi. Naimiena coraidimaci; ia fiodaillamona naimie jai jillode. Bene jai iñede. Naimie jonianomo mai eroda. <sup>7</sup> Naimie llofueoicaiganomo iena lluai. Ua Pedromo llono. Galileamo omoi uicomo naimie jaite. Omoimo naimie llua isoi, naimiena cioitomoi.

<sup>8</sup> Naiñaiñuái jino jaillanona, raiafomona aisicana jaide. Jacinaillamona abi jaidisite. Jaciruillamona, iena bummo lloñede.

*Jesús María Magdalenamo bairia rafue*

*(Jn 20.11-18)*

<sup>9</sup> Domingo jítiramo Jesús jillua mei, María Magdalenamo Jesús nano bairedo. Naiñaiñño Janaba anamo navui illamona, Jesús naiñaiññomona siete jananiai navui oni orede. <sup>10</sup> Naiñaiññomo naimie bairia mei, naimie diga jaicabidinomo iena lluaide. Naimacimo iena nia lloñenia, sure eedimaci.

<sup>11</sup> —Naimie jai jillode. Naimiena jai ciodicue —naimacimo naiñaiñño llua mei, iena ñnoñedimaci.

*Mena llofueoicaiganomo Jesús bairia rafue*

*(Lc 24.13-35)*

<sup>12</sup> Ie meinconi Jesús mena llofueoicaiganomo bairedo. Naimie eruaisoilla isoi, eruaiñede. Iaimaiaí naisomo macaria, iaimaiaímo bairedo. <sup>13</sup> Jerusalémo abido iaimaiaí rilla mei, jiaie llofueoicaiganomo iena llotiaiaimaiaí; ia ñnoñedimaci.

*Jesús ie once llofueoicaiganomo bairia rafue*

*(Mt 28.16-20; Lc 24.36-49; Jn 20.19-23)*

<sup>14</sup> Ie once llofueoicaigano danomo guitimacimo, Jesús naimacimo bairedo. Naimie jillua mei, damierie naimiena cuanona, ie llofueoicaiganomo iena llote; ia ñnoñedimaci. Naimaci ñnoñena jira, Jesús naimacimo riire llote. <sup>15</sup> Naimacimo llote:

—Nana nairaiaímo jai. Nana cominimo cue mare rafue llocana jai. <sup>16</sup> Cuena ñnuamona, bautizagano diese Jusiñamuimona duere sefuiñeitimaci; iadedi Jusiñamui cuena ñnoñedinona duere finoite. <sup>17</sup> Cuena ñnotino Janaba anamo itinomona Janabana oni oretaitimaci. Naimaci nia uiñoñega uaido ñaitimaci. <sup>18</sup> Jaiona naimaci llinoia, naimacina niese nibaiñeite. Bainode ra naimaci jiroia, naimacina niese nibaiñeite. Duidinona naimaci jetajamona, jilloitimaci.

*Jesús monamo jailla rafue*

*(Lc 24.50-53)*

<sup>19</sup> Ie llofueoicaigano diga ñaia mei, Jusiñamui cai Nama Jesús monamo uiga. Illaimana Jesús illa jira, Jusiñamui nabeimo naimie raide. <sup>20</sup> Monamo Jesús jailla mei, ie llofueoicaigano, diga nairaiaímo, ie rafuena llocana jaidimaci. Cai Nama naimacina canuamona, naimacina siño rafuena finotate. Iemona comini dinena Cristomona naimaci rafue illana uiñotimaci. Macaibaite. Cue cueda rafue jai fuite. Marcodicue.

## LUCAS JESUCRISTO ENIRUEMO ILLA RAFUE CUIAFUE

*Lucas Teófilo mo cartana orede*

<sup>1-4</sup> Teófilo, cue isuruiga nabai. ¿Nigacino? Omo bie cartana oredicue. Cai motomo birui diga rafue jai suide. Jesucristo rafuena omo cueticue. Naimie billa mei, diga comini naimiemo suide rafuena ciodimaci. Iena llocana jiai jaidimaci. Naimacimona bie rafue raise uñoticue. Bie rafuena fidianona, damierie iena jai cuetimaci. Bie rafuena jiai jai cacadio. Bie rafuena cue raise uñua jira, unacinona o raise uñollena, bie cartana jai cueticue. Iese birui cue comeci jitaide.

*Jusiñamui jaienici Juan Bautista micori jeicillena llua rafue.*

<sup>5</sup> Jesucristo nia jeiciñena, Zacarías illa facaise Herodena mameciredede illamadi. Judea raila enruena sedade. Zacarías Jusiñamui diga ñairaima. Abías raillasie facaimo duillamona, Jusiñamui jofomo maijuide. Naimie aidi Elisabet. Naiñaiño jaiete ite usumadi Aarón micori. Aarón micoridi Jusiñamui diga nano ñairaima. <sup>6</sup> Jusiñamuimona iaimaiaia mare, nana naimie lloga uaina raise iaimaiaia inua jira. <sup>7</sup> Naiñaiño oiniñona jira, uruenidiaimaiaia. Jiai jai uaicima iaimaiaia.

<sup>8</sup> Zacarías facai ite comini maijia facaise ia, Jusiñamui jofo dine naimie maijiaide. <sup>9</sup> Nainomo naimie maijia, caimare soride ra fo jobaillena, naimiema fetodimaci. Naimaci finouilla isoi, jobaillanona dani Jusiñamui diga ñairaini naimiema fetodimaci. Iemei naimie fo jaide. <sup>10</sup> Fo jailla mei, naie caimare soride ra boa facaiseconi, Jusiñamui diga naimie ñaiano, ailluena comini Jusiñamui jofo ecimo itimaci. <sup>11</sup> Ieconí cai Nama Jusiñamui jaienicidi naie ra boano nabeimo Zacaríamo bairede. <sup>12</sup> Naimiema ciuanona, Zacarías jacinaiete. <sup>13</sup> Jaienici naimiemo llote:

—Zacarías, jacinaiñeno. Jusiñamui o jiacinona jai cacade. Iemona o ai uruesite. Imana jocoite. Juan o jitalle naimie mamecidi. <sup>14</sup> Iemona o comeci caimare iite. Iobitio. Ailluena comini naimie jeiciari iobitimaci. <sup>15</sup> Jusiñamuimona naimie jamai bue isoieñitimena jaite. Jifaitate rana jiroñeite. Naimie jeiciamona Jusiñamui Joreño naimiema namataite. <sup>16</sup> Cai Nama Jusiñamui dibeimo ailluena Israel cominina naimie itataite. <sup>17</sup> Jusiñamui jitaillacinona finocana jaite. Eliamo Jusiñamui Joreño jaiete uai illa isoi, naimiemo iite. Jusiñamui rafuena naimie lluaamona, damierie, naimaci jaagái isoi, Jusiñamuina inoieñitimaci. Ailluena Jusiñamui uaina jai inoieñitimaci; ia damierie birui inoieñitimaci. Naimaci comeci Jusiñamui dibeimo meidoieñitimaci. Iemona cai Nama Jesucristo bia, naimiema inoieñitimaci.

<sup>18</sup> Zacarías dinena jicanote:

—¿Niese o llua suillena uñoticue? Jai uaicimadicoco.

<sup>19</sup> Jusiñamui jaienici dinena uai ote:

—Gabriel dicue. Jusiñamuimona biticue. Cueno oretate, bie mare rafuena omo llollena. <sup>20</sup> Ero, cue uaina o inoieñena jira, uainitio, o jito jeicille dinori. Jaiaruido bie rafue suite.

<sup>21</sup> Jusiñamui jofomo jino itino Zacarías jino billena sedadimaci. “¿Bue ñellena naimie are biñede?” comeciaina facadimaci. Naimie jino are biñena jira, rajicaidimaci. <sup>22</sup> Naimie jino bitemo, naimaci diga jai ñainide. Ie onolli diga facajamona, Jusiñamui jaienici naimiemo jai llua uñoticimaci. Naimie ñaiñeno ite. <sup>23</sup> Jusiñamui jofomo naimie maijia facaise fuilla mei, ie jofomo abido jaide. <sup>24</sup> Digarui illanona, ie aidi urueside. Ie jira jofomo naiñaiño cinco fivui fiebide, comeciaina facajanona: <sup>25</sup> “Cue uruesilla jira, iena nia buna lloiacaiñedicue. Cue Nama cuena jai duenaillana uñoticue. Navui cue urue inena jira, meiruieñitue. Jai meiruieñitue. Comini cue joreñona jai ñaiñitimaci”.

*Jusiñamui jaienici Jesús jeicillena llua rafue*

<sup>26-27</sup> Elisabet seis fivui uruesilla mei, Jusiñamuidi Galileamo ie jaienici Gabrielna orede. Nazaretmo María dine naimiema orede. María nia ininide; ia jai José jicanogañaiño. Naimie usumadi David micori.

<sup>28</sup> Rillanona, naiñaiñomo llote:

—Itio. Cai Nama Jusiñamui ona eo duenaite. Ona jai fetuamona, nana jaiete rifeñiaia baifemo naimiedi ona marena itatate.

<sup>29</sup> Iena cacajanona, naiñaiño jacinaiete. Iena naiñaiño raise cacaiñena jira, iemo comeciaina facade. <sup>30</sup> Gabriel dinena llote:

—Jacinaiñeno. Jusiñamui ona duenaite. <sup>31</sup> Birui uruesitio. Imana jocoitio. Naimie mamecina jitaite Jesúsna. <sup>32</sup> Siño Jitona jaite. Nanoca Itimie Jitona jaite. Ie usuma David micori illaima illa isoi, Jusiñamuidi naimiema illaimana itataite. <sup>33</sup> Illaimana illamona, Israel raila nairaina jaca sedate. Naimie ifomo jaiamie jaca inete.

<sup>34</sup> María uai ote:

—ñima diga nia iñedicue. ¿Ñiese bie nibaille?

<sup>35</sup> Gabriel llote:

—Jusiñamui Joreño omo iite. Ie siño uai diga iena finoite. Jusiñamui marena isoi naimie jiai marenite. Naimiedi Jusiñamui Jito. <sup>36</sup> O comini iñaiño. Elisabet, ie uaicitailla facaise jiai jai urueside. Naiñaiño jai jionaide; ia jai seis fivui naiñaiño uruesilla ite. <sup>37</sup> Jusiñamui nana bie isoi de rafuena finorede.

<sup>38</sup> María uai ote:

—Jee. Jusiñamui anamo iticue. O llucacino cuemona mare. Ie facaise Gabriel naiñaiñomona oni jaide.

#### *Maríadi Elisabet dine jailla rafue*

<sup>39</sup> Ie facaiseconi María aneduai dine Judea railla eniruemo Zacarías illanomo raire jaide. Elisabetna cioillena, jaide. <sup>40</sup> Zacarías jofomo rillano:

—Itio —raillanona, Elisabetna uaidote. <sup>41</sup> Elisabet naiñaiño uaina cacajano, ieconi naiñaiño jeraimo ite urue iena jai uñuamona, niraide. Ie facaise Jusiñamui Joreño anamo Elisabet jai ite. <sup>42</sup> Iese illamona, María uruesillana uñote. Naiñaiño ado llote:

—Jusiñamui ona eo marena canoite. O uruena marena itataite. <sup>43</sup> Jamai bue isoidicue; ia, odi cue jilloitaraíma ei illanona, cue dine bitio. Iena cuemo nia lloñedio; <sup>44</sup> ia, cuena o uaiduanona, iobillamona cue jeraimo ite uruedi niraide. <sup>45</sup> Cai Nama omo llotataga uaina suillana o ñnua jira, Jusiñamui ona eo marena canoite. —Jusiñamui Joreño naiñaiñomona illamona, iena llote.

<sup>46</sup> María dinena uai ote:

Caiñai Nama eo mare. Naimiemo iobillacinona fecaacadicue.

<sup>47</sup> Naimiedi cue jilloitaraímana jira, naimieri iobidicue.

<sup>48</sup> Jamai bue isoidicue; iadedi cuena fetode.

Ie jira biruimona nana comini cuena marena ñaitimaci.

<sup>49</sup> Naimiedi siño. Naimiedi mareuidimie. Cue facaina eo mare rafuena finode.

<sup>50</sup> Naimiena ñnotinona jaca duenaite. Cai jaiagaina jaca duenaite. Caina birui jaca duenaite. Ua nana naimiena ñnotinona duenaite.

<sup>51</sup> Diga siño rafuena finoite. Abi iedotino comeciái facajacinona llucacitaite.

<sup>52</sup> Naimiedi illaicominina oni dotaite; ia jamai bue isoidinona jamai bue isoiñedinona itataite.

<sup>53</sup> Dueredinona eo canoite; ia duenidinomo buena fecañeite.

<sup>54</sup> Duenailamona, cai Israel cominina feitañeite.

<sup>55</sup> Cai jaiagaimo naimie jaie llua isoi, birui caina canoite.

Abraham micorimo jaie llote: “Ona duenaiticue. O cominina jaca duenaiticue”

María llote. <sup>56</sup> Elisabet diga davui amani naiñaiño fiebide. Ie mei ie jofomo abido jaide.

#### *Zacarías jito jeicia rafue*

<sup>57</sup> Elisabet jocularui jai ridemo, ñmana jocode. <sup>58</sup> Naiñaiño ecimo ite comini, naiñaiño comini diga, iena fidiamona, cai Nama naiñaiñona eo duenailana uñnotimaci. Naiñaiño diga iobidimaci. <sup>59</sup> Ocho digarui jeicia mei, naimaci finouilla isoi, urue abina dia rafuemo bitimaci. Ie moo mamecina jitaacadimaci; <sup>60</sup> iadedi Elisabet llote:

—Dama ite. Jitaiñedicue. Naimie mamecidi Juan cai jitalle.

<sup>61</sup> Uai otimaci:

—¿Bue ñellena iese raitio? O cominimona jaca bu Juan mameciredimiena iñede.

<sup>62</sup> Jefona cacaiñena jira Zacaríamo onolli diga jicanotimaci, ie jito mamecina jitallena.

<sup>63</sup> Onolli diga Zacarías fairiuano, rabena jicade. Cuete: “Naimie mamecidi Juan”. Ieri rajjicaidimaci. “¿Bue ñelle iena jítade?” comeciaina facadimaci. <sup>64</sup> Ieconi Zacarías jai dane ñaite. Ie jira Jusiñamuimo iobillacino fecade. <sup>65</sup> Nana iaiaiaia ecimo itino rajjicaidimaci.

—Jusiñamui muidona naie rafue suide —llotimaci. Bie rafuena fidiano, nana Judea railla aneduamo itinodi iena ñaioidimaci. <sup>66</sup> Iena cacajano, comeciaina facadimaci: “Bimie jamai bue isoiñeitimiena jaite”. Cai Nama naimiena marena jaca canua jira, iese llotimaci.

#### *Zacarías Jusiñamuimo iobillacinona fecaja rafue*

<sup>67</sup> Ie facaise Jusiñamui Joreño Zacaríana llotatajanona, Zacarías llote:

<sup>68</sup> Cai Nama Jusiñamuidi mare.

Cai Israel comini dine biite, caina jilloitallena.

<sup>69</sup> David micori Jusiñamuina jaie sedade.

David micori cominimona siño jilloitaraímana cai dine oretaita.

<sup>70</sup> Ie facaina llorainido naimie jaie llua isoi, cai jilloitaraímana oretaita,

<sup>71</sup> Taifemona, Janabamona cai jilloillena.

<sup>72-73</sup> Cai usumatia micoriaimo: “Omoína duenaiticue” llote.

Cai usuma Abraham micorimo jaie llogacinona feitañede.

<sup>74-75</sup> Tai femona cai jilloillena, cai jilloitaraimana oretaite.

Nana cai ille dinori Jusiñamuina jaciruiñeno sedajana jitaide.

Naimie jitailla isoi cai illena, naimie jitaillacinona cai finollena, cai jilloitaraimana oretaite.

<sup>76</sup> Cue jito, ona lloiticue. Jusiñamui ie lloraimana jaitio.

Cai Nama uicomo jaitio, comini comeciai o raise finollena.

<sup>77</sup> Ie cominimo jeacinomona jilluacinona lloitio.

Iena naimaci ñnoia, Jusiñamui naimaci jeacinona feitaite.

<sup>78-79</sup> Jeacino anamo jai cai illa jira, jitiredinomo iticai isoidicai.

Jusiñamuina cai ñia ñnoñenia, fiodaillana jaciruiticai.

Naimie caina duenaillamona, cai jilloitaraima billena o llofuellena, ona oretaite.

Naimiena cai ñnoia, jitiredinomo iñeiticai; ia Jusiñamui diga cai comeciai uri iite.

<sup>80</sup> Zacarías jito sairide. Jusiñamuina ñnocana jaide. Cominimo naimie ñia marefodo lloñenia, jofue iñenanomo ite.

## 2

### *Jesús jeicia rafue*

(Mt 1.18-25)

<sup>1-2</sup> Jesús jeicia facaise César Augusto anamo ailluena nairaijai ite. Romamona naimacina sedauide. Naie facaise Siria railla enirue gobernadori Cirenio. César Augusto, ñie ñiese comini naga nairaimo illana naimie uiñollena, nana comini mameciai cuellena ocuide. Jaca bu iese jaie ñinoñede. <sup>3</sup> Naimaci jaiagai illanomo mameciai cuiana ocuide. <sup>4</sup> Ie jira José Galileamona Nazaretmona jaide. Judeamo Belémo jaide. David micori cominimo naimie jainaijailla jira, David micori illanomo jaide. <sup>5</sup> Ie ai María diga jaide. Naiñaiño fena jai eo aillue. <sup>6-7</sup> Belémo iaimaijai rillanona, naie facaise comini jofomo inillino iñena jira, jurareta jofomo ridiaimaia. Nainomo ie doforato jito jeicite. Jocua mei, iniroina naimiena ferinote. Ie jito inillena, jurareta ecaranomo naimiena jonete.

### *Jusiñamui jaienisaí toica llaudaíai sedaraini dine jailla rafue*

<sup>8</sup> Jesús jeicia facaise naie ñaio Belén ecimo ite pastomo damierie toica llaudaiaina sedaraini itimaci. Naimaci toinaiaina sedadimaci. <sup>9</sup> Ieconí cai Nama Jusiñamuimona daje jaienici naimacimo ebena bairede. Jusiñamui ie siño uai diga naimacina quetiñote. Jacinaitimaci. <sup>10</sup> Jaienici llote:

—Jacinañeno. Mare rafue lloiacadicue. Nana cominina iobitallena, iena lloiacadicue.

<sup>11</sup> David micori illanomo damie como jeiciga. Jusiñamui facaina lloraini micoriai naimie billena jaie llouidimaci. Naimiedi Cristo cai Nama. Naimie omoi jilloitaraima. Jeacinomona omoina jillotaite. <sup>12</sup> Naimiena ciua mei, iniroina ferinoga urue jurareta jofomo imaci ecaranomo baitomoi. Iemona cue lluaana uanaicinona uiñoitomoi —llote.

<sup>13</sup> Ie facaise naie jaienici dine ailluena jaienisaí bitimaci. Jusiñamuimo iobillacinona fecajano rotimaci:

<sup>14</sup> Monamo Jusiñamui illanona, naimiemo iobillacinona fecacadicai.

Cominina naimie duenaillamona, naimie diga uri iitimaci rotimaci. Ie mei abido jaidimaci.

<sup>15</sup> Monamo jaienisaí jailla mei, toica llaudaíai sedaraini coniniri ñaitimaci:

—Belémo mai cai jailli, cai Nama caimo como lloga rafuena cai jibuisaillena.

<sup>16</sup> Ieconí raire jaidimaci. María José diga baitimaci. Iaimaijai urue jurareta ecaranomo biillana cioidimaci. <sup>17</sup> Naimiena ciua mei, nana naimacimo jaienici lloga rafuena llotimaci.

<sup>18</sup> Nana naie rafuena cacadinodi ieri rajicaidimaci. <sup>19-20</sup> Iaimaijai uruena ciua mei, llaudaíai sedaraini imaci toinaíai dine abido jaidimaci. Naimacimo jaienici llua isoi naimacimo suilla jira, iobidimaci. Nana naimaci cacaja rafueri, nana naimaci ciua rafueri Jusiñamuimo iobillacinona fecadimaci. María naie rafuena feitañede; ia iena comecina facauide.

### *Jerusalémo Jusiñamui jofomo Jesúna iaimaijai uilla rafue*

<sup>21</sup> Ocho digarui illanona, naie urue abina dete. Ie ei jeraimo naimie ñia comuiñenia, Jusiñamui jaienici naimie lloga mamecina jitade. Jusiñamui jaienici llua isoi, Jesúna ie mamecina jitade.

<sup>22-24</sup> Moisés micori jaie llua isoi Jerusalémo Jesúna uitiaimaia. Moisés micori jaie cuete: “Cuarenta digarui jocua mei, Jusiñamuimona riño marena illena, Jusiñamuimo mena ficiri naiñaiño fecaja. Jusiñamui diga ñairaima iena faja mei, riño facaina Jusiñamuimo jobaica”. Jiai cuete: “Naga nano doforamiedi Jusiñamui ie. Ie muidona naimie facaina Jusiñamuimo ucubena fecaja”. Ie muidona Jerusalémo Jesús diga jaidiaimaia.

<sup>25</sup> Naie facaise Jerusalémo Simeón raillamie ite. Jusiñamuimona naimiedi mareuidimie. Jusiñamuina eo ñnocana jaide. Naimie cominina Cristo jilloitallena, Cristo billemo ocuiride.

Naie facaise Jusiñamui Joreño anamo naimie ite. <sup>26</sup> Iemona Jusiñamui Joreñodi, naimiena Cristona ciöllena, navui uicodo uñotade. O nia fiodiañenia, Cristona cioitio raillanona llote. <sup>27</sup> Jusiñamui jofomo Jusiñamui Joreño naimiena oretate. Jusiñamuimo Jesúsna fecallena, Jesús ei, José diga, Jesúsna fo uillana Simeón ciode. <sup>28</sup> Naimaci dine jaillanona, Jesúsna meniñote. Jusiñamuimo iobillacinona fecajano jüde:

<sup>29</sup> Nama, o anamo iticue.

Cuomo o lloga uai jai suilla jira, uri fiodiaitcúe.

<sup>30</sup> O oretaga jilloitaraímana jai ciodicúe.

<sup>31</sup> Naimiena oredío, nana comini jilloillena.

<sup>32</sup> Naimiedi judíuafiñedinona uanaicinona uñotaite.

O cominina iobitaite

jüde. <sup>33</sup> Iena cacajamona, iaímaiai jitona lloga uairi rajicaidiaímaiai. <sup>34-35</sup> Simeón iaímaiaimo caimaredecinona llote:

—Jusiñamui omoína raise canoite —llote.

Maríamo llote:

—Ero, ie rafuena lloillena, Jusiñamui o jitona jai fetode. Naimie illamona, comini comeciaina facajacinona uñotaite. Naimiemo suille rafuemona o comeci sure iite. Cai cominimona ailluena naimiena jitaíñeitimaci. Ailluena jitaítimaci.

<sup>36</sup> Nairuido Jusiñamui jofomo Ana railla feciño ite. Jusiñamui naiñaiño mo lloga rafuena llouide. Naiñaiño moo Fanuel micori. Naiñaiño nairaidi Aser. Jitaíño facaisemona ie ini diga siete años illanona, naimie fiodaite. <sup>37</sup> Naiñaiño jai eo uaciño. Ochenta y cuatro años naiñaiñodi jai ite. Jusiñamui jofomo jaca isoide. Nagarui Jusiñamuimo jianona guicabiñeno naimiena sedauide.

<sup>38</sup> Simeón ñaiana cacajano, naiñaiño Jesús comini dine billano, Jusiñamuimo iobillacinona fecade. Naimie billemo naimaci ocurilla jira, naiñaiño naimaci jilloitaraímana nainomo itinomo llocana uite.

#### *Nazaretmo abido naimaci jailla rafue*

<sup>39</sup> Moisés micori lloga uai naimaci fuidua mei, Jesúsna uillanona, Galileamo Nazaretmo naimaci illanomo abido jaidiaímaiai. <sup>40</sup> Nainomo Jesús sairicana mairicana jaide. Eo abina uñote. Naimieri iobillamona, Jusiñamui naimiena canouide.

#### *Jerusalémo Jusiñamui jofomo Jesús illa rafue*

<sup>41</sup> Naga año Jerusalémo pascua railla rafue dine Jesús moo iaímaiai jaisoidiaímaiai. Egiptomona naimaci jaiagai jillobillana comecillena, naie rafue ite. <sup>42</sup> Naimiemo doce años illa facaise Jerusalémo iaímaiai jaisoilla isoi, jaidiaímaiai. Naimie doce años illa jira, Jesúsna uitaímaiai. <sup>43-44</sup> Rafue fuilla mei, abido bitiaímaiai. Ailluena comini jai billa jira, Jesús billana raise uñofediaímaiai. “Cai comini diga naimie bite” raillanona comecina facadiaímaiai; ia Jesús Jerusalémo fiebide. Darui raifi billa mei, iaímaiai cominimo naimiena eo jenodiaímaiai. <sup>45</sup> Baiñena jira, inia mei, Jerusalémo darui jaillanona, abido jaidiaímaiai. <sup>46</sup> Ie are Jusiñamui jofomo naimiena baitiaímaiai. Moisés micori llogacinona llofueraíni motomo naimie ite. Naimaci llofuiana cacade. Iena naimaci diga jiai siadote. <sup>47</sup> Nana cacadino naimie uñogacínori rajicaidimaci. Naimie raise siadogacínori jiai rajicaidimaci. <sup>48</sup> Naimiena iaímaiai baia, rajicaidiaímaiai. Ie ei naimiemo jcanote:

—¿Bue ñellena cocona duere finodio? O moocama diga ona eo duere jenodicoco.

<sup>49</sup> Naimie uai ote:

—¿Bue ñellena cuena duere jenodomico? Cue Moo jofomo naimie rafuena finodicue. ¿Niese bene cue illana uñofedomico?

<sup>50</sup> Naimie lluna raise cacafiñediaímaiai. <sup>51</sup> Iemei iaímaiai diga Nazaretmo naimie abido jaide. Iaímaiai uai iñuanona, iaímaiai anamo ite. Ie ei María nana naie rafue ie comecimo facauide. <sup>52</sup> Naimie sairicana abina uñocana jaide. Jusiñamui naimieri iobide. Comini dinena naimiena jiai gaidimaci.

## 3

#### *Jofue iñenanomo Juan Bautista micori illa rafue*

(Mt 3.1-12; Mr 1.1-8; Jn 1.19-28)

<sup>1-2</sup> Jofue iñenanomo diga años Juan illanona, Jusiñamuimona ie uaina feiñote. Naimiedi Zacarías jito. Naie facaiseconi Romamo quince años Tiberio César di nanoca illaímana jai ite. Judea railla enirue gobernador di Poncio Pilato. Galilea railla enirue gobernador di Herodes. Naimie amadi Felipe. Iturea railla enirue, Traconite railla enirue diga, gobernador di Felipe. Abilinia railla enirue gobernador di Lisaniás. Jusiñamui diga nanoca ñairaima iaímaiaidi Anás, Caifás diga. <sup>3</sup> Jusiñamui llua jira, nana Jordán fuemo ite comini dine Juan llofuecana jaide. Llote:

—Omoi jeacinona fainonocaida, Jusiñamui dibeimo omoi comeciaí uai meido. Iemona Jusiñamui omoi jeacinona feitaite. Omoi comeci uai omoi meidoia, comini iena uifollena, mai omoi bautizallomoi.

<sup>4</sup> Isaías micorí ie rabemo naimiēna jaie cuete:

Jofue iñenanomo damie jidai-jidaillana cacadicue.

Naimie llote: “Cai Nama biite. Naimie jaillino atona fino.

<sup>5</sup> Nana iconi oruita.

Naga aneduai diese eniruena judai.

Neicairuai joidē nasona atona fino.

Naimo itaicuai illa diese eniruena oruita, daje facai illena.

<sup>6</sup> Nana comini Jusiñamui naimacina jillotaiacanana uifoitimaci”

cuete; ia naimaci comeciaina ñaite. Cai Namana iñuana ñaite. Abina iedoñenana ñaite. Jeacino finocana jaiñenana ñaite. Cai Nama Jesús dia, Jesús uaina naimaci feifollena, naimaci comeciā marena finuana ñaite.

<sup>7</sup> Naimacina bautizallena, ailluena comini naimie dine bitimaci. Naimacimo llouide:

—Maraiñede rafuena finocana omoi jailla jira, jaio nairai isoidomoi. ¿Ñiese jilloitomoi? Cue dine omoi billena, ¿bu omoimo lloga? <sup>8</sup> Omoi comeciā uai illai meido. Omoi jeacinona fainonocai. Iemona Jusiñamui jitaillacinona fino. Mare rafuena finocana jai. Naiemona omoi comeciā uai illai meidua uifoiticai. Ie mei bautizallomoi. Omoi comeciaina facañeno: “¿Bue ñellena o llua isoi finoiticai? Jusiñamui Abraham micorina jaie eo raise nabaide. Abraham micorí cai moo illamona, Jusiñamui riicaillifuemona jilloiticai”. Ero, omoimo lloiticue: Cue llua isoi omoi finoñenia, naimie riicaillifuemona jilloñeitomoi. Abraham micorí uruiadomoi; iadedi Jusiñamui jitaillacinodo jaiacaiñedomoi. Naimie jitaia, naimie jitaillacinona naimaci finollena, bene ite noficinona naimiedi Abraham micorí facaina uruiaina comuitarede. <sup>9</sup> Ero, lliñede riana tiedomoi. Tia mei, maraiñena jira, iena jobaidomoi. Ie isoidomoi. Omoi maraiñena jira, Jusiñamui omoina jai duere finoacade. Ie riicaillafue anamo jai itomoi. Omoi comeciā uai omoi meidoñenia, omoina duere finoite.

<sup>10</sup> Iena cacajanona, comini dinena naimiemo jicanotimaci:

—Cai bautizaja mei, ¿ñiese iiticai? ¿Ñie isoide mare rafuena finoiticai?

<sup>11</sup> Juan uai ote:

—Ailluena iniroredimiedi iniroinidimiemō iniroina feca. Guilleredimiedi guillenidimiemō guillena feca.

<sup>12</sup> Naimacina bautizallena, gobierno ucubena oraini jiai bitimaci. Jicanotimaci:

—Llofueraima, cai bautizaja mei, ¿ñiese iiticai? ¿Ñie isoide mare rafuena finoiticai?

<sup>13</sup> Uai ote:

—Gobierno facaina omoi ibataia, cominimona gobierno llua baifemo oñeno.

<sup>14</sup> Naimie dine billanona, soldaduai jicanotimaci:

—Cai bautizaja mei, ¿ñiese iiticai? ¿Ñie isoide mare rafuena finoiticai?

Uai ote:

—Cominimona rana bairoñeno. Riicinodo rana oñeno. Tainona llogiduamona, cominimona rana oñeno. Omoi ucube illa diese feiño. Ie baifemo ucubena nicidoñeno.

<sup>15</sup> Juan llofuamona naie facaise cominidi Cristo billemo ocurilla jira, “Juandi nibai Cristo” raillanona, Juanmo comeciaina facauidimaci. <sup>16</sup> Iena fidiano, Juan llote:

—Cristoñedicue. Jusiñamui dibeimo omoi illamona, jinui diga omoina bautizadicue. Cai baifemo faitimie bie facaise biite. Naimie cue ifomo meidoite. Jamai bue cue isoilla jira, naimiēna cue canuana uifoñedicue. Naimiemo omoi duia, naimiedi Jusiñamui Joreño omoimo itataite. Omoi comeciā uai omoi meidoñenia, omoina duere finoite. <sup>17</sup> Trigona omoi betaia, mare trigona eenotomoi. Maraiñede ra oni dotajanona, iena jobaitomoi. Ie isoide. Naimie rafuena lluanona, naimiedi comeciā uai illai meidotinona ie Moo illanomo ofitaite; iadedi jiaie cominina duere finoite. Iraimo dotaite. Naie irai jaca duñede —llote.

<sup>18</sup> Bie isoidicinodo cominimo ie mare rafuena llofueuide. <sup>19</sup> Naie facaiseconi Herodedi gobernador. Ie ama ai ote, ie aina illena. Naiñaiñodi Herodías. Diga jiaie mariñede rafuena finode. Ie muidona Juan naimiēna lletade. <sup>20</sup> Maraiñede rafuena Herodes finocana jaillamona, Juan cárcelmo jonetade.

*Juandi Jesúna bautizaja rafue  
(Mt 3.13-17; Mr 1.9-11)*

<sup>21</sup> Ailluena cominina Juan bautizaja facaise, Jesúna jiai bautizade. Bautizaja mei, Jesúsdi ie Moo diga ñaianona, mona bojode. <sup>22</sup> Ieconí Jusiñamui Joreño ucugina eruailano, naimie emodomo ana bite. Monamona Jusiñamui llote:

—Cue isiruiga jitodio. Ori iobidicue.



*Jesucristo ie usumatiai*  
(Mt 1.1-17)

<sup>23</sup> Jesús treinta años illamona, Jesús ie maijille rafue tainede. “Naimiedi José micori jito” raillano naimiemo cominidi comeciaina facadimaci. Josédi Eli micori jito. <sup>24</sup> Elídi micori Matat micori jito. Matat micori Leví micori jito. Leví micori Melqui micori jito. Melqui micori Jana micori jito. Jana micori José micori jito. <sup>25</sup> José micori Matatías micori jito. Matatías micori Amós micori jito. Amós micori Nahum micori jito. Nahum micori Esli micori jito. Esli micori Nagai micori jito. <sup>26</sup> Nagai micori Maat micori jito. Maat micori Matatías micori jito. Matatías micori Semei micori jito. Semei micori José micori jito. José micori Judá micori jito. <sup>27</sup> Judá micori Joana micori jito. Joana micori Resa micori jito. Resa micori Zorobabel micori jito. Zorobabel micori Salatiel micori jito. Salatiel micori Neri micori jito. <sup>28</sup> Neri micori Melqui micori jito. Melqui micori Adi micori jito. Adi micori Cosam micori jito. Cosam micori Elmodam micori jito. Elmodam micori Er micori jito. <sup>29</sup> Er micori Josué micori jito. Josué micori Eliezer micori jito. Eliezer micori Jorim micori jito. Jorim micori Matat micori jito. Matat micori Leví micori jito. <sup>30</sup> Leví micori Simeón micori jito. Simeón micori Judá micori jito. Judá micori José micori jito. José micori Jonam micori jito. Jonam micori Eliaquim micori jito. <sup>31</sup> Eliaquim micori Melea micori jito. Melea micori Mainán micori jito. Mainán micori Fares micori jito. Fares micori Natán micori jito. Natán micori David micori jito. <sup>32</sup> David micori Isaí micori jito. Isaí micori Obed micori jito. Obed micori Booz micori jito. Booz micori Salmón micori jito. Salmón micori Naasón micori jito. <sup>33</sup> Naasón micori Aminadab micori jito. Aminadab micori Aram micori jito. Aram micori Esrom micori jito. Esrom micori Judá micori jito. <sup>34</sup> Judá micori Jacob micori jito. Jacob micori Isaac micori jito. Isaac micori Abraham micori jito. Abraham micori Taré micori jito. Taré micori Nacor micori jito. <sup>35</sup> Nacor micori Serug micori jito. Serug micori Ragau micori jito. Ragau micori Peleg micori jito. Peleg micori Heber micori jito. Heber micori Sala micori jito. <sup>36</sup> Sala micori Cainán micori jito. Cainán micori Arfaxad micori jito. Arfaxad micori Sem micori jito. Sem micori Noé micori jito. Noé micori Lamec micori jito. <sup>37</sup> Lamec micori Matusalén micori jito. Matusalén micori Enoc micori jito. Enoc micori Jared micori jito. Jared micori Mahalaleel micori jito. Mahalaleel micori Cainán micori jito. <sup>38</sup> Cainán micori Enós micori jito. Enós micori Set micori jito. Set micori Adán micori jito. Adándi Jusiñamui comuitagamie.

## 4

*Taife ramo Jesús faia rafue*  
(Mt 4.1-11; Mr 1.12-13)

<sup>1</sup> Jusiñamui Joreño anamo Jesús illamona, Jordán railla illemona Jesús jaillano, jofue iñenanomo Jusiñamui Joreño naimiema orede. <sup>2</sup> Nainomo cuarenta digarui Taifedi naimiema ramo faite. Naie facaiseconi Jesús jaca guiñede. Naie facaise fuilla mei, guiñeno illamona, naimie aimetaite. <sup>3</sup> Jesús aimetaillana Taife uiñuamona, naimiemo llote:

—Jusiñamui Jitodiódona, naimiemo llono: “Ore Moo, bie noficina llomeniconajaita”.

<sup>4</sup> Jesús uai ote:

—Iena lloñeiticue. Jusiñamui facaina lloraima micori iena jaie cuega: “Jiaie rafuedi llomenico guilla baifemo faite”.

<sup>5</sup> Ie mei a ite anedumo Taife Jesúna uillano, dallu illanona, naimiemo nana nairaiaina acatate. <sup>6-7</sup> Llote:

—Nana bie nairaiái cue anamo ite. Iena cue iacagamie mo itataredicue. Cuena o sedajamona, iobillacinona cuemo o fecaia, nana bie nairaiái omo fecaiticue. Bie nairaiái illaimana jaitio.

<sup>8</sup> Jesús uai ote:

—Dama ite. Ona sedañeiticue. Moisés micori jaie cuega: “Cai Nama Jusiñamuina seda. Dama naimiemo iobillacinona feca”.

<sup>9</sup> Ie mei Jerusalémo Jusiñamui jofo muidomo Taife Jesúna uite. Raite:

—Jusiñamui Jitodiódona, eniruemo mai ana uai. <sup>10-11</sup> David micori ona jaie cuega: Ona eenollena Jusiñamuidi ie jaienisaimo lloite.

Eniruemo o uaiñellena, o abi bofedaiñellena, ona feiñoitimaci

cuega. Naimie lloga uai suillena, bie jofo muidomona mai ana uai. Naimie ie lloga uaina finorede; ia iena cue uiñollena, mai ana uai.

<sup>12</sup> Jesús uai ote:

—Dama ite. Ana uaiñeiticue. Ero, ie cominimo Moisés micori jaie cuega: “Cai Nama Jusiñamuina facaciñeno”. Naimie cuena raise eenuana jai uiñoiticue. Jamai ebena naimiema facaciñeiticue. O lluaña finoñeiticue.

<sup>13</sup> Taife naimiena ramo faia mei, naimiemona ie jitaile dinori oni jaide.

*Galileamo Jesús ie rafue lolle jillaci*  
(Mt 4.12-17; Mr 1.14-15)

<sup>14</sup> Jusiñamui Joreño naimiemo illamona, Galileamo Jesús abido jaide. Nana naie eniruemo naimie mameci soride. <sup>15</sup> Ailluena judúai ofiracuaimo naimie llofueuide. Iena cacajanona, comini: “Naimie llofuiacino mare” raitimaci.

*Nazaretmo Jesús illa rafue*  
(Mt 13.53-58; Mr 6.1-6)

<sup>16</sup> Macarillamona, Nazaretmo naimie jaide. Navui nainomo naimiedi sairide. Naimie jaisoilla isoi, sábadomo nainomo ite ofiracomo jaide. Jaie cuegafuiaina ado facallena, naimie a naidadate. <sup>17</sup> Naie lloraco nama mullaimadi Isaias micori jaie cuegafuiái jai ferinoga rabe naimiemo fecade. Iena oni suiñoacada, bie rafuena baillanona facade:

<sup>18-19</sup> Jusiñamui Joreño cuemo ite.

Dueredinomo mare rafuena lollena, cuena fetode.

Taife anamo ailluena comini illa jira, Jusiñamui naimacina jillotaiacana uiñoñedimaci.

Jusiñamui rafuena ailluena comini uiñoñena jira, naimie illanomo rillena uiñoñedimaci.

Jeacino anamo naimaci illa jira, Jusiñamui naimacina jillotaiacana uiñoñedimaci.

Naimie naimacina duenailana birui uiñuana jitaide.

Naimacimo mare rafue lollena, cuena jai oretate.

<sup>20</sup> Naie rafue facaja fuillamona, cuegafuiái abido fecade. Naimacina llofuellena, dane ana raide. Nana nainomo ite comini naimiemo eo eruaidimaci. <sup>21</sup> Iemei naimie naimacina llofueite. Raite:

—Omoi como cacaja cuegafuiái omoi motomo jai suide. Cuena ñaite.

<sup>22</sup> Naimie luana comini cacajano, coninina raitimaci:

—Naimie fue mare. Naimie marena llofueite. —Iemona rajicailamona, coniniri raitimaci—, Naimiedi jamai José jito. ¿Niese naie rafue birui suide?

<sup>23</sup> Iena uiñuamona, Jesús dinena llote:

—Cue lluana ñinoñedomoi. Comeciaina facadomoi: “Capernaumo naimie siño finoca rafuena fididicai. Siño rafuena cai motomo naimie jiaí finoia, naimiena ñinoitici. ‘Ua médico duia, ie abina dama jillotarede’ cai einamací raisoidimaci. Ie isoide. Naimie llua isoi naimie ia, siño rafue cai motomo finorede” comeciaina facadomoi. <sup>24</sup> Uanaicinona omoimo lloiticue. Naimie comini nairaímo Jusiñamui facaina lloraima ia, ie comini naimie uaina feiñoiacasiñede. Iena jamaisite. Ie isoide. Cue nairaímo cue illa jira, cue uaina ñinoñedomoi. <sup>25</sup> Jaie ie isoide. Elías facaiseconi daje amani años abimo atomonado noci deñede. Aime guitimaci. Naie facaiseconi bie eniruemo cai comini dine ailluena feciñuái itimaci; iadedi omoi jaiagai Jusiñamui uaina ñinoñedimaci. <sup>26</sup> Jusiñamuidi Eliana cai comini dine oreñede; iadedi jiaie eniruemo ite feciño dine naimiena orede. Sarepta railla nairaímo orede. Sidón railla eniruemo naie nairaí ite. Cai cominiñede feciñomo orede. <sup>27</sup> Jiaie rafuena lloiticue. Eliseo micoridi Jusiñamui facaina jaie llote. Eliseo micori facaiseconi bie eniruemo diga efonaitino ite; iadedi naimacimona Jusiñamui buna jillotañede. Omoi jaiagai Jusiñamui uaina ñinoñena jira, Eliseo micori duidinona jillotañede. Naie facaiseconi dama Naamán micorina jillotate. Cai cominimo naimie duiñede; ia Siria railla eniruemo duide. Ie isoidomoi. Cue uaina ñinoiacasiñedomoi —llote.

<sup>28</sup> Jesús lluana cacajano, naie ofiracomo itino eo iciritimaci. <sup>29</sup> Naidacaillano, naimiena jino uitimaci. Naie illanodi iconimo ite. Nainomo naimiena uillanona, iconimona naimiena ana dotaacadimaci. <sup>30</sup> Naimiena meineiacadimaci; iadedi naimaci motomo naimie jailanona, naimacimona naimie jillobillano oni jaide.

*Jesúdi Janaba anamo itimie jillotaja rafue*  
(Mr 1.21-28)

<sup>31</sup> Jesús Capernaumo jaide, Galilea railla eniruemo ite. Nainomo naimie ia, sábadoruimo judúai ofiracomo jaide. Nainomo llofueite. <sup>32</sup> Illaíma uai isoi naimie llofuiá jira, nainomo ite comini naimie llofuiamona rajicaidimaci. <sup>33</sup> Janaba anamo illamie nainomo ite. Jesús llofuiana cacaíta, Janabadi ñimana ado cuirioitate:

<sup>34</sup> —Odi Nazaret ie Jesús. ¿Bue ñeiacadio cai diga? Caina duere finuaibidio. Ona uiñoticue. Odi Jusiñamui ie Mare Fetocamiedio.

<sup>35</sup> Jesús naimiena lletade:

—Lliicai. Naimiemona oni jai. —Iena cacajanona, naimaci motomo Janaba ñimana ana dotade; ia naimiedi bofedaiñede. Ie mei Janaba naimiemona oni jaide. <sup>36</sup> Iena ciuanona, nana nainomo itino rajicaidimaci. Coniniri siadotimaci:

—¿Nie isoide Jesús uai? Janabamo naimie llua mei, ñimamona Janabadi oni jaide.

<sup>37</sup> Jesús finoca rafue muidona, naimie mamecidi nana naie eniruemmo soride.

*Jesúdi Simón Pedro jifaiña jillotaja rafue*  
(Mt 8.14-15; Mr 1.29-31)

<sup>38</sup> Ofiracomona Jesús jaillanona, Simón Pedro jofomo jaide. Ie facaise Simón jifaiño duide. Abina cuaride. Naiñaña jilloitallena, nainomo itino Jesúmo jicante. <sup>39</sup> Naiñaña dine Jesús jaillanona, ie uai luuamona, naie duicodi oni jaide. Teconi naiñaña jillode. Abi cuarñede. Naidacailanona, guille finuanona, ie jofomo itinona ecade.

*Jesúdi ailluena duidinona jillotaja rafue*  
(Mt 8.16-17; Mr 1.32-34)

<sup>40</sup> Nairuido jítoma ana itemo, comini ailluena duidinona Jesús dine atidimaci. Diga duicuai illanona atidimaci. Naimacina jetajamona, naimacina jillotate. <sup>41</sup> Jananiaina jai oni oretajano, jananiai dinena raite:

—Odi Jusiñamui Jitodio. —Naimiēna naimaci uñua jira, Jesús naimaci ñaiāna rairuide. Naimiedi Jusiñamui Jitona uñoitimaci.

*Judeamo Jesús llofua rafue*  
(Mr 1.35-39)

<sup>42</sup> Ie areruido jítiramo jofue iñenanomo Jesús jaide; iadedi comini naimiēna jenuaidimaci. Baillanona, naimaci motomona naimie jaiñellena jicantimaci. <sup>43</sup> Naimacimo llote:

—Jiaie nairaimo cue mare rafuena lloiacadicue. Naimie anamo comini illana Jusiñamui jitailla jira, naimacimo iena lloiacadicue. Ie mare rafuena lloillena, Jusiñamui cuena orede. Oni jaiticue. Omoi diga fiebiñeiticue.

<sup>44</sup> Ie mei Judeamo ite ofiracuaimo Jesús llocana jaide.

## 5

*Jesús muidona, naimaci ailluena lliciaina ua rafue*  
(Mt 4.18-22; Mr 1.16-20)

<sup>1</sup> Jairuido Genesaret railla jorai fuemo Jesús ia, ailluena comini naimie dine bitimaci. Ie rafue raise cacaillena, conini oni ñuicocana naimie ecimo bitimaci. <sup>2</sup> Ie facaise jorai fuemo Jesús mena sijide botena ciode. Naimaci lloijina naimaci jocua jira, naie botemo lloiji fairaini iñede. <sup>3</sup> Comini ie llofuiacinona raise cacaillena, Jesús daje botemo jaide. Naie bote namadi Simón Pedro. Naie bote joraimo janore bai ñuitallena Simómo jicante. Botemo ana raite, botemona cominina llofuede. <sup>4</sup> Llofua mei, Simómo llote:

—Aforedinomo jai. Nainomo omoi lloijina faino.

<sup>5</sup> Simón uai ote:

—Maestro, cue nabaiñai diga namona naio lloiji faiticai; iadedi jaca buena ofiedicai. ¿Niese ja oitica? Iadedi o llua jira, lloijina faiticue.

<sup>6</sup> Iena naimaci faia mei, ailluena lliciaina jitatimaci. Ie jira naimaci lloiji cuaranoiacade. <sup>7</sup> Iena ciuano, onolli diga imaci nabaiñai uaidote, naimiēna naimaci canollena. Naimaci canuaibilla mei, lliciaina naga bote oruitate. Eo oruilla jira, buiacade. <sup>8</sup> Iena ciuano, Simón Pedro Jesúmo iobillacino fecallena, caiñici ifodo rainadate. Raite:

—Odi siño Jitodio; ia cue jamaí bue isoilla jira, cuemona oni jai. Jecinona finoidimiedicue.

<sup>9</sup> Ailluena lliciaina naimaci ua jira, naimaci rajicaillamona, iena naimie llote. <sup>10</sup> Naimie nabaiñaimona Zebedeo jito iaímaiaí ite. Juan diga Jacobo iaímaiaí. Simómo Jesús llote:

—Cuenta jaciruiño. Lliciaina birui ocabitomoi; iadedi cue dibeimo naimaci illena, biruimona cominina oitomoi.

<sup>11</sup> Eniruemmo sijiano, naimaci raruiaí fainonocaida, Jesús diga jaidimaci.

*Jesúdi efonaitimienā jillotaja rafue*  
(Mt 8.1-4; Mr 1.40-45)

<sup>12</sup> Jairuido Jesúdi jiaie nairaimo ia, efonaitimie naimie dine bite. Naimie eo fodo jaide. Jesúna naimie ciuano, naimiēna raise uaiduamona, ana bitadate. Llote:

—Maestro, o jitaadedi, cuena jillotaredio.

<sup>13</sup> Jesús ie onolli oni ñuitajanona, naimiēna jetade. Raite:

—Ona jillotaiacadicue. Mai o jillo. —Ieconī jillode.

<sup>14</sup> Jesús naimiemo llote:

—Omo suide rafue jaca bumo lloñeno; iadedi Jerusalémo Jusiñamui jofomo Jusiñamui diga ñairaimamo o abina acatajai. O jillua jira, Jusiñamuimo Moisés micori jaie lloga rana feca lemona comini o jilluana uñoitimaci.

<sup>15</sup> Iese Jesús naimiemo llote; iadedi Jesús finoca rafue llocana eo uite. Ie muidona naimie lluaana cacaillena, duidinona Jesús jillotallena, ailluena comini naimie dine bitimaci. <sup>16</sup> Bitimaci; iadedi Jusiñamui diga ñaillena, jofue ifnenanomo Jesús jaide.

*Jesúdi tisitaitimiena jillotaja rafue*  
(Mt 9.1-8; Mr 2.1-12)

<sup>17</sup> Jiairuido naimie llofueia, diga comini naimie illa jofomo bitimaci. Fariseuai railla comini bitimaci. Moisés micori llogacinuaina llofueraini bitimaci. Galileamona diga nairaimona bitimaci. Judeamona bitimaci. Jerusalémona bitimaci. Jusiñamui uaido Jesús naimie dine bite duidinona jillotate. <sup>18</sup> Ie facaise ie biiramo biide tisitaitimiena Jesús dine damierie atidimaci; <sup>19</sup> iadedi naimaci uillifo iñena jira, ailluena comini illa jira, riñedimaci. Naie jofo bibanilla jira, jofo emodomo a jaidimaci. Jofo beicimo ite tidabacuido a jaidimaci. Jofo emodo econocaida ifodo naimiena ie biiramo biide diga, comini motomo Jesús ecimo ana ñuitadimaci. <sup>20</sup> Iena Jesús cianona, tisitaitimie jilluana naimaci inuana Jesús uiñote. Tisitaitimie mo llo:

—Jai, o jeacinona cue feitaja jira, iena oni jai dotadicue. Ie facai ibana jai oñeiticue.

<sup>21</sup> Nainomo itinomona Moisés micori llogacinona llofueraini itimaci. Fariseuai jiai itimaci. Comeciaina facadimaci: “Naimie Jusiñamuina jeare ñaite. Dama Jusiñamui jeacinona dotarede. Bimie Jusiñamuiñede; ia Jusiñamui ifomo iacade”. <sup>22</sup> Naimaci comeciaina Jusiñamui ñuana, naimacimo jicane:

—¿Bue ñellena omoi comeciaina iese facadomo? <sup>23</sup> Bimie mo: “O jeacinona jai oni dotadicue” cue lloia, cue uai siñonana uiñoñeitomoi; ia bimie mo: “Mai naidacaillanona macari” cue lloia, cue uai siñonana uiñoñeitomoi. <sup>24</sup> Monamona jaiie cue billanona, imana jaidicue. Ie jira jeacino oni dotaja uai cuemo ite. Iena omoi uiñollena, tisitaitimie mo lloiticue: “Mai naidacai. O biira ferianona, o jofomo mai jai”.

<sup>25</sup> Iese naimie raillamona, tisitaitimie jillode. Ieconí naimaci motomo naimie naidaide. Ie biira feriano, Jusiñamuimo iobillacino fecajano, ie jofomo jaide. <sup>26</sup> Nana naiena ciodino eo rajjicadimaci. Iemona Jusiñamuimo iobillacinona fecadimaci. Eo rajjicaillamona, raitimaci:

—Bie isoide siño comena jaca cioñedicaí.

*Jesúdi Levina fetua rafue*  
(Mt 9.9-13; Mr 2.13-17)

<sup>27</sup> Jesús jino macarillano, gobierno facaina ucube oraimana ciode. Naimie mameci Leví. Ie ucubena ouillanomo raide. Jesús naimiemo llo:

—Cue llofuegamiena o jaillena, cue diga bi.

<sup>28</sup> Naidacaida, Jesús diga jaillanona, ie maijiana fainonocai. <sup>29</sup> Nailli ie jofomo Leví aillue rafuena finode, Jesús iena. Diga ucube oraini guisaibitimaci. Diga jiaie comini jiai guisaibitimaci. Jesús diga danomo guitimaci. <sup>30</sup> Nainomo fariseuai cominidi, Moisés micori llogacino llofueraini diga, jamaí bitimaci. Jesúsna cianona, ie llofueoicaiganomo jicanotimaci:

—¿Bue ñelli ucube oraini diga guitomoi? Marañede comini diga guitomoi.

Moisés micori llogacinodo ucube oraini raise jaiñenamona, naie isoidino diga fariseuai comini nabairiñena jira, iese jicanotimaci. <sup>31</sup> Jesús iena cacajano, llo:

—Ecairedino médicono jitaiñedimaci; iadedi duidinodi médicono jitaídimaci. <sup>32</sup> Jusiñamui dibemo mareuidinona uaibñedicue; iadedi marañedinona uaibiticue.

*Jesúmo comini guiñenana jicanua rafue*  
(Mt 9.14-17; Mr 2.18-22)

<sup>33</sup> Naie facaise fariseuai dinena Jesúsno llo:

—Cai einamací llua isoi, Jusiñamuina cai raise iobitallena, guiñenaruillai illa facaiseconi guiñedicaí. Jusiñamuimo jicabidicaí. Cai jeacino facaina sunaibiticaí. Cai einamací rafuedo Juan Bautista llofueoicaigano jaidimaci. Cai llofuegano iedo jiai jaidimaci; iadedi o llofueoicaigano jaca guitimaci. ¿Bue ñellena cai einamací rafuedo jaiñedimaci?

<sup>34</sup> Jesús uai ote:

—Jiaie rafuedo iena lloiticue. Coniruedi ie aina uarui ia iobilla jira, ie nabaiñai sunañedimaci. Iobillamona guitimaci. <sup>35</sup> Jiairuido jai aireiacade conirue naimaci diga iñena, naimaci comeci sunaillamona, naimaci jitaie, guiñenaruillaidi iite. Ie isoide. Cue comini diga birui cue illa jira, iocire itimaci. Eco cue jaille mei, sunaitimaci. Ie muidona birui cue llofueoicaigano guicabitimaci. <sup>36</sup> Jiaie rafuedo iena lloiticue: Nia jocoñega comue iniroidi jacaie iniroimo jillifega. Jilliadi jocua mei, comue iniroi jacaie iniroimona fo llirite. Eo fodo cuararite. Jai marañeno cioite. <sup>37</sup> Jacagomona finoca bolsa como finoca vino joneñega. Jonegadana, mairiñena jira, sirillamona igoi raire cuararite. Vino faifite. Igoi jiai

faifite. <sup>38</sup> Como finoca vino comogomo jonelle. Iemei iena faifíñeite. <sup>39</sup> Navui finoca vino jirua mei: “Navui finoca vino nia mare” raillamona, como finoca vino buna jiroacaiñede. Ie isoide. Omoi einamací rafue ifomo jiaie rafue birui ite. Iena omoimo llocabiticue. Iedo jaidicai; ia omoi einamací rafuemo omoi fibilla jira, jiaie rafuedo birui jaiacaiñedomoi — llote.

## 6

*Sábadoruimo Jesús llofueoicaigano maijia rafue*  
(Mt 12.1-8; Mr 2.23-28)

<sup>1</sup> Jiairuido sábadoruimo Jesús, ie llofueoicaigano diga, trigo illa illi motodo joide naisona jaide. Ie llofueoicaigano trigona tijiano, golluano, guicana jaidimaci. <sup>2</sup> Dajerie fariseuai iena ciuano, llotimaci:

—Rairuica rana finosite. Moisés micorí rairuilla jira, sábadoruimo maijinidicai; iadedi trigona naimaci tijiamona, caimona jai maijidimaci. Caimona jeacinona jai finodimaci.

<sup>3</sup> Ie llofueoicaiganona riđuano, Jesús uai ote:

—Cuemona jeacino finoñedimaci. David micorí jiaie finoca rafuemo omoi comeciá raise facañedomoi. David micorí guille iñenia, naimie aimetaia, ie nabaiñiaí diga Jusiñamui jofomo fo jaide. <sup>4</sup> Jusiñamui fecaca llomeniconu uanona, guitimaci. Jamai bue isoidino naie llomeniconu guillana Jusiñamui rairuide. Dani Jusiñamui diga ñairaini iena guiredimaci. David micorí iena guite; ia Jusiñamui naimacina duere finoñede. <sup>5</sup> Monamona cue billamona, immana jaidicue. Ie jira sábadoruimo comini finolle rafuena rairuiredicue. Nairuimo finoñelle rafuena jiaí rairuiredicue. Ie jira nairuimo cue jitailla rafuena finoredicue.

*Jesúdi onollina idisarodimiena jillotaja rafue*  
(Mt 12.9-14; Mr 3.1-6)

<sup>6</sup> Jiaie sábadoruimo judíuai ofiracomo Jesús jaillanona, llofuede. Ie facaise nainomo nabellimo idisarodimie ite. <sup>7</sup> Moisés micorí llogacinona llofueraíni, fariseuai diga, Jesúmo eruaidimaci, sábadoruimo Jesús naimiena raabaca ie segoitai. Iena Jesús finoia, naimacimona sábadoruimo naimie jai maijia jira, naimiena llogidoiacadimaci. Naimacimona sábadoruimo bu maijia, jeacinona finode. <sup>8</sup> Naimaci comeciaina facajacinona Jesús uñuamona, onollina idisarodimie mo llote:

—Cue ecimo naidada. —Iemei Jesús ecimo naidadate.

<sup>9</sup> Jesús nainomo itinomo jicanote:

—¿Nie isoide rafue sábadoruimo finuadena mare? Bimie birui cue jillotaiadedi, birui mare rafuena finodicue. Cuená birui omoi meineiadedi, birui marañede rafue finodomoí. Sábadoruimo ¿nie isoide rafue finuana rairuidomoí?

<sup>10</sup> Naimacimo eruailanona, duidimie mo llote:

—O onolli mai oni ñuita. —Iena ñuitajanona jillode. <sup>11</sup> Nainomo itino iena ciuanona, eo iciritimaci.

—¿Niese Jesúna nibaiticai? —naimona coniniri siadotimaci.

*Jesúdi ie doce llofueoicaiganona fetua rafue*  
(Mt 10.1-4; Mr 3.13-19)

<sup>12</sup> Nairui aneduaimo Jesús jaide, Jusiñamui diga ñaillena. Namona naio jüde. <sup>13</sup> Monaidemo, ie llofueganona naimie dine uaidote. Naimacimona doce digamiena fetode. Naimie diga icabillena, naimacina naimie facaina llorainina naimaci jaillena, naimacina fetode. <sup>14</sup> Iese mameciredimaci: Simón; naimie mameci jiaicidi Jesús jitaca Pedrona. Andrés; naimiedi Pedro ama. Jacobo, Juan, Felipe, Bartolomé, <sup>15</sup> Mateo, Tomás, jiaie Jacobo; naimiedi Alfeo jito. Jiaie Simóna fetode. Naimiedi cananista comini facaisemo duide. <sup>16</sup> Judas; naimiedi Jacobo jito. Judas Iscariote micorí; naimiedi Jesúna gaitatimie.

*Jesúdi ailluena cominina llofuia rafue*  
(Mt 4.23-25)

<sup>17</sup> Aneduaimona siniaidinomo ie doce llofueoicaigano diga Jesús bite. Ie jiaie llofuegano naimie dine bitimaci. Ailluena jiaie comini bitimaci. Nana Judeamona bitimaci. Jerusalémona bitimaci. Tiromona bitimaci. Sidómoma bitimaci. Tiro monaillai fuemo ite. Sidón monaillai fuemo jiaí ite. Naimie llamo cacareillena bitimaci. Naimaci duicomona jiaí jilloiacadimaci. <sup>18</sup> Jananiaí anamo itinomona Jesús jananiaina oni orede. <sup>19</sup> Nana comini naimiena jetaacadimaci. Naimie mo siño uai illa jira, naimiena jetajamona, naimaci duicomona jillodimaci.

*Jesús lloga rafue*  
(Mt 5.1-12)

<sup>20</sup> Ie llofueganomo eruailanona, Jesús llote:

—Naimie anamo omoi jai illamona, Jusiñamui omoina sedaacana rafuena omoina llofueitícue. Naimiēna jitaídomoína, omoína sedaite. Comeciaina facadomoi: “Jusiñamui jitaillacinona daní finonidícaí; ia Jusiñamui caina canuamona, iena finoitícaí”. Naimie comíni omoi illamona, naimie omoína canoite. Iemona caimare iitomoi. <sup>21</sup> Naimie jitaillacino omoi finuamona, Jusiñamui omoína sedaite. Naimiedi mare rafuena omoi finuana canoite. Iemona caimare iitomoi. Omoi sunaia, Jusiñamui omoína sedaite. Ailluena comíni jeacino finocana jaidímaci. Iena uíñuamona, sunaitomoi. Naie isoidino omoi illamona, Jusiñamui omoi comeciaina ocuifíotaite. Iemona iocire iitomoi. <sup>22</sup> Cuemo omoi duia, duere sefuitomoi. Jiaie comíni omoína enoitímaci. Omoína oní dotaitímaci. Omoína jeare ñaitímaci. Cuemo omoi duilla jira, omoína jamaitímaci; ia Jusiñamui omoína caimare itataite. <sup>23</sup> Omoi isoi omoi jaiagaímona Jusiñamui facaina llorainí micoriaí jiaie duere sefuidímaci. Iena omoi uíñuamona, monamo Jusiñamuimona ailluena íbana ico omoi feiñua jira, birui omoi duere sefua, iocire omoi jai. <sup>24</sup> Iese iitomoi; ia Jusiñamuina jitaíñedino ico duere sefuitímaci. Comeciaina facadímaci: “Jusiñamuina jitaíñedícaí. Marena birui itícaí. Nana caí comecíai jitaillacino birui caímo ite”. Iese birui itímaci; ia Jusiñamui naimacina ico duere finoite. <sup>25</sup> Jusiñamuimona buena birui jitaíñedino ico duere sefuitímaci. “Nana caí comecíai jitailla rafue caímo birui illa jira, Jusiñamuimona buena jitaíñedícaí” raitímaci. Iese birui itímaci, ia Jusiñamui naimacina ico duere finuamona, buenitímaci. “Caí comecíaina iocire itatallena, Jusiñamuina jitaíñedícaí” damíerie birui raitímaci. Naimaci jeacino facaina sunaíñedímaci. Birui ite rafuena eburitímaci. Iese birui itímaci; ia Jusiñamui naimacina ico duere finuamona, sunaitímaci. Eeitímaci. <sup>26</sup> Naimacírí iobíllamona, omoi jaiagaídi Jusiñamui facaina llorainína abí caitadinona marena ñaitímaci. Damíerie birui daje isoidímaci. Jusiñamuina iobitaiacaiñedímaci; ia comínína iobitaiacadímaci. Iemona comíni naimacína marena ñaitímaci; ia Jusiñamui naimacina ico duere finoite.

*Jesúdi íba oñenana llua rafue*  
(Mt 5.38-48; 7.12)

<sup>27</sup> Jesús llote:

—Cue lluana cacajamona, iena íino. Finuamona omoína enoidinona isirui. Naimacina cano. <sup>28</sup> Omoi jeare ñaitinona marena ñaino. Omoína jeare finodino facaina Jusiñamuimo omoi jíi. <sup>29</sup> Omoi cacaina bu dutalade, íba oñeno; íadedí enefebeimo dobaida, enefebeimo jiaí dutallena. Omoi níroina bu bairoiacania, omoímo naimie nia jicañenia, naimie jitailla níroí baífemo naimiemo feca. <sup>30</sup> Omoímo ite rana bu jicaia, iena caidíñeno feca. Omoímona rana bu bairoia, iena abído jicañeno. <sup>31</sup> Jusiñamui jitaillacinona omoi finuamona, jiaie comínína marena fino. Jiaie comíni omoína finuana omoi jitailla isoi, naimacina fino. Naimaci omoína marena finuana omoi jitaia, naimacina marena fino. Naimaci omoína maraíñeno finuana omoi jitaia, naimacina íe isoi maraíñeno fino. O finoacaga ra isoi jiaie comínimo fino. <sup>32</sup> Naimie comínína omoi illamona, nana comíni daje isoi isirui. Omoína isiruitinona omoi isirua, mare; íadedí omoína gaíñenanona omoi isiruíñenia, Jusiñamui omoína: “Mare” raiñeite. Maraíñede rafuena finorainí naimacína isiruitinona isiruitímaci. Nana comínína omoi isiruíñenia, maraíñede rafuena finorainí baífemo faíñedomoi. Naimaci isoi itomoi. <sup>33</sup> Naimie comínína omoi illamona, nana comíni daje isoi cano. Omoína canodinona omoi canoia, mare; íadedí omoína canoñedinona omoi canoñenia, Jusiñamui omoína: “Mare” raiñeite. Maraíñede rafuena finorainí naimacína canodinona canodímaci. Nana comínína omoi canoñenia, maraíñede rafuena finorainí baífemo faíñedomoi. Naimaci isoi itomoi. <sup>34</sup> Naimie comínína omoi illamona, nana comínimo daje isoi rana feca. Omoímo ra fecadínomo rana omoi fecajia, mare; íadedí omoímo rana fecañedínomo rana omoi fecañenia, Jusiñamui omoína: “Mare” raiñeite. Maraíñede rafuena finorainí naimacímomo rana fecadínomo rana jiaí fecadímaci. Nana comínimo rana omoi fecañenia, maraíñede rafuena finorainí baífemo faíñedomoi. Naimaci isoi itomoi. <sup>35-36</sup> Omoína gaíñedinona isirui. Naimacímomo mare rafuena fino. Naimacímomo rana jamaí feca. Naimacímoma íba uamo ocuíríñeno; ía Jusiñamui omoi raise íbaite. Jusiñamui maraíñedinona canocabide. Naimieri iobíñedímaci; ía naimacína canocabide. Naimacína duenaicabite. Íe jira maraíñedinona omoi duenai. Naimie isoi omoi illamona, maraíñedinodí naimie comínína omoi íllana uíñoitímaci. Jusiñamuídí comínína duenailla isoi, comínína omoi jiaí duenai.

*Jesúdi jiaie comínína mameríñenana llua rafue*  
(Mt 7.1-5)

<sup>37</sup> Jesús llote:

—Duenaillacinona nia llofueiacadicue. Jiaie comínína mameríñeno. Jiaie comínína omoi mameria, omoímo ite maraíñede rafue facaina Jusiñamui omoína duere finoite. Omoímo maraíñede rafuena bu finoia, iena feita. Iena omoi feitañenia, Jusiñamui omoímo ite maraíñede rafuena feitañeite. <sup>38</sup> Jiaie rafuedo iena lloiticue. Rana omoi fecaia, iena raise

omoi gaieia, ico ibana omoi oia, raise gaiecana feiñoitomoí. Ie isoide. Jiaínomo maraiñede rafuena finoñeno; ia naimacina duenaillamona, naimacimo rana jamai feca. Iena raise feca. O fecaja diese Jusíñamuimona eo raise ibana feiñoitomoí.

<sup>39</sup> Naimacina iena nia llofuiamona, naimacimo Jesús jiaie rafuena llote:

—Cue cominina omoi illamona, bie rafuena cacarei. Uanaicinodo omoi jaiñenia, uisnidimie isoi itomoí. Uisnidimie jiaie uisnidimiena ifonide. Ifo iade, nagamaiaí dafomo uaidiaímaiaí. <sup>40</sup> Fueotimie ie llofueraíma baífemo uaiñede; iadedi naimie raise fueoia, ie lofueraíma isoi jaite. Raise fueollena, cue uaimo cacarei. <sup>41</sup> Omoi ecimo itimie mo janore maraiñedicino illana omoi uíñoia, iemo comechina facañeno; iadedi omoimo ailluena ite maraiñedicinomo nano omoi comechina faca. <sup>42</sup> Omoimo maraiñedicino illamona, ¿niese omoi ecimo itimiena mameritomoí? Omoimo ite maraiñedicinomo omoi comechina facacañena jira, maredinona abi caitadinodomoí. Omoi comechiána nano raise fino. Iemei omoi ecimo itimiena canorenitomoí. Naimie comechina raise canorenitomoí.

*Jesúdi ríara llisilla llilla llua rafue*

(Mt 7.17-20; 12.34-35)

<sup>43</sup> Jesús nia llofueite:

—Mare ríara maraiñede ríara isoi llisiñede. Maraiñede ríara mare ríara isoi jiaí llisiñede. <sup>44</sup> Llisillamona nie isoide ríara illana uíñoticai. Amena ie llisilla llillamona amena marena uíñoa. Llillamona, amena maraiñenana jiaí uíñoa. Eecuaimona uvas railla ríarana oñedícaí. Monaigimona higos railla ríarana jiaí oñedícaí. <sup>45</sup> Ie isoide. Naimaci comechiáimo iticinomona comini ñaitimaci. Mare comechi iticinomona maremiedi mare rafuena finocabide. Maraiñede comechi iticinomona maraiñedimie maraiñede rafuena finocabide.

*Jesúdi naimiena ñnuana ñaia rafue*

(Mt 7.24-27)

<sup>46</sup> Jesús nia llofueite:

—Omoimona damierie cuena: “Cai Nama” raitomoí; iadedi cue llogacinona finoñedomoí. <sup>47</sup> Diga comini cue ñine bitimaci. Cue uaina cacadimaci. <sup>48</sup> Cue uaina ñnotimie jofona raise finodimie isoide. Jofona raise finodimiedi ie jofona finodemo, jofona goiñellena, nofici illa ñinori eo ana raite. Noci deidemo, eo jinuidemo, jofomo ille toia, jofu raise finua jira, jofu goiñede. Iena faíñede. Ie isoide. Cue lluaña ñnotimie faíñeite. <sup>49</sup> Cue uaina ñnoñedimie jofona raise finoñedimie isoide. Jofona raise finoñedimiedi ie jofona finodemo, enirue emodomomo iena finode. Ana raíñede. Noci deidemo, eo jinuidemo, jofomo ille toia, jofu goillamona, jai eo judaisite. Iena faífide. Ie isoide. Cue lluaña ñnoñedimie faífite —llote.

## 7

*Jesúdi capitán mullaímana jillotaja rafue*

(Mt 8.5-13)

<sup>1</sup> Ie llua fuillamona, Jesús Capernaumo jaide. <sup>2</sup> Nainomo romanos railla nairáimo duide illaíma ite. Cien soldaduana sedauide. Naimiedi capitán. Judíñedimie. Ie mullaíma eo duide. Niade fiodaiacade. Capitán naimiena eo gaide. <sup>3</sup> Capernaumo Jesús illana capitán fidiano, Jesús ñine judíuai einamacina orede. Naimie ñine Jesús billena jitaide. Ie mullaímana jillotajaíbillena jitaide. <sup>4</sup> Jesús ñine naimaci rillano, capitán ñine naimie billena, naimie mo duere jicanotimaci. Raitimaci:

—Naimiedi caimona maremiena jira, naimiena o canuana jitaídícaí. <sup>5</sup> Cai nairáina isiruite. Ie ucube diga cai ofiracona finote.

<sup>6</sup> Iena cacajamona, Jesús naimaci diga jaide. Capitán jofomo iaírei Jesús ríara, capitádi Jesús ñine ie nabaiñáina orede, Jesús mo lloñena:

—Maestro, biñeno. Jamai bue cue isoilla jira, cue jofomo biñeno. <sup>7</sup> Jamai bue cue isoilla jira, o ñine jiaí jaiñedicue. O illanomona o uaido cue mullaíma jilloita. <sup>8</sup> Jiaie illaícomini anamo ñitue. Naimaci lloga uaina ñnoticue. Cue anamo jiaie soldaduáí illanona, cue uaina ñnotimaci. Cue anamo cue mullaíma illa jira, naimiedi cue uaina ñnote. O anamo naie duico illa jira, o uaina bene o lloia, cue mullaíma jilloite.

<sup>9</sup> Iena cacajano, Jesús raíjcaide. Oni dobaidajano, naimie diga jaidinomo llote:

—Bie isoidimie cue uaina ñnotimiena jaca baiñedicue. Cai judíuai cominimona bie isoidimiena jaca íñede. Mai abido jai.

<sup>10</sup> Capitámona bitino abido capitán jofomo rillano, mullaíma jai jilluana ciódimaci.

*Jesúdi feciño jítóna jillotaja rafue*

<sup>11</sup> Jiaíruido Naín railla nairáimo Jesús jaide. Ie llofueoicaigano jiaí jaidimaci. Ailluena comini jiaí jaidimaci. <sup>12</sup> Naie nairai ie nasemo naimie iaíreicaia, jai fiodaitimiena comini

jino atiana ciode. Naie fioidaitimiedi conirue. Ie eidi feciño. Dajede ie jitodi jai fioidaite. Ailluena Nain itino naie feciño diga jaidimaci. <sup>13</sup> Jesús naiñaifona ciuanona, naiñaifona duenaite. Naiñaifona raite:

—Mai eeñeno.

<sup>14</sup> Fioidaitimie dine Jesús jaillanona, naimaci ieconi naidadallena, ie uiga rana jetade. Naimiena uitinodi ieconi naidadatimaci. Fioidaitimie mo Jesús llote:

—Mai a rainada.

<sup>15</sup> Iena Jesús llua mei, naie fioidaitimie ie uiga ramona a rainadate. Ie meinoconi naimie ñaite. Jesús naimiena ie eimo abido ite. <sup>16</sup> Naieri nana jacinaitimaci. Jusiñamuimo iobillacinona fecadimaci. Raitimaci:

—Jusiñamui facaina lloraíma cai motomo ite. Naimie uai eo siño. Naimiena Jusiñamui oretaja jira, Jusiñamui caína birui canoacana jira, iobidicai.

<sup>17</sup> Nana Judeamo itino Jesús finoca rafuena fididimaci. Judea enirue fuemo ite nairaiaidi jiai fididimaci.

*Jesús dine Juan Bautista micori ie llofueoicaiganona oretaja rafue  
(Mt 11.2-19)*

<sup>18</sup> Juan Bautista micori llofueoicaiganodi nana Jesús finoca rafuena fidiano, iena naimie mo llote. Ie llofueoicaiganomona Juan micoridi menamiena uaidote. <sup>19</sup> Llote:

—Jofue iñenanomo navui cue ia, jiaimie billena llofuecabiticue. Jesús dine omico jai: “¿Buudio? ¿Odi Juan llofuegamiedio? ¿Jiaimie billemo nia ocuiriticai?” naimie mo jicano.

<sup>20</sup> Jesús dine iaímaiaí rillano, Jesús mo llotiaímaiaí:

—Juan Bautista cocona orede. Jofue iñenanomo navui naimie ia: “Jusiñamuimona damie biite” naimie llofuecabite. Juan llofuegamiena o illana uíñoiacadicaí. Imieñediadena, jiaimie billemo nia ocuiriticai. Cocomo llono.

<sup>21</sup> Jesús dine iaímaiaí billa facaiseconi, Jesús diga isoide duicuaí illanona jillotate. Jananiaí anamo itinomona jananiaína oni jiai orede. Uisinidina uisina dane ciotate. <sup>22</sup> Ie jira Jesús iaímaiaí mo llote:

—Cue lluaña cacadomico. Cue finoca rafuena ciodomico. Juan dine abido omico jaillanona, iena naimie mo llono. “Uisinidino jai cioidimaci. Ñuja-ñujacaida jaidinodi jai raise macaritimaci. Efonaitino jai jillodimaci. Jefona cacaiñedinodi jai jefona cacasite. Fioidaillamona damierie jai jillodimaci. Dueredino mare rafuena jai cacadimaci”. Iese naimie mo llono. <sup>23</sup> Jiai llono: “Ñibaí nana cue rafuena raise cacaiñedio; ia cuena jaca nia iinocana o jaia, caimare iitio”.

<sup>24</sup> Iaímaiaí abido jailla mei, naimie ecimo ailluena ite cominimo Jesús i Juan rafuena llote:

—Jofue iñenanomo naimie navui ia, naimie dine jaidomoi. ¿Nie isoidimiena ciodomoi? Daje uaido rafuena comecina facadimiena ciodomoi. Ero, fuirna aifi billamona, raitire afai bijide. Afaina aifi billamona, raitire fuiri bijide. Naimie ie isoíñede. Nie isoide rafue naimie mo ia, cue rafuena llocana jaide. <sup>25</sup> ¿Bue ñellena naimie dine jaidomoi? Mare iniroina jitadimiena cioñedomoi. Mare iniroina jitadinona omoi cioacaniadedi, illaicomini dine jaidomoi. Naimacimo ailluena ra ite. <sup>26</sup> Jusiñamui facaina lloraímana ciodomoi. Naimie Jusiñamui facaina llocabite. Jiaie lloraíni baifemo faite, cue billena omoimo naimie llua jira. <sup>27</sup> Malaquíás micori naimiena jaie cueba: “Jusiñamui raite: ‘Ero, o uicodo cue rafuena llollena, damiena oretaiticue, comini comeциаína marecinona duiñollena’ ” cueba. Malaquíás Juan Bautistana cuete. <sup>28</sup> Juan Bautista nana Jusiñamui facaina lloraíni baifemo faite; iadedi Jusiñamui cominina birui bu illamona, Juan baifemo birui faite. Juan cue billena llofueite; ia naimie cue lloga rafuena omoi isoí cacaiñede. Naimie cue lloga rafue omoi isoí suillana cioñede. Iemona naimie baifemo faitomoi.

<sup>29</sup> Naimacina navui Juan bautizaja jira, nainomo ite comini iena cacajano, Jusiñamuimo iobillacinona fecadimaci. Gobierno ucube oraindi jiai fecadimaci; <sup>30</sup> iadedi fariseuai iobillacinona fecañedimaci. Moisés llogacinuaina llofueraíni jiai fecañedimaci. Jusiñamui naimacina jillotajana naimaci jamailla jira, naimaci jeacinona Jusiñamuimo lloña jira, Juan naimacina navui bautizañede. <sup>31</sup> Jesús llote:

—Cuen a iñoñedinona lloiticue: Ero, omoina ñaiticue. <sup>32</sup> Jifanote uruaí isoidomoi. Uruaí jifanoiacania, naimaci nabairiñaína uaiduanona, raitimaci: “Omoi diga jifanoiacadicaí; iadedi cai diga jifanoiacañedomoi. Caimarede rafuena cai jifanoiacania, sunailla rafuena jifanoiacadomoi. Sunailla rafuena cai jifanoiacania, caimarede rafuena jifanoiacadomoi. Coninina nabairiñedicaí” raitimaci. <sup>33</sup> Ie isoidomoi. Juan jirorainide. Caimare guíñede; ia naimie diga nabairiñedomoi. Naimiena gaiñedomoi. Ie jira omoimona dajerie naimiena raitimaci: “Janaba anamo naimie illamona, naimie uairico isoí ite” raitimaci. <sup>34</sup> Monamona billanona, imana jaidicue. Omoi isoí guiticue. Caimataidicue; ia cue diga nabairiñedomoi. Cuen jiai gaiñedomoi. Ie jira cuena jeare ñaitomoi. Raitomoi: “Guillaredimie. Jiroruidimie.



Jearede rafue finodino diga nabairitimidio”.<sup>35</sup> Iese raitomo; iadedi Jusiñamuina ñnotinodi cue finoca rafuena marenana uiñotimaci.

*Jesús Simón jofomo illa rafue*

<sup>36</sup> Jiairuido fariseuai cominimona, ie jofomo naimie diga guillena, damiedi Jesúsna uaidote. Naimiedi Simón. Naimie dine Jesús jaillanona, naimie diga guite.<sup>37</sup> Jesús guitemo, daje riño fo jaide. Naiñaiñodi marañede rafuena finoraño. Naicomo Jesús guillana fidiano, naiñaiño fo jaide. Noficimona finoca frascóna atide, na soride ra illa diga.<sup>38</sup> Judíuai aciaíta jaca guisoidimaci. Jinafo dine eilli jonesiuidimaci. Fo jaillano, naie riño Jesús abimo naidaide. Naiñaiño eiamona, naiñaiño uisimona uaide uillinociai diga Jesús eillina jocode. Safenaillena, naimie eillina ie ifotie diga dote. Ie eillina jiai llibanote. Ie mei ie eillimo frascóna soride rana totade. Naimiena naiñaiño isiruillamona, iese naiñaiño finode.<sup>39</sup> Iena cianona, Simón dama comecina facade: “Bimie Jusiñamui facaina lloraimadena, nie isoide naimiena jetade riñona niade uiñote. Naimiedi naiñaiño marañede rafuena finorañona uiñote. Iena naimie uiñuamona, naiñaiñona jino raire orede. Naimiedi Jusiñamui facaina lloraimañede”.<sup>40</sup> Jesús naimie comecina facajacinona uiñuano, naimiemo llot:

—Simón, naiñaiño finoca rafuena o raise fueollena, omo bie rafuena lloiacadicue.

Simón uai ote:

—Maestro, mai cuemo llono.

<sup>41</sup> Jesús llot:

—Damie menamaiaimo ucubena fecade. Damie mo quinientos diga ucubena fecade. Jiaimie mo cincuenta diga ucubena fecade.<sup>42</sup> Ie iade, naiena abido meidonidiaimaia. Ie jira ucubena fecadimiedi raito: “Dama omico meidoñega. Naiena jai feitatícue”. Ero, Simón, ¿naimieca ucubena fecadimiena eo isiruite?

<sup>43</sup> Simón dinena uai ote:

—Cue comeci raito: Ailluena ucube feitaja jira, eo ailluena ucubena igamie.

Jesús dinena raito:

—Raise cue uaina fairiotio.

<sup>44</sup> Iemei Jesúsdi riño dine dobaidajanona, Simómo llot:

—Biñaiñona ja lloiticue. O jofomo biticue; ia cuena raise nafueñedio. O nabai o dine bia, naimiena raise nafuecabitio. Ie jearede eilli jocollena, comini finocabilla isoi, jinui fecadio. Safenaillena eilli dora fecadio. Naimiena llibanotio. Ie abi caimare sorillena, janore soride ra naimiemo jonetio. Iese cuena nafueñedio; ia bie riño cuena isiruillamona, ie uillinociai diga cue eillina jocode. Ie ifotie diga dote.<sup>45</sup> Naiñaiño cue ecimo fo billanona, cue eillina diga icaño llibanote.<sup>46</sup> Naiñaiño cue eillimo soride rana totade.<sup>47</sup> Naiñaiño mo eo jeacino ite; ia cuena naiñaiño eo isiruillamona, nana ie jeacina jai oni dotajana uiñotícai. “Jeaicino cuemo raise iñede” comecina bu facaia, Jusiñamui naimie jeacina oni dotajamona, naimie Jusiñamuina janore isiruite. Iemo o comecina faca.

<sup>48</sup> Naiñaiño mo llot:

—O jeacino jai oni dotaca. Iena jai feitatícue.

<sup>49</sup> Jiaimo nainomo guillanona, coniniri ñaitimaci:

—Bimiedi ¿nie isoidimie? Bimie jeacino oni dotanide.

<sup>50</sup> Jesús dinena riño mo llot:

—Cuena o ñnua jira, o jeacinomona jai jillodio. Mai uri o jaillano o i.

## 8

*Dajerie riñoníai Jesúsna canua rafue*

<sup>1</sup> Ie facaise diga nairaimo Jesúsdi mare rafuena llocana jaide. Naimie anamo comini illana Jusiñamui jitailla jira, Jesúsdi Jusiñamui dibeimo naimaci comecei i uaina meiduana llofue. Ie doce llofueoicaigano naimie diga jaidimaci.<sup>2</sup> Dajerie riñoníai jiai jaidimaci. Naiñaiñuaimona dajerie Jesús navui jananiai anamona orecañaiñuai. Dajerie duicomona jilloitagañaiñuai. María Magdalena ite. Naiñaiñomona siete diga jananiai oni oretate.<sup>3</sup> Juana ite. Naiñaiño inidi Chuza. Herodes railla illaima ecimo naimie maijuide. Susana ite. Jiaie riñoníai jiai itimaci. Naiñaiñuai ramona Jesúsna canouidimaci.

*Jesúsdi trigona judaímiena llua rafue*

(Mt 13.1-9; Mr 4.1-9)

<sup>4</sup> Diga nairaimomona ailluena comini Jesús dine billanona, naimacimo llot:

—Jusiñamui omoina sedaacana omoi fueollena, bie rafuena lloiticue.<sup>5</sup> Damiedi trigona judaiaide. Naimie judaiaimona naisomo janore iduai juide. Comini nainomo jaillano, iena saitadimaci. Bai jailla mei, sillíñiai iena jiai guisaibite. Ie jira sicoñede.<sup>6</sup> Nofiemo jiaie iduai juide. Sicode; iadedi jinui raise iñena jira, duide.<sup>7</sup> Eecuai illanomo jiaie iduai juide. Eecuai

sicua mona, riaru eecuai ibaica. Ie jira llisiñede. <sup>8</sup> Mare eniruemo jiaie iduai juide. Sicoe. Llisillamona danademo cien diga llisillana ote.

Bie rafuena naimie llua mei, naimacimo llote:

—Omoi jeforena jira, raise fueollena, cue lluamo cacarei. Iena ñino.

*Jesús ie como lloga rafuena llofuia rafue*

(Mt 13.10-23; Mr 4.10-20)

<sup>9</sup> Jesúmo ie llofueoicaigano ie como lloga rafuena jicanotimaci:

—¿Bue ñellena bie isoide rafuedo cominina llofuetio?

<sup>10</sup> Uai ote:

—Jusiñamuidi omoína ie sedaacana rafuena jai uifnotade. Jiaie iena uifnoñedomoi. Jiaie cominina iena nia uifnotañede. Ie jira bie isoidicinodo naimacimo lloticue. Cue siño finoca rafuena ciotimaci; iadedi iena naimaci ñinoñena jira, uifnoñeno jaidimaci. Cue llofuiana jamai cacadimaci; iadedi naimaci ñinoñena jira, raise cacañedimaci. Uifnoñedimaci.

<sup>11</sup> ‘Omoína cue como lloga rafuena llofueiticue. Naie iduai: Jusiñamui uai. <sup>12</sup> Dajerie comini comeciai naisomo juide iduai isoidimaci. Jusiñamui uaina cacadimaci; ia naimaci naie uaina ñinoi raillano, naimaci naiemona jilloi raillanona, Taife naimaci comeciáimo cacaja uaina ñnotañede. <sup>13</sup> Jiaie iduai nofiemo juide. Dajerie comini comeciai naie nofie isoidimaci. Jusiñamui uai nano naimaci cacaja, iena caimare feifnotimaci. Nofiemmo riga iduai jainaonidedi raise sicoñede. Naie comini janore ñnua jira, ie isoidimaci. Dalu nano ñnotimaci. Jusiñamui uai muidona duere naimaci sefuia, abido danomo uaidimaci. <sup>14</sup> Jiaie iduai eecuai illanomo juide. Naie iduai sicua mei, iena eecuai ibailla jira, raise llisiñede. Dajerie comini comeciai naie illano isoidimaci. Jusiñamui uaina cacadimaci. ñnotimaci; iadedi naimaci comeciai jarire illamona, naimaci raruiaina ebiruillamona, naie uai naimaci comeciáimo itabiñede. Jusiñamui jitaile rafuena finocana jañedimaci. <sup>15</sup> Jiaie iduai mare eniruemo juide. Dajerie comini comeciai naie enirue isoidimaci. Jusiñamui uaina cacajano, iena raise cacadimaci. Mare jeanide comeciáimona ñnocana jaidimaci. Eo lliside isoidimaci. Jusiñamui jitailla rafuena sefuiruifno ñnocana jaidimaci.

*Jesús ie rafue llocana jailla llua rafue*

(Mr 4.21-25)

<sup>16</sup> Jesús nia llote:

—Lamparín bu unia meinoconi, jiaie ra biide anamo rainañega; iadedi jofo jeraimo lligañollena, nainomo bite comini raise cioillena, ie rairanomo rainaca. <sup>17</sup> Ie isoide. Cue rafue llocana jiaie, comini comeciai iticinona uifnotade. Uanaicino naimaci cacajamona, damierie ñnotimaci. Damierie ñnoñedimaci. <sup>18</sup> Cue lluamo raise cacarei. Iena omoi ñnuamona, Jusiñamui omoína canoite. Omoína uifnocana jaitaite. “Jusiñamui rafuena uifnoticue” raitimiedi ñnoñenia, Jusiñamui naimiena faifitaite.

*Jesús dibeimo itinona ñaia rafue*

(Mt 12.46-50; Mr 3.31-35)

<sup>19</sup> Cominina Jesús nia llofuia, naimie dine Jesús ei, ie amatiai diga bitimaci; ia ailluena comini illa jira, naimiemo riñedimaci. <sup>20</sup> Nainomo itino naimiemo llote:

—O ei, o amatiai diga jino naidaidimaci. O diga ñaiacadimaci.

<sup>21</sup> Jesús uai ote:

—Jusiñamui uaina cacajamona, iena ñnotino ieca cue eidi, cue amatiaidi.

*Jesúdi jorai baguana llucaitaja rafue*

(Mt 8.23-27; Mr 4.35-41)

<sup>22</sup> Jiairuido botemo Jesús jailla mei, ie llofueoicaiganomo llote:

—Ruica dibeimo mai cai jailli. —Ie mei jaidimaci. <sup>23</sup> Naimaci jaidemo, Jesús inide. Bai jaidimacimo, eo riire aifi bite. Baguamona botemo jinui a uaide. Oruiacana jira, eo jacinaitimaci. <sup>24</sup> Jesúna casitajano, naimiena raitimaci:

—Maestro, jai buisaidicai. Jai corobaisaidicai.

Naimie casillano, aifna lletade. Joraina llucaitade. Ieconí aifi llucaide. Bagoñede. <sup>25</sup> Naimacimo jicanote:

—¿Bue ñellena cuena ñnoñedomoi? —Naimiena jacinaillamona uai oñedimaci. Raijicaillamona, cominiri ñaitimaci:

—Bimiedi, ¿nie isoidimie? Aifi naimie uaina ñnote. Jorai naimie uaina jiaie ñnote.

*Jesúdi Gadara railla eniruemo illa rafue*

(Mt 8.28-34; Mr 5.1-20)

<sup>26</sup> Ruica dibellemo ridemo, Gadara railla eniruemo sijidimaci. Galilea facaisemo ite. <sup>27-29</sup> Botemona ari Jesús jaidemo, damie Jesús dine bite. Naie nairai imie. Janaba anamo illamie. Taimiena jai jaicaisoide. Jofomo naimie irainide; ia comini raioillanomo nofie moto

ifuaimo i-isoide. Ebena cominina naimie faei raillanona, lloeo diga ie onollidi maiga. Ie eilli jiaí maiga; iadedi lloeo oni ticonote. Ie mei jofue ifñenanomo Janaba naimiena jaitate. Iese suisoide.

Jesúna naimie cuanona, cuirioide. Jesús ecimo uaide. Janaba naimiena ado llotatate:

—Jesús, nanoca Jusiñamui Jitodio. ¿Niese cuena nibaicacadio? Cuena duere finoñeno.

Iese raite, Janaba naie imamona oni jai oretajana Jesús llua jira. <sup>30</sup> Jesús naimiemo jicanote:

—¿O mamaci bu?

Uai ote:

—Aillosiedicai. —Ailluena jananiai naimie ecimo illa jira, iese naimiedi raite. <sup>31</sup> Jesúmo duere jicanoside, iraimo naimacina nia oretañellena. <sup>32</sup> Naie facaise nainomo ite anedumo ailluena chanchuai itimaci. Chanchuai abimo naimaci jaillena Jesúmo duere jicanotimaci. Jesús dinena:

—Jee —raite. <sup>33</sup> Ieconí imamona jaidemo, chanchuai abimo jaidimaci. Iena suidemo, iconí jillacimo joraimo chanchuai aisidimaci. Dinomo corobaside.

<sup>34</sup> Iena cuanona, chanchuai sedarainí naimaci nairai dine aisicana jaidimaci. Naie rafuena llocana jaidimaci. <sup>35</sup> Ie jira diga comini jaide, naie rafuena raise fidillena. Jesús dine naimaci ridemo, jaive Janaba anamo illamiéna Jesús ecimo raillana ciodimaci. Naimie iniroina jai jítade. Naimie jai uairicoñede. Iena cuanona, Jesúna jaciruitimaci. <sup>36</sup> Naie rafuena ciodinodi como bitinomo naimie jilluana llotimaci.

<sup>37</sup> Naimiéna naimaci jaciruillanona, naimacimona oni jaillena nana naie eniruemo ite nairaidi Jesúmo jicanotimaci. Ie jira botemo Jesús jaide, ruica díbeimo abido jaillena. <sup>38</sup> Ieconí jaive Janaba anamo illamie Jusúmo jicanote, naimie diga jaillena; iadedi Jesús raite:

—Dama ite. <sup>39</sup> Mai o jofomo o jai. Nainomo itinomo nana Jusiñamui omo finoca rafuena llono.

Ie mei jaide. Nana naimie nairaimo Jesús naimiemo finoca rafuena llocana jaide.

*Jesúdi mena duide riñona jillotaja rafue*

*(Mt 9.18-26; Mr 5.21-43)*

<sup>40</sup> Ruica díbeimo Jesús abido ria, naimie abido billemo naimaci ocurilla jira, ailluena comini naimiéna feiñotimaci. <sup>41</sup> Jairona mameciredimiedi Jesús dine bite. Naimiedi judíuai rafue ofiraco sedaraima. Jesúmo duere jicanollena, ana bitadate. Naimie jofomo Jesús billena duere jicanote. <sup>42</sup> Dañaiñode ie jisa. Doce años naiñaiñodi ite. Niadedi fiodaíacade. Ie jira Jesúmo jicanuaibite. Iena cacajano, naimie diga Jesús jaide. Ie llofueoicaigano jiaí jaidimaci. Jesús jaillano, diga comini naimiemo ñajisaide.

<sup>43</sup> Bai jaillanona, duidiñaiño Jesús jinafona jaide. Naiñaiño jeraimona doce años jaca diaide. Naiñaiño jaca buna jillotanide. <sup>44</sup> Jinafo dinena billanona, Jesús iniroi fueda jetade. Iemona diailladi fainonocai. Jillode.

<sup>45</sup> Jesús dinena jicanote:

—¿Bu cuena jetade?

Naimie ecimo ite comini uai otimaci:

—Ona jetañedicai.

Ie nabaiñiai diga Pedro dinena raite:

—Maestro, ailluena comini o ecimo jaidimaci. Omo ñajjidimaci.

<sup>46</sup> Jesús uai ote:

—Damie cuena jetade. Cue abimona cue uai jaillamona, naimie jai jillode.

<sup>47</sup> Jaive duidiñaiñodi Jesús naiñaiño uifñuana uifñote. Ie jira Jesús dine jaciruicana bite. Naimie uicomo ana bitadajanona, nana comini uicomo naimiéna jetaja rafuena llote. Naiñaiño iconi jilluana llote. <sup>48</sup> Jesús dinena naiñaiño raite:

—Ñoo, cuena o inua jira, jai jillodio. Mai jaillanona, uri o i.

<sup>49</sup> Naiñaiño diga Jesús nia ñaitemo, jairo jofomona damie bite. Jairomo llote:

—O jisa jai fiodaite. Maestrona ñaidoñeno.

<sup>50</sup> Iena Jesús cacajano raite:

—O comece jarire ifñeno; ia cuena nia ino. Naiñaiño jilloite.

<sup>51</sup> Jairo jofomo naimaci rillano, ailluena comini naimie diga fo jaillana rairuide. Dani diese fo jaillana jitaide: Pedro, Jacobo, Juan, nai jitaibici moo, naiñaiño ei. Jaca diese fo illana jitaide. <sup>52</sup> Nana nainomo itino eecuinaidimaci. Faillñaidimaci. Jesús dinena raite:

—Omoi eñeno. Cuemona naiñaiñodi fiodaiñedesa. Jamai inide.

<sup>53</sup> Jai fiodaitedi: “¿Bue ñelli inide raitio?” raillanona jaisitimaci. <sup>54</sup> Jesús fo jailla mei, naiñaiño onollina llonocaida, raite:

—Jitaibici, mai naidacai.

<sup>55</sup> Ieconí naináinaiño joreño abido bite. Naidacaide. Jesús llote:  
 —Guillena naináinaiño eca. <sup>56</sup> —Naináinaiño moo, ie ei diga, rajjicaidíiaimaiaí. Jesús iaímaiaimo llote:  
 —Bie rafuena bumó lloñeno.

## 9

*Jesúdi ie llofueoicaiganona oretaja rafue*  
 (Mt 10.5-15; Mr 6.7-13)

<sup>1</sup> Ie doce llofueoicaiganona naimie dine Jesús uaiduanona, naimacimo ie uaina iñonocaide, jananiaina anamona cominina jilloitallena. Duicuaína oni oretallena, iena jiaí iñonocaide. <sup>2</sup> Naimacimo llote:

—Omoí jaillanona, cominimo llono: “Jusiñamui facaina jaie lloraini micoriai llogamie jai bene ite. Naimie anamo omoí illana Jusiñamui jitailla jira, naimie díbeimo omoí comeciaí iuaina meido”. Duidinona jillota. <sup>3</sup> Omoí jaia, buena uiñeno. Omoí abina riidollena, jiguidana uiñeno. Ailluena rana omoí uiñellena, bolsana uiñeno. Llomeniconona uiñeno. Ucubena uiñeno. Guille ifo meidollena, rana uiñeno. Meidolle iniroina uiñeno. <sup>4</sup> Nie nairaimo omoí jaia, daacomo omoí ri. Naie nairaimo omoí ille dinori, daacomo omoí i. <sup>5</sup> Omoína comini feiñoñenia, naimaci nairaimona omoí jaia, omoí eilliaimo ite jearacuaina oni jaidino. Nicino naimacimo illana naimaci uiñollena, omoí eilliaína oni jaidino.

<sup>6</sup> Jesús naimacimo llua mei, jaidimaci. Jusiñamui rafuena lluanona, diga nairaimo jaidimaci. Diga comini imaci duicomona jillotatimaci.

*Juan Bautista micori fiodailla rafue*  
 (Mt 14.1-12; Mr 6.14-29)

<sup>7</sup> Naie facaise Herodes railla gobernador nana Jesús finoca rafuena fidide. “Fiodaillamona Juan Bautista micori jai jillode” dajerie railla jira, ie comeci uri iñede. <sup>8</sup> Jiaie comini raisoidimaci:

—Elías jai bairede.

Jiaino raisoidimaci:

—Fiodaillamona Jusiñamui facaina jaie lloraima micori jai jillode.

<sup>9</sup> Jesúsna fidiano, Herodes comeci uri iñede. Comecina facade: “Juan micori ie ifogina navui jaitataticue. Ie muidona ¿birui bu ie rafuena fididicue?” Raise uiñollena, Jesúsna cioacade.

*Jesús cinco mil iñiaína ecaja rafue*  
 (Mt 14.13-21; Mr 6.30-44; Jn 6.1-14)

<sup>10</sup> Jesús llofueoicaigano abido bia, Jesúsno naimaci finoca rafuena llotimaci. Ie mei dani ie llofueoicaigano diga Jesús Betsaida railla nairai dine jaide; <sup>11</sup> iadedi comini iena fidianona, naimiena racadimaci. Naimie dine naimaci rilla mei, naimacina feiñuanona, naimie anamo comini illana Jusiñamui jitailla jira, Jesúdi Jusiñamui díbeimo naimaci comeciaí iuaina meiduana llofuede. Duidinona jiaí jillotate.

<sup>12</sup> Jitoma ana itemo, ie doce llofueoicaigano naimie dine billanona, raitimaci:

—Jofue bene iñede. Bene jaca buedi iñede. Ianori ite nairaimo, ianori ite jofuemo naimaci inillena, naimaci guille ollena, bie cominina abido oreta.

<sup>13</sup> Jesús uai ote:

—Naimacina bene eca.

Uai onaisite:

—Dani caimo ite cinco llomenico mena lliciaí diga. Nana naimaci guillena, ¿guille cai iballena níbaí jitaideo?

<sup>14</sup> Cinco mil iñiaí nainomo illa jira, ailluena guille jitaillana uiñotimaci. Naimaci ainiaí, imaci uruiaí diga, jiaí itimaci. Ie llofueoicaiganomo Jesús llote:

—Comini ana raillesa llono. Cincuenta digamierie ana imaci raillesa llono.

<sup>15</sup> Iena finodimaci. <sup>16</sup> Naie cinco llomeniconona, naie mena lliciaí diga Jesús uanona, monamo eruaillanona, Jusiñamuiimo iobillacinona fecade. Iemei taillude. Ie llofueoicaiganomo fecade, cominina ecallena. <sup>17</sup> Nana guillanona monidimaci. Monillamona, fiebide guillena iraidimaci. Doce cirigaiaimo oruitatimaci.

*Pedro Jesúsna llua rafue*  
 (Mt 16.13-19; Mr 8.27-29)

<sup>18</sup> Jiairuido Jesús ie Moomo jiaa facaiseconí, ie llofueoicaigano naimie diga illanona, naimacimo jicanote:

—¿Niese cominídi cuena raitimaci?

<sup>19</sup> Uai otimaci:

—Damierie raitimaci: “Juan Bautista micoridio”. Damierie raitimaci: “Odí Elíadio”. Jiaíno raitimaci: “Jusiñamui facaina jaie ite llorainimona damie jai jillode. Imiedio”.

<sup>20</sup> Jesús naimacimo jicanote:

—¿Niese omoi cuena raitomoi?

Pedro uai ote:

—Odi cai jilloitaraimadio. Jusiñamui facaina lloraini micoriai o billena jaie llotimaci. Jusiñamui ona orede.

*Jesús ie fiodaillena llofuia rafue*

(Mt 16.20-28; Mr 8.30-9.1)

<sup>21</sup> Jesús naimaci como llogacino bumo lluaana rairuide. <sup>22</sup> Llote:

—Cai judíuai illaicomini cuena eo duere finoitimaci. Cuena jitaiñellemona, cuena meineitimaci; iadedi darui amani illanona, fiodaillamona jilloiticue.

<sup>23</sup> Nana ie llofueoicaiganomo llote:

—Cue cominina bu jaicania, ie jitaile rafuedo jaiñena. Cue dibeimo naimie jaillamona, duere sefuicana jaite. Nibai naiemona fiodaite. Bu iese jaicania, cue dibeimo naimie iite. <sup>24</sup> Duere sefuillana jaciruillamona cue cominina bu jaicaiñenia, ja muidomo faifite; iadedi duere sefuillana jaciruñenamona cue cominina bu jaia, jaca faifñeite. <sup>25</sup> Cue cominina bu jaiñenia, nibai eo duere sefuñeite. Nibai aillena ra naimiemo iite; ia, ¿niese cue Moo dine riite? Nainomo naimie riñeno faifite. <sup>26</sup> Cuena bu meiruia, cue uaina bu meiruia, dane cue bia, naimiena meiruiticue. Cuena meiruillamona: “Cristomo duidicue” bu lloiacaiñenia, ico cue bia: “Naimiedi cue comin?” lloñeiticue. Jusiñamui jaiñenisaí siño uai isoí illanona, cue Moo dinena monamona ico biiticue. Cue Moo uai cuemo illanona, ebire biiticue. <sup>27</sup> Uanaicnona omoímo lloticue. Omoimona dajerie nia fiodaiñeitomoi, illaimana cue bairellena cioitomoi.

*Jesús abi meidocailla rafue*

(Mt 17.1-8; Mr 9.2-8)

<sup>28</sup> Ocho digarui illanona, Jusiñamuimo jüillena, anedumo Jesús jaide. Naimie diga jaillena, Pedrona uite. Juan jiaí uite. Jacobona jiaí uite. Jiaie llofueoicaiganona uñede. <sup>29</sup> Naimie jüamona naimie abi meidocaide. Naimie iniroi naie dacaíño eo userecaide. <sup>30</sup> Ieconí menamie bairiano, Jesús diga ñaitiaímaiaí. Moisés micori joreño ite. Elías jiaí ite. <sup>31</sup> Ebire bairediaímaiaí. Jesús Jerusalémo fiodaile rafuena ñaitimaci. <sup>32</sup> Ie facaiseconí Pedro ie nabaiñiaí diga jai inidimaci; ia casillamona, Jesús ebirenana ciodimaci. Jesús ecimo itiaímaiaina jiaí ciodimaci. <sup>33</sup> Iaimaiaí jaicania, Pedro Jesúsmo llote:

—Maestro, bene cai illana mare. Daje amani bisainí cai finollena, mare. Daje oie, jiaie Moisés micori ie, jiaie Elías ie. —Iese raite; ia ie ñaia rafuena raise uññoño jamai ebena ñaite.

<sup>34</sup> Tena naimie nia lluaanona, uillie billamona, naimacina ibaide. Uillie ibaibillaconi jacinaitimaci. <sup>35</sup> Uilliemona Jusiñamui naimacimo llote:

—Bimiedi cue jito. Naimiena fetodicue, cue jitaile rafue finollena. Naimie lluaana omoi cacareillanona, iena ñno —llote.

<sup>36</sup> Jusiñamui llua mei, dama Jesúsna dane ciodimaci. Jesús diga itino naimaci cúa rafuena naie facaiseconí jaca bumo lloñedimaci.

*Jesúsí Janaba anamo itimiena jillotaja rafue*

(Mt 17.14-21; Mr 9.14-29)

<sup>37</sup> Ie areruido anedumona ana bitimacimo, ailluena comini naimacimo dafaifide.

<sup>38</sup> Cominimona damie ado llote:

—Maestro, cue dajede cue jito duillana jibuisaíbi. <sup>39</sup> Janaba naimie anamo illamona, cue jito cuiritate. Cue jitona naillitacabite. Iemona ie fue mullecabite. Naimiena bofedaicabite. Naimiemona oni jaicaiñede. <sup>40</sup> Janabana oni oretallena, o llofueoicaiganomo jicanoticue; ia oretanidimaci.

<sup>41</sup> Iena cacajanona, Jesús ie llofueoicaiganomo llote:

—Cue uai siñonana nia ñnoñedomoi. Cue mare rafuedo nia raise jaicaiñedomoi. Omoi diga are iticue. Raise omoi ñnollena, ¿nie dinori omoi diga iiticue? —Naie duidimie moomo llote—, O jito cue dine mai ati.

<sup>42</sup> Naie urue billano, Janaba naimiena eniruemo ana dotade. Naimiena naillitate; ia oni jaillena Jesús Janabana lletade. Ieconí naie urue jillode. Iemei Jesús ie moomo naimiena fecade. <sup>43</sup> Comini iena ciuanona, Jusiñamui siño uai naimiemo illari rajicaídimaci.

*Jesús ie fiodaillena dane llofuia rafue*

(Mt 17.22-23; Mr 9.30-32)

Naimaci nia rajicaia, Jesús ie llofueoicaiganomo llote:

<sup>44</sup>—Cue lluana feitaño. Monamona billanona, iimana jaidicue; ia Jusiñamui jitailla jira, jiairuido illaicomini cuena meineitimaci.

<sup>45</sup>Jesús lluana raise cacaiñedimaci. Naimie iena llofueña jira, iena raise uiñoñedimaci. Naimiemo iena jicanuana jiaí meiruitimaci.

*Jesús ie llofueoicaigano moto imiena ille rafue*

(Mt 18.1-5; Mr 9.33-37)

<sup>46</sup>Te facaise Jesús llofueoicaigano conini uaitajanona raitimaci:

—¿Bu cai moto imiena ille?

<sup>47</sup>Jesús naimaci comeciai facajacinona uiñuamona, nainomo ite cominimona daje urue bai jainanocaida, naimaci motomo naimiena jonete. <sup>48</sup>Raite:

—Comini dinena bie urue jamai bue isoidie; ia bie isoidimie cuemo duillamona, naimiena feiñotimiedi cuena jai feiñote. Jusiñamui cuena oretaja jira, cuena feiñotimie Jusiñamuina jiaí jai feiñote. Jamai bue isoidimiedi omoi moto imiena ille.

*Jesús ie dibeimo itinona llua rafue*

(Mr 9.38-40)

<sup>49</sup>Naie facaise ie llofueoicaiganomona Jesúmo Juan llote:

—Maestro, o mamecido jananiaina oretacabitimiena ciodicai. Cai diga naimie jaicabiñena jira, iena finuana rairuidicai.

<sup>50</sup>Jesús dinena uai ote:

—Naimiena rairuiño. Cai dibeimo itimiedi cai facaisena ite. Ie jira naimie isoidinona rairuiño.

*Jesús dinena Jacobo, Juan iaímaiaí lletaja rafue*

<sup>51</sup>Monamo abido Jesús jaillirui iaírei ia, Jerusalémo jaiacanamo naimie comecina facade. <sup>52</sup>Ie jira dajeriena uicodo oretate. Ie inillinona jenollena, Samaria raila nairaimo jaidimaci; <sup>53</sup>iadedi Jerusalémo naimaci jailla jira, judíuainedimona samaritanodi gaiñena jira, Jesús llofueoicaiganona feiñoicaifedimaci. <sup>54</sup>Iena fidianona, Jacobo, Juan diga, Jesúmo jicanotiiaímaiaí:

—Nama, ¿bie comini jobaillena, monamona irai billena Jusiñamuimo coco jicanuana jitaídio?

<sup>55</sup>Iaímaiaímo eruailanona, Jesús dinena iaímaiaímo riire lletade:

—Dama ite. Iena jitaíñedicue.

<sup>56</sup>Ie mei inillena jiaíe illanomo jaidimaci.

*Jesús ie llofuegamiena damie jaillena ie rafue*

(Mt 8.19-22)

<sup>57</sup>Naisona ie llofuecaigano diga, Jesús oni jaillanona, Jesúmo damie llote:

—O jaillinomo o diga jaiacadícue. O llofuegamiena jaiacadícue.

<sup>58</sup>Jesús uai ote:

—Janorede ocaíniaídi joforedimaci. Silliñiaí jillaíniaíredimaci; iadedi jofonidícue. Monamona billanona, iimana jaidicue; iadedi buenidícue. Jofonidícue. Cue diga o jaiacania, bue isoidena cuemona oñeitio. Iemo o comecina raise faca.

<sup>59</sup>Jiaímiemo Jesús llote:

—Cue llofuegamiena o jaillena, cue diga mai bi.

Naimie uai ote:

—O diga jaiticue; ia cue moo nia fiodaíñena jira, o diga nia jaiñeiticue.

<sup>60</sup>Jesús naimiemo dane llote:

—Dama ite. Cue diga mai bi. Cuena iñoñedinodi o moona canoredimaci. Naimie fiodaia, naimiena naimaci raille. Cue rafue jiaíe rafue baífemo faite. Naimie anamo comini illana Jusiñamui jitailla jira, naimie dibeimo naimaci comeciai iuaina meiduana llocana cue diga mai o bi.

<sup>61</sup>Jiaímie Jesúmo llote:

—O llofuegamiena jaiacadícue: iadedi cue jofomo nano jaiacadícue, cue cominina facadollena.

<sup>62</sup>Jesús uai ote:

—Cue llogamiena jaiacania, jiaíe ramo naimie comecina eo facañena. Jiaíe ramo naimie comecina eo facaia, Jusiñamui facaina raise maijinide.

## 10

*Ie rafuena lollena, Jesús setenta digamiena oretaja rafue*

<sup>1</sup>Ie llofueganona llofuia mei, naimacimona Jesús setenta digamiena fetode. Naga naimie jaiacana nairaiaímo menamieriena oretate. <sup>2</sup>Naimacimo llote:

—Diga comini ite, naimacina Jusiñamui rafuena ñnotallena; iadedi eo janore lloraini ite. Jusiñamui jicano, jiaie llorainina naimie oretallena. <sup>3</sup> Mai jai; iadedi abi rairuicana jai. Toica llauadaia janallari illanomo illa isoi, omoina oredicue. <sup>4</sup> Ucubena uifieno. Ailluena rana omoi uifellena, bolsana uifieno. Meidolle zapatona uifieno. Naisomo bu omoimo dafaifa, are ñaifieno. <sup>5</sup> Bu ie jofomo omoi ria, jofomo itinomo marena uaido. <sup>6</sup> Nainomo maremie ia, o uaina fairioite. Maremie iñenia, o uaina fairioñenia: “Jusiñamui ona canoite” naimiemo lloñeno. <sup>7</sup> Nie nairaimo omoi ria, daacomo omoi ri. Omoi ecalle rana guiño. Cue facaina omoi maijia jira, comini omoina ecajia, cue facaina omoi maijia facaina omoi guiño. Naga jofomo guicana jaiñeno. <sup>8</sup> Nie nairai omoi ria, omoina naimaci feiñoia, omoi ecalle rana uaitaño guiño. <sup>9</sup> Duidinona jillota. Nainomo itinomo lloño: “Naimie anamo omoi illana Jusiñamui jitailla jira, naimie ñibeimo omoi comeciai iuaina meido”. <sup>10</sup> Nie nairaimo omoi ria, omoina naimaci feiñoñenia, ie naiso motomo jaillanona lloño: <sup>11</sup> “Omoi naisomo cai eillimo ite jearacuai jai jaidinotici, marañede rafue omoimo illana omoi uifollena. Jusiñamui omoina sedaacade; ia iena jitañedomoi” lloño. <sup>12</sup> Sodoma nairai jaiie eo marañede. Jusiñamui iena jaiie fuidode; ia nana comini naimie uicomo ico ia, Jusiñamuidi omoina feiñoñedinona Sodoma railla nairai baifemo duere finoite.

*Jesús ie ñnoñedinona llua rafue*  
(Mt 11.20-24)

<sup>13</sup> Ie fetocanomo Jesús nia llote:  
—Corazín railla illanomo navui iticue. Betsaida railla illanomo navui jai iticue. Naimaci dine diga siño rafuena finodicue; iadedi ñnoñedimaci. Ico duere sefuitimaci. Tiro railla nairaimo, Sidón railla nairaimo naie isoide siño rafuena finodicuena, naimaci comeciai eo isinotaillamona, naimaci comeciai iuai meidotimaci. Naimaci comeciai iuai meiduana jiaie comini uifotallena, ebinide iniroina jitanona, jusefo naimaci ifogiaimo jonetimaci. <sup>14</sup> Jusiñamui uicomo nana comini ico ia, Corazímo itino Tiro nairai baifemo duere sefuitimaci. Sidón nairai baifemo duere sefuitimaci. <sup>15</sup> Capernaumo itino jai duere sefuitimaci. Birui abina iedoacacimaci; iadedi jiairuido sure iitimaci. Monamo cue Moo diga jaca ñeitimaci; iadedi naimie naimacina duere finollemona, sure iitimaci. <sup>16</sup> Omoi llua naimaci cacaacania, cuena cacadimaci. Omoi llua naimaci jitañenia, cuena jitañedinaci. Cuena jitañedinodi cuena oretagamiena jai jitañedinaci. —Jesús naie fetocanomo iese llua mei, oni jaidimaci.

*Ie setenta fetocano abido billa rafue*

<sup>17</sup> Jiairuido Jesús ie setenta fetocano abido caimare bitimaci. Raitimaci:  
—Nama, o facaido cominimona jananiaina oni oredicai.

<sup>18</sup> Jesús naimacimo llote:  
—Monamona Taiife borilla isoi jaiie ana dotajana cidicue. Iemona cue uai naimie uai baifemo faiana uifotocue. <sup>19</sup> Jaiomona ramo omoi jiriñena uai omoimo jai itataticue. Acaiduaimona ramo omoi jiriñena uai omoimo jai itataticue. Nana cue ñibeimo iñedino omoi anamo jai itataticue. Omoina niese nibañeitimaci; <sup>20</sup> iadedi omoi uaina janania ñnua jira, iobiñeno; iadedi Jusiñamui cominina omoi illamona, omoi mameciai monamo Jusiñamui rabenicommo jai cuiamo iobi.

*Jesús ie Moo diga ñaia rafue*  
(Mt 11.25-27; 13.16-17)

<sup>21</sup> Ie facaiseconi ie Moo Joreño naimiemo illa jira, Jesús iobide. Raite:  
—Ore Moo, oca mona Namadio. Oca enirue Namadio. Abina uifotinona bie isoide rafuena uifotañedo; iadedi jamai bue isoidinona iena uifotadio. O jitailla jira, iese uifotadio. Ie jira iobillacinona omo feaacadicue. Mai.  
<sup>22</sup> Jesús dinena naimie ecimo ite cominimo dane llote:  
—Cue Moomona nana cue rafuena oticue. Dama cue Moo cuena raise uifote. Dama cue Moona raise uifotocue. Cue jitaile diese omoina naimiena uifotadicue. Ie muidona naimiena uifotomoi.  
<sup>23</sup> Ie llofueoicaigano diga eneno ia, naimacimo llote:  
—Cue finoca rafuena omoi ciua jira, ni ua omoi marena illino jillaci. <sup>24</sup> Jusiñamui facaina jaiie lloraini micoriai omoi siñona ciua rafuena jaiie cioacadimaci; iadedi cioñedinaci. Iena cacaacadimaci; ia cacañedinaci. Jusiñamuina jaiie ñnotino micoriai iena cioacadimaci; iadedi cioñedinaci. Iena cacaacadimaci; iadedi cacañedinaci.

*Jesús cai ecimo itimiena isiruillana llua rafue*

<sup>25</sup> Jesús ecimo itinomona Moisés micori llogacinuaina llofueraimadi Jesúna facaciano, naimiemo jicanote:  
—Maestro, Jusiñamui illanomo jaca cue illena, ¿bue finoiticue?

<sup>26</sup> Jesús uai ote:

—¿Niese Moisés micori llogacinuai iena raite?

<sup>27</sup> Uai ote:

—Moisés micori jaie cuega: “O jitailla jira, o comecina facajamona, cai Nama Jusiñamuina nana o comeci jitaillamona naimiema eo isirui. O abina o isiruilla isoi, o ecimo itinona isirui”.

<sup>28</sup> Jesús dinema raite:

—Marena cue uai otio. Iena o finoia, Jusiñamui illanomo jaca iitio.

<sup>29</sup> Naie llofueraima Jesúmo dane jicante:

—¿Bu cue ecimo itino?

<sup>30</sup> Jesús uai ote:

—Jiaie rafuedo iema omo lloiticue. Jerusalémona Jericómo damie jaide. Naimie jaillano firefino naimie dine bitimaci. Ie iniroina bairosite. Naimiema fatimaci. Niade ie meinanona ie ecimona jaisite. <sup>31</sup> Dallu illanona, Jusiñamui diga ñairaima naie naisona jaide. Fagamiema ciode; iadedi ecido jaide. <sup>32</sup> Dallu illanona, Jusiñamui jofomo maijiraima jiaie jaide. Fagamiema ciuanona, ecido jiaie jaide. <sup>33</sup> Ja muidomo Samaria nairai imie jaide. Naie nairaima enoidomoi. Fagamiema naimie ciuanona, naimiema duenante. Iemona naimie canoacade. <sup>34</sup> Naimie dine jaillano, ie bofellañona manode. Jiaie maítade. Ie burro emodomo jonecaida, naimiema uite. Inillanomo rilla mei, nainomo naimiema sedade. <sup>35</sup> Ie areruido ie inia jofono namamo janore ucubena fecade. Raite: “Naimiema seda. Naimie facaina jiaie rana o oia, abido cue bia, iema ibaiticue”. Ie mei oni jaide. <sup>36</sup> —Naie llofueraimamo Jesús dinema jicante— ¿Fagamiema ecimo itimiedi bu?

<sup>37</sup> Uai ote:

—Fagamiema duenaitimie.

Jesús raite:

—Jai raise uifotio. Mai jai. Ie isoi finocana o jai.

*Jesúdi Marta iaiñuái María jofomo illa rafue*

<sup>38</sup> Nia macaritimacimo, comini illanomo Jesús ie llofueoicaigano diga ridimaci. Marta raillañaiño ie jofomo naimiema feiñote. <sup>39</sup> Naiñaiño euiñodi María. Jesús ecimo llaribamo María ana raide, naimie llofuiacinona cacareillena; <sup>40</sup> iadedi Martamo maijille eo illa jira, naiñaiño naimie llofuiacinona cacareñede. Ie jira Jesúmo llote:

—Nama, cue euiño cuema canoacaiñema jira, daño maijiticue. “O euiño cano” naiñaiño llono.

<sup>41</sup> Jesús uai ote:

—Ero, Marta, jarire itio. Diga o ramo comecina facadio; ia Jusiñamui rafuemo comecina faca. <sup>42</sup> María iemo comecina jai facade. Naiñaiño cue llofuiema nano cacaiacade. Oña canollena naiñaiño lloñeiticue.

## 11

*Jusiñamuimo Jesús jia rafue*

(Mt 6.9-15; 7.7-11)

<sup>1</sup> Jiairuido ie Moo diga Jesús ñaia, ie llofueganomona damie naimiemo llote:

—Nama, jiaiana caina llofue, ie llofueoicaiganona Juan Bautista micori llofui isoi.

<sup>2</sup> Jesús uai ote:

—Omoi jiaia, iese omoi jia:

Ore Moo, comini ori iobidesa.

O illaimana jira, nana cominina o anamo raire itata.

O jaienisaie o jitaillacinona finua isoi, cominina o jitaillacinona finota.

<sup>3</sup> Nagarui guille caimo itata.

<sup>4</sup> Caina jeare jiaino finoia, iema caimona feilla isoi, cai jeacinona omona feilla jira, cai jeacinona oni dota.

Caina ramo bu faia, caina cano, iema cai inoñellena.

<sup>5</sup> Iema naimacina nia llofuellena, Jesús jiaie rafuema llote:

—Naiona mona moto llomenicono jicallena, o nabai dine o jiaia, ado lloiticue: “Nabai, daje amani llomenicono jitaidecúe”. <sup>6</sup> Jiaie nabai cue jofomo como ride. Jaca cuemo buedi iñede, naimiema cue ecallena”. <sup>7</sup> Ie jofu jeraimona o nabai fairioite: “Cuema uaidoñeno. Cue nasedi jai cue ibaicasa. Cue uruiaie jai inidimaci. Jiaie inidicue. Llomenicono omo fecallena casiacañedicue”. <sup>8</sup> Ja muidomo casillano, omo iema fecate. Ie nabaina o illa jira, fecateite; iadedi o eo jitailla jira, o jitailla rana fecate. <sup>9-10</sup> Daje ra omoi fafia, iema jenodomoi. Raise jenoia, iema baitomoi. Damiena omoi jenoia, naimie illanomo jaidomoi. Nainomo



naimiēna baillamona, omoīna feiñōite. Ie isoide. Buena omoī jitaia, Jusiñamui mo jica. Iena omoī jicaja jira, iena naimie cacajamona, omoimo iite.

<sup>11</sup> 'Ero, omoimona ie moomo llomeniconā ie jito jicaia, noficina fecañede. Lliciaina jicaia, jaiona fecañede. <sup>12</sup> Jigina jicaia, acaidona fecañede. <sup>13</sup> Jeacinona finocabidomoi; iadedi omoī uruiaimo mare rana fecacabillana uiñotomoi. Cai Moo Jusiñamui jaca mareuidimie. Cai baifemo naimie faite. Ie muidomo naimacina canollena, naimiemo jicadinomo ie Joreñona itataite.

*Comini Jesúna jeare ñaia rafue*  
(Mt 12.22-30; Mr 3.19-27)

<sup>14</sup> Jiairuido Janaba anamo illamiemona Jesús Janabana oni orede. Janabana nia ore-tañenia, Janaba anamo naimie illamona, naie iima ñañide. Janaba oni jailla mei, naimie ñañite. Ie jira comini raíjicaidimaci; <sup>15</sup> iadedi dajerie raitimaci:

—Beelzebú anamo bimie illamona, Beelzebú uaido jananiaina oni orede —raitimaci. Beelzebúdi Janaba comini.

<sup>16</sup> Jiaino naimiēna facaciacasite. Raitimaci:

—Siño uai omo ia, Jusiñamuina siño rafuena finota.

<sup>17</sup> Naimaci comeciaina Jesús uiñua jira, naimacimo llote:

—Daje isoi comeciaina lloillamo daje nairai facañenia, danamo majinidimaci. Oni jaidimaci. Daje isoi comeciaina lloillamo daje jofomo itino facañenia, danamo jainaiainidimaci. Oni jaidimaci. <sup>18</sup> Ie isoide. Beelzebú uaido jananiaina, omoī llua isoi, cue oretaia, Janaba ie dibeimo itino diga jai nabairiñede. Iemona naimie comini danomo iñeitimaci. <sup>19</sup> Omoī comini jananiaina oni oretacabitimaci; iadedi naimaci finoca rafuena uaitañedomoi. Naimacimo jicano, bie isoide rafuena omoī raise uiñollena. Iemei cue finoca rafuena uaitañeitomoi.

<sup>20-22</sup> 'Jiaie rafuedo iena lloiticue. Ero, ie rana raise riiduamona, mairidimie ie rana raise enoite. Ie jofomo ie ra illanona, iena raise sedaite. Jamai bue isoidimie ie rana finide; iadedi naimie baifemo mairidimie bia, naimiēna emodofillamona, ie rana fiñrede. Ie isoide. Janaba anamona cominina jillotacabiticue. Naimie afemo nano cue iñenia, cominina jillotanidicue. Naimie afemo cue illa jira, iena finoredicue. Jusiñamui uaido jananiaina cue oretaia, Jusiñamui rafuena cue llua uiñotomoi.

<sup>23</sup> 'Cue dibeimo iñedimie cuena enoide. Cue dibeimo cominina itatañedimiedi naie cominina cuena iñotañede.

*Janaba anamo illamie rafue*  
(Mt 12.43-45)

<sup>24</sup> Jesús naimacimo nia llote:

—Birui bene ite maraiñede cominidi Janaba anamo illamie isoidimaci. Naimiēmona Janaba oni jaia, jiaie illanona baillena, jofue iñenanomo jaide; iade baiñede. Baiñena jira, naimie comeciina facade: "Navui cue anamo illamie dine abido jaiticue". <sup>25</sup> Abido naimie bia, naie iima comeci namanidena naimie baite. <sup>26</sup> Iemei oni jaillanona, jiaie siete jananiaina naimie diga atide, naimaci anamo naie iima illena. Naie siete jananiaina naimie baifemo maraiñedimaci. Iemona naie iima eo fodo jaide. Ie isoide birui ite maraiñede comini. Cue rafue naimaci iñotañenia, eo fodo jaitimaci.

*Daje riño Jesús eina marena ñaia rafue*

<sup>27</sup> Cominimo Jesús llotemo, comini motomona dañaiño Jesús mo llote:

—O ei caimare illesa. Naiñaiñomona comuidio. Naiñaiño monoí jirodio. Naiñaiño caimare illesa.

<sup>28</sup> Jesús uai ote:

—Marena llotio; ia Jusiñamui uaina naimaci cacajamona, iena iñuamona, jiaino eo caimare iitimaci.

*Dajerie Jesús siño rafuena finuana jitailla rafue*  
(Mt 12.38-42; Mr 8.12)

<sup>29</sup> Ie facaise diga comini Jesús dine biñoidimaci. Naimacimo llote:

—Birui ite cominidomoi maraiñedomoi. Siño rafuena cue finuana cioacadomoi; iadedi iena omoī jamai cioillena, siño rafuena finoñeiticue. Ero, Jonás micorí jaie ite rafuena uiñotomoi. Naiemo omoī comeciaina omoī faca. <sup>30</sup> Naimiemo suide rafuēmona Nínive railla nairaidi Jusiñamui naimiēna oretajana jaie uiñotimaci. Ie isoide. Fiodaillamona cue jilluamona birui ite cominidi Jusiñamui cuena oretajana uiñoitimaci. <sup>31</sup> Ero, Saba railla nairai ie illaiño micorídi Salomón micorí dine jaie aarena jaide. Naimie micorí uiñuacinona naiñaiño micorí cacareillena, aarena jaide. Salomón micorí baifemo birui uaidicue; iadedi cuena iñofedomoi. Omoī comeciaina icinuaina birui omoī meidoñena jira, Jusiñamui uicomo

nana comini ille facaiseconi naiñaiño micori omoina ico ñaite: “Naimiedi siño rafue finuana ciodomoi. ¿Bue ñellena naimiena iñoñedomoi?” omoina ico ñaite. <sup>32</sup>Lliciaí jeraimona naimie jillua mei, Nínive railla nairai dine Jonás micori jaide. Nainomo Jusíñamui rafuena llote. Naie comini iena cacajano, naimaci comeciaí icinuaina meidotimaci. Cue rafuena omoi cacajamona, omoi comeciaí icinuaina birui omoi meidoñena jira, Jusíñamui uicomoi ico nana comini ille facaiseconi: “Cue cominidomoi” omoina raiñeiticue. Jonás micori baifemo birui uaidicue; iadedi cuena iñoñedomoi.

*Jesús comini illa rafue*  
(Mt 5.15; 6.22-23)

<sup>33</sup>Jesús llote:

—Lamparín bu unia mei, jofu anamo bainino rainañega. Cirigai anamo rainañega. Ie rairanomo rainaca, comini nainomo bia, jofu jerai lligaiñollena. <sup>34</sup>Omoi uisi diga rana ciodomoi. Omoi uisi marañenia, rana raise cioñedomoi. Ie isoide. Omoi comeci marañenia, marañedicinona finocana jaidomoi. Jusíñamuina uiñoñedomoi. Ie rafuena jiaí uiñoñedomoi. <sup>35</sup>Ie jira omoi comeciaina raise fino, cue rafuena omoi raise iñollena. <sup>36</sup>Nana omoi comeciaina marena ia, cue rafuena iñocana jaitomoi. Iena raise uiñoitomoi. Jofomo lamparín raise lligaiñua iso, cue rafuena raise uiñoitomoi.

*Jesúdi judúai illaicominina ñaia rafue*  
(Mt 23.1-36; Mr 12.38-40; Lc 20.45-47)

<sup>37</sup>Cominina Jesús llofuia mei, daje fariseo imie naimie dine bite. Raite:

—Cue diga cue jofomoi mai guisaíbi. —Jesús fairiua mei, naimie diga guisaide. <sup>38</sup>Naimie nia guiñenia, naimaci einamaci llogacinodo naimie jaiñenamona, Jesús ie onollina jocoñede. Ie jira naie fariseo imie rajicaide. Ie comecina facade: “Naimie eo mare llofueraíma. ¿Niese caí einamaci llogacinodo jaiñede?” <sup>39</sup>Jesús naimiemo llote:

—Da platos jinafo, da pocillos jinafo jocodino isoidomoi. Da platos jerai, da pocillos jerai jocoñedino isoidomoi. Omoi abina finodomoi; iadedi omoi comeciaina finoñedomoi. Rana eo nicidotomoi. Omoi comeciaina jearede. <sup>40</sup>Abi uiñoñedomoi. Jusíñamui omoi abiaína omoi comeciaina diga finode. Omoi finoca rafuena uiñote. Omoi comeciaina facajacina jiaí uiñote. <sup>41</sup>Omoi comeciaina marena ia, jiaie cominina canodomoi. Temona Jusíñamuimona omoi abi jiaí mare. <sup>42</sup>Fariseuai, omoimo rafuena lloiticue. Nana omoi illimo ite ramona Jusíñamuimo janoie jisa feca-fecacabidomoi; iadedi jiaie cominimo mare rafuena raise finoñedomoi. Jusíñamuina jiaí raise isiruiñedomoi. Nana naie isoide rafuena omoi jiaí finua. <sup>43</sup>Comini omoiri acarillena, ofracomoi uicomoi raicadomoi. Nine omoi macaria: “Jamai bue isoñedicaí” omoi comeciaina facajamona, jiaie comini omoína uaiduana gaidomoi. Iese omoi jailla jira, Jusíñamui omoína duere finoite. <sup>44</sup>“Bainino ite raiafo emodomoi comini uiñoñeno macarillamona, naimaci abi jai jearede” raitomoi. Bainino ite raiafo isoidomoi. Omoi diga jiaie cominidi omoimo ite jeacinona uiñoñeno nabairillamona, jeacinona jiaí finodimaci. Iese omoi finocana jiaia, Jusíñamui omoína duere finoite.

<sup>45</sup>Naie facaise Moisés llogacinuaina llofueraímona damie Jesúmo llote:

—Iese o lloia: “Jeacino finodomoi” caina jiaí llotio.

<sup>46</sup>Jesús uai ote:

—Jusíñamuimona jiaí duere sefuitomoi. Omoi einamaci llogacinuaido raise naimaci jaillena, diga rafue comini finuana jitaídomoi; iadedi iedo naimaci raise jaillena, naimacina jaca canoñedomoi. “Jusíñamuina eo raise sedadicaí” comecina facadomoi. <sup>47</sup>Omoi jaiagaidi Jusíñamui facaina llorainina meinetimaci. Naie lloraini micoriaí raiafuaí birui marena finodomoi; <sup>48</sup>iadedi naimaci micoriaí llogacinuaido omoi birui jiaí jaiñena jira, omoi jaiagai finoca radi: “Mare” raitomoi. Jusíñamui rafuedo birui omoi raise jaiñena jira, omoi jaiagai isoí itomoi. Iese omoi jailla jira, Jusíñamui omoína duere finoite. <sup>49</sup>Omoína Jusíñamui abi uiñuamona jai llote: “Cue rafuena llollena, naimaci dine cue facaina llorainina oretaiticue. Cue rafuena eo uiñotinona jiaí oretaiticue. Dajeriena meinetimaci. Jiaínona duere finoitimaci”. <sup>50</sup>Enirue finua facaisemona ailluena Jusíñamui facaina llorainina meinetimaci. Omoimona Jusíñamui iba oite. <sup>51</sup>Abel micori jiaie ite. Ie ama naimiena meinete. Naimie facaisemona omoi jaiagaidi diga llorainina meinetimaci. Zacaríaia jiaí meinetimaci. Jusíñamui jofomoi Jusíñamuimo toica ocaína jobaisoillano motomoi naimiena meinetimaci. Omoimona Jusíñamui birui iba oite. <sup>52</sup>Omoi llofuiaimona comini Jusíñamui rafuena uiñoñedimaci. Jusíñamui rafuena raise uiñoñedomoi. Jiaíno iena raise uiñuana jitaíñedomoi. Iese omoi jailla jira, Jusíñamui omoína duere finoite.

<sup>53</sup>Fariseo jofomona Jesús jailla mei, fariseuai comini icirillamona, Jesúmo diga rafuena jicanotimaci, naimie uaina uaitallena. Moisés micori llogacino llofueraíni daje isoí uai uaitatimaci. <sup>54</sup>Naimie raise uai oñedena, naimiena duere finoacadimaci.

## 12

*Jesúdi mareuidinona abi caitadinona llofuia rafue*

<sup>1</sup> Ie facaiseconi eo ailluena comini Jesús dine ofidimaci. Ailluena illa jira, conini eilliaimo naidadatimaci. Ie llofueoicaiganomo Jesús llote:

—Fariseuai siritate ramona abina rairui. Biena ñaiticue. “Maredicai” raitimaci; iadedi mareuidinona abi caitadimaci. Naimacimona abina rairui. <sup>2</sup> Naimaci birui finoca rafuena birui bainino finodimaci; ia Jusiñamui naimaci comeciai iticinona ico uiñotaite. <sup>3</sup> Ero, cue rafuena birui anado llocana jaidomoi; ia ico marefodo iena llocana jaitomoi.

*Jesúdi jaciruiñeno llofuia rafue*

(Mt 10.28-31)

<sup>4</sup> Ie llofueganomo Jesús llote:

—Cue nabaiñiaidomoi. Omoína meineiacadinona jaciruiñeno. Omoi abina meineredimaci; ie iadedi omoi joreñona meinenidimaci. Omoína naimaci meinia, omoi joreño Jusiñamui dine jaite. Iena uiñuamona, omoi meineiacadinona jaciruiñeno. <sup>5</sup> Cue rafuedo omoi raise jaiñenia, Jusiñamuina jacirui. Omoi fiodailla mei, omoi abina omoi joreño diga iraimo ie dotalle uai naimiemo ite. Ie jira naimiema jacirui. <sup>6</sup> Ero, dabecuiro janorede sillina fecadomoína, eo janore ibaca. Silliñiai eo janore raifide; iadedi Jusiñamui naimaci illana uiñote. <sup>7</sup> Ero, niga ifotirai omoimo illana Jusiñamui jiai uiñote. Naimiedi omoína sedajana jiai uiñote. Silliñiai baifemo Jusiñamui isirugaomoi. Omoi duere finoacadinona jaciruiñeno. Jusiñamui jitaiñenia, omoimo jaca buena suiñeite.

*Jesús naimiema janoñenana llofuia rafue*

(Mt 10.32-33; 12.32; 10.19-20)

<sup>8</sup> Ie llofueoicaiganomo Jesús nia llote:

—Cue rafuena omoi lluamona, jiaíno omoína duere finoitimaci. Cuená birui omoi janoñenia, nana comini Jusiñamui jaienisai uicomo ico ia, nainomo omoína janoñeiticue. “Cue cominidomoi” omoína raiticue. <sup>9</sup> Cuená birui omoi janoía, nana comini Jusiñamui jaienisai uicomo ico ia, nainomo omoína janoíticue. “Cue cominiñedomoi” omoína raiticue. <sup>10</sup> Jusiñamuidi naga cuena jeare ñaitimie jeacinona feitarede; iadedi Jusiñamuidi ie Joreñona jeare ñaitimie jeacinona feitañeite. <sup>11</sup> Cue rafuena omoi llua muidona, duere sefuitomoi. Illaicomini dine omoína llogidollena comini uia, omoi abi riidollcinomo omoi comeciaina jarire facañeno. <sup>12</sup> Naie facaiseconi Jusiñamui Joreño omoi abi riidollcinona uiñotaite.

*Jesúdi raruiaí eo uamona abi rairuillana llofuia rafue*

<sup>13</sup> Nainomo ite cominimona damie Jesúmo llote:

—Maestro, cue moo jai fiodailla mei, cue ama doforamie cue facaina ite rana cuemo iacañede. Naimiemo llono, cuemo illena.

<sup>14</sup> Jesús uai ote:

—Juezñedicue. Bie isoide rafue cuemo duiñede.

<sup>15</sup> Ie ecimo itinomo llote:

—Ero, rana nicidoñeno. Ailluena ra omoimo illamona, Jusiñamui illanomo riñeitomoi. <sup>16</sup> Iena omoi raise uiñollena, jiaie rafuedo iena lloíticue. Ucuberedimiedi ie illimona ailluena rana ote. <sup>17</sup> Ie jira comecina facade: “Cue illimona ailluena rana oticue; iadedi ¿ninomo iena eenoíticue?” <sup>18</sup> Birui cuemo ite eenoracona judaíticue. Ie mei aillue eenoracona finoíticue. Nainomo cue rana eenoíticue”. <sup>19</sup> Ie comecina facaite: “Cuemo ailluena ra jai ite. Diga años nia iíticue. Jamai iíticue. Marena guiticue. Caimare iíticue”. <sup>20</sup> Iese comecina facade; iadedi Jusiñamui naimiemo llote: “Abi uiñoñedio. Cue llua jira, ja naiona fiodaítio. Ie mei omo ite ra omo fiebiñeite”. <sup>21</sup> Dama ramo ie comecina bu facaía, Jusiñamui jitaillacinomo ie comecina bu facaenia, faifite.

*Jesúdi Jusiñamui cai sedajana llua rafue*

(Mt 6.25-34)

<sup>22</sup> Ie llofueoicaiganomo Jesús llote:

—Jusiñamui jitaillacinomo omoi comecina facaía, omoi illamo omoi comecina jarire facañeitomoi. Bue omoi guillemo jarire comecina facañeno. Omoi jitalle iniroimo jarire comecina facañeno. <sup>23</sup> Jusiñamui omoína itataja muidona, guille omoimo iite. Naimie omoi abi finua muidona, iniroidi omoimo iite. <sup>24</sup> Silliñiaimo comecina faca. Buena riñedimaci. Nie isoide guillena eenoñedimaci; iadedi omoi Moo Jusiñamui naimacina sedajamona, naimaci guille ite. Naimaci baifemo omoi faía jira, naimie omoína canoite. <sup>25</sup> Omoímona, ¿bu ie comeci jarire facajamona a saíríte? Iese jaca buna a saíríñede. Dama Jusiñamui omoína a saírítarede. <sup>26</sup> Omoi comeciaina facajamona omoi a saíríñena jira, jiaie ramo omoi comeciaina jarire finoñeno. <sup>27</sup> Safiamo omoi comeciaina faca. ¿Niese sicodimaci? Maijñedimaci. Iniroína tiferiñedimaci; iadedi Salomón micori naimaci isoí jaie iñede. Naimie

illaimana jira, naimie micori iniroi eo ebirede; iadedi safia naimie iniroi baifemo ebire eruaidē. <sup>28</sup> Jusiñamui safiana ebiretacabide. Dallu facaise illanona, safiadi duide. Safia baifemo omoi uaila jira, Jusiñamuidi iniroina omoimo jaca iite. Safiana naimiedi ebiretaja muidona, omoimo iniroidi jaca iite. Omoi ra omoimo illena, naimiena ino. Jusiñamuina eo janore inotomoi. <sup>29</sup> Omoi comeaiana jarire icana jaiñeno. “¿Buena guitica?” raiñeno. Iemo comeaiana eo facañeno. <sup>30</sup> Jusiñamuina inoñedinio iemo comeina facacabidimaci. Nana omoi jitaillacinona omoi Moo Jusiñamuidi uñua jira, naimaci isoi iñeno. <sup>31</sup> Jusiñamui jitaillacinona finocana omoi jai. Naimiemo omoi comei facaia, omoi illamo omoi comeina jarire facañeitomoi. Iemona guille omoimo Jusiñamui iite. Iniroi omoimo jiai iite.

*Jesúdi Jusiñamuimo comeina facaja rafue*

(Mt 6.19-21)

<sup>32</sup> Jesús llote:

—Cue cominina omoi illanona, uri omoi i. Omoi Moo Jusiñamui jitailla jira, naimie anamo omoina itatajanona, omoina sedaite. <sup>33</sup> Omoi raruaiana fecajanona, ucubena dueredinomo feca. Sabiñeite bolsana ono, omoi ra faifi raillano. Monamo omoi ra illa isoi ñaiticue. Monamo omoi ra illa isoi, iena faifiñeitomoi. Fíriraíma nainomo jaiñede. Giereco nainomo jai iñede. <sup>34</sup> Aillue ra omoimo ia, Jusiñamuimo comeaiana facañedomoi; iadedi naimie jitaillacinona omoi finoi, naimiemo comeaiana facadomoi.

*Jesús ie abido billemo ocurillana llofua rafue*

<sup>35-38</sup> Jesús nia llofue:

—Monamona ico cue abido billemo ocuri. Iena omoi raise cacaillena, bie rafuedo iena lloiticue. Damie ie nabai ie ai ua rafue dine naiona jaide. Ie mullaiaí naimie abido billemo ocurillana ocuide. Naimie billemo naimaci raise ocuri, iniroina jitajanona, lamparíniai unianona, ocuritimaci. Iese naimaci ia, nasena naimie tua, iena raire econoitimaci. Nie hora naimie abido bia, naimiena naimaci inñeno ocuri, ieri naimie iobite. Iobillamona, mullaimana naimie itena, mesamo naimacina ecaite. Naimie bille hora naimaci uññoñena jira, jaca ocuricana naimaci illa. <sup>39</sup> Ero, fíriraíma bille facaiseconí jofó namadi uññotena, nia caadote, ie ra faifi raillanona. <sup>40</sup> Monamona ico abido biiticue. Omoi ocuriñena facaise mo biiticue. Ie jira cue billemo raise ocuri.

*Jesúdi patrón ie mullaimana ie jofona sedataja llua rafue*

(Mt 24.45-51)

<sup>41</sup> Ie como lloga rafuena cacajano, Jesúmo Pedro jicanote:

—¿Bumo bie rafuena llotio? ¿Caimo llotio? ¿Nana cominimo?

<sup>42</sup> Uai ote:

—Bie isoide cominimo lloticue. Ie mullaiaimona patrón damiena fetode, ie jiaie mullaiana sedallena. Naimacina sedajanona, naimie naimacina jiai ecade. <sup>43</sup> Ie mei patrón oni jaide. Jofomo abido naimie bia, ie nanoca mullaima raise maijana fidiia, naimiena raise ibaite. <sup>44</sup> Iobillamona, nana ie raruaiana sedaite; <sup>45</sup> iadedi naie mullaima marañenia, comeina facaite: “Cue patrón are biñeite. Jiaie rafuena finoiticue”. Ie comeina iese facaja jira, naimie anamo ite mullaiana faite. Ie jitailla rafue finuamona, jifairuidino diga jirocabite. Naimacina nabaillamona, naimaci diga guite. Naimaci isoi jearede rafuena finoite. <sup>46</sup> Ie ocuriñena facaise ie patrón abido billanona, naimiena meinetaite. Ie uaina inoñedinio isoi, duere finoite. <sup>47</sup> Naie mullaima ie patrón jitailla rafuena finuana uññote; iadedi iena finoñede. Ie jira eo duere sefuite; <sup>48</sup> iadedi marañede rafuena raise uññoñeno jiaie mullaima finoi, janore duere sefuite. Ie isoide. Jusiñamui rafuena raise uññotino iedo raise jaiñenia. Jusiñamui naimacina eo duere finoite. Iena janore uññotino iedo raise jaiñenia, Jusiñamui naimacina janore duere finoite. Iese omoimo suiñellena, mare mullaima isoi, Jusiñamui jitaillacino finocana omoi jai.

*Jesús muidona nana comini uri iñena rafue*

(Mt 10.34-36)

<sup>49</sup> Jesús llote:

—Cuen naimaci inollena, eniruemo comini dine biticue. Cuen dajerie inuamona, cue cominina jaitimaci. Cuen jaiño inoñenamona, cue cominina jaiñeitimaci. Iemona cominina duere finoiticue. Cue maija raire fuiduana jitaidicue. <sup>50</sup> Cue nia eo duere sefuiticue. Iena raire suillena jitaidicue. <sup>51</sup> Nana cominina uri itatallena eniruemo biñedicue. Cuen inoñedinodi cuena inotinona enoitimaci. Enoillamona, cuena inotinona duere finoitimaci. <sup>52</sup> Cue billamona, daje jofomo itino diese danomo iñeitimaci. Dabecuiro comini nainomo ia, menamie cue dibeimo iite. Daje amani cue dibeimo iñeite. Iese iñenia, daje amani cue dibeimo iite. Mena cue dibeimo iñeite. <sup>53</sup> Cue lloga rafuena damierie inua muidona, ie moo illa dibeimo ie jito iñeite. Ie jito dibeimo ie moo iñeite. Ie ei illa dibeimo

naiñaiño jisa iñeite. Ie jisa dibeimo ie ei iñeite. Ie jifaiño illa dibeimo ie miodi iñeite. Ie miodi dibeimo ie jifaiño iñeite. Iese cominina uri itatañedicue.

*Jesúdi monamo ite rana llofuia rafue*  
(Mt 5.25-26; 16.1-4; Mr 8.11-13)

<sup>54</sup> Cominimo Jesús dane llote:

—Bie eniruemo afai dine uilliena omoi cioia, raicabitomoi: “Noci deiacade”. Iese omoi ciua meinomo, ua noci deide. <sup>55</sup> Bie eniruemo beici dinena aifi bia: “Eo ecasiite” raicabitomoi. Iese aifi bia, ua eo ecasite. <sup>56</sup> Abina uiñotinona abi caitadinodomoi. Monamo eruaiillamona, rafue suillana uiñotomoi; iadedi omoi ecimo suiacalle rafuena raise uiñofedomoi. Cue lloga rafuena raise cacaiñedomoi. <sup>57</sup> Lemo omoi comeiciaina raise facañedomoi. <sup>58</sup> Ero, omoína bu llogidoia, juez dine nia omoi riñenia, omoína llogidotimie diga naie rafuena raise fino. Iena raise finoñenia, juez dine omoi ria, nainomo duere sefuitomoi. Calabozomo omoína jonetaite. <sup>59</sup> Nana raise ibañenia, juez llua isoi, jino jaiñeitomoi. Ie isoide. Cue rafue omoi cacajamona, naimiemona duere sefuiñellena, Jusiñamui diga omoi rafuena raise fino.

## 13

*Jesúdi comeiciái iuai meiduana dana llua rafue*

<sup>1</sup> Cominina Jesús nia llofuetemo, jiaie comini Jesús dine billanona, raitimaci:

—Jerusalémo Jusiñamui jofomo dajerie Galileamona navui bitimaci. Ocainaiaina fatimaci, Jusiñamuina naimaci sedallena. Ie facaiseconi Pilato railla gobernadori daduaina orede, naie cominina fallena.

<sup>2</sup> Jesús uai ote:

—¿Niese comeiciaina facadomoi? “Bie comini iese duere sefuilla jira, jiaie Galilea comini baifemo jeacinona finodimaci” comeiciaina facadomoi. <sup>3</sup> Iese omoi comeiciaina facañeno; ia omoi comeiciái iuai meiduamo comeiciaina faca. Omoi comeiciái iuai omoi meidoñenia, omoidei jiaie faifitomoi. <sup>4</sup> Siloé railla tidacana navui ana goillamo, dieciocho digamie saítabidimaci. Iena fididomoi. ¿Niese naimacimo omoi comeiciaina facadomoi? “Nana Jerusalémo ite comini baifemo jeacinona finodimaci” comeiciaina facadomoi. <sup>5</sup> Iese omoi comeiciaina facañeno; ia omoi comeiciái iuai meiduamo comeiciaina faca. Omoi comeiciái iuai omoi meidoñenia, omoidei jiaie faifitomoi.

*Jesúdi ie Moo comini comeiciái iuai meiduamo fecuise ocurilla llua rafue*

<sup>6</sup> Iena comini raise uiñollena, Jesús bie rafuena llote:

—Damie ie illimo higuera railla riarana rite. Sicua mei, riarana ollena jibuisaide; iadedi nia llisiñede. <sup>7</sup> Ie jira ie illina sedaraimamo llote: “Ero, daje amani años bisoicicue, riarana ollena. Nia llisiñede. Iena mai tie. Naie illanomo jiaie riarana coco rillesa”. <sup>8</sup> Ie illina sedaraima uai ote: “Dama ite. Daje año nia seda. Riarana abina caiguiticue. Eniruena caimaretaiticue. <sup>9</sup> Jiaie año llisia, mare. Llisiñenia, iena tieiticoco”. Ie isoide. Jusiñamui omoi comeiciái iuai meiduamo are ocurrite; ia meidoñenia, omoína duere finoite.

*Jesúdi jiaicaidiñaiñoña jillotaja rafue*

<sup>10</sup> Jiairuido sábadoruimo judíuai ofiracomo Jesús llofuede. <sup>11</sup> Nainomo duidiñaiñodi ite. Janaba anamo naiñaiño illa jira, naiñaiño jiaicaide. Atona naidainide. <sup>12</sup> Naiñaiñoña Jesús cianona, naiñaiñoño llote:

—Ñoo, o duicomona jai jillodio. <sup>13</sup> —Ie mei naiñaiñoña jetade. Ieconí naiñaiño atona naidadate. Ie jira Jusiñamuimo iobillacinona fecade. <sup>14</sup> Naie ofiraco sedaraima icirite, sábadoruimo Jesús naiñaiñoña jillotaja jira. Nainomo itinomo llote:

—Seis digarui ite maijillena. Nairuido omoi bi, omoi duicomona omoi jilloillena. Sábadoruimo biñeno. Sábadoruimo maijifidicai.

<sup>15</sup> Jesús uai ote:

—Maijifididinona abi caitadinodomoi. Sábado iruimo maijicabidomoi. Sábado iruimo omoi toiniaina imaci illanomona suifodomoi, jinui illanomo naimaci jiruaillena. Naie isoide maijia omoimona mare. <sup>16</sup> Ie isoide. Bie riñodi Abraham micori comini. Omoi nairai iñaiño. Dieciocho años Janaba anamo jai illamona, duere sefuide. Naiñaiñoña canollena, sábadó iruimo naiñaiñoña Taiife anamona cue jillotaia, cuemona mare.

<sup>17</sup> Iena Jesús lluamona, nana naimie dibeimo iñedinodi meidaitimaci; iadedi jiaie comini iobidimaci, diga mare rafue naimie finua jira.

*Jesúdi mostaza ido llua rafue*  
(Mt 13.31-32; Mr 4.30-32)

<sup>18</sup> Jesús jiaie rafuena llote:

—Jusiñamui dibeimo comini jailla rafuena nia lloiticue. Jusiñamui rafuena janore comini birui cacajamona, ailluena comini naimie cominina ico jaitimaci. <sup>19</sup> Jiaie rafuedo iena omoimo lloiticue. Mostaza railla ido eo janorede. Ie illimo damie iena rillamona, eo aillue riaradi sicode. Ailluena jira, nainomo sillifia: jicaiciaina finodimaci.

*Jesús siritate rana llofuia rafue*

(Mt 13.33)

<sup>20</sup> Jesús jiaie rafuena llote:

—Jusiñamui dibeimo comini jailla rafuena lloiticue. Jiaie uaido iena omoimo lloiticue. <sup>21</sup> Daje cirigai raifi coremo siritate ra faianona, namo tameia siritate. Ie isoide. Ailluena comini iena cacaillena, Jusiñamui rafue llocana jaite.

*Jesúdi Jusiñamui dine rille llua rafue*

(Mt 7.13-14, 21-23)

<sup>22</sup> Jesús diga nairaimo llofuecana jaide. Jerusalén dine jaide. <sup>23</sup> Jesús oni jaillanona, damie naimiemo jicanote:

—Nama, ¿niga comini o uaina ñnoitimaci? —Jesús uai ote:

<sup>24</sup> —Monamo cue Moo dine jaille nasedi janorede isoide. Naie nasedo llicana o jai. Ailluena comini naiedo jaiacanitimaci; iadedi fo jainitimaci. <sup>25</sup> Naie jofo nama nase ibaila mei, ¿niese fo jaitomoi? Jino naidaillamona, nasena tutajanona, raitomoi: “Nama, o nase econo”. Naimie uai oite: “Omoína uñoñedicue”. <sup>26</sup> Dane lloitomoi: “O diga navui guticai. Cai illanomo llofuetio”; <sup>27</sup> iadedi naimie uai oite: “Omoína uñoñedicue. Cue cominiñedomoi. Jeacino omoi comecimo nia illa jira, mai jai”. <sup>28</sup> Jusiñamui illanomo Abraham micorina, Isaac micorina, Jacob micorina, nana Jusiñamui facaina lloraini micoriaina cioitomoi; ia omoi jino illamona, duere sefuillamona, eeditomoi. <sup>29</sup> Diga comini Jusiñamui illanomo iitimaci. Ailluena judiuañedino naga nairaiaimona Jusiñamui illanomo bitimaci. Nainomo coninina caimare nabaitimaci. <sup>30</sup> Naga nairaimona Jusiñamui cominina jillotarede. Cue rafuena cacadomoi; ia cue cominina omoi jaiacania, abi iedoñeno cuena ñnocana omoi jailla.

*Jesús Jerusalémo itinomo llua rafue*

(Mt 23.37-39)

<sup>31</sup> Ie facaiseconi dajerie fariseuai comini Jesús dine billano raitimaci:

—Benomona mai o jai. Cai illaíma Herodes ona meineiacade.

<sup>32</sup> Jesús uai ote:

—Herodedi eo jifueraima. Naimie dine jai. Naimiemo llono: “Janaba anamo ite cominimona Janabana oni orecaidicue. Duidinona jillotacabiticue. Birui siño rafuena finocaidicue. Ico iese nia finoiticue. Iese cue majille fuite. <sup>33</sup> Nia oni jaiticue. Ailluena Jusiñamui facaina lloraini micoriain nainomo jai fiodailla isoi. Jerusalémo cue rafue jiaie raire fuite” llono.

<sup>34</sup> Jerusalémo itinomo comecina facajano, Jesús llote:

—Jerusalémo itino, omoimo rafuena lloiacadicue. Jusiñamui facaina llorainina jaie meinetomoi. Naimie omoi dine oretaganona noficina fairinuano, naimacina meinetomoi. Omoína cue sedallena, atava ie uruiaí sedaja isoi, diga icaíño cue anamo omoína uaidoia-cadicue; iadedi omoi dinena cuena jitaiñedomoi. <sup>35</sup> Iemona Jusiñamuidi omoi illanona jai fañonocaide. Cue Moo dine jaiticue. Cue jailla mei, cuena cioñeitomoi. Ico cue abido bia, comini cuena lloitimaci: “Jusiñamui oretagamie eo mare. Naimiedi cai Nama” lloitimaci.

## 14

*Jesúdi abina siridimiena jillotaja rafue*

<sup>1</sup> Jiairuido sábadoruimo Jesúdi fariseo imie jofomo guisaidie. Naie fariseo imiedi illaicomini. Nainomo itino Jesús eo eruaidimaci. <sup>2</sup> Guille facaise naie jofomo duidimie bite. Naimie abina siridimie. <sup>3</sup> Nainomo itinomona damieriedi fariseuai comini. Moisés micori llogacinuaina llofueraini jiaie itimaci. Naimacimo Jesús jicanote:

—Sábadoruimo comena cue jillotaia, ¿omoimona jeacino finodicue? ¿Niese Moisés micori llogacinuai iena llote?

<sup>4</sup> Uaina oñedimaci. Ie jira Jesús duidimie onollina llinuamona, naimiema jillotate. Ie mei naimiema jino orede. <sup>5</sup> Nainomo itinomo llote:

—Sábadoruimo majicabidomoi. Sábadoruimo omoi jurareta pozomo uaidena, iena jillotal-lena, nairuimo iena ari otomoi. Omoimona naie isoide majia mare. Bimiema cue jillotaja jira, ¿niese cuena jeare ñatomoi? <sup>6</sup> Iena cacajanona, uainicaidimaci.

*Jesúdi guillena uaidoganona llua rafue*

<sup>7</sup> Jesúsdi naimaci guisaibillana ciode. Jiaino baifemo illena, jofu nama abimo nana raiacadimaci. Iena ciuamona, naimacimo Jesús rafuena llofuede:

<sup>8</sup>—Rafue dine guillena omoína bu uaidoia, jofu nama abimo raiñeno, omoi baifemo itimie bi raillano. <sup>9</sup>Jofu nama abimo omoi raia, omoi baifemo itimie bia, jofu nama omoimo lloite: “Bimiemo omoi raillanona feca”. Meidaillanona, oni rainadaitomoi. <sup>10</sup> Ie jira rafue dine omoína uaidoia, naie jofomo omoi ria, oni rai. Ie mei jofu nama jitaia, omoimo lloite: “Cue abimo rai”. Ie mei nana naie itino omoi iobillana cioitimaci. <sup>11</sup> Ie isoide. Jusiñamuidi jiaimie afemo iacadimiéna jiaimie afemo iñenana itataite. Jusiñamuidi jiaimie afemo iacaiñedimiéna jiaimie afemo itataite.

<sup>12</sup> Naimiéna uaidotimie mo Jesús lloite:

—Guille rafuena o finoia, naga icaíño o nabaiñiána uaidoñeno. Naga icaíño o cominána uaidoñeno. Naga icaíño o ecimo itino ucuberedinona uaidoñeno. Naimacina o uaidotona, jiairuido guillena ona uaidotimaci, naie iba o ollena; <sup>13</sup> ia rafuena o finoia, dueredinona uaido. Ñuja-ñujacaida macaritinona uaido. Uisinidinona uaido. <sup>14</sup> Naimacimona iba ico o oñenamona, Jusiñamui ona caimare itataite. Jiairuido fiodaillamona mareuidino jilloia, monamo Jusiñamui ona ibaite.

*Jesúdi ailluena guille finoca rafuena llua rafue*

<sup>15</sup> Jesús abimo itinomona Jesús lluaña damie cacajano, raite:

—Monamo Jusiñamui illanomo itimiedi marena iite.

<sup>16</sup> Jesús uai ote:

—Iena omoi raise uñollena bie rafuena lloiticue. Damie aillue rafuena finode. Ailluena cominána uaidote. <sup>17</sup> Rafue illaruimo ie mullaímana orede, cominána dane uaidollena. Raité: “Mai bi. Nana guille finuadi jai fuite”; <sup>18</sup> ia biacaiñedimaci. Damie lloite: “Enirúena como ibadicue. Iena jibuisaiacadícue. O rafuemo jaiñeiticue. Ie jira cue joreñona icíñeítiosa”. <sup>19</sup> Jiaimie lloite: “Diez diga juraretana como ibadicue. Naimacina jibuisaiacadícue. O rafuemo jaiñeiticue. Ie jira cue joreñona icíñeítiosa”. <sup>20</sup> Jiaimie lloite: “Riño como oticue. Ie jira o rafuemo jaiñeiticue”. <sup>21</sup> Ie nama dine naie mullaíma abido jaide. Comini biacaiñenana lloite. Iena cacajano, rafue namadi icirite. Ie mullaímamo lloite: “Cai nairai naisona jai. Dueredinona uaido. Ñuja-ñujacaida jaidinona uaido. Uisinidinona uaido”. <sup>22</sup> Ie mei naie mullaíma jaide. Abido naimie bia, ie namamo lloite: “O lluaña finodicue. Ailluena comini jai bitimaci. O jofomo illino nia ite”. <sup>23</sup> Rafue namadi uai ote: “Naisomo itinona bene atillena, cue jofona oruitallena, cai nairaimona jino jai. <sup>24</sup> Cue nano uaidogano cue guillena guiñeítimaci”. Ie isoide. Jusiñamui rafuena feiñotino monamo Jusiñamui illanomo ico iitimaci; ia naimie rafuena jitaíñedino nainomo ico iñeítimaci.

*Jesúdi naimie llofueganona jaiacadino rafue*

<sup>25</sup> Naie facaise ailluena comini Jesús diga jai jaisoidimaci. Naimacimo lloite:

<sup>26</sup>—Cue llofuegamíéna jaiacadimie cuena ie moo baifemo isiruilla. Cuena ie ei baifemo isiruilla. Cuena ie ai baifemo isiruilla. Cuena ie uruiai baifemo isiruilla. Cuena ie amatai baifemo isiruilla. Cuena ie miriñotiai baifemo isiruilla. Cuena ie abi baifemo isiruilla. Iese cuena isiruiñenia, cue llofuegamíéna raise jainide. <sup>27</sup> Cue llofuegamíéna bu jaillamona, duere sefuicana jaité. Nibai naiemona fiodaite. Bu iese jaiacaiñenia, cue llofuegamíéna naimie raise jainide.

<sup>28</sup> ‘Ero, jiaie rafuendo iena lloiticue. Jofona bu finoacania, ie ucubena bailla diese uñollena: “¿Niga raifite?” comecina nano facade. <sup>29</sup> Iese naimie comecina facañenia, goguirai naidania mei, ie ucube riñenia, taiguanona, naimieri jaisitimaci. <sup>30</sup> Raitimaci: “Ie jofu finua tainede; iadedi fuidonide”.

<sup>31</sup> ‘Ero, jiaie rafuendo iena lloiticue. Illaíma jobaimena finoacania, nano comecina facade: “Cuemo ite diez mil soldaduai. Cue bacauaimo ite veinte mil soldaduai. ¿Niese emodofiticue?” Comecina facaja mei: “Emodofíñeíticue” naimie comecina facajia, <sup>32</sup> nia are naimie bacauai ia, daguelli uicodo orede, ie fairiconi diga ñaillena. Raité: “Jobairiacaiñedícue; ia o diga bie rafuena raise finoacadícue”. <sup>33</sup> Biemo comecina omoi faca. Ie raruiaímo bu comecina eo facaia, cue llofuegamíéna jainide.

<sup>34</sup> ‘Sal mare; iadedi ie caimano jai iñenia, ¿dane niese nibaiamona caimarenite? <sup>35</sup> Jai marañede. Enirúemo jonegadéna, jiaí marañede. Oni dotaca. Ie isoide. Cue llua isoi omoi iñenia, cue llofueganona jainidomoi. Omoi jeforena jira, raise fueollena, cue llua mo cacarei. Iena ñino.

## 15

*Jesúdi naimiéna ñnotinomona damie faifillana jitaíñena rafue  
(Mt 18.10-14)*

<sup>1</sup> Naimaci bisoilla isoi ie rafuena cacailena, diga gobiernu ucubena oraini Jesús dine ofidimaci. Jusiñamui llogacinona raise jaiñedino jiai ofidimaci. <sup>2</sup> Iena ciuano, fariseuai cominidi, Moisés micori llogacinuaina llofueraini diga, Jesús joreñona ñaitimaci:

—Bimie marañedicinona finorainina feiñote. Naimaci diga jiai guite.

<sup>3</sup> Naimaci ñaiana uñuanona, Jesús naimacimo bie rafuena llote:

<sup>4</sup>—Omoimona damiemo cien toica llaudaiaia nibai ite. Naimacimona daje feiraite. Ie noventa y nueve llaudaiaia fainonocaida, iena jenuaite, ie baille dinori. <sup>5</sup> Baillanona, ie fecanicomo rocanocaida, iobicana biite. <sup>6</sup> Jofomo naimie ria, ie nabaiñiaia uaidoite. Ie ecimo itinona jiai uaiduanona, raite: “Cue diga iobi. Cue feiraite llaudana jai baiticue”. <sup>7</sup> Ie isoide. Cue rafuena cue llumona, damie ie comeci jeacinona fainonocaillamona, ie comeci iuai meidumona, monamo itimo eo iobitimaci; iadedi noventa y nueve comini marena illamona, janore iobitimaci.

*Jesúdi faifide ucubena bailla llua rafue*

<sup>8</sup> Jesús llote:

—Jiaie rafuena omoimo lloiticue. Dañaiñodemo diez diga ucube ite. Naiemona daje ucube naiñaiño faifia, lamparin unianona, ie jofona gallaite. Eo jenoite, ucube ie baille dinori. <sup>9</sup> Iena naiñaiño baia, ie nabaiñiaia uaidoite. Ie ecimo itinona jiai uaiduanona, raite: “Cue diga iobi. Cue faifide ucubena jai baiticue”. <sup>10</sup> Ie isoide. Cue rafuena cue llumona, damie ie comeci jeacinona fainonocaillamona, ie comeci iuai meidumona, Jusiñamui jaienisai eo iobidimaci.

*Jesúdi damie ie moo fainonocailla llua rafue*

<sup>11</sup> Jesús llote:

—Jiaie rafuena omoimo lloiticue. Damiemo mena jito ite. <sup>12</sup> Ie moomo jamamie llote: “Moo, o fiodailla mei, o raruaiamona janore feiñoticue. O fiodaillana sedaacaiñedicue. O raruaiama cue facaina birui jitaidicue. Cuemo ine”. Ie jira ie moo naimiemo fecade. <sup>13</sup> Ie mei nano nie dinori illamona, nana ie raruai iraianona, jiaie eniruemo jaide. Nainomo ie ucube jamai buruemo faiaide. <sup>14</sup> Nana naimie ucube fuidua facaise, naie eniruemo guille iñede. Aime guitimaci. Naimie jiai aime guite. <sup>15</sup> Ie jira naimo ite patrón dine maijaide. Naie patrón ie chanchuaina sedallena naimiena orede. <sup>16</sup> Naimiena jaca buna ecarainina jira, chanchuai guillemona guiacade. <sup>17</sup> Iese naimie duere sefuilla jira, ja muidomo abina uñocaillamona, comecina facade: “Cue moo jofomo nana naimie mullaiaia raise guitimaci. Guille fiebicabite; iadedi bene aimeri fiodaiticue. <sup>18</sup> Cue moo dine abido ja jaiticue. Naimiemo lloiticue: Jusiñamuimo jeacinona finodicue. Omo jeare jiai finodicue. <sup>19</sup> Odi: ‘Cue jito’ cuena raiñeno. O mullaiaia illa isoi, cuena abido feiño”. <sup>20</sup> Ie facaise ie moo dine jai jaide. Nia aare naimie ia, ie moo naimiena cide. Ie jitona duenaillanona, naimie dine aiside. Naimiena caimadote. Jiai llibanote. <sup>21</sup> Ie jito naimiemo llote: “Moo, Jusiñamuimo jeacinona finodicue. Omo jeacino jiai finodicue. Odi: ‘Cue jito’ cuena raiñeno”. <sup>22</sup> Ie moo iena cacajano, ie mullaiaimo llote: “Cue jitona naimie eruailena, eo mare iniroina ati, naimie jitallena. Cue jitona naimie illa jira, iena jitallena, anillona ati. Naimie jitallena, zapatona jiai ati. <sup>23</sup> Janoreta farediretana fano. Iena raise finuanona, iena mai cai guilli. Iobillamona, caimare ebirede rafuena finoitica. <sup>24</sup> Navui cuemona cue jito fiodaite isoide. Caje cuemo dane abido rilla. Navui cuemona naimiedi faifide; iadedi birui naimiena dane cidicue”. Naimie llua isoi, rafuena finodimaci. <sup>25</sup> Naie facaise nana doforamie illimo ite. Jofomo abido naimie bia, comini iraisillana cacade. <sup>26</sup> Daje mullaimana uaiduanona, naie rafuena jicanote. <sup>27</sup> Naie mullaima uai ote: “O ama abido jai bite. O ama ramo jiriñeno abido billa jira, o moo ie janoreta farediretana jai fatatate”. <sup>28</sup> Iena cacajano, icirite. Fo jaiacaiñede. Ie jira ie moo jino bite. Naimiena fo uaidote. <sup>29</sup> Ie moomo llote: “Ero, diga años o diga maijdicue. O uaina jaca inoticue; iadedi cue nabaiñiaia diga, rafuena cue finollena, chivo cuemo jaca fecañedio. <sup>30</sup> O jito jamamie ie ucube callirediñaiñuimo fuidode; iadedi abido naimie billano, naimie facaina janoreta farediretana fatatatio”. <sup>31</sup> Ie moo uai ote: “Moo, nagarui cue diga itio. Nana cue radi oienite. <sup>32</sup> Cuemona o ama navui fiodaite isoide; iadedi naimiena dane cidicue. Naimie navui faifide raiticue; iadedi caje cuemo dane abido rilla. Cue iobillanona rafuena finodicue”. Bie rafuemona omoi fueollena, iena jai lloticue —Jesús llote.

## 16

*Jesúdi patrón ie mullaima finoca rafuena llua rafue*

<sup>1</sup> Ie llofueoicaiganomo Jesús jiaie rafuena llote:

—Ucuberede patrón ie mullaimana ie rana sedatate. Naie patrón eneno oni illanona, ie mullaima ie rana raise sedañenana fidide. <sup>2</sup> Naimiena uaiduanona, naimiemo jicanote: “¿Maraiñede o finoca rafuena niese fididicue? Omo ite cuentas cioacadicue. Cuemo ati. Cue



diga jai maijiñeitio”.<sup>3</sup> Iena cacajano, naie mullaima comecina facade: “¿Niese nabaiitucue? Cue nama cuena jai dotaacade. Maijiana ocuiniducue. Jiaie cominimona ucube jamai jicajana meiruitucue.”<sup>4</sup> Cue finuana jai uifnotucue. Naimaci jofomo comini cuena ico feifollena cue dotaja mei, nana cue patrón debedinona uaidoitucue”.<sup>5</sup> Ie jira naimacina uaidote. Damiemo jicanote: “¿Cue patrómo niga debedio?”<sup>6</sup> Uai ote: “Cien bidones raifi acceitunamona oga aceitena debedicue”. Naie mullaima raite: “O rabemo jarire ja cueno: cincuenta bidones”.<sup>7</sup> Jiaimiemo jicanote: “¿Niga debedio?” Uai ote: “Cien digagai trigo raifi debedicue”. Naie mullaima dinena raite: “O rabemo ochentana cueno”.<sup>8</sup> Tena fidiano, naie mullaimamo ie patrón raite: “Jiairuido marena o illemo o comecina raise facadio. Eo abina uifnotimiedio” raite. Ero, Jusiñamuina ifofedinodi naimiena ifnotino baifemo ra fecajana baitadimaci.<sup>9</sup> Naiemona omoi fueollena, omoimo lloiticue. Omoimo ite ra diga dueredinona cano. Iemona omoi nabaiñaina jaitimaci. Omoi fiodaia, omoi ra bene fiebite; ia Jusiñamui illanomo naimaci diga omoi ia, naimacina birui omoi canuamona, nainomo omoina marena ñaitimaci.<sup>10</sup> Janore ra omoimo illamona, Jusiñamui facaina birui omoi raise maijia, ailluena ra omoimo itedena, Jusiñamui facaina jiai raise maijimotoi. Janore ra omoimo illamona, marañede rafuena birui omoi finoia, ailluena ra omoimo itedena, marañede rafue nia jiai finoitomo.<sup>11</sup> Omoimo birui ite ra diga Jusiñamui facaina omoi raise maijifenia, naimiemona jiaie rana feifñoñeitomo.<sup>12</sup> Omoi anamo ite ra diga Jusiñamui facaina omoi raise maijifenia, Jusiñamui ie rafue omoimo itatañeite.<sup>13</sup> Mena patrones diga daruido buna jaca maijinide. Mena diga bu maijiacania, damiena jiaimie baifemo gaitte. Ie gaiamie ocuica rana finoite. Jiaimie ocuica rana raise finoñeite. Ie isoide. Raruiái ollemo comecina omoi eo facaia, Jusiñamui jitaillacinomo comecina raise facañeitomo.

*Jesúdi fariseuai comini diga dane ñaia rafue*

<sup>14</sup> Jesús llofuana fariseuai comini cacajano, ucubena eo gaia jira, naimie uaina jaimidimaci.<sup>15</sup> Naimacimo Jesús llote:

—Omoi finoca rafuemona comini omoina: “Mare” raillana jitaidomoi; iadedi Jusiñamui omoi comecia marañenana uifnote. Iese omoi illana Jusiñamui gañede.<sup>16</sup> Jusiñamui facaina lloraini micoriai ciegafuiaimona Jusiñamui rafuena cacacabidomoi. Moisés micori ciegafuiaimona iena jiai cacacabidomoi. Juan Bautista micorimona naimie anamo omoi illana Jusiñamui jitaillana cacadomoi. Jusiñamui dibeimo omoi comecia iuaina meiduana cacadomoi. Iena jiai llocabitucue. Iena ailluena ifnuamona, Jusiñamui dibeimo birui duere iacadimaci.<sup>17</sup> Mona enirue diga nia ia, nana Jusiñamui llogacinuai suicana jaite.

*Jesús ima ie aina dotaja rafuena llofuia rafue*

(Mt 19.1-12; Mr 10.1-12)

<sup>18</sup> Jesús llote:

—Naga aina dotadimiedi, jiaifñaiño ollena, jeacinona jai finode. Dotacañaiño bu oia, jeacinona jai finode.

*Jesúdi ucuberedimie iaimaia Lázaro ie rafuena llua rafue*

<sup>19</sup> Jesús jiaie rafuena llote:

—Cue llogacinona omoi raise uifollena, bie rafue lloiticue. Ucuberedimie ite. Eo mare iniroina jitade. Eo caimare raise guicabite.<sup>20</sup> Naimie nasemo Lázaro raillamie jamai biide. Naimiedi dueredimie. Efonaitimie.<sup>21</sup> Naimiedi ucuberedimie guiga allamona guiacade; ia guifñede. Jiconiaidi naimie efocaina mecabite.<sup>22</sup> Ie mei naimie fiodaite. Jusiñamui cominina naimie illamona, Jusiñamui jaienisaí naimie joreño monamo Abraham micori joreño illanomo uitimaci. Ucuberedimie jiai fiodaite. Comini naimiena raitimaci.<sup>23</sup> Jusiñamui cominina naimie ifnenamona, naimie joreño iraimo jaide. Nainomo naimie duere sefuillamona, Abraham joreño aarena ciode. Naimie ecimo Lázaro micori ie joreño jiai ciode.<sup>24</sup> Abraham joreño uaidote: “Cue moo Abraham, cuena duenai. Lázaron cue dine oreta, ie onocai diga, jinuina cue fuemo llocatallesa, cue fuedo manare jaillena. Bie iraimona jai eo llegi cacadicue”.<sup>25</sup> Abraham joreñodi uai ote: “Moo, o illa dinori naga ra omo ite. Marena itio; iadedi Lázaro duere sefuide. Birui naimie marena ite; iadedi o duere sefuidio.”<sup>26</sup> O dine jainidicai. O enefebetuemo itio. Cai enefebetuemo jiai iticai. Caimona omoi dine bu jaiñellena, omoimona cai dine bu biñellena, iese ite”.<sup>27</sup> Ucuberedimie micori joreño dinena uai ote: “Cue moo jofomo Lázaron oreta.”<sup>28</sup> Cuemo cinco amatiaí ite. Naimacimo riire llollena, bie iraimo naimaci riñellena, naimiena oreta”.<sup>29</sup> Abraham joreñodi uai ote: “Naimacimo Moisés micori ciegafuiaí ite. Jusiñamui facaina jai lloraini micoriai ciegafuiaí jiai ite. Iemo naimaci comeciaina facallesa”.<sup>30</sup> Uai ote: “Iese lloñeno. Iemo comeciaina facañeitimaci; iadedi fiodaillamona jilluanona, naimaci dine bu jaia, naimiena ifnoitimaci. Naimaci comeciaí iuai meidoitimaci”.<sup>31</sup> Abraham joreñodi uai

ote: “Moisés micori cuegafuiai, Jusiñamui facaina jaie lloraini micoriai cuegafuiai naimaci ñnoñenia, fiodaillamona bu jilloia, naimiena jiai ñnoñeitimaci” —Jesús llote.

## 17

*Jesúdi jeacinona fñoñenana llofua rafufe*

(Mt 18.6-7, 21-22; Mr 9.42)

<sup>1</sup> Ie llofueoicaiganomo Jesús llote:

—Diga ramo omoi faicana uitinomo riitomoí. Omoi ramo faitimie duere sefuite. Jusiñamui omoi ramo faitimiena duere finoite. <sup>2</sup> Como creyentena jaidimiena ramo bu faia, naimie cimaioimo aillue notici maianona, joraimo corobaillena naimiena dotacadena, mare. <sup>3</sup> Como creyentena jaidimiena ramo omoi fañellena, abina omoi rairui. O ecimo itimie ona jeare finoa, naimiemo iena llono. Ie comecina meidoiacania, naimie jearede finoca rafuena feita. <sup>4</sup> Nagarui diga icañño ona jeare naimie finoa, naga icañño o diga naimie marena dane ñaiacania, naie rafuena feita.

*Jesúdi naimiena ñnuana llua rafufe*

<sup>5</sup> Ie doce llofueoicaigano Jesús llote:

—Ona ñnoticai; ia caina o uaina eo ñnota.

<sup>6</sup> Uai ote:

—Jusiñamuina eo janore ñnotomoidena, bene ite amenamo omoi lloia: “Benomona jai. Joraimo sico”, naie amena omoi uaina ñnote.

*Jesúdi ie facaina llofueoicaigano maija llua rafufe*

<sup>7</sup> Ie llofueoicaiganomo Jesús llote:

—Bie rafuemona omoi fueollena, iena lloiticue. Illimo ie mullaíma maijiamona, ie toiniái sedajamona jofomo abido naimie ria, ie patrón naimiemo lloñeite: “Mai nano guisaíbi”; <sup>8</sup> iadedi naimiemo lloite: “Cueiena guillena nano fino. Cuenca eca. Ie mei gutio”. <sup>9</sup> Naie mullaíma ocuica rana finua muidona, mullaímana naimie illa jira, ie mullaímano patródi iobillacinona fecañeite. <sup>10</sup> Ie isoide. Nana cue lluana omoi finodomoina, dani omoi maijiadi, cue cominina omoi illa jira, cuemona iobillacinona feññoñeitomoi.

*Jesúdi diez efonaitinona jillotaja rafufe*

<sup>11</sup> Jerusalémo ie llofueoicaigano diga Jesús jaidemo, naimie nabeimo Samaria enirue ite. Naimie jarifebeimo Galilea enirue ite. <sup>12</sup> Nairai dine naimie riacania, diez efonaitinodi naimiemo dafaífidimaci. Eneno oni naidaidimaci. <sup>13</sup> Naimiena ado uaidotimaci:

—Jesús, Maestro, caina duenai. Caina ja jillota.

<sup>14</sup> Naimacina Jesús ciuanona, naimacimo llote:

—Mai jai. Jusiñamui diga ñairainimo omoi abina acata. —Jaidimacimo, jillodimaci. <sup>15</sup> Ie abi jilluana ciuano, naimacimona damie Jesús dine abido bite. Jusiñamuimo iobillacinona ado fecade. <sup>16</sup> Naimiemo iobillacinona jiai fecallena, Jesús uicomo ana bitadate. Naimiedi judíñedimie. Samaritano imie. <sup>17</sup> Jesús llote:

—Diez digamiedomoi. Omoina jai jillotaticue. ¿Ñinomo jainodi nueve digamie itimaci? <sup>18</sup> ¿Ñiese Jusiñamuimo iobillacinona fecaacaiñedimaci? Dama bimie fecade. Naimiedi judío imieñedimie.

<sup>19</sup> Jesús naimiemo llote:

—A naidada. Mai jai. Cuenca o ñnua jira, jai jillodio.

*Jesúdi Jusiñamui ie cominina sedajana llofua rafufe*

(Mt 24.23-28, 36-41)

<sup>20</sup> Naie facaise fariseuai comini Jesúsno jicannotimaci:

—¿Ñiruido Jusiñamui caina bene sedaite?

Jesús uai ote:

—Ñño rafuena omoi ciuamona, Jusiñamui omoina sedallena uññoñeitomoi. <sup>21</sup> Buena ciuamona raiñeitomoi: “Jai, Jusiñamui bene caina jai sedade”. “Jai, batine caina jai sedade”; iadedi omoi motomo itinomona Jusiñamui díbeimo damierie illamona, Jusiñamui omoi motomo jai illana uññoitomoi.

<sup>22</sup> Ie llofueoicaiganomo llote:

—Jaiñruido duere sefuillamona cue diga janore jisa iacanitomoi; iadedi iese nia iñeitomoi. <sup>23</sup> Damierie raia: “Ero, batine Cristo jai bairedo” nainomo jaiñeno. Naimaci raia: “Ero, bene Cristo jai bairedo” iena ñnoñeno. <sup>24</sup> Mona borillamona mona jillacidi usere ciode. Ie isoide. Cue abido bia, nana comini iena uññoitimaci. <sup>25</sup> Birui iese nia suiñeite. Nano duere sefuiticue. Birui ite comini cuena jiai feññoñeitimaci. <sup>26</sup> Abido cue billirui iaerei ia, Noé micori facaiseconi itino isoi, comini iitimaci. Naimaci duere sefuillemo Noé micori facaise itinodi comeciaina facañedimaci. <sup>27</sup> Naie facaiseconi nia eo noci deiñenia, Noé micori

ecimo itino naimaci isoilla isoi icana jaidimaci. Jamai guicana jaidimaci. Aina ua mei, inina ua mei, jebuicana jaca jamai jaidimaci. Dani iemo comeaiina facauidimaci. Jusiñamuimo comeaiina facañedimaci. Iese itimaci, Noé micori ie balsamo fo jailla dinori. Nia noci deiñenia, Noé micori lloga uaina inoñedimaci. Noci deilla mei, ebena nana faifidimaci. Cue abido bia, ie isoite. Ebena biiticue. <sup>28</sup> Lot micori facaiseconi daje isoidimaci. Jamai guicana jaidimaci. Aina ua mei, inina ua mei, jebuicana jaca jamai jaidimaci. Rana ibauidimaci. Iena fecauidimaci. Illimo maijuidimaci. Jofona finouidimaci. Naimaci isoilla isoi icana jaidimaci. <sup>29</sup> Dani iemo comeaiina facadimaci. Jusiñamuimo comeaiina facañedimaci. Iese icana jaidimaci, Sodomamona Lot micori jailla dinori. Nairui monamona boode azufre ebena billanona, nana Sodomamo itino jobaide. Ebena nana faifidimaci. <sup>30</sup> Ie isoide. Abido cue billiruimo comini iitimaci. Cue bia, ebena biiticue. <sup>31</sup> Naie facaise bu ie jofe emodomo ia, ie raruiaina ollena, naimie diga uillena, bu fo jaiñena. Illimo bu ia, ie raruiaina ollena, ie jofomo bu jaiñena. <sup>32</sup> Iemona fueollena, Lot ai micori rafuemo comeina faca. Naiñaiño ie raruiaimo daño comeina facajamona, na ie abi diga faifide. <sup>33</sup> Dama ie raruiaimo ie comeina bu facaia, ja muidomo faifite. Cue diga jaca iñeite; iadedi cue jitaillacinona finuamo ie comeina bu facaia, monamo cue diga jaca iite. <sup>34</sup> Cue bille facaise menamie daje cuartomo iniano iitaiamaiai. Damie jaite. Jaiimie fiebite. <sup>35</sup> Mena riño danomo doberillanona iitaiamaiai. Dañaiño jaite. Jaiñaiño fiebite. <sup>36</sup> Menamie illimo maijiano iitaiamaiai. Damie jaite. Jaiimie fiebite.

<sup>37</sup> Ie llofueoicaigano jicanotimaci:

—¿Ñine jaitimaci?

Uai ote:

—Urujaisai rifaide ramo ofillana uiñua isoi, nana cuena inotino cue abido billena uiñoitimaci. Cuemo duillamona, cue diga jaitimaci.

## 18

### *Jesúdi feciñona llua rafue*

<sup>1</sup> Ie llofueoicaigano Jesús rafuena dane llote:

—Jusiñamuimo jicabi, omoi jicaca rafue omoi feiñolle dinori. Raire feiñoñenia, abina jafueño. <sup>2</sup> Iena omoi raise uiñollena, bie rafuena lloiticue. Jiaie nairaimo juez ite. Jusiñamuina jaciruiñede. Cominina jiai jaciruiñede. <sup>3</sup> Nainomo naimie dine daje feciño jai-jaicabillanona, raite: “Cuena duere finodimeimona cuena cano”. <sup>4</sup> Naimie dinena raite: “Dama iesede. Ona canoñeiticue”. Ie mei ie comeina facade: “Jusiñamuina jaciruiñedicue. Cominina jiai isiruiñedicue; <sup>5</sup> ia naiñaiño cuemo sefuire bi-bina jira, naiñaiño canoiticue, cue rairaiñellena”.

<sup>6</sup> Jesús llote:

—Maraiñede juez llua cacadomoi. Ja muidomo naiñaiño canode. <sup>7</sup> Ero, biemo omoi comeaiina faca. Jusiñamui naie juez isoifede. Nagarui Jusiñamuimo naimaci jicaia, ¿niese naimie ie fetocanona canoñeite? Jaca canoite. <sup>8</sup> Raire fairuanona, naimacina raire canoite; iadedi abido cue bia, ¿niga cuena inotino iitimaci? Nibai ailluena cuena inoñeitimaci.

### *Jesúdi Jusiñamuimo menamie jia llua rafue*

<sup>9</sup> “Mareuidicai” dajerie railla jira, “Jiaie comini baifemo faiticai” dajerie railla jira naimacimo Jesús bie rafuena llote:

<sup>10</sup> —Jusiñamui jofomo, nainomo jillena, menamie jaidiamaiai. Damie fariseo imie. Jaiimie gobierno ucubena oraima. <sup>11</sup> Fariseo imie naidadacaida, dama anado jüde: “Jusiñamui, jiaie comini isoifedicue. Fñidimaci. Maraiñedimaci. Naimaci añede riño diga itimaci. Cue ecimo ite ucubena oraima isoi iñedicue. <sup>12</sup> Naga semana menarui guicabifedicue, ona raise cue sedajanona. Cue ramona omo fecacabidicue. Macaibaite” jüde. <sup>13</sup> Gobierno ucubena oraima eneno naidadacaida, jüde. Monamo eruaiñede; iadedi jamai bue isoillanona, jogobena farode. Raite: “Jusiñamui, jeacinona finoramadicue. Cuena duenai. Macaibaite” jüde. <sup>14</sup> Jusiñamuidi jaiimie afemo iacadimena jaiimie afemo iñenana itataite. Jusiñamuidi jaiimie afemo iacañedimena jaiimie afemo itataite. Ie jira gobierno ucubena oraima ie jofomo Jusiñamuimona jai marebicailanona jaide; ia fariseo imie iese jaiñede.

### *Jesúdi naimie dine uruai billana jitailla rafue*

(Mt 19.13-15; Mr 10.13-16)

<sup>15</sup> Naie facaise Jesús dine comini naimaci eisaiaina atisite. Ie onolli naimacimo naimie joniana jitaidimaci. “Naimacina raise cano” ie Moomo lloillena jitaidimaci. Iena ciuanona, ie llofueoicaigano cominina Jesús dine billana rairuidimaci; <sup>16</sup> iadedi Jesúdi eisaiaina uaiduano raite:

—Uruiaí cue dine billesa. Naimacina rairuñeno. Cuena bie isoi ñnotinodi Jusiñamui cominidimaci. <sup>17</sup> Bie uruiaí abina iedoñedimaci. Einamacimona jamai bue isoidimaci. Naimaci isoi bu ifenia, Jusiñamui cominina jaiñeite. Jusiñamui naimiena sedallena, Jusiñamui cominina naimie jaiñeite.

*Ucuberedimie Jesús diga ñaia rafue*  
(Mt 19.16-30; Mr 10.17-31)

<sup>18</sup> Ie facaise illaicominimona damie Jesús mo jicanote:

—Maestro, odi mareuidimiedio. Jusiñamui diga ico monamo cue jaca illena, ¿nie isoide rana finoiticue?

<sup>19</sup> Jesús uai ote:

—¿Bue ñellena cuena: “Mareuidimiedio” raitio? Dama damie mareuidimiena. Naimiedi Jusiñamui. Naimiemo jicano. <sup>20</sup> Moisés micori llogacinuaina ñinocana jai. Jaie cuete: “O añede riño diga ñeno. Comena meineño. Rana fiiño. Jiaimiena o llogidoia, tainona lloño. O moo uaina ñno. O ei uaina ñno”.

<sup>21</sup> Uai ote:

—Cue uruena illa facaisemona nana bie llogacinuaina ñinoticue.

<sup>22</sup> Iena cacajano, Jesús raite:

—Daje rana nia finoñedio. O raise marebicaiacania, omo ite raruiaina feca. Naie ucubena dueredinomo feca. Cuena o ñnuamona, monamo ico jaca iitio. Cue llofueoicaiganona o illena, mai cue diga bi.

<sup>23</sup> Jesús lluaana naimie cacajano, sunaicaide. Naimiemo eo ailluena ra illa jira, iena fecaacañede. <sup>24</sup> Naimiemo eruailano, Jesús raite:

—Ucuberedinodi Jusiñamui cominina jaillena eo sefuiruite. <sup>25</sup> Igido ifodo camello jaca jainde. Ie isoide. Ie ra isiruillamona, ucuberedimiedi Jusiñamui cominina jiai raise jainde.

<sup>26</sup> Jesús lluaana cacadino jicanote:

—¿Iemona buca jillobiti?

<sup>27</sup> Jesús uai ote:

—Nana comini dani jillobinidimaci; iadedi Jusiñamuidi naimacina jillobitarede.

<sup>28</sup> Pedro raite:

—Ero, o llua isoi cai jofuena fañonocaída, o diga jaisoidicai.

<sup>29</sup> Uai ote:

—Uanaicinona lloticue: Jusiñamui cominina naimie jaillamona, ie jofona bu fañonocaía, ie aina bu fañonocaía, ie amatiaina bu fañonocaía, ie moona bu fañonocaía, ie eina bu fañonocaía, ie uruiaína bu fañonocaía, <sup>30</sup> Jusiñamui mona ailluena ibana birui feiñoite. Monamo ico jiai jaca iite.

*Jesúdi ie fiodaillena dane llua rafue*  
(Mt 20.17-19; Mr 10.32-34)

<sup>31</sup> Ie doce llofueoicaigano eneno uillanona, dani naimacimo llote:

—Ero, Jerusalémo jai jaidicai. Monamona billanona, ñmana jaidicue. Jusiñamui facaina lloraini cuena jaie cuetimaci. Nana naie rafue ja suite. <sup>32</sup> Judiaañedinomo judiaí illaicomini cuena fecaitimaci. Cueri jifanoitimaci. Cuena jeare finoitimaci. Cuena tuallaitimaci. <sup>33</sup> Cuena faitimaci. Cuena meineitimaci; ia darui amani illanona, cue fiodaillamona jilloiticue.

<sup>34</sup> Naimie lluaana raise cacañedimaci. Naimacina iena Jesús nia raise llofueña jira, iena raise uiñoñedimaci.

*Jesúdi uisínidimiena jillotaja rafue*  
(Mt 20.29-34; Mr 10.46-52)

<sup>35</sup> Jericó railla nairaímo ie llofueoicaigano diga Jesús riacademo, uisínidimie naiso fuemo raillana ciode. Ucubena jamai jica-jicade. <sup>36</sup> Ailluena comini Jesús diga jaillana naimie cacajano, naie cominimo nie isoide rafue illana jicanote. <sup>37</sup> Uai otimaci:

—Nazaret ie Jesús como bene bite.

<sup>38</sup> Ie jira naimie cuirioide:

—David micori Jitona o illamona, cuena duenai. Cuena cano.

<sup>39</sup> Uicodo jaidino naimiena lletade, naimiena llicaitallena; iadedi naimie eo cuirioide:

—David micori Jitona o illamona, cuena duenai.

<sup>40</sup> Naimiena cacajano, Jesús naidadate.

—Cue dine naimiena ati —llote. Naimiena atianona, naimiemo Jesús jicanote:

<sup>41</sup> —¿Niese ona cue nibaiana jitaídio?

Uai ote:

—Maestro, cioacadicue.

<sup>42</sup> Jesús raite:

—Mai eroda. Cuen a o ñnua jira, jai jillodio.

<sup>43</sup> Iecon naimie uisidi ciode. Jusiñamuimo iobillacinona fecajano, Jesús diga jaidino diga naimie jaide. Naimie jilluana ciuamona, nana comini Jusiñamuimo iobillacinona jiaí fecadimaci.

## 19

### *Jesús Zaqueo diga illa rafue*

<sup>1</sup> Jericómo Jesús rillanona, nainomo macaritemo, <sup>2</sup> naie facaise nainomo Zaqueo rillamie ite. Gobierno ucubena nanoca oraima. Naimiedi eo ucuberede. <sup>3</sup> Jesús bai macaritemo, Zaqueo naimiena cioacade; iadedi ailluena comini illamona, Zaqueo ianorina jira, Jesúsna cionide. <sup>4</sup> Ie jira uicodo aisicana jaide, amenamo a jaillena, naimiena cioillena. <sup>5</sup> Naimie dine Jesús rillano, Zaqueomo a erodate. Naimiena uaidote:

—Zaqueo, raire ana bi. O diga danomo illena, o jofu dine jaiticue.

<sup>6</sup> Ie jira raire ana bite. Ie jofomo Jesúsna iocire feiñote. <sup>7</sup> Iena jiaie comini cianona, Jesús joreñona jeare ñaianona raitimaci:

—Mariñedinona finoraima jofomo naimie jaide.

<sup>8</sup> Jesúsna naimie feiñua mei, Zaqueo Jesús ecimo naidaita, naimiemo llote:

—Nama, atuedo cue raruiaina dueredinomo biruimona fecaiticue. Bumona navui cue fiia, cuatro diga ra abido iiticue.

<sup>9</sup> Jesús uai ote:

—Iese o llua jira, o comini diga Jusiñamuina jai o ñnuana uiñoticaí. —Jamai bitinomo llote:

—Zaqueodi Abraham micori jito; ia Jusiñamuina navui ñnoñede. <sup>10</sup> Naimie isoidino jillobitallena, biticue. Monomona billanona, imana jaie jaidicue. Jusiñamuina ñnoñedinona jenuaibidicue, naimacina jillobitallena.

### *Illaima ie mullaiaimo ucubena fecaja rafue*

<sup>11</sup> Zaqueo jofomo itino Jesús llofuiana cacajano, comecina facadimaci: “Jerusalén ianori ite. Nainomo Jesús rilla mei, illaima isoi nainomo Jusiñamui ie cominina raire sedaite”. <sup>12</sup> Iena naimaci raise uiñollena, Jesús bie rafue naimacimo llote:

—Illaima jito ie nanoca illaima dine jiaie nairaimo jaide. Ie cominina sedallena, nanoca illaimamona ie uaina feiñoiacade. Iemei abido biacade. <sup>13</sup> Nia naimie jaiñenia, diez diga ie mullaiaina uaidote. Nagamierie daberie ucubena fecade. Naimacimo llote: “Bie ucube diga jiaie ucube ocana omoi jai”. Ie mei oni jaide. <sup>14</sup> Ie comini naimiena enoidimaci. Jiaionna nanoca illaima dine oretajano, raitimaci: “Bimie caina sedajana jitañedicaí”; ia nanoca illaima dinena naimaci llua jaca cacañede. Ie jira naie nanoca illaima naie illaima jitomo ie uaina ite. <sup>15</sup> Ie uaina feiñua mei, abido ie eniruemmo jaide. Rilla mei, ie mullaiaina uaidote. Nie diese ucubena ocana naimaci jaillana uiñoiacade. Ie jira naimacina uaidote. <sup>16</sup> Nano bitimie raite: “Nama, o cuemo dabe fecadio. Dabedemona jai cuemo ite diez digabe”. <sup>17</sup> Naie illaima naimiemo llote: “Eo marena maijidio. Mare mullaamadío. Janore ra raise o sedaja jira, ona diez nairaiaina sedataiticue”. <sup>18</sup> Ie mei jiaie mullaiaina billanona, raite: “Nama, o cuemo fecaca dabedemona jai cuemo ite cinco digabe”. <sup>19</sup> Illaima llote: “Ona cinco nairaiaina sedataitica”. <sup>20</sup> Ie mei jiaie mullaiaina bite. Raite: “Nama, jadi, o cuemo iga o ucube. Iniroimo tilliano, iena eenoticue. <sup>21</sup> Ona cue jaciruillano, odi eo riimiena jira, iena jamai eenoticue. Jiaie cominimona ie rana bairocabidio. O maijiñena ramona ocabitio”. <sup>22</sup> Illaima dinena raite: “Eo marañede mullaamadío. Cuen a o llua isoi, ona duere finoiticue. Cue riimienana uiñotio. Jiaie comini ie rana cue baiaruana uiñotio. Cue maijiñena motomo ra cue uana uiñotio; ia buena maijiñedio. <sup>23</sup> ¿Bue ñellena bancomo cue ucube joneñedio? Bancomo itena, jiaie ucubena ocana jaide. Ie mei abido cue bia, omo cue fecaja ucube baiñemo feiñotica”. <sup>24</sup> Nainomo itinomo llote: “Naie ucube naimiemona baiaruano, diez digabe itimiemo feca”. <sup>25</sup> Uai otimaci: “Naimiemo ailluena ucube jai ite. ¿Bue ñellena dane jiaie fecaitio?” <sup>26</sup> Illaima dinena uai ote: “Ailluena raredimie jiaie rana feiñoite; iadedi janore raredimie ie rana faifite. <sup>27</sup> Cuen enoidinona bene ati. Naimacina cue sedajana jitañedimaci. Naimacina meine”.

Jesús nia llote:

—Ie isoide. Iese omoimo suiñellana, Jusiñamui ie comini sedalliruina omoi uiñoñena jira, cue jitaillacino finocana jai.

### *Jesús Jerusalémo jailla rafue*

(Mt 21.1-11; Mr 11.1-11; Jn 12.12-19)

<sup>28</sup> Naie rafuena llofui mei, Jerusalén dine comini uicodo ie llofueoicagano diga Jesús jaide. <sup>29</sup> Jerusalén iaiecaidemo, mena nairaimo riacade. Betfagémo railla nairaimo

ride. Betania nainomo jiai ite. Olivos railla anedumo naga nairai iaiaiaia ite. Ie llofueoicaiganomona mena orede. <sup>30</sup> Raite:

—Bie nairai illa uicomo mai omico jai. Nainomo cuinaca burritona baitomico. Naie burrito emodomo nia buna jaiñena. Iena suiñuano bene ati. <sup>31</sup> Omicomo: “¿Bue ñellena iena suiñodomico?” bu jicanoia, llono: “Coco Nama iena jitaide”.

<sup>32</sup> Naimie llua isoi jaidiaiaiaia. Naimie llua isoi burritona baitiaiaiaia. <sup>33</sup> Te facaise ie nanai iaiaiaia jicnote:

—¿Bue ñellena cai burritona suiñodomico?

<sup>34</sup> Uai otiaiaiaiaia:

—Coco Nama iena jitaide.

<sup>35</sup> Ie mei Jesúmo iena atidiaiaiaia. Burrito emodomo iniroina jobianona, ie emodomo Jesúsdi rainadate. <sup>36</sup> Jesús iese jaidemo, naimiena iobitallena, illaia isoi naimie jaillena, comini imaci iniroi diga, naiso motomo jobedimaci. <sup>37</sup> Jerusalémo joide naiso ite nafai muidomo naimie rillanona, naie ituemo ana jaillanona, nana Jesús diga jaidino caimare itimaci. Nana Jesús siño finoca rafuena naimaci jai ciua jira, iena naimaci uibiñuamona, Jusiñamuimo iobillacinona ado eo fecadimaci. <sup>38</sup> Raitimaci:

—¡Cai illaia billa! ¡Jusiñamui namecido bitimie mo cai iobicabillasa! O muidona Jusiñamuidi comini diga uri ite. ¡O finoca rafue muidona Jusiñamuimo iobicabillasa!

<sup>39</sup> Naie cominimona dajerie fariseuai raitimaci:

—Maestro, o diga jaidinona llucaillena, naimacina lleta.

<sup>40</sup> Uai ote:

—Naimaci llucaila, biso fuemo ite noficidi cuena marena ñaite.

<sup>41</sup> Jerusalémo Jesús iairei ria, iena ciuano, eede. <sup>42</sup> Raite:

—Jerusalén itino, Jusiñamui diga omoi uri illena jai biticue. Omoia naimie cominina itataiacadicue; iadedi iena jitañedomoi. Iena jitañedomoiena, ico duere sefuiñetomoi. <sup>43</sup> Jaiñuido omoi bacauai jobaimena finuanona, omoia cirinoitimaci. Omoi ecido llaitimaci. <sup>44</sup> Omoia meineitimaci. Omoi uruiaia meineitimaci. Omoi illanona judaitimaci. Jusiñamui omoi motomo birui illana omoi uifñoñena jira, iese omoimo suite.

*Jesúdi Jusiñamui jofomona damieriena dotaja rafue*

*(Mt 21.12-17; Mr 11.15-19; Jn 2.13-22)*

<sup>45</sup> Jerusalémo Jesús rilla mei, Jusiñamui jofomo jaide. Jusiñamuimo ofomaiaia fecallena, naimie mo toica laudaiaia fecallena, nainomo comini jaisoidimaci. Naie cominina ibatajanona, ofomaiaia, toica laudaiaia diga, damierie fecauidimaci. Iena ciuanona, naimacina jino orede. <sup>46</sup> Raite:

—Te facaina lloraia micori Jusiñamui llogacino jaie cuega: “Cue jofo ite nainomo cuemo comini jillena” cuega. Ero, ailluena omoi ibataja jira, naimie jofona firiruidino jofona omoi finoca.

<sup>47</sup> Jusiñamui jofomo nagarui Jesús llofujete. Judiaui illaicominidi Jesúsna meineiacadimaci;

<sup>48</sup> iadedi niese nibañedimaci, nana comini naimie llofuiana eo jitailla jira.

## 20

*Jesúdi ie siño uaina llua rafue*

*(Mt 21.23-27; Mr 11.27-33)*

<sup>1</sup> Jusiñamui jofomo Jesúsdi cominina llofujete. Jusiñamui rafuena llofujete. Judiaui illaicomini naimie dine bitimaci. Naimacidi Jusiñamui diga nanoca ñairaini. Naimacidi Moisés micori llogacino llofueraini. Naimacidi einamaci. Dies billanona, <sup>2</sup> jicanotimaci:

—¿Nie isoide uaido o finoca rafuena finocabidio? ¿Bu omo iga uai diga o finoca rafuena finocabidio?

<sup>3</sup> Jesús dinena uai ote:

—Omoimo nano jicanoiticue. <sup>4</sup> Juan Bautista micoridi cominina navui bautizade. ¿Bu naimie micorina cominina bautizatate? ¿Jusiñamui? ¿Comini? Cuemo llono.

<sup>5</sup> Dani coniniri iena siaduanona raitimaci:

—“Jusiñamui” cai fairioia, caimo jicanoite: “¿Bue ñellena naimie micorina inoñedomoi? ¿Bue ñellena naimie micori llua isoi bautizañedomoi?” <sup>6</sup> “Comini” cai fairioia, bene itino caina meineitimaci, Juan micoridi Jusiñamui facaina lloraia naimaci railla jira.

<sup>7</sup> Ie jira Jesús uai otimaci:

—Uifñoñedicaia.

<sup>8</sup> Jesús dinena raite:

—Ie muidona cuemo nie isoide uai illana omoimo lloñeiticue.

*Jesúdi marañede majiraini rafuena llua rafue*

*(Mt 21.33-44; Mr 12.1-11)*

<sup>9</sup> Nainomo itinomo Jesús llote:

—Jiaie rafue omoimo lloiticue. Iemo cacarei. Daje patrón uvas railla riaraiaina rite. Ie mei ibatajanona jiaínomo fecade, iena sedallena. Ie mei jiaie eniruemo are illena jaide. <sup>10</sup> Uvas jai einaila facaise riaraiaina sedaraini dine daje mullaimana orede, naimie facaise iedinona naimie feiñollena; iadedi naie sedaraini naie mullaimana fatimaci. Uvas naimiemo fecañeno abido oredimaci. <sup>11</sup> Ie mei patrón jiaie mullaimana orede. Naimiena fatimaci. Jeare finodimaci. Uvas naimiemo fecañeno abido oredimaci. <sup>12</sup> Naie patrón jiaimiena orede. Naimiena eo bofedaitajanona jino dotadimaci. <sup>13</sup> Iemei patrón comecina facade: “¿Niése nibaiticue? Cue isiruiga jitona oretaiticue. Naimiena nibai jaciruitimaci. Naimie uaina inoitimaci”. <sup>14</sup> Riaraiaina sedaraini naimiena cuanona, coniniri ñaitimaci: “Bimiemo bie illi fiebiite, naimie moo fiodailla mei. Naimiena cai meinelli, bie illi caimo fiebillesa” ñaitimaci. <sup>15</sup> Naimiena jino dotajanona, naimiena meinetimaci. Iena fidia mei, ¿niése naie patrón nibaiite? <sup>16</sup> Naimie biite, naie sedarainina meinellena. Ie mei jianona ie illina sedataite.

Naie rafuena cacadino raitimaci:

—Bie isoide rafue suillana jitaiñedicai.

<sup>17</sup> Naimacimo Jesús eruaillano, llote:

—Naie illi sedaraini isidomoi. Jusiñamui facaina lloraíma micori omoína jaie cuete. Ie cugeafuena raise facañedomoi. Naimie micori cuela:

Jofo finoraini jitaiñena nofici nana naie jofomo ite nofici baifemo jai uaide.

cuela. Jusiñamui cominina damierie jaillana naimie micori cuete. Jusiñamui oretagamiena damierie jitaiñenamona, naimie cominina jaiñeitimaci; iadedi Jusiñamui oretagamiena ail-luena inuamona, naimie cominina jaitimaci. Ero, naimie micori caina cuete. Naie jofona finoraini isidomoi. Naie nofici isoidicue. Cue rafuena omoi jitaiñena jira, naimie cominina jaiñeitomoi. <sup>18</sup> Naie noficina nia ñaiticue. Noficimo bu eicaitaia, bofedaite; ia naie nofici bumo ana uai, naimiena saitaite. Ie isoide. Cue lluaana omoi jamaia, duere sefuitomoi. Iena omoi inoñena, ja muidomo faifitomoi —llote.

*Jesúmo gobiernomo ucubena fecajana jicanua rafue*

(Mt 21.45-46; 22.14-22; Mr 12.12-17)

<sup>19</sup> Jesús como lloga rafuedo naimacina ñaiana uiñotimaci. Ie jira naie facaiseconi judiaí illaicomini naimiena gaitaacadimaci; iadedi cominina jaciruitimaci. <sup>20</sup> Ie jira naimiena uiñododimaci. Mare rafuedo abi caitadinona oredimaci. Naimie raise uai oñenia, naimiena duere finollena, naimiena facaciacadimaci. Gobernadoromo naimiena llogidoiacadimaci.

<sup>21</sup> Jesúmo llotimaci:

—Maestro, uanaicóna marena llofuecabitio. Nana cominina dauaido llofuecabitio. Jusiñamui rafuedo cai marena jaillana raise llofuetio. <sup>22</sup> Omo rafuena jicanoiacadicaí. Dama Jusiñamuina sedadicaí; iadedi romanos railla nairai anamo birui cai illa jira, ¿naimaci illaíma Césarmo ucubena cai fecajana rairuidio? Caimo llono —lloimaci.

<sup>23</sup> Naimiena naimaci jifuiana uiñuanona, Jesús dinena uai ote:

<sup>24</sup> —Ucube cuemo acata. ¿Bu ie joreño nainomo ite? ¿Bumo jainaiide bie cuela radi?

Uai otimaci:

—César.

<sup>25</sup> Jesús raite:

—César iena itedi, Césarmo ille. Jusiñamui iena itedi, Jusiñamuimo ille —raite.

<sup>26</sup> Jesúdi uai raise ua jira naimie llumona jeare rafuena uiñoñedimaci, naimiena llogidollena. Naimie lluari rajicaillamona, llucaidimaci.

*Jesús dine saduceuai railla comini billa rafue*

(Mt 22.23-33; Mr 12.18-27)

<sup>27</sup> Naie facaise dajerie saduceuai railla comini naimie dine bitimaci. “Fiodaillamona jaca buna jilloñeite” raisoidimaci. <sup>28</sup> Jesúmo llotimaci:

—Maestro, cai facaina Moisés micori jaie cuela: “Fima fiodailla meinoconi, naimie urue iñenia, ie ama naie feciño olle. Naimiedi uruiaina ie ama facaina comuitaite” cuela. <sup>29</sup> Bie rafuena uiñoiacadicaí. Siete amatiaí ite. Nano doforamie ie aina ote. Naimie nia uruiainide fiodailla. <sup>30-31</sup> Ie emodo imie ie ama feciñona ote. Naimie uruiainide jiaí fiodailla. Naie siete digamiedemona iese sefuide. <sup>32</sup> Ja muidomo naie riño jiaí fiodaite. <sup>33</sup> Fiodaillamona, ico naimaci jilloiadedi, ¿bu naie riño ienite? Nairiñe siete digamiena inirede —lloimaci.

<sup>34</sup> Jesús uai ote:

—Birui aina otomoi. Inina otomoi; <sup>35</sup> iadedi fiodaillamona, Jusiñamui diga jaca itino jillua mei, ainitimaci. Ininitimaci; <sup>36</sup> ia Jusiñamui jaienisaí isoi illanona, dane fiodaíñeitimaci.

<sup>37</sup> Fiodaitino jilluaana omoimo lloiticue. Moisés micori jofue iñenanomo illa facaise, amena

boode motodo Moisés micorimo Jusiñamui ñaia facaise, naimie micorimo comini ico jilloillena Jusiñamui llote: “Abraham ie Jusiñamuidicue. Isaac ie Jusiñamuidicue. Jacob ie Jusiñamuidicue” llote. <sup>38</sup> Jai fiodaitimaci; ia naimaci joreñuai nia itimaci. Jusiñamuidi dani cagedino imaci Jusiñamuina jira, naimaci joreñuai naimie dine itimaci. Ico naimaci abiaina jiai jillotaite. Naimiemo naimaci duillamona, naimaci abiaia diga jilluanona, naimie diga jaca iitimaci —llote.

<sup>39</sup> Iena cacajano, Moisés micori llogacinuaina llofuerainimona dajerie raite:

—Maestro, raise llotio.

<sup>40</sup> Ie facaise naimiemo nie isoide rafuena dane jicanuana jaciruitimaci.

*Jesús dinena fariseuai cominimo jicanua rafue*

(Mt 22.41-46; Mr 12.35-37)

<sup>41</sup> Iemei naimie ecimo itinomo Jesús jicanote:

—¿Niese Moisés micori llogacinona llofueraini Cristona raitimaci? ¿Niese naimiedi David micori jítona raitimaci? <sup>42</sup> Salmos railla cuegafuaimo David micori jaiie cuega:

Jusiñamuidi cue Namamo llote: “Illaimana o illamona, cue nabeimo ana rai.

<sup>43</sup> Ona inoñedino o anamo itataiticue”.

<sup>44</sup> “Cristodi cue Nama” David micori raite. Iese naimie micori railla jira, Cristo David micori afemo faite. Naimiedi dama David micori jitoñede; ia jiai ie Nama.

*Jesúdi judíuai illaicominina ñaia rafue*

(Mt 23.1-36; Mr 12.38-40; Lc 11.37-54)

<sup>45</sup> Nana comini cacajano, ie llofueganomo Jesús llote:

<sup>46</sup> —Moisés micori llogacinuaina llofuerainimona abina rairui. Ilaicomini naimaci itimaciden, naimacina comini cioillena, eo mare iniroina jitaacacabidimaci. Nine naimaci macaria, naimaci jamai bue isoifñedina itimaciden, comini naimacina uaiduana gaidimaci. Comini naimaciri acarillena, ofracomo uicomo raicadimaci. Rafue ia, naimaci jamai bue isoifñedina comecina facajanona, rafue nama ecimo raicadimaci.

<sup>47</sup> Feciñuaimona rana ocabillanona, naiñaiñuaina duere finodimaci. Naimiena eo sedadimaciden, Jusiñamuimo are jicabidimaci. Iese naimaci icabilla jira, Jusiñamui naimacina jiaie comini baifemo duere finoite.

## 21

*Jesúdi Jusiñamui jofomo duerede feciño ucube fecajana ciua rafue*

(Mr 12.41-44)

<sup>1</sup> Jusiñamui jofomo Jesús nia ia, a erodatemo, nainomo ite eenoranomo ucuberedino ucubena joniana ciode. <sup>2</sup> Eo duerede feciño menaruñu joniana jiai ciode. <sup>3</sup> Ie llofueoicaiganomo Jesús llote:

—Bie eo duerede feciño nana ucuberedino jonia baifemo jonete. <sup>4</sup> Naimacimo ailluena ite; iadedi naie ucubemona janore jonetimaci. Naiñaiño eo duerede; iadedi nana naiñaiñoite ite ucubena jai jonete. Janore jonete; ia Jusiñamuimona naiñaiñodi jiaino baifemo jonete.

*Jesúdi Jerusalémo ite Jusiñamui jofu judaiana llua rafue*

(Mt 24.1-28; Mr 13.1-23)

<sup>5</sup> Naie facaise Jesús llofueoicaiganomona dajerie Jusiñamui jofona eruaillanona, raite:

—Mare nofici diga finoca. Eo mare ra nainomo jiai ite.

<sup>6</sup> Jesús llote:

—Birui bie rana ciodomoi; iadedi ico jairuido nana bie jofomo ite nofici: oni judaisite.

<sup>7</sup> Jicanotimaci:

—Jusiñamui jofu judaisillana omo jicanoiacadicaí. ¿Niruido iena suite? Nana o lloga rafue suillena, ¿nie isoide rafue nano suite? Iena caimo llono.

<sup>8</sup> Uai ote:

—Omoína bie rafuena bu jifueñellena, omoi abina rairui. Ailluena comini cue mamecido billanona: “Cristodicue” raitimaci. “Cristo jai bairede” raitimaci. Naimaci dibeimo ifeno.

<sup>9</sup> Jobaimiaí illena fidiitomoi; iadedi jaciruiñeno. Iese suite; iadedi abido nia biñeiticue.

<sup>10</sup> Daje nairai jiaie nairai diga jobairite. Daje gobierno jiaie gobierno diga jobairite. <sup>11</sup> Eo aillena ñuisañuai suite. Diga illanomo comindi aime gutimaci. Duicuai eo iite. Monamo comini diga jacirede rana cioitimaci. <sup>12</sup> Bie isoide rafue nia suiñenia, cuena inoñedino omoína llogidoitimaci. Omoína gaitatajanona, omoína duere finoitimaci. Naimaci ofracomo omoína uitimaci. Cárcelmo omoína jonetimaci. Cuemo omoi duilla jira, omoi duere sefuillena, illaicomini dine omoína uitimaci. <sup>13</sup> Naie facaiseconi cue rafuena naimacimo lloitomoi. <sup>14</sup> Omoi abina omoi riidoia, omoi llua uicodo jarire ifeno. <sup>15</sup> Omoi raise lloillena,



omoina canoiticue. Uiñoracina omoimo iiticue. Iemona omoi ðibeimo iñedino o uaina uaitanitimaci. <sup>16</sup> Cuenã ñnotomoi; ia ailluena cuena ñnoñeitimaci. Cuemo omoi duilla jira, omoina enoitimaci. Iemona dajerie mootiai, dajerie eitiai, dajerie amatiai, dajerie nabaiñiai omoina llogidoitimaci. Omoimona dajeriema meineitimaci. <sup>17</sup> Cue cominãna omoi illamona, nana nairai omoina enoitimaci; iadedi cuena fañonocaiñedimie ja muidomo monamo jaca iite. Naimiena jillotaiticue. <sup>18</sup> Omoi ille ðinori Jusiñamui omoina raise sedaite. <sup>19</sup> Duere omoi sefuaia, cuena fañonocaiñeno jai. Ja muidomo monamo jaca iitomoi. <sup>20</sup> Jerusalén fuedo ruicabene icaifona soldaduai ia, ie judailla facaiseconi iairei iite. <sup>21</sup> Naiemona omoi jillobillena, duere omoi sefuiñellena, Judeamo omoi illamona, aneduai dine aisi. Jerusalémo omoi ia, naiemona oni jino omoi jai. Jino omoi ia, Jerusalémo omoi jaiñeno. <sup>22</sup> Ie facaina lloraini micoriai cuegafuai suillanona, naie facaiseconi naimiena ñnoñedinomona Jusiñamui ibana oite. <sup>23</sup> Naie rafuemona jillobillena, naie facaise urueside riño duere sefuite. Uruena nia jirode riñodi jai; duere sefuite. Naie facaise comini duere sefuitimaci. Llegi cacaitimaci. <sup>24</sup> Lloebi diga meinecana uitimaci. Jiaie nairai dine naimacina jaiadoitimaci. Judíuãiñedino sedalle facaise ðinori, naimaci anamo Jerusalémo itino iitimaci.

*Jesús abido ie bille rafue*

*(Mt 24.29-35, 42-44; Mr 13.24-37)*

<sup>25</sup> Jesús nia llofueite:

—Jitoma nagarui illa isoi iñenamona, fivui nagarui illa isoi iñenamona, ucuai nagarui illa isoi iñenamona, comini jiaie rafue suillena uiñoitimaci. Monailai eo baguamona, comini comeciai eo jarire iitimaci. <sup>26</sup> Nana monamo ite radi jaidisite. Iena raise naimaci uiñoñena jira, naie isoide rafue suillena naimaci uiñoñena jira, jaciruillamona, comini fioidaitimaci isoi iitimaci. <sup>27</sup> Naie facaise uillie motodo cue billena nana comini cioitimaci. Ebire biiticue. Naimacina cue sedallena, illaimana biiticue. <sup>28</sup> Bie isoide rafue sua, omoina cue jilloitajabillirui iairei illa jira, cue billiruimo raise ocurri.

<sup>29</sup> Iena omoi raise uiñollena, bie rafuena omoimo lloiticue. Higuera railla riaramo omoi comeciaina faca. Nana amenamo comeciaina faca. <sup>30</sup> Bie eniruemo amena firuillamona, fiemona raire illana uiñotomoi. <sup>31</sup> Ie isoide. Bie rafue ico sua, Jusiñamui ie cominãna raire sedajana uiñotomoi. <sup>32</sup> Uanaicinona omoimo lloiticue. Nana bie rafue suille facaiseconi bie nairai nia iite. <sup>33</sup> Mona fuite. Enirue jiaie fuite; iadedi cue lloga uai jaca suite. <sup>34</sup> Jifaillacinona omoi ebirui raillano, omoi ecimo ite rana ebirui raillano, abina rairuicana jai. Cuenã ñnoñedinona duere finollena, ebena abido biiticue. <sup>35</sup> Cue bia, illaimana cue illamona, nana cominimo juez isoi lloiticue. <sup>36</sup> Ie jira nagarui abi rairuicana jai. Naie duere sefuelle facaise omoi jilloillena, Jusiñamui jii. Ja muidomo monamo cue diga jaca iitomoi —llote.

<sup>37</sup> Jusiñamui jofomo Jesús nagarui llofueuide. Naiona Olivos railla anedumo, nainomo inillena, jaisoide. <sup>38</sup> Nagarui jitiramo naimiena cacareillena, Jusiñamui jofomo comini bisoidimaci.

## 22

*Judíuãi illaicomini Jesúna gaitallena siadua rafue*

*(Mt 26.1-5, 14-16; Mr 14.1-2, 10-11; Jn 11.45-53)*

<sup>1</sup> Naie facaise pascua railla rafue iairei ite. Naie facaise llomenico guille rafue jiaie ite. Naie rafue ia, siritate rana jaca guiñedimaci. Egiptomona naimaci jaiagai jillobillena comecillena, naie rafue ite. <sup>2</sup> Judíuãi illaicomini Jesúna meineiacadimaci; iadedi cominãna jacaruillanona, naimiena nia meineñedimaci.

<sup>3</sup> Ie facaiseconi Taiife ie anamo Judas Iscariote micorina itatate. Judadi Jesús ie doce llofueoicagano imie. <sup>4</sup> Jusiñamui diga nanoca ñairaini dine jaide. Jusiñamui jofona sedaraini dine jiaie jaide. Jesúna gaitatallena, naimaci diga ñaiaide. <sup>5</sup> Jobillanona, naimiemo ucubena fecaacadimaci. <sup>6</sup> Judas ðinena:

—Jee —raite. Jesús diga ailluena comini iñena facaiseconi naimiena gaitatallena sedade.

*Jesúdi ie fiodaille rafuena llua rafue*

*(Mt 26.17-29; Mr 14.12-25; Jn 13.21-30; 1 Co 11.23-26)*

<sup>7</sup> Llomenico guille rafue illanona, judíuãi comini toica llauda fauillarui ride. <sup>8</sup> Jesúdi Pedro iaiaiaia; Juan diga oretajano, raite:

—Cai rafue guille uicodo finollena omico jai.

<sup>9</sup> Naimiemo jicanotiaiaiaia:

—¿Ñinomo naiena coco finuana jitaideo?

<sup>10</sup> Uai ote:

—Ero, Jerusalémo omico ria, nogodo jinuina uitimiena cioitomico. Naimie jailla jofomo naimiena raca. <sup>11</sup> Jofo namamo llono: “Coco llofueraima cocona omo jicanotade: ‘¿Ñimãi

cue guiraco? ¿Ninomo guitucue, cue llofueoicaigano diga? ” Iese lloño. <sup>12</sup> Ie mei omicomo afebebamo ite aillue cuartona acataite. Na raruiaí diga ite. Nainomo caí guille fino.

<sup>13</sup> Jaidiaímaiaí. Naimie llua isoi baitiaímaiaí. Pascua rafue guille finodiaímaiaí.

<sup>14</sup> Guille facaiseconí ia, Jesús ie llofueoicaigano diga nainomo guisaidé. <sup>15</sup> Mesamo guitimacimo, ie llofueoicaiganomo llote:

—Nia cue fiodiaífenia, omoí diga bie rafue guillena eo jitaídícué. <sup>16</sup> Ie comínina cue Moo íco sedalle facaise ia, nana bie rafue fuite.

<sup>17</sup> Jiroracomo jai totaca vino llinocaida, Jusiñamuimo iobillacinona fecaja mei, raite:

—Mai lliño. Biemona nana dajena omoí jiro. <sup>18</sup> Omoina bene dane iese caimare nabaiñeíticué. Cue Moo sedajanomo omoí diga íco cue ia, nainomo omoina dane iese caimare marena nabaiticué. —Iena jirodimací.

<sup>19</sup> Llomeniconá llinuanona, Jusiñamuimo iobillacinona fecaja mei, iena taírude. Naimacimo fecajano raite:

—Biedi cue abí facaí ie. Omoí facaina fiodiaíticué. Cue abímo omoí comecina facajano, iena guíño.

<sup>20</sup> Naimací guilla fuilla mei, jiroracomo vino diga dane oruitajanona, naimacina jiroate. Raite:

—Cue fiodiaíllamona, dama cue diaíllamona, jeacino anamona jilloitomoí. Jusiñamuidi omoímo jiaíe rafue biruí itatajanona, omoí jeacino oní dotajana jai llote. Bie vinodí naie rafue facaí ie. —Iena jirodimací.

<sup>21</sup> Jesús llote:

—Ero, cuena gaitataítimie caí diga guite. <sup>22</sup> Monamona billanona iimána jaidícué. Jusiñamuí jitaílla isoi jai jaoicaídícué; iadedí Jusiñamuimona cuena gaitataítimie eo duere sefuite.

<sup>23</sup> Temei: “¿Nimie Jesúsna gaitatalle?” daní coníniri siadoside.

*Naimací moto imiána bu ille rafue*

<sup>24</sup> Ie facaise coníniri siaduana raitimací:

—¿Cai moto imiána bu ille?

<sup>25</sup> Iena cacajanona, Jesús raite:

—Naimací jitaílla ra finollena, judíuáiñedino illaímaiaídi naimací anamo itinona ocuicabide. “Cai anamo itinona canocabidícaí” raitimací; <sup>26</sup> iadedí omoímo iese íñede. Omoí moto itimie omoí moto imieñedimiana jaílla. Omoímona bu imiána iacanía, omoí mullaímana naimie jaicabillasa. Omoímona bu imiána iacanía, omoina naimie canocana jaicabillasa. <sup>27</sup> Ero, jiaíe rafuedo iena lloíticué. Naimiána ecallena, naimiána canollena, patrón anamo ie mullaíai ítimací. Naimací baífemo patrón illamona, naimacina canollena, ie mullaíai facaina maijñede. Cue anamo itomoí; ia omoina canollena, omoí mullaíma isoi itícué. <sup>28</sup> Biruí duere cue sefuidícuemo, cuena faínonocaiñedomoí. <sup>29</sup> Cue Moo cuena illaímana jai itatate. Omoina fetodícué, <sup>30</sup> jiaíruido cue illaíma illa facaiseconí cue ecimo omoí caimare marena íocire illena. Nainomo omoí judíuái doce naíraíaina sedaitomoí.

*Jesúdi Pedro naimiána januana llua rafue*

(Mt 26.31-35; Mr 14.27-31; Jn 13.36-38)

<sup>31</sup> Jesús llote:

—Simón Pedro, ero, Taífedi Jusiñamuimo ona jicanote, o ramo faillena; <sup>32</sup> iadedí ori jai jidícué, cuena nia ínocana o jaíllena. Íco cuena raíse o íñoñena mei, cue díbeimo o comeci íuai dane o meidoíia, íemona jiaíe creyentiaí comeciána ocuíñotaitio.

<sup>33</sup> Pedro uai ote:

—Nama, cárcelmo o ía, nainomo jiaí íitícué. O fiodiaí, jiaí fiodiaíticué. Ona faínonocaiñeíticué.

<sup>34</sup> Jesús uai ote:

—Pedro, jítiramo íitava nia ñaíñenia, dacaiño amani cuena janoítio.

*Jesús fiodiaílla facaise íaireí illa rafue*

<sup>35</sup> Ie llofueoicaiganomo Jesús llote:

—Omoímo ite rafuena uíñoiacadícué. Cue rafue lollena, navuí omoina oredícué. “Ucubena uíñoeno, bolsa uíñoeno, meídolle zapatos uíñoeno” omoímo lloíticué. Naie facaiseconí omoí, ¿bue rana jitaídomoí?

Uai otimací:

—Cai buena jitaíñedícaí.

<sup>36</sup> Jesús raite:

—Bíruimona omoí duere sefuitomoí. Ie jira abína rairuicána jai. Biruí ucube omoímo ía, nina omoí jaía, iena uíño. Bolsa bumó ía, iena uíño. Abína ríidollena, omoímo lloebí íñenia,

janore iniroina feca, lloebi ollena. <sup>37</sup> Cuena jaie cuegafuiai ja suite. Isaías micori cuena jaie cuega: “Maraiñede rafue finoraíma isoi naimie duere sefuite”.

<sup>38</sup> Raitimaci:

—Ero, Nama, mena lloebi caimo birui ite.

Jesús uai ote:

—Mena ia, macaibaite.

*Jesúdi Getsemanímo Jusiñamuimo jüia rafue*

(Mt 26.36-46; Mr 14.32-42)

<sup>39</sup> Guille mei, ie llofueoicaigano diga, Jesús jino jaide. Olivos railla anedumo naimie jaisoilla isoi jaide. <sup>40</sup> Nainomo ria, naimacimo llote:

—Taife omoína ramo fai raillano, iena omoi ñinoñellena, Jusiñamuimo jüi —llote.

<sup>41</sup> Naimie janorede nofici bai faia uailla dinori bai jaide. Caiñici ifodo ana raita, Jusiñamuimo jüide:

<sup>42</sup> —Ore Moo, o jitaia, cue duere sefuillamona cuena jillota. Cue jitailla isoi cuena finoño; iadedi o jitailla isoi cuena fino.

<sup>43</sup> Naimie comecina ocuiñotallena, ie facaiseconi monamona Jusiñamui jaienici bite.

<sup>44</sup> Jesús comei jarire illamona, naimie rioci faitemo, difai diruena eniruemo uaide. <sup>45</sup> Jüia mei, ie llofueoicaigano dine abido bite. Ocosinaillamona, jai inidimaci. <sup>46</sup> Naimacimo jicanote:

—¿Bue ñellena inidomoi? Mai casi. Taife ramo omoína fai raillano, iena omoi ñinoñellena, Jusiñamuimo jüi.

*Jesúna gaitalle rafue*

(Mt 26.47-56; Mr 14.43-50; Jn 18.2-11)

<sup>47</sup> Nia Jesús lloia, diga comini naimie dine bitimaci. Judas Iscariote micori naimacina ifode. Naimiedi Jesús llofueoicaigamie. Naimiena llibanollena. Jesús dine iairei bite.

<sup>48</sup> Jesús raite:

—Judas, cuena llibanuanona, cuena gaitataiacadio.

<sup>49</sup> Ie llofueoicaigano naie rafuena jai cioidimaci. Jicanotimaci:

—Nama, ¿cai atica lloebi diga ona riidoiticaí?

<sup>50</sup> Ie facaise naimacimona damiedi Jusiñamui diga nanoca ñairaima ie mullaíma ie nabei jefona jaíbonote. <sup>51</sup> Jesús dinena raite:

—Dama ite. —Ie jefona naimie jetajamona, naimiena jillotate. <sup>52</sup> Diga illaicomini Judas diga Jesús dine bitimaci. Naimacimo Jesús llote:

—Fñiriraimadicueta cuena omoi gaitajaibilla. Omoi lloebina atidomoi. Omoi butaralluna jiai atidomoi. <sup>53</sup> Nagarui Jusiñamui jofomo omoi motomo llofuecabiticue; iadedi cuena gaitañedomoi. Jusiñamui jitailla jira, cuena omoi gaitaja facaise jai ride. Taife anamo jai itomoi.

*Pedrodi Jesúna janua rafue*

(Mt 26.57-58, 69-75; Mr 14.53-54, 66-72; Jn 18.12-18, 25-27)

<sup>54</sup> Naimiena gaitaja mei, Jusiñamui diga nanoca ñairaima jofomo uitimaci. Pedro aarena naimaci jinafona racade. <sup>55</sup> Nairairiri motomo irai bonua mei, ana raidimaci. Pedro naimaci diga jiai raide. <sup>56</sup> Nainomo ite mullaíñodi irai bouamona, Pedromo eruailano raite:

—Bimiedi Jesús diga jaisoidimie.

<sup>57</sup> Pedro abi janote:

—Naimiena uiñoñedicue.

<sup>58</sup> Dallu illanona, jiaimie Pedrona ciuanona llote:

—Jesús ie llofueoicaigano imiedio.

Pedro dinena uai ote:

—Imieñedicue.

<sup>59</sup> Daje hora illanona, jiaimie raite:

—Bimie galileo imiena jira, bimiedi Jesús diga ua jaisoidimie.

<sup>60</sup> Pedro dinena raite:

—O lluana uiñoñedicue. —Ieconí naimie ñaitemo, iitava ñaite. <sup>61</sup> Jesús dobaidacaida, Pedromo erodacaido. Iemei Pedro Jesús lluana uibiñote. Jesús naimiemo jaive llote: “Íitava nia ñañenia, dacaiño amani cuena janoitio”. <sup>62</sup> Pedro jino jaillanona, eo sunaillamona, eo eede.

*Jesúna jifanodua rafue*

(Mt 26.67-68; Mr 14.65)

<sup>63</sup> Ie facaise Jesúna gaitadino naimiena jifanododimaci. Naimiena jiai fatimaci. <sup>64</sup> Ie uisina maitimaci. Llotimaci:

—Siño jitodiosa, ¿bu o faja? caimo llono.

<sup>65</sup> Iese jifanodocana uitimaci.

*Jesúdi judúuai illaicomini dine illa rafue*  
(Mt 26.59-66; Mr 14.55-64; Jn 18.19-24)

<sup>66</sup> Monaidemo judúuai illaicomini ofidimaci. Jusiñamui diga nanoca ñairaini ofidimaci. Moisés micori llogacino llofueraini ofidimaci. Naimaci dine naimiena gaitadino Jesúsna uitimaci. Naie illaicomini dinena raitimaci:

<sup>67</sup> —Ua Cristodiona, iena caimo llono.

Jesús uai ote:

—Omoimo iena cue lloia, ñinoñeitomoi. <sup>68</sup> Buena omoimo cue jicanoia, cue uaina oñeitomoi. <sup>69</sup> Monamona jaié billanona, imana jaidicue. Cuena omoi meiniamona, illaíma isoi Jusiñamui ecimo raire iiticue.

<sup>70</sup> Nana jicanotimaci:

—“¿Jusiñamui Jitodicue?” raitio?

Uai ote:

—Raise cacadomoi. Imiedicue.

<sup>71</sup> Iena cacajano, raitimaci:

—Naimie llwana jai cacadicaí. Jiaie comini naimiena llogiduana jai jitaiñedicaí. “Jusiñamui Jitona iticue” naimie llua jira, Jusiñamuina jai jeare ñaite. Naimie Jusiñamui jitoñede.

## 23

*Pilato dine Jesús illa rafue*  
(Mt 27.1-2, 11-14; Mr 15.1-5; Jn 18.28-38)

<sup>1</sup> Judúuai illaicomini naidacaillanona, Pilato dine Jesúsna uitimaci. <sup>2</sup> Naimiena llogidotimaci:

—Cai cominimo marañedifueno lloite. Gobiernomo ucubena cai fecajana rairuide. Naimie jiaí raite: “Cristodicue. Illaímadicue”.

<sup>3</sup> Pilato dinena naimiemo jicanote:

—¿Judúuai comini illaímadio?

Uai ote:

—Jii, judúuai illaímadicue.

<sup>4</sup> Jusiñamui diga nanoca ñairainimo Pilato lloite. Nainomo bite cominimo jiaí lloite:

—Nicinodi naimiemo iñede.

<sup>5</sup> Uai otimaci:

—Gobierno joreño comini comeciaí jeare feidocana naimie uite. Nana Judeamo uite. Galileamona tainede. Bene jai caimo ride.

*Herodes dine Jesús illa rafue*

<sup>6</sup> Iena cacajano, naimie llogidotinomo Pilato jicanote:

—¿Naimiedi Galilea imie?

<sup>7</sup> —Jii—raitimaci. Galilea enirue illaíma Herodes. Naie facaiseconi Jerusalémo naimie illa jira, naimie dine Pilatodi Jesúsna orede. <sup>8</sup> Jesúsna Herodes ciuanona, iobide. Naimie finoca rafuena naimie fidia jira, naimiena cioacade. Siño rafuena naimie finuana jiaí cioacade. <sup>9</sup> Jesúsno ie finoca rafuena are jicanote; iadedi Jesús dinena uaina oñede. <sup>10</sup> Ie facaiseconi judúuai illaicomini Jesúsna riire llogidotimaci. <sup>11</sup> Herodes ie soldaduái diga naimiena eo jeare ñaitimaci. Illaíma jitauiaga iniroina jitatatimaci. Ie mei Pilato dine naimiena abido orede. <sup>12</sup> Iemona nairuido Herodes Pilato diga nabairite. Jaié conimana enoidiaímaiaí.

*Pilatodi Jesús fiodaillana llua rafue*  
(Mt 27.15-26; Mr 15.6-15; Jn 18.39–19.16)

<sup>13</sup> Pilatodi judúuai illaicominina, nainomo ite comini diga, uaidote. <sup>14</sup> Raite: —Bimie cue dine atidomoi. Raitomoi: “Comini comeciaí feidocana naimie uite”. Naimiemo jai jicanoticue; ia naimiemo nicinodi iñede. <sup>15</sup> Herodes cue dine naimiena como abido orede. “Naimiemo nicinodi iñede” jiaí raite. Naimiena cue meinetalena, naimie jaca nicinona finoñede. <sup>16</sup> Ie jira naimiena cue sechedotajanona, naimiena oni oretaiticue.

<sup>17</sup> Naie rafue facaiseconi naga año cárcelmona damienua jino jamai oretauide. <sup>18</sup> Pilato llwana cacajano, nana comini ado cuiiriidimaci:

—¡Naimiena oni uíño, naimiena meinellena! ¡Barrabás cárcelmona jino oreta!

<sup>19</sup> Gobierno diga jobaimena naimie navui finua jira, naie facaise comena naimie meinia jira, Barrabás cárcelmo ite. <sup>20</sup> Jesúsna naimie jamai oretaiacana jira, comini diga Pilato dane ñaite; <sup>21</sup> iadedi cuiiriidimaci:

—¡Naimiena corai! ¡Naimiena meine!

<sup>22</sup> Pilato dane jicanote:

—¿Ñie isoide maraiñede rafuena finode? Naimiena cai meinellena, naimie jaca nicinona finoñede. Naimiena sechedotaiticue. Ie mei naimiena jamai oretaiticue.

<sup>23</sup> Eo riire cuiiriidimaci:

—¡Naimiena corai! —Ja muidomo Pilato dinena:

—Jee —raite. <sup>24</sup> Naimaci jitailla isoi Pilato fairiote. Jesúna meinellena lloste. <sup>25</sup> Ie mei Barrabásna cárcelmona jino oretate, naimiena comini jicaja jira; iadedi Jesúna naimacimo fecade, naimiemo naimaci jitailla ra naimaci finollena.

*Jesúna coraia rafue*

(Mt 27.32-44; Mr 15.21-32; Jn 19.17-27)

<sup>26</sup> Jesúna soldadaui oni uitemo, Simón raillamie diga dafaifidimaci. Naimiedi Cirene railla enirue imie. Jerusalén onifemona bite. Jesús jinafona naimiena cruzna rocaoicaida sonotate. <sup>27</sup> Ailluena comini Jesúna racadimaci. Ailluena riñoniai eo eecana jaisite. <sup>28</sup> Iena cacajano, Jesús naiñaiñuái dine dobaidacaída, naiñaiñuáimo lloste:

—Jerusalén itañaiñuái, cue facaina eeñeno; iadedi omoi facaina mai omoi ee. Omoi uruiai facaina mai omoi ee. <sup>29</sup> Ero, jiairuido duere sefuillemona comini raitimaci: “Oiniñuái jiaie riñoniai baifemo duere sefuiñena jira, marena itimaci”. <sup>30</sup> Jusiñamui riicaillafuemona jilloiacanamona, comini jiaie raitimaci: “Aneduai caimo jaicorillana jitaídicaí”. <sup>31</sup> Maraiñede rafuena finoñedicue; iadedi jai duere sefuidicue, Maraiñede rafuena finodimaci. Ie jira cue baifemo eo duere sefuitimaci.

<sup>32</sup> Naie iaímaiaina meinellena, mena maraiñede iimana jiaie uitimaci. Gobierno llogacinona inoñediiaímaiaí. <sup>33</sup> Hcoraína eruaiilla illanomo naimaci ria, Jesúna coraidimaci. Naie maraiñede iaímaiaina jiaie coraidimaci. Damie Jesús nabeimo. Jiaimie Jesús jarifebeimo. <sup>34</sup> Jesús ie Moomo lloste:

—Ore Moo, naimaci finoca rafuena naimaci raise uiñoñena jira, bie soldadaui cuena duere finua rafuena feita —lloste. Bu dajerie uille uiñoñena, Jesús iniroina jifanoduanu soldadaui facasite.

<sup>35</sup> Ailluena comini eruaidimaci. Judúuai illaicominidi naimiena jifanoduanona, coniniri raitimaci:

—Naimiedi jiaie cominina duicomona jillotate. ¿Ñiese dama naimie abina birui jillotañede? Naimiedi Jusiñamui oretagamiedena, Jusiñamui fetocamiedena, fiodaillamona dama naimie abina jillotarede.

<sup>36</sup> Soldadaui naimiena jiaie jifanododimaci. Ie abi isirena cacaiñellena, naimiemo vino fecajanona, <sup>37</sup> raitimaci:

—Judúuai illaimadiodena, fiodaillamona dama o abina jillota. —Naie vino Jesús jiroñede.

<sup>38</sup> Jesús ifogai afeconi rabicimo Pilato cuetataste: “Bimiedi judúuai comini illaima”.

<sup>39</sup> Jesús diga coraica iaímaiaimona damie naimiena taigode:

—Jusiñamuimona bitiodena, nia fiodaíñenamona dama o abina jillota. Cocona jiaie jillota.

<sup>40</sup> Jiaimiedi naimiena lletade:

—¿Bue ñellena bimiena taigodio? ¿Ñiese jearede rafuena nia finoacadio? Ja fiodaite. Iemei Jusiñamui uicomo ja iitio. ¿Ñiese Jusiñamui uicomo o illena jaciruiñedio? <sup>41</sup> Maraiñede rafuena coco finua jira, duere sefuidicoco; iadedi bimie maraiñede rafuena finoñede.

<sup>42</sup> Iemei Jesúmo lloste:

—Illaimana o illa facaise cuena comeci.

<sup>43</sup> Jesús uai ote:

—Uanaicino lloticue. Birui cue diga cue Moo illanomo iitio.

*Jesús fiodailla rafue*

(Mt 27.45-56; Mr 15.33-41; Jn 19.28-30)

<sup>44</sup> Jitoma naidai jai itemo, daje amani horas mona jibicaide. <sup>45</sup> Jitoma raise lligaiñoñede. Jusiñamui jofo ie fetaca iniroife ana anaba jillacimo motodo menafe cuararide. <sup>46</sup> Jesús ado lloste:

—Ore Moo, cue joreña feiño. —Ie mei naimie jai fiodaite.

<sup>47</sup> Soldadaui imaci capitán bie rafuena ciuano, Jusiñamuina jaciruillamona, raite:

—Bimie maraiñede rafuena finoñede.

<sup>48</sup> Ailluena comini Jesús fiodaillana ciodimaci. Ie mei eo sunaillamona, jogobemo fairuanona, jofomo abido jaidimaci. <sup>49</sup> Jesús nabaiñiaí bie rafuena aarena ciodimaci. Galileamona bite riñoniai bie rafuena aarena jiaie ciodimaci.

*Jesús raiafomo jonia rafue*

(Mt 27.57-61; Mr 15.42-47; Jn 19.38-42)

50-52 Pilato dine José raillamie jaide, Jesús abina jicallena. Naimiedi illaicomini. Maremie. Finogamie. Jesúna meiniana jitaife. Arimatea railla nairai imie. Judeamo naie nairai ite. Naimiedi Jusiñamui ie cominina ico sedajanomo illemo ocuride. <sup>53</sup> Pilato:

—Jee —railla mei, Jesús abina cruzmona ana uanona, iena useroi diga ferinote. Nofici ie raiafomo jonete. Nia bu raifenafomo jonete. <sup>54</sup> Nairui viernes. Sábadorui rille jai iaiei illa jira, Jesús abina raiafomo raire jonete. <sup>55</sup> Galileamona navui bite riñoniai racadimaci. Raiafona ciodimaci. Naimie abi finuana ciodimaci. <sup>56</sup> Ie jira caimare soride rana finollena, naimie abimo jonellena, jofomo jaidimaci. Naie ra finua mei, ie abina raise finollena, raiafomo abido jaidimaci. Ie mei sábadoruimo jafaici otimaci, Moisés micori jaie llua isoi.

## 24

*Jesús fiodaillamona jillua rafue*  
(Mt 28.1-10; Mr 16.1-8; Jn 20.1-10)

<sup>1</sup> Domingo jitiramo monaidemo, naie riñoniai raiafomo jaidimaci, iñaiñuái finoca soride rana uillena. <sup>2</sup> Raiafo ibaila nofici oni joillana ciodimaci. <sup>3</sup> Fo jaidemo, Jesús abina cioñedimaci. <sup>4</sup> Uainicaidimaci. Ieconí menamie naiñaiñuái ecimo baireddiainai. Iaimaiái inirói eo quenirede. <sup>5</sup> Iaimaiaina jacinailamona, ifogi ana jitadacaidimaci. Naie iaimaiái dinena jicanote:

—¿Bue ñellena fiodaítimie illanomo cajedimiena jenodomo? <sup>6</sup> Galileamo navui naimie omoimo llogacinona comeciñedomo. <sup>7</sup> Naimie raite: “Monamona billanona, iimana jaidicue. Jusiñamui jitailla jira, marañede rafue finoraini anamo iiticue. Cuená coraítimaci. Darui amani illanona, fiodaillamona jilloitucue” raite.

<sup>8</sup> Iemona ie llogacinona jai comecitimaci. <sup>9</sup> Raiafomona abido jaidimaci. Ie once llofueoicaiganomo naiñaiñuái ciua rafuena llotimaci. Naie llofueoicaigano diga itinomo jiaí llotimaci. <sup>10</sup> Naie riñoniaimona María Magdalena ite. Juana ite. María ite. Naiñaiñodi Jacobo ei. <sup>11</sup> Naie riñoniaidi iena llotimaci; iadedi ie rafuena cacadinodi iena iñoñedimaci.

—Jamaifuená ñaitomoi —raitimaci.

<sup>12</sup> Iena cacajano, Pedro aiscana raiafomo jaide. Nainomo ria, ana jitadacaida, fo erodate. Useroi joillana ciode. Iemo ie comecina facajano, jofomo abido jaide.

*Mena llofueoicaiganomo Jesús bairia rafue*  
(Mr 16.12-13)

<sup>13</sup> Jesús jilluarui mena llofuega iaimaiái Emaús railla nairaimo jaidiamaiaí. Jerusalémóna nibái once kilómetros ite. <sup>14</sup> Nana Jesúmo suide rafuena ñaiano jaidiamaiaí. <sup>15</sup> Iaimaiái ñaianona, Jesús iaimaiái diga dafaífillanona, iaimaiái diga jaide. <sup>16</sup> Jusiñamuidi iaimaiaina naimiema uñotañena jira, naimiema uñoñediaiamaiaí. <sup>17</sup> Iaimaiaimo Jesús jicanote:

—¿Buena ñaitomíco? —Ieconí naidadatiamaiaí. Sunaitiamaiaí. <sup>18</sup> Naie iaimaiaimona damiedi Cleofas. Naimie uai ote:

—¿Ñiese Jerusalémo birui suide rafuena uñoñedio? Nibái como ridio. Nana jiaí comini iena uñotimaci.

<sup>19</sup> Uai ote:

—¿Ñie isode rafue suide?

Uai otiamaiaí:

—Nazaret ie Jesús rafue. Naimiedi Jusiñamui facaina lloraima. Diga siño rafuena finode. Cominina raise llofuede. Jusiñamuiimona naimiedi maremie. Cominimona naimie maremie; <sup>20</sup> iadedi cai illaicomini naimiema gaitatitimaci. Naimiema cruzmo coraitatimaci. <sup>21</sup> Jusiñamui naimie cai dine orecamiemo comecina facadicoco. Naimie cai illaimana illemo ocuridicoco; ia naimie jai fiodaite. Naimie fiodaillamona darui amani jai ite. <sup>22</sup> Cai cominimona dajerie riñoniaibirui caina jacinaitadimaci. Jitiramo Jesús raiafomo jaidimaci; <sup>23</sup> iadedi naimie abina cioñedimaci. Abido naimaci bia: “Jusiñamui jaienisaina ciodicai” raitimaci. Naie jaienisai naimacimo llote: “Naimiedi caje”. <sup>24</sup> Iemei caimona dajerie raiafomo jaidimaci. Riñoniai llua isoi ciodimaci. Jesús abina cioñedimaci.

<sup>25</sup> Jesús dinena uai ote:

—Abi uñoñedomíco. Nana Jusiñamui facaina lloraini micoriai cuegafuaina iñoiaciñedomíco. <sup>26</sup> Cristo duere sefuillena cuetimaci. Jusiñamui iena jitaillena cuetimaci. “Naimie nia illaimana jaiñenia, duere sefuite” cuetimaci.

<sup>27</sup> Iemei Jesús iaimaiaina llofuede. Moisés micori cuegafuaina llofuede. Jusiñamui facaina lloraini micoriai cuegafuaina jiaí llofuede. Nana Cristona cuegafuaina llofuede.

<sup>28</sup> Emaús dine iaiei naimaci ria, Jesús nia jaicademo, <sup>29</sup> naimiema caididiamaiaí. Raitiamaiaí:

—Coco diga fiebi. Jitoma jai ana ite. Jai abi juanide, nia o jaillena. —Ie muidona ia:maia: diga fiebillena fo jaide. <sup>30</sup> Nailli guitimacimo, llomenicono Jesús llinuano, Jusiñamui iobillacinona fecade. Iena tairuano, ia:maia:imo fecade. <sup>31</sup> Jusiñamui jitailla jira, ieconi Jesúsna uifotia:maia: iemei ia:maia:mona naimiena jai cioicaifena. <sup>32</sup> Da:maia: fia:ia:maia::

—Coco diga naimie fia:ia, coco comeci caimare ite.

<sup>33</sup> Naie dacaifo Jerusalémo abido jaidia:maia: i. Jesús llofueoicaigano naimaci nabaiñia: diga danomo illana baitia:maia: <sup>34</sup> Ia:maia:imo llotimaci:

—Cai Nama fiodaillamona jai jillode. Simón Pedromo jai bairede.

<sup>35</sup> Ie mei naisona ia:maia: jailla rafuena llotia:maia::

—Cai guitica:imo, naimiena uifoticoco —llotia:maia:.

*Jesús ie llofueoicaigano mo bairia rafue*

(Mt 28.16-20; Mr 16.14-18; Jn 20.19-23)

<sup>36</sup> “Jesúsna ciodicoco” llotia:maia:imo, ie llofueoicaigano motomo Jesús bairede. Llote:

—Jai biticue. Uri omoi i.

<sup>37</sup> Naimiena ciuamona, jacinaitimaci. “Joreño na ciodica:” comeciaina facajanona, jiai jaciruitimaci. <sup>38</sup> Naimacimo Jesús jicanote:

—¿Bue ñellena jaciruitomoi? ¿Bue ñellena cue bene illana iñoñedomoi? <sup>39</sup> Cue onollimo eruai. Cue eillimo eruai. Jesúsdicue. Cuena jeta, raise uifollena. Cuemo llicisi ite. Cuemo illaici ite. Jamai joreño isoifedicue.

<sup>40</sup> Iena llua mei, coraiafona naimaci cioillena, ie onolli ie eilli diga acatate. <sup>41</sup> Iobiacadimaci; iadedi nia raise iñoñedimaci. Iemo comeciaina nia facadimacimo, naimacimo jicanote:

—¿Bue illa, cue guillena?

<sup>42</sup> Naimiemo janorede jai ruica llicia:ina fecadimaci. <sup>43</sup> Iena feiñuanona, rite. Iena ciodimaci. <sup>44</sup> Naimacimo llote:

—Navui omoi diga cue ia, diga rafue omoimo lloticue. Moisés micori cuena cuete. Jusiñamui facaina lloraini micoria: cuena cuetimaci. Jusiñamui jitailla jira, iena jai suide.

<sup>45</sup> Naie facaiseconi naimacina naie ciegafuia:ina raise uifotade. <sup>46</sup> Naimacimo llote:

—Jusiñamui facaina lloraini micoria: cuena jaie cuetimaci: “Cristo duere sefuite. Fiodaillamona darui amani illanona, jilloite. <sup>47</sup> Naimie muidona comeci: iuai meiduamona, Jusiñamui naimaci jeacinona oni dotaite. Naimie rafue nana naira:imo damerie lloitimaci”. Omoimo biena lloiticue. Cue rafuena lloillena, Jerusalémo taïneitomoi. <sup>48</sup> Bie rafuena ciodomoi. Iena lloitomoi. <sup>49</sup> Ero, navui naimie llua iso: i, cue Moo Joreño omoi dine oretaiticue. Jerusalémo fiebi, naimie Joreño omoi feiñolle dinori. Cue rafuena omoi lloillena, naimie Joreño omoi comeciaina ocuifotaite.

*Jesús monamo jailla rafue*

(Mr 16.19-20)

<sup>50</sup> Betania railla naira: dine Jesús naimacina ifode. Marecinona naimacimo llote.

—Jusiñamui omo:ina raise marena canoite —llote. <sup>51</sup> Iena naimacimo lluanona, monamo jaide. <sup>52</sup> Jerusalémo eo caimare abido jaidimaci. <sup>53</sup> Jusiñamui iobillacino fecajano, Jusiñamui jofomo nagarui itimaci. Mai. Macabaite. Lucadicue.

## JUAN JESUCRISTO ENIRUEMO ILLA RAFUE CUIAFUE

### *Jesucristo rafue iese tainede*

<sup>1</sup> Jaca bue nia iñenia, Cristo jaca ite. Jusiñamui uai naimiemo illamona, naimie caina Jusiñamuina birui uñotade. Jusiñamuimo jaca duide. Naimiedi Jusiñamui. <sup>2</sup> Jusiñamui diga jaca nano ite. <sup>3</sup> Naga ite rana finode. Naimie finoñega ra jaca iñede. Naga ite rana comuitaga. Naimie comuitañega ra jaca iñede. <sup>4</sup> Naimie muidona iticai. Naimiena cai ñnuamona, jaca iiticai. Lligaiñora diga rana cai cúa isoi, caina Jusiñamuina uñotade. <sup>5</sup> Naimiena ñnoñedino jitrédinomo itimaci isoidimaci. Naimaci comeciai jitrede. Ie uaido naimaci comeciaina lligaiñote, naimaci comeciaino ite jeacino oni jaillena.

<sup>6-7</sup> Naimaci comeciaina lligaiñotimiena lollena, Juan micori llucacino Jusiñamuina nana comini ñnollena, Jusiñamuidi Juan Bautista raillamie micorina oretate. <sup>8</sup> Juan naie lligaiñofedimie; iadedi Juan naimiena lluaibite. <sup>9</sup> Nanoca lligaiñotimiena llote. Nanoca lligaiñotimiedi eniruemo billanona, nana comini comeciaina lligaiñote. <sup>10</sup> Naimie muidona comini comuidimaci; iadedi naimie bene billa meinoconi, comini dinena naimiena uñofedimaci. <sup>11</sup> Ie nairai illanomo naimie ride; iadedi nana cai nairai naimiena feiñofedimaci. <sup>12</sup> Damierie naimiena feiñotimaci. Naimiena ñnotimaci. Ie uaido naimiedi naimacina Jusiñamui uruiaina itatate. <sup>13</sup> Iena Jusiñamui jitailla jira, Jusiñamui uruiaina jaidicai. Comemona jeiciamona iena jaiñedicaí. Comini jitaillamona iena jaiñedicaí. Buena cai ñnuamona iena jaiñedicaí.

<sup>14</sup> Iemo caina Jusiñamuina uñotallena, Jusiñamui Jito comena jaide. Naie facaise cai comini motomo naimie ite. Cai cominina eo duenaite. Uanaicinsona llouide. Ie siño uaina uñocana jaidicai. Jusiñamui dajede ie Jitona ciodicai. <sup>15</sup> Juan micori naimiena cominimo jaie llote:

—Birui omoimo lloticue; iadedi jiaimie cue ifo meidoite. Cue baifemo faite. Cue nia jeicifñenia, naimiedi jaca ite —llote.

<sup>16</sup> Jesucristo caina eo duenaillamona, birui caina eo canocabide. <sup>17</sup> Moisés micori Jusiñamui uaina jaie llote; iadedi iemona Jusiñamui caina duenaillana jaie raise uñofedicaí. Jesucristo llumona Jusiñamui caina duenaillana jai raise uñoticaí. Naimiemona uanaicinsona jai raise cacadicai. <sup>18</sup> Jaca buna Jusiñamuina cioñede; iadedi dajede ie Jito caina naimiena uñotade. Ie Moo diga danomo illamona, Jesús naimiena uñote.

### *Juan Bautista micoridi Jesúna llua rafue*

*(Mt 3.11-12; Mr 1.7-8; Lc 3.15-17)*

<sup>19</sup> Jerusalémona Juan micori dine judíuai illaicominidi Jusiñamui diga ñairainimona dajerie oredimaci. Jusiñamui diga ñairaini canoranimona dajerie jiai oredimaci. Naimiemo:

—¿Budío? —raillano jicanotadimaci. Juan dine rillanona, raitimaci:

—Cai jilloitaraíma biite raillamiemo ocuiridicai. Cristo raillamie billemo ocuiridicai. ¿Odi naimiedio? —raillanona jicanotimaci. <sup>20</sup> Naimie dinena janoñede; ia:

—Imieñedicue —raite.

<sup>21</sup> Dane naimiemo jicanodosite:

—¿Budío? ¿Elías?

Juan micori dinena uai ote:

—Elíañedicue.

Raitimaci:

—Moisés micori Jusiñamui facaina lloraíma íco billena jaie llote. ¿Odi naimiedio?

Juan dinena raite:

—Ieñedicue.

<sup>22</sup> Dane jicanotimaci:

—¿Budío? Caimo llono, cai oretatinomo cai lollena. ¿Ñiese naimacimo ona lloiticai?

<sup>23</sup> Juan dinena raite:

—Jofue iñenanomo ado llotimiedicue. Isaías micori jaie llua isoi llocabiticue: “Cai Nama biite. Naimie naiso atona raise fino”. Iese lloticue; ia naimie uaina omoi feiñollena, omoi comeciai raise finollena ñaiticue.

<sup>24</sup> Juan dine bitinodi fariseuai comini. <sup>25</sup> Nia jicanoiacadimaci:

—Odi cai jilloitaraímañenia, o Elíañenia, o Moisés micori llotimieñenia, ¿bue ñellena cominina bautizadio? ¿Ñie isoi de uai omo ite? ¿Ñinomona o uaina otio?

<sup>26</sup> Juan dinena uai ote:

—Cominina bautizadicue; iadedi omoi motomo omoi uñofegamie jai ite. <sup>27</sup> Naimie cue ifo meidoite. Cue baifemo faite. Jamai bue cue isoilla jira, naimie illafomo cue riñena jira, naimiena canonicue.



<sup>28</sup> Naie rafuedi Betábaramo suide. Jordán railla ille ruicafebeimo ite. Nainomo Juan bautizauide.

*Juan micori Jesúsna dane llua rafue*

<sup>29</sup> Te areruido Juan micoridi Jesús naimie dine billana ciuano, naimiena raite:

—Ero, Jusiñamui Jito toica llaua mamecido jai bite. Cai jeacino facaina faga llaua ifomo Jusiñamui ie Jitona jai orede. Naimie fallemona comini jeacinona dotaita. <sup>30</sup> Navui naimiena ñaiticue. Lloticue: “Cue ifo jiaimie meidoite. Jamai bue isoidicue; iadedi naimie jamaí bue isoifede. Cue nia jeicifenia, naimiedi jaca ite”. <sup>31</sup> Cue dine naimie nia biñenia, naimiedi cai Jilloitaraimana uifioñedicue; iadedi cominina bautizallena bene iticue, cai cominimo naimiena llollena.

<sup>32</sup> Juan jiai llote:

—Monamona ucugi isoi Jusiñamui Joreño ana billana ciodicue. Jesúmo baite. <sup>33</sup> Naimiedi cai Jilloitaraimana nia uifioñedicue; iadedi cominina bautizallena, cuena oretagamiedi jaie cuemo llote: “Cue Joreño ana billana damiemo baillana ico cioitio. Cue Joreño baillamiedi cue Joreño omoimo fecaita”. <sup>34</sup> Naie rafuena ciodicue. Iemona naimiedi Jusiñamui Jitonana lloticue.

*Jesús ie fetoacaga comini ie rafue*

<sup>35</sup> Te areruido Juan micori llofueoicaiganomona menamie Juan micori diga ia, <sup>36</sup> Juan micori Jesús macarillana ciuano, raite:

—Ero, Jusiñamui Jito toica llaua mamecido jai bite.

<sup>37</sup> Juan micori diga itiaimaiaí naiena cacajano, Jesúsna racadiaimaiaí. <sup>38</sup> Jinafo dine erodajanona, Jesús iaimaiaína ciode. Iaimaiaimo jicanote:

—¿Buena jitaídomico?

Iaimaiaí dinena uai otiaimaiaí:

—Rabbí, ¿ni o jofa? ¿Ninomo itio? —uai otiaimaiaí. Rabbí oni dobaiñuamona: “Llofueraíma raillamie”.

<sup>39</sup> Jesús nai iaimaiaí uaina ote:

—Mai. Cue diga bi, omico uifollena. —Ie jira jaidiaimaiaí. Jesús illanona ciodiaimaiaí. Jitoma nia a illa jira, nairuido naimie diga fiebidiaimaiaí. Jitirecaidemo oni jaidiaimaiaí.

<sup>40-41</sup> Naie iaimaiaímona damie Andréna mameciredimie. Jesús dinena naimie jaidemo, ie ama nano jenuaide. Naimie amadi Simón Pedro. Naimiena baillanona, llote:

—Jai cai cominina jilloitaraimana baiticue. Cristo raillamiena baiticue.

<sup>42</sup> Te mei Jesús dine naimiena uite. Jesús naimiena eo eruailanona, raite:

—Birui o mamecidi Simón. Juan ie jitodio. Biruimona Cefana jiai mamecirenitio —raite. Oni dobaiñuacidi Pedro.

*Jesús menamie uaidua raufe*

<sup>43</sup> Te areruido Jesús Galileamo jaiacade. Felipena baillanona raite:

—Cue llofuegamiena o jaillena, cue diga coco jaillena, mai cue diga bi. <sup>44</sup> Felipedi Betsaida nairai imie. Andrés iaimaiaí Pedro diga daje nairai iaimaiaí. <sup>45</sup> Jesús naimiemo llua mei, Felipedi Natanaelna oni jenuaide. Higuera railla riarana anamo naimiena baillanona, raite:

—Moisés micori jaie cuegosamiena jai baiticue. Jusiñamui lloraini micoriaidi naimiena jai jiai cuetimaci. Naimiedi Jesús. Nazaret imie. Ie moodi José.

<sup>46</sup> Natanael naie nairaina uaitajanona raite:

—Nainomo mare comedi ifede.

Felipe dinena raite:

—Naie o uifollena, cue diga mai bi.

<sup>47</sup> Jesúsmona iaimaiaí iaie ia, Jesús dinena llote:

—Ero, buna jifueñegamie billa. Nanoca Israel imie bite.

<sup>48</sup> Natanael dinena uai ote:

—¿Bu cuena llogao? ¿Niese cuena uifotio?

Jesús uai ote:

—Felipe ona ailli nia baiñenia, higuera railla riarana anamo o illana jai uifotiocue.

<sup>49</sup> Jacinaillamona, Natanael dane uai ote:

—Maestro, odi Jusiñamui Jitodio. Cai comini illaimadio.

<sup>50</sup> Jesús dinena uai ote:

—Amena anamo o illana cue uifua jira, cuena ifnotio. Diga siño rafuena ciojitio. Bie rafue baiñemo finuana ciojitio. <sup>51</sup> Jusiñamui mona billanona, imana jaidicue. Uanaicino omo lloticue. Mona ecorillana o cioia, Jusiñamui jaienisaí cue dine billena cioitio. Cuemona abido jaillena jiai cioitio.

## 2

*Jinuimona Jesús vino finua rafue*

<sup>1</sup> Menarui illanona, Galileamo Canámo iima ie ai uarafue ite. Rafue nama uaidua jira, nainomo Jesús ei jaide. <sup>2</sup> Jesús jiai uaidoga. Ie llofueoicaiganodicai jiai uaidogacai. <sup>3</sup> Vino cueillamona, Jesús ei Jesúsimo llote:

—Vino jai iñede.

<sup>4</sup> Jesús dinena uai ote:

—Quei, ¿bue ñellena iese cuemo llotio? Siño rafue cue finolle facaisedi nia riñede.

<sup>5</sup> Iemei ie eidi rafue nama mullaiaimo llote:

—Naimie omoimo lluaana fino.

<sup>6</sup> Jinui nainomo eenollena, nainomo seis noficimona finoca llerodana raisoide. Naiemona jinuina ouidimaci. Marena illena, cai einamací llua isoi, jofomo naimaci ria, naimaci abiaina llereuidimaci. Naga lleroda nibai cinco latas totaca. <sup>7</sup> Mullaiaimo Jesús llote:

—Naie llerodaiaina jinui diga oruita. —Pozomona jinui atiano, naie llerodamo toidimaci.

Iena finua mei, <sup>8</sup> Jesús naimacimo llote:

—Llerodamona janore jisa uanona, rafue nama dine uiño.

<sup>9</sup> Naie facaiseconi naie jinuidi vinona jaide. Rafue nama naiena facade. Naimiedi ninomona naie vino uana uiñoñede. Dani nainomo ite mullaiaí uiñoñotimaci. Jirua mei, ai otimie uaiduano, <sup>10</sup> raite:

—Rafue bu finoia, eo caimarede vino nano fecade. Comini ailluena jirua mei, janore caimarede vino fecade; iadedi iese fecañedio. Eo mare vino jinafona fecadio —raite.

<sup>11</sup> Galileamo Canámo Jesúsdi siño rafuena nano finode. Iemona caina ie uai siñona uiñoñote. Ie muidona naimie siño Jitonana iñotitacai.

<sup>12</sup> Rafue fuilla mei, Capernaumo Jesús ie ei diga, ie amatiai diga, ie llofueoicaiganodicai diga jaide. Nano nigarui nainomo iticai.

*Jusiñamui jofomona Jesúsdi rana fecarainina dotaja rafue*

(Mt 21.12-13; Mr 11.15-18; Lc 19.45-46)

<sup>13</sup> Pascua railla rafue iaire iacana jira, Jerusalémo Jesús cai diga jaide. Egiptomona cai jaiagai jillobillana comecillena, naie rafue ite. <sup>14</sup> Rillano, Jusiñamui jofomo diga rana fecarainina ciode. Ucube ollena, nainomo juraretaiai, toica llaudaiai, ucugiai fecauidimaci. Ucubena meidorainidi jiai itimaci. <sup>15</sup> Naimaci ocainaiai diga naimaci jino juillena, rao Jesús uanona, iena lleride. Naimaci ucubena judaide. Mesaiaina oni caitade. <sup>16</sup> Ucugiaina fecarainimo llote:

—Omoi ucugiaina jino uiño. Cue Moo jofomo ra feca-fecajana jitaiñedicue —llote.

<sup>17</sup> Iemo Jusiñamuina lloraini micoriai cuegafuiaina jai comecitacai. Iese jaie cuega: “O jofona cue riiduamona, jaino cuena meinetaitimaci”. <sup>18</sup> Nainomo ite juduai illaicomini dinena raitimaci:

—¿Nie isoide uaido naimacina jino oredio? Siño rafuena fino, siño uai omo illana cai uiñoñollena. <sup>19</sup> Jesús uai ote:

—Bicono judai. Darui amani maijiamona iena dane nillana fuidoiticue.

<sup>20</sup> Dane raitimaci:

—Cuarentiséis años bicomo maijidimaci, iena finollena. ¿Niese iena darui amani illanona, iena dane nillana fuidoitio?

<sup>21</sup> Iese raitimaci; ia Jesúsdi Jusiñamui jofona ñaiñede. Dama ie abina ñaite. Fiodaillamona ie jilloillena ñaite. <sup>22</sup> Jesús fiodaillamona naimie jillua mei, ie llofueoicaiganodicai bie llucinona comecitacai. Ie jira naie cuegafuena iñotitacai. Jesús llucinona jiai iñotitacai.

*Jesúdi comini comeciaino iticino lluaana jitaiñena rafue*

<sup>23</sup> Pascua railla rafue facaiseconi Jerusalémo Jesús ia, diga siño rafuena finode. Ie jira ailluena comini naimie uaina iñotitacai. Coniniri raitimaci:

—Naimiedi cai jilloitaraima. <sup>24</sup> —Naganomo comeciaina naimaci facaja jira, naie cominina naimie uiñuamona, Jesús naimaci motomo iacaiñede. <sup>25</sup> Naimaci comeciaino iticinuaina naimie eo raise uiñua jira, comini rafuena naimiemo bu lluaana jitaiñede.

## 3

*Nicodemo Jesús diga ñaia rafue*

<sup>1-2</sup> Juduai illaicominimona damiedi Nicodemo. Naimiedi fariseo imie. Naiona Jesús dine billanona, raite:

—Maestro, cai cominina llofuellena, Jusiñamui ona orede. Iena uiñoñotitacue. Siño rafuena o finua jira, Jusiñamui uai omo illana uiñoñotitacue.

<sup>3</sup> Jesús dīnena uai ote:

—Raise llotio; ia daje rafue omo lloiticue: Uanai omo lloiticue. Dane abido comonori o jeicifñenia, Jusiñamui ie cominina sedajanomo jaca initio.

<sup>4</sup> Nicodemo abido jicanote:

—¿Niese eimie ie ei jeraimo dane iite? ¿Niese dane comonori jeiciite?

<sup>5</sup> Jesús uai ote:

—Uanai omo lloiticue. Jusiñamui ie comini sedajanomo o illena, dama o eimona jeicifñello. Jusiñamui Joreñodo bu dane comonori comuitañenia, Jusiñamui ie cominina sedajanomo jaca iñeite. <sup>6</sup> Comemona cai comuitaia, jaca comedica; iadedi Jusiñamui Joreñodo cai comuitaia, Jusiñamui uruedica. <sup>7</sup> Omo dane lloiticue: Comonori jeicia. Ieri rajicaiñeno. <sup>8</sup> Iena o raise cacaillena, jiaie rafuedo iena lloiticue. Aifidi ie jitailla dine sairide. Iena cacadio; iadedi ninena billana uiñoñedio. Nine jaillana jiai uiñoñedio. Ie isoide. Niese Jusiñamui Joreño cominina comuitajana jiai uiñoñedio.

<sup>9</sup> Nicodemo dane jicanote:

—¿Niese biedi dane iite? Raise cacaiñedicue.

<sup>10</sup> Jesús uai ote:

—Jusiñamui rafuena omoi cominina llofuecabitio. Jusiñamui rafuena omo lloiticue; ia iena raise cacaiñedio. <sup>11</sup> Uanaicinona omo lloiticue. Abi uiñuamona omo lloiticue. Cue cūa rafuena lloiticue; iadedi cue lluaana iñoñedio. <sup>12</sup> Bene ite rafuena cue lloia, iena iñoñediota, monamo ite rafuena cue lloia, iena jiai raise iñoñeitio. <sup>13</sup> Eniruemona monamo jaca buna jaiñena jira, monamo ite rafuena bu raise uiñoñede. Monamona cue billa jira, nainomo abido jaiticue. Ie muidona nainomo ite rafuena uiñoñiticue. <sup>14</sup> Monamona biticue; ia amenamo fioidaiticue. Jofue iñenanomo Moisés micori jaio joreño amenamo jai cuinade. Jaionia iñinillamona comini fioidaiñellena iena cuinade. Comini ie isoi jilloillena, ie isoi cuena coraitimaci. <sup>15</sup> Cue fioidaillamona bu cue uaina iñoia, monamo jaca iite.

#### *Jusiñamuidi cominina eo isiruilla rafue*

<sup>16</sup> Jusiñamuidi cominina eo isiruilla jira, comini dine ie damiede Jitona orede. Ie Jitona naimaci iñollena, naimiena orede. Naimiena iñuamona, monamo jaca itimaci. Jiai faifñeitimaci. <sup>17</sup> Naimacina duere finotallena ie Jitona oreñede; iadedi naimaci jeacinomona jilloillena, naimiena orede. <sup>18</sup> Jusiñamuidi Jesús uaina iñotinona jaca duere finoñeite; iadedi ie dajede Jitona uaina naimaci iñoñena jira, Jusiñamui duere finollicino anamo jai itimaci. <sup>19</sup> Comini comeciaina lligaiñollena, Jusiñamui Jito bite. Jeacino comeciaino illana naimaci uiñollena, naimaci comeciaina lligaiñuaibite; iadedi naimaci comeciaino jitreñinomo iacana jira, jearede rafue naimaci finua muidona, naimiena jitaifñedimaci. Ie jira Jusiñamui naimacino duere finollicinona anamo jai itimaci. <sup>20</sup> Naimie finoca rafue bai raillano, naga jeacino finoraima ie comeci lligaiñuana jitaifñede; <sup>21</sup> ia Jusiñamui jitaillacinona finodino naimaci finoca rafue baillena, lligaiñotimie dine marefodo bitimaci.

#### *Juan micoridi Jesúsna dane ñaia rafue*

<sup>22</sup> Digarui illanona, Jesús ie llofueoicaiganodicai diga, Judea railla eniruemo macaricana jaidicai. Nainomo diga irui fiebidicai. Llofuiamona iñotinona bautizacana uiticai. <sup>23-24</sup> Nia cárcelmo iñenia, ailluena jinui nainomo illa jira, Enón railla nairaimo bautizajanomo Juan micori jiai ite. Salim railla nairai iairei ite. <sup>25</sup> Naie facaise Juan micori llofueoicaigano judíuai imie diga bautizajana siadotimaci. <sup>26</sup> Ie muidona Juan micori dine billanona, raitimaci:

—Maestro, navui Jordán ruica dine damie billena llotio. Naimiena o bautizallena, o dine navui bite; iadedi birui naimiedi cominina bautizade. Ailluena comini naimie dine jaioidimaci. O dine jai raise biñedimaci.

<sup>27</sup> Juan uai ote:

—Jusiñamui ie uai fecañedena, Jusiñamui facaina buna jaca buena finonide. <sup>28</sup> Cue lluaana navui cacadomo. Lloiticue: “Cai comini jilloitaraiañedicue. Cristoñedicue. Naimie billena cue lloillena, Jusiñamuidi naimie uicomo cuena orede”. <sup>29</sup> Jiaie rafuedo iena lloiticue. Damie ie aina ua mei, dama naimiemo duide. Ie aina ua rafue facaise, naimie nabai iena ciuano, ieri jiai iobide. Ie isoide. Comini cue dine navui biñoidimaci. Birui Jesúsno jaioidimaci. Naimiemo jai duidimaci. Iena cue cacajamona, ieri iobidicue. <sup>30</sup> Comini naimie uai siñona uiñuana jitaidicue. Comini cue jamai bue isoidimiena uiñuana jiai jitaidicue. <sup>31</sup> Jamai comedicutue. Ie jira eniruemo ite rafuena llocabiticue. Jusiñamuimona Jesús billa jira, cai baifemo faite. <sup>32</sup> Ie Moo illanomo cūa rafuena llote. Ie Moo illanomo cacaja rafue jiai llote; iadedi eo janore comini naimiena iñotimaci. <sup>33</sup> Naimiena iñotimiedi Jusiñamui uanaicinona lluaana raise uiñote. <sup>34</sup> Jusiñamuidi ie Joreño ie Jitomo caidiñeno fecaja jira, naimie Jusiñamui uaina llocabite. <sup>35</sup> Jusiñamuidi ie Jitona isiruite. Ie jira naga rafue

naimiemo fecade. <sup>36</sup> Bu Jusiñamui Jitona ñnoia, Jusiñamui illanomo jaca iite; iadedi bu naimiema ñnoñenia, Jusiñamui illanomo jaca iñeite. Jusiñamui ricaillafue anamo jai ite.

## 4

### *Galileamo Jesús jailla rafue*

<sup>1-2</sup> Naie facaise alluena comini Jesúsmona fueotimaci. Iemei naimie dibeido bautizadimaci. Naimacina naimie bautizallena, janore comini Juan dine jaide. Jesúdi bautizañede. Dani ie llofueoicaganodicai bautizadicaí. Fariseuai bie rafuena fidiano, iena Jesús uñña jira, <sup>3</sup> Judeamona Galileamo Jesús cai diga dane abido jaide.

### *Samaria iñaiño diga Jesús ñaia rafue*

<sup>4</sup> Galileamo jaillena, Jesúdi Samaria railla enirue dibeido jaiacade. <sup>5</sup> Samariumo cai ria, Sicar railla nairaimo iairei rillano, daje pozomo ridicai. Naie pozodi Jacob micori jaié finoca. Jacob micori naie pozo illano ie jito José micorimo jaié fecade. <sup>6</sup> Jitoma naidai itemo, naie pozo fuemo cai rillano, Jesús ana raide. Are macarillanona, jafaici ote. <sup>7-8</sup> Jesús pozomo fiebicaila meinona, Sicarmo jaidicai, guille ollena. Cai jailla mei, Samaria iñaiñodi jinui ollena, pozomo bite. Jesús naiñaiñomo jicade:

—Jinuina cue ine, cue jirollena.

<sup>9</sup> Naiñaiñodi uai ote:

—Judío imiedio. Samaria iñaiñodicue. ¿Ñiese cuemo jinuína jicadio? —Naiñaiño iese raite, judíuai Samaria comini diga ñairainina jira.

<sup>10</sup> Jesús dinena dane uai ote:

—Jusiñamui omo feacaacalle ra uññotodena, o diga ñaitimiema uññotona, cuemo jaca itataite jinuína cuemo jicadio. Iemei omo iena fecadicue.

<sup>11</sup> Naiñaiño uai ote:

—¿Ñiese bie pozomona jinuína oitio? Eo ana ite. ¿Ñinomona jaca itataite jinuína oitio? <sup>12</sup> Cai usuma Jacob micori bie pozo caimo jaié iñonocaiga. Naiemona naimie micori jaié jirode. Ie uruíai micoriai jiai naiemona jirodimaci. Ie ocainaiái dajemona jiai jirodimaci. Cai usuma micori baifemo faiñedio —raite.

<sup>13</sup> Jesús uai ote:

—Nagamiái bie jinui jirua mei, dane jiroacanite; <sup>14</sup> iadedi cue fecalle jinuína jirua mei, dane jiroacaiñenite. Cue fecalle jinui, torafo illa isoi, naimiemo jaca iite. Jusiñamui dine illena, naimiema jaca itataite.

<sup>15</sup> Naiñaiño naimie uai ote:

—Ero, cue dane jiroacaiñellena, bene dane cue biñellena, o lloga jinui cuemo ine.

<sup>16</sup> Jesús dinena uai ote:

—O jofomo mai jai. O ini diga abido bene bi.

<sup>17</sup> Naiñaiño uai ote:

—Ininidicue.

Jesús dinena uai ote:

—Uanaí llotio. Ua ñininidio. <sup>18</sup> Cinco diga ñina jai faicaidio. Birui o diga itimiedi jiai o iñiñede. Uanaicínona ua llotio.

<sup>19</sup> Iemona abina uññocailamona, naiñaiño dinena uai ote:

—Odi Jusiñamui ie lloraimadio. Iena uññoticue. <sup>20</sup> Cai jaiagai bai bene ite anedumo Jusiñamuina sedaudimaci. Ie jira nainomo Jusiñamuina ñia sedadicaí; iadedi omoi judíuai dinena raitomo: “Jerusalémo Jusiñamuina cai sedauilla”.

<sup>21</sup> Jesús dinena dane uai ote:

—Cuena ñno. Jaiurido bai bene ite anedumo cai Moona sedañeitomoi. Jerusalémo naimiema jiai sedañeitomoi. <sup>22</sup> Raise uññoteno Jusiñamuina biruido sedadomoi; iadedi cai nairaimona cai Jilloitaraima illa jira, naimiema raise uññuana sedadicaí. <sup>23</sup> Jaiurido, ua birui, cominidi: “¿Ñinomo Jusiñamuina sedaiticai?” raillamo comeciaina facañeitimaci. Naimaci comeciái jitaillamona, naimaci illanomo Jusiñamuina ua sedaitimaci. Naie isoide comini naimiema sedajana Jusiñamui jitaide. <sup>24</sup> Jusiñamui comeñede. Naimiedi jafaici. Omoi comeciái jitaillamona naimiema omoi sedajana jitaide.

<sup>25</sup> Riño uai ote:

—Cai Jilloitaraima billena uññoticue. Naimiedi Cristo. Naimie bia, nana bie isoide rafuena caina raise uññotaitaite.

<sup>26</sup> Jesús raite:

—Naimiedicue.

<sup>27</sup> Ieconí abido ridicai. Riño diga Jesús ñaia jira, rajicaidicaí; iadedi: “¿Buena naiñaiño jitaide?” raillano jicanofedicai. “¿Buena ñaitomico?” raillano jiai jicanofedicai. <sup>28</sup> Ie lleroda

pozo ecimo rainanocaida, Jesús llua isoi, naie facaise naiñaño ie nairaimo abido jaide. Nainomo abido rillanona, naiñaño cominimo llote:

<sup>29</sup> —Ailli pozo fuemo cue jaca cioiraininamie diga dafaifidicue. Nana cue finouiga rafue diese cuemo llote. Mai, cai jibuisailli. Naimiedi pozo fuemo ite. Nibai naimiedi cai Jilloitaraima. Naimiedi nibai Cristo.

<sup>30</sup> Te jira Jesús dine ailluena comini bitimaci. <sup>31</sup> Naie riño ie nairai dine jailla mei, abido cai dine nia riñenia, Jesúsna raiticai:

—Maestro, mai guiño.

<sup>32</sup> Naimie uai ote:

—Cuemo guille illana uñañedomoi.

<sup>33</sup> Coniniri siadotica:

—Jai nibai bu ecajai biga.

<sup>34</sup> Jesús uai ote:

—Jusiñamui cuena oretate. Naimie jitalla rafuena finocana jaidicue. Naimie rafuena cue lluamona, jai guticue isoidicue. <sup>35</sup> Comecina facadomo: “Jusiñamui uaina nia lloñeiticai. Ico iena lloiticai”. Te isoide. Illimo riará nia llisiñenia, comecina facadomo: “Riara einallena, naga amaga fivui fiebite. Naie facaise majiitica?”. Omoimo lloticue: Omoi ecimo eruai. Riara jai einate isoide. Naimacimo Jusiñamui rafue llollena, iena naimaci ñollena, ailluena comini jai itimaci. <sup>36</sup> Naie llisillamo majiitimiedi ie ucubena feiñoite. Te isoide. Jusiñamui rafuena damerie llocabillamona, comini iena cacadimaci. Jaiño billamona, iena dane cacajamona, iena ñnotimaci. Naie mare rafue lloraini ibana feiñoitimaci. Jusiñamui díbeimo naimaci dajena majia jira, dajena iobitimaci. <sup>37</sup> Cai comini iena raicabitimaci: “Damie iduaina rite; ia jaiñie llisillana ote”. <sup>38</sup> Te isoide. Omoína oredicue, comini cue díbeimo itatallena. Naimacimo cue uaina nano lloñedomoi; iadedi nano jaiño naimacimo cue uaina llotimaci. Te jira nana omoi llofuiamona cue uaina ñnotimaci.

<sup>39</sup> Samaria iñaño lluamona, naiñaño nairaimona ailluena comini Jesúsna ñnotimaci. “Naimiedi nana cue finoca rafuena cuemo llote” naimacimo naiñaño llote. “Naimiedi cai Jilloitaraima” raillanona Jesúsna ñnotimaci. <sup>40</sup> Jesús dine naimaci rillanona, naimaci diga naimie fiebillena, Jesúsno jicanotimaci. Te jira Jesús menarui naimaci dinomo fiebite. <sup>41</sup> Naimie llofuiamona, jiaie ailluena comini naimiena ñnotimaci. <sup>42</sup> Riñoimo llotimaci:

—Daño o lluamona, navui ñnoticai; iadedi naimie uaina cai cacajamona, birui raise ñnoticai. Naimiedi comini ua Jilloitaraima.

<sup>43</sup> Menarui illanona, nainomona Galileamo Jesús cai diga jaide. <sup>44</sup> Caimo llote:

—Jusiñamuina lloraimadi ie nairai illanomo ia, naie comini naimie lluomo cacarefiacaiñedimaci; <sup>45</sup> iadedi Galileamo cai rillanona, nainomo itino naimiena caimare feiñoitimaci. Pascua railla rafue facaise Jerusalémo nana naimie finoca rafue navui naimaci cúa jira, naimiena caimare feiñoitimaci.

#### *Jesúdi illaicomini jitona jillotaja rafue*

<sup>46</sup> Galileamo Jesús cai diga macaria, dane Canámo ridicai. Nainomo jinuumona vino navui finode. Nainomo cai ia, Capernaum railla nairaimo itimie jito duide. Duidimie moodi gobierno diga majiuiude. <sup>47</sup> Judeamona Galileamo Jesús illana naimie fidiano, Canámo bite. Jesús illanomo billena, ie jito jai fodiacaana jira, ie jitona jillotallena Jesúsno duere jicanote. <sup>48</sup> Jesús naimieo llote:

—Siño rafuena omoi cioiñenia, cuena ñnoñedomoi.

<sup>49</sup> Uai ote:

—Maestro, cue diga bi, cue jito fiodañellesa.

<sup>50</sup> Jesús uai ote:

—Mai jai. O jito jai fiodañeite —llote. Naie iima Jesús uaina ñnuano, ie jofomo abido jaide. <sup>51</sup> Naisona naimie jaidemo, ie mullaiai diga afeedo beici dafaifide. Llotimaci:

—O jito jai jillode.

<sup>52</sup> Te jira naimie jicanote:

—¿Nino jitoma itemo, jillode?

Uai otimaci:

—Navui are jitoma oni lluai caidemo, abi cuarilladi fainocai.

<sup>53</sup> Te comecina facade: “Navui are naie facaise Jesús cuemo llote: ‘O jito jai jillode’”. Te mullaiai llua cacajamona, naimiedi Jesúsdi cai jilloitaraimana ñnote. Nana naimie jofomo itino jiai ñnotimaci. <sup>54</sup> Judeamona Galileamo Jesús abido billano, siño rafuena iese jai finode.

<sup>1</sup> Digarui illa mei, cai judíuái rafue iacana jira, Jerusalémo Jesús abido jaide. <sup>2</sup> Jerusalémo toica llaudaíai jaisoilla nase facaimo joraibi ite. Cai judíuái uaimona nai joraibi mamecidi Betesda. Naie jorai fuedo ite cinco jifocotiai. <sup>3</sup> Nainomo diga duidino biidimaci: uisindimaci, ñuja-ñujacaidino, tisitaitino. Jínuina begollena sedadimaci. <sup>4</sup> Feide isoidemona dacaíño Jusiñamui jaenicidi jínuina begotallena bite. Iemei nai jínuimo nano jaidimie ie duicomona jillode. <sup>5</sup> Duidino motomo tisitaitmie ite. Treintiocho años duide. <sup>6</sup> Naimiena ciuano, naimie are duillana uíñuamona, Jesús naimiemo jicanote:

—¿Jilloiacadio?

<sup>7</sup> Duidimie uai ote:

—Jii; iadedi jínuina begoia, jaca buna iñede cue canoitena. Ie jira jiaimiedi cue uicodo jínuimo jaide. Ie jirari nia jilloñedicue.

<sup>8</sup> Jesús uai ote:

—Mai naidacai. O bíira ferinocaida macari.

<sup>9</sup> Ieconí naimie jillode. Ie bíira ferianona oni jai macarite.

*Sábadoruimo duidimie jilloitajana siadua rafue*

Sábadoruimo, judíuái jafaici ouillaruímo, naimie jillode. <sup>10</sup> Ie jira judíuái illaicomínidi jillodimie mo lote:

—Birui sábado. O bíira abinocaida o uilla jira, Moisés micori rairuica rana jai finodio. Sábadomo maijindicai. Birui jafaici uaruimo jaca buena jetanidicai.

<sup>11</sup> Naimie uai ote:

—Cuena jilloitatimie cuemo lote: “O bíira mai ferinocaida macari”.

<sup>12</sup> Judíuái dinena jicanote:

—¿Bu iena omo lote? —Naimie uíñoñena jira, uai oñede.

<sup>13</sup> Jesúsdi comini motomo itabilla jira, ailluena comini illa jira, jai jillodimie ie jilloitatimie uíñoñede. <sup>14</sup> Ie meinoconi dallu illanona, Jusiñamui jofomo Jesús dinena naimiena baite. Lote:

—Jai jillodio. Abido dane eo duere o sefuisa, dane jeacinona finoñeno.

<sup>15</sup> Ie mei judíuái illaicomínimo jillodimie lluaide. Lote:

—Jesús raillamie cuena jillotate.

<sup>16</sup> Sábadoruimo Jesús bie rafuena finua jira, judíuái illaicomínidi naimiena duere finoacasite. <sup>17</sup> Jesúsdi abina riiduano lote:

—Cue Moodi ie jitailla rafue jaca finode. Ie isoi cue jitailla rafue finocana jaca jaidicue —lote. <sup>18</sup> Sábadoruimo naimacimona Jesús maijia jira: “Jusiñamuidi cue Moo” naimie railla jira: “Jusiñamuidicue” naimie railla jira, judíuái illaicomini naimie meinellena eo jitaidimaci.

*Jesús ie Moo isoi finua rafue*

<sup>19</sup> Naimacimo Jesús lote:

—Uanaicinona lloticue. Buena dama finonidicue. Cue Moo finua rafuena ciuano finocabidicue. Cue Moo finua isoi finodicue. <sup>20</sup> Cue Moo cuena isiruillanona, nana ie finoca rafuena cuena jai uíñotade. Naimie Jitona cue illa jira, bie imana cue jilloitaja baifemo jiaie síño rafuena finoiticue, omoí rajicaillena. <sup>21</sup> Fiodaitinona jilloitallena, cue Moomo ie uai ite. Naie uai cuemo jai ite. <sup>22</sup> Cue Moo juez isoi naimie inoñedinomo lloñeite; iadedi naimacimo juez isoi cue llollena, naimaci duere sefuillena, ie uai cuemo iga. <sup>23</sup> Omoí dine naimie cuena oretate. Naimiedi omoí cuena iobitajana jitaide, naimiena omoí iobitaja isoi. Cuena omoí iobitañenia, cue Moona jiaí iobitañedomoí. <sup>24</sup> Uanaicinona lloticue. Cue uaina bu cacaiá, cuena oretatimiena bu inoia, monamo jaca iite. Jearede rafue naimie finua facaina duere sefuíñeite. Faiñeite; ia monamo Jusiñamui diga jaca iite. <sup>25</sup> Uanaicino lloticue. Jusiñamui Jitodicue. Ua birui cuena inoñedinomo cue uaina cacareitimaci. Cuena cacajamona, cuena inuamona, jaca iitimaci. <sup>26</sup> Cominina jaca itatallena, cue Moomo uai ite. Comini jaca itatallena, cuemo ie uai jiaí iga. <sup>27</sup> Cuena inoñedinomo juez isoi cue llollena, naimiemo cue duillamona, ie uai cuemo jiaí iga. <sup>28</sup> Ieri rajicaiñeno. Jiairuido nana jai fiodaitino diese cue lluaana cacaitimaci. <sup>29</sup> Fiodaillamona naimaci abiaí jilloitimaci. Ie mei cue jitaillacinona finodino jaca illena lloticue. Cue jitaillacinona finoñedinomo diese duere sefuillena lloticue. <sup>30</sup> Naimacimo cuena oretatimie jitailla isoi lloticue. Dama cue comecimo ite rafuena cue lloñena jira, bie lluaicinodi uanaicino.

*Jusiñamui ie Jito uaina comini inoñena rafue*

<sup>31-32</sup> Jesús nia lote:

—Dama cue abina cue lloiadedi, bu cuena jaca inoñede; iadedi Jusiñamui cue facaina jiaí lote. Naimie lluaicino uanaicino. Iena uíñoticue. <sup>33</sup> Naimiena cacareillena, Juan Bautista micori dine cominina navui oretatomoí. Abido naimaci bia, naimaci cacaja

rafuena omoimo lollena, naimacina oretatomo. Juan llucacino. <sup>34</sup> Naimie micori cue rafuena louide; iadedi naimie micori llogacino omo comecei eo facajana birui jitaifedice. Cuen a omo iinollena, naimie mamecina jai llotocue. <sup>35</sup> Lamparin raise lligaihua isoi, ie rafuedo Juan micori omo comecei iticimona raise uifotade. Dallu ieri iobidomo. <sup>36</sup> Cue finoca rafue Juan micori finoca rafue baifemo faite. Cue siño finoca rafuena fiaitice. Cuen naimie oretajamona, cue Moo uaido iena finodicue. Ie jira naiemona naimie dinena cue billana jai uifotomo. <sup>37</sup> Cue finoca rafue muidona cuena uifotomo; iadedi naimie lluaña jaca cacafedomo. Naimiena jiai jaca cioifedomo. <sup>38</sup> Cuen a omo iinoñena jira, naimie uaina feiñoñedomo. <sup>39</sup> Jusiñamui dine omo rillena, Jusiñamui facaina lloraini micoriai cuegafuina facacabidomo. Naifuiadi cuena ñaite; <sup>40</sup> iadedi Jusiñamui dine omo rillena, cue uaina iinoiacafedomo. <sup>41</sup> Cuemo iobillacina omo fecallena sedañedicue. <sup>42</sup> Jusiñamuina isiruiñedomo. Iena uifotocue. <sup>43</sup> Cue Moo mamecido cue billanona, cuena feiñoñedomo; iadedi dama ie mamecido jai naimie bia, naimiena feiñoitomo. <sup>44</sup> Jaca iinoiacafedomo. Iobillacino coninimo fecadomo; iadedi ua Jusiñamui omoina “Mare” raillana jitaifedomo. <sup>45</sup> “Cue Moomo omo marañede finoca rafuena llotocue” raillanomo comecei facañeno. Moisés micori cuegafuina omo llogiduafue jai ite. Moisés micori cuegafuina muidona Jusiñamui dine omo jaca illemo ocuridomo. <sup>46</sup> Moisés micori cuegafuina iinotomona, cuena naimie micori cuia jira, cuena jiai iinoitomo. <sup>47</sup> Naimie cuegafuina iinoñedomo. Ie jira cuena jiai iinoñeitomo — llote.

## 6

*Jesús cinco llomenicomona ailluena cominina ecaja rafue  
(Mt 14.13-21; Mr 6.30-44; Lc 9.10-17)*

<sup>1</sup> Jaiurido Galilea railla jorai ie ruica dibeimo Jesús ie llofueoicaiganodica; diga jaide. Naie joraidi jiai Tiberiana mameciredo. <sup>2</sup> Duidinona naimie jillotaullana naimaci cu a jira, ailluena comini naimiena racadimaci. <sup>3-4</sup> Naie facaiseconi pascua railla rafuedi jai iaie ite. Jesús cai diga anedumo a jaillanona, dinomo ana raide. <sup>5</sup> Oni erodatemo, ailluena comini naimie dine billana ciode. Felipemo jicanote:

—Naimaci guillena, ¿ninomona llomenicona oitica?

<sup>6</sup> Naimiena facacillena, iena jicanote; iadedi Jesús ie finolle rana jai uifote. <sup>7</sup> Felipe uai ote:

—Janore naimaci guillena, doscientos digarui ie majia ucube diese llomenico oticaina, baiñede.

<sup>8</sup> Naie facaise camona damie iena cacade. Naimiedi Simón Pedro ama. Andrés mameciredo. Naimie raite:

<sup>9</sup> —Cinco cebadamona finoca jenide llomenico daje uruemo bene ite. Mena lliciai jiai naimie ite; ia ¿niese nibaitica? Baiñeite.

<sup>10</sup> Jesús caimo llote:

—Cominimo llono, ana imaci raillesa.

Ie jira raitire illanomo ana raideimaci. Cinco mil iifia; itimaci. <sup>11</sup> Llomenicona Jesús ua meinoconi, Jusiñamuimo iobillacinona fecajano, Jusiñamuimo jide. Iemei cominimo caina naie llomenicona fecatate. Comini jitailla dierise lliciai daje isoi fecatate. <sup>12</sup> Naimaci monillamona, caimo Jesús llote:

—Buena jaca faififellena, fiebide guille danomo irai.

<sup>13</sup> Ie jira iena iraidica. Naie cinco llomenicomona, comini guigamona fiebidemona, doce cirigaiaimo oruitaticai. <sup>14</sup> Jesús finoca rafuena naie cominidi cuanona, llotimaci:

—Jusiñamui facaina lloraini micoriaidi cai jilloitaraima ico billena jai llotimaci. Bimiedi naimie.

<sup>15</sup> Naimaci illaimana naimie illena, naimiena gaitaacadimaci. Iena naimie uifua jira, iena naimie jitaifena jira, aneduaimo naimie oni jaide.

*Capernaumo Jesús abido jailla rafue  
(Mt 14.22-27; Mr 6.45-52)*

<sup>16</sup> Jitoma ana itemo, jai navuidemo, ie llofueoicaiganodica; joraimo jaidica. <sup>17</sup> Cai botemo cai jaillano, ruica Capernaumo jaiacadica; iadedi Jesús nia biñede. Jesúsna sedadicaimo, naimie biñena jirari, jai jitreña facaiseconi jai jaidica. <sup>18</sup> Riire aifi illa jira, jorai eo bagode. <sup>19</sup> Nibai cinco, nibai seis kilómetros jaidicaimo, damie cai dine jinui emododo billana ciodicai. Bote dine naimie billana cuanona, jacinaitica. <sup>20</sup> Jesús caimo llote:

—Jesúdicuesa. Jacinaifeno.

<sup>21</sup> Iena cacajanona, botemo naimiena a billana jitaídicaí. Ieconí ruica dine caí jaia-cananomo ridicaí.

*Comini Jesúna jenua rafue*

<sup>22-24</sup> Caí jailla mei, daje bote nairuido illa jira, jinafomo fiebidino Jesús caí diga jaiñenana uñotimaci. Caí Nama ie Moomo iobillacinona fecajanomo, cominimo guille fecajanomo, Tiberiamona dajerie botes naie facaíse iaíre bite. Monaidemo, Jesúna naimaci cioñena jira, caí jiaí iñena jira, naie botiaído Capernaumo Jesúna jenollena, jaidimaci.

*Jesús: “Llomenicodicue” railla rafue*

<sup>25</sup> Ruica dine Jesúna comini baillanona, jicanotimaci:

—¿Niruido bene ridio? <sup>26</sup> Jesús uai ote:

—Navui are omoina cue ecajamona, iemona omoi monillamona, cuena jenodomoi. Siño rafuena cue finuana ciodomoi; iadedi cuena nia ñnoñedomoi. <sup>27</sup> Guille raíre cueicabide. Cueiruide ramo comeciaina eo facañeno. Cueiruñede ramo comeciaina eo faca. Jusiñamui diga omoi jaca illemo comeciaina eo faca. Cue Moo Jusiñamui, iimana cue jaillena, cuena oretate. Ie uai cuemo illanona, cue uaina omoi iinuamona, Jusiñamui diga jaca iitomoi.

<sup>28</sup> Jicanotimaci:

—Nia Jusiñamui díbeimo iticaina, ¿nie isoidifue finodicaina mare?

<sup>29</sup> Jesús uai ote:

—Naimie oretagamie uaina omoi iinuana jitaide.

<sup>30</sup> Naimaci dinena dane jicanotimaci:

—¿Nie isoide rafuena finoitio? iena caí ciuano, o uaina caí ñnollesa. <sup>31</sup> Caí jaiagai jofue iñenanomo Jusiñamuimona bite guilla ra guisoidimaci. Moisés micori iena jaie cuela: “Jusiñamuimona bite guiga ra naimacimo nagarui fecauíde”. Iemo jiaí birui ocuridicaí. Naie isoide siño rafuena o finuana jiaí cioacadicaí —llotimaci.

<sup>32</sup> Jesús uai ote:

—Unai lloticue. Moisés micori naie guiga ra jaca fecañede. Cue Moo iena fecauíde. Birui naimiedi monamona bite ua llomenicono omoimo jai feacaacade. <sup>33</sup> Jusiñamui feacaacalle llomenico monamona jai bite. Comini iena guillamona, jaca iitimaci.

<sup>34</sup> Llotimaci:

—Nagarui caimo bie isoide llomenicono feca.

<sup>35</sup> Jesús uai ote:

—Llomenico guillamona iticaí. Omoi llomenico isoidicue. Cuena iinuamona, monamo jaca iitomoi. Cuena ñnotimie dane aimetañeite. Cuena isiruitimie jaca dane jiroacaiñenite. —Iese llote; ia naimaci comeciaina ñaite. Naimaci comeciái jitaillacino naimacimo jaca illena ñaite —. <sup>36</sup> Cuena ciodomoi; iadedi cuena ñnoñedomoi. <sup>37</sup> Nana cue díbeimo cue Moo itatallinodí cuena ñnoitimaci. Cuemona naimacina jaca oni dotañeiticue. <sup>38</sup> Cuena oretatimie ie jitailla rafuena finollena, monamona jai biticue. Dama cue jitailla rafuena finoiticuena biñedicue. <sup>39</sup> Cuena oretatimiedi cue díbeimo itatallinomona buna fañillana jitañede. Jusiñamui lluaruimo fiodaillamona nana naimaci abiaína cue jilloitajana jiaí jitaide. <sup>40</sup> Jusiñamui Jitona cue illana bu ñnoía, cuena bu ñnoía, monamo jaca iite. Jusiñamui llolluruimo fiodaillamona naimie abina jillotaiticue. Iese cue Moo jitaide.

<sup>41</sup> Jesús: “Monamona bite llomenicodicue” railla jira, judíuai illaicominidí naimie uaina jamaillano ñnosíñede. <sup>42</sup> Raitimaci:

—Bimiedi Jesús. José jito. Ie moona uñoticaí. Ie eina jiaí uñoticaí. ¿Niese naimiedi: “Monamona biticue” raite?

<sup>43</sup> Jesús uai ote:

—Iese omoi naiñeno. <sup>44</sup> Naimiena cue Moo ñnotañenia, bu cuena ñnonide. Cuena bu ñnoñenia, Jusiñamui llolluruimo fiodaillamona naimie abina jillotaiticue. <sup>45</sup> Jusiñamuina llorainí micoríai jaie iena cuetimaci: “Jusiñamuídi nana cominina íco llofueite” cuetimaci. Birui naie rafue jai suide. Naga cue Moomo cacarefidimie, naga cue Moomona fueotimie cuena jiaí ñnoite. <sup>46</sup> Buna cue Moona jaca cioñede. Naimiemona cue billamona, dama cue cúa. <sup>47</sup> Unaicinona lloticue. Cue uaina ñnotimie monamo jaca iite.

<sup>48</sup> Jesús dane llote:

—Llomenico guillamona iticaí. Omoi llomenico isoidicue. Cuena iinuamona, monamo jaca iitomoi. <sup>49</sup> Jofue iñenanomo omoi jaiagai Jusiñamuimona bite rana guisoidimaci; iadedi fiodaitimaci. <sup>50</sup> Birui jiaíe guille ra ite. Monamona ite. Iena bu guía, monamo jaca iite. <sup>51</sup> Bie llomenicodí cue. Monamo cominina jaca itatallena, monamona biticue. Bu bie isoide llomenicono guía, jaca iite. Bie llomenicodí cue abi. Comini facaina fiodaiticue.

<sup>52</sup> Iena cacajano, judíuai illaicomini coniniri naiena siadotimaci. Raitimaci:

—¿Niese bimie abina riiticaí?

<sup>53</sup> Ie jira Jesús dinena raite:



—Uanaí lloticue. Cue abina omoí riñenia, cue diruena omoí riñenia, cue Moo diga jaca iñeitomoi. <sup>54</sup> Bu cue abina riia, bu cue diruena riia, cue Moo diga jaca iite. Fiodaillamona naimie abi iirairuimo jillotaiticue. <sup>55</sup> Cue abidi ua rille. Cue diruedi ua rille. <sup>56</sup> Bu cue abina riia, bu cue diruena riia, cuena nabaiide. Naimiena jiai nabaidicue. <sup>57</sup> Cue Moo cuena orede. Naimiedi jaca ite. Cue Moo jaca illa jira, cue jaca iticue. Daje isoide. Bu cue abina riia, cue illamona, naimie jiai iite. <sup>58</sup> Bie isoide guille ra monamona jai bite. Omoí jaiagai jaiie guiga ra isoifede. Jaiie fiodaitimaci; iadedi bie guille ra birui bu guia monamo jaca iite. —Iese lloite; iadedi naimie fiodaillamona, naimiena comini inuamona, Jusiñamui diga naimaci jaca illena ñaite.

<sup>59</sup> Capernaumo judíuai ofiracomo Jesús biena lloite.

*Jesús diga jaisoidino naimie lluaña siadua rafue*

<sup>60</sup> Jesús diga jaisoidino naimie lluaña cacajano, coniniri siadotimaci:

—Bie lluaño eoi iirede. Bu iena cacaiñede.

<sup>61</sup> Jesúsdi naimaci iese siaduana uifote. Ie jira lloite:

—Cue lluaña raise inoñedomoi. <sup>62</sup> Jusiñamuimona imana jaillena jai biticue. Monamo abido ico cue jaillena cioitomoina, iena jiai nibai raise inoñeitomoi. <sup>63</sup> Cai joreño caimo illamona, iticai. Dani cai abi diga iñedicai. Ie isoide. Cue llogacino Jusiñamuimo duide. Iena omoí inuamona, jaca iitomoi; <sup>64</sup> ia omoimona nana inoñedomoi —lloite. Nano dofoconimona Jesúsdi naimiena inoñedinona uifote. Naimiena gaitataitimiena jiai uifote.

<sup>65</sup> Jesús dane lloite:

—Ie jira omoimo lloticue: Cue Moo jitañenia, cuena jaca bu inonide.

<sup>66</sup> Iena cacajano, Jesús diga jaisoidinomona, diga comini naimiena fainonocaidimaci. <sup>67</sup> Ie jira ie doce llofueoicaiganodicaimo Jesús jicanote:

—¿Jiai cuena fainonocaida, abido jaitomoi?

<sup>68</sup> Simón Pedro uai ote:

—Nama, o diga cai jaiñenia, ¿bu diga jaiticai? Jusiñamuimo cai rillena, o isoi Jillotaraíma iñede. Jiaimie mo jaca itataracinodi iñede. <sup>69</sup> O lluaña jai inotici. Jusiñamui mare Jitodio. Iena uifotici.

<sup>70</sup> Jesús dane uai ote:

—Doce digamie fetocaomoi; iadedi omoimona damie Taifemo jainaiaide —lloite.

<sup>71</sup> Caimona Judas Iscariote micorina ñaite. Judas micorí Jesúsna gaitataiacadimie.

## 7

*Jesús amatiai naimiena inoñena rafue*

<sup>1</sup> Jiairuido Galileamo ite nairaiaimo Jesús macarite. Judíuai illaicomini naimiena meinea-cana jira, Judeamo jaiñede. <sup>2</sup> Jifocotiaiai railla rafue iaie ite. Judíuai ie rafue. <sup>3</sup> Ie jira Jesús amatiai naimie mo lloite:

—O diga jaicabidino o finua rafuena raise cioillena, beno fainonocaida, Judeamo jai. <sup>4</sup> Bu ie mameci are soriacana, bainino majirainina. Ie isoide. Siño rafuena o finoa, ailluena comini illa motomo iena fino.

<sup>5</sup> Jesús amatiai naimiena inoñena jira, iese raite. <sup>6</sup> Jesús dinena uai ote:

—Jerusalémo nia jaiñeiticue; iadedi nainomo omoí jaiacalliruido omoí jai. <sup>7</sup> Comini omoína enoñedinomaci. Naimaci finoca jearede rafuena cue llua jira, cuena jaca enoidimaci.

<sup>8</sup> Jerusalémo rafuemo jai. Cue jaillirui nia riñena jira, nia jaiñeiticue. <sup>9</sup> —Iese lluaño, Galileamo naimie fiebide.

<sup>10</sup> Naimie amatiai rafuemo jailla mei, Jesúsdi naimaci jinafona dama bainino jaiide. <sup>11</sup> Nai rafuemo judíuai illaicomini Jesúsna jenuano baiñenano, cominimo jicanotimaci:

—¿Ninomo naimie ite? —Uñoñena jira, comini uai oñedinomaci.

<sup>12</sup> Nainomo ailluena comini itimaci. Comini illa motomo naimiena anado siadoside. Jiaino dinena: “Naimiedi mare” raitimaci. Jiaino dinena: “Naimiedi cominina jifute” raitimaci. <sup>13</sup> Judíuai illaicominina iciana comini jaciruillanona, anado siadoside. Jesúsna marefodo buna ñaifede.

*Sábadoruimo Jesús majia rafue*

<sup>14</sup> Jifocotiaiai railla rafue atuedo fuitemo, Jesús Jusiñamui jofomo jaillano, llofuede. <sup>15</sup> Illaicomini naimie llofuiamona rajicaidimaci:

—¿Niese naimie abi uifote? Eo rafuena uifotimimona jaca fueoñede —raitimaci.

<sup>16</sup> Jesús uai ote:

—Dama cuemona oñega cue llofuiacinodi. Cuena oretatimie ie. <sup>17</sup> Jusiñamui jitaillacinona finoiacadimiedi ninomona cue llofuiacinona cue uana uifote. Jusiñamuimona cue uana uifote. Dama cue comecimona cue oñenana jiai uifote. <sup>18</sup> Bu dama ie comecimona ie llofuiacinona uanona lloia, naimiedi comini naimie mo iobillacinona fecajana jitaide;

iadedi bu ie oretatimiena iobitaia, uanai llote. Maraiñedicinona finoñede. <sup>19</sup> Moisés micori Jusiñamui uaina jaiie llote; iadedi birui naie llogacinuaina nia raise inoñedomoi. Iena raise inotomoidena, cuena niade meineiacañedomoi.

<sup>20</sup> Comini dinena uai ote:

—Nibai uairitaidio. ¿Bu ona meineiacade?

<sup>21</sup> Jesús uai ote:

—Dacaño sábadoruimo damiena jillotaticue. Ie jira cue uaina uaitatomo. <sup>22</sup> Sábadoruimo jiai maijicabidomoi. Moisés micori iisaiiai abiai diana omoimo jaiie llote; iadedi naimie micori naiena nano lloñede. Naimie micori usumatiai naiena nano llotimaci. Sábadoruimo iisana abi dellirui ia, detomoi. <sup>23</sup> Moisés micori llogacinona inollena, sábadoruimo iisaiaina detomoi. Sábadoruimo iimana raise jillotaticuemo, ¿bue ñellena cue diga iciritomoi? <sup>24</sup> Cominimo jamai eruailanona, naimacina jeare ñañeno; ia naimaci finoca rafuena raise uiñuamona, naimacimo comecina faca. Cue finoca rafuemo comecina faca.

*Jesúna comini siadua rafue*

<sup>25</sup> Ie jira Jerusalémo itino coniniri siadotimaci:

—Illaicomini bimiena meineiacadimaci; <sup>26</sup> iadedi beno marefodo naimie llofuede. Jaca buena lloñedimaci. Illaicominidi: “Bimiedi cai Jilloitaraima” raillano nibai comeciaina facadimaci. <sup>27</sup> Bimie ie billanona cai uiñua jira, naimiedi cai Jilloitaraimañedimie. Cai Jilloitaraima baireia, jaca budi naimie billanona uiñoñeite —siadotimaci.

<sup>28</sup> Ie jira Jesús Jusiñamui jofomo naimie llofuano llote:

—Cuena uiñotomoi. Ninena cue billana jiai uiñotomoi. Cue jitailla jira biñedicue; iadedi jiaimie cuena oretate. Naimiedi uanai llote. Naimiena uiñoñedomoi. <sup>29</sup> Naimiemona cue billa jira, naimiena uiñotucue. Cuena oretate —llote.

<sup>30</sup> Ie jira illaicomini Jesúna gaitaacadimaci; iadedi naimie fiodable facaise nia riñena jira, buna naimiena gaitañede. <sup>31</sup> Nairui ailluena comini naimie uaina inotimaci. Raitimaci:

—Cai Jilloitaraima bia, ¿ñiese naimiedi bimie baifemo jiaie rafuena finoite?

*Jesúna gaitaiacana rafue*

<sup>32</sup> Fariseuaidi comini iese ñaiana cacajano, Jesúna gaitallena, Jusiñamui diga nanoca ñairainidi ailluena policiana orede. <sup>33</sup> Ie jira naimacina Jesús dinena raite:

—Dallu omoi diga nia iiticue. Ie mei cuena oretatimie dine abido jaiticue. <sup>34</sup> Cuena jenoitomoi; iadedi cuena baiñeitomoi. Cue dine binitomoi.

<sup>35</sup> Ie jira nainomo ite illaicomini dani siadotimaci:

—¿Ñine jaité? ¿Ñiese naimiena baiñeiticai? Judúañedinona llofuellena, jiaie eniruemo cai comini dine nibai jaité. <sup>36</sup> ¿Ñiese naimie raite: “Cuena jenoitomoi; iadedi cuena baiñeitomoi”? ¿Ñiese raite: “Cue dine binitomoi”? —iese siadotimaci.

*Jesúdi Jusiñamui Joreña ñaia rafue*

<sup>37</sup> Jifocotiaiai railla rafue fuillaruiimo, ua rafue ie nairuimo, Jusiñamui jofomo itinomo Jesús ado llote:

—Bu jiroacania, cue dine bi. <sup>38</sup> Jusiñamui facaina lloraini micoriai jaiie cuela: “Naimiena inotimie comecimo jaca itatate jinui isoi iite, torafomona jinui tonooilla isoi”.

<sup>39</sup> Jesúdi iese llote; ia Jusiñamui Joreña ñaite. Jusúna inotinomo Jusiñamuidi ie Joreña ico illena ñaite. Jesús nia fiodañena jira, iena nia iñega.

*Comini Jesúna dane siadua rafue*

<sup>40</sup> Jesús lluana comini cacajano, raitimaci:

—Jsiñamui facaina lloraini micoriai Jusiñamui facaina lloraima ico billena jaiie llotimaci. “Cristo nia baireñenia, naimie biite” llotimaci. Bimiedi naimie.

<sup>41</sup> Jiaino raitimaci:

—Naimiedi cai Jilloitaraima. Naimiedi Cristo.

Jiaino raitimaci:

—Cai Jilloitaraima Galileamona biñeite. <sup>42</sup> Jusiñamui facaina lloraima micori cuela: “Cai Jilloitaraimadi David micori jito. Belémo David micori illanomo jeicille”.

<sup>43</sup> Ie jira daje isoi naimiemo comeciaina facañedimaci. <sup>44</sup> Jiaino naimiena gaitaacadimaci; iadedi buna naimiena jetañede.

*Judúai illaicomini Jesúna inoñena rafue*

<sup>45</sup> Ie mei policias naimaci illaicomini dine abido jaidimaci. Fariseuai dinena jicanotimaci:

—¿Bue ñellena Jesúna atiñedomoi?

<sup>46</sup> Policias dinena uai ote:

—Naimie llofuia isoi jaca buna llofueñede. Iena jacinailanona, naimiena atiñedica.

<sup>47</sup> Fariseuai dane llotimaci:

—Cominina jifua isoi, omoina jiai jifue. <sup>48</sup> Cai illaicomini dinena naimiena jaca inoñedicai. Moisés micori llogacinodo raise jaidicai; <sup>49</sup> ia Jesús llofuiana cacadino Moisés micori llogacinuaido jaca raise jaiñedimaci. Ie jira jaca faifitimacisa.

<sup>50</sup> Naie illaicominimona Nicodemo raillamie ite. Naimie naiona Jesús dine navui jaide. Fariseo imie. <sup>51</sup> Jesúna riiduanona, naimie llote:

—Cai einamaci llocabitimaci: “Bu duere cai finoacania, nano naimie lluomo cacarefiticai. Jearede rafue naimie finuana cacareillano, naimiena duere finoitici”. Iena cai cacaiñenia, naimiena duere finoñeitici.

<sup>52</sup> Nicodemomo llotimaci:

—Galileamona bitino isoi ñaitio. Naimie llofuegamiena nibai jai jaiacadio. Jaie cuega-fuiaina raise faca. Jusiñamui facaina lloraini micoriaidi cai nairaina Jilloitaraima Galileamona billena jaie cueñedimaci. Bie Jesús raillamiedi cai nairaina Jilloitaraimañedimie.

<sup>53</sup> Ie meinoconi damierie imaci jofomo jaidimaci.

## 8

*Ie iniñede iima diga riñodi rafuetaila ie rafue*

<sup>1</sup> Naie facaise Jesúsdi Olivos railla anedumo jaide. <sup>2</sup> Ie areruido jitiramo Jusiñamui jofomo abido dane jaide. Ailluena comini naimie dine billa jira, naimie ana raíta, naimacina llofue. <sup>3</sup> Naie facaise Moisés micori llogacinona llofuerainimona dajerie bitimaci. Fariseuaimona dajerie jiai bitimaci. Daje riño atidimaci. Ie iniñede iima diga naiñaiñona jai eidatimaci. Comini illa uicomo atiano, <sup>4</sup> Jesúmo llotimaci:

—Llofueraima, biñaiño ie iniñede iima diga eidaticai. <sup>5</sup> Moisés micori jaie cuega: “Bie isoidiñaiñodi nofici diga fairinoga, meinellena”. ¿Niese naiñaiñona o raitio?

<sup>6</sup> Naimiena facacillena, naimie raise uai oñenia, naimiena llogidollena, iese jicanotimaci. Iena cacajano, Jesús ana jitadacaida, eniruemo ie onocai diga cuete. <sup>7</sup> Naimiemo diga icaíño jica-jicanuano, naimie naidacaida, naimacimo llote:

—Omoimona jeacino iñedimie naiñaiñoimo nano noficina fairino.

<sup>8</sup> Dane ana jitadacaida, eniruemo dane cuete. <sup>9</sup> Naimie lluaana cacajano, dajerie jino jaidimaci. Nano eo einamacidi jino jaidimaci. Ie mei conirueni jino jaidimaci. Nana comini tuua mei, nainomo Jesús fiebide, naie riño diga ñaillena. <sup>10</sup> Eruaillano naiñaiñoimo jicanote: —¿Ni nai o llogidotino?

<sup>11</sup> Naiñaiño uai ote:

—Jaca iñedimaci. Cuen a jai llogidoiacaiñedimaci.

Jesús uai ote:

—Jiai ona duere finoñeiticue. Mai jai. Jeacino dane finoñeno.

*Jesúdi comini comeciai lligaiñua rafue*

<sup>12</sup> Jesúsdi cominina dane llofuianona, raite:

—Jeacino oni jaillena, comini comeciaina lligaiñoticue. Cuen a inotimie jitre dinomo jaca iñeite. Jeacino anamo jai iñedimie Jusiñamui diga ico jaca iite.

<sup>13</sup> Fariseuai dinena uai otimaci:

—Dama o abina ñaitio. Ie jirari uanaicinona lloñedio.

<sup>14</sup> Jesús uai ote:

—Dama cue abina lloticue; iadedi uanaicinona lloticue. Ninena cue billanona uiñoticue. Nine cue jaillinona jiai uiñoticue. Ninena cue billanona uiñoñedomoi. Nine cue jaillinona jiai uiñoñedomoi. <sup>15</sup> Abi raise uiñoñeno cuena jeare ñaitomoi. Iese omoína ñaiñedicue; <sup>16</sup> iadedi omoína cue ñaia, uanaicinona lloticue. Dama cue uaina omoína lloñedicue. Cuen a oretatimie omoína jiai llote. <sup>17</sup> Moisés micori iena jiai jaie cuega: “Menamie daje isoi lloia, naie iaiaiaiaí llucacnodi: omoi inua” cuega. <sup>18</sup> Cue facaina lloiena, menamie jai ite. Cue facaina lloticue. Cue Moo cue facaina jiai llote.

<sup>19</sup> Fariseuai dinena jicanote:

—¿Ni o moo?

Jesúsdi uai ote:

—Cuen a uiñoñedomoi. Cue Moona jiai uiñoñedomoi. Cuen a uiñotomoina, cue Moona jiai uiñotomoi.

<sup>20</sup> Jusiñamui jofomo ucube eenoracomo bicinona siadotimaci. Jesús fiодaille facaise nia riñena jira, jaca buna naimiena gaitañede.

*Jesúna comini inoñenia, naie jeacino diga fiодaila rafue*

<sup>21</sup> Naimacimo Jesús dane llote:

—Ico oni jaiticue. Cuen a jenoitomoi; iadedi cuena baiñeitomoi. Na omoimo jeacino nia itemo, fiодaitomoi. Cue jaillinomo jainitomoi.

<sup>22</sup> Ie jira judiuaí illaicomini dinena iena siadotimaci:

—Dama ie abina meineite.

“Cue jaillinomo jainitomo?” Jesús railla jira, iese siadotimaci.

<sup>23</sup> Jesúsdi uai ote:

—Jusiñamuimo ite rafuemo duiñedomoi. Naimiemo ite rafuemo duidicue. Naimie dibeimo iñedomoi; ia naimie dibeimo iticue. <sup>24</sup> Cue Jusifñamui Jitonana omoi iñoñena jira, na omoi jeacino diga fioidaitomoi.

<sup>25</sup> Jicanoside:

—¿Budío?

Jesús uai ote:

—Nano omoi motomo cue illamona bumiedicuena omoina raicabiticue. <sup>26</sup> Diga rafue omoimo lloiacadicue. Marañede rafuena omoi finuana omoimo nia lloiacadicue; iadedi omoimo cuena oretatimie uaina dama lloticue. Nai uaidi uanaicino —lote.

<sup>27</sup> Naimiedi ie Moo Jusifñamuina lloti; iadedi cacañedimaci. <sup>28</sup> Ie jira Jesús lloti:

—Cuena omoi meinia mei, bumiedicuena uñoitomoi. Cue uaido dama lloñedicue; iadedi cue Moo cue llofuia uaido llocabiticue. <sup>29</sup> Cuena oretatimie cue diga ite. Naimie jitaille rafuena cue finua jira, cuena fainonocañede.

<sup>30</sup> Iese Jesús llotemo, diga illaicomini naimie uaina como iñoiacadimaci.

*Comini Taife anamo illa rafue*

<sup>31</sup> Jesúsdi naimie uaina como iñoiacadinomo lloti:

—Cue llwana iñocana omoi jaia, cue ua cominidomoi. <sup>32</sup> Uanaicinona uñoitomoi. Ie mei jiaimie anamo dane iñeitomoi.

<sup>33</sup> Uai otimaci:

—Abraham micori ie uruiaidicai. Jiaimie anamo jaca iñedica. ¿Bue ñellena llotio: “Jiaimie anamo iñeitomoi”?

<sup>34</sup> Jesúsdi uai ote:

—Uanai lloticue. Jeacino finocabidomoi. Naga jeacino finoraima ie jeacino anamo jai ite. Omoi jeacino anamo omoi illana ñaiticue. <sup>35</sup> Jiaie rafuedo iena lloticue. Ie patrón anamo itimiemo ie patrón rafuedi duiñede; iadedi naie patrón jito mo ie rafuedi duide. <sup>36</sup> Ie isoide. Jusifñamui Jitona cue illamona, naimie rafuemo duidicue. Ie jira omoimo cue lloia, omoi jeacino anamo ua iñeitomoi. <sup>37</sup> Abraham micori ie uruiaidomoi. Iena uñotocue; iadedi cue llwana omoi raise iñoñena jira, cuena meineiacadomoi. <sup>38</sup> Cue Moo diga jai cue illamona, cue cúa rafuena llocabiticue. Omoi moomona cacaja rafuena finocabidomoi.

<sup>39</sup> Uai otimaci:

—Cai moodi Abraham micori.

Jesús dane uai ote:

—Abraham micori uruiaidomoidena, Abraham micori finoca rafue isoi finodomoi. Abraham micori uruiañedomoi. Ie jira Abraham micori finoca rafue isoi finoñedomoi. <sup>40</sup> Uanai cue llua jira, cuena meineiacadomoi; iadedi Abraham micori iese finoacañede. Cue llucacino Jusifñamuimona oticue. <sup>41</sup> Jusifñamui uruiaia finoca rafuena finoñedomoi; iadedi omoi moo finoca rafuena finocabidomoi.

Uai otimaci:

—Jamai nairai ie uruiañedica. Cai Moodi Jusifñamui.

<sup>42</sup> Jesús dane lloti:

—Jusiñamuidi omoi moodena, cuena isiruitomoi, naimiemona cue billa jira. Cue jitailla jira, biñedicue; iadedi cuena oretate. <sup>43</sup> ¿Bue ñellena cue llwana cacañedomoi? Cacareirainidomoi. <sup>44</sup> Omoi moodi Taifena jira, cue llwana iñoñedomoi. Naimie jitailla rafuena finoacacabidomoi. Nano dofomona naimiedi comena meineraima. Naimie taino jaca llua jira, uanaicinona naimie jaca gaiñede. Naimie tainona lloia, ie comeci llua isoi lloti. Naimiemona taino llucacino di comucabide. Naimie isoidomoi. <sup>45</sup> Uanai cue llua jira, cuena iñoñedomoi. <sup>46</sup> ¿Nie isoide jeacino finodicue? Cuemo llono. Uanai cue llua, ¿bue ñellena cuena iñoñedomoi? <sup>47</sup> Jusifñamuina mooredimiedi Jusifñamui uaina cacade. Jusifñamui uruiañedomoi. Ie jira cue llwana cacañedomoi.

<sup>48</sup> Naimiena jearuillanona, naie illaicomini dinena iese raitimaci:

—Samaritano nairai imedio. Janaba illamedio. Uairitaidio.

<sup>49</sup> Jesús uai ote:

—Janaba illamieñedicue. Cue finoca rafuemonona cue Moona iobitadicue; iadedi iese cuena omoi ñaiamona cuena iobitañedomoi. <sup>50</sup> Omoimona iobillacinona feiñollena, cue rafuena finoñedicue; ia cue Moo iena oiacade. Cuena omoi iñoñena, cuemo iobillacinona omoi fecañena, cue Moo omoina duere finoite; <sup>51</sup> ia bu cue llwana ua iñoia, jaca ua fioidañeite.

<sup>52</sup> Naie illaicomini dinena uai otimaci:

—Janaba illamiediona jai uifnoticai. Abraham micori jai e fiodaite. Jusiñamuina lloraini micoriai jai jai e fiodaite; iadedi: “Bu cue lluaña uinoiadedi, fiodaite” raitio. <sup>53</sup> Cai usuma Abraham micori baiferno faifedio. Jusiñamuina lloraini micoriai baiferno faifedio. ¿Bumiedota?

<sup>54</sup> Jesús uai ote:

—Dama cue abina biriñedicue; ia cue Moo cuena marena ñaiamona, cuena iobitate. “Cai Moodi Jusiñamui” raicabitomo; <sup>55</sup> iadedi naimiena uifnotedomoi. Naimiena uifnoticue. “Naimiena uifnotedicue” cue raia, omoi isoi taino lloticue. Naimiena uifnoticue. Naimiena jai uifnoticue. <sup>56</sup> Omoi usuma Abraham micori enirumo cue ico billena jai e uifnote. Iena uifnuamona, naimie iobide.

<sup>57</sup> Illaicomini dinena uai otimaci:

—Odi cincuenta años nia iñedio. ¿Niese Abraham micorina ciodio?

<sup>58</sup> Jesús uai ote:

—Abraham micori nia iñena facaiseconi jaca iticue.

<sup>59</sup> Iena cacajanona, naimie fairinollena, naie illaicomini noficina llinotimaci; iadedi Jesús reirillanona, Jusiñamui jofomona oni jai e.

## 9

### *Jesús uisnidimiena jillotaja rafue*

<sup>1</sup> Jai ruidio ie llofueoicaiganodica; diga Jesús macaria, uisnidimiena ciodo. Iese nanomona jaca naimiedi jeiciga. <sup>2</sup> Jesús mo jicanotica:

—Llofueraima, ¿bue ñellena naimiedi iese jeiciga? ¿Nie isoide ra ie mo jetajamona, naimie iese jeiciga? ¿Nie isoide ra ie ei jetajamona, naimie iese jeiciga? Caimo llono.

<sup>3</sup> Jesús uai ote:

—Naimie jeacino finua muidonañede. Ie mo muidonañede. Ie ei muidonañede. Jaca bue jetajamona, iese comiñede. Jusiñamui uai siñonana comini uifnollena, iese jeiciga. <sup>4</sup> Nia userena jira, cuena oretatimie ie jitailla rafuena finoacadica. Raie jitirenite. Ie mei bu jaca maijinite. <sup>5</sup> Enirumo cue nia ia, comini comeciaina lligaiñoticue. —Iese Jesús lloite; iadedi jiaie rafuena ñaite. Naimie nia fiodaifenia, Jusiñamui rafuena llocana naimie jaillana ñaite. Ie fiodaillirui jai iaie iacanana ñaite. Comeciaina lligaiñuana lloite, jeacino oni jaillena.

<sup>6</sup> Iena lluaña eniruma tuajano, enirue idiai finuaña, uisnidimie uisina naie enirue diga riginote. <sup>7</sup> Raite:

—Siloé railla joraibimo mai noisai —raite. Siloé oni dobaifnuamona: “Oretarabi”.

Ie jira naimie noisaide. Uisi jai ciodome, abido bite. <sup>8</sup> Billa mei, naimie ecimo itino, jai naimiena ciocabidino diga, naimie jilluaña coniniri siadotimaci:

—¿Buuta naimiedi? Bene ucube jicallena raicabidimie isoide.

<sup>9</sup> Jiaño raitimaci:

—Jii, naimie.

Jiaño raitimaci:

—Ieñede. Naimiena eruaide isoide.

Naimie dinena raite:

—Uisnidimiedicue; iadedi jai ciodicue.

<sup>10</sup> Naimiemo jicanotimaci:

—¿Niese jai birui ciodio?

<sup>11</sup> Uai ote:

—Jesús raillamie enirue idiai finuaño, cue uisina riginote. Cuemo lloite: “Siloé railla joraibimo noisai”. Ie jira noisaicue. Jai ciodicue.

<sup>12</sup> Jicanotimaci:

—¿Ninomo ite nai Jesús?

Naimie uai ote:

—Uifnotedicue.

### *Comini uisnidimie jai jilluaña siadua rafue*

<sup>13</sup> Navui uisnidimie jai jilluaña mei, fariseuai dine comini naimiena uitimaci. <sup>14</sup> Sábadoruimo Jesús naimiena jillotaja jira, <sup>15</sup> fariseuai naimiemo jicanotimaci:

—¿Niesenamona jai ciodio?

Uai ote:

—Jesús raillamie enirue idiai finuaño, cue uisina riginote. Ie mei Siloé railla joraibimo noidicue. Iemona jai ciodicue.

<sup>16</sup> Fariseuaimona jiaño raitimaci:

—Sábadoruimo bimiena Jesús jillotaja jira, caimona jai maijide isoide. Jesús maijia jira, Jusiñamuimona naimie biñede.

Jiaino raitimaci:

—¿Niese jearede ra finouidimiedi uisinidimiena jillotate? —Ie jira daje isoi comeciaina facañedimaci.

<sup>17</sup> Ie jira navui uisinidimie mo dane jicanotimaci:

—Naimie ona jillotaja jira, ¿niese odi Jesúna raitio?

Uai ote:

—Naimiedi Jusifamui uai lloraima.

<sup>18</sup> Naimie moo, naimie ei iaímaiaimo nia jicanoñenia, judíuai illaicomini nai iima jaca cioñenano inosiñede. Ie jira iaímaiaina uaiduanona, <sup>19</sup> jicanotimaci:

—¿Bimiedi omico jito? ¿Naimie jaca uisinino jeiciga?

<sup>20</sup> Uai otiaímaiaia:

—Jii, bimie coco jito. Jaca uisinino jeiciga. Iena uiñoticoco. <sup>21</sup> Niese jai naimie uisina cuana uiñoñedicoco. Bu naimiena jilloitajana jai uiñoñedicoco. Naimie mo jicano. Naimiedi jai eimiesa. Dama ie facaina jai ñaite —uai otiaímaiaia.

<sup>22</sup> Bie rafue nia suiñenia, judíuai illaicomini navui llotimaci: “Jesúdi cai Jilloitarama bu lloia, cai ofiracom naimiena fo billana rairuitica”. Iena jacruillanona, <sup>23</sup> llotiaímaiaia: “Naimie jai eimiesa. Naimie mo jicano”. <sup>24</sup> Ie jira illaicomini dane naimiena uaiduano, llotimaci:

—Jusifamuimo iobillacinona feca. Jesúmo fecañeno. Naimie jearede rafuena finouidimiena uiñoticai.

<sup>25</sup> Uai ote:

—Naimie jearede rafuena finouillana uiñoñedicue. Daje rafuena uiñoticue. Navuidi cioirainidicue. Birui jai ciodicue. Iena uiñoticue.

<sup>26</sup> Jicanotimaci:

—¿Niesede ra diga finuamona odi uisina ciodio? ¿Niese ona jillotate?

<sup>27</sup> Uai ote:

—Omoimo jai lloticue; iadedi cacaiacaiñedomoi. ¿Bue ñellena omoimo dane lloticue? ¿Ie llofueganona jaiacadomoi?

<sup>28</sup> Riire uai otimaci:

—Naimie ie llofuegamiedio. Caidi Moisés micori ie llofueganodica. <sup>29</sup> Jusifamui Moisés micorimo jai llua uisina uiñoticai; iadedi bimiena uiñoñedicai. Naimie ninena billana jai uiñoñedicai.

<sup>30</sup> Nai iima uai ote:

—Jadi, naimie ninena billana uiñoñedomoi; iadedi cuena jillotate. <sup>31</sup> Jusifamuidi jearede rafuena finodino ñaia uaina cacareñede. Naie isoidino siño rafuena finoñenana uiñoticai; iadedi Jusifamuidi naimiena sedadimie ñaia uaina cacade. Ie jitailla rafuena finodimie ñaia uaina cacade. Naie isoidino siño rafuena finuana uiñoticai. <sup>32</sup> Enirue finua facaisemona jaca buna uisinino jeicigamiena jilloitañede. <sup>33</sup> Jesúdi Jusifamuimona biñedimiedena, jaca buena finonide.

<sup>34</sup> Uai otimaci:

—Jamai cai nairai imiedio. ¿Niese caina llofueitio?

Ie jira naimaci ofiracomona naimiena jino dotadimaci.

*Jesús uisinidimie diga ñaia rafue*

<sup>35</sup> Uisinidimiena jino dotajana fidianona, Jesús naimiena jenode. Baillano, jicanote:

—¿Omoi cominina Jilloitaramana inotio?

<sup>36</sup> Uai ote:

—¿Bumai naimie? Cuemo llono, naimiena cue inollasa.

<sup>37</sup> Jesús uai ote:

—Naimiena ciodio. O diga ñaite. Cue.

<sup>38</sup> Caiñici ifodo rainadajanona, iobillacinona fecallena, uai ote:

—Nama, jai o uaina inoticue.

<sup>39</sup> Jesús uai ote:

—Uisinidino cioitallena, enirue mo biticue. Jai uisina ciodino uisina cioitañellena biticue. —Iese Jesús raite; ia naimaci comeciaina ñaite. Jesús “Jai marañedicai” raitinona jillotaja bite. Jesús “Jai maredicai” raitinomo ite jeacino naimaci uiñollena bite.

<sup>40</sup> Naimie ecimo ite fariseuai iena cacajano, jicanotimaci:

—¿Uisinidomoi caina raitio?

<sup>41</sup> Jesús uai ote:

—Uisinidino isoi itomoina, omoimo ite jeacino omoi muidonañede; ia “Jai ciodica” omoi railla jira, omoimo ite jeacino omoi muidona.

Iese raite; ia naimaci comeciaina ñaite. Jeacino naimacimo illana naimaci uiñoiaiañena jira, iese ñaite. Naimaci jeacino oni dotajana jitañedimaci.

## 10

### *Toica llaudaiai sedaraima rafue*

<sup>1-2</sup> Jesús dane llofujete:

—Cue rafuena omoi raise uiñollena, toica llaudaiaina ñaiticue. Llaudaiai jino uicabilla isoi, llaigafomo nasedo fo jaidimiedi naie llaudaiai sedaraima; ia jinofebai dinena bitimiedi firiraima. <sup>3</sup> Llaigafu llaudaiai sedaraima fo jaillena, nase sedaraimadi nase econote. Llaudaiai naimie uaina uiñotimaci. Imaci mameciaido uaiduamona, llaigafomona jino bitimaci. <sup>4</sup> Nana ie llaudaiai jino bia, naimacina ifode. Naimie uaina uiñuanona, naimiena racadimaci. <sup>5</sup> Naimaci uiñoñegamierna racañedimaci; iadedi naimie uaina naimaci uiñoñena jira, naimiemona oni aisidimaci.

<sup>6</sup> Bie isoidicinona Jesús llofujete; iadedi naie comini iena cacaiñedimaci. <sup>7</sup> Ie jira Jesús dane llofujete:

—Llaigafu ie nase isoidicue. <sup>8</sup> Damierie firirainina bitimaci. Ie jira llaudaiai naimaci uaina cacaiñedimaci. —Iese Jesús llofujete; ia naimiena ñnotinona ñaite. Naimiena abi caitadinona ñaite. Naimie ñnotino naimiena abi caitadino llogacinomo cacareffñena ñaite. <sup>9</sup> Nia llofujete:

—Llaigafu isoidicue. Bu cue nasedo fo bia, jilloite. Llaudaiai isoi fo biite. Jino jaite. Mare guille baite isoite. —Iese llofujete; ia naimiena ñnotino marena illana ñaite. Naimiemona naimaci jitailla rafuena uana ñaite. <sup>10</sup> Nia llofujete:

—Llaudaiaina fillena, meinellena, faifillena, firiraima bite; iadedi cominina jaca raise itatallena, biticue. <sup>11</sup> Llaudaiai marena sedaraimadicue. Mare sedaraimadi ie toinai facaina riiduanona ie abina faifite. <sup>12</sup> Janallari bia, llaudaiai naimie ieñena jira, jamai maijidimiedi, llaudaiaina fainonocaillano, ecimona aiside. Llaudaiaina janallari gaitaacanamona, llaudaiai tuudimaci. <sup>13</sup> Jamai ucube oiacanano, isiruiñenano, jamai maijidimie aiside. <sup>14</sup> Iese iñedicue. Mare sedaraimadicue. Cue llaudaiaina uiñoticue. <sup>15</sup> Cue Moo diga conimana coco uiñua isoi, naimaci cuena jiai uiñotimaci. Cue llaudaiai facaina fioidaiticue. —Iese Jesús llofujete; ia naimiena ñnotinona ñaite. Jamai maijidimie isoi naimacina sedañede. Naimacina raise riidote. Naimaci facaina jiai fioidaiacade. <sup>16</sup> Nia llofujete:

—Jiaie llaigafomo jiaie llaudaiai cuemo ite. Naimacina jiai atiacadicue. Cue uaina cacaitimaci. Ie mei danomo nana cue llaudaiai iitimaci. Naimacina dama sedaiticue. —Iese Jesús llofujete; ia jiaie nairaiaimo naimiena ñnoitinona ñaite. Dajena naimacina sedajana ñaite.

### *Jesús fioidaille rafue*

<sup>17</sup> Jesús nia llofujete:

—Cue jai fioidaiacanamona, cue Moo cuena isiruite. Fioidaillamona dane jilloiticue. <sup>18</sup> Cue jitañenia, jaca buna cuena meineñeite. Cue jitailla jira, fioidaiticue. Siño uai cuemo illa jira, cue jitaillruimo fioidaiticue. Cuemo cue Moo siño uaidi jai illa jira, dane jilloiticue.

<sup>19</sup> Jesús iese llofujia jira, judiaui illaicominidi daje isoi comeciaina facañedimaci. <sup>20</sup> Jiaiodi: —Naimiemo Janaba illamie —raitimaci—. Uairico. Naimiena cacareiaicaiñedicaí —raitimaci.

<sup>21</sup> Jiaino raitimaci:

—Bie isoidicinona Janaba illamie llofueñede. Janaba illamie uisindimienena jillotanide.

### *Jesús ie Moo diga daje isoi comeci lloilla rafue*

<sup>22</sup> Rollime facaise Jerusalémo Jesús ite. Naie facaiseconi Jusiñamui jofu ie finua comeci rafue ite. <sup>23</sup> Salomón micori finotaga jofu abi ibirimo Jesús macarite. <sup>24</sup> Naie facaise judiaui illaicomini naimie dine bitimaci. Jicanotimaci:

—¿Ñiruido caimo ona lloitio? Odi cai Jilloitaraimania, caimo marefodo llono.

<sup>25</sup> Jesús uai ote:

—Omoimo jai lloticue; iadedi ñnoñedomoi. Cue Moo mamecido cue finoca rafuemona cuena uiñotomoi. <sup>26</sup> Cue toica llaudaiaimo omoi jainaiañena jira, cuena ñnoñedomoi. <sup>27</sup> Cue toica llaudaiai cue uaina cacadimaci. Naimacina uiñoticue. Cuena racadimaci. <sup>28</sup> Naimaci jaca itataticue. Jaca abina faifñeitimaci. Cue anamona jaca budi naimacina bairoñeite. <sup>29</sup> Cue Moo naimacina cuemo fecade. Naimacidi jiaino baiñemo faitimaci. Naimiemona jaca budi naimacina bairoñide. <sup>30</sup> Cue Moo diga daje isoi comecina lloidicoco. —Iese llote; ia naimiena ñnotinona ñaite. Naie illaicomini naimiemo jainaiañena jira, naimiena ñnoñedimaci. Iena Jesús ñaite.

<sup>31</sup> Jesús llofuiana cacajano, naie illaicomini noficina llinotimaci, naimiena meinellena. <sup>32</sup> Tena ciuanona, Jesús llote:

—Cue Moo uaido diga mare rafuena finodicue. ¿Nie isoide rafuena cue finua muidona, cuena meineiacadomoi?

<sup>33</sup> Uai otimaci:

—Mare rafuena o finua muidona, ona meineñiticaí. Jamai iimadio. “Jusiñamuidicue” o railla jira, ona meineiticaí. Jusiñamui Joreñona jiai jeare ñaitio.

<sup>34-36</sup> Jesús dinena uai ote:

—Jaie cuegafuaina jamainidicaí. Nainomo Jusiñamuidi naimie uaina cacadinomo jaie llote: “Omoídi jusiñamuillaidomoi”. Jusiñamui ie uaina cacadinomo jaie iese lloide, ¿niese cuena jeare ñaitomoi? Jusiñamui cuena fetuano, cuena bene oretate. “Jusiñamui Jitodicue” cue railla jira, “Jusiñamui Joreñona jeare ñaitio” raitomoi. <sup>37</sup> Cue Moo isoi cue finoñenia, cuena iñoñeno; <sup>38</sup> iadedi cuena omoi iñoiacañenia, cue Moo isoi cue finoia, naie rafuena iño. Iemei cue Moomo cue jainaiailana uiñoitomoi. Cuemo cue Moo jainaiailana jiai uiñoitomoi.

<sup>39</sup> Tena cacajano, naimiena dane gaitaacadimaci; iadedi naimacimona jillode.

<sup>40</sup> Ie mei Jesús Jordán railla ille ruica dibeimo jaide. Nainomo Juan micorí cominina nano bautizade. Nainomo rillanona, nainomo Jesús fiebide. <sup>41</sup> Ailluena comini Jesús dine bitimaci. Coninina raitimaci:

—Juan micorí siño rafuena finoñede; iadedi nana Juan micorí Jesúsna llucinodi uanaicino.

<sup>42</sup> Nainomo ailluena cominidi Jesús naimaci Jilloitaraimana iñotimaci.

## 11

### *Betaniamo Jesús abido jailla rafue*

<sup>1</sup> Naie facaise Betaniamo Lázaro raillamiedi duide. Naimie miriñodi Marta, María iaifñuai. <sup>2</sup> Naie Mariadi jairuido Jesús eillimo caimare soride rana totade. Ie mei naifñaiño ie ifote diga naimie eillina safenaillena dote. <sup>3</sup> Naie iaifñuai Jesús dine uaina orediaifñuai, naimie billena. Naimie jibuisaibillena llotatatiiaifñuai:

—Nama, o isiruiгамie duide —llotatatiiaifñuai.

<sup>4</sup> Jesús naie rafuena fidiano, llote:

—Jamai fiodaillena naimie duiñede. Jusiñamui uaina siñonana comini uiñollena, naimie duide. Iemona comini dinena: “Ua Jusiñamui Jitodio” cuena raitimaci.

<sup>5</sup> Jesúsdi Lázaron a isiruite. Ie miriño iaifñuaina jiai isiruite; <sup>6</sup> iadedi Lázaro duillana Jesús fidiano, naimie dine jaifñede. Naimie illanomo menarui nia fiebide. <sup>7</sup> Ie mei ie llofueoicaiganodicaimo llote:

—Judeamo abido dane mai cai jailli.

<sup>8</sup> Uai oticaci:

—Llofueraima, judíuai illaicomini birui noficina ona fairinoiacadimaci. ¿Niese naimaci dine dane jaitio?

<sup>9</sup> Uai ote:

—Nagarui userede. Userenia bu macaria, raise ciua jira, eicaitañede; <sup>10</sup> iadedi bu naiona macaria, raise cioñena jira, eicaitaide. —Iese llofue; ia naimie rafuedo jaillena ñaite. Raite:

—Cue rafue suicana jaite. Cue jitaille dinori nia llofueticue. Cue rafuedo omoi jaia, marena jaitomoi. Iedo omoi jaiñenia, duere sefuitomoi.

<sup>11</sup> Dane llote:

—Lázaro jai inide; iadedi naimiena casitallena, jaiticue.

<sup>12</sup> Uai oticaci:

—Nama, naimie jamai iniia, nia dama casite.

<sup>13</sup> Naimie jafaici uanona iniamo comeциаina facadicaí; iadedi Jesús naiena lloñede. Lázaro fiodaillana ñaite. <sup>14</sup> Ie jira Jesús caimo marefodo llote:

—Naimie jai fiodaite. <sup>15</sup> Nainomo cue iñena jira, cue siño uai omoi iñollena, omoi facaina iobidicue. Naimie dine mai cai jailli.

<sup>16</sup> Caimona Tomás caimo llote:

—Maíña. Naimie diga fiodaisaiticaí —llote. Tomás mameci jiaicidi Dídimo. Naimiedi gorasa.

### *Jesús Marta diga ñaia rafue*

<sup>17</sup> Betaniamo cai ria, Lázaro raiafomo jai nagaamagarui illana fididicaí. <sup>18</sup> Jerusalémona Betaniamo tres kilómetros dinori illa jira, <sup>19</sup> diga judíuai illaicomini eedollena, Marta iaifñuai María dine bitimaci. <sup>20</sup> Jesús billana Marta fidiano, cai dine naisomo bite; iadedi jofomo María fiebide. <sup>21</sup> Jesúsno Marta llote:



—Nama, o bene itiona, cue iio fioidaiñede; <sup>22</sup> iadedi Jusiñamuiimo buena o jicaia, naimie iena finoite. Iena uifnoticue.

<sup>23</sup> Jesús dinena uai ote:

—O iio abido jilloite.

<sup>24</sup> Naiñaiño uai ote:

—Nana comini jilloilliruimo naimie jiai jilloite. Iena uifnoticue.

<sup>25</sup> Jesús uai ote:

—Fioidaillamona comini abiaina jilloitaraimadicue. Jusiñamui diga jaca illena, cominina itataraimadicue. Bu cuena inuanona, fioidaiadedi, iemona ico jilloite. <sup>26</sup> Cuena inotimiena Jusiñamui illanomo jaca illena itataitacue. ¿Iena inotio?

<sup>27</sup> Naiñaiño uai ote:

—Jii, Nama; odi cai Jilloitaraimadio. Odi Jusiñamui Jitodio. Jusiñamui dinena o billamo jaie ocuiridicai.

<sup>28</sup> Iese raillanona, jofomo Marta abido jaide. Ie euiñona uaiduano, anado llote:

—Llofueraima jai ride. Ona uaidote.

<sup>29</sup> Iena cacajano, raire cai dine María bite. <sup>30</sup> Marta diga ie ñaianomo Betania ecimo Jesús nia ite. <sup>31</sup> Jesús dine María nia jaiñenia, judíuai illaicominidi Maríana nia eedotimaci. María jino jaillana ciuano, racadimaci. “Raiafomo eellena naiñaiño jaide” raillanona comeciaina facadimaci. <sup>32</sup> María Jesús dine rillano, naimiena duenaillano, caifúci ifodo rainadacaida, llote:

—Nama, bene itiona, niadedi cue iiodi fioidaiñede.

*Jesús Lázaron a jillotaja rafue*

<sup>33</sup> María eiana Jesús ciuano, naiñaiño diga bitino eiana ciuano, naimie comeci eo sunaite. Sunaillamona, jafaicina faite. <sup>34</sup> Jicanote:

—¿Ninomo Lázaron raitomoi?

Uai otimaci:

—Nama, mai jibuisaibi.

<sup>35</sup> Lázaron duenaillanona, Jesús eede. <sup>36</sup> Iena ciuanona, judíuai illaicomini dinena llotimaci:

—Ero. Naimiena eo isiruite.

<sup>37</sup> Jiaino raitimaci:

—Navui uisinidimiena jillotate. ¿Bue ñellena bimiena jilloitañede, naimie nia fioidaiñenia?

<sup>38</sup> Iena cacajanona, ie siño uai finuana naimaci nia raise inosiñena jira, Jesús comeci dane sunaite. Oni jaillanona, raiafomo ridicai. Nofici motomo ite naie raiafo. Ifodi jiaie noficina ibaica. <sup>39</sup> Jesús llote:

—Nofici oni ñuita.

Marta dinena naimie uai ote:

—Nama, naimie abi jai sorirede. Nagaamagarui raiafomo jai ite.

<sup>40</sup> Jesús uai ote:

—Cuena o inoia, Jusiñamui uai siñonana uifnotio.

<sup>41</sup> Iemona cominidi noficina oni ñuitadimaci. Jesús monamo eruaillano, llote:

—Moo, cue uaina o cacaja jira, iobidicue. <sup>42</sup> Jaca cuena cacadio. Iena uifnoticue; iadedi cue diga bene itino illa muidona, iese ado lloticue. Cuena o oretajana naimaci inollena, o diga ado ñaiticue.

<sup>43</sup> Ie mei eo ado llote:

—Lázaro, jino bi.

<sup>44</sup> Nai fioidaitimie nia naimie abi nana ferinua ra diga jino bite. Jesúsdi cominimo llote:

—Naimie abi ferinua oni suiño. —Ie jira suiñodimaci.

<sup>45</sup> Ie muidona María diga bitinomona ailluena comini Jesúsna inotimaci. Naimie finoca rafuena ciuanona, inotimaci.

*Jesúna meinellena, illaicomini comeciaina facaja rafue*

(Mt 26.1-5; Mr 14.1-2; Lc 22.1-2)

<sup>46</sup> Jesúsna inoñedinomona damierie Jesús finoca rafuena fariseuai dine lluidimaci. <sup>47</sup> Ie jira Jusiñamui diga nanoca ñairaini, fariseuai diga, danomo ofidimaci. Jesús rafuena siadotimaci:

—¿Ñiese naimiena nibaiticai? Diga siño rafuena ua finocabide. <sup>48</sup> Naimiena ñiese cai nibañenia, nana comini naimiena inoitimaci. Nana comini naimie dibeimo jaia, naimaci illaimana naimie jaillana jitaitimaci. Iemei romanos soldaduai biitimaci. Jusiñamui jofona judaiaibitimaci. Cai nairaiaina jiai fuidoitimaci. Iena jitaiñedicai.

<sup>49</sup> Naie facaise nanoca Jusiñamui diga ñairaimana Caifás illamona, naimacimo llote:

—Naimie rafuena raise uiñoñedomoi. <sup>50</sup> Iese cai nairaimo suiñellena, damie cai nairai facaina fiodaitena, mare. Iena nıbai nıa raise uiñoñedomoi.

<sup>51</sup> Ie comecina dama facajano, iese lloñede; ia Jusiñamui diga nanoca ñairaimana naimie illamona, Jusiñamui naimiena buena llotatate:

—Jesúdi cai comini facaina fiodaite.

<sup>52</sup> Cai comini facaina dama fiodaiñede; iadedi nana Jusiñamuina inoitonona facaina fiodaite. Diga nairaimo itimaci; iadedi naimiemo dajena nana naimaci duillena, naimie fiodaite. <sup>53</sup> Caifás lluaana naimaci cacajamona, judıuaı illaicomini comeciaina nıa facadimaci, naimiena meinellena.

<sup>54</sup> Ie jira Jesús judıuaı illaicomini illa motodo marefodo macariñede. Jofue iñena dofodo jaidicai. Efraın railla nairai dine ridicai. Nainomo diga irui iticai. <sup>55</sup> Pascua railla rafue iaire iacana jira, ailluena comini Jerusalémo naimaci nairaimona jaidimaci. Rafue nıa tainenia, naimacimo ite rafue oni jaillena, cai einamacı llua isoi finodimaci. <sup>56-57</sup> Jusiñamui diga nanoca ñairainidi fariseuai diga navui ñaitimaci:

—Bu Jesúna cioia, naimiena cai gaitallena, caimo llono.

Rafuemo bitino illamona, Jesúna jenodimaci. Jusiñamui jofomo naimaci ia, coninimo jicanododimaci:

—¿Nıese comeciaina facadomoi? ¿Jesús bene biite? Cai illaicomini llua jira, nıbai jai biñeite. Illaicomini lluaana fidiano, naimie biñeite.

## 12

### *Betaniamo Lázaro jofomo Jesús guilla rafue*

(Mt 26.6-13; Mr 14.3-9)

<sup>1</sup> Pascua railla rafue rilledi seis digarui fiebidemo, Jesús cai diga Betaniamo jaide. Betania Lázaro illano. Jesús Lázaronna fiodaillamona navui jillotate. <sup>2</sup> Jesúri iobillano, Lázaro ie guille rafuena finode. Marta guille bai jonega. Jesús diga guitino motomo Lázaro ite. Jesús llofueoicaiganodicai; jai motomo guiticai. <sup>3</sup> Iemei Mariadi nardomona finoca caimare soride ra Jesús eillmo totate. Daje botella raifi totate. Safenaillena naiñaiño ifotie diga ie eillna dote. Nai caimare soride ra eo raifide. Daje botella ite. Iemona nana jofe jeraidi soride. <sup>4</sup> Caimona Judas Iscariote micorına mameciredimie ite. Jesúna gaitataitimie. Llote:

<sup>5</sup> —¿Bue ñellena bie soride radi fecañede, ucubena ollena? Fecacadena, trescientos digarui maijia ucube diese raifide. Ie mei nai ucube dueredinomo fecadena, mare —llote. <sup>6</sup> Dueredinona naimie duenaiñede; iadedi naimie cai ucubena sedade. Naimiedi firiraima. Naie ucubemona fiuilla jira, iese naimie llote.

<sup>7</sup> Jesús uai ote:

—Dama ite. Bie soride ra naiñaiño jai eenoga cue fiodaillirui iena. <sup>8</sup> Dueredino omoi diga jaca itimaci; iadedi omoi diga jaca iñeiticue.

### *Ailluena comini Lázaronna cioia rafue*

<sup>9</sup> Lázaro jofomo Jesús illana ailluena cai illaicomini fidiano, bitimaci. Navui fiodaillamona Lázaronna Jesús jillotaja jira, Jesúna dama cioiacaiñedimaci; iadedi Lázaronna jai cioiacadimaci. <sup>10</sup> Ie jira Jusiñamui diga nanoca ñairainidi Lázaronna jai meinellemo comeciaina facadimaci. <sup>11</sup> Lázaro muidona ailluena judıuaı illaicomini naimaci illa dıbei faimonocaida, Jesúna inotimaci.

### *Jerusalémo illaıma isoi, Jesús marena jailla rafue*

(Mt 21.1-11; Mr 11.1-11; Lc 19.28-40)

<sup>12</sup> Pascua railla rafue illa jira, ailluena comini Jerusalémo itimaci. Egiptomona cai jaıgıai jillobillana comecillena naie rafue ite. Jesús Lázaro diga guillarui ie areruido Jesús Jerusalémo billana naie comini fididimaci. Fiodaillamona Lázaronna Jesús navui jilloitajana diga comini cıodimaci. Iena llcana uitimaci. Ie jira ailluena comini Jesús dine jaidimaci. <sup>13</sup> Raforona uanona, naimiena feiñollena, naimie uicomo jaidimaci. Ado cuiriisite:

—¡Cai Jilloitaraima billa! ¡Jusiñamui mamecido bitimie eo mare! ¡Cai Illaıma eo mare! — cuiriisite.

<sup>14</sup> Jesúdi aillı baıga burrito emododo jaide. Jusiñamui facaina lloraima micorı jaie llua isoi jaide. Jaie llote: <sup>15</sup> “Jerusalén imaci, jacinaıñeno. O Illaıma burrito emododo biite”.

<sup>16</sup> Naie facaise bie rafuemo comeciaina facañedicai; iadedi Jesús jilluaı mei, bie rafuena comeciticaı. <sup>17-18</sup> Lázaronna Jesús jillotaja jira, ailluena comini Jesús dine jaidimaci. <sup>19</sup> Iena cuano, fariseuai coniniri ñaitimaci:

—Jaca buena birui finoñedicai. Ailluena comini Jesús dıbeımo jai jaidimaci.

### *Judıuaıñedino Jesúna cioiacana rafue*

<sup>20</sup> Judia iñedino Jusiñamuina sedallena, pascua railla rafuemo jiai bitimaci. <sup>21</sup> Naie facaise cai dine bitimaci. Felipedi Galilea ie Betsaida nairai imiēna jira, Felipe dine bitimaci. Felipemo llotimaci:

—Jesúna cioiacadicaí.

<sup>22</sup> Felipe iena Andrémo lloite. Ie mei Jesúmo lluaidiaimaiaí. <sup>23</sup> Jesús uai ote:

—Monamona biticue; ia jai cue fiodable facaise ride. Comini cue uaidi siñonana uifua facaise jai ride. <sup>24</sup> Jiaie rafuedo iena lloiticue. Ido rilla mei, naie ido sicoñenia, buena iñede; iadedi sicuamona, ailluena llisilladi iite. Ie isoide. Cue fiodiañenia, jaca bu jillobiñeite. Cue fiodaillemona ailluena comini jillobitimaci. <sup>25</sup> Ie abimo ite rafuemo comecina dama bu facaia, ja muidomo faifite; ia cuemo ite rafuemo comecina bu facaia, monamo jaca iite. <sup>26</sup> Cuena bu raise sedaacania, cue rafuedo naimie jaite. Cue llofuegamiēna naimie jaillamona, cuemona fueoite. Iemona cue Moodi naimiēna caimare itataite. <sup>27</sup> Cue comeci jai rucacuerite; iadedi, ¿ñiese raiticue? Raiñeiticue: “Moo, cue fiodaillemona cuena jillote”. Fiodaillena biticue. Ie jira raiticue: <sup>28</sup> “Moo, cominina o uai siñonana uifota”.

Ieconí monamona Jusiñamui lloite:

—Jai iena finodicue. Dane iena finoiticue.

<sup>29</sup> Jusiñamui ñaiana nainomo ite comini raise cacaiñenano, raitimaci:

—Mona gurude.

Jiaino raitimaci:

—Naimiemo Jusiñamui jaienici lloite.

<sup>30</sup> Jesús uai ote:

—Cue facaina naie lluana cacaiñedomoi; iadedi omoi facaina iena cacadomoi. <sup>31</sup> Cuena uifoiñedino duere sefuilla facaise ja taineite. Taife anamo comini jai itimaci; ia Jusiñamui Taifena ja anafefitaite. <sup>32</sup> Cruzmo cue fiodaia, naimacina jilloitallena, ailluena cominina cue dibeimo itataiticue. <sup>33</sup> —Naimie fiodaillana naimaci uifollena, iese lloite.

<sup>34</sup> Naie comini uai otimaci:

—Jusiñamui facaina lloraini micoriai jaie cuela: “Cai Jilloitaraima jaca fiodiañeite”. ¿Ñiese raitio: “Jusiñamuimona biticue; ia fiodaicue”?

<sup>35</sup> Jesús dane uai ote:

—Cue llofua dinori omoi comeciaina nia lligaiñoticue. Cue lluomo cacarei. Omoi diga cue nia ia, cue llofuiamo cacarei. Jitiredemo bu macaria, nai illana raise uifoiñede. Ie isoide. Jeacino anamo itinodi jitiredinomo itimaci isoidimaci. Uanaicinona uifoiñedimaci. <sup>36</sup> Jeacino anamona omoi jilloillena, cue llofua uaido omoi comeciaina birui lligaiñoticue. Cue uaina iino, cue cominina omoi jaillena.

Bie llua mei, Jesús oni jaillano, naimacimona reirite.

*Comini Jesús uaina iñoñena rafue*

<sup>37</sup> Jesús diga siño rafuena finode; iadedi ailluena comini: “Naimiedi cai Jilloitaraima” raillana nia iñosiñede. <sup>38</sup> Iemona Isaías micori jaie cuela: “Cai Jilloitaraima” Jusiñamui, cai llucacimona cacadimaci.

O siño uaido o finoca rafuena jai cioidimaci; iadedi iñoñedimaci.

<sup>39-40</sup> Isaías micori dane cuela:

Naimaci cioi raillano, Jusiñamui naimacina uisindino isoi itatate.

Naimaci comeciaina abina uifoi raillano, naimaci comeciaina feitate.

Naimiēna iñoi raillano, iese naimacina jai itatate.

Ie jira jai iñonidimaci. <sup>41</sup> Jusiñamui ie ebirede rafuena naimie ciuamona, Isaías micori iena lloite. Isaías micori Jesúna lloite. <sup>42</sup> Isaías micori iese lloite; iadedi ailluena judiaí illai comini Jesús uaina iñotimaci. Fariseuaina jaciruillanona, iena janotimaci. Naimaci ofiracomona naimacina jino dotajana jaciruitimaci. <sup>43</sup> Comini naimacina iobitajana naimaci eo jitaila jira, dotajana jitañedimaci. Jusiñamuimo ite iobillacinona raise oiacañedimaci.

*Jesús ie Moona ñaia rafue*

<sup>44</sup> Naie facaise Jesús eo ado lloite:

—Cuena iñotimie cuena oretatimienā jai jai iñote. <sup>45</sup> Cuena cioidimie cuena oretatimienā jai ciode isoide. <sup>46</sup> Comini comeciaina lligaiñollena biticue. Ie muidona naga cuena iñotimie jitiredinomo jai iñede. Jeacino anamo jai iñede. <sup>47</sup> Cue uaina cacajano iñoñedimie juez isoi birui lloñedicue. Cominina duere finollena, biñedicue; iadedi naimaci jeacinomona naimacina jilloitallena biticue; <sup>48</sup> ia cuena bu iñoñenia, cue uaina naimie iñoñenia, ja muidona faifite. Cue uaina naimie iñoñellemona, nana naimiēna iñoñedino janafelliriuimo Jusiñamui naimiēna ico duere finoite. Cuena jitañedimie, cue uaina jitañedimie comini janafelliriuimo janafefite. <sup>49</sup> Dama cue comeci facaja uaido lloñedicue. Cue Moo cuena oretaja muidona, cue Moo cuemo lloga uaido lloiticue. <sup>50</sup> Cue

Moo lloga uaidi naimie díbeimo cominina jaca itatate. Iena uifóticue. Ie jira cue Moo cuemo lloga uaina jaca lloticue.

## 13

### *Jesúdi ie llofueoicaigano eilliana jocua rafue*

<sup>1</sup> Pascua railla rafue riacana areruido ia, Jesús ie Moo dine abido jaiacanana uifóte. Naimaci diga naimie nia ia, ie cominina jaca eo isiruite. <sup>2</sup> Jesúsna gaitatallena, naie facaise Taifedi Judas Iscariote micori comecina feidote. Judas micori Simón jito. <sup>3</sup> Jesúsdi ie uai ie Moomona feifuaana uifóte. Ie Moo dinena billana uifóte. Ie Moo dine abido jaillena jiai uifóte. <sup>4</sup> Nairuido Jesús cai diga guite. Guilla meinoconi, Jesús a naidacaida ie abimo ite iniroina duifode. Abi dora diga ie moillina ferinote. <sup>5</sup> Janorede nogomo jinuina totaja mei, cai eilliana jocode. Safenaillena, ie dora diga dote. <sup>6</sup> Simón Pedro dine naimie ria, Pedro jicanote:

—Nama, ¿cue eillina jiai jocoitio?

<sup>7</sup> Jesús uai ote:

—Cue finoca rafuena birui uifóñedio; iadedi jiairuido uifóitio.

<sup>8</sup> Pedro uai ote:

—Cue eillina jaca jocoñeítio.

Jesús uai ote:

—O eillina cue jocoñenia, cue facaina ifeítio.

<sup>9</sup> Pedro uai ote:

—Nama, dama cue eillina jocoñeno. O facaina raise cue illena, cue onolli, cue ifogi diga, jiai joco.

<sup>10</sup> Jesús uai ote:

—Nana o abina jocoñeíticue. Da o eillina jocoíticue. Jai noidimie mena icaiño noiñede. Ie abi jai jeanide. Dama ie eillina nibai dane jocoacade. Omoi comeciai jiai jai jeanide; iadedi omoimona damie comeci nia jearede.

<sup>11</sup> Naimiena gaitataiacadimienna naimie uifua jira, iese llote.

<sup>12</sup> Cai eilliana jocua mei, ie iniroi dane jitaja mei, dane ana rainadajanona, caimo jicanote:

—Omoimo ailli cue finoca rafuena nibai raise cacaiñedomoi. <sup>13</sup> Cuen a “Cai Nama” raicabitomoi. “Cai llofueraima” cuena jiai raicabitomoi. Iese cuena omoi raia, mare. Ie isoi iticue. <sup>14</sup> Omoi Namadicue. Omoi llofueraimadicue; iadedi omoi mullaima isoi iticuedena, omoi eilliana jai jocodicue. Omoi jamai bue isoidinomona, omoi eilliana danirie jocua. <sup>15</sup> Cuemona fueo. Abi iedoñoeno cue isoi omoi jai. Cue afemo ifedomoi. <sup>16</sup> Unai omoimo lloticue. Mullaima ie nama afemo ifede. Oretagamie ie oretatimie afemo ifede. Ie isoide. Cue afemo ifedomoi; ia omoi eilliana jocodicue. “Jaiimie afemo itica” raillanomo comecina omoi facañeno. <sup>17</sup> Bicin omoi uifuaomona, iese omoi finoia, caimare iitomoi. <sup>18</sup> Nana omoina iese ñaifedicue. Nana cue fetocanona uifóticue. David micori jai llote: “Cue diga guitinomona damie cuena enoidimie ite”. <sup>19</sup> Bie nia suiñenia, iena jai lloticue. Iena cuemo suilla mei, David micori llogacino raise inoitomoi. <sup>20</sup> Unai lloticue. Cue oretagamien a bu feiñoia, cuena jiai feiñote. Bu cuena feiñoia, cuena oretatimien a jiai feiñote.

### *Jesúdi ie gaitataitimien a llua rafue*

(Mt 26.20-25; Mr 14.17-21; Lc 22.21-23)

<sup>21</sup> Jesús iese llua mei, ie comeci sunaite. Llote:

—Unai lloticue. Omoimona damie cuena gaitataite.

<sup>22</sup> Caimona ¿nimie naimien a gaitataite? raillanona, comecina facajano, coninimo eroridicai. <sup>23</sup> Cuen a Jesús eo gaia jira, Jesús abimo iticue. <sup>24</sup> Cuen a uaiduanona, Pedro cuemo llote:

—“¿Bu ona gaitataite?” Jesúsno jicano.

<sup>25</sup> Ie jira Jesúsno jicanoticue:

—Nama, ¿bu ona gaitataite?

<sup>26</sup> Jesús uai ote:

—Bie llomenicon a mutajanona, naimiemo fecaiticue —raite. Mutaja mei, Judas micorimo fecade. Naimie micoridi Simón Iscariote jito. <sup>27</sup> Llomenicon a guilla meinoconi, Taife anamo Judas micori illamona, Taife naimie comecina feidote. Jesús naimiemo llote:

—O finoacaga rana raire fino.

<sup>28</sup> Jesús Judas micorimo llua na raise uifóñedicai. <sup>29</sup> Judas micori ucubena sedaja jira, jiano comecina facade: “ ‘Cai jitaille guille ibarisai’ Jesús naimiemo llote”. Iese lloñenia, “ ‘Janore ucube dueredinomo feca’ nibai naimiemo llote”. <sup>30</sup> Guilla mei, Judas micori jino jaide. Naie facaise jai jitíficaide.

*Jesús ie fiodaillena ñaia rafue*

<sup>31</sup> Judas micori jailla mei, Jesús llote:

—Jusiñamuimona billanona, iimana jaidicue; ia cue fiodaille facaise jai ride. Cue fiodaillmona cominidi Jusiñamui uai siñonana uiñoitimaci. <sup>32</sup> Iemona Jusiñamui uai siñonana cominidi uiñoaia, Jusiñamuidi cominina cue siño Jitona jiai uiñotaita. Iese ja finoite. <sup>33</sup> Cue comini, dallu omoi diga bene iticue. Jaiticue. Cue diga iacanitomoi. Judiaui illaicominimo navui cue lua isoi, omoimo ja lloiticue. Cue jaillinomo nia jaiñeitomoi. <sup>34</sup> Ie jira jiaie rafuena omoimo ja lloiticue. Omoina cue isiruilla isoi, cominina omoi isirui. <sup>35</sup> Coninina omoi isiruillamona, jiaie cominidi cue cominidomoina uiñoitimaci.

*Pedro Jesús diga ñaia rafue*

(Mt 26.31-35; Mr 14.27-31; Lc 22.31-34)

<sup>36</sup> Naie facaise Pedro naimiemo jicanote:

—Nama, ¿nime jaitio?

Jesús uai ote:

—Cue jaillinomo cue diga ja jaiñeitio. Jairuido jaitio.

<sup>37</sup> Pedro uai ote:

—Nama, ¿bue ñellena ja jaiñeticue? O jitaia, o facaina ja fiodaiticue.

<sup>38</sup> Jesús dinena uai ote:

—Cue facaina fiodaicadio. Uanai omo lloticue. Nia monañenia, iitava nia ñañenia, dacaiño amani cuena janoitiosa.

**14***Jesús ie Moo dinomo rille rafue*

<sup>1</sup> Jesús ie llofueoicaiganodicaina nia llofueite:

—Rucaicueriñeno uri i. Jusiñamuina iñocana jai. Cuena jiai iñocana jai. <sup>2</sup> Cue Moo illanomo diga comini illanuai ite. Iese iñedena, omoimo jai lloticue. Omoi illinuaina raise finollena, nainomo jaiticue. <sup>3</sup> Fuiduanona, dane abido biiticue. Omoina cue dine uillena, cue dine omoi illena, biiticue. <sup>4</sup> Cue jaillinona birui uiñotomoi. Nainomo omoi rillena jiai uiñotomoi.

<sup>5</sup> Tomás uai ote:

—Nama, o jaillinona uiñoñedicaí. ¿Ñiese nainomo riiticaí?

<sup>6</sup> Jesús uai ote:

—Omoi naiso isoidicue. Uanaicinona lloticue. Cue Moo dibeimo cominina jaca itataticue. Cue Moo dine joide naiso isoidicue. Jaca dasode cue Moomo duide naidi. Cue Moo dine o ria, cuena iño. <sup>7</sup> Cuena uiñotomoina, cue Moona jiai uiñotomoi. Biruidemona naimiema uiñoitomoi. Naimiema jai ciodomoi.

<sup>8</sup> Felipe uai ote:

—Nama, o Moona caimo acata. Iemo jai macaibaite.

<sup>9</sup> Jesús uai ote:

—Felipe, are omoi diga iticue; iadedi cuena nia uiñoñedomoi. Cuena ciotimie cue Moona jiai jai ciode isoide. ¿Ñiese llotio: “O Moona caimo acata”? Cue Moona jai ciotio isoidio. <sup>10</sup> Cue Moo diga daajedicoco. Iena nia iñoñedio. Cue lluadi cue Moo uai. Cue lluadi cue comeci uaiñede. Cue motodo naimie maijide. <sup>11</sup> Cue Moo diga daajedicocona iño. Cue uaina omoi iñoñenia, siño rafuena cue finua jira, cuena iño.

*Jesús ie Moo Joreña llua rafue*

<sup>12</sup> Jesús nia llofueite:

—Uanai lloticue. Cuena omoi iñoia, cue finoca rafuena jiai finoitomoi. Cue Moo dine cue jailla jira, cue Moo Joreña omoi dine cue oretaja mei, cue finua bai femo finoitomoi. <sup>13</sup> Cue Moo uai siñonana omoi uiñollena, buena cue dibeido cue Moomo omoi jicaia, nana iena finoiticue. <sup>14</sup> Cue dibeido omoi jicaia, iena finoiticue. <sup>15</sup> Cuena omoi isiruia, cue llogacinuaina iñoitomoi. <sup>16</sup> Ie Joreño omoimo fecallena cue Moomo jiiiticue. Naie Joreñodi omoina canoite. Omoi diga jaca iite. <sup>17</sup> Uanaicinona llocabite. Naimiema naimaci uiñoñena jira, cuena iñoñedino naimiema feñonidimaci; iadedi naimie omoi diga illa jira, naimiema uiñotomoi. Omoi diga jaca iite. <sup>18</sup> Omoina fañonocaiñeiticue; ia dane biiticue. <sup>19</sup> Nano nigarui illanona, cuena iñoñedino cuena nia ciotimaci. Ie mei cuena cioñeitimaci; iadedi fiodaillamona cue jillua mei, cuena nia ciotomoi. Cue jaca illa jira, jiai jaca iitomoi. <sup>20</sup> Fiodaillamona cue jillua mei, cue Moomo cue duillana raise uiñoitomoi. Cuemo omoi duillana jiai raise uiñoitomoi. Omoimo cue duillana jiai raise uiñoitomoi. <sup>21</sup> Cue llogacinuaina omoi isiruia, cuena isiruitomoi. Ie jira cue Moodi omoina jiai isiruite. Omoina jiai isiruiticue. Omoina cuena uiñotaiticue.

<sup>22</sup> Iscariotena mamecifeñede Judas naimiemo jicanote:

—Nama, ¿bue ñellena dani caina ona uññotaitio; iadedi jiaie cominina ona uññotañeitió?

<sup>23</sup> Jesús uai ote:

—Cuena isiruitinona cue rafuena uññotadicue. Bu cuena isiruvia, cue llogacinuaina ñnoite. Cue Moo naimiena isiruite. Iemona naimiena nabaiticoco. <sup>24</sup> Bu cuena isiruiñenia, cue llogacinuaina ñnoñede. Cue llogacinodi cuejeñede. Cue Moo ie. Naimie cuena oretate. <sup>25</sup> Omoi diga nia cue illamona, bie llogacinuai omoimo jai lloticue. <sup>26</sup> Cue Moodi omoina canollena, naga rafuena omoina llofuellena, cue facaina ie Joreñona omoimo oretaitate. Omoina nana omoimo llogacinuaina comecitaitate. <sup>27</sup> Cue Moo dine jaiticue; iadedi omoi comeciaina uri itataiticue. Cuena ñnoñedino omoi comeciaina iese itatanidimaci. Jarire iñeno. Jaciruiñeno. <sup>28</sup> Ailli cue llua na cacadomoi: “Cue Moo dine jaiticue; iadedi dane biiticue”. Cue Moo dine cue jailla jira, cuena omoi isiruvia, cueri iobitomoi. Cue Moo cue afemo ite. <sup>29</sup> Bie rafue cuemo nia suiñenia, uicodo omoimo iena jai lloticue. Naie suaia, cuena ñainocaiñeno omoi jaillena jitaicue. <sup>30</sup> Omoi diga are nia ñañeiticue. Cuena ñnoñedino anamo itimie cuena jai duere finocade. Taifena ñaiticue. Naimie anamo iñedicue; <sup>31</sup> iadedi cue Moona cue isiruillana cuena ñnoñedino uññollena, cue Moo cuemo llua isoi, ñnoiticue. Mai cai jailli.

## 15

*Uvas railla riará ie rafue*

<sup>1</sup> Jesús nia llofuate:

—Cue díbeimo marena omoi illena omoi raise uññollena, jiaie rafuedo iena llofueiticue. Uvas railla ua riaradicue. Cue Moodi uvas railla riará sedaraima. <sup>2</sup> Cue amena igailaidomoi. Llisíñede igai cue Moo cugaica. Eo llisillena, naga lliside igaina janore muido jaigaica. Ie isoide. <sup>3</sup> Cue llogacinuaido jaillamona, jai jaigaica isoidomoi. Iemona omoi comeciai jai jeanide. <sup>4</sup> Cuena nabai. Ona jiaí nabaiticue. Naie amenamo jai duiñena jira, daje díbegaise jaitaca igaidi jai llisíñede. Ie isoide. Cuena omoi nabaicabiñenia, llisíñede igai isoidomoi. Ie jira cuena nabai. <sup>5</sup> Uvas railla riaradicue. Cue amena igailaidomoi. Cuemo omoi duiadedi, omoimo cue duiadedi, eo lliside isoidomoi; iadedi cuemo omoi duiñenia, jaca llisíñede isoidomoi. Cuemo omoi duiñenia, cue jitailla isoi mare rafuena jaca ñnoñetomoi. <sup>6</sup> Jai duide igailai safenailla mei, maraiñena jira, jobaillena, danamo ofitaticai. Cuemo duiñedimie jai duide igai isoide. Jusiñamuimona duere sefuite. <sup>7</sup> Cuena omoi nabaia, cue uaina omoi feitañenia, omoi jitalle rana jica. Ie mei feññoitomoi. <sup>8</sup> Eo lliside omoi isoia, cue Moo iobide. Iese omoi ia, ua cue cominidomoi. —Iese Jesús llofuate; ia naimie díbeimo naimaci raise illena ñaite. Mare rafuena naimaci finocana jaillena ñaite.

<sup>9</sup> Nía llofuate:

—Cuena cue Moo isiruilla isoi, omoina isiruiticue. Cuena nabaicabi. <sup>10</sup> Cue Moo llogacinuaina cue ñnuamona, naimie isiruillacino anamo iticue. Cue Moo llogacinuaina omoi ñnuamona, cue isiruillacino anamo itomoi. <sup>11</sup> Cue isoi omoi comeciai eo caimarellena, bicinuai omoimo lloticue.

<sup>12</sup> Dane bie rafuena lloticue. Omoina cue isiruilla isoi, coninina omoi isirui. <sup>13</sup> Naimaci o isiruillamona, o nabaiñiai facaina o fiodaia, naimacina eo ua isiruitio. <sup>14</sup> Cue llogacinuaina omoi ñnoia, cuena nabaidomoi. <sup>15</sup> Omoina “Cue mullaiaidomoi?” jaca raiñedicue; iadedi omoina “Cue nabaiñiaidomoi?” birui raiticue. Mullaiaí imaci patrón finoca rafuena uññoñedimaci. Ie jira nana cue Moomona cue cacaja rafuena omoimo jai lloticue. Ie jira nana cue rafuena jai uññotomoi. <sup>16</sup> Cuena fetoñedomoi; iadedi omoina fetodicue. Omoi lliside isoicabillana omoimo jai lloticue. Ie mei buena cue mamecido cue Moomo omoi jicaia, omoimo fecaitate. <sup>17</sup> Coninina omoi isiruillena jai lloticue.

*Comini Jesúna enoilla rafue*

<sup>18</sup> Jesús nia llofuate:

—Cuena ñnoñedino omoina enoia, nano cuena jai enoidimaci. Iena uññotomoi. Omoina nia enoiñenia, cuena jai enoidimaci. <sup>19</sup> Naimacimo jainaiaidomoina, omoina isiruitimaci; iadedi naimacimo omoi jainaiñeña jira, omoina cue fetua jira, omoina enoidimaci. <sup>20</sup> Omoimo jai lloticue. Illaíma duere sefua, naimie anamo itino jiaí duere sefuidimaci. Ie isoide. Cuena comini duere finua isoi, omoina jiaí duere finoitimaci. Cue llofuacinona naimaci ñnuua isoi, omoi llofuiacino jiaí ñnoitimaci. <sup>21</sup> Cuena oretatimienana naimaci uññoñena jira, cue muidona iese finoitimaci. <sup>22</sup> Naimacimo ite jeacinona naimacimo lloñedicuena, naimacimo ite jeacinona uññoñedimaci. Cue rafuena naimaci cacajamona, naimacimo ite jeacinona jai uññotimaci. Naimacimo jeacino nia ia, naimaci muidona. <sup>23</sup> Cuena enoidimiedí cue Moona jiaí enoide. <sup>24</sup> Eo siño rafuena naimaci motomo finodicue. Buna cue isoi jaca ñnoñede. Iena ñnoñedicuena, naimacimo ite jeacinona uññoñedimaci. Cue siño finoca rafuena jai cidomaci. Ie jira cuena enoidimaci. Cue Moona jiaí enoidimaci.

<sup>25</sup> Naimacina David micori jai e llote: “Naimacimo buena finoñedicue; ia cuena enoidimaci”. Naie cuegafuiai jai suide.

<sup>26</sup> Cue Moo ie Joreño omoimo oretaite. Ie Joreño omoina canoite. Omoina uanaicinona uñotaite. <sup>27</sup> Cue nano lluaruimona cue diga omoi illa jira, cue facaisena jiai raise lloitoimo.

## 16

### *Judúai illaicomini Jesús llofueoicaiganona duere finua rafue*

<sup>1</sup> Jesús nia llofueite:

—Danomo abido omoi jaiñellena, cue uaina omoi fainonocaiñellena, bicinuai omoimo ja lloiticue. <sup>2</sup> Omoi ofiracomona illaicomini omoina dotaitimaci. Jiairuido omoina meini- amona: “Jai Jusiñamuina marena sedadicaí”, comeciaina facaitimaci. <sup>3</sup> Cuena naimaci ññoñena jira, cue Moona jiai naimaci ññoñena jira, iena finoitimaci. <sup>4</sup> Bie rafue omoimo sua, naie facaise cue llwana omoi comecillena, omoimo birui lloticue. Omoi diga cue illa jira, navui iena lloñedicue; iadedi omoimona birui oni jaiticue.

### *Jesús Jusiñamui Joreña llua rafue*

<sup>5</sup> Jesús nia llofueite:

—Cuena oretatimie dine ja jaiticue; iadedi omoimona buna: “¿Ñine jaitio?” cuemo jaca nia jicanoñede. <sup>6</sup> Omoimo bie rafue cue llua jira, omoi comeciái eo sure ite. Ie jira cue jaillonona jicanoñedomoi. <sup>7</sup> Uanai lloticue. Cue jaia, mare. Cue jaiñenia, omoina canoraíma omoi dine biñeite. Cue jaia, omoi dine naimiena oretaiticue. Jusiñamui Joreñodi omoi canoraíma. <sup>8</sup> Naimie bia, cuena ññoñedinona naimacimo ite jeacinona uñotaite. Naimiedi Jusiñamui marena naimaci illana jitaillana uñotaite. Naimiedi Jusiñamui naimacina duere finollena jiai uñotaite. <sup>9</sup> Cuena naimaci ññoñenia, naimacina naimacimo jeacino nia illana uñotaite. <sup>10</sup> Cue Moo dine abido cue jaillonona, cuena cioñeitimaci; ia iemona Jusiñamui Joreño cue uaina siñonana uñotaite. <sup>11</sup> Fiodaillamona jilloiticue. Iemona cuena ññoñedino anamo itimiedi cue Moo janafefillacino anamo iite. Taifena ñaiticue. Cue finoca rafue muidona, cue Moo Joreñodi cominina, cue Moo Joreñodi cominina naie janafefillemona jillwana uñotaite. <sup>12</sup> Diga rafue omoimo nia lloiacadicue; iadedi jai rairafaidomoi. <sup>13</sup> Jusiñamui Joreño bia, omoimo nana uanaicinuaina llofueite. Dama ie facaina llofueñeite; iadedi ie cacajacinodo llofueite. Jiairuido suille rafuena llofueite. <sup>14</sup> Omoina cue rafuena uñotaite. Ie jira cuena iobitaite. Nana cue Moomo ite uaidi cueje. <sup>15</sup> Ie jira bie rafuena lloticue. Jusiñamui Joreño omoina cue rafuena raise uñotaite.

### *Sunaillamona caimare illa rafue*

<sup>16</sup> Jesús nia llofueite:

—Dallu illanona cuena cioñeitomoi. Ie mei dallu illanona, cuena dane cioitomoi.

<sup>17</sup> Ie llofueoicaiganodicaimona damierie dani coninimo jicanodosite:

—¿Ñiese caimo llote: “Dallu illanona, cuena cioñeitomoi. Ie mei dallu illanona, cuena dane cioitomoi. Cue Moo dine jaiticue”? <sup>18</sup> ¿Buena caimo llote? Raise cacaiñedicai.

<sup>19</sup> Cai jicanuana Jesús uñuanona, naimie jicanote:

—¿Cue llwana raise uñoiacadomoi? <sup>20</sup> Cuemo suille rafue sua, eo eeditomoi; iadedi cuena ññoñedino eo iobitimaci. Sunaitomoi; iadedi jiairuido caimare iitomoi. <sup>21</sup> Jiaie uaido iena lloiticue. Riño jocoacania, naiñaiño jigico isirede. Jocua mei, naiñaiño urue jeiciamona, isirenadi feibicaide. Iemona jai iobide. <sup>22</sup> Ie isoide. Ja sunaitomoi; iadedi dane omoina cioiticue. Fiodaillamona cue jillua mei, dane cuena cioitomoi. Ie mei caimare iitomoi. Iemona omoina buna sure itañaite. <sup>23</sup> Nairuimo cuemo buena jicañeno; iadedi cue Moomo jica. Ie mei cue muidona naimie omoimo fecaite. <sup>24</sup> Cue mamecido cue Moomo buena jaca nia jicañedomoi. Jica. Ie mei feñoitomoi, omoi comeci eo caimare illena.

### *Jiairuido Jesús marefodo llua rafue*

<sup>25</sup> Jesús nia llofueite:

—Jiaie uaido bicinona omoimo jai lloticue. Jiairuido iese lloñeiticue. Omoina cue Moona marefodo lloiticue. <sup>26</sup> Nairuimo cue Moomo omoi facaina jicañeiticue. Cue mamecido cue Moomo omoi jitaillacinona dani jicaitomoi. <sup>27</sup> Omoina naimie isiruillamona, omoimo fecajite. Cuena omoi isiruilla jira, cue Moomona cue billana omoi ñnua jira, cue Moo omoina isiruite. <sup>28</sup> Cue Moomona eniruemo biticue. Naimie dine abido jaiticue.

<sup>29</sup> Lloticai:

—Jai marefodo caimo llotio. O uaina meidocana jai uñedio. <sup>30</sup> Nana rafuena o uñuana uñoticai. Cai comeciáimo iticinona o uñuamona, caina raise uñotio. Iemona Jusiñamuimona o billana jai ñnoticai.

<sup>31</sup> Jesús uai ote:

—Cuenta jai ñnotomoi. <sup>32</sup> Jiairuido, ua birui, oni tuuítomoi. Nagamíai jofomo omoi jailla mei, dama ifoconi fiebiticue; iadedi dama ifeíticue. Cue Moo cue diga iite. <sup>33</sup> Cuenta omoi ñnuano, omoi uri illena, omoimo bie lloticue. Eníruemo omoi ia, jaca duere sefuitomoi; iadedi omoi comeciaina oculiño. Omoina duere finodinona jai cue emodofilla jira, omoi comeciaina oculiño. Naimaci baifemo faiticue.

## 17

### *Jesús ie Moo diga ñaia rafue*

<sup>1</sup> Jesús bicinona llua mei, monamo eruailano, jüde:

—Moo, cue fiodiaicanarui jai ride. Cue uai siñonana uiñota. Iemei o uai siñonana jiai uiñotaiticue. <sup>2</sup> Nana comini afemo cuenta jai itatatio. Iimana cue jaillamona, nana comini afemo cuenta jai itatatio. Comini comeciái iuaina o meidotajamona, cue fiodiaillamona, ailluena comini o diga jaca iitimaci. <sup>3</sup> Ona nanoca Jusíñamuina uiñoitimaci. Jai cuenta o oretajana jiai uiñoitimaci. <sup>4</sup> Ailluena siño rafuena jai finodicue. Nana o cuemo lloga rafuena cue finuamona, bene ona jai iobitadicue. <sup>5</sup> Ore Moo, enirue nia ifena facaiseconi o diga iticue. Illaíma isoi o ecimo dane ebire iacadicue. Dane cuemo ine, daje isoi coco illesa. <sup>6</sup> Comini comeciái iuaina o meidotajamona, naimacina jai llofuecabiticue. O anamo naimaci illamona, omo ite rafuena llofuecabiticue. Iemona o rafuena ñnocana jaidimaci. <sup>7</sup> Nana cuemo ite rafuecuona feiñoticue. Iena jai uiñotimaci. <sup>8</sup> Nana cuemo o llogacinuaina naimacimo jai lloticue. Jai ñnotimaci. Omona cue billana jiai jai ñnotimaci. Cuenta o oretajana jiai ñnotimaci. <sup>9</sup> Naimaci facaina birui jüdicue. Naimacina cuenta ñnotadio. Ie jira omo jai duidimaci. Ona ñnoñedino facaina birui jüñedicue. <sup>10</sup> Nana o dibeimo itinodi cueje. Nana cue dibeimo itinodi oie. Nana naimaciri iobidicue. <sup>11</sup> Bene eniruemo fiebitimaci. Eníruemona monamo jaiticue. O dine abido jaiticue. Ore Moo, jeacino naimaci finoi raillano, o anamo o uai diga naimacina seda. Coco comeci lloilla isoi, naimaci daje isoi comeciaina lloita. <sup>12</sup> Naimaci diga nia cue ia, naimacina cue anamo sedadicue. Naimacina raise sedadicue, naimaci feirai raillano. Naimaci motomona dama Judas feiraite. Jusíñamui lloiraíma micori cuegafuiai suillena, naimie ua faifite. <sup>13</sup> O dine ja jaiticue. Cue isoi naimaci comeciái eo caimare illena, naimacimo ailluena rafuena jai lloticue. <sup>14</sup> O llogacinuaina jai lloticue. Ona ñnoñedinomo naimaci jainaiaifena jira, ona ñnoñedino naimacina enoidimaci. Ona ñnoñedinomo jiai jainaiaifenedicue. <sup>15</sup> Eníruemona birui o naimacina uana jicanoñedicue; iadedi Taifemona naimacina o sedajana birui jicanoñoticue. <sup>16</sup> Ona ñnoñedinomo jainaiaifenedimaci. Ona ñnoñedinomo jiai jainaiaifenedicue. <sup>17</sup> O llogacinuaido naimacina marena itata. O llogacinuaidi uanaicino. O jitaillacinona naimaci finollena, o uai naimaci comeciái raise itata. <sup>18</sup> Bene cuenta o oretaja isoi, ona ñnoñedino dine naimacina oretaticue. <sup>19</sup> Uanaicinsona naimaci uiñuamona, naimaci comeciái marebicaillena, cuenta ñnotino facaina fiodiaicadicue. <sup>20</sup> Bimacina birui dane jüñedicue; iadedi bimaci cue rafuena ico lloia, jiaie comini cuenta ñnoitimaci. Cuenta ico ñnoitino facaina birui jiai jüdicue. <sup>21</sup> Daajedicoco. Coco illa isoi, naimaci comeciaina daje isoi lloillena, nana naimaci facaina jüdicue. Daje isoi comeciái lloillamona, cuenta nia ñnoñedinodi ñnoitimaci. Iemona cuenta o oretajana ñnoitimaci. <sup>22</sup> Cuemo o iga uaidi ebirede. Naimaci comeciái lloillena, naimacimo o uai jai cue iga. <sup>23</sup> Naimaciri dajedicai. O diga daajedicoco. Naimaci comeciái daje isoi lloillana jitaicue. Iemona cuenta ñnoñedino bene cuenta o oretajana uiñoitimaci. Cuenta o isiruilla isoi, naimacina o isiruillana jiai uiñoitimaci. <sup>24</sup> Ore Moo, naimaci cue dine illena jitaicue. Eníruue nia ifenia, illaíma isoi o ecimo ebire jaie iticue. Dane ie isoi ebire birui cue ia, naimaci cuenta ciuana jitaicue. <sup>25</sup> Ore Moo, mareuidimedio. Jiaie comini ona uiñoñedimaci; iadedi ona uiñoticue. Cue llofueoicaiganodi o cuenta oretajana jai uiñotimaci. <sup>26</sup> Naimacimo ona jai lloticue. O cuenta isiruilla isoi coninina naimaci isiruillena, naimacimo nia lloiticue —jüde.

## 18

### *Jusúna gaitalle rafue*

(Mt 26.47-58; Mr 14.43-54; Lc 22.47-54)

<sup>1</sup> Jiaí mei, Jesús ie llofueoicaiganodicai diga, Cedrón railla iconi enefebeimo ruica aceituna railla riaraiái illanomo naíona jaide. <sup>2</sup> Jesús cai diga nainomo jaisoilla jira, Judas micori naie illanona jiai uiñote. Jesúsna gaitatallena nainomo Judas jaide. <sup>3</sup> Soldaduái diga policías diga jaide. Naimacina ifode. Jusíñamui diga nanoca ñairaini naimacina oredimaci. Fariseuái naimacina jiai oredimaci. Soldaduaidi lamparínaiiri bitimaci. Reinaíairi jiai bitimaci. Sidanaíairi jiai bitimaci. Judas naimacina ifode. <sup>4</sup> Jesúsdi nana naimiemo suille rafue uiñuanona, naimaci dine billano, jicanote:

—¿Buna jenodomoí?



<sup>5-6</sup> Uai otimaci:

—Nazaret ie Jesús.

Jesús uai ote:

—Imiedicue.

Iena cacajano, jacinailamona, abido ñaijillamona, eniruemo uaidimaci. Jesúna gaitatallena, Judas micori naimaci diga ite.

<sup>7</sup> Jesús dane jicanote:

—¿Buna jenodomoí?

Uai otimaci:

—Nazaret ie Jesús.

<sup>8</sup> Jesús uai ote:

—Omoimo jai lloticue: “Imiedicue”. Cuen a omoi jenoia, cue diga itino oni jaillena rairuiño.

<sup>9</sup> Naimie ie Momo como lloga uai suillena, iese llote. Iese ie Momo como llote: “Cuen a oñnotaganomona jaca buna faifiñedicue”. <sup>10</sup> Ie daacaíño Simón Pedrodi ie lloebiñocaida, Jusiñamui diga nanoca ñairaima mullaíma jefona jaibonote. Naie mullaíma mamecidi Malco. <sup>11</sup> Iena ciuanona, Jesús Pedromo llote:

—O lloebina eeno. Cue Moo jitailla isoi, fiódaiticue.

<sup>12</sup> Ie mei soldaduai, imaci capitán diga, judíuai imaci policías diga, Jesúna gaitajano, naimiena maítimaci. <sup>13</sup> Anás dine nano uitimaci. Anásdi Caifás jifai. Caifásdi Jusiñamui diga nanoca ñairaima. <sup>14</sup> Navui Caifás judíuai illaicominimo llote: “Damie nana cai comini facaina fiódaitena, mare”.

*Pedro Jesúna nano janua rafue*

(Mt 26.69, 70; Mr 14.66-68; Lc 22.55-57)

<sup>15</sup> Simón Pedro Jesús jinafo racade. Jiaí racadicue. Cuen a Jusiñamui diga nanoca ñairaima uiñua jira, ie nairairirimo Jesús diga jaídicue; <sup>16</sup> iadedi Pedro nasemo fiebicaide. Ie jira jino abido jaillano, Pedro fo atillena, nasena sedaraiño mo jicanoticue. <sup>17</sup> Naiñaiño Pedromo llote:

—Jesús llofueoicaigano imiedio.

Pedro uai ote:

—Ieñedicue.

<sup>18</sup> Rosirena jira, naie jofo mullaíai, policías diga, cooci diga irai bonodimaci. Agaillena irai ecimo naidaidimaci. Agaillena Pedro naimaci motomo jiaí ite.

*Jesús Anás dine illa rafue*

(Mt 26.59-66; Mr 14.55-64; Lc 22.66-71)

<sup>19</sup> Ie facaise Anás Jesúmo ie llofueoicaiganodicaina jicanote. Ie llofuiciñuaína jiaí jicanote. <sup>20</sup> Jesús dinena uai ote:

—Nana cominimo marefodo lloticue. Omoi ofiracuaimo jaca llofuecabiticue. Jusiñamui jofomo jiaí jaca llofuecabiticue. Nainomo nana o comini oficabidomoi. Bainino buena jaca lloñedicue. <sup>21</sup> ¿Bue ñellena birui cuemo jicanotio? Cuen a cacadinomo iena jicano. Cue llofuiana uiñotimaci.

<sup>22</sup> Iese Jesús llua jira, daje policía naimie uiecona butade. Jesúmo jicanote:

—¿Bue ñellena iese uai otio?

<sup>23</sup> Jesús dinena naie uai ote:

—Naimie uai jeare oticuen a, cuemo llono. Jeare oñedicuemo, ¿bue ñellena cuena butadio?

<sup>24</sup> Jesús uai oñede. Iemei Anásdi Caifás jofomo Jesús maianona orede.

*Pedro Jesúna dane janua rafue*

(Mt 26.71-75; Mr 14.69-72; Lc 22.58-62)

<sup>25</sup> Ie facaise Pedro irai ecimo nia agaide. Nainomo itino naimiemo llote:

—Jesús llofueoicaigano imiedio.

Pedro janote:

—Ieñedicue.

<sup>26</sup> Naie facaise daje mullaíma Pedromo llote:

—Aceitunas railla riaraiái illanomo ona ciódicue —llote. Jusúna soldaduai gaitaja facaiseconi Pedro naie mullaíma ie come jefona ailli jaibonote, soldaduai Jesúna gaitaja ie daacaíño. <sup>27</sup> Pedro dane janote. Iecon iitava ñaite.

*Jesús Pilato dine illa rafue*

(Mt 27.1-2, 11-14; Mr 15.1-5; Lc 23.1-5)

<sup>28</sup> Ie mei Caifás jofomona gobernador jofomo Jesúna jitiñamo uitimaci. Naie facaise gobernador di Pilato. Naimiedi judíuaiñedimie. Naimaci einamaci rairuilla jira, judíuaiñedimie

jofomo naie facaise fo jaiñedimaci. Fo jaiadedi, pascua railla rafue guilledi guiñega. <sup>29</sup> Ie jira Pilato jino bite. Naimacimo jicanote:

—¿Nie isoide rafue muidona llogidotomoi?

<sup>30</sup> Uai otimaci:

—Bimie marañede rafue finoñedena, o dine naimiena atañedicaí.

<sup>31</sup> Pilato llote:

—Naimiena uiño. Omoi einamací llogacinuaido naimiena duere fino.

Uai otimaci:

—Come meinellena caimona rairuidomoi. Naimie coraiana jitaidicaí —llotimaci.

<sup>32</sup> Navui Jesúdi: “Cuena cruzmo coraitimaci” llote. Naie llucino jai suisaide.

<sup>33</sup> Pilato fo abido jaillano, Jesúsna uaiduano, naimiemo llote:

—Judíuai illaíma raillamiedio.

<sup>34</sup> Jesús dinena jicanote:

—¿O comecina dama iese facajano llotio? Iese comecina o facañenia, jiaimie omo lloga.

<sup>35</sup> Pilato uai ote:

—Judío imieñedicue. O rafue raise uiñoñedicue. Omoi comini cuemo ona fecadimaci.

Jusiñamui diga nanoca ñairaini cuemo jai fecadimaci. ¿Nie isoide marañede rafuena finodio?

<sup>36</sup> Jesús uai ote:

—Eniruemo cominina sedañedicue. Judíuai illaicomini cuena gaitañellena, eniruemo cominina sedadicuedena, cue comini cue facaina fuiridimaci.

<sup>37</sup> Pilato uai ote:

—Ie jira odi illaimadio.

Jesús uai ote:

—Jaca railla. Uanaicino llollena, jeicigacue. Nana uanaicinona jitaidino cue lluaana cacadimaci.

<sup>38</sup> Pilatodi Jesús uaina uaitajamona, raite:

—¿Nie uai naidi uaina?

Ie mei dane jino billano, cominimo llote:

—Jaca nicino naimiemo ñede.

*Jesúna coraiacana rafue*

*(Mt 27.15-31; Mr 15.6-20; Lc 23.13-25)*

<sup>39</sup> Pilato nia llote:

—Naga año pascua railla rafue illa facaise, damie cárcelmona jino ollena, cuemo jicanuaibisoidomoi. Bie año omoi jitaia, omoi illaíma raillamiena marena oretaiticue.

<sup>40</sup> Comini dinena cuiriidimaci:

—Dama ite. Bimierna jitaiñedicaí. Barrabásna cárcelmona marena jino oreta. —Iese cuiriidimaci. Barrabásdi firiraima.

## 19

<sup>1</sup> Ie mei Pilato Jesúsna oni uillanona, naimiena sechedotade. <sup>2</sup> Jifanodosillena, soldaduai eecuaímona finoca nuiciraina naimie ifogimo jitadimaci. Jiduirede iniroina jitatajano raitimaci:

<sup>3</sup> —Judíuai illaimadio. —Iemei ie uiecona bucoídimaci.

<sup>4</sup> Pilato dane jino billano, raite:

—Naimie omoi dine jino ja biite. Naimiemo nicinodi ñede —raite.

<sup>5</sup> Ie facaise Jesús jino bite. Eecuaímona finoca nuiciraina jitaca. Jiduirede iniroina jitaca. Pilato naimacimo llote:

—Jadi, naimie.

<sup>6</sup> Jusiñamui diga nanoca ñairainidi, jiaie illaicomini diga, naimiena cuano, cuiriidimaci:

—Naimiena corai.

Pilato llote:

—Naimiemo nicinodi ñede; ia oni uillanona, naimiena omoi corai.

<sup>7</sup> Uai otimaci:

—Moisés micori jaie ciega: “Bu Jusiñamuina jeare ñaianona, fiodailla”. “Jusiñamui Jitodicue” naimie railla jira, naimie fiodailla. Naimie Jusiñamui Jitona abina caítadimie. Caimona naimiedi marañede rafue jai finode.

<sup>8</sup> “Naimiedi Jusiñamui Jito” comini raillana Pilato cacajano, eo jacinaita. <sup>9</sup> Jesúsna dane fo uite. Jesúdi Jusiñamui Jitona naimie raise uiñollena, Jesúsno jicanote:

—¿Ninena bitio?

Jesús uai oñede. <sup>10</sup> Ie jira Pilato dane jicanote:

—¿Bue ñellena cue uaina oiacañedio? Uai cuemo ite, o marena oretallena. Uai cuemo ite, ona coraítallena.

<sup>11</sup> Jesús uai ote:

—O anamo Jusiñamui cuena itataja jira, o uai ite, cuemo lollena. Ie jira omo cuena fecadino o baifemo jeacino finodimaci.

<sup>12</sup> Te facaimona Pilato Jesús marena jino oretaiacade; iadedi judíuai illaicomini dinena cuiirisite:

—Bimie o jino marena oretaia, cai nanoca illaima ie nabaiñedio. “Illaimadicue” Jesús llumona, cai nanoca illaima dibeimo naimiedi iñede. Cai nanoca illaimadi César.

<sup>13</sup> Comini lluana cacajano, Pilato Jesúsna jino atide. Ie cominimo lloranomo raide. Naie illano nofinina mameciredede. Judíuai uaido Gabatana mameciredede. <sup>14</sup> Pascua rafue guilla finoraruiimo jitoma naidai illanona, Pilato dinena llote:

—Jadi, omoi illaima.

<sup>15</sup> Temona cominidi cuiirisite:

—¡Naimie oni uillanona, naimiena meine! ¡Naimiena corai!

Pilato jicanote:

—¿Bue ñellena omoi illaimana coraíticue?

Jusiñamui diga nanoca ñairaini uai otimaci:

—Cai illaimadi César. Jiaie illaimadi caimo iñede. Jaca dallaimade cai illaimadi.

<sup>16</sup> Te mei Pilato naimacimo naimiena fecade, coraillena.

### *Jesúna coraiacana rafue*

(Mt 27.32-56; Mr 15.21-41; Lc 23.26-49)

Pilato llua jira, Jesúna uitimaci coraillena. <sup>17</sup> Jesúsdi ie cruzna rocaoicaida sonode. Ifocoraina eruaiilla mameciredede illanomo jaidimaci. Judíuai uaido naie illano Gólgotana mameciredede. <sup>18</sup> Nainomo naimiena coraidimaci. Naimie abimo menamie coraica. Damie Jesús nabeimo. Jiaimie jarifebeimo. <sup>19</sup> Cruzmo jonellena, Pilato rabricimo cuetatate: “Nazaret ie Jesús. Judíuai Illaima”. <sup>20</sup> Judíuai uaido cuega. Romanos comini uaido jiai cuega. Griego uaido jiai cuega. Jesús coraiano Jerusalén ianori illa jira, ailluena comini iena cioidimaci.

<sup>21</sup> Iena ciuamona, naie rabricina meidollena, Jusiñamui diga nanoca ñairaini Pilatomo llotimaci:

—“Judíuai Illaima” raillano jai cuetatatio. Iena meiduana jitaidicai. Bimie dinena raisoide: “Judíuai Illaimadicue” raillanona, o cuetatatjana jitaidicai

<sup>22</sup> Pilato uai ote:

—Jai cuetataticue. Jiaie rabricimo dane cuetatañeiticue.

<sup>23</sup> Jesúsna coraia mei, soldaduai naimie iniroi uanona, naga soldado digamie jonega iniroi. Nagamaga soldaduai ite. Ie camisa fiebide. Naie daje jamai nigaroi. <sup>24</sup> Ie jira dani coniniri ñaitimaci:

—Bie camisa cuaranoñeiticai, dani cai fecallena. Mai. Conima jabomaiticai, iena ollena. —Iese finuano Jusiñamuina lloraima micori cuegafuiai suide. Jaiie cuega: “Cue iniroi dani naimacimo fecaitimaci; iadedi cue camisa ollena, conima jabomaitimaci”. Iese finodimaci.

<sup>25</sup> Cruz abimo Jesús ei, ie euiño diga ite. Cleofas aidi ite. Naiñaiño mameci María. María Magdalena jiai ite. <sup>26</sup> Jesús ie eina ciode. Cuena naiñaiño ecimo jiai ciode. Cuena eo gaide. Ie jira ie eimo llote:

—Jadi, o jito isoi itimie anamo iitio.

<sup>27</sup> Cuemo llote:

—Jadi, o ei isoidiñaiño anamo iitio.

Naie dacaño naiñaiñoa cue jofomo uillanona, naiñaiñoa sedadicue.

<sup>28</sup> Te mei Jesús nana rafue jai fuillana uñuano, llote:

—Jiroacadicue. —Iese lluanona, Jusiñamuina lloraima micori jaiie cuegafuiai jai suide.

<sup>29</sup> Nainomo llerojimo vino ite. Radosimo fibecode rana joniano, vinomo faite. Iemei Jesúmo fecade jaronollena. <sup>30</sup> Iena jaronuano, Jesús llote:

—Cue maijia jai fuite. Jai macaibaite. —Ie ifogi ana jitadacaida, fiodaite.

### *Jesús sida diga ducia rafue*

<sup>31</sup> Pascua railla rafue guille finuarui illa jira, judíuai illaicomini Pilato dine jaidimaci. Raire fiodaillena, coraicano idaiaina uellullena naimiemo jicanuaidimaci. Sábado rafue ie nairui nia illanona, sáborui jai raire taíneacana jira, coraicano cruzmo sáboruimo illana jitaiñedimaci. <sup>32</sup> Soldaduai jaillano, Jesús ecimo coraica iaímaiaí idaiaina uellude. <sup>33</sup> Jesús dine billano, naimie jai fiodaillana cioidimaci. Ie jira naimie idaiaina uelluñedimaci; <sup>34</sup> iadedi daje soldado Jesús ciraigiconi sida diga ducide. Naifo diaide. Naifomona jinui jiai bite. <sup>35</sup> Nana iena cioidicue. Uanai lloticue. Omoi inollena, iena lloticue. <sup>36</sup> Soldaduai iese

finuamona, jaie cuegafuiai jai suide. Jaie Jesúna cuega: “Naimie illaicina tainoñeitimaci”.  
<sup>37</sup> Jiai jaie cuega: “Judíuai dinena naimaci ducitagamiemo ico eruaitimaci”.

*Nofici ifomo Jesús raia rafue*

(Mt 27.57-61; Mr 15.42-47; Lc 23.50-56)

<sup>38</sup> Naie facaise Pilato dine José raillamie jaide. Cruzmona Jesús abí oni ollena, Pilatomo jicanuaide. Josédi Arimatea nairai imie. Pilato fairiote. Ie jira José Jesús abí ana uanona, iena oni uite. Judíuai illaicominina naimie jaciruillanona, Jesúsna bainino ñnote.  
<sup>39</sup> Nicodemo jiai bite. Siorede rana atide. Mirra áloe diga jai tamiano atide. Nibai treinta kilos atide. Naimiedi Jesús dine naiona navui bite. <sup>40</sup> José, Nicodemo diga, Jesús abina useroina ferinotiaimaiai. Naimaci comini finouilla isoi, naie siorede radi ñiroimo jonega. <sup>41</sup> Amenaiai iaire illanomo Jesúsdi coraica. Nainomo nofici ie raiafodi ite. Nia buna naifomo raifenafa. <sup>42</sup> Naifo iaire illa jira, sábadorui jai riacana jira, jiaie raiafo jenollena abí juanina jira, nainomo naimiena jonetiaimaiai. Nofici diga raiafo raise ibaila mei, jofomo jaidiaimaiai.

## 20

*Fiodaillamona, Jesús jillua rafue*

(Mt 28.1-10; Mr 16.1-8; Lc 24.1-12)

<sup>1</sup> Domingo jítiramo nia monañenia, raiafomo María Magdalena jaide. Raiafo ibaila nofici oni joillana ciode. Jesús abina cioñede. <sup>2</sup> Ie jira aisicana Pedrona jenuaide. Cuenajai jenuaide. Baillano, llote:

—Cai illaicomini cai Nama abina raiafomona otimaci. Naimiena jonianona uiñoñedicue.

<sup>3</sup> Ie mei raiafomo jaidicoco. <sup>4</sup> Aisicana jaidicoco; iadedi riire cue aisicana jailla jira, nano ridicue. <sup>5</sup> Ana bitadacaida, fo erodatcuemo, useroi joillana ciodicue; iadedi fo jaiñedicue. <sup>6</sup> Ie mei Simón Pedro rillano, fo jaide. Useroi joillana jiai ciode. <sup>7</sup> Ie ifogimo ferinoga ñiroi eneno illana ciode. Raise nacuana ciode. <sup>8</sup> Iemei jiai fo jaidicue. ñiroina ciuamona, Jesús jai jilluana ñnoticue. <sup>9</sup> Jaie cuegafuiai llote: “Fiodaillamona jilloite”. Naie cuegafuaina como raise ñnoticoco. <sup>10</sup> Ie mei jofomo jaidicoco.

*María Magdalenamo Jesús bairia rafue*

(Mr 16.9-11)

<sup>11</sup> Raiafomo abído billano, coco jailla mei, nainomo María fiebide. Eede. Ana bitadacaida, fo erodatemo, <sup>12</sup> Jusiñamui mona mena jaienici jai billana ciode. Userede ñiroi jitaiaimaiai. Jesúsna navui jonianomo ana raidiaimaiai. Damie ifogi díbeimo raide. Jiaimie eilli díbeimo raide. <sup>13</sup> Naiñaiño jicanotiaimaiai:

—¿Bue ñellena eedio?

Naiñaiño uai ote:

—Cue Namana bu oni uillanona, naimiena jonianona jai uiñoñedicue.

<sup>14</sup> Naie facaise jinafo dine eroaillanona, Jesúsna ciode; iadedi naimiena uiñoñede. <sup>15</sup> Naiñaiño comequina facade; “Naimiedi bie illano sedaraíma”. Jesús naiñaiño jicanote:

—¿Bue ñellena eedio? ¿Bu jenodio?

Naiñaiño uai ote:

—Jesúna o uia, naimie jonianona cuemo llono. Ie mei naimiena oni uiticue.

<sup>16</sup> Jesús dinena uai ote:

—¡María!

Naimie dine naiñaiño como raise dobaicaide. Judíuai uaido llote:

—¡Raboní! —Naie uai oni dobaíñuamona: “Llofueraíma”.

<sup>17</sup> Jesús uai ote:

—Cuenalíñoño cuena faicai. Cue Moo dine nia a jañedicue. Cue amatiai dine mai jaillanona, cue rafuena lluai. Cue Moo dine jaiticue. Naimiedi cue Jusiñamui. Naimie jiai omoi Moo. Jiai omoi Jusiñamui.

<sup>18</sup> Ie jira María Magdalena Jesús llofueoicaiganodicaímo lluaibite:

—Cai Namana jai ciodicue. —Iemei caímo naimie naiñaiño lluaana llote.

*Jesús ie llofueoicaiganomo bairia rafue*

(Mt 28.16-20; Mr 16.14-18; Lc 24.36-49)

<sup>19</sup> Domingo naí Jesús llofueoicaiganodicaí jofomo ofidicai. Judíuai illaicominina cai jaciruillamona, nasiai nana cai ibaica. Nase econoñeno ieconí Jesús cai motomo billanona, caína uaiduano, llote:

—Uri omoi i.

<sup>20</sup> Ie onollina acatate. Ie ciragína jiai acatate. Cai Namana jai cai ciuari eo iobidicai.

<sup>21</sup> Jesús dane llote:

—Uri omoi i. Cue Moo cuena oretaja isoi cue rafuena lloiena, omoi na oretaiticue.

<sup>22</sup> Ie facaise caina firaiñuanona, raite:

—Jusiñamui Joreñona omoi feiñuana jitaicicue. <sup>23</sup> “O jeacinona jai dotade” bumo omoi lloia, Jusiñamui jai dotaca. “O jeacinona nia dotañede” bumo omoi lloia, Jusiñamui nia dotañega.

<sup>24</sup> Naie naio Tomásna mameciredede llofueoicaigamie cai diga iñede. Dídimona jiai mameciredede. Naimiedi gorasa. <sup>25</sup> Naimiemo lloticaí:

—Cai Namana ailli ciodicai.

Tomás uai ote:

—Clavo ifona naimie onolli jeraimo cue cioñenia, naie ifona cue jetañenia, naimie ciraigi ifona cue jetañenia, ñnoñeiticue.

*Jesús ie llofueoicaiganomo dane bairia rafue*

<sup>26</sup> Ocho digarui illanona, Jesús llofueoicaiganodicai dane ofillano, Tomás cai diga ite. Nana nasiaí ibaica; iadedi nase econoñeno ieconi Jesús cai motomo dane fo billano, uaiduano, lote:

—Uri omoi i.

<sup>27</sup> Iemei Tomásno llotite:

—Eroda cue onollimo. Naifo jeta. Ciraigi ifona jiai jeta. ñnoñeno jaiñeno. Mai ñno.

<sup>28</sup> Tomás uai ote:

—Cue Namadio. Cue Jusiñamuidio.

<sup>29</sup> Jesús dane uai ote:

—Cuena o cúa jira, cuena ñnotio; iadedi cuena cioñedino cuena ñnoia, jiai caimare iitimaci.

<sup>30</sup> Jesús diga siño rafuena finode. Iena ciodicai. Nana naie rafuena bie rabenicomo cueñedicue; <sup>31</sup> iadedi dajerie cueticue. Jesúdi cai jilloitarañmana omoi ñnollena, iena cueticue. Naimiedi Jusiñamui Jitona omoi ñnollena, iena jiai cueticue. Naimiena omoi ñnuano, naimie diga jaca iitomoí.

## 21

*Jesús ie llofueoicaiganomo ane bairia rafue*

<sup>1</sup> Diga irui illanona, Tiberiana mameciredede jorai fuemo Jesús ie llofueoicaiganodicaimo dane bairedede. <sup>2</sup> Nainomo diese iticai: Simón Pedro, Tomás, Natanael, cue ama Jacobo, cue, jiaie iaímaiaí. Tomás mameci jiaicidi Dídimo. Natanael Galilea ie Caná nairai imie. <sup>3</sup> Simón Pedro caimo llotite:

—Lloiji faiaiticue.

Naimie uai oticai:

—O diga jaiticai. —Iese raillano, botemo jaidicai. Namona naio llojjina faiticai; ia jaca buena oñedicai. <sup>4</sup> Monaiacademo, Jesús jorai fuemo bite; iadedi naimiena uññoñedicai.

<sup>5</sup> Jesús caimo jicanote:

—Caimaci, ¿nie diese lliciaina jai otomoí?

Uai oticai:

—Jaca oñedicai.

<sup>6</sup> Naimie dane uai ote:

—Omoi bote nabei dine omoi llojjina faino.

Ie jira faiticai. Ailluena lliciaí naíemo jilla jira, a aiñonidicai. <sup>7</sup> Iena ciuamona, Pedromo llotite:

—Cai motomo cai Namadi ite.

Pedro iena cacajano, naimie tañmiena jira, ie iniroi jitate. Jesús dine naimie raire rillena, joraimo daiade; <sup>8</sup> iadedi botedo biticai. Enirue iaire illa jira, na lliciaimo sonocana, llojjina atidicai. Nibaí cien metros oni ite. <sup>9</sup> Jorai fuemo cai ria, coocimona bonoca iraina ciodicai. Lliciaí iraimo ruica jai ite. Llomenico jiai ite. <sup>10</sup> Jesús caimo llotite:

—Omoi oga lliciaimona janore ati.

<sup>11</sup> Ie jira Simón Pedro botemo jaillano, llojjina llinuanona, eniruemmo ari sonode. Ciento cincuenta y tres jemierie jitatitacai. Ailluena ite; iadedi lloiji cuarariñede. <sup>12</sup> Jesús llotite:

—Mai guisaibí. —Jesúna cai uñña jira: “¿Budío?” jaca buna raiñena. <sup>13</sup> Jesúdi llomenico diga lliciaina caina ecade. <sup>14</sup> Fiodaillamona jillua facaiseimona dacañño amani caimo Jesús jai abina bairetate.

*Jesús Pedro diga ñaia rafue*

<sup>15</sup> Guilla mei, Jesús Simón Pedromo llotite:

—Simón, odi Juan jitudio. —Jiai jicanote— ¿Nana o nabaiñiaí baifemo cuena isiruitio? Simón uai ote:

—Jii, Nama, ona cue isiruillana uifnotio.

Jesús uai ote:

—Toica llaudaiaia uruiaina omoi raise sedaja isoi, cuena inotinona raise seda. Naimacina cue rafuena raise llofue.

<sup>16</sup> Dane llote:

—Simón, odi Juan jitodio. —Dane jicanote— ¿Cuena isiruitio?

Simón uai ote:

—Jii, Nama, ona cue isiruillana uifnotio.

Jesús dinena uai ote:

—Toica llaudaiaia uruiaina omoi raise sedaja isoi, cuena inotinona seda.

<sup>17</sup> Dane jicanote:

—Simón, ¿cuena isiruitio? —Jesús naimiemo dane jicanua jira, “Jesús cue uaina inofede” raillanona, Pedro comeci sunaite.

Uai ote:

—Nama, naga rafuena uifnotio. Ona cue isiruillana uifnotio.

Jesús uai ote:

—Toica llaudaiaia uruiaina omoi raise sedaja isoi, cuena inotinona seda. <sup>18</sup> Daje rafue omo nia lloiticue. O nia conirue facai o iniroi dama jitadio. Ie mei o jitaillanomo jaidio. O uaicroma facaiseconi o onolli oni ñuitaitio. Ie mei jaimie o iniroi ona jitajano, o jitaifenanomo ona uite. Cue llua inocana o jai.

<sup>19</sup> Fiodaillena Pedro uifollena, uicodo Jesús iese llote. Cristo llua isoi, Cristo rafue muidona, illaicomini Pedrona jiairuido meinetimaci. Naimie fiodaillanona, Jusifamuina iobitade.

*Jesús ie gaia llofueoicaigamiemo llua rafue*

<sup>20</sup> Pedro diga Jesús nia ñaia facaise, Pedro dobaicaillanona, cuena ciode. Iaimaia jinafona racadicue. Jesús gaimiedicue. Navui cai guia, Jesús nia fiodaifenia, Jesús abimo cue ia, Jesúmo jicanoticue: “¿Bu gaitatallio?” <sup>21</sup> “Cuena inotinona seda” Pedromo Jesús llua mei, Pedro dobaicaillanona, cuena ciuano, Jesúmo jicanote:

—Nama, ¿niese naimie fodaite?

<sup>22</sup> Jesús uai ote:

—Naimie nia itemo, cue abido bia, dama iesede. Naimie rafuedi omo duiñede; ia cue llua inocana o jai.

<sup>23</sup> Ie jira creyentiaia naie llua fidiano cuena raitimaci:

—Naimie fodaifneite. —Iese raitimaci; iadedi Jesús iese raiñede. Jesús llote: “Naimie nia itemo, cue abido bia, dama iesede. Naimie rafuedi omo duiñede”.

<sup>24</sup> Nana rafuena ciuano lloticue. Iena cueticue. Uanaicinuaina cueticue.

<sup>25</sup> Jesús ailluena jiaie rafuena finode. Nana ie rafue cuogada, enirue baiñede, naie libros eenollena. Mai. Juandicue.

## JESUCRISTO ORETAGANODI NAIMIË RAFUE LLOCANA UILLA RAFUE

*Jesús Jusiñamui Joreño billena llua rafue*

<sup>1</sup> Teofilo, o dine, ¿nigacino? ¿Nie isodio? Omo jiaie rabe birui dane oretaiacadicue. Lucadicue. Navui jiaie cartana oretaticue. Ailluena Jesús finoca rafuena nainomo cueticue. Ailluena Jesús llofuiacinona jiai cueticue. <sup>2</sup> Monamo naimiena Jusiñamui nia uifienia, Jesús ie llofueoicaiganona llofueuide. Ie llofueoicaiganona jaie naimie fetuamona, Jusiñamui Joreño uaido naimacina llofueuide. Naie llofuiacinona navui cueticue. Jesús monamo jailla mei, ie llofueoicaigano naimie oretaganona mameciredimaci. <sup>3</sup> Naimie fiodaillamona ie jillua mei, naimacimo bairede. Naimie ua jilluana naimaci raise uifollena, diga icaifño cuarenta digarui naimacimo baireuide. Naimacina Jusiñamui dibeimo ie comini jai illa rafuena llofueuide. Naimiemo jai suide rafuena llofueuide. Naimiemo nia suifede rafuena llofueuide.

<sup>4</sup> Naimaci diga Jesús guilla facaise, naimie Jerusalémona naimaci oni jaillana rairuide. Raite:

—Cue Moo ie Joreño omoimo fecallena, omoimo jai lloticue. Naiena omoi feifollena, Jerusalémo nia fiebi. <sup>5</sup> Naimie rafuena comini inuamona, Juan Bautista micori jinui diga bautizade; iadedi cue rafuena omoi inuamona, nano nigarui illanona, cue Moo ie Joreñona feifnoitomo —raite.

*Monamo Jesús jailla rafue*

<sup>6</sup> Ie llofueoicaigano diga Jesús dane ofillanona, naimiemo jicanotimaci:

—Nama, ¿birui cai judiui cominina jai sedaitio, David micori cai usumatiai micoriai jaie sedaja isoi?

<sup>7</sup> Naimie uai ote:

—Naie rafue suille facaiseconi jaca uifnoeitomo. Naimie siñona illamona, dama cue Moo naie rafue suilliruina uifnote; <sup>8</sup> iadedi cue Moo ie Joreñona omoi feifua mei, siño uai omoimo iite. Ie jira Jerusalémo cuena lloitomo. Judeamo, Samariamo, ua nana eniruemo ite nairaimo lloitomo —raite.

<sup>9</sup> Naimie iena llua mei, Olivos railla anedumo jai jaidimaci. Nainomo itimacimo, naimaci eruaisitemo, monamo Jesús Jusiñamui uiga. Uillie illa jira, naimiena cioisifede. <sup>10</sup> Monamo nia eruaidemo, ieconi naimaci dine Jusiñamui jaienici, mena iima bairia isoi, bairediaimaia. Naie iaiaiaia iniroi userede. <sup>11</sup> Raitiaimaia:

—Galileo imaci, ¿bue ñellena monamo eruaidomoi? Omoi motomona Jesús monamo jaillana jai ciodomoi. Naimie jai jailla isoi, dane abido ico biite —raitiaimaia.

*Matiana fetua rafue*

<sup>12</sup> Naimacimo Jusiñamui jaienici llua mei, Olivos railla anedumona Jerusalémo naisodo abido jaidimaci. Olivos railla anedumona Jerusalémo ochocientos metros dinori illanona, sábadoruimo Moisés micori lloga dinori macaritimaci. <sup>13</sup> Rillano imaci cuartomo jaidimaci. A dibebamo ite. Nainomo itimaci: Pedro, Jacobo, Juan, Andrés, Felipe, Tomás, Bartolomé, Mateo, jiaie Jacobo. Naimiedi Alfeo jito. Simón ite. Naimiedi cananista comini facaisemo duide. Judas ite. Naimie jiaie Jacobo jito. Diese nainomo itimaci. <sup>14</sup> Naimaci jitaillamona, Jusiñamuimo jillena, nagarui danomo ofidimaci. Jillena, jiano naimaci diga jiai ofisoidimaci. Diga riñoniai jiai ofisoidimaci. Jesús ei, María, jiai ofisoide. Jesús amatiai jiai ofisoidimaci.

<sup>15</sup> Comini ofilla motomo Pedro naidaita, rafuena lloite. Nibai ciento veinte comini nainomo itimaci. Pedro lloite:

<sup>16</sup> —Amatiai, David micori jaie lloga rafue birui jai suide. Jusiñamui Joreño jaie David micorina Judas micorina ñaitatate. Salmos rabenicomo naie ñaiacino di cueba. Iena uifnoticai. Judas micorina uifnoticai. Naimie Jesúsna gaitadinona ifode. <sup>17</sup> Naimiedi da cai llofueoicaigano imie. Cai diga maijuuide. <sup>18</sup> Ie marañeno finoca rafuemonu ucubena feifua mei, ie comeci iuaina meiduanona, naie ucubena oni judaide. Judíui illaicomini naie ucube diga eniruena ibadimaci. Nainomo Judas micori ie cimao cuinajanona, ie abina dama meinete. Rifailamona, ana uaillamona, ie jebegi boficaillamona, nana ie jebegi jino uaide. <sup>19</sup> Nana Jerusalémo itino iena fididimaci. Ie jira cai uaido naie enirue mameciredede Acéldama. Oni dobaiñuamona dirue toillanie. <sup>20</sup> Ero, Salmos rabenicomo Judas micorina iese David micori jaie cueba:

Naimie illano taino iite.

Buna jaca iemo ifeite.

Naimie maijille jiaimie mo iite.

Iese cuega. <sup>21-22</sup> Ie jira cai diga itinomona damiena fetoiticaí. Cai Nama Jesús cai diga illa facaiseconi, nagarui diga iñiaí cai diga jaisoidimaci. Juan Bautista micorí Jesúna bautizaja facaise mona, Jesús monamo caimona jaillarui facaiseconi, naimaci cai diga jiaí itimaci. Naimacimona damiena fetoiticaí, Jesús jilluana cai diga lollena. —Iese Pedro raite.

<sup>23</sup> Ie mei mena imana fetodimaci. Damiedi José Barsabas. Jiaici mameci Justo. Jiaimiedi Matías. <sup>24</sup> Ie mei Jusiñamuimo jiidimaci:

—Nama, nana comini imaci comeciaina uiñotio. ¿Nie imana jitaideo? Caina uiñota.

<sup>25</sup> Naimiedi Judas ifo meidoite. Jesús ie oretagamiena naimie jaillamona, cai diga maijijite. Ie fiodaillamona Judas micorí ie maijiana jai faínonocai —jiidimaci. <sup>26</sup> Ie jira conima jabomaside, uiñollena bu ille. Matíamo baite. Iemei jiaie once diga oretagano isoi naimie ite.

## 2

### *Cristo oretagano Jusiñamui Joreñoña feiñua rafue*

<sup>1</sup> Pentecostés railla rafue irui ria, nana creyentiaí diese danomo itimaci. Pentecostés trigo ua ie rafue. Pascua rafue illa meinocni, cincuenta digarui illanona bie rafue ite.

<sup>2</sup> Danomo ia, ebena illacínomona monamona riire aifi billa isoi buena cacadimaci. Nana jofomo itino naiena jiaí cacadimaci. <sup>3</sup> Iena naimacimo bairede. Iena cioidimaci. Irai boua isoi eruaide. Nana naimacimo baite. <sup>4</sup> Iese Jusiñamui Joreñoña feiñotimaci. Nana naimaci comeciaina namatade. Iemei diga nairai uaillaído ñaitimaci, Jusiñamui Joreño naimacina ñaitatajamona. Naimaci ñaia uallaina uiñofedimaci.

<sup>5</sup> Naie facaiseconi Jerusalémo Jusiñamui rafuedo eo jaide judíuaidi itimaci. Diga nairaiamona bitimaci. <sup>6</sup> Creyentiaí ñaiana naimaci fidiano, ailluena comini jino tainomo ofidimaci. Nagamiiaidi ie nairai uaina cacade. Ie jira jacinaitimaci. <sup>7</sup> Eo rajicaidimaci. Coninimo jicanotimaci:

—¿Buta ñaite? Nana Galileos imaci. <sup>8</sup> ¿Niese naimacina cacadicaí? Cai uaido dajerie ñaiana cacadicaí —raitimaci. <sup>9</sup> Diga comini imiaí itimaci: Partos, Medos, Elamitas, Mesopotamia imaci, Judea imaci, Capadocia imaci, Ponto imaci, Asia imaci, <sup>10</sup> Frigia imaci, Panflia imaci, Egipto imaci, Libia imaci. Libia imaci enirue Cirenemo ruica eruaide. Romamona jamai macaritano jiaí itimaci. <sup>11</sup> Judíuaidi itimaci. Judíuaidedino jiaí itimaci. Judíuaidi isoi Jusiñamuina jai sedadimaci. Cretenses itimaci. Arabes itimaci.

—Cai uaido Jusiñamui ie ebirede finoca rafuena cacadicaí —raitimaci. <sup>12</sup> Nana eo rajicaidimaci. Danirie jicanododimaci:

—¿Bue ite?

<sup>13</sup> Jiaie comini jifanoduano, raitimaci:

—Jifaidimaci. Ie jira iese ebena ñaitimaci.

<sup>14</sup> Ie facaise ie once nabaiñiaí naimie ecimo illanona, Pedro nainomo como ofidinomo ado llote:

—Caimaci, ua nana Jerusalén imaci, cue lluomo cacarei. Naie rafuena lloiticue. <sup>15</sup> Omoi comeciaina omoi facaja isoi, jifaiñedicaí. Jitoma nia fuiri daidemo, bu jaca jifairainina.

<sup>16</sup> Joel micorí bie rafuena jaie llote. Joel micorí Jusiñamui rafuena lloiraíma. Naimie jaie lloga rafue birui caimo jai suide. <sup>17</sup> Llote:

Jusiñamui caimo llote: “Jiairuido bie rafue suite.

Cue Joreñoña diga cominimo fecajiticue.

Iedo omoi uruaí cue lluana lloitimaci.

Iemona omoi coniruaína nicairitaiticue.

Iemona omoi einamacina jiaí nicairitaiticue.

<sup>18</sup> Ua nana cuena sedadinomo cue Joreñoña fecajiticue.

Naimaci cue lluana lloitimaci.

<sup>19</sup> Monamo eo jacirede rafuena ico suiñotaiticue.

Eniruemo eo jacirede rafuena ico jiaí suiñotaiticue.

Comini jobairillemona, eniruemo comini diruedi eo iite.

Naie facaise daje diese enirue boojite. Bouamona uillie eo iite.

<sup>20</sup> Jitoma lligaiñoñeite. Fivui diruena eruaite.

Nana bie suite, Cristo billa facaise nia iñenia.

Naie facaise diga jacirede rafue suite;

<sup>21</sup> Iadedi birui cuemo bu jicaia, ie jeacinomona naimiena jillotaiticue” Jusiñamui llote.

Ie Joreño caimo birui illamona, Joel micorí llogacino jai suide.

<sup>22</sup> Caimaci, bie uaina omoi cacarei. Nazaret ie Jesúna ñaiticue. Jusiñamuidi omoi motomo naimiena siño rafuena jai finotate. Iena jai uiñotomoi. <sup>23</sup> Jusiñamui comeci jaie facaja isoi, Jusiñamui jitailla isoi, Jusiñamui naimiena omoimo fecade. Jesúna coraitatomoí. Jusiñamuina



ñinoñedinona naimiena meineta domo; <sup>24</sup> iadedi fiodaillamona naimiena Jusiñamui jillotajano, legi ie cacajamona naimie jillobide. Naimie fiodaite; iadedi fiodaillamona nainomo ifioñede. <sup>25</sup> David micori naimiena jaie llote:

Jusiñamui cue diga jaca illana uiñoticue.

Cue ecimo naimie ite, cue comecina ocuiñotallena.

<sup>26</sup> Ie jira cue comeci caimare ite. Eo iobidicue.

Cue marena illemo jai jiai ocuiridicue,

<sup>27</sup> raiafomo cue joreña naimie fañonocaiñena jira,

ie mare Jito abi rifaillana naimie jitañena jira.

<sup>28</sup> Naimie cuena jilloitallena uiñoticue.

Cue diga naimie illa jira, cue comeci caimare iite.

<sup>29</sup> Caimaci, cai usuma David micorina marefodo ñaiticue. David micori ñaia, dama naimie facaina ñañede. Jesúna ñaite. David micori jaie fiodaite. Raiafomo jonega. Naifo bene nia illamona, naimiedi Jesúna ñañena uiñoticai. <sup>30</sup> Ie ia David micori Jusiñamui rafuena llote. Naimie micoridi Jusiñamui naimiemo uanaicinona lluaana uiñote. Jaie Jusiñamui naimiemo llote: “O uruaimona damie illaimana illanona, ie cominina sedajite” llote.

<sup>31</sup> Cristona ñaite. David micori nia suiñede rafuena llote. Naimie micori Cristo jilloillena llote: “Raiafo Jusiñamui fiodaillanomo Cristo Joreño fañonocaiñeite. Cristo abi rifañeite” llote.

<sup>32</sup> Jesúna ñaite. Jusiñamui Jesúna jai jillotote. Nana cai iena ciodicai. Ie jira iena lloticai.

<sup>33</sup> Ie ecimo Jesúna jai dane itatajanona, Jusiñamui naimiena iobitade. Ie Moo llua isoi, Jesús jai ie Moo Joreño caimo jai fecade, omoi birui ciua isoi, omoi birui cacaja isoi. <sup>34</sup> Naimie abi monamo jaiñena jira, David micori dama naimie facaina ñañede; ia Cristona ñaite. Ero, jaie David micori raite:

Jusiñamui Cristomo llote: “Cue ecimo ana rai.

<sup>35</sup> Ona ñinoñedinona o anamo itataiticue”

raite. David micori llua isoi, birui jai suide.

<sup>36</sup> Pedro nia ñaite:

—Jesúna coraidomoi; iadedi Jusiñamui naimiena cai Namana itatate. Naimiena cai jilloitaramana jai itatate. Nana judiua comini naiena uiñuana jitaicue.

<sup>37</sup> Pedro lluaana cacajano, naimaci comeciaino riire baite. Pedromo iena jicanotimaci. Ie nabaiñaimo jai jicanotimaci:

—Caimaci, o lluaana jai cacadicai. ¿Bue finoiticai?

<sup>38</sup> Pedro uai ote:

—Omoi comeci iuaina meido. Iemei Jusiñamui omoimo ite jecinuaia dotajite. Jesucristo facaina omoi bautizallomoi. Jusiñamui Joreña jai feñoitomoi. <sup>39</sup> Omoimo ie Joreño fecallena navui llote. Omoi uruaimo jai fecaite. Jaiie nairai itinomo jai fecaite. Ua nana Jusiñamui fetocanomo jai fecaite.

<sup>40</sup> Diga uai naimacimo Pedro llote. Raite:

—Ailluena comini marañede rafuena birui finocana jaidimaci. Fafitimaci. Naimaci isoi jaiñeno; iadedi cue lluaana omoi cacajamona, iena ñino.

<sup>41</sup> Diga comini ie lloga uaina feñuano, bautizadimaci. Nairuido nibai tres mil comini creyentiaina jaidimaci. <sup>42</sup> Cristo oretagano llofuana fueuidimaci. Cristo oretaganona eo nabaidimaci. Nagarui ofillanona, Jesús fiodaillana comeciuidimaci. Jusiñamuimo jiiuidimaci.

*Cristona ñnotino illa rafue*

<sup>43</sup> Cristo oretaganodi diga siño rafuena finuamona, nana comini jacinaitimaci. <sup>44</sup> Nana creyentia damacina itimaci. Naimaci raruia coninimo fecauuidimaci. <sup>45</sup> Dueredino ia, naimacina canollena, raruia redino naimaci raruiaina vendedimaci. Iemei naie ucube dueredinomo fecadimaci. <sup>46</sup> Jusiñamuina sedallena, nagarui Jusiñamui jofomo ofisoidimaci. Danirie imaci jofuemo Jusiñamuina jai sedauuidimaci. Nainomo danomo guillanona, Jesús fiodaillana comeciuidimaci. Caimare imaci comeci illamona, caidiñeno guisoidimaci. <sup>47</sup> Jusiñamuimo iobillacinona fecacana jaidimaci. Nana cominidi naimacina: “Mare” raitimaci. Naimacina Jusiñamui itataja isoi, nagarui comini creyentiaina jaidimaci.

### 3

#### *Jusiñamui jofomo Pedro llucino*

<sup>1</sup> Jusiñamui jofomo jia facaise Pedro iaiaiaia Juan diga jaie. Jitoma ana ia, comini jiiuidimaci. <sup>2</sup> Iaiaiaia jaillanomo jaie comini tsitaitimiena atiana cidiiaiaiaia. Tsitaitimiena naimie jaca jeiciga. Naimiena nagarui atiano, Jusiñamui jofu ie ebiredena railla nase fuemo rainauuidimaci. Nainomo naimiena rainauuidimaci, fo jaidinomona ucube

jica-jicallena. <sup>3</sup> Iaimaiaí fo jaiacania, ucube jicallena, ie onolli ñuitade. <sup>4</sup> Iaimaiaí naimiemo eruaillano, Pedro raite:

—Cocomo eruai.

<sup>5</sup> Ie jira iaimaiaimo eruaide. Ra feiñoitena, ocianona sedade. <sup>6</sup> Pedro raite:

—Ucube cuemo ifede; iadedi cuemo ite rana omo fecaiticue. Nazaret ie Jesucristo uai cuemo illa jira, ona macaraiticue.

<sup>7</sup> Pedro naimie onollido llinuano, a naidanete. Ieconi naimie eillidi jillode. Ie taisicoñuai jiaí jillode. <sup>8</sup> Daiacaillanona naidacaide. Macarillanona, iaimaiaí diga fo jaide. Jusiñamui iobillacinona fecajano, daiacaillanona macarite. <sup>9</sup> Nana comini naimie macarillana cioidimaci. Naimie iobillacinona fecajana jiaí cacadimaci. <sup>10</sup> Naimie nase fuemo ana rasoilla jira, naimiema uiñotimaci. Naimiemo jai suide rafuena eo rajjicaidimaci. <sup>11</sup> Naimiedi Pedro iaimaiaí Juan diga nia llinuano, naimaci dine Salomón micori finotaga jofa abi ibirimo comini aisidimaci. Rajjicaidimaci. <sup>12</sup> Iena ciuano, Pedro naimacina raite:

—Caimaci, ¿bue ñellena biemo rajjicaidomoi? ¿Bue ñellena caimo iese eruaidomoi? “Daimaiaí iaimaiaí uaido naimiema jilloitate” raillanona cocomo eruaidomoi. <sup>13</sup> Iena finofedicoco; iadedi Jusiñamui iena finuano, ie Jito Jesúna iobitade. Cai usumatiaí micoriaí, Abraham, Isaac, Jacob, ua nana cai usumatiaí micoriaí bie Jusiñamuina sedadimaci; iadedi Jesúna birui fecadomoi, coraillena. Pilato naimiema jino marena oretaiacana jira, Pilato ecimo naimiema llogidotomoi. <sup>14</sup> Mareuidimiena jitaiñedomoi; iadedi come fatimiena cárcelmona jino billana jitaidomoi. Barrabás raillamiena jitaidomoi. <sup>15</sup> Jusiñamui ðibeimo caina itatatimiena meinetomoi. Naimie fiodaite; ia Jusiñamui naimiema jillotate. Iena ciodicoco. Ie jira iena lloticoco. <sup>16</sup> Tisitaitimie jilluana jai ciodomoi. Naimiema uiñotomoi. Jesúna naimie ñnua jira, Jesús naimiema maritate. Naimiema raise jillotate. Iena jai ciodomoi.

<sup>17</sup> Caimaci, ero, omoi finoca rafuena abina uiñoñeno finodomoi. Omoi illaicomini jiaí daje isoi finodimaci. <sup>18</sup> Jaié Jusiñamuidi ie facaina llorainina jairuido sulle rafuena llotatate. Naimacina Cristo legi cacajana llotatate. Birui naie llogacino suide. <sup>19</sup> Omoi comeciaí uaiillaí meido. Jusiñamui ðibeimo omoi comeciaina meido. Iemei Jusiñamui omoi jeacinona dotaite. Iena jaca feitaite. <sup>20</sup> Omoi uri illa facaise illena, Jusiñamui omoi diga illena, iena fino. Jusiñamui Jesucristona omoi dine dane oretallena, iena fino. Naimiedi omoi Jilloitaraíma. <sup>21</sup> Jusiñamui facaina lloraini micoriaí jaié lloga rafue sulle ðinori monamo naimie fiebiite. Jaié Jusiñamuidi ie mare lloraini micoriaí uaido buena llote. <sup>22</sup> Moisés micori raite: “Omoi cominimona naimie rafue lloraimana jaillena, cai Nama Jusiñamui cue isoi damiema fetoite. Nana naimie omoimo lluaana cacarei. <sup>23</sup> Bie lloraimana bu cacareññenia, Jusiñamui naimiema duere finoite. Iemona faifite”. <sup>24</sup> Nana Jusiñamui ie lloraini micoriaí birui sulle rafuena llotimaci. Samuel micori illa facaise mona naimaci buena llotimaci. <sup>25</sup> Jusiñamuidi cai usumatiaí micoriaímo rafuena llote; ia bie rafue birui omoimo jiaí duide. Jusiñamui Abraham micorimo jaié llote: “Nana cominidi o uruiai muidona caimare iitimaci”. <sup>26</sup> Ie rafue suiñollena, Jusiñamui ie Jitona omoi dine navui orede. Omoi caimare illena, nano omoi marañedicinona faínonocaitallena, omoi dine naimiema nana jai oretate.

## 4

### *Cristo oretagamaiaí ilaicomini motomo illa rafue*

<sup>1</sup> Comini diga Pedro iaimaiaí Juan diga ñaia facaise, Jusiñamui diga ñairainidi naie iaimaiaí dine bitimaci. Jusiñamui jofona sedaraini illaíma diga, saduceuaí railla comini diga jiaí bitimaci. <sup>2</sup> Fiodaillamona Jesús jai jilluana llofuetiaímaiaí. Cominina iaimaiaí llofuia jira, naie iaimaiaí diga iciritimaci. <sup>3</sup> Iaimaiaína gaitajanona, jai navuilla jira, cárcelmona jonetimaci, ie jitiramo naie rafuena siadollena. <sup>4</sup> Iese suide; ia Pedro llogacinona cadanimona ailluena comini naiena ñnotimaci. Cinco mil digamie creyentiaína jai itimaci.

<sup>5</sup> Icõiti Jerusalémo nana judíuai ilaicomini siadollena ofidimaci. <sup>6</sup> Anás jiaí bite. Naimiedi Jusiñamui diga nanoca ñairaima. Caifás bite. Juan bite. Alejandro jiaí bite. Nana Jusiñamui diga nanoca ñairaima cominidi ofidimaci. <sup>7</sup> Naimaci motomo Pedro iaimaiaí Juan diga atianona, iaimaiaimo jicanotimaci:

—¿Bu uai diga buena finodomoi?

<sup>8</sup> Jusiñamui Joreño nana Pedro comecimo namatajano, Pedro naimacimo llote:

—Illaicomini, bie rafuena omoimo lloticue. <sup>9</sup> Tisitaitimie jilluana birui cocomo jicanotomoi. “¿Bue mona naimie jillode?” raillanona cocomo jicanotomoi. <sup>10</sup> Jesucristo uai diga jillode. Omoi buena uiñuana, ua nana judíuai comini buena uiñuana jitaidicue. Jesucristodi Nazaret imie. Naimiema jai coraidomoi; ia Jusiñamui naimiema jai jillotate. Ie

jira omoi uicomo Jesús muidona tísitaitimie jai benoconi naidaillana ciodomoi. <sup>11</sup> Omoi jofo finoraini isoidomoi. Omoi jitaiñede noficidi jiaie nofici baifemo jai jaide. Jesúsdi naie nofici isoide. Naimie rafuena omoi jitaiñena jira, naimiena meinetomoi. <sup>12</sup> Cai jeacinomona jiaimie caina jillotanide. Nana eniruemo ite cominimona jiaimie buna jaca jillotanide. Dama Jesús caina jillotarede —lote.

<sup>13</sup> Jaciruñeno marefodo llofuetiamaia. Nainomo itino iena cacajano, comecina facadimaci: “Abina uññoñediaamaia. Jamai bue isoidiaamaia”. Ie jira rajicaidimaci; iadedi Jesús llofueoicaigaiaamaia illana uñnotimaci. <sup>14</sup> Jilloitagamie iaamaia diga naidaillana cioidimaci. Ie jira naimaci uai iñede. <sup>15</sup> Naie rafuena siadollena, naie illaicomini iaamaia bai oredimaci. <sup>16</sup> Coninimo jicanotimaci:

—¿Niese naie iaamaia nibaíticai? Nana Jerusalémo itino iaamaia siño rafuena finuana jai fididimaci. Iena janonidicai. <sup>17</sup> Jiaie comini iena fidii raillano, Jesús rafuena iaamaia llofuana rairuiticai.

<sup>18</sup> Ie mei iaamaia naimaci dine dane uaidotimaci. Iaamaimo Jesús rafuena llofueñellena riire llotimaci. <sup>19</sup> Pedro iaamaia Juan diga naimaci uai ote:

—Ie rafuena coco llollena Jusiñamui jitaide. Omoi uaina coco ñnoia, Jusiñamui jitaila rafuena finoñeitico. Cocomo llono. ¿Bu uaina ñnoiticoco? ¿Jusiñamui? ¿Omoi? Cocomo iese llono. <sup>20</sup> Damaiaia coco ciua rafuena lloticoco. Damaiaia coco cacaja rafuena lloticoco —raite.

<sup>21</sup> Iaamaia jacinaitajamona, iaamaia jino oretatimaci. Iaamaia duere finoñedimaci, nainomo ite comini icirinañellena. Jusiñamuimo nana nainomo itinodi iobillacinona fecadimaci, tísitaitimie jai jillua jira. <sup>22</sup> Jai jillodimie mo cuarenta años baifemo ite. Siño uaido naimie jillua jira, comini iobidimaci.

*Naimacina Jusiñamui canollena, naimie mo jiacino*

<sup>23</sup> Iaamaia jino jailla mei, iaamaia nabaiñia dine jaidiaamaia. Illaicomini iaamaia mo llua llotiaamaia. <sup>24</sup> Naimaci iena cacajano, Jusiñamuimo damie llua isoi jiidimaci:

—Ore Moo, mona finodio. Eniruena finodio. Monailaina finodio. Nana naiemo ite rana jai finodio. <sup>25</sup> Cai usuma David micorina raise uñnoticai. Naimiedi ona sedadimie. Naimiena bie rafuena o Joreño jiaie llotatajamona, naimie llote:

¿Bue ñellena Jusiñamui diga judiuañedino iciritimaci?

¿Bue ñellena Jusiñamuimo comini tainomo comeciaina facadimaci?

<sup>26</sup> Illaicomini ofidimaci, Jusiñamui diga fuirillena.

Jusiñamui facaisena iñedimaci.

Cristo facaisena jai iñedimaci

llote. <sup>27</sup> Naie rafue birui bene suide. Bie nairaimo Herodedi, Poncio Pilato diga, judiuañedino diga, judiua comini diga, ofide. O mare Jito Jesús facaisena iñedimaci. Naimacimo o oretagamie facaisena iñedimaci. <sup>28</sup> Naimaci ofillamona, nana o jitaille rafuedi, o jiaie lloga rafue diga, jai suide. <sup>29</sup> Nama naimaci jaciruitajacinona jai uñnotio. Cai comeciaina oculiñota, o rafuena jacitaiñeno cai lollesa. <sup>30</sup> Duidinona jilloita. O mare Jito Jesús uaido caina siño rafuena finota —jiidimaci.

<sup>31</sup> Jusiñamuimo jiacino fuilla meinoconi, naimaci ofiracodi jaidisite. Jusiñamui Joreño nagamiia comecimo namatade. Iemona Jusiñamui uai jacitaiñeno llocana jaidimaci.

*Creyentia damacina illa rafue*

<sup>32</sup> Nana creyentia damacina itimaci. Naimacimo rarui ia, dajena naimacimo duide.

<sup>33</sup> Naie facaise siño uaido naimie oretagano cai Nama Jesús jilluana llofueuidimaci. Iemona cominidi naimacina: “Mare” raitimaci. Nagarui Jusiñamui naimacina eo canode. <sup>34</sup> Naimaci dine buna buena jaca jitaiñedimaci. Ucube ollena, enirueredino imaci eniruena fecadimaci. Ucube ollena, joforedino imaci jofona fecadimaci. Ucubene atianona,

<sup>35</sup> Cristo oretaganomo fecadimaci. Ie mei dueredinomo imaci jitaila isoi fecaidimaci.

<sup>36</sup> Naimaci motomo José mameciredimie ite. Cristo oretagano jitaca mamecidi Bernabé. Ie mameci oni dobañuamona firadotimie. Naimie nairaidi levita. Naimiedi Chipre railla uiasi imie. <sup>37</sup> Jerusalémo naimie fecalle eniruedi ite. Iena fecajamona, ucube atiano, Cristo oretaganomo fecade.

## 5

*Ananías micori ie ai micori diga Jusiñamuina jifuia rafue*

<sup>1</sup> Naie facaise Ananías ie ai diga iaamaia eniruena jiaie fecade. Ie ai mamecidi Safira. <sup>2</sup> Naie iba naimie mo dabei fiebide. Ie ai iena uñnote. Atuedo atianona, Cristo oretaganomo fecade, “Nana ucube atidicue” raillanona. <sup>3</sup> Jusiñamui Joreño Pedrona naie rafuena uñnotajamona, Ananiamo Pedro jicanote:

—¿Niese Taife o comecimo namatade? Jusiñamui Joreño mo taino llotio, dabeie ucube omo fiebilla jira. <sup>4</sup> Enirue nia fecañenia, nia oie. Fecaja mei, naie ucubedi nia oie. ¿Bue ñellena o comecina marañeno facadio? Cominimo taino llotio. Jusiñamuimo tainona jiaie llotio.

<sup>5</sup> Ananias bie uaina cacajano ieconi fodaillamona oni caide. Nana iena ciodino eo jacinaitimaci. <sup>6</sup> Iemei nainomo ite conirueniaie naimiēna feridimaci. Jino uillano, raiafomo jonetimaci.

<sup>7</sup> Naie rafue daje amani horas illanona, naimie ai ie inimo suide rafuena uifñoñoeno bite.

<sup>8</sup> Pedro naiñaiñomo jicanote:

—¿Nie diese o fecaca o enirue? Cuemo llono.

Naiñaiño uai ote:

—Jii, ie diese coco fecaca.

<sup>9</sup> Pedro jicanote:

—¿Bue ñellena Jusiñamui Joreña jifuetomico? Ero, o ini raiafomo jonetino saisia jai nasemo cacade. Naimaci ona jiaie jino ja uitimaci.

<sup>10</sup> Naimie ecimo ieconi naiñaiño fodaillamona, oni caide. Conirueniaie fo billano, naiñaiño fodaillana ciodimaci. Jino uillano, ie ini abimo dafomo jonetimaci. <sup>11</sup> Iena fidiamona, nana creyetaie eo jacinaitimaci. Nana bie rafuena fididinodi jiaie eo jacinaitimaci.

*Cristo oretagano ailluena siño rafuena finodimaci*

<sup>12</sup> Comini motomo Cristo oretaganodi ailluena siño rafuena finoudimaci. Naie facaise nana naimacidi Jusiñamui jofomo Salomón micori finotaga jofu abi ibirimo ofisoidimaci. <sup>13</sup> Jiaie cominidi jaciruillanona, naimacina nabaiñedimaci; iadedi naimacina raite:

—Cristo oretagano fue eo mare.

<sup>14</sup> Jaciruitimaci; iadedi creyentiaina ailluena comini jaidimaci. Ailluena iñiaie, ailluena riñoniaie, diese creyentiaina jaidimaci. <sup>15</sup> Imaci biramo duidinona jonecaida, naisomo atidimaci. Pedro nainomo macarillano, o llota naimie joreño naimacimo ibaillamona, “jillobiticaie” raillano, atidimaci. <sup>16</sup> Jerusalémo ie fuemo ite nairaiaimona comini biadedi, duidinona jiaie atidimaci. Janaba anamo ite cominina jiaie atidimaci. Nana jillodimaci. Ie isoi Cristo oretagano siño rafuena finoudimaci.

*Cristo oretagano duere sefuilla rafue*

<sup>17</sup> Cristo oretagano finoca rafueri Jusiñamui diga nanoca ñairaima eo uradoide. Nana naimie dibeimo itino jiaie eo uradoidimaci. Saduceuai railla cominimo duidimaci. <sup>18</sup> Eo uradoillamona, Cristo oretaganona gaitajano, cárcelmo jonetimaci. <sup>19</sup> Naiona Jusiñamui jaienicidi cárcel nasena econote. Cristo oretagano jino atiano, naimacina raite:

<sup>20</sup> —Jusiñamui jofomo mai abido jai. Cominimo Jusiñamui dine naimaci ille rafuena llono.

<sup>21</sup> Iena cacajano, monaidemo, Jusiñamui jofomo jaillano, llofuetimaci. Ie facaiseconi Jusiñamui diga nanoca ñairaima, ie comini diga billano, danomo ofillena illaicominina uaidote. Cárcelmo policiaiaina oretate, Cristo oretaganona atillena. <sup>22</sup> Cárcelmo jaidemo, naimacina cioiñedimaci. Abido billanona, llotimaci:

<sup>23</sup> —Cárcel ie nase jaca ibaicana ciodicai. Raie llaveca. Nase fuemo jaca soldadaui itimaci; iadedi econoticaimo, jaca buna cioiñedicai.

<sup>24</sup> Jusiñamui jofu nanoca sedaraima, Jusiñamui diga ñairaini diga, bie lluaana cacajano, uainicaidimaci. Comecina facadimaci: “¿Nie isoide rafue naimacimo jai suide?”

<sup>25</sup> Iemo damie billanona, naimacina raite:

—Cárcelmo jonega cominidi Jusiñamui jofomo jai itimaci. Cominina jai llofuetimaci.

<sup>26</sup> Iena cacajano, Jusiñamui jofu nanoca sedaraima ie policiaie diga jibuisaide. Cristo oretaganona atide. Fecuisse atide, comini dinena policiaiaina noticiaido fairinoi raillano. <sup>27</sup> Naimacina atiano, illaicomini motomo jonetimaci. Iemei Jusiñamui diga nanoca ñairaima naimacimo llote:

<sup>28</sup> —Omoimo Jesús rafuena llofuiana rairuidicai; iadedi nana Jerusalén cominina jai llofuetomoi. Iese omoi llofuecabilia, “Cai illaicomini Jesúsna meinetimaci” llotomoi.

<sup>29</sup> Pedrodi jiaie oretagano diga uai ote:

—Jesús rafuena cai llofuiana jai rairuidomoi; iadedi omoi llua baifemo Jusiñamuina iñoiacadicai. <sup>30</sup> Cai usumatiaie micoriaie Jusiñamuina sedauidimaci. Naie Jusiñamuidi Jesúsna jai jillotate. Jesúsna meinellena, cruzmo coraidomoi; ia Jesúsna omoi meinia mei, <sup>31</sup> Jusiñamuidi ie ecimo naimiēna jai itatate. Cai illaimana naimiēna jai itatate. Cai jilloitaraimana naimiēna jiaie jai itatate. Cai judúuai comini comeciaie iuai meidollena, naimaci jeacinuai dotallena, iese naimiēna itatate. <sup>32</sup> Bie rafuena llofuecabiticai. Jusiñamui Joreño uaido iena jiaie llofueticai. Jusiñamuina iñotonomo Jusiñamuidi ie Joreña jai fecade —raite.

<sup>33</sup> Iena cacajano, illaicomini eo iciritimaci. Cristo oretaganona meineiacadimaci; <sup>34</sup> ia ieconi illaicomini motomo damie naidaide. Naimie mameci Gamaliel. Moisés micori

llogacinona uuiucaide. Nana cominidi naimie uaina ñnotimaci. Cristo oretaganona dallu bai oni oretajanona, naimie llote:

<sup>35</sup> —Caimaci, omoi bie cominimo omoi finolle rafuemo comeciaina raise faca. <sup>36</sup> Jai Teudas micori illaimana jaiacade. “Jai uaina baitimedicue” raillano, naimie dibeimo cuatrocientos iñiaí jaidimaci. Iemei naimie fiodaite. Naimie micori dibeimo itinodi oni tuusite. Jai naie rafuedi jaca ieconi duide. <sup>37</sup> Naimie micori illa mei, comini mameciaina cuiana gobernador llua facaise, Galileo ie Judas micoridi jobairiacade. Jiaie comini naimie dibeimo illena fuemo faite. Naimie jiai fiodaite. Naimie micori dibeimo itino oni tuusite. <sup>38</sup> Ie jira ja omoimo lloiticue: Bie cominina faionocai. Jamai cominimona naimaci llogacino iade, jamai cominimona naimaci finuacino iade, ieconi duite. <sup>39</sup> Jusiñamuimona bie rafue ia, jaca niese nibaiñeitomoi. Jusiñamuimona bie rafue ia, Jusiñamui diga omoi rafuedi iite.

Naimaci naimie lluana feiñuano, <sup>40</sup> Cristo oretagano fo atiano, naimacina fatimaci. Naimaci Jesús rafuena llofuiana eo rairuide. Ie mei jino imacina oredimaci; <sup>41</sup> iadedi illaicomini illanomona Cristo oretagano caimare jaidimaci. “Jesús dibeimo cai illa jira, caina duere finodimaci” raillano, caimare jaidimaci. Jusiñamui naie facaise naimacina riidoñena jira, jiai caimare itimaci. <sup>42</sup> Jusiñamui jofomo nagarui Jesucristo rafuena llofuetimaci. Comini jofuemo nagarui jiai llofuetimaci. “Jesúdi cai Jilloitaraima” llofueuidimaci.

## 6

### *Creyentiaina canollena, siete digamie diáconuaina illena, fetua rafue*

<sup>1</sup> Naie facaise ailluena comini creyentiaina jaidimaci. Uradoillamona griego uaido ñaite comini dinena, judíuai uaido ñaite cominina jeare ñaitimaci. Grieguai feciñuai judíuai feciñuai isoi nagarui rana feiñoñena jira, jeare ñaitimaci. <sup>2</sup> Ie jira naie doce oretaganodi creyentiaí danomo ofillena, nana naimacina uaidotimaci. Naimacimo llotimaci:

—Jusiñamui uaina llollena, ra fecalle diga, abi juanide. Jusiñamui uaina llofuiana cai faionocaiadedi, marañede. Ra jamai cai fecaiadedi, jiai marañede. <sup>3</sup> Ie jira, amatiaí, omoimona siete digamiena fetu. Inoganona fetu. Jusiñamui Joreño nana comecimo namatadinona fetu. Eo abi uiñotinona fetu. Ie isoide iñiaína fetu. Bie ra fecarainina maijítimaci. <sup>4</sup> Ie mei cai abi juarenite, Jusiñamuimo cai jüllena, Jusiñamui uaina cai llofuellena.

<sup>5</sup> Nana cominidi:

—Jee —raitimaci. Esteban micorina fetodimaci. Naimie Jusiñamuina eo ñnote. Jusiñamui Joreño nana naimie comecimo namatade. Jiai fetodimaci: Felipe, Prócoro, Nicanor, Timón, Parmenas, Nicolás. Nicolási Antioquía nairai imie. Judíuai comini isoi naimiedi Jusiñamuina ñnote. <sup>6</sup> Fetua mei, oretagano dine atidimaci. Jusiñamuimo oretagano jia mei, fetocanomo imaci onolli jonetimaci, Jusiñamui naimacina marena itatallena.

<sup>7</sup> Naie facaise Jusiñamui uaidi cominido uiñotacana jaide. Jerusalémo ailluena comini creyentiaina jaidimaci. Jusiñamui diga ñairainimona creyentiaina ailluena jiai jaisite.

### *Esteban micori ie rafue*

<sup>8</sup> Esteban micori fue eo mare. Jusiñamui Joreño naimiena namatajamona, naimie uai eo siño. Comini motomo ailluena siño rafuena finouide. <sup>9</sup> Naie facaise daje judíuai comini ofiracomona damierie Esteban micori dine bitimaci. Patrón anamona jillobidinomo naie ofiraco jainaiade. Naimaci diga damierie Cirene nairai imaci bitimaci. Damierie Alejandría nairai imaci danomo jiai bitimaci. Cilicia nairai imaci jiai bitimaci. Asia nairai imaci jiai bitimaci. Esteban conini uaina uaitatimaci; <sup>10</sup> iadedi naimaci uaitalle uaidi iñede. Naimacimo Esteban uai isoiduaidi iñede. Jusiñamuimona ie uaina ua jira, Esteban abina uiñuano ñaite. <sup>11</sup> Ie jira jiaie cominimo bainino ibajano, naimiena llogidotadimaci. Raitimaci:

—Esteban Moisés micori jinafomo jeare ñaiana cacadicaí. Naimiedi Jusiñamui jinafomo jeare ñaiana jiai cacadicaí.

<sup>12</sup> Iese lluamona, comini comeciaina feidocana jaidimaci. Illaicomini comeciaina feidocana jiai jaidimaci. Esteban dine billanona, naimiena gaitadimaci. Naie rafuena siadollena, naimaci ofiracomomo naimie micorina uitimaci. <sup>13</sup> Tainona llogidotinona jiai atidimaci. Lotimaci:

—Bimiedi Jusiñamui jofona jeare ñaicabite. Bimiedi Moisés micori llogacino jinafomo jiai jeare ñaicabite. <sup>14</sup> Naimiedi Jesús bie jofona judaillena llote. Moisés micori caimo llogafuiai faionocaillena jiai llote. Iena cacadicaí.

<sup>15</sup> Iemo nana illaicomini naimiemo eruaidimacimo, naimie uieco Jusiñamui jaienici isoi eruaide.

## 7

*Esteban micori abi riidua rafue*

<sup>1</sup> Jusiñamui diga nanoca ñairaima Esteban micorimo jicanote:

—¿Ua ie isoi naimaci llucacino ite?

<sup>2</sup> Naimie uai ote:

—Caimaci, cacarei. Cai jaiagaimona cai fueollena, naimaci micoriaina lloiticue. Jusiñamui maremiena jira, naimiedi cai eirue jitomo jaie bairede. Cai eirue jitodi Abraham micori. Mesopotamiamo naimie micori ñia ia, Harámo naimie micori ñia jaiñenia, Jusiñamuidi naimie micorimo bairiano <sup>3</sup> llote: “O eniruemona mai jai. O cominimona mai jai. Omo cue acatalle eniruemo jaitio”. <sup>4</sup> Ie jira Caldea railla eniruemona naimie micori jaide. Harámo rillanona, diga iruillaí nainomo ite. Naimie moo micori fiodailla mei, omoí birui illa eniruemo Jusiñamui naimie micorina oretate. <sup>5</sup> Nainomo rillanona, Jusiñamuidi naie enirue naimie micorimo fecañede. Ua janore jisa fecañede; iadedi: “Omo iena ico fecajitícue” raite. “O uruiamo fecajitícue” jiai llote; iadedi naie facaise Abraham micori uruenide. <sup>6</sup> Jusiñamui jiai llote: “O uruiái jiaie comini eniruemo jaiñitímaci. Egiptomo jaiñitímaci. Naimacina duere finoitímaci. Cuatrocientos años llegi cacajitímaci. <sup>7</sup> Naimacina majitáite nairaina duere finoitícue. Ie mei o uruiái naie eniruemona biitímaci. Bie illanomo guillena baiñedímaci. “O uruiái jiaie comini eniruemo jaiñitímaci. Egiptomo jaiñitímaci. Naimacina duere finoitímaci. Cuatrocientos años llegi cacajitímaci. <sup>7</sup> Naimacina majitáite nairaina duere finoitícue. Ie mei o uruiái naie eniruemona biitímaci. Bie illanomo guillena baiñedímaci. “O uruiái jiaie comini eniruemo jaiñitímaci. Egiptomo jaiñitímaci. Naimacina duere finoitímaci. Cuatrocientos años llegi cacajitímaci. <sup>7</sup> Naimacina majitáite nairaina duere finoitícue. Ie mei o uruiái naie eniruemona biitímaci. Bie illanomo guillena baiñedímaci. <sup>8</sup> Ie cominina naimaci jaillena, Jusiñamui Abraham micorimo isaiaí diese abina diana llote. Ie facaise Abraham micori Isaac micorina comuitate. Ie jeiciamona ocho digarui illamona, Abraham micori naimie micorina dete. Isaac micori Jacob micorina comuitate. Jacob micori doce uruiaina comuitate. Naimaci micoriaina cai doce diga nairai comuidímaci.

<sup>9</sup> Caimaci, José micorina Jacob micori uruiái micoriái uradoillamona, Egipto cominimo naimiena fecadímaci; <sup>10</sup> iadedi Jusiñamui naimiena eo sedade. Ie llegi ie cacajamona naimiena jillotate. Naimiemo uiñoracinona fecade. Ie jira Faraón micori naimiena jiai gaide. Faraón micoridi Egipto illaíma. Ie muidona Faraón Joséna fetode, nana Egiptomo itinona sedallena. Ie jofona jiai sedatate. <sup>11</sup> Naie facaiseconi nana Egipto comini aime guitímaci. Canaámo Jacob micori illanona, nana nainomo itino diga aime jiai guite. Eo duere sefuidímaci. Cai usumatiaí micoriái naimaci illanomo guillena baiñedímaci. <sup>12</sup> Egiptomo guille illana Jacob micori fidiano, guille ollena, nano facaise ie uruiái micorina nainomo oretate. <sup>13</sup> Ie mei José ie amatiaína naimiena uiñotate. Faraóni José comini illana fidide. <sup>14</sup> Ie jira Josédi ie mooná uaidote. Nana ie cominina uaidote. Setenta y cinco digamie ite. <sup>15</sup> Ie jira Egiptomo Jacob micori jaide. Nainomo fiodaite. Ie uruiái micoriái nainomo jiai fiodaitímaci. <sup>16</sup> Siquem railla nairai illanomo naimaci comini naimaci micoriaina uillano, nofici ie raiafomo jonetímaci. Siquemmo Abraham micori naifona Emmor uruiái micoriaina jaie ibade.

<sup>17</sup> Caimaci, Jusiñamui Abraham micorimo lloga rafue suille iaírei illa facaiseconi, Egiptomo cai cominidi eo jebuidímaci. Abraham micorimo: “Egiptomona o uruiái biitímaci” Jusiñamui jaie llote. <sup>18</sup> Naie facaise jiaie illaíma Egiptona sedade. José micorina uiñoñede. <sup>19</sup> Ie jira cai cominina jifuiano majitáuide. Uruiái fiodaillena, naimacina imaci uruiaina faínonocaitate. <sup>20</sup> Ie facaiseconi Moisés micori jeiciga. Jusiñamuimona naimie micori eo ebire eruáide. Ie moo jofomo daje amani fivui ite. <sup>21</sup> Ie mei naimiedi faínonocaiga. Faraón jisa micoridi naimie micorina uanona, naiñaiño jito isoi naimie micorina uiuicaide. <sup>22</sup> Naimie micori nana Egipto comini uiñuacinona fueote. Illaíma uai isoi naimie uaidi ite. Eo abina uiñotímie.

<sup>23</sup> Caimaci, naimie micori cuarenta años illa facai, ie comini dine ie jaillemo ie comechina facade. Naimie cominidi cai judíuai comini. <sup>24</sup> Egipto imiemona damie llegi cacajana ciuano, naimiena riidote. Riidianona, Moisés micoridi Egipto imiena meinete. <sup>25</sup> Moisés micori comechina facade: “Cue muidona Egiptomona Jusiñamuidi cue cominina oretáite”. “Cue comini buena uiñotímaci” raillanona comechina facade; ie iadedi iena uiñoñedímaci. <sup>26</sup> Ie arediruido Moisés micoridi mena come iaímaíai fuirillana ciode. Iaímaíaina marena itataiacade. Raite: “¿Bue ñellena cominana duere finoacadomico? ¿Bue ñellena o come diga fuiridomico?” <sup>27</sup> Duere finoacadimie naimiena oni ñuitade. Jicanote: “¿Bu odi cai illaimana jonegao? ¿Bu caímo ona llotatate juez isoi?” <sup>28</sup> ¿Na are Egipto imie o meinia isoi cuena jiai meineiacadio?” <sup>29</sup> Iena cacajano, come fajana naimie llinua jira, jacinaillanona, Moisés micori aiside. Madián railla eniruemo jamai ua illafuena ite. Dinomo ie aina ua mei, nainomo mena jítona comuitate.

<sup>30</sup> Caimaci, cuarenta años illa mei, jofue iñenanomo Moisés micori illanona, Jusiñamui jaienicí naimie micorimo bairede. Sinaí railla anedu ianori ite. Amena boua isoi amenamo bairede. Naie boode amenadi fuiñede. <sup>31</sup> Iena ciuano, Moisés micori raíjicaide. Naie iaíreise naimie micori jibuisaidemo, naimiemo Jusiñamui llote: <sup>32</sup> “O usumatiaí imaci

Jusiñamuidicue. Abraham, Isaac, Jacob, imaci Jusiñamuidicue” lloste. Jacinaillamona Moisés micorí abi docaide. Jaciruillanona, erodañede. <sup>33</sup> Jusiñamui naimiena raite: “Jamai bue o isoilla jira, o zapatona duiño. Benomo cue illa jira, o naidailanodi eo mareno. <sup>34</sup> Egiptomo cue comini llegi cacajana raise ciodicue. Naimaci duere sefuillana uiñoticue. Ie jira omo bairedicue, naimacina Egiptomona jilloitallena. Mai jai. Egiptomo ona oretaiticue” lloste; <sup>35</sup> iadedi comini dinena Moisés micorina jaie jitaiñenamona, naimiena raitimaci: “¿Bu illaimana odi jonegao? ¿Bu o juezna jonegao?” Comini dinena naimiena jitaiñedimaci; iadedi Jusiñamui naimiena illaimana itatate. Naimiena Egiptomona cominina jilloitaraimana jiai itatate. <sup>36</sup> Egiptomona Moisés naimacina atide. Egiptomo nia ia, diga siño rafuena finode. Jiairede monailai fuemo naimaci rillanona, siño rafuena jiai finode. Jofue iñenanomo cuarenta años siño rafuena finocana jaide.

<sup>37</sup> Caimaci, Moisés micoridi cai judíuai cominimo lloste: “Omoimona Jusiñamuidi damiena ie rafue lloraimana ico oretaiticue, naimie cuena oretaja isoi”. <sup>38</sup> Jofue iñenanomo naimaci ia, Moisés Jusiñamui jaienici diga anedumo ñaite. Anedu mamecidi Sinaí. Iemei cai usumatiai micoríai diga naie jaienici facaina Moisés ñaite. Caimo fecallena, naimiedi cominina itatate uaina feiñote; <sup>39</sup> iadedi cai usumatiai micoríai naimiena iñoicaiñedimaci. Naimiena jitaiñedimaci. Egiptomo abido jaillemo naimaci comeci facadimaci. <sup>40</sup> Ie jira comini dinena Aarón micorimo llotimaci: “Egipto eniruemona Moisés caina atide; iadedi naimie cai diga illana ja uiñoñedicaí. Cai facaina Jusiñamuina eruai de jiraraina fino, Egiptomo abido caina ifollena”. <sup>41</sup> Iemo jurareta urue joreñoña finodimaci. Iena sedallena, faga toica ocainaiaina fecadimaci. Naimaci finoca rafueri eo caimataidimaci. <sup>42</sup> Ie jira Jusiñamui naimacimona oni jaillanona, naimacina fañonocaidi. Iemona jitomona sedauidimaci. Fivuina jiai sedauidimaci. Ucuaina jiai sedauidimaci. Jusiñamui rafue lloraima ie rabenicomo buena jaie iese cuega:

Jusiñamui lloste: “Judíuai imaci, cuarenta años jofue iñenanomo omoi ia, cuemo omoi faga toica ocainaiái fecañedomoi;

<sup>43</sup> iadedi cuemo omoi comeciaina facañeno Moloc railla jiraraina sedadomoi.

Refán railla ucuduna jiai sedadomoi.

Naimacina sedallena, jiraraina finodomoi.

Ie jira Babilonia nairai baifemo omoína oretaiticue”

cuega. Naie facaise cai usumatiai micoríai Jusiñamuina jitaiñedimaci.

<sup>44</sup> Caimaci, bie rafuena cai fueollena, cai usumatiai micoríai motomo Jusiñamui illana lloiticue. Jofue iñenanomo cai usumatiai micoríai motomo daje jofo aillocona nitimaci. Nainomo Jusiñamuina sedallena, Jusiñamui Moisés micorimo acataja isoi, iena nitimaci. Jusiñamui jaie cuega noticidi naicomo eenoga. <sup>45</sup> Josué diga bie eniruemona naimaci billa facaise, cai usumatiai micoríai naicono atidimaci. Bie enirue jiaie nairaiaimo jainaiaide; iadedi Jusiñamui naie nairaiaina dotajano, cai usumatiai naie eniruena baírodimaci. Naico nainomo ite David micorí facaiseconí. <sup>46</sup> Jusiñamui David micorina eo canode. Ie jira David micoridi cai usuma Jacob micorí ie Jusiñamui jofona finollena jicaneote; <sup>47</sup> ia Salomón micoridi jofona Jusiñamui iena finode; <sup>48</sup> iadedi Jusiñamuidi iima finoca jofomo i-iñede. Jusiñamui facaina lloraima micoridi Jusiñamuina iese cuete:

<sup>49-50</sup> Cai Nama raite: “Monamo cue illamona, nana comini cue anamo itimaci.

Jafaici oticuedena, naga rana cue finua jira, nainomo cuena omoi sedallena, nie isoide jofona omoi finuana jitaiñedicue” raite.

<sup>51</sup> Ero, omoi comeci jiairede. Omoi comeci iñoñede. Jefonidomoi isoidomoi. Ie jira Jusiñamui Joreño anamo icaiñedomoi. Omoi usumatiai micoríai isoi itomoi. <sup>52</sup> Omoi usumatiai micoríai nana Jusiñamui rafue lloraima micoríaina duere finodimaci. Mareuidimie billena llotinona meinetimaci. Mareuidimiena gaitatatomoi. Naimiena jai meinetomoi. Jesúna ñaiticue. <sup>53</sup> Jusiñamui jaieniciaimona Moisés micorí llogacinona feiñotomoi; iadedi iena iñoñedomoi.

#### *Judíuai Esteban micorina meinia rafue*

<sup>54</sup> Esteban llofuiana naimaci cacajano, eo iciritimaci. Icirillamona, isiduai muru-muru raite. <sup>55</sup> Jusiñamui Joreño nana Esteban micorí comecimo namatajamona, monamo eruailano, naimiedi Jusiñamui ebirenana ciode. Naimiedi Jusiñamui nabeimo Jesús naidailana ciode. <sup>56</sup> Raite:

—Mona ecuaillana ciodicue. Jusiñamui Jito Jusiñamui nabeimo naidailana ciodicue.

<sup>57</sup> Esteban lluana cacajano, jefo oroisite. Eo cuirillano, naimie dine aisicaidimaci. <sup>58</sup> Jerusalémona naimiena jino dotadimaci. Naimacimo ite emodomo itiroina duiñuanona, Saulo railla conirue ecimo iñiroina joneside. Iemei Estebana noticido fairinoside. <sup>59</sup> Estebana notici diga fairinuano, Estebadi Jusiñamuimo ado jide:

—Cue Nama Jesús, cue joreño feiño.

<sup>60</sup> Ieconí caíñici ifodo raínadacaida ado júde:

—Naimaci bie jeacino finua muidona, ibana ofeno.

Iese naimie júa mei, fiodaite.

## 8

### *Saulo creyentiaína duere finua rafue*

<sup>1-2</sup> Saulo dinena Esteban meiniana júi jitaide. Cristo rafuena eo inotimona damerie Esteban micori raiafomo jonetimaci. Eiamona naimacimo uillinoci eo ite. Nairui Jerusalémo ite creyentiaí duere sefuilla facaiseconi tainede. Nana comini tuficaida jaidimaci. Judea railla eniruemo jaidimaci. Jáinodi Samaria railla eniruemo jaidimaci; iadedi Cristo oretagano nine jaíñedimaci. <sup>3</sup> Ie facaiseconi Saulodi creyentiaína eo duere finode. Diga jofomo jamai jaillano, iñiaína gaitade, cárcelmo jonellena. Riñoniaína júi gaitade.

### *Felipe Samariamo illa rafue*

<sup>4</sup> Tuficaida jaidino naga illanomo Jesús rafuena llocana uitimaci. <sup>5</sup> Samariamo Felipedi daje nairaimo jaide. Nainomo Cristo rafuena llofueuide. <sup>6</sup> Ailluena cominidi Felipe llofuiana eo raise feiñotimaci, naimie siño rafuena finua jira. <sup>7</sup> Felipedi diga jananiaí anamo ite cominimona jananiaína oretate. Riire cuiriollano, jaidimaci. Ailluena tsitaitinona jillotate. Ailluena ñuja-ñujacaidinona júi jillotate. <sup>8</sup> Ie jira naie nairaimo ite comini eo ibidimaci.

<sup>9</sup> Naie nairaimo Simóna mameciredimie ite. Naimie siño rafuena finouide. Iemona Samaria cominina rajicaitade. Naimie raite:

—Siñomiedicue.

<sup>10</sup> Nana comini naimiena inotimaci. Abina uiñoñedino inotimaci. Abina uiñotino júi inotimaci. Raitimaci:

—Naimie uaidi Jusiñamui ie. Naimiedi siño jito —raitimaci. <sup>11</sup> Iese naimacina are jifuate. Naimaci rajicaila jira, naimaci naimiena cacadimaci. <sup>12</sup> Ie mei Felipe Cristo ie mare rafuena llote. Naimie anamo naimaci illana Jusiñamui jitailla jira, Jusiñamui dibeimo naimaci comeciá iuaina meiduana llote. Naimaci Felipe llofuiana inotimaci. Inuamona, Felipe naimacina bautizade. fiñiaína bautizade. Riñoniaína júi bautizade.

<sup>13</sup> —Júí inoticue —Simónidi raite. Naimie bautizaja mei, Felipe diga jaiioicaide. Felipedi diga siño rafuena finua jira, Simón naiena cuano, rajicade.

<sup>14</sup> Jerusalémo ite Cristo oretaganodi, Samaria comini Jusiñamui uaina feiñuana cacajano, Pedro, iaímaiaí Juan diga, batine oredimaci. <sup>15</sup> Iaímaiaí rillano, naimaci Jusiñamui Joreñoa feiñollena Jusiñamuimo júdiaímaiaí, <sup>16</sup> naimacimo Jusiñamui Joreño nia iñena jira. Cai Nama Jesús facaina jai bautizadimaci; ia Jusiñamui Joreñoa nia feiñoñedimaci. <sup>17</sup> Ieconí iaímaiaí onollí naimacimo joniano, Jusiñamui Joreñoa feiñotimaci.

<sup>18</sup> Naimaci Jusiñamui Joreño feiñuana Simónidi cuano, ucubena iaímaiaímo fecacade. <sup>19</sup> Raite:

—Cuemo omico uaina ine, bumo cue onollina cue joniamona, naimie Jusiñamui Joreñoa feiñollena.

<sup>20</sup> Pedro dinena uai ote:

—O ucube diga o faífa. Ucube diga Jusiñamui fecaca uaina ibaacadio; iadedi Jusiñamui naiena jamai fecade. <sup>21</sup> Bie rafuedi omo dúñede. Jusiñamuimona o comeci nia maraiñede. <sup>22</sup> O comeci uai meido. Naimie o comecimo ite maraiñede facajacinuaina oni dotallena, cai Namamo jica. <sup>23</sup> Omo ailluena maraiñedicino illana uiñoticue. O comeci eo uradoide. Maraiñedicinona o comecimo namaredio.

<sup>24</sup> Simón uai ote:

—O llua cuemo suiñellena, o Nama diga cue facaina ñaino.

<sup>25</sup> Cristo rafuena iaímaiaí llua mei, Jerusalémo abido bitiaímaiaí. Abido billano, Samariamo diga comini illanuaimo Jesús ie mare rafuena llocana bitiaímaiaí.

### *Etiopía imie creyentena jailla rafue*

<sup>26</sup> Naie facaise Jusiñamui jaíenisaimona damie Felipemo llote:

—Beicido joide naído mai jai. Jerusalémona Gazamo joide naisona jai —llote. Naie naiso jofue iñenanodo joide. <sup>27</sup> Ie jira jaide. Jusiñamuina sedajamona, naie facaise Etiopía enirue imie Jerusalémona bite. Etiopía illaiño diga maijuide. Naiñaiño mamecidi Candace. Naimiedi nana naiñaiño gobierno ucubena sedade. <sup>28</sup> Naimie jai abido jaillano, ie carretamo raíta, Isaías micori cuega rabenicono ado facade. <sup>29</sup> Jusiñamui Joreño Felipemo llote:

—Naimie dine iaírei jai. Carreta dine jai.

<sup>30</sup> Naimie dine Felipedi aisicana jaillanona, rabe ado facajana cacade. Felipe dinena naimiemo jicanote:



—¿O facaca rabenicono uifñotio?

<sup>31</sup> Naimie uai ote:

—¿Niese uifñotitue, bu cuena canoñenia?

Felipemo jicante, naimie diga a jaillano danomo raillena.

<sup>32</sup> Naimie facaca cuégafue lese raite:

Toica llauda fallena uilla isoi, naimiena uitimaci.

Toica llauda itirai garedino dine eñena isoi, naimie ñañede.

Ie abina riidollena, uaina oñede.

<sup>33</sup> Marañede rafuena naimie finoñede; ia naimiena duere finodimaci.

Naimie uruai iñededí, ¿bu naimie rafuena lloite?

Meinia meinoconi, naimie jai iñede.

<sup>34</sup> Etiopía imie Felipemo jicante:

—¿Bie lloraima bu iena lloite? ¿Dama naimie iena lloite? ¿Jiaimiena iena lloite? Cuemo llono.

<sup>35</sup> Temei Felipedi bie cuégafuimona naimiemo Jesús ie mare rafuena lloite. <sup>36</sup> Naisona jaidiaimaiaimo, jinui illanomo ridiaimaia. Etiopía imie dinena raite:

—Ero, bie jinui itemo, ¿bue ñe cuedi bautizañellicue?

<sup>37</sup> Felipe uai ote:

—O comecimona o ñinoia, cuemona mare.

Naimie uai ote:

—Jesucristodi Jusiñamui Jitonana ñnoticue.

<sup>38</sup> Naimie ie carreta jorodate. Temei jinui dine jaidiaimaia. Felipedi naimiena bautizade. <sup>39</sup> Jinuimona iaimaia bia, Jusiñamui Joreño Felipena oni uite. Etiopía imie Felipena dane cioñede; iadedí Etiopía imie iobicana jaide. <sup>40</sup> Jusiñamui Joreño Azotomo Felipena uite. Cesarea dine naimie jaillanona, naga nairaiaimo Jesús ie mare rafuena llocana uite. Ie mei Cesareamo ride.

## 9

*Saulo creyentena jailla rafue  
(Hch 22.6-16; 26.12-18)*

<sup>1</sup> Naie facaise Saulo cai Nama Cristona ñnotinona eo duere finoacade. Icirillamona, naimacina meineiacade. Ie jira Jusiñamui diga nanoca ñairaima dine jaide. <sup>2</sup> Judíuai comini naie ñairaima anamo illamona, creyentiaina duere finollena, Saulo cartana naimiemo jicajaide. Damascómo ite judíuai ofiracuaimo dajerie cartana uiacade. Naie ofiracuái sedaraini naimie canollena jitaide. Jesucristona ñnotinona naimie baia, naimacina gaitañe; iadedí Jerusalémo atillena, naimiena canollena, cartana jitaide. Iñiaia baia, riñonia baia, naimacina Jerusalémo atiacade. <sup>3</sup> Cartana ua mei, naimie jaillano, Damascómo iaire ia, ieconí monamona damie naimie abina quetiñote. <sup>4</sup> Eniruemó naimie ana uaillano, monamona damie naimiemo lluaana cacade:

—Saulo, Saulo, ¿bue ñellena cuena duere finodio?

<sup>5</sup> Naimie uai ote:

—¿Budío?

Monamona damie raite:

—Jesúdicue. Cuena duere finodio. Iemona o abina duere finodio, riicallamona raise maiga jurareta suiñoacana isoi. Ie isoidio. Riicallamona, cuena duere finoacadio.

<sup>6</sup> Naidacái. Damascómo mai jai. Nainomo o finolle rafue omo lloiticue.

<sup>7</sup> Saulo diga jaidinodi ñañeño naidaidimaci. Naie uaina cacadimaci; iadedí buna cioñedimaci. <sup>8</sup> Ieconí Saulo naidacaide. Ie uisí ecoricallamona, erodatemo, jai buena cioñede. Ie onollina llinocaida, naimiena Damascómo uitimaci. <sup>9</sup> Darui amani cioñede. Jusiñamuimo comecina facajamona, guñede. Jiai jiroñede.

<sup>10</sup> Damascómo Ananíana mameciredimie ite. Naimiedi creyente. Iñiñenamona, Ananías nicairilla isoi cacaillena, Cristodi naimiemo rafuena lloite:

—Ananías.

Naimie uai ote:

—Jii, bene iticue.

<sup>11</sup> Cai Nama Cristo naimiemo lloite:

—Naidacái. Atona joide railla naisona jai. Judas ie jofomo jai. Naicómo Tarso ie Saulona jicano. Naimie cuemo jai jii. <sup>12</sup> Naimie damiena jai nicairite isoide. Ananíana mameciredimiena nicairite isoide. Ona nicairite isoide. Naimie dine o jaillena ona nicairite isoide. Naimiemo o onollí joniamona, naimie dane ciuana nicairite isoide.

<sup>13</sup> Ananías uai ote:

—Nama, diga cominimona naimiena fididicai. Jerusalémo naimiedi maraiñede rafuena ona ñnotinomo finode. <sup>14</sup> Jusiñamui diga nanoca ñairaima uai naimiemo ite, nana bene ite creyentiaina gaitallena.

<sup>15</sup> Cai Nama naimiemo llote:

—Mai. Naimie jai cue fetoca, judíuáiñedinomo cue rafuena lllollena, illaicominimo cuena lllollena, judíuái cominimo cue rafuena jiaí lllollena. <sup>16</sup> Cuena naimie jai ñnua muidona, naimie nie isoi llegi cacajite. Naimiemo iena lloiticue.

<sup>17</sup> Ie jira Ananías naie jofomo jaide. Ie onolli Saulomo joniano, raite:

—Saulo, jai cue amana jai itio. Naisomo cai Nama Jesús omo jai bairede. Naimie cuena o dine orede, dane o cioillena, Jusiñamui Joreño nana o comecimo namatallena.

<sup>18</sup> Ieconí Saulo uisimona lliciaí ico isoide ra uaide. Dane ciuana, naidaide. Ie mei jai bautizaga. <sup>19</sup> Ie mei jai guite. Dane maíride. Diga irui Damascómo ite creyentiaí diga naimie ite.

#### *Damascómo Saulo illa rafue*

<sup>20</sup> Judíuái ofiracómo naimie jaillanona, Jesús ie rafuena llofuete. “Jesúdi Jusiñamui Jito” raillanona llofuete.

<sup>21</sup> Nana naimiena cacadinodi rajicaide. Raitimaci:

—Bimie Jerusalémo Jesúsna ñnotinona duere finouide. Naimacina gaitallena, Jusiñamui diga nanoca ñairainimo uillena, naimie bene bite; ia Jesús díbeimo jai ite.

<sup>22</sup> Saulo nagarui jacitaiñeno llofuiamo fibioicaide. Llofueuide:

—Jesúdi cai Jilloitaraíma. —Naimie raise llofuía jira, judíuái dinena iena uaitanidimaci.

<sup>23</sup> Digarui illa mei, judíuái comeciaina facadimaci, naimiena meinellena. <sup>24</sup> Naimie aisii raillano, aremona ñairai nasiaina sedadimaci. Naíona nasiaina jiaí sedadimaci, naimiena meinellena; iadedi Saulo iena fidiano, <sup>25</sup> naíona creyentiaí naimiena oni uitimaci. Naimie jillobillena, llaigafó jinofebeimo cirigaimo rainajanona, naimiena ana ñuitadimaci.

#### *Jerusalémo Saulo illa rafue*

<sup>26</sup> Jerusalémo naimie jaide. Naimie ria, creyentiaina nabaicade; ia naimiena jaciruitimaci. Creyentena naimie jaillana ñnoñedimaci. <sup>27</sup> Ie jira Bernabé naimiena Cristo oretagano dine uillano, naimicómo naiso motomo Saulo cai Namana ciuana llote. Naiso motomo cai Nama Saulomo lluaña jiaí llote. Damascómo naimie ia, Jesúsna jacitaiñeno llofuiana jiaí llote. <sup>28</sup> Ie jira Saulona nabaidimaci. Jerusalémo jaisoillanona, cai Nama ie rafuena jacitaiñeno lloouide. <sup>29</sup> Iena cacajanona, griego uaina ñaite judíuái naimie llofuiana uaitatimaci. Naimiena meineiacadimaci. <sup>30</sup> Creyentiaí iena fidiano, Cesareamo Saulona uitimaci. Ie mei Tarsómo naimiena oredimaci.

<sup>31</sup> Judeamo, Galileamo, Samariamo nana creyentiaí uri itimaci. Cai Namana ñnocana jaidimaci. Cai Namana jaciruoicaida jaidimaci. Jusiñamui Joreño naimiaci comeciaina eo ocuiñotade. Ailluena comini creyentiaina jaidimaci.

#### *Eneas jillua rafue*

<sup>32</sup> Naie facaise diga illanuaimo Pedro macarite. Lidamo ite creyentiaí dine ride. <sup>33</sup> Nainomo damie biiramo biidena ciode. Naimiedi Eneas. Ocho años tisitaillamona biide. <sup>34</sup> Naimiena ciuano, Pedro naimiemo llote:

—Eneas, Jesucristo ona jai jillotate. Mai naidacai. O biira ferí. —Ieconí naimiedi naidadate. <sup>35</sup> Nana Lidamo ite comini, nana Sarónmo ite comini diga, naimiena jilluana ciuana, creyentiaina jaidimaci.

#### *Fiodaillamona Dorcas jillua rafue*

<sup>36</sup> Jopemo Tabitana mamecirediñaiño ite. Griego uaimona oni dobaíñuamona naie mameci Dorcas. Naiñaiño creyente. Ailluena mare rafuena finouide. Ailluena duerede cominana canouide. <sup>37</sup> Naie facaise naiñaiño duicotaide. Ie mei fiodaite. Naimica einamaci finua isoi, ie nabaiñiaí naiñaiño abina jocodimaci. Iemei aneba ie cuartomo naiñaiñoña jonetimaci. <sup>38</sup> Lidamona Jope iaire ite. Pedro Lidamo creyentiaí illana fidiano, menamie naimie dine oredimaci. Iaimaína llotatimaci:

—Buena sedañeno cai dine raire bi.

<sup>39</sup> Ie jira Pedro naidacaida, naie iaimaiaí diga jaide. Naimie ria, aneba ie cuartomo naimiena uitimaci. Nana feciñuái Pedro ecimo eecana naidaidimaci. Dorcas finouiga iníroina naimiemo acatatimaci. <sup>40</sup> Dorcas finouiga rafuena Pedro fidiano, Pedro nana naimacina jino orede. Caiñici ifodo naimie raita, Jusiñamuimo jide. Abído dobaicaida, naiñaiño erodate. Raite:

—Tabita, mai rainaicaí.

Ieconí naiñaiño uisi oni erodate. Pedrona ciuano, a rainadate. <sup>41</sup> Naiñaiño onolli llinuanona, a naidanete. Ie mei Pedrodi feciñuaina, jiaie creyentiaí diga, uaidote, naiñaiño

jai cajenana naimaci cioillena. <sup>42</sup> Nana Jopemo ite comini naie rafuena fididimaci. Ie jira ailluena comini cai Namana inotimaci. <sup>43</sup> Jopemo Pedro diga irui Simón jofomo ite. Simón di ocaina igoina cuidoraíma.

## 10

### *Cornelio começi iuai meidua rafue*

<sup>1</sup> Cornelio raillamiedi Cesaremo ite. Naimiedi capitán. Italiamona bite soldaduai naimie anamo itimaci. <sup>2</sup> Naimiedi Jusiñamui llogacinodo jaide. Nana ie comini diga Jusiñamuina innote. Judíuai cominimo ailluena rana jamai fecauide. Jusiñamuimo jiuide. <sup>3</sup> Jitoma ana ia, naimiemo jai nicaírilla isoi ite. Naimiedi Jusiñamui jaienícina naimie dine billana ciode. Jaienícidi uaidote:

—Cornelio.

<sup>4</sup> Naimiena Cornelio jaciruoicaida eruaide. Jicanote:

—Nama, ¿buena jitaídio?

Naimie uai ote:

—Jusiñamui o jiacinuaina jai cacade. Jusiñamuidi duerede cominina o canuana jiai feitañede. <sup>5</sup> Mai, Jopemo damerie o mullaiaimona oreta, Simón raillamiena atillena. Naimie jiaie mamecidi Pedro. <sup>6</sup> Naimiedi igoí cuidoraíma jofomo ite. Naie cuidoraíma mamecidi Simón. Monailai fuemo naimie jofo ite.

<sup>7</sup> Jusiñamui jaienici jailla mei, Corneliodi ie mullaiaimona mena uaidote. Naimie anamo ite soldaduai mona damie jiai uaidote. Naie soldadodi Jusiñamuina jiai innote. <sup>8</sup> Nana naimiemo Jusiñamui jaienici luana naimacimo luua mei, Jopemo oretate. <sup>9</sup> Ie are naimaci jaillano, Jopemo ianori riacanano, jitoma naidai ia, jofo emodomo Pedro jaide, Jusiñamuimo jiaillena. <sup>10</sup> Naimie aimetaite. Guillacade. Guillena comini finodemo, naimiemo nicaírilla isoi ite. <sup>11</sup> Mona oni econuana ciode. Aillue sábana isoi, buena ana billana ciode. Eniruemo naga muiduedo maigado ana bite. <sup>12</sup> Naiemo jiaiforie eruaide ocainaiai ite. Diga eniruemo jorode raniai ite. Diga nuiciniai jiai ite. Nana Moisés micori fimaidoga rille radi ite. <sup>13</sup> Naimiedi monamona dame luana cacade:

—Pedro, naidacaida, fajano, buena rino.

<sup>14</sup> Pedro uai ote:

—Nama, dama ite. Moisés micori fimaidoga rille rana jaca riñedicue.

<sup>15</sup> Monamona damie luana dane cacade:

—Jusiñamui jai fimaidoñede. Ie jira iese lloñeno.

<sup>16</sup> Dacaiño amani iese suide. Ie mei naie radi monamo abido jaide.

<sup>17</sup> Pedro ie começina facade: “¿Niese illana ciodicue?” Ie daacaiño Cornelio oretagano bite. Simon illa jofo jicanuano, naie nasemo ride. <sup>18</sup> Simón Pedrona naie jofomo illana jicanotimaci. <sup>19</sup> Pedro ie nicaírillana isoidemo começina facajano, Jusiñamui Joreño naimiemo llote:

—Ero, daje amani iima ona jenode. <sup>20</sup> Naidacaida, ana jai. Naimaci diga buena sedañeno mai jai. O dine naimacina oredicue.

<sup>21</sup> Pedrodí comini dine ana jaide. Raite:

—Omoi jenocamedicue. ¿Bue ñiaíbitomoi billa?

<sup>22</sup> Uai otimaci:

—Cornelio raillamie anamo iticai. Cornelio Jusiñamui jaienici birui llote: “Pedro dine damierie oreta, naimiena o jofomo atillena. Jusiñamui rafuena raise cacallena, naimiena atí?” llote. Corneliodi capitán. Naimiedi mareuidimie. Jusiñamuina innotimie. Nana judíuai comini dinena naimiedi mareuidimie.

<sup>23</sup> Iena Pedro cajajano, naimie jofomo inillena naimacina fo uaidote. Ie are naimaci diga jaide. Damierie Jopemo ite creyentiai naimie diga jiai jaidimaci. <sup>24</sup> Ie are Cesaremo ridimaci. Cornelio naimaci billemo ocuride. Nana ie cominina jai uaidote. Ie nabaiñiai jiai jai uaidote. <sup>25</sup> Pedro fo jaia, Cornelio dinena naimiena uaidote. Pedro anamo bitadate, Jusiñamuimo fecaja isoi Pedromo iobillacinona fecallena. <sup>26</sup> Pedrodí naimiena a naidanete. Raite:

—Mai a naidada. Cue jiai jamai imadicue.

<sup>27</sup> Naimie diga ñaiano fo jaidiaimaiai. Ailluena comini ofillana ciode. <sup>28</sup> Naimacimo llote: —Moisés micori judío imie judiñedimie nabairillana rairuide. Iena uiñotomoi. Judiñedimie jofomo illana jiai rairuide. Ie areruido Jusiñamui nicaírilla isoidifueña cuemo acatate. Iemona jai fueoticue. Jiaie nairai diga cue nabairillena, Jusiñamuimona marenana jai uiñoticue. Jusiñamui omoína cue jearuillana jai jitaíñede. <sup>29</sup> Ie jira buena sedañeno biticue, cuena o uaidua jira. ¿Bue ñellena cuena uaidotomoi? Cuemo llono.

<sup>30</sup> Cornelio uai ote:

—Nairui nagaamagarui illa meinomo, bie hora cue jofomo Jusiñamuimo jiidicue. Ieconí Jusiñamui jaienicí cuemo bairede. Naimie iníroi quenirede. <sup>31</sup> Cuená raite: “Jusiñamui o jiana cacade. Naimiedi duerede cominina o canuana feitañede. <sup>32</sup> Ie jira Jopemo damieriena oreta, Simón Pedrona uaidollena. Jiaie Simón jofomo ite. Simón di goi cuidoraíma. Ie jofo monaillai fuemo ite”. <sup>33</sup> Iemona ona uaidoticue. O comeci marena jira, bene bitio. Jai nana bene iticai. Jusiñamui cai diga jiaie ite. Cai Nama nana omo lluaana cacareillena, bene iticai.

*Corneliomo Pedro llua rafue*

<sup>34</sup> Pedro uai ote:

—Jusiñamui nana comini naimie inuana jitaillana jai uifnoticue. <sup>35</sup> Naga nairaimona Jusiñamuidi cominina jai jitaide. Bu naimiena inoia, bu mare rafuedo jiaia, Jusiñamui naimiena jai jitaide. <sup>36</sup> Cai judíuái cominimo Jesucristo llua mona, Jusiñamui díbeimo cai illena jai uifnoticai. Iemona Jusiñamui diga cai uri illana jai jiaie uifnoticai. Jesúdi nana cai Nama. Bie rafuena navui janore fididomoi. <sup>37</sup> Nana Judeamo bie rafue llucana jai jaide. Juan micorí bautizajana llua mei, Galileamo Jesús naimie lloufuaana tainede. <sup>38</sup> Jusiñamuidi ie Joreñona Jesúmo fecade. Jesúdi Nazaret imie. Naimiemo ie uaina jiaie fecade. Ie jira Jesús mare rafuena finocana uite. Jusiñamui naimie diga illa jira, diga Taife anamo itinona jillotote. <sup>39</sup> Judíuái eníruemo nana naimie síño finoca rafuena ciodicai. Iena birui llocabiticai. Cruzmo jonianona, cai illaicomini naimiena meinetimaci; <sup>40</sup> iadedi darui amani illa mei, Jusiñamui naimiena jillotote. Jusiñamui jitailla jira, Jesús jillua mei, ailluena comini naimiena ciodimaci. Cajedimiena ciodimaci. Jiaie ciodicai. <sup>41</sup> Nana comini naimiena cioifnedimaci; iadedi Jusiñamui fetocano diese naimiena ciodimaci. Fiodaillamona naimie jillua mei, naimie diga guiticai. Naimie diga jamai jirodicai. Naimiena cai raise uifua jira, Jusiñamui caina fetode, naie rafuena llollena. <sup>42</sup> Cominimo bie rafuena lluaana caimo llote. Jusiñamui Jesúna jai fetode, naimiena inofnedinona duere finollena. Nia fiodaifnedinona duere finoite. Jai fiodaitinona jiaie duere finoite. Ie jira Jesús rafuena llucana jaidicai. <sup>43</sup> Jesús muidona naga naimiena inotimie ie maraifnedinodi Jusiñamui dotalle. Iena nana Jusiñamui facaina lloraini micoríai jiaie llotimaci.

*Judíuáiñedino Jusiñamui Joreñona feiñua rafue*

<sup>44</sup> Pedro biena nia llofueia, Jusiñamui Joreño nana bie rafuena cacadinomo bite. <sup>45</sup> Iena ciuana, Pedro diga bite creyentíai rajicaidimaci. Naimacidi judíuái comini. Judíuáiñede cominimo Jusiñamui ie Joreño jai fecaja jira, rajicaidimaci. <sup>46</sup> Jusiñamui Joreño naimacimo illamona, judíuáiñedinodi jiaie nairai uaillaido ñaitimaci. Naie ñaia uaillaina uifnoñedimaci. Jusiñamuimo iobillacinona jai fecadimaci. Pedro diga bitino iena cacajano, rajicaidimaci. Iemei Pedro raite:

<sup>47</sup> —Cai feiñua isoi, Jusiñamui Joreñona jiaie feiñotomoi. Omoi bautizallena jaca budi rairuifeite.

<sup>48</sup> Ie jira naimiedi naimaci Jesucristo facaina bautizallena llote. Bautizaja mei, naimaci diga fiebillana naimaci jitailla jira, diga irui nainomo fiebide.

## 11

*Jerusalémo Pedrodi naimiemo jai suide rafuena llote*

<sup>1</sup> Judeamo ite Cristo oretagano, jiaie creyentíai diga, judíuáiñede comini Jusiñamui uaina feiñuana fididimaci. <sup>2</sup> Pedro Jerusalémo abido ria, judíuái comini naimiena icidimaci. <sup>3</sup> Jicanotimaci:

—¿Bue ñellena judíuáiñedino jofomo jaidio? ¿Bue ñellena naimaci diga guitio?

<sup>4</sup> Pedro uai uanona, naimacimo naie rafuena nagacinuaina llote:

<sup>5</sup> —Jopemo navui cue ia, Jusiñamuimo cue jiaia, nicairilla isoi iticue. Aillue sábana isoi ana billana ciodicue. Monamona ana lloride, ie muiduai maiga diga. Cuemo ana ride. <sup>6</sup> Nainomo eruaidicue, diga rana ciodicue: ocainaiaina, eníruemo jorocana jaidinona, nuicinaiaina. Iena ciodicue. <sup>7</sup> Monamona damie cuemo lluaana cacadicue. Raite: “Pedro, naidacaillanona, fajanona, rino”. <sup>8</sup> Naie uai oticue: “Nama, dama ite. Moisés micorí fimaidoga rille rana jaca riñedicue”. <sup>9</sup> Monamona dane cuemo llote: “Jusiñamui iena jai fimaidoñede. Ie jira iese lloño”. <sup>10</sup> Dacaiño amani iese suide. Ie mei monamo nana abido dane jaide. <sup>11</sup> Ieconí daje amani iima cai illa jofomo ridimaci. Cesareamona cue dine damie naimacina orede. <sup>12</sup> Jusiñamui Joreñodi naimaci diga buena sedaño cue jaillena cuemo llote. Cue diga seis creyentíai jiaie jaidimaci. Cuená uaidotimie jofomo jaidicai. <sup>13</sup> Nainomo cai rilla mei, naimie ie jofomo Jusiñamui jaienicina navui ciuana caimo llote. Naie jaienicí naimiemo llote: “Jopemo cominina oreta, Simón Pedrona atillena. <sup>14</sup> O jitaillae rafuena omo lloite. Naie rafuena o cacajamona, jeacinomona jilloitio, nana o jofomo ite comini diga” llote. Ie jira naimie cuena uaidote. <sup>15</sup> Nainomo cue lloufia facaiseconi, nano dofoconi

caimo billa isoi, Jusiñamui Joreño naimacimo bite. <sup>16</sup> Iena cue ciuamona, cai Nama Jesús lloga uaina comeciticue. Naimie navui llote: “Juan micori rafuena comini feiñuamona, Juan naimacina bautizade; iadedi cue rafuena omoi feiñuamona, cue Moo ie Joreñoa birui feiñoitomo?” <sup>17</sup> Cai Nama Jesucristona cai ñnuamona, Jusiñamuidi ie Joreñoa caimo navui fecade. Naimacimo daje isoi birui fecademo, ¿ñiese Jusiñamui dibeimo ñeiticue?

<sup>18</sup> Iena Cristo oretagano cacajano, jai naimaci uaina uaitallicino ñede. Jusiñamuimo iobillacinona fecadimaci. Raitimaci:

—Naimaci jaca illena, Jusiñamuidi judiuañede comini comeciai iuai meiduana jai jitaide. Naimie dibeimo naimaci illana jai jitaide. Ie jira naimieri iobidicai.

#### *Antioquíamo ite creyentia illa rafue*

<sup>19</sup> Esteban micorina duere finua facaise, creyentia tuficaida jaidimaci. Feniciamo damierie jaidimaci. Chipremo damierie jiai jaidimaci. Antioquíamo damierie jiai jaidimaci. Dani judiua cominimo naimaci rafuena llotimaci; <sup>20</sup> iadedi tuficainomona jiaño Chipremona billanona, Cirenemona billanona, Antioquíamo rillano, judiuañedinomo cai Nama Jesús rafuena llotimaci. <sup>21</sup> Cristo uai naimacimo illamona, ailluena comini ñnotimaci. Cai Nama dibeimo jaidimaci. <sup>22</sup> Jerusalémo ite creyentia iena fidiano, Antioquíamo Bernabéna oretatimaci. <sup>23</sup> Naimie ria, naimaci marena illamona, naimiedi Jusiñamui naimacina duerullana uñote. Ie jira iobide. Imaci comeciai ocuiñocana ñnocana jaillana naimacimo llote. <sup>24</sup> Naimiedi maremie Jusiñamui Joreño nana naimie comecimo namatadimie. Jusiñamuina eo ñnotimie. Naie facaise ailluena comini creyentia jaidimaci.

<sup>25</sup> Ie mei Tarsomo Bernabé Saulona jenuaide. Naimiena baillanona, Antioquíamo naimiena uite. <sup>26</sup> Daje año creyentia diga nabairillanona, naimacina llofuetiaimaiai. Antioquíamo creyentiaidi cristianona nano mameciredimaci.

<sup>27</sup> Iemei Jerusalémona Antioquíamo damierie Jusiñamui rafuena lloraini bitimaci. <sup>28</sup> Naimacimona Agabo raillamie ite. Jusiñamui Joreñodi naimiena llotatate:

—Nana comini ico aime guitimaci. —Claudio illaimana illa facaiseconi iese jai suide. <sup>29</sup> Ie jira Antioquíamo ite creyentiaidi, Judeamo ite creyentiaimo, ucubena oretaiacadimaci. <sup>30</sup> Nagamiiai imacimo illa dierise ucubena oredimaci. Creyentiaina llofuerainimo Bernabé diga, iaimaiai Saulo diga, naie ucubena oredimaci.

## 12

### *Herodes Agripadi creyentiaina duere finua rafue*

<sup>1</sup> Naie facaise Herodes railla illaimadi creyentiaimona damieriena gaitatate, naimacina duere finollena. <sup>2</sup> Lloebi diga Jacobo cimaiona jaitatate. Jacobodi Juan ama. <sup>3</sup> Ieri judiua illaicomini iobidimaci. Iena uñuamona, Herodes Pedrona jiai gaitatate. <sup>4</sup> Naie facaiseconi judiua comini llomenico guilla rafue ite. Naimiena gaitatana, cárcelmo jonete. Soldaduaina orede, naimiena sedallena. Daje soldado Pedro nabeimo lloeo diga cuinaca. Daje soldado Pedro jarifebeimo lloeo diga cuinaca. Mena soldado naie cuarto ie nasena sedade. Ie isoi sedauidimaci. Naie llomenico guilla rafue fuilla mei, comini illa uicomo naimiena meineiacade. <sup>5</sup> Ie jira Pedro cárcelmo fiebide; iadedi creyentia naimie facaina eo juidimaci. <sup>6</sup> Herodes naimiena meineiacanarui naio Pedro soldaduai motomo ñide. Mena lloeo diga maiga. Soldaduai cárcel nasena jiai sedadimaci. <sup>7</sup> Ieconci cai Nama ie jaienicidi cárcelmo bairede. Cárcelmo lligaiñote. Naimiena casitallena, jaienicidi Pedro ciragina jetade. Raite:

—Raire naidacai.

Ie mei naimie onollimo ite lloeodi oni uaide. <sup>8</sup> Jaienicidi naimiena raite:

—O ñiroina jita. O zapatona jiai jita— Iena jitaja mei, naie jaienicidi dane raite—. O ñiroi o abimo ferino. Cue diga mai bi.

<sup>9</sup> Naie jaienicidi jinafona Pedro jino jaide. Pedrodi naie jaienicidi naimiemo finoca rafuena uññoñede.

—Nicañilla isoi comecina facadicue —raite. <sup>10</sup> Naga nasena sedade soldadomona jaide. Jino jaillena, nanoca nasemo ride. Nai nasedi lloema ie; iadedi nase dama ecoride. Jino jaidiaimaiai. Daje calle jaillanona, jaienicidi naimiena fainonacaide. <sup>11</sup> Iemona Pedro naimiemo suide rafuena jai uññoacaide. Raite:

—Cue Nama ie jaienicina uanañi oretate. Herodemonona cuena jillobitade. Judiuañi illaicomini cue meinellena cue sedajamona cuena jillobitade.

<sup>12</sup> Iena jai naimie uñuano, María jofomo jaide. Mariadi Juan Marcos ei. Jusiñamuimo jillena, naicomo ailluena comini ofidimaci. <sup>13</sup> Rillanona calle fuemo ite nasena tute. Daje mullaño bite. Naiñaño mamecidi Rode. <sup>14</sup> Naimie uaiduamona, naiñaño Pedro uaina uñnote. Iobilla jira, nase econoñede; iadedi abido fo aiseide. Pedro nasemo illana llote. <sup>15</sup> Raitimaci:

—Odi uairico isoidiosa.

Naiñaiñodi:

—Pedrodi jaca ieseuide —raite.

Uai uamona:

—Naimie joreño ite —raitimaci.

<sup>16</sup> Pedro nasena nia tua jira, nasena econuaibitimaci. Econuamona naimiena naimaci ciuamona, raijcaidimaci. <sup>17</sup> Fo jaillano, Pedro ie onolli jaidide, naimaci ll#caillena. Cárcelmona cai Nama naimiena jino ua rafuena lloste. Raite:

—Jacobomo iena llono. Jiaie creyentiaimo iena jiai llono.

Ie mei Pedro jino jaillano, jainomo jaide.

<sup>18</sup> Monaidemo, Pedro nainomo iñena jira, soldaduai raijcaillanona, siadotimaci.

<sup>19</sup> Herodes iena fidiano, naimiena jenotate. Naimiena baiñena, soldaduaimo jicanote. Baiñena jira, naimacina meinellena lloste. Iemei Judeamona Cesareamo Herodedi jaide.

#### *Herodes micori fiodailla rafue*

<sup>20</sup> Naie facaise Herodedi Tiro railla nairai diga, Sidón railla nairai diga, eo icirite. Naimaci uri ille rafuena siadollena, naimie dine bitimaci. Herodes ecimo maijidimiedi Blasto. Blasto diga naie cominidi nabairite, naimaci dibeimo naimie illena. Herodes eniruemona naimaci guille billa jira, uri illena naimiemo jicanote. <sup>21</sup> Naie cominina Herodes feiñollena, ie ebirede iniroina jitade. Naimacina feiñollena, ie rairabicimo raide. Iemona raita, rafuena are lloste. <sup>22</sup> Iena cacajano, comini ado cuiriidimaci:

—Jamai iimadi ñaiñena. ¡Jusiñamui ñaia!

<sup>23</sup> “Jusiñamuiñedicue” naimie raiñena jira, ieconi cai Nama jaienici naimiena iracotaitate. Jusiñamuimo iobillacino naimie fecañena jira, aiaí naimiena aite. Iemona naimiedi fiodaite.

<sup>24</sup> Naie facaiseconi Jusiñamui uai llocana jaide. Ailluena comini iena inotimaci.

<sup>25</sup> Iaimaiaí uiga ucube illanona, Bernabé, Saulo diga, Jerusalémona Antioquíamo abido bitiaimaiaí. Juan Marcos jiai atidiaimaiaí.

## 13

#### *Bernabéna, iaimaiaí Saulo diga, fetua rafue*

<sup>1</sup> Antioquíamo creyentiaí motomo Jusiñamui facaina lloraini itimaci. Llofueraíni jiai itimaci: Bernabé, Simón. Simóni jiaie mameci Negro. Lucio ite. Naimiedi Cirene imie. Manaén ite. Naimiedi Herodes ie amana mamede. Herodedi Galilea railla enirue gobernador. Saulo jiai ite. <sup>2</sup> Naimaci Jusiñamuina sedajamona, guñenaruillai ia, Jusiñamui Joreño naimacimo lloste:

—Bernabé iaimaiaí Saulo diga fetu, cuejena. Cue rafuena iaimaiaí llollena, iaimaiaína jai fetodicue.

<sup>3</sup> Jusiñamuimo naimaci jiaí mei, Jusiñamui iaimaiaína fetuana naimaci uñuamona, naimaci onolli iaimaiaimo jonía mei, iaimaiaína naimacimona oni oretatimaci.

#### *Pablo, iaimaiaí Bernabé diga, Chipremo illa rafue*

<sup>4</sup> Iaimaiaína Jusiñamui Joreño oretaja jira, Seleuciamo jaidiaimaiaí. Nainomona botedo Chipremo jaidiaimaiaí. Chipredi uiaí. <sup>5</sup> Chipremo ria, Salaminamo judiaí ofiracuaimo Jusiñamui uaina llofuetiaimaiaí. Juan Marcos iaimaiaí diga jiai jaide. <sup>6</sup> Nana naie uiasimo jaillanona, Pafos railla nairaimo ridimaci. Nainomo Barjesúna mameciredimiena baitimaci. Naimie judío imie. Naimiedi aima. Naimiedi diga siño rafuena finoraíma. “Jusiñamui rafuena lloticue” raité; iadedi taino lloraíma. <sup>7</sup> Gobernador diga majjuide. Gobernadori Sergio Paulo. Gobernadori abina uñotimie. Jusiñamui uaina cacacana jira, naimie Bernabé iaimaiaí Saulo diga uaidote. <sup>8</sup> Barjesús ie jiaie mamecidi Elimas. Naie iaimaiaí llofuiana uaitate. Gobernador inuana jitaiñede. <sup>9</sup> Saulodi jiaie mameci Pablo. Pablo dinena naimiena eo eruailano, Jusiñamui Joreño nana Pablo começimo namatajamona, <sup>10</sup> naimiemo lloste:

—¡Eo jifueraimadio! ¡Eo marañedio! ¡Tañe dibeimo itio! Nana mare rafue dibeimo iñedio. Cai Nama ie mare uanaicinsona do Bairaidodio. <sup>11</sup> Cai Nama ie uaido ona ja iracotaitaicue. Nano nigarui useredinona cioñeítio.

Ieconi naimie cioñede. Cominina jenuaide, ie onollido llinocaida ie uillena. <sup>12</sup> Iena ciuamona, gobernador creyentena jaide. Cai Nama Jesús rafue siñonana ciuanona, naimie jainaite.

#### *Jesús rafuena llocana jaidiaimaiaí*

<sup>13</sup> Pafomona botedo Pablo ie nabaiñiaí diga jaide. Perge railla nairaimo ride. Perge Panfilia railla eniruemo ite. Juan Marcos iaimaiaína fañonocaida, Jerusalémo abido jaide. <sup>14</sup> Pergemona Antioquíamo jaidiaimaiaí. Pisidia railla eniruemo Antioquíuía ite.

Sábadoruimo judúuai ofiracomo jaillano, ana raidiiaimaia. <sup>15</sup> Moisés micori cuegafuena facaja mei, Jusiñamui facaina lloraini micoriai cuegafuena facaja mei, judúuai ofiraco sedadino iaimaiaimo llotimaci:

—Caimaci, cominimo bue omico lloiacania, mai llono.

<sup>16</sup> Pablo naidadajano, ie onollina jaidide, comini llucaillena. Raite:

—Jusiñamuina sedallena bue itomoi. Omoimona damierie judúuaidomoi. Jiaino judúuaidomoi; iadedi judúuai isoi Jusiñamuina sedadomoi. Cue llamo mai cacarei.

<sup>17</sup> Iemona omoi fueollena, cai jaiagai rafuena lloiticue. Cai judúuai comini Jusiñamuina birui sedadica. Naimiedi cai jaiagaina jaie fetode. Egiptomo naimaci ia, naimacina eo jebuitate. Nainomona ie siño uai diga naimacina atide. <sup>18</sup> Jofue ifenanomo cuarenta años naimacina canode. <sup>19</sup> Canaán eniruemo siete nairaina cuenode. Cai jaiagaimo, naimaci uruijai diga, naie eniruena fecade, naimaci iena. <sup>20</sup> Cuatrocientos cincuenta años cai jaiagaina fetuamona, naie eniruena naimacimo fecade. Naie facaise Jusiñamuidi jueces fetode, cai jaiagaina naimaci canollena. Naimie dibeimo naimacina itatallena, Jusiñamui naie jueces fetode; iadedi Samuel micori illa facaise juecesna jai jitaifedimaci. Samuel micoridi Jusiñamui facaina lloraima. <sup>21</sup> Illaimana naimaci jitailla jira, Jusiñamui Saúl micorina fetode. Naimiedi Cis micori jito. Naimie micori nairaidi Benjamín. Cuarenta años Saúl micori cai usumatia micoriai sedade. <sup>22</sup> Naimie ifo meidollena, naimaci illaimana illena, Jusiñamui David micorina fetode. Naimiedi Isai micori jito. Jusiñamui naimie micorina llote: “Bimie eo cue comecido jaidimie. Nana cue jitailla rafuena finoite”. <sup>23</sup> Jusiñamui llua isoi, David micori uruaimona Jesúdi cai judúuai comini Jilloitaraimana jaide. <sup>24</sup> Jesús nia llofueñenia, Juan Bautista micori llofueidie. Juan micori cai cominimo llouide: “Omoi jeacinona fañonocaida, Jusiñamui dibeimo omoi comecia iuailai meido. Iena omoi meidoia, comini iena uiñotallena, mai omoi bautizallomoi”. <sup>25</sup> Juan micori ie llofuaia fuillamona, raite: “Omoi comeci facajamieñedicue. Cue ifomo jiaimiena meidoite. Naimie isoiñedicue. Jamai bue isoidicue. Jamai bue cue isoilia jira, naimiena cue canuana uiñofedicue”.

<sup>26</sup> Caimaci, cai eirue jito Abraham micorimona comuidicai. Jusiñamuina birui sedadica. Ie jira cai jeacinomona naimie jilloitalle rafue caimo duide. Jesúna ñaiticue. <sup>27</sup> Jerusalémo itinodi, cai illaicomini diga, Jesúna jaie meinetimaci. Naga sábadó Jusiñamui facaina lloraini micoriai cuegafuinaia facadimaci; iadedi iena raise cacaiñedimaci. Jesúna naimaci meiniamona, Jusiñamui lloraini micoriai cuegafuinaia jai suitatimaci. <sup>28</sup> Jesús marañede rafuena finoñede; iadedi naimiena meinetimaci. Pilatomo jicanotimaci, naimiena meinellena. <sup>29</sup> Nana Jusiñamui facaina lloraini micoriai cuegafuinaia suilla mei, cruzmona naimie ana uano, nofici ie raiafomo naimiena jonetimaci; <sup>30</sup> iadedi fiodaillamona Jusiñamui naimiena jillotate. <sup>31</sup> Galileamona Jerusalémo naimie diga jaidino naimiena diga icaiño ciodimaci. Iemei cominimo naimie rafuena jai llocabitimaci. <sup>32</sup> Jusiñamui cai jaiagaimo jaie lloga rafue jai suide. Iena omoimo ja lloiticoco. <sup>33</sup> Jusiñamuidi cai jaiagaimo llogafue birui jai suide. Jesúna cai dine jai orede. Naiena salmos dosmo cuega: “Jusiñamui llote: ‘Cue jitodio. Birui ona Jilloitaraimana itataticue’”. <sup>34</sup> Fiodaillamona Jusiñamui naimiena jai jillotate. Ie abi jaca rifañede. Iena Jusiñamui jiai raite: “Davidmo cue llogacimona omoi facaina jaca finojiticue”. <sup>35</sup> David micori jiaie salmomo iena cuete: “O mareuidimie jaca rifaiillana jitaifedio” raite. <sup>36</sup> Jusiñamui David micorina ñañede. Ie illa dinori David micoridi Jusiñamui jitailla rafuena finode. Ie mei naimie fiodaite. Ie raiafomo naimie comini naimiena jonetimaci. Ie mei David micori abi rifaide; <sup>37</sup> iadedi Jusiñamui jito abidi ie isoi rifañede.

<sup>38</sup> Caimaci, daje rafue omoimo lloiacadicue. Jesús fiodailla jira, Jusiñamui omoi jeacino oni dotaacade. Moisés micori llogacimodi omoi marañedicinomona omoina jillotate; <sup>39</sup> iadedi Jesúna birui omoi ñnoia, omoi jeacino anamona jilloitomoi. <sup>40</sup> Abina omoi rairui, Jusiñamui facaina lloraini micoriai jaie cuegafuinaia omoimo sui raillano. Jaie cuetimaci:

<sup>41</sup> Ero, Jusiñamui uaina jamaidomoi. Ieri rajicaidomoi; iadedi fañfidomoi. Omoi motomo siño mare rafuena birui finodicue. Bu omoimo iena iese lloia, bie rafuena ñnoñeitomoi. Ie isoi omoimo suiñellena, Jesúna birui omoi mai ñno.

<sup>42</sup> Ie mei Pablo llucacide. Iaimaiaia jino jaidemo, comini iaimaiaimo jicanotimaci, jiaie sábadoruimo bie rafuena naimacimo dane llollena. <sup>43</sup> Comini jino jailla mei, ailluena comini Pablo, iaimaiaia Bernabé diga, ñaicana jaidimaci. Judúuai iese jaidimaci. Judúuaidedino iese jiai jaidimaci. Naie judúuaidenodidi judúuai isoi Jusiñamuina ñnotimaci. Pablo, iaimaiaia Bernabé diga, ñaicana jaillanona, naimacimo llotiaimaiaia:

—Jusiñamui omoina duenaillana omoi jai uiñua jira, Jesús rafuena mai omoi ñno.

<sup>44</sup> Jiaie sábadoruimo ailluena comini ofidimaci, Jusiñamui uaina cacareillena. <sup>45</sup> Ailluena cominina ciuano, judúuai comini dinena eo uradoidimaci. Pablo joreña ñaitimaci. Naimie llofuacinuina uaitatimaci; <sup>46</sup> iadedi Pablo, iaimaiaia Bernabé diga, jacitaifeno llofuetiaimaiaia:

—Omoim Jusiñamui uaina nano lloiacadicoco. Iena jitaifñedomoi. Jusiñamui diga omoi jaca illena jitaifñedomoi. Ie jira judíuafñedino dine jaiticoco. <sup>47</sup> Iese Jusiñamui jaie llote: Judíuafñedinomo ona oretaiticue, naimacimo cue rafue lllollena, naga eniruomo ite cominimo jeacinomona jilluana lllollena.

<sup>48</sup> Iena cacajano, judíuafñedino iboidimaci.

—Jusiñamui rafue mare —raitimaci. Jusiñamui jaca illena fetocano diese Jesúna ñnotimaci. <sup>49</sup> Nana bie eniruomo cai Nama Jesús uaina llocana jaide; <sup>50</sup> iadedi judíuai dinena diga cominina fuemo faicana uitimaci. Jusiñamuina sedade riñoniaina fuemo faicana uitimaci. Naie riñoniai mameciai are soride. Illaicomini fuemo faicana uitimaci. Ie jira Pablo, iaimaiai Bernabé diga, duere finodimaci. Naimaci illanomona iaimaiaina jino dotadimaci; <sup>51</sup> iadedi jioracuai iaimaiai eillimona jaidinotiaimaiai, naimacimo ite jeacinuaina naimaci uifñollena. Ie mei Iconio railla nairaimo jaidiaimaiai; <sup>52</sup> iadedi Antioquíamo ite creyentiaí eo iocire itimaci. Jusiñamui Joreño nana naimaci comecimo namatade.

## 14

### *Iconiomo Pablo, iaimaiai Bernabé diga, illa rafue*

<sup>1</sup> Iconiomo judíuai ofiracomo, iaimaiai Antioquíamo jailla isoi, jaidiaimaiai, Cristo rafuena duere llotiaimaiai. Ie jira ailluena comini creyentiaina jaidimaci. Judíuai cominimona ailluena ñnotimaci. Judíuafñede cominimona ailluena jiai ñnotimaci; <sup>2</sup> iadedi ñnoñede judíuaidi judíuafñedinona fuemo faitimaci. Naimacimo creyentiaina tainona llotimaci; <sup>3</sup> iadedi nainomo are fiebidiaimaiai. Cai Nama facaisena jacitaiñeno llotiaimaiai. Cai Nama Jesús iaimaiaina siño rafuena finotate. Ie jira cominidi cai Nama Jesús naimacina dueruillana fididimaci; <sup>4</sup> iadedi nana comini naiena ñnoñedimaci. Comeciaina daje isoi lloisñede. Damierie judíuai facaisena itimaci. Damierie naie iaimaiai facaisena itimaci. <sup>5</sup> Judíuafñedinodi, judíuai diga, naimaci illaicomini diga, naie iaimaiaina duere finoacadimaci. Noficina iaimaiaina fairigilacadimaci. <sup>6</sup> Iena fidiano, Licaoniamo ite nairaimo aiscano jaidiaimaiai. Listra railla nairaimo jaidiaimaiai. Derbe railla nairaimo jiai jaidiaimaiai. Naie nairai ecimo ite eniruomo jiai jaidiaimaiai. <sup>7</sup> Nainomo Jesús ie mare rafuena llofuetiaimaiai.

### *Listramo iaimaiaimo suilla rafue*

<sup>8</sup> Listramo damie tisitaitate. Nanomona naimie iese jeicia jira, jaca macariñede. <sup>9</sup> Pablo llofuiana naimie raise cacajamona, “Jusiñamui cuena jillotarede” raillanona, tisitaitimie ñnote. Pablo dinena naimiemmo eruaillano, naimie ñnuana uifñote. <sup>10</sup> Naimiemmo ado llote:

—A naidada.

Iemei daiacaida naimie macarite. <sup>11</sup> Ailluena comini Pablo finoca rafuena ciodimaci. Naimaci uaido ado cuiridimaci:

—Iñiaí isoi Jusiñamui cai dine bite.

Naie cominidi Júpiter railla jusiñamuina sedauidimaci. Mercurio railla jusiñamuina jiai sedauidimaci. <sup>12</sup> Ie jira Bernabé mamecidi jiaicina jonega Júpiter. Pablo mamecidi jiaicina jonega Mercurio, naimie ñairaimana illa jira. <sup>13</sup> Naie nairai nanoca nase ruica facai Júpiterna sedauilla jofo ite. Iaimaiaina sedallena, safia diga juraretaiaina abina finoduanona, Júpiter facaina ñairaima naimacina atide. Ailluena comini diga bite. Juraretaiaina fallena, “Naie iaimaiaidi cai Jusiñamui” raillano, iaimaiaimo fecaacadimaci. <sup>14</sup> Iaimaiai iena cianuona, “Comini marañede rafuena finoacade” raillano, iaimaiai iniroina cuaranotiaimaiai. Comini motomo aiscana jaidiaimaiai. Ado llotiaimaiai:

<sup>15</sup> —Nabaiñiaí, ¿bue ñllena cocomo iese finodomoí? Jamai ñmadicoco. Omoi isoidicoco. Jusiñamuina omoi sedallena, jamai rana omoi sedañllena, mare rafuena omoimo jai lloticoco. Cajede Jusiñamuina sedadicoco. Naimiedi mona finode. Eniruena finode. Monailaina jiai finode. Nana nainomo ite rana jiai finode. <sup>16</sup> Jaie Jusiñamuidi nana omoi judíuafñedino omoi jitailla rafuena finuana rairuñede; <sup>17</sup> iadedi naimie finoca rafuemona naimiena uifñoredomoi. Omoi facaina mare rafue naimie finocabide. Noci deitate. Omoi riana sicotate. Omoimo guille itatate. Iemona omoi comeciaina caimare itatate. Iemona Jusiñamuina uifñoredomoi.

<sup>18</sup> Iese Pablo llote; iadedi iaimaiaimo juraretaiaina fecajana jaca fañonocaiacaiñedimaci.

<sup>19</sup> Nano nigarui illamona, Pisidiamo ite Antioquíamona judíuai comini bitimaci. Iconiomona jiai bitimaci. Judíuai dinena fuemo faiamona, naimaci dibeimo comini jaidimaci. Iemona nofido Pablona fairigitate. Naie nairaimona naimiena sonocana uitimaci, fiodañimiena naimie eruailla jira. <sup>20</sup> Naimiena iese fañonocailla mei, creyentiaí naimie ecimo billamona, naimie a naidadate. Nai nairaimo abido jaide. Ie are Derbemo, Bernabé diga, jaide. <sup>21</sup> Naie nairaimo Jesús ie mare rafuena llotiaimaiai. Diga comini creyentiaina jaidimaci. Ie mei Listramo abido jaidiaimaiai. Iconiomo abido jiai jaidiaimaiai. Pisidiamo ite



Antioquíamo jiaí abido jaidiíaimaiaí. <sup>22</sup> Creyentiaí comeciaina ocuiñotadiíaimaiaí. Cristona nia iñuana llotiíaimaiaí. Raitiíaimaiaí:

—Jusiñamui dine cai nia riñenia, eo duere sefuiticai.

<sup>23</sup> Naga creyentiaí illanomo creyentiaína sedarainina fetodiíaimaiaí. Guiñeno Jusiñamuimo jiaí mei, guiñena facaise mei, naimiēna naimaci jai iñua jira, cai Nama illa anamo naimacina fañonocadiíaimaiaí.

*Siriāmo ite Antioquíamo abido jaidiíaimaiaí*

<sup>24</sup> Pisidiamo jaillanona, Panfiliamo ridiíaimaiaí. <sup>25</sup> Pergemo Cristo uaina llua mei, Ataliamo jaidiíaimaiaí. <sup>26</sup> Nainomona botedo Siriāmo ite Antioquíamo abido ridiíaimaiaí. Nano naie iaimaiaí illanomo abido ridiíaimaiaí. Nainomona iaimaiaí navui nia jaiñenia, creyentiaí dinena Jusiñamui iaimaiaína duenaillana uíñuamona, iaimaiaína oredimaci. Jusiñamui rafuena iaimaiaí llolena, iaimaiaína oredimaci. Naie maijia fuilla jira, jai abido bitiíaimaiaí. <sup>27</sup> Iaimaiaí rilla mei, creyentiaína ofitadiíaimaiaí. Nana Jusiñamui iaimaiaímo finoca rafuena llotiíaimaiaí.

—Jusiñamuidi judíuáiñedino naimiēna iñuana jai jitaide —lloitiíaimaiaí. <sup>28</sup> Dinomo creyentiaí diga are itiíaimaiaí.

## 15

*Jerusalémo Moisés micorí llogacinona siadua rafue*

<sup>1</sup> Antioquíamo Jerusalémona janore comini billano, creyentiaína iese llofuetimaci:

—Moisés micorí caimo llua isoi, omoi abina omoi detatañenia, jeacinomona jillo-biñeitomoi.

<sup>2</sup> Ie jira creyentiaí uri iñedimaci. Pablo, iaimaiaí Bernabé diga, Jerusalémona bitino llofuiāna eo uaitatiíaimaiaí. Ie muidona creyentiaí dinena iaimaiaína, jiaie creyentiaí diga, Jerusalémo jaillena fetodimaci. Cristo oretagano diga, Jerusalémo ite creyentiaína sedaraini diga, bie rafuena siadoiacasite. <sup>3</sup> Creyentiaí naimacina oretaja mei, Fenicia railla enirue díbeido jaidimaci. Ie mei Samaria railla enirue díbeido jiaí jaidimaci. Creyentiaí illanuāimo llofuecana jaidimaci. Judíuáiñedino creyentiaína jai jaillana naimacimo jiaí llotimaci. Ie jira naie creyentiaí caimare itimaci.

<sup>4</sup> Jerusalémo ria, creyentiaídi naimacina feiñotimaci. Cristo oretagano itimaci. Creyentiaína sedaraini jiaí itimaci. Naimacimo nana Jusiñamui iaimaiaímo finoca rafuena llotiíaimaiaí. Cristo rafuena iaimaiaí llofuiamona, judíuáiñedino Cristona iñuana llotiíaimaiaí. <sup>5</sup> Iena cacajano, fariseuái díbeimo ite creyentiaímona jiaíno naidaita raitimaci:

—Moisés micorí llogacinuāina iñuamona, judíuáiñede creyentiaí abina diana jitaídicaí.

<sup>6</sup> Bie rafuena siadollena, Cristo oretaganodi, creyentiaí sedaraini diga, danomo ofidimaci.

<sup>7</sup> Iena are siadua mei, Pedro naidacaillano, raite:

—Amatiai, judíuáiñedinodi cuemona Jesús ie mare rafuena cacaillena, jaie omoimona Jusiñamui cuena fetode. Iena uíñotomoi. Cue llofuiamona iñotimaci. <sup>8</sup> Nana comini comeciaina naimie uíñuamona, judíuáiñedino naimiēna iñuana Jusiñamuidi uíñote. Caímo fecaja isoi, ie Joreño naimacimo fecaja jira, Jusiñamuidi judíuáiñedinona jitaillana jai uíñoticaí. <sup>9</sup> Jusiñamuidi naimacina cai isoi jai feiñote. Naimiēna naimaci iñua jira, naimie naimaci comeciāmona jeacinona jai dotade. <sup>10</sup> ¿Bue ñellena Jusiñamuina iñoiacaiñedomoi? Jusiñamui jitaillacino omoi finoacaiñena jira, naimie omoina duere finuana jitaídomoi. Cai jaíagái Moisés micorí llogacinodo jaidimaci; iadedi iena raise iñonoñedimaci. Nana ie llogacinona jaca finonidimaci. Iedo jaie jiaí jaidicaí; iadedi iena jiaí finonidicaí. ¿Bue ñellena iedo birui cai jaillana jitaídomoi? <sup>11</sup> Jesucristo caina duenailla jira, cai jeacinomona jilloiticaí. Judíuáiñedino cai isoi jilloitimaci.

<sup>12</sup> Iena cacajano, nana ofidino uai llúicaídicaí. Iemei Bernabé lluaana cacadimaci. Pablo lluaana jiaí cacadimaci.

—Jusiñamui judíuáiñedino motomo cocona siño rafuena finotate —lloitiíaimaiaí.

<sup>13</sup> Iaimaiaí ñaia mei, Jacobo raite:

<sup>14</sup> —Amatiai, cuemo cacarei. Judíuáiñedinomo Jesús rafue Simón Pedro nano llua rafuena jai cacadicaí. Creyentiaína naimaci jaillena, Jusiñamui naimacina jai fetode. <sup>15</sup> Jusiñamui facaina lloraini micoriaí iena jaie cuetimaci:

<sup>16-18</sup> Jusiñamui jaie llote: “David micorí illaíma isoi illaímana illena, cue Jitona ico oretaiticue.

David jicorí jito illaímana birui iñede;

iadedi David micorí ifomo illaímana cue Jito iite.

Iemona judíuáiñedino cuena iñoitimaci.

Naimaci cue cominana jaillena jiaí jitaídicaí.

Iena cue lua jira, iena finoiticue” llote.

<sup>19</sup> Ie muidona cue comeci raite: Judúaiñedimona creyentiaina jaidinona duere finoñeiticai. <sup>20</sup> Naimacimo rabena oreta, dama buena lollena: “Jiraraimo fecaca llicisina riñeno. O añede riño diga iñeno. O iniñede iima diga iñeno. Llerinoga rana riñeno. Diruena jiai riñeno”. <sup>21</sup> Jaiemona naga sábado naga judúuai ofiracomo judúuaidi Moisés micori cuegafuaimona naie isoide lletarafuena cacadimaci. Ie jira naie isoide rafuedo nia jaiticai: iadedi jiaie Moisés micori lletarafuedo jaiñeiticai.

<sup>22</sup> Ie mei Cristo oretaganodi, creyentiaina sedaraini diga, comeciaina facadimaci, naimacimona cominina fetollena, Antioquíamo oretallena. Nana creyentiaí comeciaina facajano: “Jee” raitimaci. Pablo, iaímaiaí Bernabé diga, naimacina oretaiacadimaci. Judana fetodimaci. Naimie mameci jiaicidi Barsabás. Silana jiai fetodimaci. Jiaie comini baifemo rafuena baitadiiaímaiaí. <sup>23</sup> Rabena cuetimaci, iaímaiaí diga oretallena. Iese raillano, cuetimaci:

“Antioquíamo itino, Siriamo itino, Ciliciamo itino, omoimo cueticai. Jerusalémo iticai. Cristo oretaganodicai. Creyentiaina sedarainidicai. Omoídi cai amatiaí. Omoimo jai cueticai. Judúaiñediomoi; iadedi cai amataidomoi. <sup>24</sup> Cai motomona jiaie comini naimaci llofuaido omino uri itatañenana fididicai. Omoí jecinomona omoí jilloillena, Moisés micori llogacinodo omoí jaillana jitaidimaci. Ie jirari omoí comeciá rucaicuerite. Naimacina oretañedicai. <sup>25</sup> Danomo cai ofilla mei, menamiéna fetodicai, omoimo oretallena, Bernabé, iaímaiaí Pablo diga. Bernabéna isiruiticai. Pablona jiai isiruiticai. <sup>26</sup> Iaímaiaí cai Nama Jesucristo muidona navui niadedi fidaitiaímaiaí. <sup>27</sup> Ie jira Judas, iaímaiaí Silas diga, oretaiticai. Omoimo bie rabe cuia isoi lloitiaímaiaí. <sup>28</sup> Jusíñamui Joreño caimo illamona, bie rafuena omoimo lloiticai. Ailluena rafue omoí finuana lloñeiticai. Dani bie rafuena finojitomoi. <sup>29</sup> Jiraraimo fecaca rana riñeno. Diruena riñeno. Llerinoga rana riñeno. O añede riño diga iñeno. O iniñede iima diga iñeno. Iese omoí iñenia, marena iitomoi. Macaibaite” cuetimaci.

<sup>30</sup> Ie mei Antioquíamo jaidimaci. Ailluena cominina ofitaja mei, naimacimo cartana fecadimaci. <sup>31</sup> Iena facajano, naie llucinori iobidimaci. <sup>32</sup> Judas Jusíñamui facaina lloraíma. Silas daje isoide. Diga rafuena creyentiaímo llofuetiaímaiaí. Naimaci comeciaina jiai ocuñotadiiaímaiaí. <sup>33</sup> Diga irui nainomo illa mei, iaímaiaína oretatinomo creyentiaí iaímaiaína marena abido oretatimaci.

<sup>34</sup> Nainomo Silas comecina facajano, fiebide. Ie jira Judas dama abido jaide. <sup>35</sup> Antioquíamo Pablo, iaímaiaí Bernabé diga, cai Nama Jesús rafuena llofuellena fiebidiaímaiaí. Diga comini jiai iese llofuetimaci.

*Pablo jiaie enruemo ite creyentiaí dne dane jailla rafue*

<sup>36</sup> Diga irui illa mei, Pablo Bernabémo llote: p—Naga navui coco lua nairaimo creyentiaí dne abido mai coco jai. Cai Nama ie mare rafuena dane lloiticoco. Nie isoi naimaci illana jibuiticoco.

<sup>37</sup> Bernabédi, naie iaímaiaí diga, Juan Marcos uiacade. <sup>38</sup> Panfiliamo iaímaiaína navui Juan faínonocaide. Iaímaiaí diga llofuellena jaiñena jira, Pablo naimiéna dane uiacañede. <sup>39</sup> Raire ñaitiaímaiaí. Comecina daje isoi lloíñediiaímaiaí. Ie jira dajena jaiñediiaímaiaí. Bernabé Juan Marcona uillanona, Chipremo aillue botedo jaidiaímaiaí. <sup>40</sup> Ie mei Pablo Silana uite. “Jusíñamui omicono canoite” creyentiaí dinena raillanona, iaímaiaína oredimaci. <sup>41</sup> Siria railla enruemo Jesús rafuena llocana jaidiaímaiaí. Cilicia railla enruemo jiai llocana jaidiaímaiaí. Creyentiaí comeciaina ocuñotacana jaidiaímaiaí.

## 16

*Timoteo iaímaiaí diga jailla rafue*

<sup>1</sup> Nano Derbemo Pablo, iaímaiaí Silas diga, ridiaímaiaí. Iemona Listramo ridiaímaiaí. Nainomo Timoteo railla creyente ite. Naimie eidi judiaíñaño. Jiai creyente. Ie moo micoridi griego imie. <sup>2</sup> Listramo ite creyentiaí, Iconiomo ite creyentiaí diga, naimiéna: “Mare” raitimaci. <sup>3</sup> Pablodi Timoteona uiacade, naimie diga jaillena. Timoteo moo micori griego imiéna jira, naimie abina nia detatañede; iadedi nainomo ite judúuai illa jira, Moisés micori lua isoi, Pablo Timoteo ie abina dete. Judúñedimie naimaci motomo ia, naimaci motomo inide. <sup>4</sup> Naga nairaimo naimaci jaillanona, Jerusalémo siadogacinona creyentiaímo llote. Jerusalémo Cristo oretaganodi, creyentiaina sedaraini diga, navui naicinona siadotimaci. Creyentiaí naie lluaña ñnollena, iena llocana jaidimaci. <sup>5</sup> Ie jira creyentiaí ñnocana jaidimaci. Nagarui ailluena comini creyentiaína jaidimaci.

*Pablo ñicairilla ra isoidena cuia rafue*

<sup>6</sup> Jusíñamui Joreño Asia railla enruemo ie uaina naimaci llofuiana rairuilla jira, Frigia railla enruemo macaricana jaidimaci. Iemona Galaciamo jaidimaci. <sup>7</sup> Misiamo naimaci

rillano, Bitiniamu jaiacade; iadedi Jesús Joreño dane imaci jaillana rairuide. <sup>8</sup> Ie jira Misiamona ecido jaillano. Troas railla nairaimo jaidimaci. <sup>9</sup> Nainomo naie nairaimo Pablo nicairilla ra isoidena ciode. Daje Macedonia imiedi uicomo naidaita naimiemo jicajicanode. Raitte: “Macedoniamu ruica o bi. Caina canuabi?”. <sup>10</sup> Nairaimo Pablo cúa mei, naie facaisemona Pablo diga jaidicue. Lucadicue. Ie jira bie rafuena raise uifotitue, iena omo cuellena. Macedoniamu ruica dine cai jaill botena jenodicai. Comecina facadicai: “Jusiñamuidi caina uaidote, nainomo ie mare rafuena cai llollena”.

### *Filipomo illa rafue*

<sup>11</sup> Ie jira Troamona Samotraciamu monaillaido atona ie mamedo jaidicai. Ie icotidiruido Neápolis railla nairaimo ridicai. <sup>12</sup> Dinomona Filipomo duide naisodo jaidicai. Macedoniamu ite. Naie enirue facaise ie nanoca nairai Filipos. Naie nairaidi Romamona bitino nairai. Diga irui nainomo iticai. <sup>13</sup> Sábadoruido naie nairaimona nasedo jino jaidicai. Comecina facajamona: “Dinomo nibai comini oficabidimaci, Jusiñamuimo jüllena”, ille fuemo jaidicai. Nainomo dañaiñorie ríñonai billanona, dinomo ana raicicai, nairaiñuaimo Cristo rafuena llollena. <sup>14</sup> Naimacimona dañaiño cai llofuiana eo cacade. Nairaiño mamecidi Lidia. Tiatira railla nairai iñaiño. Nairaiñodi jiduirede inirruena fecauide. Jusiñamuina jai sedade. Pablo llofuiana nairaiño cacajano, cai Nama Jesús nairaiño comeci naie lluaña feñotade. Naie facaise creyentena jaide. <sup>15</sup> Nairaiño ie jofomo itino diga bautizaja mei, caimo llote:

—Cuedi cai Namana cue jai iñuana omoi uifñuamona, cue jofomo mai bi, nainomo omoi fiebillesa. —Duere caina uai-uaidode.

<sup>16</sup> Jusiñamuimo jiranomo jairuido jaidicaimo, daje jitañomo dafaifidicai. Nairaiñodi jainomona ibacñaiño. Janaba anamo nairaiño jiai ite. Iemona nairaiño jairuido suille rafuena llouide. Naie rafuena lluaña ibatajano, nairaiño namaiaidi ailluena ucubena feñoidimaci. <sup>17</sup> Nairaiñodi cai jinafona jaillanona, ado cuiri-cuiricaide:

—Naimaci nanoca Jusiñamui ie lloraini. Omoi jilluana omoimo llocabitimaci.

<sup>18</sup> Diga irui nairaiñodi iese cuiri-cuirisoide. Icirillamona, Pablo abido dobaidacaida, nairaiñomo ite Janabamo llote:

—Cue Nama Jesucristo uaido nairaiñomona oni jai. —Iemona oni jaide.

<sup>19</sup> Nairaiño lluañomona ucubena jai oñenana nairaiño namaiaidi jai uifñua jira, Pablo, iaimaiaidi Silas diga, gaitadimaci. Iaimaiaina plazamo illaicomini illanomo sonocana uitimaci.

<sup>20</sup> Dinomo iaimaiaina illaicomini dine atidimaci. Iese iaimaiaina llogidotimaci:

—Naie iaimaiaidi cai nairaina uri itatañedi iaimaiaidi. Iaimaiaidi judiaidi comini. <sup>21</sup> Romanuaidi cominina cai illa jira, iaimaiaidi llogacinuana cai iñoia, iedo cai jai, marañede.

<sup>22</sup> Iena cacajano, nana comini naie iaimaiaina fanaisitimaci. Illaicominidi naie iaimaiaidi iniroina cuaranuanona duñode. Rasi diga, iaimaiaina diga icaiño fatatatimaci. <sup>23</sup> Iaimaiaina eo faja mei, cárcelmo jonetimaci. Cárcelna sedaraimo iaimaiaina raise sedallena llotimaci. <sup>24</sup> Iese llua jira, iaimaiaina llaveracomo fo iaimaiaina uite. Donoramona iaimaiaidi eillaiñuaitano, raise donode.

<sup>25</sup> Naiona daferui facai Pablo, iaimaiaidi Silas diga, Jusiñamuimo ifuerillacinona rorodii iaimaiaidi. Jiai jüdi iaimaiaidi. Jiaie llavecana nairaina cacadimaci. <sup>26</sup> Jamai ebena illacinomona ñuisañodi suide. Cárcel illanodi jaidisite. Naie facaiseconi nana nasiaidi ecocorinaite. Ie dacaiño nana llavecana imaci donua radi oni ecoride. <sup>27</sup> Cárcelna sedaraima casidemo, cárcel ie nasiaidi ecocorinaillana ciode. “Llavecana jai aisidimaci?” raillamo naimie comeci facade. Ie jira ie lloesi añoiacida, dama abi faitaacade. “Illaicomini bia, ¿bue lloiticue?” raillamona comeci facade; <sup>28</sup> iadedi Pablodi eo riire cuirioidi:

—¡O abina dama meineño! Bene nana iticaia.

<sup>29</sup> Lamparina atillena cárcelna sedaraima jicajanona, jarire fo jaide, Pablo iaimaiaidi Silas dine. Jacinaillano, naimie abidi docaillamona, iaimaiaidi uicomo cañici ifodo ana rainadate.

<sup>30</sup> Iaimaiaina jino ua mei, nai iaimaiaimo jicanote:

—¿Buena finojiticue, cue jecinomona cue jillollena?

<sup>31</sup> Uai otii iaimaiaidi:

—Coco Nama Jesúsna iño. Iese na o jofomo ite comini diga o jillolleso.

<sup>32</sup> Iemei naimiema Jesús ie rafuena llofuetii iaimaiaidi, nana ie jofomo itino diga. <sup>33</sup> Naie facaise iaimaiaidi bofellañona jocode. Iemei naimiedi, nana ie comini diga, bautizaga.

<sup>34</sup> Guillena, ie jofomo naie iaimaiaina uite. Jusiñamuina jai iñua jira, na ie comini diga, naimie caimare ite.

<sup>35</sup> Ie oni monaidemo, illaicominidi dajerie policiana cárcelmo oretatimaci, nai iaimaiaina jino orellena. <sup>36</sup> Cárcel sedaraimadi naie rafuena Pablomo llote. Raitte:

—Omicu jaillena, illaicominidi omicono oredimaci. Mai marena jai.

<sup>37</sup> Iadedi policiamu Pablodi llote:

—Cocodi romanuai cominidicoco; iadedi cocomo ite rafuena raise uifioñeno cocona marefodo fatimaci. Cárcelmo cocona jonetimaci. Jai bainino cocona jino oretaiacadimaci. Iese jino jaiñeiticoco. Naimacimo llongo: “Cocona jino ollena bi”.

<sup>38</sup> Ilaicominiño policias naiena lluaibitemo, illaicominiñi naiena cacajanona, eo jacinaiete, romanuai cominina iaimaiaina jira. Cai nanoca illaicominiñi romanuai nairai cominina jamai ebena duere finuana rairuidimaci. <sup>39</sup> Ie jira naie iaimaiaia dine illaicominiñi jaidimaci, iaimaiaia: “Dama dino iesede” raillena. Jino atia mei, nairaimona jino iaimaiaia jaillena oredimaci. <sup>40</sup> Cárcelmona jino billano, Lidia jofomo fo jaidiaimaiaia. Creyentiaina ciuano, naimaci comeciaina ocuñitallena, naimacina dane llofuetiaimaiaia. Ie mei oni jaidiaimaiaia.

## 17

*Pablo, iaimaiaia Silas diga, Tesalónicamo illa rafue*

<sup>1</sup> Anfipolis railla nairaimo macaritiaimaiaia. Apolonia railla nairaimo macaritiaimaiaia. Ie mei Tesalónica railla nairaimo ridiaimaiaia. Dinomo judiaia ofiracodi ite. <sup>2</sup> Pablo fibilla isoi, nainomo fo jaide. Daje amani sábadoruimo Jusiñamuina cuegafuiaimona naimacina llofue. <sup>3</sup> Iese naimacina llofue:

—Cristo legi cacaiete. Fiodaillamona naimie jilloite. Naimiedi Jesús. <sup>4</sup> Naiena cadinomonona ailluena inotimaci. Pablo, Silas iaimaiaia dibeimo jaidimaci. Jusiñamuina inote grieguaimona ailluena comini creyentiaina jaidimaci. Ie emodoconi ailluena nanocañaiñuaidi creyentiaina jiai jaidimaci; <sup>5</sup> iadedi judiaiaidi uradoillano, jamai itinomona eo marañede iñiaina uaiduanona, ailluena cominina ofitatimaci. Ie jira naie nairai uri inedimaci. Iaimaiaina comini uicomo uillena, Jasón jofomo binaisite. <sup>6</sup> Iaimaiaina baiñenano, Jesóna, jiaie creyentiaia diga, illaicominiñi illanomo aifioicaida uitimaci. Cuiisite:

—Naga nairaimo cominina uri itatañediaimaiaia. Benomo jai bitiaimaiaia. Jai benomo billanona, Jasón ie jofomo iaimaiaina feñote. <sup>7</sup> Cai nanoca illaia ie llogacinona jai inoñedimaci. Ie anamo jai iacañedimaci. Raitimaci: “Jiaie illaia anamo iticai. Jesús raillamie anamo iticai”.

<sup>8</sup> Judiaia iese lluaimona, cominiñi uri inedimaci. Ilaicominiñi jiai uri inedimaci. <sup>9</sup> “Naie iaimaiaia dane biñeitiaimaiaia” illaicominiño creyentiaia railano, illaicominiñi Jasón jiaie creyentiaia diga, jino oretatimaci.

*Bereamo Pablo, iaimaiaia Silas diga, illa rafue*

<sup>10</sup> Naie naio creyentiaia Pablona, iaimaiaia Silas diga, Bereamo raire oretatimaci. Dinomo rillano, judiaia ofiracomo jaidiaimaiaia. <sup>11</sup> Nainomo ite judiaia eo mare. Tesalónicamo ite judiaia isoiñedimaci. Bereamo itinodi Cristo rafuena iocire feñotimaci. Niedi uanaicinoni railanona, nagarui Jusiñamuina cuegafuiaina facadimaci. <sup>12</sup> Ie jira naimacimona ailluena inotimaci. Judiaiañedinomona ailluena nanocañaiñuaidi inotimaci. Ailluena iñiaia jiai inotimaci; <sup>13</sup> iadedi Bereamo Pablo Jusiñamui ie uaina jai lluaia Tesalónicamo ite judiaiaidi fidiano, dinomo jaidimaci. Cominina fuemo faillena, jaidimaci. <sup>14</sup> Naie facaise creyentiaia Pablona oni oretatimaci. Monailai fuemo duide naisona oretatimaci. Silas, iaimaiaia Timoteo diga, fiebidiaimaiaia. <sup>15</sup> Pablo uigamacai naimie diga Atenamo jaidimaci. Dane abido Bereamo jaidimacimo, naimacimo Pablo llofe:

—“Silas, iaimaiaia Timoteo diga, raire cue dine billesa” llongo.

*Atenamo Pablo illa rafue*

<sup>16</sup> Atenamo iaimaiaia rillena Pablo sedademo, naie nairaimo ailluena jiraraiaina ciode. Iena ciuanona, Pablo comecidi jeareficaide. <sup>17</sup> Naiena ciua mei, judiaia ofiracomo judiaia diga coniniri Jusiñamui rafuena siadote. Jusiñamuina jai inote judiaiañedinona diga coniniri iena jiai siadote. Plazamo nagarui jamai itino diga coniniri iena jiai siadote. <sup>18</sup> Jamai comecina facadinomona damierie naimie diga jiai ñaitimaci. Epicúreo railla rafuedo jaisoidimaci. Estoico railla rafuedo jai jaisoidimaci. Damierie naimacimona raitimaci:

—¿Buena nai ñaillareuidimie caimo lloiacade?

Jiaino raite:

—Jiaie nairai jusiñamuillaicaimo lloiacade isoide.

Jesús fiodaillamona jilluana Pablodi llouilla jira, iese raitimaci. <sup>19</sup> Ie jira naimienna naimaci siadouillanomo uitimaci. Naie illano Areópagona mameciredede. Jicanotimaci:

—¿Nie isoide o comocinuai? Caimo llongo, cai uifollena. <sup>20</sup> Eo feiredicinuaia cacadicai. ¿Buena nai llofuacinodi llofe? Iena uifoiacadicai.

<sup>21</sup> Nana Atenamo ite comini, jiaie illanomona bitino diga, jamai ailli como imaci fidia rafuena ñai-ñaidimaci. Jamai ailli fidia rafuena caca-cacadimaci. Jiaie rafuena finoñedimaci.

<sup>22</sup> Jicanua mei, Areópago railla illanomo Pablo naidacaida llofe:

—Atenas imaci, omoimo rafuena lloiacadicue. Omoi jusiñamuillaina eo sedacabidomoi. <sup>23</sup> Cue macarillamona, omoi jusiñamuillaina sedaja jiraraina ciodicue. Daje jirarai abimo iese cuela: “Uiñoñega Jusiñamuina sedadicaí” cuela. Uiñoñeno naimiena sedadomoi. Ja omoimo naimiena lloiticue. <sup>24</sup> Jusiñamui biniena jaie finode. Ie emodoconi Jusiñamuidi nana binie mo itinona jiaí finode. Naimiedi mona ie Nama. Enirue ie Nama. Ie jira iima finoca jofomo naimie ifede. <sup>25</sup> Naga jitaile rana naimie mo illa jira, naimiena canonicicaí. Naimie nana cominina comuitate. Jiaí nagarui jafaici caí uadi caimo iga. Uanaí nana rana caimo iga. <sup>26</sup> Damiedemona nana cominina jebuitate, nana eniruemo naimaci illena. Naimaci illa dinori naimie jonega. Naimaci illanomo naimie jiaí jonega. <sup>27</sup> Iese jonega, naimaci naimiena jenollena. Jenuano, nibai naimiena baitimaci. Caimona naimie are ifede. <sup>28</sup> Naimie jaca illa jira, caí jiaí iticaí. Jiaí cajedicaí. Ie isoi omoi rafue lloraini jiaí llotimaci: “Naimie ie uruaidicaí”.

<sup>29</sup> ‘Naimie caina comuitaja jira, Jusiñamuidi jirarai isoiñedena uiñoticaí. Jusiñamuidi oromona finoca ra isoiñede. Platamona finoca ra isoiñede. Noficimona finoca ra isoiñede. Ima ie onolli diga finoca ra isoiñede. <sup>30</sup> Cominidi abi uiñoñeno jeacino jaie finouidimaci. Jusiñamui naimacina nia janafede; iadedi jai birui Jusiñamuidi nana cominina naga illanomo naimaci comeciaí uai meidollena jitaide. <sup>31</sup> Naimaci comeciaí uai naimaci meidoñena, naimie jai lloga facaise, naimacina duere finote. Naimacina duere finollena, ie Jitona jai fetode. Naimaci finoca rafuena naimie raise uiñuamona, naimacina duere finote. Fiodaillamona Jesúna naimie jai jilloitaja jira, iena uiñoticaí.

<sup>32</sup> Fiodaillamona Jesús jilluana cacajano, damierie jaisitimaci. Ieconí jianodi raite:

—Jiairuido o lluanane cacajiticaí.

<sup>33</sup> Temei naimaci motomona Pablo jino jaide. <sup>34</sup> Naie cominimona damierie naimie dibeimo jaidimaci. Inotimaci. Naimacimona damie Areópogomo siadouidimie. Ie mamecidi Dionisio. Jiaíñaño inote. Naiñaño mamecidi Dámaris. Daje facaiseconi jiaie cominidi inotimaci.

## 18

### *Corintomo Pablo illa rafue*

<sup>1</sup> Atenamona Corinto railla nairaimo Pablodi jaide. <sup>2</sup> Nainomo Aquila raillamiena baisesaide. Naimiedi judío imie. Ponto railla eniruedi naimie comuillano. Ie ai mamecidi Priscila. Naiñaño diga Romamona como bitiaimaiaí. Romamona Claudio nana judiaí cominina jai oretate. Ie jirari bitiaimaiaí. Roma ie nanoca illaimadi Claudio. <sup>3</sup> Pablo iaimaiaí daje isoi maijia jira, Pablo iaimaiaí jofomo fiebide. Iaimaiaí conima diga maijide. Chivos itiraiaí ie nilla iniroina tiforisoidimaci, naimemona jofona finollena. <sup>4</sup> Naga sábadoruimo judiaí ofiracommo llofueite, judiaína inotallena, judiaíñedinona iena jiaí inotallena. <sup>5</sup> Macedoniamona Silas, iaimaiaí Timoteo diga, bitemo, Pablodi nagarui Jusiñamui uaina llofueuide. Judiaímo: “Jesúdi caí Jilloitaraima” llouide; <sup>6</sup> ia naimie uaina inosiñedimaci. Jiaí naimie jinafomo jeare ñaitimaci. Naimaci comeciaí jeare cúa jira, Pablo ie iniroina jaidinote, naimacina raillano:

—Dani omoi muidona Jusiñamui omoína duere finojite. Cue muidonañeite. Jai judiaíñedinone dine jaiticue, naimacina cue llofuellena.

<sup>7</sup> Iese raillano, oni jaide. Justo jofomo jaide. Naimiedi Jusiñamuina inouidimie. Ie jofu judiaí ofiraco ecimo ite. <sup>8</sup> Crispodi, nana ie jofomo itino diga, caí Nama Cristona inote. Naimiedi judiaí ofiraco ie sedaraima. Ailluena Corintomo ite comini creyentiaína jaidimaci. Ie mei naimacidi bautizaga. <sup>9</sup> Daje naiona Pablo ñicairilla isoidemona, Pablomo caí Nama Jesucristodi llote:

—Mai jaciruiño. Faicaiño cue rafuena llocana jai. <sup>10</sup> O diga iiticue. Budi ona maraiño finoneite. Bie nairaimo ailluena cominidi cue dibeimo jaitimaci.

<sup>11</sup> Ie jira daje año ie emodo seis fivui dinomo Pablodi fiebide, naimacimo Jusiñamui uaina llofuellena.

<sup>12</sup> Corinto railla nairaidi Acaya railla eniruemo jainaijaide. Naie facaise Acaya ie gobernadori Galión. Naie facaiseconi damierie judiaí comini Pablona faicadimaci. Galión dine naimiena uitimaci. <sup>13</sup> Raitimaci:

—Caí illaima llogacino isoi bimiedi cominina Jusiñamuina sedallena llofueñede.

<sup>14</sup> Pablo uai oiacademo, judiaímo Galióni llote:

—Judiaí, cacarei. Naimie maraiñede rafuena finodena, naimie omoína jifuetena, omoi lluomo nia cacarefidicue; <sup>15</sup> iadedi jamaí naimie uailai cuemo llotomoi. Omoi usumatiaí micoriaí mameciaí cuemo jiaí llotomoi. Omoi einamací llogacinuaina cuemo jiaí llotomoi. Iena omoi coniniri siadotomoi. Bie isoi de rafuena siadoiacañedicue.

<sup>16</sup> Iemona naimiedi nainomona naimacina oni orede. <sup>17</sup> Ie mei Sóstenena gaitadimaci. Sóstenes ofiraco ie sedaraima. Naimiena gobernador uicomo fanaisite; ia naifuena Galión niese nibaiñede.

*Antioquíamo Pablo abido jailla rafue*

<sup>18</sup> Naifue suilla mei, nainomo Pablo are fiebide. Ie mei creyentiaina facaduano, Priscila iaimaii Aquila diga, Siria railla eniruemo botedo jaide. Ie uai raise finuana uiñollena, Moisés micori llua isoi, Cencreamo rillano, ie ifogina rijiruda garetate. <sup>19</sup> Efesomo rillanona, iaimaiaina fainonocai. Judíuai comini Jusiñamui rafuena siadollena, Pablodi judíuai ofiracomo fo jaide. <sup>20</sup> Are naimaci motomo fiebillena naimiemo jicanotimaci; iadedi Pablo dinena uai ote:

—Fiebiñeiticue— <sup>21</sup> Naimacina facaduano, llote—. Jerusalémo jaiticue; iadedi Jusiñamui jitaia, dane omoi dine abido riitucue. —Iemei Efesomona jaide. <sup>22</sup> Cesareamo sijiano, Jerusalémo macarite. Creyentiai dine jaide. Ie mei Antioquíamo jiai macarite.

<sup>23</sup> Nainomo are fiebilla mei, Pablo dane jaide. Galaciemo macarite. Ie mei Frigiamo macarite. Nana creyentiai imaci comeciaina ocuiñotacana jaide.

*Apolos illa rafue*

<sup>24</sup> Ie facaise Efesomo Apolos raillamie Alejandría railla nairaimona ride. Judío imie. Naimie eo raise llofueuidimie. Naimiedi Jusiñamui facaina lloraini micoriai cuegafuiai raise uiñote. <sup>25</sup> Naimiedi Jesús ie rafuena navui jai cacade. Ie comeciomona tena eo llote. Jesús rafuena raise llofuede; iadedi naimie dama Juan micori ie bautizajana uiñote. Nana Jesús finoca rafuena nia uiñofede. Jusiñamui Joreño feiñuana jiai uiñofede. <sup>26</sup> Judíuai ofiracomo naimie llofuia, jaitaiñeno llofuede. Priscila, iaimaii Aquila diga, naiena cacadiiamaia. Ie jira naimiena oni eneno uitiaimaia. Ie uiñofega rafuena eo raise naimiena llofuetiaimaia. <sup>27</sup> Acayamo Apolodi jaiacana jira, creyentiaidi naimie comecina ocuiñotajano, naimiena oresite. Acayamo ite creyentiaimo rabemo cuetimaci. Jusiñamui naimacina dueruilla jira, creyentiaina jai jaidimaci. Naimiena marena feiñollena iese cuetimaci. Nainomo naimie rillanona, creyentiaina eo canode. <sup>28</sup> Judíuai diga marefodo jiai eo ñaite. Iemona naimaci uai ollinodi iñede. Naimiedi Jusiñamui cuegafuaimona Jesúsdi cai jilloitaramana llofuede.

## 19

*Efesomo Pablo illa rafue*

<sup>1</sup> Corintomo Apolo nia itemo, nairaiái onifedo joide naido jailla mei, Pablo Efesomo ride. Dinomo rillanona, creyentiaina baite. <sup>2</sup> Naimacimo jicanote:

—¿Cristona omoi ñnuaruimo Jusiñamui Joreña feiñotomoi?

Uai otimaci:

—Jusiñamui Joreña nia jaca cacaiñedicaí.

<sup>3</sup> Dane jicanote:

—¿Nie isoi omoi bautizagomoi?

Uai otimaci:

—Juan micori lloga rafue facaina bautizagacai.

<sup>4</sup> Pablo uai ote:

—Mare. Juan llote: “Omoi comeciái iuaina meido. Iemei bautizallomoi”. Ie ifo meidoitimiena comini ñnollena llote. Jesúsna ñnollena llote. Jesús rafuena omoimo raise loiticue.

<sup>5</sup> Iena cacajano, cai Nama Jesús díbeido bautizadimaci. <sup>6</sup> Naimacimo Pablo ie onollina joniomona, Jusiñamui Joreña feiñotimaci. Ie mei naimaci uiñofega nairai uaido ñaitimaci. Jusiñamui Joreño naimacimo llua rafuena jiai llotimaci. <sup>7</sup> Nibai nana naimacidi doce iñiaí.

<sup>8</sup> Sábadoruimo judíuai ofiracomo fo jaillano, naimie anamo naimaci illana Jusiñamui jitailla jira, Jusiñamui díbeimo naimaci comeciái iuaina meiduana Pablodi jaitaiñeno eo llouide. Nainomo daje amani fivui fiebide. <sup>9</sup> Naimacimona jainodi Pablo uaina uaitatimaci. Jiai ñnoiacaíñedimaci. Naimaci ñnoñena ira, ofiracomo bitinomo: “Cristo rafuedi maraiñede” lloidimaci. Ie jira Pablodi creyentiai diga naimacimona eneno oni jaide. Tiranno ie lloracomo nagarui Pablodi llofueuide. <sup>10</sup> Mena fiemona iese llofueuide. Ie jira diga Asia railla eniruemo ite cominidi cai Nama ie uaina cacadimaci. Judíuai cacadimaci. Judíuaiñedino jiai cacadimaci.

<sup>11</sup> Jusiñamuidi Pablona siño rafuena finotate. <sup>12</sup> Duidinomo cominidi naimie jetaca pañueluaina uitimaci. Duidinomo naimie jetaca niroina jiai uitimaci. Naiena jetajamona, duidinodi jillodimaci. Janaba anamo itinodi jiai jillodimaci. <sup>13</sup> Naie facaise jamai macarisoidino ridimaci. Judíuai imaci. Naimacidi icoriraini. Jesús mameci llinuano, jananiai anamo itinomona jananiaina oni oretaiacadimaci. Jananiaimo raitimaci:

—Pablo llua isoi, Jesús muidona bimacimona oni jai.

<sup>14</sup> Esceva ie siete jitotiaidi esese finoacadimaci. Escevadi Jusiñamui diga ñairaima. <sup>15</sup> Janabana oni oretaiacadimacimo, Janaba dinena uai ote:

—Jesúna uiñoticue. Pablona jiai uiñoticue; iadedi omoína uiñoñedicue.

<sup>16</sup> Ieconí Janaba anamo itimie naimaci emodomo daiacaide. Riire nana naimacina emodoficaide. Ie jira naie jofomona taimiaina jino aisidimaci. Naimacidi bofellaiai diga jino aisidimaci.

<sup>17</sup> Nana Efesomo itino iena fididimaci. Judúuai, judúuaiñedino diga, naifuena fididimaci. Naifuena fidianona, eo jacinaitimaci. Iemona cai Nama Jesús mamecidi are soride. Comini dinena: “Jesús uai eo siño” raitimaci. <sup>18</sup> Ie jira ailluena creyentiaidi billano, imaci navui marañeñede finoca rafuena Jusiñamuimo llotimaci. Icorilla rafuena finouidimaci. Iena marefodo llotimaci. <sup>19</sup> Ailluena icorilla rafuiai illabiai atianona, marefodo jobaidimaci. Niga raifi rabiai jobaillana facadimaci. Cincuenta mil ucube diese facai rabiaina jobaidimaci. <sup>20</sup> Cai Nama Jesús uaina eo llocana jaide. Cominidi naie uai siñonana uiñoticimaci.

<sup>21</sup> Naie rafue illa mei, Pablodi comecina facajano raite: “Macedoniamos cue macarillamonana, Acayamos cue jiai macarillamonana, Jerusalémo riacadicue”. Ie emodoconi naimiedi raite: “Nainomona Romamos jiai jaiacadicue”. <sup>22</sup> Naimie nia Asiamos nano nigarui illanona, mena canoramana Macedoniamos oretate. Timoteona, iaimaiai Erasto diga, oretate.

*Efesomos ite comini marañeñede rafue finoacadimaci*

<sup>23</sup> Naie facaiseconi Pablo nia oni jaiñenia, Jesucristo rafue muidona Efesomos ite cominidi marañeñede rafuena comuitatimaci. <sup>24</sup> Demetrio raillamie platamonana diga rana finouide. Naimiedi Diana ie jofo joreñuaina finouide. Naimie anamo ailluena maijuuidimaci. Dianadi naimaci jusiñamui. <sup>25</sup> Naimie isoi maijuuidinona Demetrio uaidote, nana naimaci danomo ofillena. Ie mei raite:

—Jai danomo ofidicai. Bie maijiamona cai ucubena uana raise uiñotomoi; <sup>26</sup> iadedi Pablo raillamiedi diga cominina jai llofuate: “Comini finoca raniaidi jusiñamuillañeñede”. Naie llofuiamona ailluena comini naimie dibeimo jaidimaci. Dama Efesomos iese suiñede; iadedi ua nana Asiamos iese suide. <sup>27</sup> Ie jira abina rairuicadicai, cai maijille faifi raillano, comini Diana jofona jiai sofei raillanona. Cominidi naiñaiñona eburuillana feitaimitimaci. Naiñaiñori raijicaiñeitimaci. Dianadi eo ebirede jusiñamui. Nana Asiamos ite comini naiñaiñona sedacabidimaci. Uanai nana bie eniruemo ite nairaidi naiñaiñona sedacabidimaci. Ie jira abina rairuicadicai.

<sup>28</sup> Iena cacajano, eo iciritimaci. Riire cuiriidimaci:

—¡Efeso ie Diana eo ebirede!

<sup>29</sup> Daniríe siaduamona, nana comini eo failliñaidimaci. Iemo nana comini dajena naimaci ofiracomos fo raire jaisite. Gayona, iaimaiai Aristarco diga, gaitajano uitimaci. Naie iaimaiaidi Pablo ie nabai iaimaiai. Iaimaiai comuillanodi Macedonia. <sup>30</sup> Pablo ofiracomos jiai fo jaiacade; iadedi creyentiaidi naimie fo jaillana rairuidimaci. <sup>31</sup> Illaicominimona damierie nabaiñai naimiemo fo jaillana jiai rairuidimaci. <sup>32</sup> Fo itinomona damierie daje rafuena ebena cuiriidimaci. Jiaino jiaifuena ebena cuiriidimaci. Eo failliñaidimaci; ie iadedi bue ñellena naimaci ofillana raise uiñoñedicimaci. <sup>33</sup> Comini motomona judúuai dinena damie uicomos oredimaci. Ie mamecidi Alejandro. Cominina llicaitallena, ie onolli jaidianona, cominimo lloiacade; <sup>34</sup> iadedi naimie judío imiema naimaci uiñuanona, nana daacaiño cuiriidimaci. Mena horas raifi cuiri-cuiriidimaci:

—¡Efeso ie Diana eo ebirede!

<sup>35</sup> Iemei naie nairai rabe cueraimadi cominina llicaitatate. Naimaci llicaiilla meinoconi, naimie llucacinona cacadimaci. Raite:

—¡Cacarei! Cai nairaidi Dianana sedacabidicai. Naiñaiño ebireñaiñaiño. Naiñaiñona eruaiide jiraraidi monamonana jaie uaide. Iena jiai sedacabidicai. Nana bie eniruemo ite comini iena uiñoticimaci. Bu naiena uiñoñedimienana jaca iñede. <sup>36</sup> Bu cue lluaana jaca uaitañeite. Ie jira omoi llicai. Comeciai facañeno buena finoñeno. <sup>37</sup> ¿Bue ñellena Gayo iaimaiai Aristarco diga, benomo atidomoi? Iaimaiaidi cai jusiñamui joreñona ñaiñediñaiñai. Naiñaiñona jeare finoñediñaiñai. <sup>38</sup> Demetrio, ie maijiraini diga, iaimaiaina llogidoiacania, cominina llogidoracos ite. Diga jueces jiai ite. Coniniri nainomona iena siado; <sup>39</sup> iadedi jiai nicino omoimo ia, cai illaicomini ofia, buena siaduanos, caimo lloitimaci. <sup>40</sup> Birui bie rafue cai finua jira, illaicomini nibai caina duere finoitimaci. ¿Ñiese cai nibaille? Illaicomini caimo buena jicanoia, ¿ñiese raiticai?

<sup>41</sup> Naie llua mei, ofdinona jino orede. Iemei jai jono tuudimaci.

## 20

*Macedoniamos Pablo dane jailla rafue*

<sup>1</sup> Efesomo ite rafue suilla mei, Pablodí creyentiaína uaidote. Naimaci comeeciána ocuiñotafuena lloste. Iemei naimacina naimie facaduano, Macedonia railla eniruemo jaide. <sup>2</sup> Nainomo ite nairaiaimo macarite. Comecina ocuiñotallena, naimacina llofuecana jaide. Iese Macedonia mona Grecia railla eniruemo risaide. <sup>3</sup> Nainomo daje amani fivui illa mei, Siriamo botedo abido jaicade; iadedi judíuaidí naimiena meineiacanana Pablo fidiano, Macedonia abido macarite. <sup>4</sup> Jiaíno naimie diga jaidimaci. Sópater jaide. Naimiedi Berea nairai imie. Pirro jito. Aristarco, iaímaiaí Segundo diga, jaide. Tesalónica nairai imie iaímaiaí. Gayo naimie diga jiaí jaide. Gayodí Derbe nairai imie. Timoteo naimie diga jiaí jaide. Tíquico, iaímaiaí Trófimo diga, jiaí jaidíiaímaiaí. Asia imie iaímaiaí. <sup>5</sup> Coco uicodo naimaci jaillano, Troamo cocona sedadimaci. <sup>6</sup> Llomenico guillaruillai railla rafue fuilla mei, Filipomona jaidicoco. Monailaido dabecuirorui coco jailla mei, Troamo naimaci diga dane danomo dafaifidicoco. Nainomo siete digarui fiebidicoco.

*Troamo Pablo illa rafue*

<sup>7</sup> Domingoruimo Jesús fiodaillana começillena, danomo ofidicaimo, Pablodí caina llofue. Icoiti naimie jaiacana jira, Pablo are ñaite. Naíona jítoma daferui illa facai nia ñaite. <sup>8</sup> Cai ofillanomo ailluena lamparínai ite. <sup>9</sup> Pablo are ñaia jira, daje coniruemo iniaicidi suide. Naie conirue mamecidi Eutico. Naimiedi ventanamo raide. Naimie eo inia jira, ventanamona ana uaide. Tercer pisomo a iticai. Nainomona eniruemo naimiedi uaide. Ana jíbuisaíbidemo, naimiena meniñocaidemo, naimie jai fiodaillana cioidimaci. <sup>10</sup> Ie jira Pablo ana jaide. Naimie emodomo jítadacaida, naimiena meniñote. Cominimo llote:

—Omoi rucaicueriñeno. Naimie cajede. Jafaicina nia faite.

<sup>11</sup> Abido a jaidimaci. Jesús fiodaillana começillena, llomenicono tairuano, cominimo Pablo fecade. Guilla meinomo, naimaci diga naimie are ñaite, monaiacademo. Ie mei oní jaide. <sup>12</sup> Nainomona conirue jai cajede uitimaci. Ie jira nana naimaci naimieri eo iobidimaci.

*Miletto railla nairaímo Pablo jailla rafue*

<sup>13</sup> Pablodí Troamona Asón railla nairaímo arido jaiacana jira, botedo jaidicai. Iese uicomo Asónmo jaidicai. Nainomona Pablona botedo uiacadicai. <sup>14</sup> Ie jira Asónmo naimiena cai baillanona, cai diga botemo bite. Ie mei Mitilene railla nairaímo jaidicai. <sup>15</sup> Nainomona dane monailaido cai jaillano, ie areruido Quéo railla nairaímo ruicafabelle mo jaidicai. Dane ie areruido Samos railla nairai mamedo atona jaidicai. Ie areruido dane cai jaillano, Miletomo sijidicai. <sup>16</sup> Abi juarenia, Pentecostés railla rafue suilliruimo naimie Jerusalémo iacade. Pentecostés trigo ua ie rafue. Pascua rafue illa meinocóni, cincuenta digarui illanona bie rafue ite. Asia railla eniruemo naimie are iacaiñena jira, Pablo começina facade: “Efeso ecido monailaido jaiticai”.

*Efesomo ite creyentiaí sedarainimo Pablo llua rafue*

<sup>17</sup> Creyentiaína sedarainina uaidollena, Miletomona Efesomo Pablo cartana orede. <sup>18</sup> Naimie dine naimaci rillanona, Pablo naimacimo llote:

—Asiamo nano cue rillaruímona, niese omoi diga nagarui cue illana uñínotomoi.

<sup>19</sup> Cai Nama diga abina iedoño mo jaiuidicue. Eecana sure maijídicue. Judíuai cuena duere uñínotosía jira, ie facaiseconí dueredicue. <sup>20</sup> Cuemo ite marecinona omoímo jaca janofueidicue. Nana Jusíñamui rafuena omoímo jai lloticue. Omoi ofillanomo omoína llofueuidicue. Omoi jofuemo omoína jiaí llofueuidicue. <sup>21</sup> Judíuaina llofueticue. Judíuaiñedinona daje isoí llofueticue. Jusíñamui díbeímo omoí começiaí uaina meiduana lloticue. Cai Nama Jesúna omoi ñnuana jiaí lloticue. <sup>22</sup> Jusíñamui Joreñodí cuena jai jaicaitaja jira, Jerusalémo birui jaiticue. Nainomo ramo cue jirille rafuena uñínotedí; <sup>23</sup> iadedi Jusíñamui Joreñó naga nairaímo cuemo llote: “Llaveracomo ona gaitajano ona jonesíte. Duere sefuitio”. <sup>24</sup> Cue ille dínorí are illemo começina facañicue. Dama cue ille dínorí fuidoiacadicue. Cai Nama Jesúmona cue feiñoga maijiana fuidoiacadicue. Mare rafuena omoímo lloiacadicue. Jusíñamui omoína duenaillana jiaí lloticue. <sup>25</sup> Jusíñamui anamo omoi illa rafuena omoímo jai lloticue. Jai dane cue ueconca cioñínotomoi. Iena uñínoticue. <sup>26-27</sup> Cue uaina jaca janofueidí; ia nana Jusíñamui uai omoímo lloticue. Ie jira cuemona omoi diga cue começí mare. Jusíñamui uaido omoi jaiñenia, cue muidonañeite. <sup>28</sup> Mai omoi abí rairuí. Jusíñamui Joreñodí omoína creyentiaína sedatate. Naimacina raise seda. Jusíñamui díbeímo itinona llofue. Naimie Jito fiodailla muidona, naimacina ote, naimie iena. <sup>29</sup> Naimacidi toica llauaiaí isoídímaci. Nia abina raise uñínotedímaci. Cue jailla meinocóni, taino llorainídi, janallari isoí, omoímo biite. Naimaci nana omoi sedaca comínina ramo faite, danomo abido naimaci jaillena, jiconiaí llauaiaí gaitaja isoí. <sup>30</sup> Omoímona uanaíñedinona llorainídi iite. Creyentiaína ramo faitímaci, omoi llucínona faínonocañena, naimaci díbeímo illena. <sup>31</sup> Ie jira abina rairuí. Bie rafuena feitañeno. Daje



amani fiemona nana omoína jai llofueticue. Naiona omoína llofueticue. Aremona omoína jiai llofueticue. Omoína cue duenailamona, eianona omoína llofueticue. <sup>32</sup> Mai. Cai Nama illa anamo omoína fainonocaiticue. Naimie uaimona naimie omoína duenailana jai uiñotomoi. Naie uaidi omoína jai ocuiñotaite. Iemona Cristona iinocana jaitomoi. Nana naimie fetocano diga naimie illanomo ico jaca iitomoi. <sup>33</sup> Jiaino ie ucubena jaca nicidofedicue. Bu ie iniroillaina jaca jiai oiacañedicue. <sup>34</sup> Cue jitaile rana dama cue maijiano oticue. Cue diga jaidino imaci jitaile rana jiai dama cue maijiano oticue. Iena nana omoidi uiñotomoi. <sup>35</sup> Iese cue illamona omoína llofueticue. Iese maijiano duerede cominina canocana jaicadicaí. Cai Nama Jesús ie llogacinona uiñoticaí. Naimie raite: “Raruiaína cai feiñoia, iobidicaí; iadedi cai eo iobiacania, jainomo raruiaína fecadicaí”. <sup>36</sup> Naie llua meino, naimaci diga cañici ifodo rainadajano, Jusiñamuimo jüide. <sup>37</sup> Nana naimacidi eo eedimaci. Pablona caimaduanona, naimiena libanotimaci. <sup>38</sup> “Cuená dana cioñeitomoi?” naimacimo llua jira, eo sunaitimaci. Ieconí naimie diga botemo jaidimaci.

## 21

### *Jerusalémo Pablo jailla rafue*

<sup>1</sup> Naimacina cai facadua meinocóni, suiñodicai. Cos railla nairaimo atona jaidicaí. Ie are Rodas railla uiasimo ridicaí. Iemei Pátara railla nairaimo ridicaí. <sup>2</sup> Nainomo Fenicia railla eniruemo jaicade botena baiticaí. Nai botemo cai jailla mei, suiñodicai. <sup>3</sup> Chipre railla uiasina cai ciojia, cai nabei díbeimo ite. Iemei Siria railla eniruemo jaidicaí. Tiro railla nairaimo sijidicaí. Botedo uiga raruiaína nainomo joneacadimaci. <sup>4</sup> Tiromo ite creyentiaí cai baillanona, siete digarui naimaci diga iticaí. Jerusalémo naimiena judúuai meineñellena, nainomo naimie jaiñellena, Jusiñamui Joreño naimacina Pablomo llotatate. <sup>5</sup> Digarui illa meinomo oni jaidicaí. Naie nairaimona nana naimaci cai diga jaidimaci. Riñoniaí, naimaci uruiaí diga, jaidimaci. Caiñici ifodo monaillai fuemo ana rainadajano Jusiñamuimo jüidicaí. <sup>6</sup> Naimaci facadua meinocóni, botemo jaidicaí. Naimaci imaci jofuemo abido jaidimaci. <sup>7</sup> Tiromona Tolemaida railla nairaimo jaidicaí. Creyentiaína uaiduano, darui naimaci diga iticaí. <sup>8</sup> Ie are jaillano, Cesareamo cai ria, Felipe jofomo jaidicaí. Felipedi Jesucristo ie rafuena lloraíma. Jerusalémo diáconuaina creyentiaí jaié fetuaí faicaí, Felipena fetodimaci. <sup>9</sup> Naimie dinomo fiebidicaí. Naimiemo cuatro jisa ite. Naiñaiñuái nia íima abina uiñoñede. Jusiñamui naiñaiñuáiimo llucacinona llocabitimaci.

<sup>10</sup> Digarui nainomo cai illamo Judeamona damie bite. Naimie mameci Agabo. Jusiñamui facaina lloraíma. <sup>11</sup> Caimo ria, naimiedi Pablo cinturóna aiñode. Naie diga ie eillina maite. Ie onollina jiai maite raillano:

—Jusiñamui Joreño raite: “Jerusalémo judúuai illaicomini bie cinturón jainaoide íimana daje isoi maitimaci. Judúuaiñedinomo naimiena fecajitimaci” raite.

<sup>12</sup> Naiena cai cacajano, naie comini diga, Pablona caididicaí, naimie Jerusalémo jaiñellena. <sup>13</sup> Pablo uai ote:

—¿Bue ñellena eedomoi? ¿Bue ñellena cue comecina ocuiñotañedomoi? Cue maiana jaca jitaídícue. Ua cue fiodaillana jaca jiai jitaídícue. Cue Nama Jesús muidona cue fiodaíadedi, damamai fiodaíticue.

<sup>14</sup> Cai lloga uai naimie iñoñena muidona, raiticaí:

—Cai Nama jitaile rafuena finuana jitaídicaí. —Iemei llicaidicaí.

<sup>15</sup> Nano ñigarui illanona, cai raruiaína finuano, Jerusalémo jaidicaí. <sup>16</sup> Cesareamo ite creyentiamona jiaino cai diga jaidimaci. Mnasón jofomo caina uitimaci. Naimiedi Chipre railla uiaí imie. Naimiedi nano bie rafue tainiamona creyente.

### *Jacobo diga Pablo ñaia rafue*

<sup>17</sup> Jerusalémo cai ría, creyentiaídi caina caimare uaidotimaci. <sup>18</sup> Ie are Pablo, cai diga, Jacobo dine jaide. Nana creyentiaína sedaraini nainomo jai ofidimaci. <sup>19</sup> Uaidua mei, Pablo nagacinuaido Jusiñamui judúuaiñedinomo finoca rafuena llote:

—Cue llofuiamona ailluena judúuaiñedino creyentiaína jaidimaci —llote.

<sup>20</sup> Naie rafuena cacajano, Jusiñamuimo iobillacinona fecadimaci. Iemei naimiemo llotimaci:

—Ama, ero, judúuaiamona ailluena comini jai creyentiaína jaidimaci; ia nana naimaci Moisés micori llogacinodo eo jaidimaci. <sup>21</sup> O finoca rafuena jai fididimaci. Ona comini ñaiana jai fididicaí. Jiaie nairai motomo ite judúuaina Moisés micori llogacinona fainonocailana llofuetio. Naimaci uruiaí abina deñenana llofuetio. Moisés micori llogacinuaido jaiñellena llofuetio. <sup>22</sup> Ie jira ¿ñiese nibaiticaí? O rillana jai fididimaci. <sup>23</sup> Ie jira omo cai llua fina. Cai ecimo cuatro íima jai ite. Nie isoide rafuena Jusiñamuimo jai llotimaci. <sup>24</sup> Jusiñamui jofomo naimacina uiño. Naimaci diga Moisés micori llua isoi, o abi fino. Naie rafuena raise fuidollena, Jusiñamuimo fecallena, toica ocainaiaina naimaci

facaina iba. Naie rafue omoi fuiduanona, omoi ifogina rijiruda gareitomoí. Ie mei nana comini mare rafuena o finocana jaillana uiñoitimaci. Moisés micori llogacinodo o nia jaillana uiñoitimaci. Iese omo lloiacadicaí. <sup>25</sup> Judíuáñedino Moisés micori llogacinodo jaillana lloñeiticai. Naimacimona creyentiaina jaidinomo navui cueticaí: “Jiraraímo fecaca rana riñeno. Diruena riñeno. Llerinoga rana riñeno. O aiñede riño diga iñeno. O iñifeđe iima diga iñeno” cueticaí.

<sup>26</sup> Pablo “Jee” raillanona, nai cuatro iima diga ie are Moisés micori llogacinona finuano, Jusiñamui jofomo jaide, naimie ie finoca rafue fuillarui llollena. Jusiñamuimo nagamiiaí rana fecajaruina jiaí llote. Siete digarui illanona, Moisés micori llua isoi, naie rafuena fuidoiacadimaci.

*Pablona gaitaja rafue*

<sup>27</sup> Naie siete iruillaí fuiacananaruillaímo Asiamona damierie judíuáidi bitimaci. Jusiñamui jofomo Pablona ciuano, comini comeciaina feidocana uitimaci. Pablona gaitajanona, <sup>28</sup> cuiriidimaci:

—Caimaci, caina cano. Bimie naga illanomo llofuiamona, cominina raise itatañede. Moisés micori llogacinuaido jaiñede. Bifona raise sedañede. Judíuáñedino bifomo atiano, bie mare jofo naimie jai jeare finode.

<sup>29</sup> Iese ite: Jerusalémo Trófimo diga Pablona ciodimaci. Trófimodi Efeso nairai imie. Judíuáñedimie, Pablo naimiena Jusiñamui jofomo uillamo comecina facadimaci; iadedi uiñede. Judíuáí cominimona judíuáñedimie Jusiñamui jofomo jaillana maraiñede.

<sup>30</sup> Asiamona bitino cuirillamona, nana Jerusalémo ite comini icirinaidimaci. Aisicana Jusiñamui jofomo jarire ofidimaci. Pablona gaitajanona, naifomona naimiena jino sonodimaci. Ie mei Jusiñamui jofona sedaraini nasena ibaidimaci. <sup>31</sup> Pablona meineiacania, soldaduai ie comandantedi nana comini ieillana fidide. <sup>32</sup> Ieconí naimiedi, ie soldaduai diga, nana ie illacomini diga, comini dine aisicana bitimaci. Ie jira cominidi naimacina ciuano, Pablona fajana faínonocaidimaci. <sup>33</sup> Comandante naimiemo iaireicaia, Pablona gaitade. Naimiena mena lloeo diga maillena llote. Jicanote:

—¿Bu naimiedi? ¿Bue ñete?

<sup>34</sup> Nana ieidinodi jiaíforie llotimaci. Ie jira naie rafuena naimie jaca uiñoñede. Ie muidona cuatelmo naimiena uillena llote.

<sup>35</sup> Cuartel tidabacuimo naimacía, comini jarire jailla jira, soldaduai Pablona uitimaci. <sup>36</sup> Ailluena comini racadimaci. Ocuioisite:

—¡Naimiena meine!

*Pablo ie abi riidua llua rafue*

<sup>37</sup> Cuartelmo jaiacania, Pablo comandantemo llote:

—O diga ñaiacadicue.

Raijicaillamona, naimie uai ote:

—Griego uaido ñaitio— <sup>38</sup> Jiaí llote—. Egipto imieñedio. Navui jobaime finodio. Jofue iñenanomo, cuatro mil cominina meinetinona uitio.

<sup>39</sup> Pablo uai ote:

—Naimieñedicue. Judío imiedicue. Ciliciamo ite Tarso railla nairaimona biticue. Naie nairai mamecidi are soride. Cominimo cue llollena, omo jicanoiacadicue.

<sup>40</sup> —Jee —raite. Pablo tidabacui muidomo naidaide. Cominina llicaitallena, ie onollina jaidide. Comini llicaitaí mei, Pablo judíuáí uaido naimacimo llote:

## 22

1—Caimaci, einamací, cue abi riiduacinomo mai omoi cacarei.

2 Naimie judíuáí uaido llua naimací cacajano, llicaidimaci. Ie jira Pablo llote:

3—Judío imiedicue. Ciliciamo ite Tarso railla nairaimo jeicigacue. Bene omoi nairaimo escuelamo jaidicue. Gamalielmona fueoticue. Moisés micori llogacinuaina eo raise facadicue. Jusiñamui rafuedo birui omoi isoi jaidicue. <sup>4</sup> Jesucristo innotinona jaie eo duere finodicue. Diga creyentiaina maianona, cárcelmo joneticue. Iñiaina duere finodicue. Riñoniaina jiaí duere finodicue. <sup>5</sup> Jusiñamui diga nanoca ñairaima cuena uiñote. Nana omoi illacomini cuena uiñotimaci. Creyentiaina duere finollena, naimacimona dajerie cartana jaie feiñoticue. Damascomo ite judíuáímo cuetimaci. Damascomo jaidicue, nainomo ite creyentiái maiano, Jerusalémo atianona, naimacina duere finollena.

*Pablodi Jesúsna inuana llua rafue*  
(Hch 9.1-19; 26.12-18)

<sup>6</sup> Omoimo bie rafuena lloiticue. Jerusalémona jaidicue; iadedi Damascomo cue iaireicaia, jítoma naidai iacania, ieconí monamona damie cue abina eo quetiñote. <sup>7</sup> Eniruemo ana uaidicue. Monamona damie cuemo llua nacaadicue: “Saulo, Saulo, ¿bue ñellena cuena

duere finodio?”<sup>8</sup> Jicanoticue: “¿Budío?” Monamona damie uai ote: “Nazaret ie Jesúsicue. Cuena duere finodio”.<sup>9</sup> Cue diga itinodi cue quetiñua rana cioidimaci; iadedi cue diga ñaitimiena cacaiñedimaci.<sup>10</sup> Raiticue: “Nama, ¿bue ñeiticue?” Cai Nama cuena raite: “Naidadajanona, Damascómo jai. Nainomo o finolle rafuena omo lloiticue”.

<sup>11</sup> Cuena eo quetiñua jira, cioñedicue. Cue diga itino cue onollido llinocaida, Damascómo cuena uitimaci.<sup>12</sup> Nainomo Ananías raillamiedi ite. Jusiñamuina eo ñnote. Moisés micori llogacinuaido eo jaisoide. Nainomo ite judíuaidi naimiema: “Mare” raitimaci.<sup>13</sup> Naimie cuemo bite. Cuemo llote: “Saulo, ama, mai oni eroda”. Ieconí dane erodajanona, naimiema cioidicue.<sup>14</sup> Naimie raite: “Cai usumatiai micoriai ie Jusiñamuidi ona fetode, naimie jitaille rafuena o uñollena, ie mare Jitona o cioillena, naimie uaina o cacareillena.”<sup>15</sup> Nana cominimo naimiema lloitio. Nana o ciua rafuena lloitio. Nana o cacaja rafuena jiai lloitio.<sup>16</sup> Mai cue lluaña ñino. Naidadajanona, o jecino oni dotallena, Jusiñamuimo jica. Ie mei bautiza” raite.

### *Judíuainedíno Pablo jailla llua rafue*

<sup>17</sup> Ie mei Jerusalémo abido cue billa mei, Jusiñamui jofomo Jusiñamuimo cue jiiia, nicairiticue isoidicue.<sup>18</sup> Cai Namana cioidicue. Cuemo llote: “Jerusalémona raire mai jai. Cominidi o cuena lluaña feiñoñeitimaci”.<sup>19</sup> Uai oticue: “Nama, naga judíuai ofiracómo ona ñnotinona fauidicue. Cárcelmo naimacina joneuidicue. Nama, Jerusalémo itino iena uñotimaci.”<sup>20</sup> Esteban micori fiodailla facaiseconí nainomo iticue. Naimie o facaina lloraima. Naimie fiodailla jira, iobidicue. Naimiema meinetino ñiroina sedadicue”;<sup>21</sup> iadedi cue Nama cuemo llote: “Mai jai. Judíuainedíno ona are oretaiacadicue”.

### *Comandante anamo Pablo illa rafue*

<sup>22</sup> Bie lloga dinori cominí Pablo lluaña cacadimaci. Iemei cuirridimaci:  
—Bie isoide ñima illana benomo jitañedicai. ¡Naimiema meine!  
<sup>23</sup> Cuirrillamona naimaci ñiroina jaidisite. Icirisiano eniruena jiai fadosite.<sup>24</sup> Judíuai uaido cominimo Pablo llua jira, comandante iena cacaiñede; iadedi cominí icirillana ciuanona, naimie llote:  
—Naimiema cuartelmo uñño. Naimiema fano. Naimiemo ite rafuena caimo naimie llollena, naimiema duere fino.

<sup>25</sup> Naimiema maiano naimiema fallena, Pablodi nainomo ite capitámo jicanote:  
—¿Juez ñia lloñenia, romano nairai imiema fajana mare? Romano nairai imiedicue.

<sup>26</sup> Capitán iena cacajano, comandante dine jaide. Iena llote. Jicanote:

—¿Ñiese ñibaitici? Bimie romanuai nairai imie.

<sup>27</sup> Iena cacajano, comandante bite. Pablomo jicanote:

—¿O Romano nairai imiedio?

Pablo uai ote:

—Jii.

<sup>28</sup> Comandante dinena raite:

—Romanuai nairai imiema cue jaillena, eo ibadicue.

Pablo uai ote:

—Romanuai nairai imiema jeicigacue.

<sup>29</sup> Ieconí naimiema duere finoacadino naimiemona raire oni jaidimaci. Pablo romanuai nairai imiema jira, naimiema jai ebena maia jira, comandante jiai jacinaita. Comecina ñibai facade: “Iese naimiemo cue finua jira, ie ibana ollena, cue illaímamo cuena jiai llogidoite”.

### *Illacomini motomo Pablo illa rafue*

<sup>30</sup> Comandantedi judíuai Pablona llogiduana ua raise uññoiacade. Ie jira ie are Pablona suiñollena llote. Jusiñamui diga nanoca ñairaini, nana judíuai illacomini diga, ofillena llote. Pablona atiano, naimaci motomo uillanona, naimiema naidanete.

## 23

<sup>1</sup> Ie abina riidollena, Pablo naie judíuai illacomini motomo ite. Naimacimo eruailano, Pablo raite:

—Caimaci, cuemona nana cue illa dinori Jusiñamui jitailla rafuena finocabidicue. Naimiemona cue comeci mare.

<sup>2</sup> Ananiadi Jusiñamui diga nanoca ñairaima. Pablo lluaña naimie gaiñenamona, Pablo ecimo itinona Pablo fuena farotate.<sup>3</sup> Pablo dinena naimiemo llote:

—Jusiñamui o fuena faroite. Mareuidimema abina caitadio. Moisés micori llogacinuai muidona benomo itio, cuemo llollena; iadedi cue finoca rafuena raise o uññoeno cue fue ebena farollena llotio.

<sup>4</sup> Nainomo itino raite:

—Jusiñamui diga nanoca ñairaimamo jeare ñaitio.

<sup>5</sup> Pablo uai ote:

—Moisés micori iena jaie cuiana uifnoticue. “Illaicomini na jeare ñaifeno” cuete. Caimaci, naimie Jusifamui diga nanoca ñairaima illana uifnotedicue. Uifnoticuedena, naimiemo iena lloñedicue.

<sup>6</sup> Cominimo Pablo eruailamona, saduceuai railla comini nainomo illana ciode. Fariseuai railla comini nainomo illana jiai ciode. Ie jira naimacimo ado lloste:

—Caimaci, fariseo imiedicue. Fariseo imie jitodicue. Fiodaillamona ico jilluacinomo ocuiriticue. Ie jira bene cuena llogidoiacadomoi.

<sup>7</sup> Naimie iena lloia, naimaci comeciai daje isoi lloifnedimaci. <sup>8</sup> Saduceuai cominidi fariseuai comini isoi inoñedicaci. “Fiodaillamona jilloñeiticai” saduceuai comini raillana inoside. “Jusifamui jaienisaifñede. Comini joreñuafñede” raillana inoside; iadedi fariseuai comini dinena nana naie rafue illana inotimaci. <sup>9</sup> Ie jira eo failñaaidimaci. Fariseuai motomona jaino naidadajanona, lloste:

—Bimiemo jeacino ifñede. Jusifamui jaienici naimiemo ñibai jaie llumona, bie rafue naimiemo ite.

<sup>10</sup> Naimaci iese riire failñaaidimaci. Naimaci Pablona llagui raillano, comandantedi soldaduaimo cuartelmo naimiema uillena lloste.

<sup>11</sup> Ie are naiona cai Nama Pablomo bairedede. Raite:

—Comecina ocuifño. Jerusalémo cuena o llua isoi, Romamo cuena jiai lloitio —raite.

*Pablona meineiacana rafue*

<sup>12</sup> Monaidemo, judíuaimona jaino comeciaina facadimaci: “Pablona nia cai meineñenia guifñeiticai. Jiroñeiticai”. <sup>13</sup> Cuarenta baifemo ite comini iese comeciaina facadimaci.

<sup>14</sup> Naimaci judíuai illaicomini dine jaillano, raitimaci:

—Dani comeciaina facadimai: Pablona nia cai meineñenia, jaca buena guifñeiticai. <sup>15</sup> Omoi dine Pablona atillena, naimiemo eo raise jicanua isoi, comandantemo jicano. Pablo iairei bia, naimiema cai meinellena, ocuidoiticai.

<sup>16</sup> Pablo enaise naie rafuena fidiano, cuartelmo jaide, Pablomo lloiena. <sup>17</sup> Iena cacajano, Pablodi capitána uaidote. Raite:

—Bie coniruena comandante dine uifño. Naimie diga ñaiacade.

<sup>18</sup> Ie jira naimiema uite. Raite:

—Cuartelmona Pablo cuena uaidote. Bie conirue omo atillena cuemo jicanote. O diga ñaiacade.

<sup>19</sup> Naimie onollina comandante llinocaida, bai ie atianona, naimiemo jicanote:

—¿Bue cuemo lloiacadio?

<sup>20</sup> Naimie uai ote:

—Ico are Pablona illaicomini dine uillena, naimiemo eo raise jicanua isoi, omo jicanollena, judíuai dani comeciaina facadimaci. <sup>21</sup> Naimaci jitailla isoi finoñeno. Cuarenta digamie baifemo naimiema reiduano sedadimaci. Llotimaci: “Guifñeiticai, jiroñeiticai, Pablona nia cai meineñenia”. Naimacidi omo jicanolle rafuena o finollena sedadimaci.

<sup>22</sup> Comandante coniruena facaduano raite:

—Jaca bumo cuemo o llua lloñeno.

*Félix dine Pablo oretaja rafue*

<sup>23</sup> Comandante mena capitána uaidote. Lloste:

—Doscientos soldaduaina uaido, imaci raruiai finollena, Cesareamo navuida baife imaci jaillena. Sententa caballuaido jaitino uaido. Doscientos ducirainina jiai uaido. <sup>24</sup> Jiaie caballona ati, naie emodomo rainadacaida Pablo jaillena. Félix railla gobernador dine naimiema raise uifño—lloste. <sup>25</sup> Cartana jiai cuete. Iese cuete: <sup>26</sup> “Félix, omo cueticue. Claudio Lisiadicue. Cai mare gobernardio. ¿Nigacino? Cue uai o dine oredicue. <sup>27</sup> Damie o dine oredicue. Judíuai naimiema meineiacana jira, soldaduai diga naimiema gaitaticue. Naimiema gaitataja mei, naimiedi romanuai nairai imienana fididicue. <sup>28</sup> Judíuai illaicomini dine naimiema uiticue, naimaci llogiduacinona raise cue uifñollena. <sup>29</sup> Naimaci einamací llogacinuai muidona naimiema llogidotimaci. Iena fididicue. Naimie jaca buena finoñede. Naimiema meinellena, naimie cárcelmo jonellena lloiacañedicue. <sup>30</sup> Jaino naimiema dane meineiacanana fididicue. Ie jira o dine naimiema oretaticue. Ie llogidotino o dine jaillena jiai lloiticue. Naimaci naimiema omo lloitimaci” cuete.

<sup>31</sup> Comandante llua isoi, soldaduai naiona Pablona Antipatrisimo uitimaci. <sup>32</sup> Ico are eillido jaide soldaduai cuartelmo abido bitimaci; ia Pablo caballuaido jaidino diga oni jaide.

<sup>33</sup> Cesareamo railla nairaimo rillanona, gobernadormo cartana fecadimaci. Naimie dine Pablona jiai uitimaci. <sup>34</sup> Gobernador cartana facade. Ie mei Pablomo ie nairai illanona jicanote. Pablo uai ote:

—Cilicia.

<sup>35</sup> Gobernador dinena raite:

—O llogidotino bia, o rafuena cacajiticue.

Soldaduaimo jiaí llote:

—Omoi anamo Herodes railla illaíma micori jofomo naimiēna seda.

## 24

*Félix dine Pablo riidua rafue*

<sup>1</sup> Dabecuirorui illa mei, Ananías bite. Naimiedi Jusiñamui diga nanoca ñairaima. Jiaie illaicomini diga bite. Tértulo raillamie jiaí bite. Naimiedi llogidoraima. Gobernadormo Pablona llogiduabitimaci. <sup>2</sup> Pablona uaidua mei, gobernadormo Tértulo Pablo finoca rafuena llote:

—Félix, bie rafue omo lloiticue. Eo mareuidimiedio. O muidona eo uri iticai. Cai nairaina canollena, diga mare rafuena finodio. <sup>3</sup> Iobillamona, nana cai iena feiñoticaí.

<sup>4</sup> Ona icicaiñedicue; iadedi o fue maria jira, cue lluomo dallu cacarei. <sup>5</sup> Bimiedi eo cai abina aruire finode. Nana eniruemo ite judíuaina uri itañaēde. Naimiedi Jesús raillamie rafuedo jaidino illaíma. <sup>6</sup> Jusiñamui jofona jeare naimie finoiacana jira, naimiēna gaitadicaí. Moisés micori llogacinuaido naimiēna duere finoacadicaí; <sup>7</sup> iadedi comandante Lisias ride. Caimona naimiēna riire bairode. Naimiēna cai llogidollena, o dine cai billena caímo llote. <sup>8</sup> Pablomo o jicanoiacania, naimiēmona bie rafuena uñoitio. Nana naimiēna cai llogiduacinona uñoitio.

<sup>9</sup> Judíuái illaicomini, Tértulo llua isoi, dacinodo llotimaci.

<sup>10</sup> Iemei gobernador dinena Pablomo llote:

—Mai o facaina o ñaino.

Ie jira Pablo ñaite:

—Diga años cai nairai o anamo iticai. Ie jira cue abina riiduacinona omo marefodo lloiticue. <sup>11</sup> Doce digarui illanona, Jerusalémo como birui ridicue. Iena uñoiacadosa jiaie cominimo jicano. Jusiñamuina sedallena, Jerusalémo iticue. <sup>12</sup> Bu diga conima uaina jaca uaitañedicue. Jusiñamui jofomo uaina uaitañedicue. Judíuái ofiracuaimo uaina jiaí uaitañedicue. Naisomo uaina jiaí uaitañedicue. Cominina uri itañaēnana lloñedicue. <sup>13</sup> Nie isoide rafuena cue finuana cioñedimaci. Ie jira cuena raise llogidonidimaci; <sup>14</sup> iadedi jiaie rafuena lloiticue. Cai usumatiaí Jusiñamuina sedadimaci. Naimiēna jiaí sedadicue. Nana Moisés llogacinuaina iñoticue. Nana Jusiñamuina lloraini micriai cuegafuaina iñoticue. Bimacimona jiaie llogacinuaido jai jaidicue. Bimacimona uanañedicinodo jaidicue. <sup>15</sup> Fiodaillamona comini ico jilloillena iñoticue. Jusiñamuina iñotino jilloitimaci. Jusiñamuina iñoñedino jiaí jilloitimaci. Beno itino iena jiaí iñotimaci. <sup>16</sup> Ie jira marena iacadicue, “Maraiñede rafuena Pablo finode” comini lloñellena, “Maraiñede rafue Pablo finode” Jusiñamui lloñellena. <sup>17</sup> Diga años Jerusalémo abido biñedicue. Jerusalémo ite dueredinona canollena, ucubena birui atidicue. Jusiñamuina jiaí sedajaididicue. <sup>18</sup> Moisés micori llua isoi, cue abi marena finuano, nairui Jusiñamui jofomo cuena baitimaci. Aillena comini cue diga iñede. Cominina iciritañedicue. <sup>19</sup> Naie facaise Asiamona jiaie judíuái bitimaci. Cuemo nicino ia, ¿bue ñellena naimaci bene biñedimaci, cuena llogidollena? <sup>20</sup> Naimaci biacaiñenia, ¿bue ñellena bene itino bie rafuena raise lloiacaiñedimaci? Naimaci motomo Jerusalémo cue ia, maraiñede rafuena cue finuana lloñedimaci. <sup>21</sup> Navui naimaci motomo cue lloticue: “Fiodaillamona comini ico jilloitimaci”. Iena birui ñaitimaci. Ie jira cuena llogidoiacadimaci.

<sup>22</sup> Félixdi Jesús dibeimo itino rafuena raise uñua jira, Pablo rafuena nairuido siadoiacaiñede.

—Comandante Lisias bia, dane omoi rafuena siadoiticue —raite. <sup>23</sup> Félix capitámo Pablo cárcelmo sedajana llote. Naimiēna maiñellena jiaí llote. Naimiēna canollena, naimie nabaiñiaí naimie dine jaillena rairuñede.

<sup>24</sup> Diga irui illa mei, Félix, ie ai diga, bite. Naiñaiño mameci Drusila. Naiñaiñodi judía iñaiño. Pablona uaidua mei, Pablo llofuiana cacadiiamaiaí. Jesúsna iñuana cacadiiamaiaí.

<sup>25</sup> Jeacino finoñellena, dama ie jitailla rafuena finoñellena, jiaíruído Jusiñamui riicallafue anamo iñellena cacadiiamaiaí. Pablo llofuiamona Félix jacinaite. Ie jira raite:

—Jai macaibaite. Cue abi juarelliruido ona dane uaidoiticue.

<sup>26</sup> Pablo jino jaille iballe ucubemo ocurirde. Ie jira diga icaiño naimiēna uaidote, naimie diga ñaillena. <sup>27</sup> Mena años illa mei, Porcio Festodi Félix ifo meidote. Félixdi judíuaina iobitaacana jira, cárcelmo Pablona faínonacaide.

## 25

*Festomo Pablo llua rafue*

<sup>1</sup> Naie provinciamo darui amani rilla mei, Cesareamona Jerusalémo Festo jaide. <sup>2</sup> Nainomo Jusiñamui diga nanoca ñairainidi, jiaie judíuai illaicomini diga, Festomo Pablona llogidotimaci. <sup>3</sup> Festomo daje rafuena jicanotimaci, naimaci iena. Pablona Jerusalémo atillena jicanotimaci. Naiso motomo naimiena meinellemo comeciaina facadimaci. <sup>4</sup> Festo uai ote:

—Pablo Cesareamo fiebiite. Raire nainomo abido jaiticue. <sup>5</sup> Omoi illaicominimona damerie cue diga jaitimaci, nicino naimiemo ia, naimiena llogidollena.

<sup>6</sup> Nibai ocho, nibai diez diga irui nainomo illa mei, Cesareamo naimie abido jaide. Ico are ie cominimo louillanomo raide. Pablo atillena llote. <sup>7</sup> Pablo billa mei, Jerusalémona bite judíuai naimie ecimo ofidimaci. Diga fododicinona naimiena llogidotimaci; iadedi tainuaido llogidotimaci. <sup>8</sup> Pablo uai ote:

—Judíuai llogacinuaina jaca jeare finoñedicue. Jusiñamui jofona jeare finoñedicue. Cai nanoca illaimamo jearede rafuena jiai finoñedicue.

<sup>9</sup> Iena cacade; iadedi Festo judíuaina iobitaacana jira, Pablomo jicanote:

—¿Jerusalémo cue diga jaiacadio? Nainomo nana bie rafuena siadoiticue.

<sup>10</sup> Pablo uai ote:

—Llogidoracomo jai iticue. Cai nanoca illaima facaina cominimo llotio, naimacina duere finollena. Benomo cue lolle. Judíuaimo jaca buena finoñedicue. Iena raise uiñotio. <sup>11</sup> Romanuai railla nairai illaicomini llogacinona cue ñinoñenia, damamei jearede rafuena cue finoa, cue fiodaillamo jaca ocuiridicue; iadedi cuemo nicino iñenia, cuena meinellena bu cuena judíuaimo fecañeite. Cue rafue naimie siadollena, Romamo cai nanoca illaima dine jaiacadicue.

<sup>12</sup> Ie ecimo ite canoraini diga Festo ñaia mei, Festo raite:

—Cai nanoca illaima dine o jaiacana jira, nainomo jaitio.

#### *Agripamo Pablo llua rafue*

<sup>13</sup> Diga irui illa mei, Agripadi Festo dine, ie miriño Berenice diga, Cesareamo bitiaimaiai. Agripadi naie enirue illaima. <sup>14</sup> Diga irui nainomo itiaimaiai. Naimiemo Festodi Pablo ie rafuena llote:

—Félix Pablona cárcelmo bene fainonocai. <sup>15</sup> Jerusalémo navui cue ia, Jusiñamui diga nanoca ñairaimadi, judíuai einamac; diga, naimiena llogidote. Naimiena duere finollena cuemo jicanotimaci. <sup>16</sup> Naimaci uai oticue: “Cai Romanos cominidi llogidogamiēna jamai tainomo duere finoñedicai; iadedi llogidogamiēdi ie llogidotino uai nano cacareiticaí. Ie mei ie abi riidollicinomo jiai cacareiticaí”.

<sup>17</sup> Ie jira naimaci cue dine benomo navui bia, ie are cominimo cue louillanomo raidicue. Pablona cue dine uaidoticue. <sup>18</sup> Naimiena llogidotinodi lloia, naimiena marañede finoca rafue cue facaja isoi, llogidoñedicaci. <sup>19</sup> Dani naimaci ñinuacinona llotimaci. Jesús raillamie rafuena llotimaci. “Jesús jai fiodaite” raitimaci; iadedi Pablodi: “Jesús jai cajede” raite. <sup>20</sup> Bie rafuena raise cue uiñoñenia, naimiemo navui jicanoticue: “¿Jerusalémo jaiacadio, nainomo bie rafuena siadollena?”; <sup>21</sup> iadedi Pablo nainomo jaiacañede. Cai nanoca illaima dine jaillena jicanote. Nainomo ie rafuena siadollena jitaie. Ie jira naimie sedajana lloticue, cai nanoca illaima dine naimiena cue nia oretañenia.

<sup>22</sup> Agripadi Festomo llote:

—Naimie ñaiana cacacadicue.

Festo uai ote:

—Ico are naimie ñaiana cacareitio.

<sup>23</sup> Ie jira ie are Agripa, iaimaiai Berenice diga, gobernador ofiracomo bitiaimaiai. Finobillano ebire bitiaimaiai. Soldaduai imaci illaicomini jiai bitimaci. Naie nairaimo ite nanoca comini jiai bitimaci. Ofilla mei, Festo Pablona atillena llote. <sup>24</sup> Festo llote:

—Agripa, nana beno itino, bimiena ciodomoi. Jerusalémo ailluena judíuai naimiena llogidotimaci. Bene cue dine jiai bitimaci. Naimie meiniana eo jitaídímaci; <sup>25</sup> iadedi naimiemo nicinodi iñenana jai uiñoticue. Naimiena meinellena cue lollena, nicinodi naimiemo iñede. Augusto dine naimie jaillena naimie jicanua jira, naimiena oretaiticue. <sup>26</sup> Nicinodi nia iñede, cai illaimamo cue cuellena. Ie muidona omoi dine naimiena jai atidicue. Agripa, naimie ñaiamo raise cacarei. Naimiemo cai jicanua mei, nibai nicino naimiemo illana uiñoiticaí. Iemona Augustomo cueiticaí. <sup>27</sup> Augusto dine llavecamiē cue oretaia, naimiemo nicino iñenia, cuemona marañede.

## 26

#### *Pablo ie abina dane riidua rafue*

<sup>1</sup> Naie facaise Agripa Pablomo llote:

—Mai llono. O abi riiduacinona cacacadicue.

Pablo: “Jii” raillanona, ie onolli a ñuitade. Raite:

<sup>2</sup>—Agripa, bene o illa jira, cuemona mare. Cue fue baillafuedo o uicomu cue abina riidoiticue. Judíuái cominidi diga rafuena cuena llogidotimaci. <sup>3</sup>Nana cai judíuái rafuena raise uifnotio. Nana cai einamací rafuena jiaí uifnotio. Cuemo raise cacarei. <sup>4</sup>Jerusalémo naimaci motomo cue illa jira, diga judíuái cue coniruenamona cuena uifnotimaci. <sup>5</sup>Cuena naimaci lloiacania, fariseo imiena cue illana are uifnotimaci. Jiaie comini baifemo fariseuái cai einamací llogacinuaina inotimaci. <sup>6</sup>Jusiñamuidi cai usumatia micoriaimo fiodaillamona comini ico jilloillena jiaie llote. Ie suillemo jai ocuiridicue. Ie jira llogidoracomu birui jai iticue. <sup>7</sup>Nagarui Jusiñamuina naimaci eo sedajamona, cai doce nairaidi naie llogacino suillemo jiaí nia ocuiridimaci. Ore illaíma, bie ocuirillacino muidona judíuái illaicomini cuena llogidotimaci.

<sup>8</sup>¿Bue ñellena Jusiñamuidi comini fiodaillamona jillotajana inoiacaiñedomoi? <sup>9</sup>Jiaie ie isoidicue. Nazaret ie Jesúna inotinona diga jearede rafuena jiaie finoacadicue. <sup>10</sup>Jerusalémo iena finodicue. Cárcelmo ailluena Jesúna inotinona joneticue. Jusiñamui diga nanoca ñairaini uaido iena finodicue. Naimacina meinelle cai illaicomini raia: “Jee” raisoidicue. <sup>11</sup>Diga judíuái ofiracomu, diga icaiño, naimacina duere finodicue. Naimaci Jesúna jeare ñaiana jitaicicue. Naimaci diga cue eo icirilla jira, jiaie eniruemo ite nairaimo jiaí jaidicue, naimacina duere finollena.

*Pablodi Jesúna inuana llua rafue  
(Hch 9.1-19; 22.6-16)*

<sup>12</sup>Ie jira Damascomu jaidicue. Jusiñamui diga nanoca ñairaini uaido jaidicue. <sup>13</sup>Ore illaíma, jítoma naidai ia, monamona quetiñotena cidicue. Naidi jítoma baifemo quetiñote. Cue abina quetiñote. Cue diga itino abina jiaí quetiñote. <sup>14</sup>Eniruemo cue ana uaia, damie lluaana cacadicue. Judíuái uaido cuemo llote: “Saulo, Saulo, ¿bue ñellena cuena duere finodio? Cue diga icirillana eo sefuiruitio. Iemona o abina duere finodio, riicaillamona raise maiga jurareta suiñoacana isoi. Ie isoidio. Riicaillamona, cuena duere finoacadio”. <sup>15</sup>Uai oticue: “¿Budiotá?” Cai Nama cuemo llote: “Jesúdicue. Cuena duere finodio. <sup>16</sup>Mai a naidacai. Cue rafuena o llofuellena ona fetodicue. O birui ciua rafuena lloitio. Ona cue uifnotalle rafuena jiaí lloitio. <sup>17</sup>Naimaci ona duere finoia, omoi cominimona ona jillotaiticue. Judíuáiñedinomona ona jiaí jillotaiticue; iadedi judíuáiñedino dine ona oretaiticue, <sup>18</sup>naimaci comeciaí tainomo inellena. Taife anamona Jusiñamui anamo naimacina itataitio. Jeacino anamo naimaci birui illa jira, jítiredinomo jai itimaci isoidimaci. Jusiñamuina uifnuamona, useredinomo iitimaci isoidimaci. Iemei Jusiñamui naimaci jeacinona dotajite. Cuena naimaci inuamona, nana cuena inotino diga cue illano ico jaca itimaci”.

<sup>19</sup>Ore Agripa, monamona cue cacaja rafuena inoticue. Jesúdi Jusiñamui Jítoma inoticue. <sup>20</sup>Damascomu itinomo iena nano lloticue. Ie meí Jerusalémo itinomo iena jiaí lloticue. Diga Judeamo itinomo iena jiaí lloticue. Judíuáiñedinomo iena jiaí lloticue. Lloticue: “Omoi comeciaino iticinona meido, Jusiñamui debeimo omoi illena. Omoi comeciaino iticinona omoi meidua meí, mare rafuena finocana jai”. <sup>21</sup>Ie jira judíuái illaicomini Jusiñamui jofomo cuena gaitadimaci. Cuena meineiacadimaci; <sup>22</sup>iadedi Jusiñamui cuena canode. Ie jira birui bene iticue. Illaicomini beno nia lloticue. Illaicominiñedinomo jiaí nia lloticue. Dama Jusiñamui facaina lloraini micoriaí ico sulle cuegafuena birui lloticue. Dama Moisés micori ico suite cuegafuena jiaí birui lloticue. Jiaie rafuena lloñedicue. <sup>23</sup>Jiaie cuetimaci: “Cristo llegi cacajite. Fiodaillamona jilloite. Naimiedi nano dofoconi jilloitimie. Iemona cai judíuái comini jeacinomona jilloillena uifnotimaci. Iemona judíuáiñedino jeacinomona jilloillena uifnotimaci”. Ie jira bie rafuena llocana jaidicue.

*Crezentena Agripa jaillena Pablo jitailla rafue*

<sup>24</sup>Iese Pablodi abi riiduano, Festo riire llote:

—Pablo, odi uairico isoidio, eo comecina o facaja jira.

<sup>25</sup>Pablo uai ote:

—Uairicoñedicue. Festo, odi cue illaímadio. Cue llucacimodi uanaicino. Ebena ñaiñaiacaiñedicue. <sup>26</sup>Agripa cue lloga rafuena raise uifnote. Nana bie rafuena naimie jai uifnuu jira, naimie diga marefodo ñaiticue. Bainino suiñede. <sup>27</sup>Ore Agripa ¿Jusiñamui lloraini cuegafuaina inotio? omo jicanoticue. Iena o inuana jai uifnoticue.

<sup>28</sup>Agripa dinena uai ote:

—Dallu o ñaiamona, cuena crezentena nibai itataiacadio.

<sup>29</sup>Pablo uai ote:

—Nibai dallu ñaiticue. Nibai are ñaiticue; iadedi cue isoi o jaillana jitaicicue. Ua nana cue ñaiana cacadino cue isoi jaillana jitaicicue; iadedi omoi bie lloeo diga maiana jitaicicue.

<sup>30</sup> Iemona Agripa naidacaide, Festo diga, Berenice diga. Nana raídino jiai naidacaidimaci.  
<sup>31</sup> Jino jaillano, Pablo joreñoña siadotimaci:  
 —Bimie jaca buena finoñede, naimiena cai meiniana lollena. Buena finoñede, cárcelmollena.

<sup>32</sup> Agripa Festomo llote:

—Naimie cai nanoca illaíma dine jaillana jicanoñedena, niadedi naimie jino marena oreca.

## 27

### *Romamo Pablo jailla rafue*

<sup>1</sup> Italiomo Augusto dine Pablo oretajana Festo llua mei, Pablona jiaie llavecano diga capitámo fecade. Naie capitádi Julio. Augustona mamecireda batallómo jainaiade.  
<sup>2</sup> Adramitiomona bite botemo jaidicai. Naie bote Asia railla enirue igobaiño sjiacana jaicade. Aristarco cai diga jaide. Macedonia enirue imie. Naimie nairaidi Tesalónica. Suiñoñedica. <sup>3</sup> Ie areruido Sidón railla nairaimo ridicai. Nainomo Juliodi Pablona marena sedade. Ie nabaiñiai dine Pablo ari jaillana rairuiñede. Ie jira naimacimona ie jitaile rana ote. <sup>4</sup> Iemei nainomona suiñoñedica. Aifidi abido caina ati-atina jira, aifi raise iñenanomo, Chipre railla uiasi cai jarifebeimo illa ecido jaidicai. <sup>5</sup> Cilicia railla enirue ecido monaillaido jaidicai. Panfilia railla enirue ecido jiai jaidicai. Mira railla nairaimo ridicai. Naie provincia mameci Licia. <sup>6</sup> Naie bote Roma dine jaiñena jira, capitádi jiaie botena jenode. Capitádi Alejandríamona bite botena baite. Naie bote Italiomo jaicade. Ie jira naie botemo cai jonecaida, caina uite. <sup>7</sup> Diga irui fecuise sefuiere jaillano, Gnido railla nairai iaireise ridicai. Aifidi abido caina ati-atina jira, Creta railla uiasimo jaidicai. Aifi raise iñenanodo Salmón railla nairai dine jaidicai. <sup>8</sup> Uiasi iaireise iese sefuicana jaillanona, Maregobe railla illanomo ridicai. Lasea railla nairai jiai ianori ite.

<sup>9</sup> Digarui cai faifilla jira, noci deisoilla facaise jai illa jira, jaillena eo jacirede. Ie jira botemo maijidiñomo Pablo llote:

<sup>10</sup> —Nabaiñiai, cai jaillena eo jacirenana uiñoticue. Eo maraiño caimo sefuiticai. Cai raruaiña nibai faifitica. Botena jiai nibai faifitica. Cai nibai jiai faifitica —llote.

<sup>11</sup> Iese llote; iadedi naie bote piloto oni jaicade. Naie bote nama jiai oni jaicade. Capitán iaímaiai lluana Pablo lluana baífemo ñnote. <sup>12</sup> Igobe maraiñena jira, rollime facaise illa jira, ailluena comini nainomona jaicadimaci. “Fenice railla nairaimo ñedi riitica” raillano jaicadimaci. Nainomo rollime facaiseconi iacadimaci. Fenice Cretamo ite. Naie igobedi jítoma billa beici dine eruaide. <sup>13</sup> Beici ñinena aifidi bia, “cai jitailla aifidi bite” raillanona, suiñoñedica. Creta iairei monaillai fuemo jaidicai. <sup>14</sup> Ie mei raire cai dine eo riire aifi bite. Naie aifi noci deisoilla ñinena bite. <sup>15</sup> Botena oni uite. Botena atona eronenidicai. Ie muidona jamai ebena jaidicai. Aifidi caina iese uite. <sup>16</sup> Janorede uiasi fuemo aifi raise iñenanomo jaidicai. Nai uiasi mameci Claudia. Faifíllena bote ie janorede nocae sefuiere a aiñoñedica. <sup>17</sup> A aiñua mei, rao diga botena ruica maíticai. Sirte railla conillie illanomo cai joodai raillano, velaíaina ñuiñoñedica. Iemei aifi jamai uigacai. <sup>18</sup> Ie areruido aifi riire illa jira, cargana oni dotadica. <sup>19</sup> Dane ie are bote ie raruiai, cai onolli diga, oni dotadica. <sup>20</sup> Diga irui jítoma bainide. Diga irui ucuai jiai bainide. Aifi eo riire nia ite. Cai jillobifíllemo jai ocuiríñedica.

<sup>21</sup> Diga irui cai guiñena mei, Pablo naimacimo llote:

—Nabaiñiai, cue uaina navui ñnotiomoidena, niadedi bie isoi sefuiñedica. Cretamo cai fiebidicaina, bie isoi sefuiñedica. <sup>22</sup> Omoi comeiaína ocuiño. Bie botedi faifite; iadedi caimona jaca buna faifíñeite. <sup>23</sup> Jaive naíona Jusiñamui jaienicidi cuemo baireda. Jusiñamuimo jainaiaidicue. Naimiena sedadicue. <sup>24</sup> Naie jaienicidi cuemo llote: “Pablo, jaciruiño. Romamo o nanoca illaíma dine iitio. Jusiñamui ona duenaila jira, nana o diga jaídino jilloitimaci”. <sup>25</sup> Ie jira omoi comeiaína ocuiño. Cuemo llua isoi, naimiedi bie rafuena suitaita. Jusiñamui iena finuana ñnoticue. <sup>26</sup> Nibai uiasimo jutadaiticai.

<sup>27</sup> Catorce digarui naio illamona, Adria railla monaillaimo jamai cai jai, naíona daferui facai marineruaidi: “Enirue iaire ite” raillanona comeiaína facadimaci. <sup>28</sup> Ie jira ie afoedinona facadimaci. Veinte brazas aforede. Iemei llua isoi, nainori illamona, dane facadimaci. Quince brazas aforede. <sup>29</sup> Nofici illanomo naimaci bai raillano, faírillaíllena, ie jillacimona cuatro lloelluna faitimaci. Mona monaille sedadimaci. <sup>30</sup> Naie facaise marineruaidi botemona asiacadimaci. Ie jira botemo ite nocaena ana monaillaimo dotadimaci, bote jillacimona lloelluna faia isoi.

<sup>31</sup> Iena ciuano, Pablo capitámo llote. Soldaduaimo jiai llote:

—Botemo bimaci fiebiñeniadedi, jilloñeitomoi.

<sup>32</sup> Ie jira soldaduaidi nocae maía raona jaitadimaci. Jai dinomo nocaena faínonocaidimaci. <sup>33</sup> Nia monaiñenia, Pablo nana caímo llote:



—Guiño. Catorce digarui illanona, jai guiñedomoi. <sup>34</sup> Ie jira guiño, omoi mairillesa. Ua faifiñetomoi.

<sup>35</sup> Iese naimie raillanona, Jusifiñamui iobillacinona fecade, nana comini illa uicomo. Llomenicono tairuano, guite. <sup>36</sup> Nana naimaci comeciai ocuiñocaida, jiai guitimaci. <sup>37</sup> Botemo doscientos setenta y seis diese iticai. <sup>38</sup> Cai monillamona, fiebide trigona monaillaimo oni fadodicai, bote meenaiñellena.

<sup>39</sup> Ie oni monaidemo, erodatemo, naie eniruena uiiñodicai. Igebemo conillici illana ciodicai. Nainomo jamai ebena sijiacadici. <sup>40</sup> Ie jira lloelluna nainomo oni fainonocaidici. Datarabe maiana suiñodicai. Vela aifimo sebiñoticai. Monaillai fuemo enirue dine jai jaidicai. <sup>41</sup> Iemei jaiciridifomo ridicai. Eniruemo jodate. Bote muido eniruemo jaiare jodate. Eo baguamona jillaci taicosite. <sup>42</sup> Naimaci iamona jillobi raillano, soldaduai llavecana meineiacadimaci. <sup>43</sup> Pablona jillotaiacana jira, capitán iena rairuide. Llote:

—Nano iana uiiñotino diese monaillaimo ana daia. Eniruemo jai. <sup>44</sup> Jiaino bote ie rabicido juicaida icana jai. Jiaino bote ie raruiaido juicaida icana jai. —Iese eniruemo nana marena ridicai.

## 28

### *Maltamo naimaci illa rafue*

<sup>1</sup> Jai cai jillua mei, Malta railla uiasimo cai illana uiiñoticai. <sup>2</sup> Nainomo ite comini caina marena feiñotimaci. Iraina bonotatimaci. Noci deilla jira, rosirena jira, irai ecimo agaillena caina uaidotimaci. <sup>3</sup> Pablo reiena ua mei, iraimo jonete. Joniamona, jaiio usirenamona, reigaimona jino bite. Naimiena ainide. <sup>4</sup> Jaiio naimie onollido llillana Malta comini ciuano, coniniri ñaitimaci:

—Ñibai bimie comena meinetimie. Monaillaimona jillobide; iadedi jai bu naimiemo ibadi oga.

<sup>5</sup> Jaiona ciuanona, Pablo iena iraimo dotade. Iemei naimiemo jaca bue isoide rafue suiñede. <sup>6</sup> Comeciaina facadimaci: “Naimie onolli raire sirite. Iemei raire fiodaite”. Are sedaja mei, naimiedi jaca niese iñede. Ie jira dane comeciaina facajano raitimaci:

—Naimiedi ñibai Jusifiñamui.

<sup>7</sup> Naie illanomona uiasi illaima enirue iaie ite. Naimie mamecidi Publio. Caina marena feiñote. Darui amani ie jofomo caina marena itatate. <sup>8</sup> Publio moo duide biide. Abi cuaride. Jeraina feide. Ie jira naimie dine Pablo jaide. Jusifiñamui jia mei, ie onolli naimiemo joniano, naimiena jillotate. <sup>9</sup> Bie rafue suilla jira, naimie dine nana uiasimo ite duidino bibidimaci. Naimacina jillotate. <sup>10</sup> Ie jira caimo iobillacinona eo fecadimaci. Cai oni jaiadedi, cai jitailla ra caimo fecadimaci.

### *Romamo Pablo rilla rafue*

<sup>11</sup> Daje amani fivui illa mei, Alejandriamona bite botedo jaidicai. Naie uiasimo nana rollime facaiseconi naie bote ite. Mena jusifiñamui iaiaia; joreño bote muidomo ite. Damie Cástorna mameciredo. Jiaimie Póluxna mameciredo. <sup>12</sup> Naie botedo oni cai jaillanona, Siracusamo sijidicai. Darui amani nainomo iticai. <sup>13</sup> Nainomona jaillano Regíomo sijidicai. Darui illa mei, aifi beici dinena billa jira, ie areruido Puteolimo ridicai. <sup>14</sup> Sijia mei, nainomo creyentiaina baiticai. Naimaci diga siete digarui cai illana jitaidimaci. Ie mei Roma dine jaidicai. <sup>15</sup> Romamo nia cai riñenia, nainomo ite creyentiai cai billana fididimaci. Cai dine bitimaci. Foro de Apio railla nairaimo damierie bitimaci. Jiaino Tres Tabernas railla nairaimo bitimaci. Naimacina ciuano, Pablodi Jusifiñamui iobillacino fecade. Ie comecina jiai ocuiñote. Cai diga Romamo jaidimaci. <sup>16</sup> Romamo cai ria, capitán llavecana ie illaaimo fecade. Cárcelmo Pablona naie illaima oreñede; iadedi Pablo ie ibauiga jofomo eneno oni orede. Aisiñ raillano, daje soldado nainomo naimiena sedade.

### *Romamo Pablo llofuia rafue*

<sup>17</sup> Darui amani illa mei, Pablo Romamo ite nanoca judiuaia uaidote. Danomo ofilla mei, naimacimo llote:

—Caimaci, jaca buena cai cominimo finoñedicue. Cai einamací llogacinuaina jaca iinoticue; <sup>18</sup> iadedi Jerusalémo cuena gaitajano, romanuai nairai cominimo cuena fecadimaci. Romanuai nairai comini cuemo jicanua mei, cuena marena oretaiacade, fiodaillafue cuemo iñena jira; <sup>19</sup> iadedi judiua: “Dama ite” railla jira, cai nanoca illaima dine jaillena jicanoticue; iadedi cue nairai diga jaca iciriñedicue. <sup>20</sup> Omoi diga ñaillena, omoina ciocadicue. Fiodaillamona íco comini jillollena cue llofuecabilla jira, bie lloeo diga maigacue.

<sup>21</sup> Uai otimaci:

—Judeamona jiaino ona cuega cartana jaca feiñoñedicai. Caimo o rafuena llollena, jaca buna biñede. Bene jaca bu ona jeare ñaifede. <sup>22</sup> Ie jira omona naie rafuena cacacadicai.

Naga illanomo comini o llofuiana uaitajana uifotica. Creyentiaina jeare ñaitimaci. Iena fididica. Te jira caimo iena raise llono.

<sup>23</sup> Naimie dine dane billiruina llotimaci. Te mei ailluena comini naimie jofomo bitimaci. Naimie anamo naimaci illana Jusiñamui jitailla jira, Jusiñamui dibeimo naimaci comeciã iuaina meiduana llofuate. Moisés micori llogacinuaimona, Jusiñamui facaina lloraini micoriai ciegafuaimona, Jesúsna llofuate. <sup>24</sup> Jiaño naimie llofuiana ñnotimaci. Jiaño ñnoñedimaci. <sup>25</sup> Nana naimaci comeciãna daje isoi lloñedimaci. Iemona oni jaidimaci. Nia jaiñenia, naimacimo Pablo llote:

—Jusiñamui Joreñodi Isaías micorina cai usumatiaimo raise llotatate. Omoi usumatiaï micoriai illa isoi nia itomoi. Isaías micoridi omoïna jai cueba rafue jai suide. Naimie micori cuete:

<sup>26</sup> Jusiñamui llote: “Bie comini dine mai jai.

Llono: ‘Cue rafuena cacaitomoi; iadedi iena cacaiñeitomoi.

Rafuena cioitomoi; iadedi iena uifioñeitomoi.

<sup>27</sup> Omoi comeciã jai tainomo ite isoide.

Omoi jefona jai cacaiñedomoi isoidomoi. Cue rafuena jai cacaiñedomoi.

Jai uisnidomoi isoidomoi. Siño rafuena jai cioiacaiñedomoi. Iena jai uifioiacaiñedomoi.

Cue dibeimo iacaiñedomoi, omoïna cue jilloitai raillanona’ ”.

<sup>28</sup> Jusiñamui rafuena omoi ñnoñena muidona, judíuainedinodi Jusiñamui naimacina jilloitaiacanana jai fididimaci. Naimaci iena cacareitimaci.

<sup>29</sup> Iese naimie llua mei, judíuaidi coniniri siadocana abido jaidimaci.

<sup>30</sup> Mena años Pablo te jofomo ite. Te illa ñnori naie jofona ñbauide. Nainomo nana naimie dine bite cominina feiñote. <sup>31</sup> Naimie anamo naimaci illana Jusiñamui jitailla jira, Jusiñamui dibeimo naimaci comeciã iuaina meiduana llofuate. Marefodo llofuate. Naimiedi cai Nama Jesucristo rafuena llofuate. Jaca budi naimie llofuiana rairuñede. Teofilo, jaca digacino omo jai lloticue. Mai. Lucadicue.

## ROMAMO ITE CRISTONA HNOTINOMO PABLO ORETAGA RABE

### *Romamo ite creyentiaimo Pablo cartana orede*

<sup>1</sup> Romamo ite creyentiai, omoi dine cartana oredicue. Pablodicue. ¿Nigacino? Jesucristo dibeimo maijidicue. Jusiñamui fetocamiedicue. Ie mare rafuena cue lllena, cuena orede.

<sup>2</sup> Jusiñamuidi naimie facaina llloraini micoriaido bie rafuena jaie llote. Naimaci micoriai iena jaie jiai cuega. Iemona birui facacabidicai. <sup>3</sup> Bie rafuedi Jusiñamui Jitona llote. Naimie jaie ite usumadi cai illaïma David micori. <sup>4</sup> Naimie Jusiñamui Jitonana uifnoticai. Jusiñamui Joreñodi siño rafuedo caina iena uifnotade. Jusiñamui Jito fiodaïllamona, Jusiñamuidi ie Jitona jillotade. Jusiñamui Jitodi Jesucristo. Cai Nama. <sup>5</sup> Caina duenaïllanona, caina oretate, naga nairaïaina naimiena inotallena, naimiena naimaci iobitallena. <sup>6</sup> Naimacimona itomoi. Naimiemo omoi duïllena, Jesucristo omoïna jai fetode.

<sup>7</sup> Romamo ite creyentiai, Jusiñamui isiruiganodomoi. Naimie isoi mareuidinona omoi illena, fetocanodomoi. Cai Moo Jusiñamui, cai Nama Jesucristo diga, omoïna duenaite. Iena uifnocana mai omoi jai. Iaimaïai omoïna uri jai itatatiïmaïai. Iena omoi uifnocana mai omoi jai.

### *Roma dine Pablo jaiacade*

<sup>8</sup> Diga comini, diga illanuaïmo, Jesucristona omoi inuana jai fididimaci. Ie jira nano dofoconi omoi facaina Jesucristomo iobillacinona fecaacadicue, Jusiñamuimo iena naimie fecallena. <sup>9</sup> Jusiñamuimo cue jiiïa, omoïri jiidicue. Jusiñamui iena uifnote. Naimie Jito rafuena cue lluanona, cue comecimona naimiena sedadicue. <sup>10</sup> Jusiñamuimo cue jiiïa, naimiemo jicadicue, cuena canollena. Naimie jitaïa, omoi dine ja muidomo cue riiticue. Iena jicadicue. <sup>11</sup> Omoïna eo cioacadicue. Jusiñamui Joreño uai cuemo illamona, omoi comeciaina ocuifnotaiacadicue. <sup>12</sup> Jesucristona omoi inuamona, naimiena cue inuamona, coninina cai comeciaina ocuifnotaiticai.

<sup>13</sup> Cue amatiai, diga icaïño omoi dine jaiacadicue. Iena omoi uifnuana jitaidicue. Jaiacadicue; iadedi nia jainidicue. Cuemona Jesucristo rafuena cacajamona, dajerie jiaïe nairaïai jai inotimaci. Omoi dine Jesucristo rafuena lluaïacadicue, iena omoïmona dajerie inollena. <sup>14</sup> Nana comini dine Jusiñamui oretagacue. Ie jira griego uaido ñaitinomo Jesucristo rafuena lloiacadicue. Griego uaido ñaifedinomo iena jiai lloiacadicue. Abina uifnotinomo iena lloiacadicue. Abina uifnoñedinomo iena jiai lloiacadicue. <sup>15</sup> Ie jira omoïmo Jesucristo rafuena eo lloiacadicue.

### *Jesucristo rafue siño*

<sup>16</sup> Jesucristo rafueri iobidicue. Naie rafuedi siño. Jusiñamuidi naga iena inotinona naimaci jeacinomona jillotade. Judiuaidino nano iena cacadimaci. Ie mei judiuaidinodo iena jai cacadimaci. <sup>17</sup> Naie rafuemona Jusiñamui caina feifnuana uifnoticai. Jusiñamui caina marebicaitajana uifnoticai. Naimiena cai inuamona iena uifnoticai. Jusiñamui facaina llloraima micori jaie cuega: “Jusiñamuina inuamona marebicaidimiedi Jusiñamui dibeimo ico jaca iite” cuega.

### *Comini jeacinona fnoïadedi, dani naimaci muidona*

<sup>18</sup> Nana Jusiñamuina jitaidinodi naimie duere finollifue anamo jai itimaci. Iena uifnoticai. Jusiñamui caina iena uifnotade. Maraiñede rafue naimaci finuanona, Jusiñamui ie uanaicinona jamaidimaci. <sup>19</sup> Jusiñamui naimacina naimiena uifnotaja muidona, imaci comeciaina Jusiñamui illana uifnotimaci. <sup>20</sup> Enirue finua facaisemona naimie finoca ramona naimie illana uifnotimaci. Naimiena cionidimaci; iadedi naimie finoca ramona naimiena uifnotimaci. “Naimiena uifnotimaci” omoi raia, naimiedi bu. Naimie uai jaca siñonana uifnotimaci. Ie jira: “Jusiñamuina uifnoñedicai” rainidimaci. <sup>21</sup> Jusiñamui uifnotimaci; iadedi naimie uaina inoñedimaci. Naimiemo comeciaina facañedimaci. Naimiemo iobillacinona fecañedimaci; iadedi ebena comeciaina facacabidimaci. Naimaci comeciï jai tainomo ite isoide. Jai marebificañedimaci. <sup>22</sup> “Abina uifnoticai” raitimaci; iadedi abina uifnoñedimaci. Jamai ebe isoidimaci. <sup>23</sup> Jusiñamui jaca ite. Naimie uai siño. Naimiena sedaacañedimaci; iadedi jiaïe rana sedaacadimaci. Fiodairuide imana eruaide jiraraina finodimaci. Ofomana eruaide jiraraina finodimaci. Ocainana eruaide jiraraina finodimaci. Jaiona eruaide jiraraina finodimaci. Naie isoide jiraraina sedauidimaci.

<sup>24</sup> Ie jira Jusiñamui naimacina fainonocaide, naimaci jitaïlla jearede rafuena imaci finollena. Ie mei conini diga eo meirede rafuena finouidimaci. <sup>25</sup> Jusiñamui ie uanaicinona jitaidedimaci. Uanaifedinodo jaidimaci. Jusiñamui finoca rari iobidimaci; iadedi naie

rana finodimieri iobiñedimaci. Ero, dani Jusifñamuimo iobillacinona jaca cai fecacabillasa. Uanaicinona lloticue.

<sup>26</sup> Iese naimaci illa jira, naimaci jitailla meirede rafuena finollena, Jusifñamui naimacina fañonocaide. Conifñona aifuedotimaci. <sup>27</sup> Naimaci jitailla jira, conimana aifuedotimaci. Naimaci marañede finoca rafuena duere sefeuillemona ibana feiñoitimaci.

<sup>28</sup> Jusifñamuina naimaci uifñoiacaiñena jira, marañede rafuemo naimaci começai facallena, Jusifñamui naimacina fañonocaide. Naimaci finorainiga rafuiaina finocana jaidimaci. <sup>29</sup> Naga isoide marañedicinona finouidimaci. Naga isoide jearedicinona finouidimaci. Jiaie comini rana nicidoudimaci. Jiaie cominina duere finouidimaci. Jiaima raconi uradoisoidimaci. Cominina jaca meinetimaci. Fuiriruidimaci. Jifuerisoidimaci. Jiaie cominina jeare finouidimaci. Eo ñaillaredimaci. <sup>30</sup> Jiaie comini joreñona ñaoidimaci. Jusifñamuina jaca gaiñedimaci. Cominina jeare ñaoidimaci. Abina iedouidimaci. Abina biruidimaci. Diga jearede rafuemo começaina facauidimaci. Naimaci moo uaina ñnorainidimaci. Naimaci ei uaina ñnorainidimaci. <sup>31</sup> Ebena itimaci. Naimaci lloga uaina finorainidimaci. Jiaie cominina isiruirainidimaci. Naimacina jiai dueruirainidimaci. Iese jaisoidimaci. Iese nia jaicabidimaci. <sup>32</sup> Jusifñamuidi jiaie lote: “Bie isoide rafuena finodino iraimo jaca duere sefuitimaci. Cue illanomo jaca iñeitimaci” llote. Jusifñamui lluaña uifñotimaci; iadedi naie rafuena finocana jaidimaci. Iena jiaie comini finoiadedi, iobillanona, “Macai mare iese imaci finua” raitimaci.

## 2

### *Jusifñamuidi marañede rafuena finodina duere finoite*

<sup>1</sup> Ero, omoi judíuaimona damie começina nibai facade: “Bie isoide marañede rafuena finofedicue. Iena finuamona, jiaie comini Jusifñamuimona duere sefuitimaci. Cue duere sefuiñeiticue” raillamo naimie começina facade; iadedi naie isoide marañede rafuena naimie finua jira, Jusifñamui naimiena jiai duere finoite. <sup>2</sup> Jusifñamuidi uanaicinona uifñuamona, marañede rafuena finodimena duere finoite. Iena uifñoticaí. <sup>3</sup> “Jusifñamui duere finollicino anamona jilloñeitimaci” começina facadio. Naimacimo o começina o facaja isoi, naimaci isoi o finua jira, Jusifñamui ona jiai duere finoite. <sup>4</sup> Ona naimie duenaillamona, ona naimie duere finoacaiñellemona, o começimo iticino marecinona meiduana naimie jitaide. Naimie dibeimo o illana naimie jitaide. Naiena jamaiñeno. <sup>5</sup> O começi jaiarena jira, o começi Jusifñamui dibeimo meidoiacaiñedio. Ie jira ico eo duere sefuitio. Ie riicailfuemona Jusifñamuidi nana naimiena ñnoñedinona duere finoite. Iena Jusifñamui finoia, Jusifñamuimona mare. <sup>6</sup> Nagamiiai imaci finua ille dinori Jusifñamui naimacina duere finoite. <sup>7</sup> “Mare rafuena finocana jaidino cue illanomo jaca iitimaci” lloite. Naimaci naimie isoi ebire iacania, naimiemona iobillacino naimaci jitaia, naimie illanomo naimaci jaca iacania, iese Jusifñamui lloite. <sup>8</sup> Marañede rafuedo jaidino Jusifñamui duere finollicino anamo iitimaci. Dani imaci abina isiruitimaci. Uanaicinona ñnoñedimaci. <sup>9</sup> Jusifñamui naga jeacinona finodimena eo duere finoite. Judíuai comini ua duere finoite. Judíuaiñedinono cominina jiai duere finoite; <sup>10</sup> iadedi Jusifñamuidi naga mare rafuedo jaidimena ebire itataite. Iobitaite. Uri itataite. Judíuaimo iese ua finoite. Judíuaiñedinomo iese jiai finoite, <sup>11</sup> naga nairaina daje isoi naimie finua jira.

<sup>12</sup> Judíuaiñedinodi Moisés micori llogacino anamo iñedimaci; iadedi jeacinona naimaci finua jira, Jusifñamui naimacina duere finoite. Judíuai Moisés micori llogacino anamo itimaci; iadedi iena naimaci ñnoñena jira, jiai jaca daje isoi duere sefuitimaci. <sup>13</sup> Moisés micori llogacinona cacajamona, Jusifñamuimona jaca buna marebicaiñede; iadedi iena ñnuamona marebicaide. <sup>14</sup> Judíuaiñedinodi Moisés micori llogacino anamo iñedimaci; iadedi naimaci começai facajamona, marecinona finuana uifñotimaci. Marecinodo jaillana jiai uifñotimaci. <sup>15</sup> Moisés micori llogacino anamo naimaci illa isoi, naimaci começaimona marecinona naimaci finoiadedi, iena uifñotimaci. Ie jira marañedicinona naimaci finoiadedi, iena jiai uifñotimaci. <sup>16</sup> Biena llofuecabiticue. Ico Jusifñamui llua jira, Jesucristodi cominimo imaci começaimo iticinona juez isoi lloite. Marañedicinona finouidinomo duere finollicinona lloite. Marecinona finouidinomo duere finollicinona lloñeite.

### *Moisés micori llogacinodo judíuai comini raise jaiñedimaci*

<sup>17</sup> Abina ieduumona, omoimona damierie raitomoi: “Judíuai imacidicaí. Moisés micori llogacino anamo cai illa jira, duere finollicinomona jilloiticaí. Jusifñamui cai diga ite” raitomoi. Iena omoi raillamona, abina iedotomoi. <sup>18</sup> Naimie jitailla rafuena uifñotomoi. Moisés micori llogacinona omoi uifñuamona, marecinona finuana uifñotomoi. <sup>19</sup> Jusifñamuina uifñoñedinona llofueciacodomoi. Naimiena naimaci uifñoñena jira, jitiredinomo itimaci isoidimaci. Uanaicinona naimacimo omoi lluaamona, naimaci começaina lligaiñoiacodomoi.

Naimacina uanaicinona uifñotaiacadomoi. <sup>20</sup> Jusiñamuina raise uifñofedñona llofueiacadomoi. Naimacina abina uifñotaiacadomoi. Naimie rafuena nia raise uifñofedñona llofueiacadomoi. Moisés micori llogacinomo nana uifñuacino illa jira, naiemo uanaicino illa jira, iese iacadomoi. <sup>21</sup> Jiaie cominina llofueiacadomoi; iadedi çniese omoi comeciaino fueoiacaiñedomoi? “Rana fiñeno” llotomoi; iadedi fiñdomoi. <sup>22</sup> Omoi aifñede riño diga iñenana llotomoi; iadedi ie isoi finodomoi. Jusiñamuina eruaide jiraraina gaiñedomoi; iadedi naie ra illanuaimona naie jiraraina fiñdomoi. <sup>23</sup> Moisés micori llogacinori abina iedotomoi; iadedi iena omoi iñoñena jira, Jusiñamuina jeare finodomoi. <sup>24</sup> Iena Isaías micori jiaie cuete: “Omoi muidona judíuafñedñodi Jusiñamuina jeare ñaitimaci” cuete.

<sup>25</sup> Jusiñamui dibeimo jai omoi illana jiaie comini uifñollena, omoi abina detatatomoi. Moisés micori llogacinona omoi iñoiadedi, omoi abina detatajadi mare; iadedi naicinona omoi iñoñenia, abina detatañedño isoi jai itomoi. Jusiñamui dibeimo iñedomoi. <sup>26</sup> Moisés micori llogacinona judíuafñedño iñoiadedi, naimaci abina detatañenia, Jusiñamuimona naimie dibeimo ite judíuai isoidimaci; iadedi abina detatañedimaci. <sup>27</sup> Moisés micori llogacinuaina uifñotomoi. Omoi abiaina detatatomoi; iadedi Moisés micori llogacinona judíuafñedñodi iñua jira, Moisés micori llogacinuai omoi iñoñena jira, Jusiñamuimona omoi baifemo uaidimaci. <sup>28</sup> Omoi jeiciamona Jusiñamui ua comiñedomoi. Omoi abiaina detatajamona, Jusiñamui ua comiñedomoi; <sup>29</sup> iadedi omoi comeciaino marena illamona, Jusiñamui ua cominidomoi. Abi detataja jira, Jusiñamui comiñedomoi; iadedi omoi comeciaino marena illa jira, Jusiñamui cominidomoi. Raise naimiena iñotinodi cominimona iobillacinona feiñuana jitaiñedimaci; iadedi Jusiñamuimona iobillacinona jitaiddimaci.

### 3

<sup>1</sup> Bie cartana omoi feiñuana, iena facallemona, damierie comecina facaite: “Judíuaidicai; ia naiemona, çniese jiaie comini baifemo faiticai? Cai abiaina detataticai; ia naiemona jaca buena ofñediacai”. <sup>2</sup> Ie jira omoimo lloiacadicue: “Judíuaina cai illana eo mare”. Jusiñamuidi dani caimo ie rafuena llote. Jiaie cominimo lloñede. <sup>3</sup> Cai cominimona dajerie Jusiñamui rafuena iñoñedimaci; iadedi Jusiñamuidi ie lloga rafuena jaca finode. <sup>4</sup> Comini tainona llotimaci; iadedi Jusiñamuidi uanaicinona jaca llote. David micori iena jiaie llote:

O lloga uaimona uanaicinona o llouillana uifñotici.

O finoca rafuena jiaie comini uaitaia, o dinena jaca anafenodio.

Iena uifñotici.

<sup>5</sup> Dane damierie comecina facaite: “Jusiñamuidi mareuidimie. Cai baifemo uaide. Cai marañedñona cai finuamona caina Jusiñamui jitaia, jiaie cominidi Jusiñamui jaca mareuillana uifñotimaci. Cai illa muidona Jusiñamuina iese uifñotimaci. Ie muidona naimiedi cai jeacino facaina caina duere finoñena, jiaie cominina naimiena cai uifñotaja jira”. Omoimona iese dajerie comeciaina facadimaci; <sup>6</sup> iadedi iese iñede. Cai jeacino facaina caina duere finoñeniadedi, Jusiñamuidi jiaie cominina jiaie duere finonite.

<sup>7</sup> Taino cue lloia, iena naimie oni dotaia, naimiedi mare rafuena finuana cominidi uifñotimaci. Ie mei naimiemo iobillacinona fecadimaci. Ie muidona Jusiñamui cue jeacino facaina cuena duere finoñena. <sup>8</sup> Omoimona dajerie cuena ñaitimaci: “Bimie raite: ‘Jusiñamui marecinona finuana raise cai uifñollena, marañedñona finocana cai jailla’”. Iese cue lloñena jira, Jusiñamui naimacina duere finoia, cuemona mare.

#### *Jeacinona nana cai finodici*

<sup>9</sup> Judíuaidicai; iadedi jeacinona nana comini finua jira, jiaie nairai baifemo faifñediaci. Judíuaidicai; iadedi jeacinona finodici. Judíuafñedñodi jeacinona jiaie finodimaci.

<sup>10</sup> Jusiñamui facaina lloraini micoriai iena jiaie cuete:

Marebicadino jaca iñede. Nana comini marañedimaci.

<sup>11</sup> Jaca buna Jusiñamuina raise uifñedimaci. Naimiena raise uifñocaiñedimaci.

<sup>12</sup> Mare rafuedo nana jaiñedimaci. Marañedñona finoodimaci.

Jaca buna marecinona finoñedimaci.

<sup>13</sup> Jeare ñaicabitimaci. Tainona llocabitimaci.

Naimaci ñaiamona diga jearede rafue comuicabide.

<sup>14</sup> Naimaci fuijai eo borede.

<sup>15</sup> Icirillamona jiaie cominina raire meinetimaci.

<sup>16</sup> Nine naimaci jaia, diga marañede rafuena comuitatimaci.

<sup>17</sup> Uri illana uifñedimaci.

<sup>18</sup> Jusiñamuina jaciruiñedimaci

jiaie iese cuete. <sup>19</sup> Jusiñamui facaina lloraini micoriai lloga uaidi naie lloga uai anamo itinomo duide. Naie lloga uai naimaci uifñuamona, dani abi imaci riidolle uai iñede. Nana

comini Jusiñamui duere finollicino anamo itimaci. Iena uiñoticaí. <sup>20</sup> Moisés micorí lloga uaina ñnuamona, Jusiñamui jitailla isoi, jaca buna marebicaiñeite; iadedi naie lloga uaina cai uiñuamona, jeacinona cai ñnuana uiñoticaí.

*Jesucristona cai ñnuamona jillobidicaí*

<sup>21</sup> Jusiñamuidi birui caina marebitatajana jai uiñotade. Moisés micorí lloga rafuedo iena birui uiñofedicaí; iadedi Moisés micorí iena jaie llote. Jusiñamui facaina lloraini micoriai iena jai llotimaci. <sup>22</sup> Jesucristona cai ñnuamona, Jusiñamuidi caina marebicaitate. Nana Jesucristona ñnotinona marebicaitate. Nie isoide cominina cai ia, caina marebicaitallena, caina daje isoi feiñoite. <sup>23</sup> Nana caidi jeacinona finodicaí. Jusiñamui caina jitailla isoi, marena ifedicaí. <sup>24</sup> Caina naimie duenaillamona, naimie jitailla jira, Cristo Jesúsna cai ñnuamona, caina marebicaitate. <sup>25</sup> Jesucristo nia biñena facaise ite cominimo jeacino facaina Jusiñamuidi ibana ofede. Naimaci jeacino facaina Cristo Jesús fiodaillena, cai facaina naimie fiodaillena, Jusiñamui naimiena oretate. Naimiena birui cai ñnoia, caina duere finoñeite. Jusiñamuina mareuidimiena uiñoticaí. <sup>26</sup> Naimiena iese oretajamona, Jesúsna ñnotimiena Jusiñamuidi marebicaitaja jira, Jusiñamuina mareuidimiena uiñoticaí.

<sup>27</sup> Cai jeacinomona marena cai illena, buena finoñedicaí. Iadedi Jesucristona cai ñnuamona, jillobidicaí. Ie jira cai ñnoca rafueri abina iedoñedicaí. <sup>28</sup> Moisés micorí lloga uaina cai ñnuamona, marebicaiñedicaí; iadedi Jesucristona cai ñnuamona marebicaiñedicaí.

<sup>29</sup> Jusiñamuidi dani judíuai imaci Mooñede; iadedi naimiedi nana comini imaci Moo. <sup>30</sup> Cai Moodi jaca damiena jira, naimiena naimaci ñnua jira, judíuaina marebicaitate. Naimiena naimaci ñnua jira, judíuaiñedinona jai marebicaitate. <sup>31</sup> Cai ñnuamona cai marebicaiilla jira, Jusiñamui facaina lloraini micoriai jaie lloga uaina caitañedicaí; iadedi iena ua ñnocana jaidicaí.

## 4

*Abraham micorimona fueoticaí*

<sup>1</sup> Abraham micorí rafuena ja ñaiacadicue. Naimie marebicaiillafuena omoimo lloiacadicue. <sup>2</sup> Ie ñnoca rafuemonona naimie micorí marebicaidena, naimie micorí abina iedote; iadedi ie ñnoca rafuemonona naimie micorí marebicaiñede. Ie jira Jusiñamuimona naimie micorí abina iedoiacaiñede. <sup>3</sup> Iena Moisés micorí jaie cuela: “Jusiñamuina Abraham micorí ñnua jira, Jusiñamuidi naimie micorina jeacinona jaca finoñedimiena isoitate. Naimie micorina marebicaitate” cuela. <sup>4</sup> Maijillena buna damie ocuiadedi, ibajana jamai fecañeite; iadedi maijia facaina fecaite. <sup>5</sup> Ero, ie maijiamona jaca bu jeacinona jaca finoñedimiena isoicaiñede. Jusiñamuina naimaci ñnua jira, Jusiñamuidi maraiñedinona marebicaitate. <sup>6</sup> Bie rafuena David micorí jai jaie cuela:

Ie maijiamona bu marebicaiñena jira, Jusiñamui marebicaitagamiedi iocire iite.

<sup>7</sup> Naimaci maraiñedinona Jusiñamui dotajamona, iocire iitimaci.

Jusiñamui naimaci jeacinona dane abido ietañeite.

<sup>8</sup> Naie jeacinomo Jusiñamuidi comecina dane facañeite.

Naimiedi jai feitaite.

Ie jira iocire iitimaci.

<sup>9</sup> Dani abina detatativo iocire illena lloñede; ia abina detatañedinomo iena jai llote. Jusiñamuina Abraham micorí ñnua jira, Jusiñamui naimiena marebicaitate. <sup>10</sup> Naimie micorí abina nia detatañenia, naimie micorí marebicaide. <sup>11</sup> Naimie micorí marebicaiilla mei, Jusiñamui ñnena Abraham micorimo abi detatajana llote. Abraham micorí ie abina detatajamona, Jusiñamuina naimie micorí ñnuana uiñoticaí. Ie abina detatajamona, judío imiena jai jaide; iadedi Jusiñamuina ñnuamona, naimie micorí marebicaide. Ie jira Abraham micorí nana Jusiñamuina ñnotino moo. Nana comini abiana detatañedinaci; iadedi naimaci ñnua jira, Jusiñamui naimacina marebicaitate. <sup>12</sup> Cai comini abiana detatativaci; iadedi cai moo Abraham micorí isoi naimaci ñnua jira, Abraham micorí isoi marebicaidimaci. Ie jira Abraham micorí nana naimaci moo.

*Abraham micorí ñnuamona, Jusiñamui lloga uaidi suide*

<sup>13</sup> Abraham micorimo Jusiñamuidi: “Nana enirue omo iiticue” llote. “O uruiaimo iena jai iiticue” llote. Moisés micorí llogacina Abraham micorí ñnua jira, iese Jusiñamui lloñede; iadedi Jusiñamui lloga uaina Abraham micorí ñnua jira, iese Jusiñamui llote. Abraham micorí ñnua jira, Jusiñamuidi naimiena marebicaitate. <sup>14</sup> Moisés micorí lloga uaina ñnotinomo: “Nana eniruena omoimo iiticue” Jusiñamuidi llotena, Jusiñamuina ñnotino tainona ñnotimaci. Jusiñamui lloga uai jai jai saide; iadedi iese ifede. Dani naimiena ñnotinomo: “Nana eniruena omoimo iiticue” llote. <sup>15</sup> Moisés micorí lloga uaina naimaci

raise inoñenia, Moisés micori lloga uaido jaidino Jusiñamui riicailifue anamo itimaci; iadedi Moisés micori lloga uai inedena, Jusiñamuimona buna duere sefuiñeite.

<sup>16</sup> “Eniruena omoimo iiticue” naimiena inotinomo Jusiñamuidi lloete. Duenaillamona lloete. Nana Abraham uruiái micoriaimo iena lloete. Dani Moisés micori lloga uaido jaidinomo lloñede; iadedi Abraham isoi inotinomo jiai lloete. Abraham micori isoi cai jailla jira, naimiedi cai moo. <sup>17</sup> Jusiñamui iena jaiete lloete: “Ona diga nairai imaci moonai jai itataiticue” lloete. Jusiñamui fioidaitinona jilloitarede. Nia inede rana ie uaido jiai comuitate. Ie jira Jusiñamui Abraham micorimo llua isoi, suide. Jai fioidaitino illa isoi Abraham micori abi illa jira, Jusiñamui naimie abina mairitate. Ie ai oiniñomo urue comuillena lloete.

<sup>18</sup> Jusiñamui Abraham micorimo jiai lloete: “Ailluena uruiái omo iite. Diga nairai omona jebuite” lloete. Abraham micoridi naie inorainiga rafuena inote. <sup>19</sup> Jaca inote; iadedi cien años naimie micorimo illamona, naimie jai eeiroma. Naimie micori aidi, Sara micoridi, oiniñona jira, naiñaiño uruedi comuñede. <sup>20</sup> Abraham micoridi Jusiñamui llua inote. Inocana jaillano, iobillacinona Jusiñamuimo fecade. <sup>21</sup> Abraham micoridi Jusiñamui lloga uaina finuana eo inote. <sup>22</sup> Ie jira Jusiñamui naimiena marebicaitate.

<sup>23</sup> Naie rafue jaiete cuega; iadedi dama Abraham micorimo duiñede; <sup>24-25</sup> iadedi caimo jiai duide. Jusiñamuina inotinona marebicaitate. Cai Nama Jesús fioidaillamona, Jusiñamuidi naimiena jillotate. Cai jeacino facaina fioidaite. Caina marebicaitallena, naimiena jai jillotate.

## 5

### *Jai cai marebicaidicai*

<sup>1</sup> Jusiñamuina cai inuamona cai marebicaila jira, Jusiñamui diga uri iticai. Cai Nama Jesucristo finoca rafue muidona, Jusiñamui diga uri iticai. <sup>2</sup> Jesucristo muidona Jusiñamui caina duenaillamona, caina marebicaitate. Naimie ebirena isoi cai illemo caimare ocuiridicai; <sup>3</sup> iadedi duere cai sefuiadedi, jiai iobidicai. Duere sefuillamona, cai comeciái ocuiñocana cai jaillana uiñoticai. <sup>4</sup> Cai comeciái ocuiñuamona facacifidicai. Facacifillamona, Jusiñamuimo ocuiridicai. <sup>5</sup> Jusiñamui caina isiruilla jira, tañonomo ocuirifñeiticai. Ie Joreño caimo fecade. Ie Joreño cai comeciaino illa jira, ie Joreño Jusiñamuidi caina naimie caina isiruillana uiñotate.

<sup>6</sup> Cai jeacinomona dani jillonidicaimo, Cristo cairi fioidaite. Marañedecai; iadedi naie facaiseconi cairi fioidaite. <sup>7</sup> Marañedimie facaina caimona jaca buna fioidaia-caiñede. Caimona nibai damie maremie facaina fioidaite; iadedi nana comini iese fioidaia-caiñedimaci. Marañedimie facaina jaca buna fioidaia-caiñede; <sup>8</sup> iadedi nia marañedecaimo, Jusiñamui caina isiruillamona, Cristo cairi fioidaite. <sup>9</sup> Cristo cairi fioidaillamona, jai marebicaidicai. Ie muidona Jusiñamui caina duere finuacinomona Cristodi caina jillotaite. <sup>10</sup> Cai dinena Jusiñamuina cai enoilla facaiseconi naimie Jito cairi fioidailla muidona, ie Jito jillua muidona, Jusiñamui caina jai nabaide. Naimie caina nabailla jira, cai ico jilloillena raise uiñoticai. <sup>11</sup> Cai Nama Jesucristo muidona, Jusiñamui iobidicai. Cristo muidona Jusiñamui diga uri iticai.

### *Adán micori finoca rafue*

<sup>12</sup> Bie rafue jai suide. Adán micori jeacinona finuamona, nana caimo jeacinodi jai comuide. Jeacino caimo illa muidona, cai jeacino ite diga nana fioidaicana jaidicai. <sup>13</sup> Moisés micori llogacino nia inenia, jeacinona finodimaci; iadedi Moisés micori llogacino nia inenia, Jusiñamuidi jeacino facaina ibana oñede. <sup>14</sup> Moisés micori llogacino nia inenia, Adán micori facaiseomona Moisés micori facaiseomona naimaci jeacino ite diga nana comini fioidaicana jaidimaci. Adán micori isoi jeacinona fiñoñedimaci; iadedi fioidaicana jaidimaci. Adán micoridi Cristo isoiñede. Adán micori finoca rafuemonajacino comuide. Cristo finoca rafuemonajacino Jusiñamui cai jeacinona oni dotade.

<sup>15</sup> Adán micori finoca rafuedi Jusiñamui finoca rafue isoiñede. Adán finoca rafuemonajacino cai jeacino ite diga nana cai fioidaicana jaidicai; iadedi Jusiñamui finoca rafue Adán micori finoca rafue baifemo faite. Jusiñamui jitailla jira, caina naimie duenaillamona, cai dine Jesucristona orede, nana cai jilloillena. <sup>16</sup> Dama Adán micori jeacinona finuamona, Jusiñamuidi nana caina duere finollicino anamo itatate; iadedi Jesucristo fioidaillamona, Jusiñamui jitailla jira, caina marebicaitate. Ailluena jeacinona finodica; iadedi marebicaidicai. <sup>17</sup> Dama Adán micori jeacinona finuamona, cai jeacino ite diga nana cai fioidaicana jaidicai. Jusiñamui caina eo duenaillamona, Jusiñamui caina marebicailamona, dama Jesucristo muidona, Jusiñamui diga jaca iiticai.

<sup>18</sup> Dama Adán micori muidona, nana comini duere finollicino anamo itimaci; iadedi dama Jesucristo finoca mare rafuemonajacino Jusiñamui diga naimaci jaca illena, nana comini

marebicairedimaci. <sup>19</sup> Adán micorí Jusiñamuina ñnoñenamona, nana comini jeacinona finodimaci. Jesucristo Jusiñamuina ñnuamona, ailluena comini marebicaitimaci.

<sup>20</sup> Jusiñamui Moisés micorimo rafuena llote. Iena comini ñnoñenamona, diga jeacinona naimaci finuana uifnotimaci. Jeacinona finocana jaidimaci; iadedi Jusiñamuidi naimacina eo duenaite. <sup>21</sup> Jeacino anamo jaie nana cai illa jira, cai jeacino ite diga fiodaicana jaidicai; iadedi Jusiñamui duenaillacino anamo birui iticai. Ie jira cai marebicallamona, cai Nama Jesucristo muidona, Jusiñamui diga jaca iiticai.

## 6

### *Jeucristomo cai duillamona, jeacino anamo jai ññedicai*

<sup>1</sup> Jeacino anamo jai ññedicai; iadedi omoimona damierie comecina facaite: “Naga icaiño jeacino cai finoia, caina Jusiñamui duenaillamona, cai jeacinona oni dotade. Naimie caina duenaicabillana raise cai uifollena, jeacino eo finocana jaiticai. Iemona cai jeacinona oni dotajamona, naimie caina duenaillana eo raise uifnoticai”. <sup>2</sup> Iese comecina facañeno. Jeacino anamo jai cai ññena jira, jeacinona finocana cai jaiñena. <sup>3</sup> Biena uifnotomoi. Cristo Jesús dibeimo cai illamona, nana caidi bautizagacai. Cristo fiodailla jira, cai comeciaino ite jearedicino anamo jai ññedicai. <sup>4</sup> Cristo fiodailla jira, raiafomo naimiena jonetimaci. Cristo fiodaillamona ie Moo uaido jillode. Naimie dibeimo cai illamona, cai jeacino anamona jillodicai. Cai comeciaino jiaie rafue birui illa jira, jiaie rafuedo jai jaidicai.

<sup>5</sup> Cristo fiodaite; iadedi naiemona jillode. Naimie dibeimo cai illanona, cai comeciaino ite jearedicino anamona cai jillua jira, Cristo ie mare rafue anamo birui iticai. <sup>6</sup> Cristo fiodailla jira, cai comeciaino ite jearedicino anamo jai ññedicai. Caimo jai jainaiaññena jira, jeacino finocana cai jaiñena. <sup>7</sup> Jeacino anamo jai cai ññena jira, jeacinona finocana cai jaiñena. <sup>8</sup> Cristo fiodaite; iadedi jillode. Naimie fiodailla jira, cai jearedicino anamo jai ññedicai. Naimie jillua jira, jiaie rafuedo birui jaidicai. <sup>9</sup> Fiodaillamona Cristo jillua jira, naimiedi dane fiodaññeite. Naimie fiodaitemo, cai jeacino facaina naimiedi jai fiodaite. Jai dane fiodaññeite. <sup>10</sup> Jeacino facaina jeacinona oni dotallena, naimie dacañño fiodaite; iadedi ie Moona jaca iobitajanona, naimie ie Moo dibeimo jaca iite. <sup>11</sup> Ie jira jeacino anamo ññenanomo omoi comeciaina faca. Cristo Jesús dibeimo jai omoi illanona, Jusiñamui jitailla rafuena finollemo omoi comeciaina faca.

<sup>12</sup> Jeacinona finocana jaiñeno. Omoi comeciaino jeacinona finoacania, iena ñnoñeno. <sup>13</sup> Jeacinona omoi finoñellena, omoi comeciaina ocuiño. Mare naimie jitaillacinona omoi finollena, Jusiñamuina ñno. Jeacino anamo jaie omoi illa jira, naimiemo omoi ñña duññena jira, Jusiñamuimona fiodañño isoidomoi; iadedi jeacino anamo birui omoi ññena jira, naimiemo omoi jai duilla jira, Jusiñamuimona fiodaillamona jai jillodino isoidomoi. Jaiie naimiemo duññedomoi; ia birui naimiemo jai duidomoi. <sup>14</sup> Moisés llogacinuai anamo omoi jai ññena jira, jeacino anamo jai ññedomoi. Jeacinona finocana omoi jaiñellena, Moisés micorí llogacinodo jaiñedomoi; iadedi jeacino omoi finoñellena, omoina Jusiñamui duenaillamona, naimie omoina birui canocabide.

### *Patrón anamo itinomona cai fueolle*

<sup>15</sup> Moisés micorí llogacino anamo jai ññedicai; iadedi omoimona damierie comecina facade: “Moisés micorí llogacino anamo cai ññenamona, jeacino cai finoia, Jusiñamui caina duere finoñeite”. Iese comecina facañeno. Jeacinona finocana cai jaiñena. <sup>16</sup> Biena uifnoticai. Patrón anamo bu ia, ie patrón comeci jitailla rana finode. Ie ocuica rana ñnote. Ie isoide. Jeacino anamo omoi ia, jeacinona finocana jaidomoi. Jeacino omoi finuamona omoi jeacino ite diga fiodaicana jaidomoi. Ie jira Jusiñamui illanomo ico ññeitomoi. Jusiñamui anamo omoi ia, Jusiñamui jitailla rafuena finocana jaidomoi. Naimie illanomo ico iitomoi. <sup>17</sup> Jeacino anamo jaiie itomoi. Iemei omoimo jiaie comini Jesucristo rafuena jai llotimaci. Iena cacajanona, iena raise ñnotomoi. Ie jira Jusiñamuimo iobillacinona fecadicue. <sup>18</sup> Jeacino anamona jai jillobillamona, marecinona finocana jai jaidomoi.

<sup>19</sup> Cue lluaana omoi raise cacaillena, bie isoide rafuena lloticue. Omoi comeciaino railla jira, jeacinona navui finodomoi. Maraññedicinona finocana navui jaidomoi. Cristo dibeimo omoi jai illa muidona, marecinona omoi finocana birui mai omoi jai. Iese omoi jaillamona, omoi comeciaino Jusiñamui jitailla isoi marena iitomoi.

<sup>20</sup> Jeacino anamo navui omoi ia, Jusiñamui jitailla isoi, marecinona finoñedomoi. <sup>21</sup> Jeacinona navui omoi finuamona mare rafuena oñedomoi. Ie jira iena birui meiruitomoi. Jeacinona finocabidino fiodaillamona, Jusiñamui illanomo ico ññeitimaci. <sup>22</sup> Jeacino anamona jai jillobidomoi. Jusiñamui anamo omoi jai illa jira, naimie ocuica rafuena finodomoi. Iena omoi finuamona, Jusiñamui jitailla isoi, marecinona finocana jaitomoi. Ja muidomo naimie diga iitomoi. <sup>23</sup> Jeacinona finocana omoi jai, omoi jeacino ite diga fiodaitemo.



Jusiñamui illanomo ico iñeitomoi; iadedi cai Nama Jesucristona omoi ñinuamona, Jusiñamuidi omoína jaca itataite. Naimie illanomo ico iitomoi.

## 7

### *Inireda riñomona cai fueolle*

<sup>1</sup> Cud amatai, Moisés micori llogacinuaina uiñotomoi; iadedi iena nia raise cacaiñedomoi. Te fiodailla mei, jaca buna Moisés micori llogacinuai anamo iñede. Te fiodailla mei, jai iñena jira, nainomo duiñede. <sup>2</sup> Ie isoide. Nana naimie ille ñinori, inireda riño ie inimo duide. Iese Moisés micori jaiie lloste. Te ini fiodailla mei, ie inimo jai duiñede. Naimie anamo naiñaiño jai iñena jira, jaiamiēna naiñaiño oia, ie inina illena, Jusiñamuimona mare. <sup>3</sup> Ie ini nia fiodaifñenia, jaiamie diga naiñaiño ia, ie ini abimo jeacinona jai finode, Moisés micori lloga uai naiñaiño ñinoñena jira. Te ini fiodailla mei, naimie anamo naiñaiño jai iñena jira, jaiamiēna ie inimo naiñaiño oia, jeacinona jai finoñede.

<sup>4</sup> Ie isoide. Cristo fiodailla jira, Moisés micori llogacinuai anamo jai iñedicaí. Iemo jai duiñedicaí. Te jira Cristomo jai duidicaí. Jusiñamui jitailla rafuena finocana cai jaillena, fiodaillamona Cristo jai jillode. <sup>5</sup> Jusiñamuina nia cai ñinoñenia, cai jitailla rafuena finocana jaidicaí. Moisés micori llogacinona uiñoticaí; ia cai maraiñede jitailla rafuena finocana jaidicaí. Cai jeacino ite diga fiodaicana jaidicaí; <sup>6</sup> ia Moisés micori llogacino jai saide. Caimo jai duiñede. Navui ie anamo iticaí; iadedi birui ie anamo jai iñedicaí. Jusiñamuina cai sedajamona, Jusiñamui Joreño rafuedo jai jaidicaí. Moisés micori ciegafuaido jai jaiñedicaí.

### *Cue comecimo ite maraiñedicino*

<sup>7</sup> “Moisés micori llogacino maraiñede” lloñeiticaí; iadedi naie llogacino iñedena, jeacinona uiñoñedicue. Jaiamiemo ite rana cue niciduana maraiñenana jaiie uiñoñedicue. Moisés micori jaiie lloste: “Jaiamiemo ite rana nicidoñeno” lloste. Te jira naiemona niciduanana maraiñenana uiñoticue. <sup>8</sup> Naie llogacino muidona cue comeci jeacinona finoacade. Te muidona rana nicidotucue. Naie llogacino iñedena, jeacino finuana uiñoiacaiñedicaí. Naie llogacino iñedena, jeacino anamo iñedicaí. <sup>9</sup> Moisés micori llogacinona nia cue uiñoñenia, caimare uri iticue. Naiena cue uiñuamona, jeacino cue finuana uiñoticue. Ico Jusiñamui diga cue iñenana uiñoticue. <sup>10</sup> Nano cue comecina facadicue: “Naiedo cue jaillamona, Jusiñamui diga ico jaca iticue”. Iese cue comecina facadicue; iadedi naie llogacinona cue uiñuamona, Jusiñamui dibeimo cuena jaca itatañede. <sup>11</sup> Naie llogacino muidona cue comeci jeacinona finoacana jira, cue jitailla rafuena oñedicue. Ico Jusiñamui diga jaca cue illena oñedicue; iadedi duere cue sefuillicinona oticue. Naimie dibeimo Moisés micori llogacino cuena itatañede; ia naimie dibeimona cuena itataite.

<sup>12</sup> Iese ite; iadedi Moisés micori llogacinodi mare. Jusiñamuimona ite. <sup>13</sup> Naie llogacino mare. Naie rafue muidona fiodaifñeticue; ia jeacino muidona fiodaiticue. Jeacinona cue finua jira, Jusiñamui illanomo ico jaca iñeiticue. Naie mare llogacinomona jeacino cue finuana eo maraiñenana uiñoticue.

<sup>14</sup> Jusiñamui Joreño Moisés micorina naie llogacinona cuetataite. Te jira naicino mare; iadedi cue jitailla rafuena cue finua jira, cuemo jeacino illa jira, jeacino finoraimana iticue. <sup>15</sup> Cue finua rafuena raise uiñoñedicue, cue mare jitailla rafuena cue finoñena jira. Cue gaiñena maraiñede rafuena finocabidicue. <sup>16</sup> Cue maraiñede finoacaiñega rafuena cue finoiaide, Moisés micori llogacino marenana uiñoticue. <sup>17</sup> Cue comeci iena dama finoñede; iadedi cue comecimo ite jeacino cuena finotate. <sup>18</sup> Cue comecimo marenino iñede. Mare rafuena finoacadicue; iadedi iena finonidicue. <sup>19</sup> Cue mare finoacaga rafuena finoñedicue; iadedi cue maraiñede finoacaiñega rafuena finodicue. <sup>20</sup> Cue finoacaiñega rafue cue finoiaide, cue comeci iena dama finoñede; iadedi cue comecimo ite jeacino cuena iena finotate. <sup>21</sup> Biese cuemo suicabide. Mare rafuena cue finoacaniadedi, jeacinona finocabidicue. <sup>22</sup> Cue comeci Jusiñamui lloga uaina gaide; <sup>23</sup> iadedi cue comecimo maraiñede rafuena illana uiñoticue. Cue comecina namataacade. Cuena jeacinona finotaiacade.

<sup>24-25</sup> Eo dueredicue. Jusiñamui lloga uaina cue comecimona finoacadicue; iadedi cue comecimo ite maraiñede rafue cuena jeacinona finotaiacade. Jeacino finocana cue jai, duere sefuiticue. Jusiñamui illanomo ico jaca iñeiticue. Naiemona jaca buna cuena jillobitañede. Dama Jusiñamui cuena jillotaite, cai Nama Jesucristo muidona. Te jira Jusiñamuimo cue iobicabillasa.

## 8

### *Jusiñamui Joreño cai comeciaina namatacana cai jailla*

<sup>1</sup> Cristo Jesúmo duidinodicaí. Te jira Jusiñamuidi caina duere finoñeite. <sup>2</sup> Jeacino anamo jai cai iñena jira, caina duere finoñeite. Jeacinona cai finuamona, Jusiñamui illanomo ico jaca iñeiticaí. Duere sefuiticaí; iadedi naiemona Jusiñamui Joreño caina jai jillotate.

Jesucirstomo cai duillanona, caina jaca itaite. <sup>3</sup> Moisés micori llogacinona cai raise inoñena jira, jeacinomona dani jillonidicai. Ie jira Jusiñamuidi ie Jitona orede, imana naimie jaillena. Cai isoi naimie jaide; iadedi naimiedi jeacinona finoñede. Jeacinona finorainidicai. Cai jeacino facaina fodaillena, naimiena orede. Naimie uaidi cai jeacinona anafetitate. Ie jira jeacino anamona jai caina jillotate. <sup>4</sup> Iese finode, cai marena illena, Moisés micori llogacino llua isoi. Ie jira cai comecimo ite marañede jitailla rafuedo jai jaiñedicai; iadedi Jusiñamui Joreño jitailla rafuedo jai jaidicai.

<sup>5</sup> Cai comecimo ite marañede jitaillacinodo cai jaiadedi, naiemo cai comeciaina facadicai. Iena finodicai; iadedi Jusiñamui Joreño jitailla rafuedo cai jaiadedi, iemo cai comeciaina facadicai. Naimie jitailla rafuena finodicai. <sup>6</sup> Marañede jitaillacinomo comeciaina facacabidino Jusiñamui diga ico jaca inñeitimaci; iadedi Jusiñamui Joreño jitailla rafuedo jaidino Jusiñamui diga jaca iitimaci. Jiai jaca uri iitimaci. <sup>7</sup> Jiaino Jusiñamuina enoidimaci. Jusiñamui lloga uaina jitañfedimaci. Iena inonidimaci. <sup>8</sup> Iese itino Jusiñamuina iobitanidimaci.

<sup>9</sup> Iese inñedomoi; iadedi Jusiñamui Joreño jai duidomoi. Naimie omoimo ite. Bumo Jusiñamui Joreño inñena, Cristomo nia duñede. <sup>10</sup> Jeacinona omoi finua jira, fodaitomoi; iadedi Cristo omoimo illa jira, omoi joreñuai Jusiñamui illanomo jaca iitimaci, Jusiñamui omoina marebicaitaja jira. <sup>11</sup> Cristo Jesús fodaillamona, Jusiñamuidi naimiena jillotate. Omoimo ie Joreño illa jira, omoi fodaiaide, Jusiñamuidi ie Joreño uaido omoi abiaina jiai jillotaite.

<sup>12</sup> Cue amatiai, iese caimo suite. Ie jira cai comeciaino ite marañedicinodo cai jaiñelli. <sup>13</sup> Naicinodo cai jai, Jusiñamui illanomo ico jaca inñeiticai; iadedi Jusiñamui Joreñodi caina canuamona, naicino anamona cai jilluanona, Jusiñamui illanomo ico jaca iitici.

<sup>14</sup> Nana Jusiñamui Joreño namatadinodi Jusiñamui uruai. <sup>15</sup> Jusiñamui Joreño feiñoñedomoi, naimiena omoi jaciruillena; iadedi Jusiñamui uruaiaina omoi jaillena, naimiena feiñotomoi. Duere sefuillacinona navui jaciruitomoi; iadedi birui: “Cai Moo” raillanona, Jusiñamuina uaidotomoi. Ie jira naimiena jai jaciruiñedomoi. <sup>16</sup> Cai comeciaina Jusiñamui Joreño uññotajamona, cai comeciainona Jusiñamui uruaiidicaina jai uññotici. <sup>17</sup> Naimie uruaiidicaina jira, ie uruaiimo fecaacalle ra caimo jai duide, Cristomo jai duilla isoi. Naimie dibeimo cai illanona, Cristo isoi cai duere sefuilla jira, naimie isoi ie Moo illanomo ico iitici.

<sup>18</sup> Biena uññoticue. Bene birui duere sefuidicai; iadedi iemo cai comeciaina cai facañena, monamo ico eo marena jaca cai illena jira. <sup>19</sup> Iese cai illemo nana Jusiñamui finoca radi iocire birui ocuridimaci. <sup>20</sup> Nana enñuemo ite Jusiñamui finoca radi mare; iadedi Adán micori jeacino finua jira, Jusiñamui llua jira, naimaci faidobidimaci. Iese suide; iadedi ico dane marena naimaci illemo ocuridimaci, <sup>21</sup> naimaci rifaillamona ico naimaci jillua jira. Ie mei Jusiñamui uruaiidicaina isoi marena iitimaci. Dane fodaññeitimaci. <sup>22</sup> Biena uññotici. Nana Jusiñamui finoca radi danomo eo duere sefuicana nia jaidimaci. Marena illemo nia ocuridimaci. <sup>23</sup> Dani naimaci duere sefuicana jaidimaci; iadedi jiai duere sefuidicai. Jusiñamuidi ie Joreño caimo fecaja jira, ico cai marena illena uññotici. Monamo Jusiñamui uruaiaina ico cai illemo ocuridicai. Cai fodaia, fodaillamona cai abiaina jillotaite. Jiaifo eruaito cai abiaimo meidollemo ocuridicai. Ie mei cai abiai dane fodaññeitimaci. <sup>24</sup> Naiemo cai ocurillamona, cai jeacinomona navui jillobidicai. Bumo ie jitaillera ia, iemo naimie ocuriñede. Ie feiñoñega ramo ocuride. Ie isoidemo ocuridicai. <sup>25</sup> Caimo suiñede rafuemo cai ocurilla jira, iemo fecuise ocuridicai.

<sup>26</sup> Birui duere cai sefui, ico marena cai illemo ocuridicai. Jusiñamui Joreño caina jiai canode. Jusiñamuimo cai jiaia, naimiemo cai jicanua rafuena cai raise uññenia, ie Joreño cai facaina ñaite. Naimiedi cai jino botanide uaina Jusiñamuimo llote. <sup>27</sup> Jusiñamui cai comeciaina uññote. Naimie jitaillacinona ie Joreño jia jira, iena uññote. Jusiñamui cominidicai. Ie Joreño cai facaina ñaiana cacade.

### *Jusiñamui caina isiruite*

<sup>28</sup> Jusiñamuina isiruitinodicai. Naimie jitailla jira, naimie caina fetode. Jusiñamuidi caimo suide rafuena marena suicana jaitate. Iena uññotici. <sup>29</sup> Caina isiruillanona, caina fetode. Nano dofoconimona caina naimie Jito isoi cai illena itatate. Naimie Jitodi cai ama doforamiena. <sup>30</sup> Caina iese jai itatajamona, birui caina uaidote. Caina uaiduanona, caina jeacinona jaca finoñedino jai isoitate. Caina jeacinona jaca finoñedino jai isoitajamona, naimie illanomo ico cai ia, ebire iitici.

<sup>31</sup> Iese caina itataja jira, Jusiñamuidi cai facaina illa jira, bu cai facaina inñellena, damamai iesedicai. <sup>32</sup> Jusiñamuidi ie Jitona duere sefuillamona jillotañede; iadedi naimie jitailla jira, cai facaina ie Jitona orede, cairi fodaillena. Ie muidona naimie dibeimo marena cai ille rafuena caimo jiai iite. <sup>33</sup> Jeacinona navui finodicai; iadedi Jusiñamuidi caina jeacinona jaca finoñedino jai isoitaja jira, Jusiñamui fetocanodicaina jira, jaca buna cai jeacino facaina

naimiemo llogidoñeite. <sup>34</sup> Ie jira cai jeacino facaina jaca buna caina duere finotañeite. Cristo Jesús jaiie fiodaite; iadedi fiodaillamona naimie jillode. Jusiñamui beicimo naimiedi birui ite. Cai facaina naimie ñaite. <sup>35</sup> Cristo caina isiruite. Jaca buna Cristo caina isiruillacinona baironide. Jiaie comini duere caina finoia, caina jeare finoia, aime cai guia, cai iniroinia, jacirede rafue caimo ia, jiaie comini caina meinea, Cristo caina nia isiruite. <sup>36</sup> Iena Jusiñamui facaina lloaíma micori jaiie cuega:

Jusiñamui muidona caina jaca meinetimaci, mercadomo toica llaudaiaí fallena illa isoi cuega. <sup>37</sup> Cristo caina isiruilla jira, caina naimie canuamona, naga bie isoide rafue caimo suia, cai comeciaí ocuiñocana cai jailla. <sup>38</sup> Jusiñamui caina isiruite. Naimiemonna jaca budí caina baironide. Cai fiodaia, cai nia ia, Jusiñamui caina nia isiruite. Jusiñamui jaienisaidi, Taifedi, Janabadi Jusiñamui isiruillacinomonna caina baironidimaci. Birui diga isoide rafue caimo suide; iadedi Jusiñamui caina nia isiruite. Ico diga isoide rafue caimo suia, Jusiñamui caina nia jaca isiruite. Jaca buna ie uaido Jusiñamui isiruillacinomonna caina baironide. <sup>39</sup> Monamo ite radi Jusiñamui isiruillacinomonna caina baironide. Eniruemo ite radi Jusiñamui isiruillacinomonna caina baironide. Nana Jusiñamui finoca radi Jusiñamui isiruillacinomonna caina baironide. Cai Nama Cristo Jesús mo cai duilla jira, Jusiñamui caina isiruillana uñoticaí.

## 9

### *Jusiñamuidi judíuai railla cominina fetode*

<sup>1-2</sup> Jiaie rafuena nia lloiticue. Cue comecidi eo sunaite. Cristomo cue duilla jira, tainona llofedicue. Jusiñamui Joreño cue comecina uñotajamona, iena uñotiticue. Cue cominiri sunaiticue. <sup>3</sup> Cue comini Cristo rafuena inoiacaiñedimaci. Ie muidona Jusiñamui ricaiillifue anamo birui itimaci. Naiemona naimaci jilloillena, naimaci duere sefuillacino ifomo cue iticuedena, cuemona mare. Naimacidi cue amataí. <sup>4</sup> Israel railla cominidimaci. Jiaicidi judíuai railla cominidimaci. Jusiñamuidi naimacina fetode, ie uruina. Jusiñamui siño finoca rafuena ciodimaci. Iena naimaci inollena, Moisés micorimo Jusiñamuidi rafuena jiaí lloite. Naimiena sedallena jiaí lloite. Naimaci dine naimaci jilloitaraimana oretallena jiaí lloite. <sup>5</sup> Naimaci jaigaidi Abraham micori, Isaac micori, Jacob micori. Naimacimona comuide nairaimona Cristodi comuide. Naimiedi Jusiñamui. Nana rana naimie anamo ite. Naimieri jaca cai iobicabillasa. Iena jitaidicue.

<sup>6</sup> Cai cominimo Jusiñamuidi ie uaina lloite; iadedi nana cai comini iena inoñena jira: “Jusiñamui ie lloga uaina finoñede” raiñeiticai. Jusiñamuina naimaci raise inoñena muidona, nana Israel micorimona comuide cominidi Jusiñamuimo duifedimaci. <sup>7</sup> Nana Abraham micorimona comuidinodi naimiemo duifedimaci. Jusiñamui iena jaiie lloite: “Dama Isaacmona comuidinodi ua Abraham uruiaí”. <sup>8</sup> Naie lluamona nana Abraham micorimona comuidinona ie uruiañenana uñoticaí. Jusiñamui lloga uaina inotinodi naimie ua uruiaí. <sup>9</sup> Jusiñamuidi Abraham micorimo jaiie lloite: “Jiaie año bie facaiseconi o dine abido biiticue. Naie facaiseconi o ai Saradi jitona jocoite” lloite. Ie mei iese suide.

<sup>10</sup> Ie mei Isaac micoridi Rebeca micorina ote, naimie aina. Ie mei naiñaiño micoridi gorasana iaímaiaí micorina jocode. Nano doforamiedi Esaú micori. Jiaimiedi Jacob micori. <sup>11-13</sup> Naiñaiño micori nia jocoñenia, Jusiñamuidi naiñaiño micorimo lloite: “Nano doforamie ie ama anamo jaca iite” lloite. Jusiñamui facaina lloaíma micori Jusiñamui lluaña jiaí cuete: “Jusiñamui lloite: ‘Jacobna eo isiruiticue; iadedi Esaúna janore isiruiticue’ lloite”. Naie iaímaiaí micori nia jeicñenia, iaímaiaí micori marecinona nia finoñenia, iaímaiaí micori marañedicinona nia finoñenia, Jusiñamuidi iaímaiaí micorina iese lloite. Ie finoca rafuemonna Jacob micorina fetofede; iadedi Jusiñamui jitailla jira, Jacob micorina fetode.

<sup>14</sup> “Jusiñamuidi dama Jacob micorina fetuana marañede” raiñeiticai. Jusiñamuidi marañedicinona jaca finoñede. <sup>15</sup> Jusiñamui bie isoide rafuena Moisés micorimo lloite: “Cue dinena cue jitaillanona duenaiticue; ia cue dinena cue jitañenana duenaiticue” lloite. <sup>16</sup> Comini naimiena jitaillamona, Jusiñamui naimacina duenaiñede. Naimaci rafue finuamona, naimacina duenaiñede; iadedi naimie jitailla jira, naimacina duenaite. <sup>17</sup> Jusiñamuidi bie isoide rafuena Faraón micorimo lloite. Moisés micori illa facaise Egipto railla enirue illaimadi Faraón micori. Naimiemo lloite: “Ona illaimana jai itataticue. O uicomo siño rafuena finodicue, cue uai siñonana jiaie comini uñollena, nana cominido cue mameci sorillena”.

<sup>18</sup> Jusiñamui iese ite. Naimie dinena ie jitaillanona duenaite. Naimie jitailla jira, jiaie cominina naimiena inotañede.

<sup>19</sup> Nibaí comeciaina facadomoi: “Cominina iese Jusiñamui itataia, ¿bue ñellena naimacina duere finoacade?” <sup>20-21</sup> Iese comeciaina facañeno. ¿Niese nainona naimiemo ducaitomoi? Ero, jñoramonna nogona finodiñaiñodi ie jitailla dierise nogona finode. Dajerie ebirede nogona finode. Dajerie jamai nogona finode. <sup>22</sup> Ie isoide. Nana comini dajena eruañedicai.

Je jitailla isoi, jiaiforie Jusiñamui caina comuitate. Jusiñamui ie jitailla rafuena finode. Jeacinona comini finua jira, Jusiñamuidi naimacina duere finoacade. Naimacina ie uai siñonana jiai uifñotaacade; iadedi naimacina nia duere finoñede. <sup>23</sup> Cominina Jusiñamuidi jiai duenailla jira, naimacina ie siño uai ebirenana uifñotaacade. Naimie illanomo nanomona naimaci marena iitimaci. Iese naimie naimacina itatate. <sup>24</sup> Jusiñamui caina iese itatate. Da judiuaia iese itatañede; ie iadedi judiuaifñedinona jiai iese itatate. <sup>25</sup> Jusiñamui iena jaie lluana Oseas micori jaie cuete:

Cue cominiñedinodi cue cominina jaitimaci. Isiruiñeganona isiruiticue.

<sup>26</sup> Dane jiai cuete:

Navui cue cominiñedomoi; iadedi jiaie comini omoina ico lloitimaci: “Naimacidi jaca cajede cai Jusiñamui ie uruiaidimaci” lloitimaci

cuete. <sup>27</sup> Isaías micori railla lloraima jaie cuete: “Monailai fuemo conillie eo ite. Ie isoi Israel micori uruiái eo jebuitimaci; iadedi Jusiñamuidi nana naimacina jillobitañeite. Dajeriena jillotajanona, <sup>28</sup> jiaianomo ie lloga uaina raire finoite. Naimacina duere finoite” cuete. <sup>29</sup> Isaías micori jiai cuete:

Jusiñamuidi anamo nana ra ite.

Jusiñamuidi Sodómamo ite comini micoriaina jaie cuenode.

Gomórramo ite comini micoriaina jiai jaie cuenode.

Naimaci micoriai isoi iñedicaí, nana cai cominina naimiedi duere finoñena jira.

### *Judiuaidi Cristo rafuena jitaifñedinomaci*

<sup>30</sup> Biemo comeaiina faca. Judiuaifñedinodi Jusiñamui jitailla isoi, marena illana navui uifñoiacaiñedinomaci; iadedi iena jai uifñotimaci. Jesucristona naimaci inuamona, marena illana jai uifñotimaci. <sup>31</sup> Jusiñamui jitailla isoi marena naimaci illena, judiuaidi Moisés micori llogacinodo jaidimaci; iadedi Moisés micori llogacinona naimaci raise inoñena jira, marena illana jaca uifñedinomaci. <sup>32</sup> Naimaci finoca rafuemonona marena iacadimaci. Marena naimaci illena, Jesucristona inoiacaiñedinomaci. Naimie muidona marena iñeitimaci. <sup>33</sup> Isaías micori iena jaie cuete:

Jusiñamui llote: “Ero, Jerusalémo cue Jitona oretaiticue.

Naimie muidona cominidi jilloñeitimaci.

Naimiēna naimaci inoñenia, faifitimaci;

iadedi naimiēna inotinodi tainona inoñeitimaci.

Suubicaifñeitimaci” llote.

## 10

<sup>1</sup> Cue amatai, judiuaí comini jilluana eo jitaidicue. Jusiñamui diga cue ñaia, iena jicadicue. <sup>2</sup> Jusiñamui jitaillacinona eo finoacadimaci. Iena uifñoticue. Iena finoacadimaci; iadedi iena finuana raise uifñedinomaci. <sup>3</sup> Jusiñamui naimacina marena itatallena uifñedinomaci. Naimaci finoca rafuemonona marena iacadimaci. Jusiñamui llua isoi jaiacaiñedinomaci. <sup>4</sup> Nana Cristona inotinomiedi Moisés micori llogacinodo naimie marena illena jai jaifñede. Cristona inuamona, Jusiñamui jitailla isoi, naimie marena jai ite.

<sup>5</sup> Moisés micori jaie cuete: “Naimie marena illena, cue lluado jaidimiedi jaca iite, cue lluana naimie raise inoia” cuete. <sup>6</sup> Iese jaie cuete; iadedi jaca buna iese inoñede. Cristona inuamona, marena Jusiñamui jitailla isoi, birui iticai. Jusiñamui uai llote: “Omoí comeaiina facañeno: ‘Cristona cai baillena, naimiēna bene cai atillena, monamo jaiticai. <sup>7</sup> Fiodaitino dine jaiticai, Cristona cai jillotallena’. Iese comeaiina facañeno” llote. Cristodi eniruemo jaie bite. Fiodaite; ia naiemona jai jillode. <sup>8</sup> Jusiñamui uai llote: “Naie rafue cai dine jai ite. Iena jai uifñoticaí”. Cai jilloillena Cristona cai inuana birui lloticai. <sup>9</sup> Jiaie cominimo: “Cristodi cai Nama” omoí lloia, Cristo fiodaillamona Jusiñamui naimie jillotajana omoí inoia, jilloitomoí. <sup>10</sup> Cai comeaimona cai inua jira, Jusiñamui caina marena illana itataite. “Cristodi cai Nama” cai lloia, Jusiñamui caina jillotaite.

<sup>11</sup> Isaías micori iena jaie cuete: “Cristona inotinodi tainona inoñeitimaci. Suubicaifñeitimaci” cuela. <sup>12</sup> Naie rafuedi nana cominina ñaite. Judiuaia ñaite. Judiuaifñedinona jiai ñaite. Jusiñamui anamo nana cominidi itimaci. Nana naimiemo jicanotinona jaca duenaite. <sup>13</sup> Cristodi naga naimiemo jicanotimiēna jillotaite; <sup>14</sup> iadedi Cristona naimaci nia inoñenia, naimiemo jicanonidimaci. Cristo naimaci facaina fiodailla rafuena naimaci nia cacaiñenia, naimiēna inonidimaci. Naimacimo naie rafuena jiaie comini lloñenia, iena cacaiñeitimaci. <sup>15</sup> Jusiñamui ie rafue llorainina jai orede. Isaías micori iena jaie cuete: “Mare rafuena llotino cai dine billano, eo iobidicaí” cuete.

<sup>16</sup> Tese cuete; iadedi ailluena comini naie rafuena nia jitaifñedinomaci. Isaías micori iena jiai jaie cuete: “Jusiñamui, ailluena comini cai lluana inoiacaiñedinomaci” cuete. <sup>17</sup> Cai lluumona Cristo rafuena cacadimaci. Cristo rafuena cacajamona, damierie naimiēna inotinomaci.

<sup>18</sup> Judúuai comini naie rafuena jai cacadimaci. Jusiñamui facaina lloraima micorí iena jaie cuete:

Naga eniruemo ite cominimo Jusiñamui lloraini micoríaidi naie rafuena jai llotimaci cuete. <sup>19</sup> Judúuai comini naie rafuena cacadimaci; iadedi iena ñnoñedimaci. Moisés micorí iena jaie cuete:

Jusiñamuidi lloste: “Cue rafuena naimaci feiñua jira, judúuaiñedino diga uradoitomoí.

‘Naimaci abina uññoñedimaci’ raitomoí;

iadedi cue rafuena naimaci feiñua jira, naimaci diga iciritomoí” lloste.

<sup>20</sup> Isaías micorí marefodo jiai cuete:

Jusiñamui lloste: “Cuena jenoñedino cuena jai baitimaci.

Naimacina cue jilloitallena cuena jicanoñedinomo jai bairedicue” lloste.

<sup>21</sup> Jusiñamui judúuai cominina jiai lloste: “Naimacina cue dine jaca uaidoticue; iadedi ñnoiacañedimaci. Cuena jitaiñedimaci” lloste.

## 11

### *Judúuai cominimona dajerie ñnoitimaci*

<sup>1</sup> Jusiñamuidi judúuaina fainonocaillamo omoi comeciaina facañeno. Judío imiedicue. Abraham uruai micoríaimona comuidicue. Benjamín railla nairai imiedicue. <sup>2</sup> Naimacina jaie naimie fetua jira, Jusiñamui judúuaina fainonocañede. Elíamo jaie ite rafuena uññotomoí. Jusiñamuimo naimiedi judúuaina lloste: <sup>3</sup> “Cue Nama, o facaina lloraini micoríaina meinetimaci. Ona cai sedajanona judaídímaci. Dama cue fiebidicue. Cuena jiai meineiacadímaci”. <sup>4</sup> Jusiñamui dinena uai ote: “Dama ññedio. Siete mil ññíai cue díbeimo nia eenoticue. Baal railla jiraraina jaca seditañedimaci. Cuena nia sedadímaci” lloste. <sup>5</sup> Birui ie isoide. Naimacina duenaillamona, naimacina Jusiñamui fetua jira, dajerie Jusiñamui díbeimo itimaci. <sup>6</sup> Naimacina duenaillamona, naimacina fetode. Naimaci finoca rafue muidona naimacina fetofede. Naimaci finoca rafue muidona naimacina fetodena, naimacina duenaillamona naimacina fetofede.

<sup>7</sup> Ie jira iena iese lloiticue. Ailluena judúuaidi marena Jusiñamui jitailla isoi illana oñedimaci; iadedi Jusiñamui fetocano iena otimaci. Ailluena comini iena ñnoiacañedimaci.

<sup>8</sup> Jusiñamui facaina lloraini micoríai iena jaie cueda: “Jusiñamuidi naimacina abina uññotañede. Jusiñamui finoca rana naimaci cioia, iena uññoñedimaci. Jusiñamui rafuena naimaci cacajia, iena cacañedimaci. Birui iese nia itimaci” cueda. <sup>9</sup> David micorí iena jiai lloste:

Naimacimo aillue ra illamona, Jusiñamui naimacina duere finoite.

<sup>10</sup> Naimaci comeciái Jusiñamui rafuena uññoñeitimaci.

Naimaci finoca rafue anamo duere sefuicana jaca jaitimaci.

### *Judúuaiñedinomona dajerie ñnoitimaci*

<sup>11</sup> Naimie rafuena judúuai comini jitaiñena jira, Jusiñamui naimacina duere finode; iadedi naimacina sofeñede. Jusiñamuina judúuai ñnoñena jira, Jusiñamuidi judúuaiñedinona jai jillotate. Naimacina jai jillotate, judúuai dinena judúuaiñedinona uradoillena. Uradoillamona Jusiñamuidi naimaci naimiena ñnollena jitaide. <sup>12</sup> Cristona judúuai jitaiñena jira, Jusiñamuimona judúuaiñedinodi diga marecinona birui feiñotimaci. Cristo díbeimo íco judúuai ía, Jusiñamuimona judúuaiñedino ailluena feiñoitimaci.

<sup>13</sup> Judúuaiñedino, omoímo rafuena lloiacadicue. Omoi dine Jusiñamuidi cuena orede. Cue majjari eo marena ññaiticue, <sup>14</sup> cue comini cuena uradoillena, Cristona dajerie ñnotallena. <sup>15</sup> Cristona naimaci nia ñnoñena jira, judúuaiñedino jai ñnotimaci. Cristona íco judúuai ñnoia, Jusiñamui diga jaca iitimaci. <sup>16</sup> Janore jisa juillirufu marenia, nana juilliruaídi mare. Riara íe jainauai marenia, nana íe igaillai mare. Judúuaidi íe isoidimaci. Naimaci jaiagai micoríai jainauai isoidimaci. Naimaci jaiagai marenia, naimacidi jiai mare. Birui ite judúuaidi igaillai isoidimaci.

<sup>17</sup> Taide igaillaídi íe amenamo jai duiñede. Ie isoidimaci. Naimacimona Cristona jaino ñnoñena jira, Cristomo jai duiñedimaci. Sotaca riara isoi, naimaci ífomo ítomoí. Ie jira Jusiñamuimona rafuena jai feiñocabitomoí. <sup>18</sup> Naimaci ífomo omoi illa jira, abina uradoñeno. Igaillaímona jainao cajellena, íe íjina oñede; iadedi íemo duilla jira, jainomona igaillai cajellena, íe íjina ote. Ie isoide. Naimiemo omoi duilla jira, Jusiñamuimona rafuena jai feiñocabitomoí.

<sup>19</sup> Comeciaina facadomoí: “Taide igaillai ífomo ítícaí isoidícaí. Jusiñamui judúuaina oní dotade, caína fetollena”. <sup>20</sup> Unaicinona comeciaina facadomoí. Naimaci ñnoñena jira, Jusiñamuidi naimacina oní dotade. Omoi ñnua jira, naimaci ífomo ítomoí. Ie jira abina uradoñeno; iadedi Jusiñamuina omoi jacírui. <sup>21</sup> Naimiena naimaci ñnoñena jira, judúuaina duere finode. Naimiena omoi ñnoñena, daje isoi omoína duere finoite. <sup>22</sup> Biemo comeciaina

faca. Naimiena #noñedinona jai duere finode; iadedi omoína duenaite. Naimiena #nocana omoi jaiia, naimie omoína nia duenaite. Iese omoi jaiñenia, naimie omoína dotaite. <sup>23</sup>Judíuai Cristona #noñeno navui jaidimaci: iadedi Cristona naimaci birui #noia, naimie dibeimo Jusiñamui naimacina itatarede, igai riaramo sotaja isoi. <sup>24</sup>Ailli riarana cueticue. Naie amenamo nano duñedomoi. Judíuai nainomo nano duidimaci. Jusiñamui jitailla jira, sotaca igai isoi, naimaci ifomo omoína jai itatate. Ie jira Jusiñamui jitaia, nainomo nano naimaci duilla jira, naimiedi judíuaina abido oite.

*Eo ailluena judíuai jilloitimaci*

<sup>25</sup>Bie rafuena omoi uiñuana jitaidicue. Iena navui uiñoñedicai. “Judíuai baifemo faiticai” omoi raiñellena, biena omoimo lloticue. Diga judíuai Cristona birui #noiacañedimaci. Jusiñamui jitailla diese judíuaiñedino jillua facaisena, iese iitimaci. <sup>26</sup>Ie mei eo ailluena judíuai jilloitimaci. Jusiñamui facaina lloraini micoriai iena cuetimaci: Jerusalémona cai jilloitaraíma biite.

Jacob micori uruiaimona jeacinona dotaite.

<sup>27</sup>Naimaci jeacinona oni dotajanona, Jusiñamui jaie lloga uai suite.

<sup>28</sup>Cristona birui #noiacañedimaci. Jusiñamuina enoidimaci. Jusiñamuina naimaci jitañena jira, naimie omoína fetode. Ie jira jillodomo; iadedi Jusiñamuidi judíuaina nano jaie fetode. Naimaci jaiagai micoriaimo ie lloga uaina jira, naimacina nia isiruite. <sup>29</sup>Jusiñamui ie lloga uaina sañede. Naimacina fetua jira, naimacina fainonocaiñeite. <sup>30</sup>Jusiñamuina navui #noñedomoi; iadedi Jusiñamuina naimaci #noñena jira, Jusiñamui omoína jai duenaite. <sup>31</sup>Jusiñamuina jai #noñedimaci; iadedi omoína naimie duenailla isoi, Jusiñamuidi naimacina ico jai duenaite. <sup>32</sup>Jusiñamui nana cominina naimiena #noñenana uiñotade, naimacina naimie duenailla. <sup>33</sup>Jusiñamui caina eo duenaite. Eo abina uiñote. Naga rana uiñote; ie iadedi naimie lloga uaina raise cacaiñedicai. Naimie finoca rafuena raise jai uiñoñedicai. <sup>34</sup>Jusiñamui facaina lloraima micori iena jaie cuete: “Jaca buna cai Nama Jusiñamui comecei facajacinona uiñoñede. Jaca buna naimiemo ie finoca rafuena lloñede. <sup>35</sup>Jairuido ibana feiñollena, jaca buna naimiemo rana fecañede” cuete. <sup>36</sup>Naga ra naimiemo illa jira, naga ra naimiemo bite. Naga rana finode. Naimiemo iobillacinona cai fecacabillasa. Iena jitaidicue.

## 12

*Jusiñamui anamo raise omoi i*

<sup>1</sup>Cue amatiai, omoimo bie rafuena lloiticue. Jusiñamui caina duenailla jira, omoi jeanide comeciainona, naimie jitaile rafuena omoi finuamona naimie anamo raise omoi i. Naimie jitailla isoi omoi i. Naimiedi omoi iese illana gaide. Omoi comeciainona naimiena raise omoi seda. <sup>2</sup>Cristona uiñoñedino isoi omoi iñeno; iadedi omoi comeciái uaina meiduanona, jaiie rafuedo mai omoi jai. Ie mei Jusiñamui jitailla rafuena finuana uiñoitomoi. Mare rafuena finuana uiñoitomoi. Naimiena iobitajacinona jai uiñoitomoi. Eo mare rafuedo jaillana uiñoitomoi.

<sup>3</sup>Jusiñamui cuena duenaillamona, bie rafuena omoimo cue lloiena, naimie uai cuemo ite. “Jiaie comini baifemo faiticue” raillamo o comecina facañeno; iadedi: “Nie isoidimedicue” o raillamo o comecina raise faca. Jusiñamuimona o feiñoga diese #nuacinomo o comecina faca. <sup>4</sup>Nagamie ie abimo diga ra ite. Ie onolli ite. Ie uisi ite. Ie jebe ite. Diga jiaie ra ite. Rana cai finollena, naga ra cai abimo ite. Cai abimo jainaiaide. <sup>5</sup>Ie isoide. Cristona jai #noticai. Aillosedicai; iadedi daajena naimiemo jainaiaidicai. Dani caimo jai jainaiaidicai.

<sup>6</sup>Jusiñamuidi daje isoide uaina naimie dibeimo cai majillena, caimo fecañede. Ie jitailla diese caimo fecade. Ie jira omoi feiñoga uaido naimie facaina maji. Rafuena omoimo Jusiñamui lloia, iena raise lloño. Roracomo omoi majillena Jusiñamui lloia, nainomo raise maji. Omoi llofuellena Jusiñamui lloia, naimie rafuena raise llofue. <sup>7</sup>Roracomo majiacinona uiñotimiedi nainomo raise majija. Llofuacinona uiñotimiedi raise llofua. <sup>8</sup>Comecei ocuiñotajacinona uiñotimiedi comini comeciaina ocuiñotacana jailla. Rana fecajacinona uiñotimiedi rana caidñeno fecaja. Cominina sedajacinona uiñotimiedi cominina raise sedaja. Dueredinona canodimiedi dueredinona iocire canua. Cristomo daajena cai jainaiállamona, iese coninina canocana jaiticai.

*Cristo rafuedo cai jailla*

<sup>9</sup>Omoi comeciainona nana cominina isirui. Maraiñedicinona gaiñeno; iadedi mare rafuedo omoi jai. <sup>10</sup>Coninina isirui, omoi cominina omoi isiruilla isoi. Omoína jaiimie nia iobitañenia, naimiena raire omoi iobita.

<sup>11</sup>Cristo rafuena sefuiruiñeno finocana omoi jai. Cai Namana iocire seda.

<sup>12</sup> Naimie dine omoi illemo iocire omoi ocuiri. Duere omoi sefuia, omoi comeciaina ocuiño. Jusiñamui diga ñaicabillanona omoi jai.

<sup>13</sup> Jiaie creyentiaí rania, naimacina cano. Omoi jofuemo creyentiaí ria, naimacina nafue.

<sup>14</sup> Jusiñamui díbeimo naimaci marena illena, omoína duere finodinona Jusiñamuimo jii. Naimaciri marena ñaino. Naimacina faidoño.

<sup>15</sup> Iobidino diga omoi nabairillena, omoi iobi. Sunaitino diga omoi nabairillena jiai omoi sunai.

<sup>16</sup> Daje isoi omoi comeciái lloillamona uri omoi i. Abina birioicaíño. Jamai bue isoidino diga nabairi. “Jiaie comini baiferno uñoticaí” raiño.

<sup>17</sup> Jiaie comini omoína jeare finoia, naimacina daje isoi jeare finoño. Ibana oño. Omoi marena illana jiaie comini uñollena, marena omoi i. <sup>18</sup> Omoimona rafuena suiñoño. Nana comini diga uri omoi i. <sup>19</sup> Cue isiruigano, bu omoína jeare finoia, ibana oño. Jusiñamui naimacina duere finoite. Moisés micori iena jaiete: “Cai Nama llote: ‘Cominina duere finodicue. Ibana oitícue’ ” cuete. <sup>20</sup> Ibana oño. Jusiñamui facaina lloraima iena jaiete jiai cueda: “Omoi enoigamie aimetia, naimiena eca. Naimie jiroiacania, naimiena jirote”. Ie mei naimie meire omoimo eruaita. <sup>21</sup> Jiaie comini omoína jeare finoia, icriño; iadedi naimacimo mare rafuena fino. Iese omoi finoia, naimacina omoi díbeimo itaitomoi.

## 13

<sup>1</sup> Nana illaicominina naimaci ifomo Jusiñamuide itataja jira, illaicomini lloga uaina nana cai inua. <sup>2</sup> Illaicomini uaina bu inoñenia, Jusiñamuina jiai inoñede. Ie mei Jusiñamui naimiena duere finoite. <sup>3</sup> Mare rafuena finodinodi illaicominina jaciruiñedimaci; iadedi marañede rafuena finodino naimacina jaciruitimaci. Omoína duere finoñellena, mare rafuena finocana omoi jai. Iese omoi jai, omoína marena ñaitimaci. <sup>4</sup> Jusiñamui facaina omoína canodimaci. Marañede rafuena omoi finoia, naimacina jacirui. Omoína duere finollena, naimacimo uai ite. Marañede rafuena finodimiena Jusiñamui facaina duere finoitimaci. <sup>5</sup> Ie jira naimaci uaina ino, Jusiñamuimona omoi duere sefuiñellena. Omoína: “Mare” jiai raitimaci. <sup>6</sup> Gobierno omoína ibataia, Jusiñamui facaina naimaci majia jira, iena iba. Naimaci raise majillena, iena iba.

<sup>7</sup> Gobierno omoína ibataia, iena iba. Illaicominimo iobillacinona feca. <sup>8</sup> Ra omoi oia, ibaño jaiño; iadedi coninina omoi isirui. Jiaie cominina isiruitimiedi nana Jusiñamui lloga uaina jai finode. <sup>9</sup> Moisés micori diga lletarafuena jaiete: “O añede riño diga ino. O inñede iima diga ino. Jiaimiena meineño. Rana fiño. Jiaimie ite rana nicidoño” cuete. Jiai lletarafue ite: “Dani omoi abiaína omoi isiruilla isoi, jiaie cominina omoi isiruilla”. Bie lletarafuena omoi inoia, nana lletarafuena jai inotomoi. <sup>10</sup> Jiaie cominina omoi isiruia, naimacina jeare jai finoñedomoi. Jiaie cominina omoi isiruia, nana Jusiñamui lloga uaina jai inotomoi.

<sup>11</sup> Iena birui cai finua. Jesucristo billiruidi iairei jai ite. Naimiena cai nano inua facaiseconi, naimie billiruimo cai comeciaina facadica; iadedi nagarui naimie billirui iairei inoicaide. <sup>12</sup> Jesucristo nia dane biñena jira, eniruemmo cai illa jira, jitreñinomo iticaí isoidicaí. Naimie bia, naimie diga cai illemona, useredinomo raire ja iticaí isoiticaí. Ie jira jeacinona finocana cai jaillana mai cai fainonocailli. Jesucristo rafue anamo raise cai illesa. <sup>13</sup> Cai marena illana nana comini uñollena, mare rafuena finocana cai jailla. Jearede rafuena cai finoña. Cai jifañena. Cai añede riño diga cai ino. Cai fuirñena. Cai abina uradoñena. <sup>14</sup> Iese cai ino; iadedi naimie caina namatallena, cai Nama Jesucristona raise cai nabailli. Cai jearede navui jitaillacinona finoacanamo cai comeciaina facañena.

## 14

*Jiaie creyentena jeare ñaiño*

<sup>1</sup> Cristona inotimiena omoi dine biade, naimiena raise feiño. Naimie Cristona nia raise inoñenia, naimiena nafue; iadedi omoi isoi naimie inoñenia, conima uina caitaño. <sup>2</sup> Dajerie naga rana guitimaci; iadedi jiamie difai guiga rana guite. Naimie riñede. Ie comecina facade: “Cue riia, jeacinona jai finoiticue”. <sup>3</sup> Naga rana guiñedimiena miño. Naga rana guitimiena miño. Jusiñamuide naimacina jai feiño. Ie jira miño. <sup>4</sup> Omoi facaina majiñedimaci. Jusiñamui facaina majidimaci. Jeacinona naimaci finoia, Jusiñamui naimacina duere finoite. Jeacinona finoi raillanona, Jusiñamuide naimacina canoite.

<sup>5</sup> Dajerie creyentiaí comeciaina facadimaci: “Judiaí rafue finaruillaí Jesuñamuina sedajiticaí, nairuillaí jaiaruillaí baifemo uaila jira”. Jiano raitimaci: “Nagarui daje isoide” raitimaci. Nagamie ie comecina raise facajamona, <sup>6</sup> cai Namana iobitallena, nagamie ie jitaillaruimo cai Namana sedate. Naga rana guitimie iobillacinona Jusiñamuimo fecajano, cai Namana iobitate. Naga rana guiñedimie iobillacinona Jusiñamuimo fecajano, cai Namana jiai iobitate.

<sup>7</sup> Cristomo cai duilla jira, dani cai jitailla rafuena finonidicai. Cai fiodailliruina jiaie llonidicai. <sup>8</sup> Naimiedi cai finolle rafuena ocuide. Cai fiodailliruina jiaie lloite. Naimiemo cai duilla jira, iese iticai. <sup>9</sup> Cristodi fiodaite. Ie mei jillode. Ie jira naimie anamo iticai. Cai cajenia, naimie anamo iticai. Cai fiodaia, naimie anamo jiaie iiticai.

<sup>10</sup> Naimie baifemo omoi iñena jira, jiaie creyentena miñeno. Naimie uaina caitañeno. Naimiedi Cristo dibeimo ite. Jusiñamui uicomo nana ico iiticai. Jusiñamuidi marañedinona duere finoite. Maredinona duere finoñeite. <sup>11</sup> Isaías micori jaie iena cuete:

Jusiñamuidi llote:

“Cue jaca illa jira, nana comini cue uicomo cuena sedajanona, cuemo iobillacinona fecaitimaci” llote.

<sup>12</sup> Nainomo Jusiñamui nana cai finouiga rafuena lloiticai. Ie jira jiaie creyentiaie diga marena omoi i.

*Jiaie creyentena jeacino finoi raillano, mare rafuedo cai jailla*

<sup>13</sup> Ie jira jiaie cominina cai miñena; iadedi mare rafuedo cai jailla. Jiaimiena jeacinona cai finotai raillano, mare rafuedo cai jailla. <sup>14</sup> Cai Nama Jesúmo cue duilla jira, naga riga radi cuemona mare. Iena raise uñoticue. Iena cue riia, jeacinona finoñedicue. Iena uñoticue; iadedi jiaimie comecina facade: “Biena cue riia, jeacinona jai finodicue”. Naimie comecina iese facajamona, iena naimie riia, naimiemona jeacinona jai finode. <sup>15</sup> O riga ra muidona jiaie creyente comeci marañeno jaia, naimiena jai isiruiñedio. Cristo naimieri fiodaite. Ie jira naie isoide rana riñeno, naimiena Jusiñamuina fainonocaitañellena. <sup>16</sup> Ie jira o jitailla rana finoñeno. Jiaie comini ona miñellena, naie rana riñeno. <sup>17</sup> Jusiñamui cominina cai illamona, cai guille ramo cai comeciaina cai eo facañena; iadedi marena cai illamo cai comeciaina cai facaja. Uri cai illamo cai comeciaina jiaie cai facaja. Iocire cai illamo cai comeciaina jiaie cai facaja. Jusiñamui Joreño caimo illa jira, iese caina itataite. <sup>18</sup> Iese cai jaia, Cristona raise sedadicaie. Jusiñamuina iobitadicai. Jiaie comini caina marena jiaie ñaitimaci.

<sup>19</sup> Ie jira uri icana cai jailla. Dani cai comeciaina ocuiñocana cai jailla. <sup>20</sup> Omoi riicaga ra muidona, jiaie cominina Jusiñamuina fainonocaitañeno. Naga radi mare, rillena; iadedi bue isoide omoi ria muidona, jiaimie Jusiñamuina fainonocai, jeacinona jai finodomo. <sup>21</sup> Bue isoide omoi ria muidona, jiaimie jeacino finoi raillanona, iena riñeno. Bue isoide omoi jirua muidona, jiaimie jeacino finoi raillanona, iena jiroñeno. Bue isoide omoi finua muidona, jiaimie jeacino finoi raillanona, ie isoide omoi finoñeno. Naimiedi Cristomo jai duide. <sup>22</sup> Mare ra omoi finoia, omoi comeciainona iena uñotomoi. Jusiñamuidi omoi comeciaina uiñua jira, iena marefodo lloñeno. Omoi comeciainona jeacinona omoi finoñenana uñotomoi. Ie jira iocire itomoi. <sup>23</sup> “Nie isoide ra cue riia, jeacinona finodicue” raillanomo bu iese comecina facaia, iena naimie riñena. Iena naimie riia, Cristona naimie raise iñoñena jira, jeacinona jai finode. Jiaimiena jeacinona cai finotai raillano, mare rafuedo cai jailla.

## 15

*Jiaie creyentena cai canua*

<sup>1</sup> Cristo rafuedo raise jaidicai; iadedi jiaimo Cristo rafuedo cai isoi nia jaiñedimaci. Naimacina cai canua. Ie jira dani cai jitaillie rafuena finoñeiticai; <sup>2</sup> iadedi Cristo rafuedo naimaci raise jaillena, jiaie cominimo cai comeciaina cai facaja, naimacina cai canollena. <sup>3</sup> Eniruemo navui naimie ia, Cristo ie jitailla rafuena jiaie finoñede; iadedi Jusiñamui jitailla rafuena finode. Naimiedi duere sefuide. Jusiñamui facaina lloraima micori Cristo ñaiana jiaie cuete: “Jusiñamuina jeare ñaiaacadimacimo, cuena jiaie jeare ñaitimaci” cuete. <sup>4</sup> Naiemona cai fueollena, naiemona cai comeciain ocuiñotallena, Jusiñamuina jaie cuegafuiaidi caimo ite. Naiemona Jusiñamui illanomo cai illemo ocuiridicai. <sup>5</sup> Jusiñamui cai comeciaina ocuiñotade. Naimie coniniri omoina uri itatajana jitaidicue. Cristo Jesús llua isoi, omoi uri illana jitaidicue, <sup>6</sup> daje isoi omoi comeciain lloillamona, Jusiñamuina omoi iobitallena. Cai Nama Jesucristo Moona Jusiñamui illamona, Jusiñamuina omoi iobitajana jitaidicue.

*Judúaiñedinodi Cristo rafuena jiaie cacadimaci*

<sup>7</sup> Jiaie illanomona creyente omoi roracomo bia, Cristo caina feiñua isoi, Jusiñamuina iobitallena, naimiena raise omoi feiño. <sup>8</sup> Iena nia lloiticue. Judúuaina canollena, Jusiñamui lloga uaina fuidollena, Cristodi bite. Jusiñamui tainona lloñede. Jusiñamui naimaci jaiagai micoriaimo ico suille rafuena jiaie llote. Eniruemo billanona, Cristo iena fuiduaibite. <sup>9</sup> Judúaiñedinodi Jusiñamuina iobitallena, Jusiñamui naimacina duenaila jira, Cristodi bite. David micori Cristo llua jaie cuete:

Judúaiñedinodi motomo cue illamona ona iobitaitimaci.

Ruamona cue muidona ona jiaie iobitaitimaci.

<sup>10</sup> Moisés micori jiaie cuete:



Judíuainfedino, Jusiñamui mo duide comini diga iobi.

<sup>11</sup> David micori jai cuete:

Nana judíuainfedino, Jusiñamui iobillacinona feca.

Nana comini naimiemo iobillacinona fecacabillasa.

<sup>12</sup> Isaías micori cuete:

Isaí micori uruiaimona damie comuitajamona, naimiedi judíuainfedinona sedaite.

Naimie naimacina jillobitallena, naimiemo ocuiritimaci.

<sup>13</sup> Jusiñamui iemo omoina ocuiritate. Naimiena omoi inuanona, naimie omoina caimare itatajana jitaidicue. Uri itatajana jai jitaidicue. Iemei Jusiñamui Joreño naimie siño uai diga omoi jilluamo omoina ocuiritaite.

<sup>14</sup> Cue amatiai, omoina uifoticue. Eo maredomoi. Cue lloga rafuena eo uifotomoi. Coninina llofueredomoi. <sup>15</sup> Iena omoi comecllena, dafuerie rafuena omoi mo marefodo cueticue. Jusiñamui cuena fetuanona, ie rafuena cue llollena, cuena orede. <sup>16</sup> Judíuainfedinomo Jusiñamui ie mare rafuena cue llollena, Cristo Jesús facaina maijidicue. Jusiñamui dibeimo naimacina cue itatajanona, Jusiñamui naimacina feiñollena, naimacimo lloticue. Jusiñamui Joreñodi naimacina jai maretaitaite.

<sup>17</sup> Jusiñamui dibeimo cue maijia jira, Cristo Jesús muidona cue maijari iobidicue. <sup>18</sup> Cue maijana marefodo lloticue. Judíuainfedinona Jusiñamuina inotallena, Cristodi cuena canode. Cue lluaana cacadimaci. Cue illana cioidimaci. <sup>19</sup> Cristodi cuena siño rafuena finotate. Jusiñamui Joreño uaido cuena finotate. Iemei Cristona jai inotimaci. Jerusalémona Ilírico railla enirue dinomo Cristo ie mare rafuena ailluena cominimo raise jai lloticue. <sup>20</sup> Nainomo Cristona nia uifotfedino dine navui cue jaiacana jira, nainomo Cristo rafuena lluaidicue. Jai cacadino illanomo cue jaiacaiñena jira, nainomo lluaifedicue. <sup>21</sup> Isaías micori buena jai cuete:

Cristo rafuena nia cacaiñedinodi iena cacaitimaci.

Naimiena uifotimaci

cuete.

### *Romamo Pablo jaiacade*

<sup>22</sup> Nainomo cue maijacana jira, Romamo omoi dine nia jaiñedicue. <sup>23</sup> Diga nairaimo Cristo rafuena bene jai cue llua jira, cue maijille bene jai iñede. Diga años omoi dine cue jaiacana jira. <sup>24</sup> España mo cue jai, omoi dine jaiticue. Omoi diga nano nigarui caimare ñaiticue. Ie mei España mo cue jaillena, cuena canoitomoi. <sup>25</sup> Omoi dine jaiticue; iadedi Jerusalémo ite creyentiaina cue canollena, nainomo nano jaiticue. <sup>26</sup> Macedoniammo ite creyentiaidi ucubena ofitatimaci. Acayamo ite creyentiaidi ucubena jai ofitatimaci. Jerusalémo ite duereda creyentiaina canoacadimaci. Jerusalémo ite creyentiaina canollena, iena birui uiticue. <sup>27</sup> Iena fecaacadimaci. Judíuainfedimaci; iadedi judíuaina canoacadimaci, naimacimo Cristo rafuena navui judíuai llua jira. Ie jira naimacina birui canodimaci. <sup>28</sup> Naimacimo bie ucubena raise cue fecaja mei, España mo cue jaillémona, omoi dine nano jaiticue. <sup>29</sup> Omoi dine cue ria, naimie rafuena cue llollena, Cristo cuena raise canoite.

<sup>30</sup> Cue amatiai, cai Nama Jesucristomo omoi duilla muidona, Jusiñamui Joreño coniniña omoina isiruitaja muidona, Jusiñamui omoi jiiia, cue facaina jai omoi jii. <sup>31</sup> Judeamo ite creyentfedinomona cue jillobillena, Jerusalémo ite creyentiaimo cue fecaacalle ucubena naimaci raise feiñollena, cue facaina omoi jii. <sup>32</sup> Jusiñamui jitailla isoi omoi dine iocire cue rillena, iese omoi jii. Iemei omoi diga cue illemona, jafaicina oiticue. <sup>33</sup> Jusiñamui omoina uri itatajana jitaidicue.

## 16

### *Romamo itinomo Pabldi ie uaina orede*

<sup>1</sup> Febe raillañaño omoi dine jaite. Naiñañaña omoi uifuaña jitaidicue. Naiñañodi creyente. Cenrea railla nairai iñaña. Cristo dibeimo maijiano, nainomo ite creyentiaina canocabide. <sup>2</sup> Cristomo omoi duilla muidona, jaiie creyentiaina cai feiñoiacacabilla isoi, naiñañaña raise feiño. Diga cominina naiñaña canua jira, naiñaña jitaile diese cano. Curna jai canode.

<sup>3</sup> Priscila dine cue uaina oredicue. Naiñaña ini Aquila dine cue uaina jai oredicue. Cristo Jesús facaina cue diga maijidiiaimaia. <sup>4</sup> Cue facaina niadedi fiodaitiaimaia. Ie jira iaimaiari iobidicue. Diga nairaimo judíuainfedide creyentia itimaci. Cuemona Cristo rafuena cacadimaci. Cue facaina iaimaiari niadedi fiodailla jira, iaimaiari jai iobidimaci. <sup>5</sup> Iaimaiari jofomo rollena bitino dine cue uaina oredicue. Epeneto dine cue uaina jai oredicue. Cue isiruigamie. Asia railla eniruemo itinomona naimiedi Cristona nano inotimie.

<sup>6</sup> María dine cue uaina oredicue. Omoina canollena, omoi motomo maijide. <sup>7</sup> Andrónico dine cue uaina oredicue. Junias dine cue uaina oredicue. Naie iaimaiadi cue comini.

Cárcelmo danomo navui iticai. Jesucristo oretaganodi iaimaiaina marena ñaitimaci. Naimiena nia cue inoñena facaise Cristona inotiaimaia.

<sup>8</sup> Amplias dine cue uaina oredicue. Cristomo naimie duilla jira, naimiedi cue isiruigamie. <sup>9</sup> Urbano dine cue uaina oredicue. Cristo facaina cai diga maijicabide. Estaquis dine cue uaina oredicue. Cue isiruigamie. <sup>10</sup> Apeles dine cue uaina oredicue. Cristomona naimiedi mare rafuedo jaicabide. Aristóbulo jofomo itino dine cue uaina oredicue. <sup>11</sup> Herodión dine cue uaina oredicue. Naimiedi cue comini. Narciso cominimona dajerie inotimaci. Naimaci dine cue uaina oredicue. <sup>12</sup> Trifena dine cue uaina oredicue. Trifosa dine cue uaina oredicue. Cai Nama facaina maijidiaiañuui. Pérsida dine cue uaina oredicue. Cue isiruigañaiño. Cai Nama facaina eo maijide. <sup>13</sup> Rufo dine cue uaina oredicue. Cai Namana eo raise inote. Naimie ei dine cue uaina jiai oredicue. Naiñaiñodi cue ei isoide. <sup>14</sup> Asíncrito dine cue uaina oredicue. Flegonte dine cue uaina oredicue. Hermas dine cue uaina oredicue. Patrobas dine cue uaina oredicue. Hermes dine cue uaina oredicue. Naimaci illanomo ite creyentiai dine cue uaina oredicue. <sup>15</sup> Filólogo dine cue uaina oredicue. Julia dine cue uaina oredicue. Nereo dine cue uaina oredicue. Naimie miriño dine cue uaina oredicue. Olimpás dine cue uaina oredicue. Nana naimaci illanomo ite creyentiai dine cue uaina oredicue.

<sup>16</sup> Conini caimare omoi uaido. Diga nairaimo creyentiai itimaci. Nana naimacidi omoi dine naimaci uaina oredimaci.

<sup>17</sup> Cue amatiai, daje rafuena nia lloiticue. Omoi comeciai daje isoi lloitañedino diga nabairiñeno. Uai uaitacabidino diga nabairiñeno. Omoi jai cacaja rafuena lloñedimaci; iadedi jiaie rafuena llotimaci. Naimaci diga nabairiñeno. <sup>18</sup> Cai Nama Jesucristo facaina maijineñedimaci; iadedi dani naimaci jitailla rana maijicabidimaci. Mare isoide llumona abina raise uiñoñedinona jifuetimaci. <sup>19</sup> Ailluena cominidi Cristona omoi inuana uiñotimaci. Ieri iobidicue. Marecinona finuana raise omoi uiñuana jitaicidicue. Marañedicinona omoi finuana jitañedicue. <sup>20</sup> Jusiñamuidi omoina uri itatate. Naimie omoina canoite, Taifena anafetallena. Cai Nama Jesucristo omoina duenaillesa.

<sup>21</sup> Omoi dine Timoteo ie uaina orede. Cue diga jiai maijicabide. Lucio ie uaina jiai orede. Jasón ie uaina jiai orede. Sosípater ie uaina jiai orede. Naimacidi cue comini.

<sup>22</sup> Tercidicue. Pablo facaina bie cartana omoimo cueticue. Cai Namamo cue duilla jira, omoimo cue uaina oredicue.

<sup>23</sup> Gayodi ie uaina jiai orede. Naimie jofomo ricabidicue. Creyentiaidi naimie jofomo rocabitimaci.

<sup>24</sup> Erasto ie uaina orede. Naimiedi bie nairai ie ucube eenoraíma. Cuarto ie uaina orede. Naimiedi jiai creyente.

*Jusiñamuido iobillacinona jaca cai fecajasa*

<sup>25</sup> Cue mare rafue llua isoi, Jusiñamui omoi comeciaina ocuiñotarede. Jesucristo rafuena llocabiticue. Jusiñamuidi cominimo naie rafuena jaie uiñotañede; <sup>26</sup> iadedi Jusiñamui caina iena birui jai uiñotade. Nana comini iena uiñollena, Jusiñamui facaina lloraini micoriai iena jaie cuetimaci. Jusiñamui llua jira, Cristona comini inollena, nana cominido bie rafuena llocana birui jaide. Jusiñamuidi jaca ite.

<sup>27</sup> Jusiñamuidi naga rana uiñote. Naimiemo Jesucristo mamecido iobillacinona jaca cai fecajasa. Mai. Macaibaite. Pablodicue.

## CORINTOMO ITE CRISTONA HNOTINOMO PABLO NANO ORETAGA RABE

*Corintomo ite creyentiaimo Pablo cartana orede*

<sup>1-2</sup> Corinto railla nairaimo ite creyentiaí, ¿nie isoidomoi? Pablodicue. Carta omoimo oredicue. Jusiñamui jitailla jira, Jesucristo rafuena cue llovena, cuena fetode. Sóstenes cue diga illa jira, omoi dine coco uaina oredicoco. Jesucristo dibeimona naimiedi cai ama. Jai Jusiñamui cominidomoi. Jesucristomo omoi duilla jira, Jusiñamui omoína jai marebicaitate. Jusiñamui omoína fetode, naimie iena. Ua nana cai Nama Jesucristona sedadinodicaídi Jusiñamui iena. <sup>3</sup> Cai Moo Jusiñamui, cai Nama Jesucristo diga, omoína jai duenaite. Iena uifocana mai omoi jai. Iaimaiaí omoína uri jai itatatiamaiaí. Iena omoi uifocana mai omoi jai.

*Cristo muidona Jusiñamuimona ailluena feiñoticaí*

<sup>4</sup> Jusiñamui diga cue ñaia, omoi facaina iobillacinona jaca fecadicue. Jesucristomo omoi duillamona, Jusiñamui omoína jai duenaite. Ie jira naimiemo omoi facaina iobillacinona jaca fecadicue. <sup>5</sup> Jusiñamui omoína duenaillamona, ie rafuena omoi llovena, naimiemona ailluena uaina feiñotomoi. Cristomo omoi duillamona, naga icaíño Cristo rafuena omoi jino lloia, omoína eo canode. Omoína naimiemo ite rafuena raise uifotade. <sup>6</sup> Ie muidona Cristo rafuena raise ñnotomoi. Cristo rafuena cai jino llumona, naimiemo raise ñnofidomoi. <sup>7</sup> Ie muidona Jusiñamuimona omoimo jaca buena fiebiñede, naimie dibeimo omoi raise maijillena. Naimie dibeimo omoi raise maijamona, naimie dibeimo jiaie creyentiaina raise itatacana jaidomoi. Cai Nama Jesucristo abido billemo icore omoi ocuirillanona, Jusiñamuimona ailluena rafuena feiñotomoi. <sup>8</sup> Jeacinona omoi finocabi raillano, naimie nia abido biñelle dinori Jesucristo omoi comeciaina raise sedaite. Cai Nama Jesucristo abido bia, ñcino omoimo iñena muidona, omoína duere finoñeite. Naimie bia, naimacimo jeacino nia illa jira, naimiena ñnofidinona duere finoite. <sup>9</sup> Jusiñamui ie lloga uaina jaca finoite. Naimie ñnogamie. Naimie Jitona omoi nabaillena omoína fetode. Naimie Jitodi cai Nama Jesucristo.

*Naimaci comeciaí daje isoi lloñedimaci*

<sup>10</sup> Cue amataí, omoimo rafuena lloiticue. Cai Nama Jesucristomo omoi duilla jira, iena lloiticue. Omoi comeciaí daje isoi lloillana jitaídicue. Daje isoi omoi comeciaí facajana jitaídicue. <sup>11</sup> Cloé raillamie cominimona bie rafuena cue fidia jira, iese omoimo lloiticue. “Omoi comeciaí daje isoi iñedomoi” naimie llote. <sup>12</sup> Omoimona damierie raitomoi: “Dani Pablo llofuia dibecinodo jai jaidicaí”. Damierie raitomoi: “Dani Apolos raillamie llofuia dibecinodo jai jaidicaí”. Damierie raitomoi: “Dani Pedro llofuia dibecinodo jai jaidicaí”. Damierie raitomoi: “Dani Cristo llofuia dibecinodo jai jaidicaí” raitomoi. Nana iese itomoi. Iemona omoi comeciaí daje isoi iñedomoi. Cloé cominimona iese fididicue. <sup>13</sup> Ero, diga omoi jilloitaraini iñede. Omoi jeacinomona omoi jillobillena, dama Cristo illa. Omoi facaina cruzmo cuedi fioidañedicue. Cue dibeimo omoi illena cue bautizañegaomoi. <sup>14</sup> Omoína cue bautizañena jira, omoimo ite rafue cuemona comuiñena jira, iobidicue. Dama Crispona bautizadicue. Gayona jiaie bautizadicue. <sup>15-16</sup> Estéfanas jofomo ite cominina bautizadicue. Jiaie cominina cue bautizajana comeciñedicue. Ie muidona: “Pablo facaina bautizadicaí” llonidomoi. Daje isoi omoi comeciaí lloñenia, cue muidonañede. <sup>17</sup> Ailluena cominina cue bautizallena, Cristodi cuena oretañede; iadedi naimie rafuena cue llofuellena, cuena oretate. Eo abina uñoraima isoi omoimo cue llofueticuedena, cue lloga rafuemo omoi comeciaina facañedomoi. Ie jira eo abina uñoraima isoi omoimo llofueñedicue. Cristo fioidaillamona, omoi jeacinomona naimie omoína jillotade. Iena omoi feitañenana jitaídicue.

*Cristo finoca rafuemona Jusiñamui uai siñonana uñoticaí*

<sup>18</sup> Cristona ñnoñedinomona cruzmo Cristo fioidailla rafuedi jamaifue. Naimacidi faificana jai jaidimaci. Jusiñamuimona naie rafue illa jira, caimona naie rafuedi siño. Naie uaidi diga comini comeciaí meidorede. Caidi naie rafuena ñnotinodicaí. <sup>19</sup> Ero, Jusiñamui facaina lloraima micori Cristona ñnoñedinona jaiete:

Jusiñamui llote: “Abina uñoraini imaci uñuacinona saitaiticue.

Abina baitadino imaci baitajacinona saitaiticue” llote.

Ie muidona naie isoide comini jilloñenana jai uñoticaí.

<sup>20</sup> Naie isoide comini uñuacinomona jaca jillonidicaí. Abi uñoraima uñuacinodi Cristo fioidailla rafue baifemo fañede. Moisés micori cuegafuena uñoraima uñuacinodi Cristo fioidailla rafue baifemo fañede. Uaina uaitatimie birui ite uñuacinodi Cristo fioidailla rafue

baifemo faifede. Jusiñamuidi naimiena uiñoñedino imaci abi uiñuacina jai jamaitate. Iena naimie jamaitajamona, naimaci uiñuacínodo naimaci jilloñenana jai uiñotici. <sup>21</sup> Ie jitaillacino diese Jusiñamui finua jira, naimaci abi uiñuacínomona naimiena ñnoñedimaci. Ie jira naimie mare jitaillacinomona, naimiena ñnotinona jai jillotate. Naimaci jeacínomona naimacina jai jillotate. Cristo rafuena cai llumona ñnotimaci. Jusiñamuina ñnoñedinodi naie rafuena: "Jamaifue" raitimaci.

<sup>22</sup> Siño rafuena naimaci cioacana jira, judíuai railla cominidi iese raitimaci: "Siño rafuena Jusiñamui finoia, omoi lloga rafuena ñnoitici" raitimaci. Grieguai railla comini dinena raitimaci: "Omoi lloga rafuena cai abina uiñuacino ie isoi itena, iena ñnoitici" raitimaci; <sup>23</sup> iadedi Cristo rafuena llocana jaídici. Cruzmo naimie jai fiodaillana llotici. Ie jira judíuaidi cai lloga rafue muidona iciritimaci. Naiena oiacañenano iciritimaci. Damie naimaci illaimana jaille mo ocuridimaci. Naimaci ocurillamie fiodaillamo naimaci comeicina facañedimaci. Cristo fiodailla jira, raitimaci: "Naimiedi cai ocuriñenamie" raitimaci. Judíuaiñedino dinena raitimaci: "Omoi lloga rafuedi jamaifue" raitimaci. Ailluena comini cai lloga rafuena jitañedimaci; <sup>24</sup> iadedi Jusiñamui damierie judíuaina jai fetode. Dajerie judíuaiñedinona jai jai fetode. Cruzmo Cristo fiodaillamona, jeacino anamona naimaci jillua jira, naie fetocano dinena Jusiñamui uai siñonana uiñotimaci. Cristo finoca rafuedo naimaci jilluamona, Jusiñamui abina uiñuana jai uiñotimaci. <sup>25</sup> Jusiñamui Cristona orede, cai jeacino facaina naimie fiodaillena. Jusiñamuina ñnoñedinomona Cristo finoca rafuedi jamaifue. Ebinidifue. Caimona Cristo finoca rafuedi Jusiñamui ñnoñedino uiñuacino baifemo faite. <sup>26</sup> Cue amatiai, Jusiñamui omoia navui fetode; iadedi ¿nie isoidomoi? Jamai bue isoidomoi. Omoi comeicina iemo faca. Jusiñamuina ñnoñedinomona abina uiñoñedomoi. Omoi creyentiai díbeimo eo abi uiñotino raise iñedimaci. Omoi creyentiai díbeimo illacomini raise iñedimaci. Omoi creyentiai díbeimo ucuberedino raise iñedimaci. Jusiñamui ie isoidinona eo fetone; <sup>27</sup> iadedi abina uiñoñedino raillanodomoina fetode, eo abina uiñotino dinena meidaillena. Illacominiñedinona jai fetode, illacomini dinena meidaillena. <sup>28</sup> Jamai bue isoidinona fetode, jamai bue isoiñedino baifemo faille. Jusiñamuimona jamai bue isoiñedinodi jamai comini. <sup>29</sup> Ie muidona jaca buna Jusiñamui uicomo abina iedoñena. <sup>30</sup> Caina ie cominina Jusiñamui jaitaja jira, Jesucristomo duidici. Cristomona Jusiñamuina uiñotici. Cristo fiodailla jira, Jusiñamui cai jeacina feitate. Iemona jeacino cai finoñellena, caina canocabide. Jusiñamuidi jeacino anamona caina jai jai jillotate. <sup>31</sup> Jusiñamui facaina lloraima micori iena jai cuete: "Bu abina iedoiacania, nana Cristo finoca rafue diga naimie abina iedua" cuete.

## 2

### *Pabloci cruzmo Cristo fiodailla rafuena llocabite*

<sup>1</sup> Cue amatiai, omoi dine navui cue rillamona, Jusiñamuimona cue feiñoga rafuena llofueticue. Omoi baifemo eo abina uiñoticedena, iese niade llofueñedicue. <sup>2</sup> Daje rafuemo cue comeicina facacabidicue. Ie jira omoimo dama Jesucristo rafuena llofueiacadicue. Cruzmo naimie fiodailla rafuena llofueiacadicue. <sup>3</sup> Omoi motomo navui cue ia, meiruioicaillamona jacinoidicue. Jusiñamui facaina cue raise jino lloñeni raillano jaciroidicue. <sup>4</sup> Comini abi uiñuacínodo omoimo llofueñedicue; iadedi omoi jeacínomona omoi jilluamona, Jusiñamui Joreñodi omoina cue lloga rafue siñonana uiñotade. <sup>5</sup> Jusiñamuidi cue iese llofuiana jitaide. Comini abina uiñuacina omoi cacajamona, Cristona ñnoñedomoi; iadedi Jusiñamui omoina jillotaja jira, jai ñnotomoi.

### *Jusiñamui Joreñodo bie rafuena uiñotici*

<sup>6</sup> Comini abi uiñuacínodo llofuecabiñedicue; iadedi Jusiñamuimona ite abi uiñuacínodo llofueticue. Cristona raise ñnofidinomona abi uiñuacínodo llofueticue. Cristo facaina llorainidi cue isoi jai llofuecabitimaci. Cominimo jai ite uiñuacínodo llofueñedicai. Illacomini uiñogacínodo llofueñedicai. Ico faifitimaci. Ico jai uainicaitimaci. Ie jira naimaci uiñogacínodo llofueñedicai; <sup>7</sup> iadedi Jusiñamuimona abi uiñuacina cai feiñuamona, iedo llofuetici. Nano dofoconi, enirue nia finoñenia, naimie comei iena uiñote. Monamo naimie ebirede illanomo ico cai illena jitaide. Iena jai cai uiñoñedicai. Jusiñamui jaca buna iena jai uiñotañede. <sup>8</sup> Birui ite illacominidi Jusiñamui ite rafuena nia uiñoñedimaci. Iena uiñotimaciden, cruzmo cai ebirede Namana meineñedimaci. Naimie uai ebirede. Nana ra naimie jai finua jira, naimie uai siño. Jusiñamui rafuena raise uiñoñedimaci; iadedi Jusiñamui caina iena uiñotade. <sup>9</sup> Jusiñamui facaina lloraima micori iena jai cueta: Jaca buna naimiena ñnotino facaina Jusiñamui finoca rafuena cioñede. Jaca buna iena cacañede. Jaca buna iemo comeicina facañede

cuega. Jusiñamui rafuena uifnoñedino naie rafuena jaca uifnoñeitimaci; iadedi naimiena isiruitino naie rafuena uifnotimaci. <sup>10</sup> Birui Jusiñamui caina iena uifnotade. Ie Joreño caina uifnotade. Ie Joreño naga rafuena uifnote. Nana Jusiñamui comecimo iticinona jiai uifnote.

<sup>11</sup> Jaca budi jiaimie comecimo iticinona uifnoñede. Dama naimie iena uifnote. Ie isoide. Jaca budi Jusiñamui comecimo iticinona uifnoñede. Dama naimie Joreño iena uifnote. <sup>12</sup> Jusiñamuimona ie Joreña jai feiñoticaí. Jiaie cominimona naie Joreña feiñoñedicai. Jusiñamui Joreño caina Jusiñamui caimo caidiñeno fecaca rafuena uifnotade. <sup>13</sup> Omoimo naie rafuena llofuecabiticaí. Cominimona fueoga uaido llofueñedicai; iadedi Jusiñamui Joreño caimo llofua uaido llofueticaí. Ie jira Jusiñamui Joreño ite cominimo naie rafuena llofuecabiticaí. <sup>14</sup> Jusiñamuina ifnoñedinodi Jusiñamui Joreñomona iticinona feiñoñedimaci. Naimacimona naie rafue jamaifue. Iena cacaiñedimaci. Iena jiai uifnoñedimaci. Dani Jusiñamui Joreño illa cominidi naiemo cacarefidimaci. <sup>15</sup> Nana Jusiñamui jitailla rafue diese cacadimaci. Jusiñamuina ifnoñedinodi Jusiñamui Joreño illa comini illa rafuena jiai raise uifnoñedimaci. <sup>16</sup> Jusiñamui facaina lloraima micori iena jaiie cuega: “Jaca buna Jusiñamui comecimo iticinona uifnoñede. Budi naimiena jiai llofuenide” cuega. Ero Cristo comecimo iticinona cai uifua jira, Jusiñamuina ifnoñedinodi caina raise uifnoñedimaci. Caina jiai llofuenidimaci.

### 3

#### *Danomo Jusiñamui díbeimo maijidimaci*

<sup>1</sup> Cue amataí, Jusiñamui Joreño anamo itinona omoi raise itomoidena, omoína llofueñedicue. Omoi jitaillacinodo nia omoi jailla jira, omoína llofueticue. Cristo rafuedo janore jai jaidomoi. Jusiñamui uruiaína jai jaidomoi; iadedi monoi ijina jirode urue isoidomoi. Jusiñamuimona nia moonaiñedomoi isoidomoi. Creyentiaína omoi jailla mei, Cristo rafuedo eo jaiñedomoi. <sup>2</sup> Feinide rafuena navui llofueticue. Eo feirede rafuena omoimo llofueñedicue. Omoína iena nia llofueñedicue. Omoi uruiaí janore moonaila mei, guitimaci. Ie isoide. Cristona cai ifnua mei, naimie rafuena ifnocana cai jailla; iadedi omoi raise jaiñena jira, Jusiñamuimona nia moonaiñedino isoidomoi. <sup>3</sup> Nia omoi jitaillacinodo jaidomoi. Jusiñamui Joreño anamo nia raise ifñedomoi. Coninina abina uradoidomoi. Omoi comeciaí daje isoi lloifñedomoi. Jusiñamuina ifnoñedino isoi nia itomoi. Jamai ebe isoi nia itomoi. <sup>4</sup> Omoimona damierie: “Pablo llofua díbecinodo jaidicaí” raitomoi. Jiaimo: “Apolos raillamie llofua díbecinodo jaidicaí” raitomoi. Iese omoi raia, Jusiñamuina ifnoñedino isoi itomoi. Ie jira iese raifñeno.

<sup>5</sup> Jamai bue isoídica. Apolos jiai jamai bue isoide; iadedi Jusiñamui díbeimo coco maijiamona, Cristo rafue coco llofuiamona, iena ifnotomoi. Jusiñamui cocomo lua isoi, ie rafuena lloticoco. <sup>6</sup> Naie rafuena cue llofuiamona nano ifnotomoi. Ie mei Apolos iena dane llofue. Iese llofueuidicoco; iadedi dama Jusiñamui omoína naie rafuena ifnotacana jaide. <sup>7</sup> Ie muída naiemona cai fueua. Jamai bue isoídicoco. Jusiñamui coco baifemo faite. Ie jira naimie omoína ifnocana jaitate. <sup>8</sup> Daje uaina Apolos diga maijídica. Coco maijía diese Jusiñamuimona coco ibana feiñotico. <sup>9</sup> Jusiñamui facaina maijídicoco; iadedi naimiedi omoína ifnocana jaitate. Naimiedi omoi comeciaína marena itatacana jaitate. <sup>10</sup> Jusiñamui cuemo lua isoi, naimie cuena canua diese, Cristo rafuena llofueticue. Cristo rafuena eo cue uifnuamona, Cristo rafuena omoimo navui llofueticue. Cue lluamona Cristona ifnotomoi. Birui jiaimie omoína naie rafuena jai llofue. Omoi comeciaimo naie rafue raise itabillena, omoína llofue. Bu omoína llofueia, omoi comeci marena illacinomo naimie comecina facajanona, omoína naimie llofuecabilla. <sup>11</sup> Omoi jeacinomona omoi jilloillena, jaca daje rafue ite. Jiaie rafuedi ifñede. Iena omoimo jai llofueticue. Naie rafuedi Jesucristona ñaite. <sup>12</sup> Iena raise atona bu llofueia, uanaicinsona jaca llofuiamona, cominina Cristona ifnocana jaitate. Naie rafuedi naimaci comeciaimo raise itabide. Iena raise atona bu llofueñenia, uanaicinsona jaca llofueñenia, cominina Cristona ifnocana jaitañede. Naie rafuedi naimaci comecimo raise itabiñede. <sup>13</sup> Jusiñamuidi nagamie ie llofuiacinsona ico lloite. Jesucristo abido bia, Jusiñamui nie isoídicinodo naga naimie facaina maijidino lluaña lloite. Naimaci llogacinsona eo facaciite. <sup>14</sup> Ie mei Cristo rafuena raise atona llotinodi Jusiñamuimona ibana feiñoñeitimaci. <sup>15</sup> Cristo rafuena raise atona lloñedinodi Jusiñamuimona ibana feiñoñeitimaci. Naimaci niade jiai faifitimaci; iadedi faifñeitimaci. Jusiñamui diga jaca iitimaci; iadedi tainomo maijidimaci.

<sup>16</sup> Jusiñamui ie illano omoi comeciaimo illana uifnotomoi. Naimie Joreño omoimo illa jira, Jusiñamui ie illanodi omoi creyentiaí. <sup>17</sup> Cristo díbeimona omoi creyentiaína bu abido danomo itataia, Jusiñamui naimiena duere finoite. Jusiñamui omoimo jai illa jira, naimiemo jai duidomoi. Ie jira naimie díbeimona omoína itatatiñena duere finoite.

<sup>18</sup> Bie rafuedo omoi raise jaillena, dani omoi abiaina jifueñeno. Creyenteñedino uifñuacínodo jaiñeno. Omoimona bu iedo jaiacania, naimiemo llono: “Naie isoid rafuedo o jaiñeno”. Iedo naimie jaia, creyenteñedinomona abina uifñoite; ia Jusiñamuimona abina uifñoite. Jusiñamuimona abina uifñotinona omoi jaillena, creyenteñedino uifñuacínodo omoi jaiñeno. <sup>19</sup> Jusiñamuimona naimiema ñinoñedino uifñuacínodi jamaifue. Jusiñamui facaina lloraima micori jai euega: “Jusiñamuidi comini abi uifñuacínona uifñuana, naimacina jai emodofide. Naimacina jai duere finode”. <sup>20</sup> Jiai euega: “Jusiñamuidi abi uifñotino railla comini imaci comeciai facajacino jamaifueña uifñote”. <sup>21</sup> Ie jira omoi llofuerainiri abi iedoñeno. Jusiñamuimona nana rafue omoimo jai illa jira, naimaci abi uifñuacínodo abina iedoñeno. <sup>22</sup> Marena omoi comeciai illacino jitai raillano, Cristo omoi dine caina oretate. Cueno oretate. Apolona oretate. Pedrona oretate. Naiemona omoi ra ollena, omoi jitai raillano, eniruedi ite. Omoi jitai raillano, birui nana omoimo ite rafuedi suide. Omoi jitai raillano, jairuido nana omoimo ite rafuedi suite. Nia omoi fiodañenia, Cristo omoína canoite. Omoi fiodaia, naimie dine jaitomoi. Naiemona marena omoi comeciai illacino jitai raillano, ua nana rafue omoimo jai ite. <sup>23</sup> Cristomo omoi jainaiaila jira, naimie anamo itomoi. Jusiñamuimo Cristo jainaiaila jira, naimie Jusiñamui jitailla rafueña jaca finocabide. Ie jira naimie jitaillacinona finocana omoi jai.

## 4

### *Cristo fetocano naimie dibeimo majide*

<sup>1</sup> Caimo omoi comeciaina faca. Cristo dibeimo majidicai. Jusiñamui rafueña llocana jaidicai. Iena jaiie uifñoñedicai; iadedi naimie caina uifñotaga rafueña birui llofueticai. <sup>2</sup> Ero, naga patródi naimie dibeimo majidino naimie lloga uaina ñnuana jitaide. Ie isoidie. Jusiñamuidi ie facaina lloraini naimiema naimaci ñnuamona naimie rafueña raise luana jitaide. <sup>3</sup> Cue uaina omoi uaitañenia, iena omoi uaitaia, jaino iena uaitaia, iemo comecina facañedicue. <sup>4</sup> Cuemo nicino ia, iena uifñoñedicue; iadedi Cristomona cue comecimo jecino nibai ite. Ia, naimie cuemo lloite. Iemona cuena duere finoite. <sup>5</sup> Ie jira: “O llucacino mare” cuemo lloñeno. “O llucacino marañede” cuemo jiai lloñeno. Cai Nama nia abido biñenia, iena cuemo omoi lloñeno. Naimie bia, nana comini comeciaino ite rafueña uifñotaite. Naimaci comeciaino ite jitaillacinona uifñotaite. Iemona naimaci majia dinori Jusiñamuimona iobillacinona feiñotimaci. Naie facaise cuemo ite rafueña lloite. Ie jira nia cuemo lloñeno.

<sup>6</sup> Cue amaitai, naie rafueña omoi raise uifñollena, Apolona ja ñaiticue. Cocomona omoi fueollena, cuena jiai ja ñaiticue. Omoi facaina ñaiticue. Jusiñamuina cuegafue llua isoi, omoi illana jitaidicue. Omoi llorainiri tainomo iobiñeno. Omoi Cristo facaina llorainimona damie jiaie lloraima baifemo faiamo omoi comeciaina facañeno. <sup>7</sup> Nana omoi llofuerainidi dajie isoidimaci. Jusiñamuimona nana naimacimo ite uaina feiñotimaci. Dani naimaci comeciainomona iena naimaci oñena jira, ie diga abina iedoñeno.

<sup>8</sup> “Nana Jusiñamuimona iticinona jai feiñoticai. Jusiñamuimona nana cai jitaillacinona caimo jai ite. Jusiñamui sedajanomo illainina isoi jai iticai” omoi comeciaina facadomoi; iadedi nia iese iñedomoi. Nainomo itomoidena, nainomo coco jai illa jira, cuemona eo mare. Nainomo iticocodena, cuemona eo mare; iadedi jiaie rafueño cue comecina jai facadicue. <sup>9</sup> Jusiñamuidi nana omoína cue baifemo faitatate raillanomo cue comecina facadicue. Cristo rafueña llorainidicai; iadedi cue baifemo omoi faiamo cue comecina facadicue. Omoimona jamai bue isoidicai. Nana comini duere cai illamo raise eruaidimaci. Jusiñamui jaienisaidi duere cai illamo jiai eruaidimaci. <sup>10</sup> Cristo rafueña cai llua muidona, omoimona ebe isoidicai. “Cristo rafueña raise ñnuanona, iedo raise jaidicai” raillanomo omoi comeciaina facadomoi; iadedi Jusiñamuimona iese iñedomoi. Omoimona cai uaidi raise baiñede. “Cai uaidi caimo raise baite” raillanomo omoi comeciaina facadomoi; iadedi Jusiñamuimona iese iñedomoi. Omoimona jamai bue cai isoilla jira, cairi jaisitomoi. “Jaiie comini cairi iobidimaci” raillanomo omoi comecina facadomoi; iadedi Jusiñamuimona iese iñedomoi. <sup>11</sup> Cai guille buedi jaca iñede. Iniroinidicai. Jaiie comini caina duere finodimaci. Jofonidicai. <sup>12</sup> Cai ra ollena, cai onolli diga duere majidicai. Comini caina jeare ñaitimaci; iadedi ibana oñedicai. Naimaci diga marena ñaiticai. Caina duere finodimaci; iadedi uai oñeno ibana oñedicai. <sup>13</sup> Cai joreña jeare ñaitimaci; iadedi cai dinena naimaci diga marena ñaiticai. Naimacimona jamai bue isoidicai. Iese caimo naimaci comeciai nia facadimaci; ia Cristo dibeimo ie rafueña nia llocana jaiacadicai.

<sup>14</sup> Bie carta cue cuiamona, omoína meiruitacañedicue; ia omoína nia llofueiacadicue. Isiruiga uruaidomoi isoidomoi. Ie jira bie rafueña omoi raise uifñuana jitaidicue. <sup>15</sup> Omoína Cristo rafueña llofuellena, diga lloraini omoimo ite; iadedi cuemona Cristo rafueña omoi

nano cacaja jira, omoi moo isoidicue. Cue uruiaina jai jaidomoi isoidomoi. <sup>16</sup> Ie jira omoi mo cue llogacinodo mai omoi jai.

<sup>17</sup> Iedo omoi jaillena, omoi na canollena, omoi dine Timoteona jai oredicue. Naimiena isiruiticue. Naimiedi Cristo ie inogamie. Cuemona Cristo rafuena naimie cacajanona, iena inote. Ie jira naimiedi cue jito isoide. Creyentiai illanomo cue ia, Cristo rafuena jaca llofueticue. Naie rafuedo cue jitailla isoi, iedo omoi raise jaillena, naimiedi omoi na llofue. <sup>18</sup> "Pablo caina jaciruilla jira, naimie cai dine bifeite" raillanomo omoi comeciaina facajamona, omoi mona damerie jai abina biridomoi. <sup>19</sup> Iese comeciaina facadomoi; iadedi Jusiñamui jitaia, omoi dine raire jaiticue. Ie mei nie isoide uai naie abina biridinomo illana uifioiticue. Naimaci ñaiacinodo iena uifioiteicue; iadedi naimaci finoca rafuemona iena uifioiticue. <sup>20</sup> Ero, jamai ñaiamona, Jusiñamui anamo naimie jitailla isoi inedicai; iadedi naimie finoca rafuedo cai jaillamona, naimie jitailla isoi iticai. <sup>21</sup> Omoi dine ico cue ria, ¿niese omoi diga ñaiticue? Cuemo llono. Cue lluna omoi inoñenia, omoi mo riire lloiticue. Cue lluna omoi inoia, omoi na cue isiruillamona, omoi mo fecuise lloiticue. Ie jira cuemo llono.

## 5

### *Pablo eo jearede rafuena finodimiena riire llote*

<sup>1</sup> Jiaie rafuena omoi mo lloiticue. Eo jearede rafue omoi motomo jai illana jai fididicue. Jusiñamuina inoñedinona naie isoide rafuena inoñedimaci; iadedi omoi mona damie ie eicañona ote, ie ana. <sup>2</sup> Jearede rafue omoi motomo ite; iadedi nia abina iedotomoi. Naie isoide rafue omoi motomo navui suilla jira, ¿bue ñellena sunañedomoi? Omoi rocabillacom omoi naimie bia, naimie fo billana rairui. <sup>3</sup> Omoi dine iticuedena, bie rafue dani omoi siadollena, omoi danomo ofillena lloticue. Omoi dine cue inena jira, cue comecidi omoi dine ite. Bie rafuemo cue comecina facaoidicue. Bie rafue omoi diga are siadoñeiticue; iadedi naie rafuena finodimiena cue ñaiana jai uifioiticue. <sup>4</sup> Cai Nama Jesús facaina cue ñaiamona, naimiena ñaiticue. Ofillanona bie rafue omoi siadollena, omoi diga cue iacanana omoi comeci. Omoi na canollena, cai Nama Jesucristo omoi diga ite. <sup>5</sup> Taifemo jearede rafuena finodimiena sofe. Taife anamo naimie jai illa jira, duere sefuite; iadedi naiemona fueoite. Duere sefuillamona, Cristo dibeimo dane iite. Cristo ico abido bia, naimiedi Cristo dibeimo dane raise illa jira, Cristo naimiena duere finoite.

<sup>6</sup> Jearede rafue omoi motomo illa jira, ¿buena abina iedotomoi? Janorede siritate ra juilliruaimo ñaiamona, nana naie juilliruai siricana jaitate. Iena uifiotomoi. Ie isoide. Janorede jearede rafuemona, eo ailluena jearede rafuena oni jaide. Omoi mo ite jearede rafuemona oni omoi i, naiemona jearede rafuedo omoi jaisa. <sup>7</sup> Judiuai railla cominidi pascua railla rafuena finoacania, nana siritate ra naimaci jofuemona oni dotadimaci. Ie isoide. Cristo jitailla isoi omoi illena, omoi comeciaino ite jeacinona fainonocai. Jeacino anamo omoi jai illa jira, iena fainonocai. Pascua rafue facaiseconi judiuai cominidi toica llaudaia fajamona, naimaci jeacino facaina Jusiñamui ibana oñede. Cai facaina Cristo jai fiodailla jira, cai jeacino facaina Jusiñamui ibana oñeite; iadedi iemona naimiena nabaidicai. Ie jira jeacinona finocana cai jaiñeno. <sup>8</sup> Cai facaina Cristo fiodailla jira, cai jeacinona fainonocailanona, Jusiñamui jitailla isoi mai cai i. Jeacinona finocana cai jaiñelli. Uanaicinodo mai cai jailli.

<sup>9</sup> Jiaie cartana omoi mo navui oredicue. Imaci añede riñoniai diga itino diga nabairiñellena lloticue. Naiñaiñuai inifeñe iniaia diga itañaiñuai diga nabairiñellena lloticue. <sup>10</sup> Nibai iena raise cacañedomoi. Ie jira iena dane lloiticue. Cristona inoñedinona ñañedicue. Naimaci añede riñoniai diga ia, naiñaiñuai inifeñe iniaia diga ia, naimaci rana nicidoia, rana naimaci fiaia, jiraraina naimaci sedajia, naimaci diga omoi nabairiñenana ñañedicue. Iena rairuiñedicue. Iena cue rairuidenedena, naganomo Jusiñamuina uifioñedinona illa jira, ¿ninomo niadedi iticai? <sup>11</sup> "Cristona inoticaia" raitinona ñaiticue. Naimaci añede riñoniai diga naimaci ia, naiñaiñuai inifeñe iniaia diga naiñaiñuai ia, rana naimaci nicidoia, jiraraina naimaci sedajia, jiaie cominina naimaci jeare ñaia, naimaci jifaicabia, rana naimaci ficabia, naimaci diga nabairiñeno. Naie isoidino omoi jofuemo feiñoñeno. <sup>12-13</sup> Cristona inoñedinona ñañedicue. Naimaci rafue cuemo duifede; iadedi marañedicinona naimaci finoa, Jusiñamui naimacina duere finoite; iadedi Cristona inotino marañedicinona finoa, naimacino riire llono. Omoi motomo ite jearede rafuena finodimiena omoi rocabillacom omoi bia, naimie fo billana rairui.

## 6

### *Cristona inoñede juezmo jiaie creyentena llogidoñeno*

<sup>1</sup> Jiaie omoi finoca rafuena fididicue. Jiaie creyentedimie diga omoi nicino ia, ¿bue ñellena jiaie creyentiaí dine jaiñedomoi, naicinona siadollena? ¿Bue ñellena Cristona ñnoñede juez ñne naimiena meiruiñeno llogidotomoi? <sup>2-3</sup> Jesucristo abido bille mei, Cristona ñnotinodicaidi Cristona ñnoñedinona duere sefullena lloiticai. Taife comini duere sefullicinona ico jiai lloiticai. Iena uiñotomoi. Naimacimo omoi ico llua jira, ¿bue ñellena birui omoimo ite rafuena dani omoi raise finonidomoi? <sup>4</sup> Nicino omoimo ia, ¿bue ñellena Cristona ñnoñedino dine jaidomoi? Omoimona naimaci jamai bue isoidimaci. Naie isoide jueces omoimo ite rafuena raise uiñoñedimaci. <sup>5</sup> Omoi meidallena, iena omoimo jai lloticue. Naie nicinona raise omoi siadollena, iena raise finollena, omoimona ñibai damie ite, iena raise finollena. <sup>6</sup> Iese finocabiñedomoi; iadedi nicino omoi creyentiaímo ia, Cristona ñnoñedimiemo jiaie creyentena llogidocabitomoi.

<sup>7</sup> Jiaie creyentena omoi llogidoia, Cristo dibeimo raise iñedomoi. Naicino raise omoi finoñenia, uai oñeno anamo ee. Naimiemona omoi duere sefua, dama ite. <sup>8</sup> Iese iñedomoi; iadedi dani conini jiaie creyentiaína duere finocabidomoi. Naimaci rana fiñdomoi. Omoi amana duere finodomoi.

<sup>9</sup> Jusiñamui sedajanomo naimiena ñnoñedino duiñeitimaci. Naimaci isoi nia iacadomoi; iadedi Cristo dibeimo omoi illa jira, naimaci isoi inidomoi. Ie jira naimaci illamo omoi abina rairui. Bie isoidino Jusiñamui ie cominina sedajanomo jaca duiñeitimaci: imaci aiñede riño diga itino, imaci iniñede iima diga itino, jiraraina sedacabidino, daje isoide iima diga conima aifiedotino, daje isoide riño diga conioño aifiedotino, <sup>10</sup> rana bainino fiñcabidino, rana nicidocabitino, jifaicabidino, jiaie cominina jeare ñaicabitino, cominimona rana bairodino. Nana naie isoidino Jusiñamui ie cominina sedajanomo duiñeitimaci. <sup>11</sup> Omoimona dajerie iese jaietomoi; iadedi jiaie rafuedo birui jaidomoi. Cai Nama Jesucristo fiodailla jira, Jusiñamuidi omoi jeacinona jai oni dotade. Iena jai feitate. Ie Joreño uaido omoína ie cominina jai jaitate. Ie muadona naimiemona jai marebicaidomoi.

#### *Jearede rafuemona abina rairui*

<sup>12</sup> Cristo dibeimo omoi illa jira, ¿ñiese dani omoi jitaillacinodo jaiacadomoi? Diga Jusiñamui rairuiñega rafue ite. Creyentiaí iena finorede; iadedi dajerie Jusiñamui rairuiñega rafuena cai finoñelli, naimemona bue cai oñena jira. Dajerie rafuena cai finocabiñelli, naie rafue anamo cai i raillano. Dani Cristo rafue anamo cai illi. <sup>13</sup> Raitomoi: “Ñie isoide guille cai guiacania, ñie isoide rafue cai finoacania, caimona mare” raitomoi. Ero, diga rafuena finoredicai. Naimemona jeacino cai oñena jira, aimetaia, guiredicai. Jusiñamuidi cai aimetaillafue ico saitaite. Dajerie rafuena cai finoñena, naimemona jeacino cai ua jira. Jearede rafuena cai finoñellena, Jusiñamui caina finode. Cai aiñede riño diga cai illena, caina finoñede. Cai iniñede iima diga cai illena, caina finoñede. Cristona cai iobitallena, caina finode. Naimie jitaillacinona cai finollena, Cristo caina canoite. <sup>14</sup> Cristo fiodaite; iadedi fiodaillamona, Jusiñamui na ie abi diga naimiena jillotate. Cai fiodaia, ie uaido na cai abiai diga caina ico jillotaite. Cai abi jaca illa jira, jearede rafuena birui cai finoñena.

<sup>15</sup> Cristomoi jainaiaidicai. Iena uiñotomoi. Omoi ainiaíñede riño diga omoi ia, naiñaiñuaimo jai duidomoi. Cristo naie isoide riñomo jaca duiñena jira, naiñaiño diga iñeno. <sup>16</sup> Ie aiñede riño diga bu ia, ie ai illa isoi, jai dajena jaidiaimaiaí. Ie jira Jusiñamui jaiet lloti: “Riño diga iima illa jira, jai dajena jaidiaimaiaí” lloti. <sup>17</sup> Cai Nama Cristomoi bu duia, dajena jai jaidiaimaiaí. Jusiñamui Joreño iaimaiaímo illa jira, iaimaiaí comeci daje isoi jai lloide.

<sup>18</sup> Ie jirari naie jearede rafuemona abina rairui. Iesede bu finoia, jearede rafue ie abimo jai finode. Caimanide rafue ie abi diga finode. Jiaie maraiñede rafue bu finoia, naimie abimo jearede rafue finoñede. <sup>19</sup> Naimiemo omoi duillanona, Jusiñamui Joreño omoimo illana uiñotomoi. Ie illanodi omoi creyentiaí. Jusiñamui jai jainaiaidomoi. Ie muadona omoi jitaillacinodo jaiñeno. <sup>20</sup> Omoi jeacino facaina Cristo fiodailla jira, Jusiñamui cominina jai jaidomoi. Ie jira omoi finoca rafuemona Jusiñamuina eo iobita.

## 7

#### *Pablodi iima ie aina ua rafuena ñaite*

<sup>1</sup> Dajerie rafue cuemo jicanollena, carta cuemo navui oredomoi. Iena ja ñaiticue. Ima ie aina uana jicanotomoi. Faidaima jaca dama iacania, cuemona mare. Faidaiño jaca dañe iacania, cuemona jiai mare; <sup>2</sup> iadedi jeacino omoi finoí raillano, nagamie ie aina otana, jiai mare. Nagañaiño ie inina otana, jiai mare. <sup>3</sup> Naga ini ie ai diga iniacania, naimiemona naiñaiño ie abina caidiñena. Naga ai ie ini diga iniacania, naiñaiñomona naimie ie abina caidiñena. <sup>4</sup> Naiñaiño abi dañeñede; iadedi dañe ie ini abimo jiai duide. Naimie abi damañede; iadedi dama ie ai abimo jiai duide. <sup>5</sup> Ie jira: “Danomoi iniñeiticoco” lloñeno. Jusiñamui diga o raise ñaillena, naimiemo o comecina raise o facallena, iemo omico comeci



daje isoi lloillamona, diga irui illamona danomo omico iniacaiñenia, jiai mare. Naie facaise fuilla meinomo riño diga o iacanamona, dane danomo ini, Taife omicomomo ramo fai raillano.

<sup>6</sup> Dane lloiticue. Jeacinona omoi finoí raillano, nagamie ie aina otена, mare. Nagañaiño ie inina otена, jiai mare. Iese omoimo lloticue; iadedi iese ocuiñedicue. <sup>7</sup> Ainidicue. Cue illa isoi omoi illana jitaidicue; iadedi daje isoñedicai. Jusiñamui caina itataja diese iese iticai. Dajerie ainidimaci. Dajerie aireddimaci. Dajerie inidimaci. Dajerie iniredimaci.

<sup>8</sup> Nia ainidinomo lloiticue. Nia inidinomo lloiticue. Feciñuaimo jiai lloiticue. Ainidicue. Cue illa isoi omoi iacania, cuemona mare; <sup>9</sup> iadedi omoi ocuiñeniadedi, aina ono. Jiaie riño diga illemo o comecina facañellena, daje riñona ono, o aina. Jiaie iimamo o comecina facañellena, daje iimano ono, o inina.

<sup>10</sup> Creyentiaimo nia lloiticue. Aireddinomo lloiticue. Iniredinomo jiai lloiticue. Cue uaido lloñedicue; iadedi cai Nama jaielote: “Riño ie inina sofeñeno. <sup>11</sup> Iima ie aina sofeñeno” llote. Iese llote; iadedi nie riño ie inina sofeia, jiaie iimano naiñaiño oñena. Iimano naiñaiño oiacania, ie ini diga dane abido illasa.

<sup>12</sup> Nia lloiticue. Cai Nama buena jaielote; iadedi iena birui cue lloiticue. Omoi nairaimona creyentena damie jaielote; ia naimie ai creyentena nia jaiñede. Naimie creyentena illa jira, naimie diga naiñaiño nia iacania: “Naiñaiñoñona dotaño” naimiemo llono. <sup>13</sup> Omoi nairaimona creyentena dañaiño jaielote; ia naiñaiño ini creyentena nia jaiñede. Naiñaiño creyentena illa jira, naiñaiño diga naimie nia iacania: “Naimiema dotaño” naiñaiñoñono llono. <sup>14</sup> Ie ini nia creyentena jaiñenia, ie ai creyentena illamona, naimie diga naiñaiño nia iacania, jeacinona finoñede. Ie ai nia creyentena jaiñenia, ie ini creyentena illamona, naiñaiño diga naimie nia iacania, jeacinona finoñede. Naie creyente muidona, naie iañaiñaiñ uruiñina, jiaie creyente iañaiñaiñ uruiñi isoi, omoi roracomomo feiño. <sup>15</sup> Ie inina creyenteñede ai sofeiacania: “Naiñaiñoñona dotaño” naimiemo llono. “Naiñaiñoñona jaiñellena rairuiñeno” naimiemo llono. Ie aina creyenteñede ini sofeiacania: “Naimiema dotaño” naiñaiñoñono llono. “Naimie jaiñellena rairuiñeno” naiñaiñoñono llono. Sofeia mei, jai dajemo duiñediñaiñaiñai. Jusiñamui naga creyente uri illana jitaide; <sup>16</sup> iadedi ie ini diga ie ai fiebia, ie ini creyentenamona, naiñaiño nibai creyentena jaiete. Ie ai diga ie ini fiebia, ie ai creyentenamona, naimie nibai creyentena jaiete.

<sup>17</sup> Tena lloticue; iadedi Jusiñamuiñona ie feiñoña uaido nagamie jaiella. Creyentiaina omoi jaiella facaiseconi, omoi maiñuilla ramo nia raise omoi maiji. Naga creyentiañi illanomo buena lloñuecabiticue. <sup>18</sup> Nia creyentiaina omoi jaiñenia, judiñaiñi isoi omoimona dajerie omoi abiañina detatamoi. Naie detatafuemo omoi comeciaina birui facañeno. Omoimona dajerie omoi abiañina nia detatañedomoi. Iemo omoi comeciaina birui facañeno; <sup>19</sup> iadedi Jusiñamui uaina omoi inuamomo comeciaina birui faca. Jiaie rafue baifemomo faite. <sup>20</sup> Creyentiaina omoi jaiella facaiseconi, omoi maiñuilla ramo nia raise omoi maiji. <sup>21</sup> Creyentiaina omoi jaiella facaise omoimona dajerie patrón anamo itinodomoi. Nia patrón anamo itino isoi omoi jai. Iemo omoi comeciaina jarire facañeno. Jaiaruidomoi patrón: “Cue anamo iñedomoi” raia, naimie anamona oni omoi jai; iadedi Cristo rafuedo jaca omoi jai. <sup>22</sup> Cristona omoi inuafacaise, patrón anamo omoimona damierie navui itomoi; iadedi Jusiñamui omoimona fetode. Naimiema omoi inuamona, omoi jeacino anamo jai iñedomoi. Patrón anamo omoimona damierie navui iñedomoi; iadedi Jusiñamui omoimona fetode. Ie jira naimie anamo jai itomoi. <sup>23</sup> Omoi jeacino facaina Jesucristo fiodailla jira, Jusiñamui omoi jeacinona oni dotade. Iena jai faitate. Naimie cominina jai jaidomoi. Ie jira comini jitaillacino anamo iñeno; iadedi Jusiñamui jitaillacino anamo i. <sup>24</sup> Cue amatañi, creyentiaina omoi jaiella facaiseconi omoi maiñuilla ramo nia raise omoi maiji. Jusiñamui omoimona canuanona, jearede rana omoi maiñiñenia, nie isoide rana omoi maiñiñi, Jusiñamuiñona mare.

<sup>25</sup> Navui cuemo cartana oredomoi. Faidaiñuñaiñi illa rafuena uñiñoiacadomoi. Cai Nama naie rafuena jaieloteñena jira, iena birui lloiticue. Naimie cuena duenailla jira, naimie uaina inotiticue. Ie muidona comini inogamiedicue. <sup>26</sup> Birui duere omoi sefuilla facaise illa jira, omoi illa isoi omoi i. <sup>27</sup> Omoimona bu aireñia, naiñaiñoñona dotaño. Bu aiañi, dama ainide. Riñoña oñena; <sup>28</sup> iadedi o aiañi illana ininide riñoña o otiodena, jeacinona finoñedio. Omoimona o inina illana ainide iimano o otiodena, jeacinona finoñedio; iadedi aina bu ua mei, inina bu ua mei, eo duere maiñiñite. Iese omoi duere sefuñiñellena, omoimo iena lloticue.

<sup>29</sup> Cue amatañi, biemo omoi comeciaina faca. Jesucristo abido dane billirui iañeri ite. Naimie jitailla rafuena omoi raise finollena, omoi aiañaimo ite rafuemo omoi comeciaina facaja; iadedi Cristo rafuemo omoi comeciaina eo facaja. <sup>30</sup> Omoimona damierie sunaia, damierie camare ia, iemo omoi comeciaina eo facañeno. Damierie raruiañina iñaiñi, nañeri eo iobiñeno. <sup>31</sup> Omoimona damierie bene ite rana ebruitimaci; iadedi iemo omoi comeciaina eo facañeno. Iemo omoi comeciaina eo facaia, abi juanide, Cristo rafuena omoi finollena. Cristo rafue nano finuamo omoi comeciaina eo faca.

<sup>32</sup> Omoi comeciai jarire iñenana jitaicue. Nia ainidimie abi juarede, dama Cristo rafuena majjillena. Naimiena iobitaiacade; <sup>33</sup> iadedi airedimie bene ite rafuemo ie comecina facade. Ie aina iobitaiacade. Naiñaiño omoi ite rafuemo naimie comecina facade. Cristo rafuemo ie comecina jiai facade; <sup>34</sup> iadedi mena rafuemo ie comecina eo facallemo abi juanide. Ininidñaiño abi juarede, ñaño Cristo rafuena majjillena. Nana naiñaiño comecimona naimiena iobitaiacade; iadedi inirediñaiño bene ite rafuemo comecina facade. Ie inina iobitaiacade. Naimiemo ite rafuemo naiñaiño comecina facade.

<sup>35</sup> Aina uana rairuñedicue. Inina uana jiai rairuñedicue; iadedi omoi raise illena, naie rafuena lloticue. Cristo rafuedo omoi raise marena jaillana jitaicue. Dani Cristo rafuemo omoi comeciaina facajana jitaicue.

<sup>36</sup> Ero, omoimona naiñaiño oiacaga iimamo ie moo, ie jisa caidiñeno fecaca. Naiñaiño jai moonaila jira, naiñaiño jitailla jira, naiñaiño feca. Fecaia, ie moo jeacinona finoñede; <sup>37</sup> iadedi inina naiñaiño oiacañenia, naimie comeci llumona, ie comecina eo facajamona, ie jisa fecaacaiñenia, jiai mare. <sup>38</sup> Ie jisana fecaia, mare. Cristo rafuena naiñaiño eo majjillena, ie jisa fecañenia, jiai mare.

<sup>39</sup> Jiaie rafuena lloticue. Riño ie ini nia fiodañenia, naiñaiño naimiemo jaca duide. Ie ini fiodaille mei, jiaie iimano ie ini ifomo naiñaiño oiacania, mare; iadedi creyentedimiena naiñaiño ua. <sup>40</sup> Naie feciñodi iimano ie inina oñenia, naiñaiño abi juarenite, Cristo rafuena eo majjillena. Ie muidona inirediñaiño baifemo caimare iite.

## 8

### *Jusiñamuina eruaide jiraraimo llicisi fecaja rafue*

<sup>1</sup> Cuemo cartana navui oredomoi. Jusiñamuina eruaide jiraraimo fecaca llicisina jicanotomoi. Naie isoide llicisidi omoi riana uiñoiacadomoi. Iena ja ñaiticue. Naie jiraraina naimaci navui sedaja jira, omoimona damierie naie isoide llicisi riana: “Maraiñede” raitimaci. Creyentiaimona Jusiñamuina eruaide jirarai jamai rana illa jira, damierie naie llicisi riana: “Mare” raitimaci. Bu iese uiñoia, mare; iadedi iena uiñuamona naimie abi iedoia, naimie comecina raise facañede. Iena naimie ría, jiaie creyentiaimono comecina facañede. Jiaie creyentiaina bu isiruvia, naimacimo ie comecina facade. Cristo rafuedo jiaie creyentiai raise jaillana jitaide. <sup>2</sup> “Eo abina uiñoticue” ie comecina bu facaia, nia eo raise abina uiñoñede; <sup>3</sup> iadedi Jusiñamuina ua cai isiruillamona, jiaie creyentiaina cai isiruvia, jai abina uiñoticai. Jusiñamui dinena caina jiai uiñotaacade.

<sup>4</sup> ¿Niese Jusiñamuina eruaide jiraraimo fecaca llicisina ñaiticai? “Jusiñamuina eruaide jirarai jaca cajenana uiñoticai” raitomoi. “Jusiñamui jaca dajede. Iena uiñoticai” raitomoi; <sup>5</sup> iadedi “Monamo diga sedalle ra ite” dajerie comini raitimaci. Jitomana sedacabidimaci. Fivuina sedacabidimaci. “Eniruemo diga sedalle ra ite” dajerie comini raitimaci. Taifena sedacabidimaci. Janabana sedacabidimaci. <sup>6</sup> Iena sedacabidimaci; iadedi cai dani Jusiñamuina sedacabidicai. Naimiedi cai Moo. Naimiedi nana rana finode. Nana cominina comutate. Cai Nama Jesucristo uaido iena finode. Jesucristo caina jillotate. Naimiena cai sedallena, Jusiñamui caina finode.

<sup>7</sup> Jusiñamuina eruaide jiraraidi jamai rana nana creyentiai uiñoñedimaci. Jusiñamuina eruaide jirarai naimaci sedauilla jira, naie jiraraimo birui fecaca llicisi naimaci ría: “Naie jirarai sedadica” naimaci comeciaina facadimaci. Naie rafue naimaci raise uiñoñena jira: “Jeacinona finodicai” raitimaci. <sup>8</sup> Ero, nie isoide llicisi cai riamona, llicisi cai riñenamona, Jusiñamui caina feiñoñede. Naimiena cai iinuamona caina feiñote. Buena cai riñenia, buena cai ría, jeacinona finoñedicai. Naiemona marecinona jiai finoñedicai. <sup>9</sup> Naie llicisina riredomoi; iadedi omoi ama nibai Cristo ñibeimo raise iñede. Naie llicisi omoi ría, naimiemona jeacinona jai finodomoi. “Jusiñamuina eruaide jiraraina omoi nia sedadomoi” raillanomo naimie comecina facaite. Iena naimie comecina facajanona, Cristo ñibeimo raise jaiñeite. Abido danomo naimie dane jaita. <sup>10</sup> Nibai abina uiñotomoi; iadedi Jusiñamuina eruaide jirarai illanomo omoi guillena omoi jailla jira, omoina nia Cristo ñibeimo raise iñedimie cioia, nainomo jiai guisaite, comecina facajano: “Cue ama Jusiñamuina eruaide jiraraina nia sedaja jira, naie nia jiai nia sedaiticue”. <sup>11</sup> Omoi ama abido danomo jaja, omoi muidona. Cristo naimie facaina fiodaite; iadedi omoi finoca rafue muidona, omoi ama abido danomo jaita. <sup>12</sup> Iese omoi finoa, omoi amana jeacinona finotomoi. Naimie comecina oculiñotañedomoi. Ie muidona Cristomo jeacinona jiai finodomoi. <sup>13</sup> Cristomo jeacino cue finoi raillano, Jusiñamuina eruaide jiraraimo fecaca llicisina riñeiticue. Cue ama abido danomo dane jai raillano, naie llicisina jaca riñeiticue.

## 9

*Cristo facaina llorainidi naimaci jitailla rana jamai feiñua*

<sup>1</sup> Cue jitaillacinona finoredicue; iadedi Jesucristo jai oretagamiena cue illa jira, naimie jitaillacinona finoacadicue. Cuena jaié fetua facaise cai Nama Jesúna cidicue. Creyentiaina omoi jailla jira, cai Nama facaina cue maijiana uifotomoi. <sup>2</sup> Jiaie comini Jesucristo oretagamiedicue naiba uifonédimaci; iadedi omoi iena uifotomoi. Cristona omoi iinua jira, Jesucristo cuena oretajana uifotomoi.

<sup>3</sup> Cue llofuaiacina bu uaitaia, iese cue llofuaiacina riidoticue. <sup>4</sup> Jesucristo rafue lloraimana cue illa jira, omoi dine cue macaria, cue jitailla rana cuemo jamai omoi illa. Jiaie rafuena cue maijiñena motomona cuemo jamai omoi illa. <sup>5</sup> Cue ai cuemo itena, omoi dine naifañño cue diga macaria, coco jitailla rana cocomo jamai omoi illa. Omoi dine jiaie Jesucristo oretagano naimaci añiañri macaria, omoi dine Jesucristo amatiañ macaria, omoi dine Pedro macaria, naimaci jitailla rana naimacimo jamai fecauidomoi. Ie jira, ¿niese cue jitailla rana cuemo jamai fecañeitomoi? <sup>6</sup> Jiaie llorainimo naimaci jitailla rana jamai fecacabidomoi; iadedi cue onolli diga cue maijiana niba nia jitaidomoi. Bernabé ie onolli diga naimie maijiana niba nia jitaidomoi. <sup>7</sup> Ero, soldadodi ie guille ibañede. Iena jamai feifote. Naga illimo maijuuidimie ie illimo maijide, naiemona naimie guillena. Naga toiniaina sedauidimiedi naimacina sedade, naimacimona ucube ie ollena. Omoi motomo cue maijia jira, cuena omoi nafaia, omoimo Cristo rafuena llocabiticue. <sup>8</sup> Jamai comini uaido naiena llofueñedicue; iadedi Moisés micori cuegafuaimona iena fueoticue. <sup>9</sup> Naimie micori jaié cuega: “Jusiñamui lloté: ‘Jurareta trigo oni juillena saisia, iemona ie guillesa, ie fuena maiñeno. Maiñenia, ie maijia fuemona guite’ lloté”. Ie isoide. Omoi motomo cue maijia fuemona cue jitailla rana cuemo jamai omoi illa. Iena Jusiñamui lloia, dama juraretamo ie comecina facañede; iadedi caimo ie comecina ua facade. <sup>10</sup> Cristo rafuena cue llofuecabilla jira, cue llua fuemona cue jitailla rana jamai cue feiñua. Iemo ocuridicue. Ie isoide. Ie illimo bu maijia, naiemona riana ollena, nainomo maijide. Iemo ocuridie. <sup>11</sup> Omoi motomo Cristo rafuedo omoi raise jaillena, navui llofueticue. Ie jira cue jitailla raruiaí omoimona jamai cue ua. <sup>12</sup> Omoimona raruiaína jiaie lloraini feifocabilla jira, cuemona Cristo rafuena nano omoi cacaja jira, cue jamai jiaí feiñua; iadedi omoimona raruiaína jicañedicue.

Cue jitailla raruiaí cue ollena, cue onolli diga duere maijidicue. Ie jira nana cue jitailla raruiaína oñedicue. Cristo rafuena omoi cacaiacañeni raillano, omoimona raruiaína jicañedicue. Raruiaína cue jicaia, omoi comeina nibaí facaitomoi: “Raruiaí oiacanano Cristo rafuena naimie llocana uite”. Ie mei Cristo rafuena cacaiacañeitomoi. Ie jira omoimona raruiaína jicañedicue. <sup>13</sup> Ero, Jerusalémo judíuaí comini Jusiñamuina sedauilla jofo ite. Nainomo naie comini toiniaina atiuidimaci, Jusiñamui fecallena. Moisés micori jaié llua isoi, naimaci jeacino facaina toiniaina fajanona fecadimaci. Nainomo maijuicino comini atica toiniaimona naimaci rillena, ibajanona ocaibitimaci. Iena uifotomoi. <sup>14</sup> Ie isoide. Cristo rafuena llorainidi naimaci rafuena inotinomona naimaci jitailla rana imaci ua. Cristo iena jai lloté. <sup>15</sup> Omoimona raruiaína jaca jicañedicue. Raruiaí birui cue ollena, bie cartana jiaí cueñedicue. Dama cuemo ite ra diga iiticue. Omoimona iena feifoticedena, meiruioicaída feifotice. Omoimona cue feiñoñena jira, omoi facaina Cristo rafue cue llumona, abina iedotice. Raruiaí cuemo jamai omoi fecaia, ¿niese abina iedoitice?

<sup>16</sup> Jiaie lloraini rana feiñua isoi cue feiñoia, Cristo rafuena cue llumona abina iedoñeitice. Jusiñamui cuena oretaja jira, naie rafuena llotice. Iena cue lloñenia, Jusiñamui cuena duere finoite. <sup>17</sup> Dama cue comeci jitaillamona Cristo rafuena cue lloiacania, Jusiñamuimona ibana feiñoitice. Dama cue comeci jitaillamona lloñedicue; iadedi Jusiñamui cuena oretaja jira, iena llocana jaidicue. <sup>18</sup> Ie jira, ¿niese ibana feiñoitice? Hana nibaí feiñoitice; iadedi omoimo Cristo rafue cue lloia, cuemona mare. Omoimona cue jitailla rana cue ofenia, cuemona mare.

<sup>19</sup> Omoimona raruiaína cue feiñoñena jira, omoi anamo iñedicue; iadedi dama cue jitaillacinodo jaiñedicue. Creyenteñedino diga cue nabairillena, Cristo rafuena naimaci raise cacaillena, nana naimaci mare finocana uiga rafuedo jaidicue. Iese jaidicue, ailluena cominina Cristo dibeimo cue itatallena. Iese jaiñedicuedena, eo janore comini Cristo dibeimo nibaí jai itataticue. <sup>20</sup> Judíuaí comini diga cue ia, naimaci diga cue nabairillena, naimaci mare finocana uiga rafuedo jaidicue. Cristo dibeimo naimacina cue itatallena, naimaci diga nabairiacadicue. Moisés micori llogacino anamo naimaci illa jira, naie llogacinodo jaidicue; iadedi naie llogacinodo cue jilloitañena jira, naie llogacino anamo iñedicue. <sup>21</sup> Judíuaíñedino diga cue ia, naimaci diga cue nabairillena, Moisés micori llogacinodo naimaci jaiñena jira, naiedo jiaí jaiñedicue. Naimaci mare finocana uiga rafuedo jaidicue; iadedi Jusiñamui lloga uaido jiaí jaidicue. Cristo lloga uaido jiaí jaidicue. Naimacina Cristo dibeimo itataiacadicue. <sup>22</sup> Naimaci diga cue nabairillena, Cristo rafuena nia raise inoñedino diga cue ia: “Omoi baifemo Cristo rafuena uifotice” raiñedicue.

Naimacina iciaicaiñedicue, naimacimo jeacinona cue finoí raillano. Naimacina cue isiruil-lamona, naimacina canoacadicue. Naimacina Cristo rafuena raise ñnuana itataiacadicue. Nana cominina cue canoacana jira, naimaci mare finocana uiga rafuedo jaidicue. Cue comecina facadicue: “Cue muidona damierie Cristona nibai ñinoitimaci”.<sup>23</sup> Cristo rafuena ailluena comini ñnollena, iese jaidicue. Iena llocana jaidicue. Naimaci ñnua jira, iobidicue.

<sup>24</sup> Ero, dani cai jitaillacinodo cai jaiñena. Iemona omoi fueollena, jaiie uaido lloiticue. Riire aisia rafuena omoi comini jifanoia, raire uicodo ridimie rana ote. Ailluena comini aisidimacimona, damie naie rana ote. Ie isoide. Cristo rafuena ñnocana mai cai jailli, ico Jusiñamui illanomo monamo ibana nana cai feiñollena.<sup>25</sup> Naga aisidimie riire aisillena, ie abina mairillena, ie abina eenote. Mairillena, ie abina nagarui jiai facatacabite. Ibana feiñollena, iese finode. Ibana bu oia, dallu iobide. Ero, jeacinona cai finoí raillano, cai abiaina cai enua. Naimie jitailla isoi cai illena, Cristo rafuemo jiai cai facacabilla. Monamo cai rillanona, ibana cai feiñolleno, jaca iobiticai.<sup>26</sup> Riire aisiacadimie ebena aisiñede. Onolli diga mena iaimaijai jamai jifanoia, jafaicina jamai ducoiñediaimaiai; iadedi conimana ducoidiaimaiai. Ie isoide. Cristo rafuedo raise cue jaiacania, jamai ebena jaiñedicue; iadedi nana cue comecimona iedo jaidicue.<sup>27</sup> Cue comecina raise sedadicue. Dama Cristo rafue anamo iacadicue. Dama iena ñnoiacadicue. Ja muidomo ibana cue feiñollena, iese jaidicue. Jiaie cominimo Cristo rafuena llofuecabiticue; iadedi monamo ibana cue feiñollena, cue comecina raise sedadicue. Iemona omoi fueua.

## 10

### *Jiraraina sedañena rafue*

<sup>1</sup> Cue amatiai, bie rafuena feitañeno. Cai jaiagai micoriai finoca rafuemona fueoiticai. Egipto railla eniruemona naimaci billa mei, jofue iñenanomo naimaci macaria, naie diga naimacina ifollena, Jusiñamuidi monamo uillie itatate. Naie uillie anado nana jaisoidimaci. Jiairede railla monaillai ruica naimaci jaiacania, Jusiñamuidi naie monaillai oni ñaijitate, safefodo nana naimaci ruica jaillena.<sup>2</sup> Naie isoide rafue nana naimacimo suillanona, Moisés micori ñibeimo raise duidimaci. Naimie anamo itabidimaci.<sup>3</sup> Jofue iñenanomo naimaci illa jira, Jusiñamui nana naimacina ecade. Nainomo guille iñena jira, monamona bite guille rana nana guisoidimaci.<sup>4</sup> Nainomo jinui jiai iñena jira, Jusiñamui llua jira, Moisés micori noficina butajamona, toide jinulina nana jirodimaci. Naimaci ñine macaria, Cristona cioiñedicue; iadedi naimaci diga naimie jaca ite. Naimaci diga naimie illa jira, nana naimaci facaina, diga siño rafuena finocabide;<sup>5</sup> iadedi Jusiñamuina naimaci ñnoñena jira, naimiedi naimaci diga icirite. Naimaci diga naimie icirilla jira, jofue iñenanomo Jusiñamui ailluena naimaci micoriaina fioidaitade.

<sup>6</sup> Cai jaiagai finoca rafuemona cai fueua. Maraiñede jearede rafuena naimaci finua isoi ebiruñeno. Abimo omoi oñeno.<sup>7</sup> Jusiñamuiñedimienena sedañeno. Cai jaiagaimona damierie juraretana eruaide rana jaiie sedajano raitimaci: “Bie radi cai Jusiñamui”. Rafuena finodimaci, naie rana sedallena. Eo gutimaci. Ie mei iraisitimaci. Ie jira Jusiñamui naimacina duere finode. Naimaci finoca rafue isoi abimo omoi oñeno. Jusiñamuiñedimienena omoi sedañeno.<sup>8</sup> Naimaci jearede rafuena finodimaci. Naimacimona damierie naimaci aiñede riñoniai diga itimaci. Ie jira naimacimona daruidemo veintitres mil comini fioidaitimaci. Jusiñamui naimacina fioidaitade. Naimaci finoca rafue isoi abimo cai oñeno.<sup>9</sup> Cai jaiagaimona damierie Jusiñamui Joreñona ñaitimaci. Naimaci guisoiga radi Jusiñamui mona bite. Naina ñiamona, Egiptomio ite guillemo comeciaina facadimaci. Ie muidona naimienena riicaitadimaci. Ie jira Jusiñamuidi jaioniaina naimacina ainitate. Iemona ailluena fioidaitimaci. Naimaci finoca rafue isoi abimo cai oñeno. Jusiñamuina riicaitañeno. Cristona cai ñia ñnoñena facai finoca rafuemo cai comeciaina facañeno.<sup>10</sup> Cai jaiagaimona damierie Jusiñamui facaina lloraini joreñuaina ñaitimaci. Ie jira Jusiñamuidi ie jaienicina oretate, naimacina meinetasillena. Naimaci finoca rafue isoi abimo cai oñeno. Jusiñamui facaina lloraini joreñuaina cai ñaiñeno.

<sup>11</sup> Nana naie rafue naimacimo suide. Cai facaina Moisés micori iena jaiie cuete. Iemona birui cai fueua, naimaci isoi cai finoí raillanona.<sup>12</sup> Naie isoide rafue omoimo suiñellena, omoi abiaina rairui. Omoi comeciaina nibai facadomoi: “Cristona cai eo raise ñnua jira, iena finoñeiticai?” comeciaina facadomoi; iadedi omoi abiaina omoi rairuñenia, jeacinona finoitomoi.<sup>13</sup> Taife ramo omoimo faicabilla isoi, nana jiaie creyentiaimo ie isoi ramo faicabite. Iena feitañeno. Jusiñamuidi ñnogamie. Ie muidona omoi comeciái ocuillacino baifemo Jusiñamuidi Taife omoimo ramo faiana rairuite. Naiemona omoi jilloillena, Taife uai omoi ñnoñellena, Jusiñamuidi omoina canoite.

<sup>14</sup> Cue amatiai, Jusiñamui omoina canuamona, Jusiñamuiñedimie facaina finoca rafue-mona oni i.<sup>15</sup> Abina uñotomoi. Ie jira omoimo cue llucainona omoi cacaja mei, iemo

omoi comeciaina omoi faca. <sup>16</sup> Ero, Cristona cai sedallena, roracomo danomo oficabidicai. Naimie fiodailla rafuena cai comecillena, janore vino jiruana, janore llomenicon guiticai. Jusiñamuimo iobillacinona nano fecadica. Ie mei janore vino jirodica. Iena cai jiruamona, Cristona cai nabaillana uñotica. Cruzmo Cristo fiodailla jira, naimiena nabaidica. Naie facaise llomeniconna cai tairuñuamona, naimiena cai nabaillana uñotica. Cristo fiodailla jira, iese itica. <sup>17</sup> Diga creyentaidica; iadedi daje llomenicomona jaca guitica. Daje llomenicomona cai guilla jira, dajena Cristomo cai duillana uñotica.

<sup>18</sup> Ero, judiua railla cominimona cai fueua. Naimaci jeacino facaina iba ofellena, toinaia faja mei, Jusiñamuimo fecacabidimaci. Ie mei iena ritimaci. Iena naimaci riamona, Jusiñamuina nabaidimaci. Jusiñamuina iobitadimaci. <sup>19</sup> Omoi illanomo Jusiñamuina ñnoñedinodi Jusiñamuina eruaide jiraraimo guillena fecacabidimaci. Cai creyentaidicaimona naie guiledi jamai guille. Naie jiraraidi jamai ra. Cafeñede; <sup>20</sup> iadedi Jusiñamuina ñnoñedinomona jamai rañede. Naimacimona nanoca ra. “Iemo rille cai fecajia, cai moon sedadica” raitimaci; iadedi naie ramo naimaci comeciaina facañedimaci; iadedi imaci moomo comecina facadimaci. Ero, Jusiñamuiñedimie comecina fecadimaci. Taifemo naie guille fecacabidimaci. Taifena iobitadimaci. Jusiñamuimo fecañedimaci. Naimaci diga omoi jaia, Taife diga jai nabairitomo. Taife diga omoi nabairillana jitañedicue. Taifemo omoi duillana jitañedicue. <sup>21</sup> Rollena omoi ofia, Cristo fiodaillana omoi comecillena, nainomo omoi jiruamona, nainomo omoi guillamona, Cristona nabaidomoi. Comini rafue dine omoi jaillamona, Taifena nabaidomoi. Cristo diga, Taife diga, daje facaina nabairinidomoi. Iese omoi finoia, marañede. <sup>22</sup> Iese omoi finoia, Jusiñamuina jai iciritaitomoi. Naimiena omoi icia, ¿niese naimie riccaillafuemona jilloitomoi? Jaca jilloñeitomoi.

### *Jiaie creyentiaina canocana cai jailla*

<sup>23</sup> Ero, Jusiñamui dibeimo omoi illa jira, ¿niese dani omoi jitaillacinodo jaiacadomoi? Diga Jusiñamui rairuñega rafue ite. Creyentia iena finorede; iadedi dajerie Jusiñamui rairuñega rafuena cai finoñelli, naiemona bue cai ofena jira. Iena cai finoia, cai amana Cristo dibeimo itatañedica. Iena cai finoia, cai amana Cristo rafuena ñnotacana jaiñeica. Naimiena ramo faicana uitatatica. <sup>24</sup> Omoimona nagamie dama naimie ite rafuemo comecina facaña; iadedi naga jiaie creyentemo ite rafuemo le comecina jai facaja.

<sup>25</sup> Ero, ñinena o llicisina omoi ibaia, Jusiñamuiñedimie naie llicisina fecajana jicanoñeno; iadedi jicanoñeno iena jaricitañeno rino. <sup>26</sup> Iena David micori jaie cuela: “Jusiñamui bie eniruena finode. Nana rana finode. Cai guillena, cai guille rana nana comuitaga” cuela. Ie jira ¿niese fimaitica? Naimie mare finoca rana cai ría, jeacinona finoñedica.

<sup>27</sup> Ero, naimie diga o guillena Cristona ñnoñedimiedia ona uaidoia, naimie dine o jaiacania, naimie dine guisai. Nana omo eaja guillena guiño. Jamai uainino guiño. “¿Ñinena ibadio bie llicisina?” jicanoñeno. O comeci jarire finoñeno; <sup>28</sup> iadedi Cristona raise ñnoñedimie nainomo jai guitemo, omo loia: “Bie llicisidi Jusiñamuiñedimie jai fecaca llicisi”, iena o riñeno. Iena o ría, Cristona raise ñnoñedimie comecina faicite: “Jeaquina finodio. Taifemo fecaca llicisina ritio. Creyentemie iena riñede” comecina faicite. O isoi naie llicisimo naimie comecina facañede. O raitio: “Naie llicisidi jamai llicisi” raitio; iadedi naimie raite: “Naie llicisi Taife ie” raite. Ie jira naie creyentena o canollena, naiena riñeno. <sup>29</sup> Naimie comecina facajacinodo cai jañenamona, nana Jusiñamui comuitaga guillena guiredica; iadedi Cristona nia raise ñnoñedimie nana guinidica; iadedi naimie comecina facajacinodo jaiñedica. <sup>30</sup> Cai guia, Jusiñamuimona naie guille comuitaja jira, Jusiñamuimo iobillacinona fecadica; iadedi cai guillamona damerie cai joreña ñaiamona, iena guñeica. <sup>31</sup> Omoimo iena nia lloiticue. Nie isoide rana omoi guia, nie isoide rana omoi ría, nie isoide rana omoi jiroia, nie isoide rafuena omoi finoia, naieri Jusiñamuina iobita. <sup>32</sup> Jusiñamuina nia ñnoñedimie canocabi, naimie uaina naimaci cacaillena. Jusiñamuina jai ñnotinona jai canocabi, naimaci abido danomo uaiñellena. <sup>33</sup> Buena cue finoia, nana cominimo cue comecina facadicue. Ie jira nagaruí cue jitaillacinodo jaiñedicue; iadedi Cristo rafuena naimaci ñnollena, nana cominina canocana jaidicue.

## 11

<sup>1</sup> Cristo lloga rafuedo jai jaidicue. Cue isoi omoi jai.

### *Roracomo riñonai illa rafue*

<sup>2</sup> Cuen nia feitañedomoi. Cristo oretagano jaie llogacinona omoina llofueticue. Cue llofueuillacinodo nia jaidomoi. Ie jira omoi iobidicue; <sup>3</sup> iadedi jiaie rafuena nia lloiacadicue. Cristo ie Moo anamo ite. Naga iima Cristo anamo jai ite. Nagamie ai ie ini anamo ite. Omoi afemo itino uaina omoi ñnoñenia, marañede. <sup>4</sup> Roracomo omoi comini oficabia, ie

ini anamo ie ai illa jira, omoi comini finocabilla isoi, naga riño ie ifogimo iniroina bicuano jailla. Iese naiñaño bicoñenia, ie ini anamo naiñaño iñede isoi eruaide. Jusiñamui diga nie iima ñaia, Jusiñamui uaina nie iima jino lloia, naimie ie ifogi icona jitañeno, Cristo anamo naimie illa jira. Naie facaiseconi ie ifogi icona jitajia, Cristo afemo itena eruaide. <sup>5</sup> Nie riño Jusiñamui diga ñaia, Jusiñamui uaina nie riño jino lloia, ie ifogimo iniroina bicoñeno jaia, iima isoi naiñaño iacana jira, ie ini afemo illana eruaide. Ie ini anamo iacañena jira, ie inino meidaitade. <sup>6</sup> Nie riño ie ifogimo iniroi bicoñeno jaiacania, iima isoi eruaillena, ie ifogidi rijiruda gareca. Iemona naiñaño meidallamona, ie ini anamo illamona, ie ifogimo iniroina bicuano naiñaño jaite. <sup>7</sup> Jusiñamui diga naimie ñaia, Jusiñamui anamo naimie illa jira, iima ie ifogi icona jitañena. Jusiñamui naga iimana comutate. Iimana naimie finuamona, naimiena cai iobitajamona, Jusiñamui cai afemo illana uifotica. Ie inina iobitajamona, naiñaño afemo ie ini illa jira, riño ie ifogimo iniroina bicuana jailla. <sup>8</sup> Ero, Eva micorimona Adán micori comuiñede; iadedi ie ini micorimona ie ciraiofemona naiñaño micori comuide. <sup>9</sup> Naiñaño anamo illena naimie comuiñede; iadedi naimie anamo illena naiñaño comuide. Naimie uai inollena, naimiena canollena, naiñaño comuide. <sup>10</sup> Ie ini anamo naiñaño illa jira, riño ie ifogimo iniroina bicuano jailla. Naiñaño iese ia, naiñaño naimaci ciuanona, Jusiñamui jaienisaimona jiai mare. <sup>11</sup> Naga riño ie ini anamo ite; iadedi Cristona cai inua jira, riño baifemo iimadi faiñede. Iima baifemo riño jiai faiñede; iadedi daimaia conimana iaiaiaia canua. Cristo naga iimana, naga riño daje isoi feiñote. <sup>12</sup> Naga comini Jusiñamui comutaga. Nano facaiseconi Adán micorimona Eva micorina jai comutate; iadedi birui naga iima riñomona comuide.

<sup>13</sup> Biemo omoi comeciaina omoi faca: Omoi roracomo Jusiñamui diga nie riño ñaia, omoi einamaci finocabilla isoi, ie ifogina bicoñeno jaia, ¿niese omoi comeciadi raite? Cue comeci: “Maraiñede” raite. Ie ini anamo naiñaño iñedena eruaide. <sup>14</sup> Nana omoi biesedena raicabitomoi: “Nie iima ie ifotirai eo areniadedi, cai cominimona maraiñeno ciode; <sup>15</sup> iadedi nie riño ifotie eo arenia, mare” raicabitomoi. Naiñañuiai ieri iobidimaci. Jusiñamui iena sicotajamona, naiñaño ifotie ie ifogina raise ibaide. <sup>16</sup> Iena jaca llofuecabitucue. Jiaie creyentia illanomo cue isoi comeciaina lloidimaci. Omoimona bu cue llogacinona uaitaacania, damamei ite.

#### *Cristo fiodailla rafuena raise comeciñedimaci*

<sup>17</sup> Jiaie rafuena lloiticue. Omoi maraiñede finocabilla rafuena jai fididicue. Cristona sedallena omoi ofcabia, Cristo rafuena inocana jaiñedomoi; iadedi naiemona maraiñede rafue comuide. <sup>18</sup> Rollena omoi ofcabia, omoi comeciaina daje isoi lloiañenana jai fididicue. ¿Bue ñellena omoi comeciaina daje isoi lloiacaiñedomoi? Naie rafuena omoi diga ja ñaiacadicue. Omoi ofcabia, nagamiai guillena aticabidomoi. Mare; iadedi danomo guiñedomoi. Omoimona damerie ucuberena jira, dueredino diga guiacaiñedomoi. Omoi guille caididomoi. <sup>19</sup> Omoi iese illana jitañedicue; iadedi daje isoi omoi comeciaina lloiañenamona, Jusiñamui dibeimo raise itinodi uifoga. Omoimona damerie danomo omoi guillamona, Jusiñamuina omoi isiruillana uifotica. <sup>20</sup> Cristona sedallena omoi ofcabia, guitomoi; iadedi vino jiruanona, llomeniconna guillanona, cai Nama fiodailla rafuena raise comeciñedomoi. Maraiñede rafuena omoi finua jira, iena nia lloiticue. <sup>21</sup> Nagamiai guillena aticabidomoi. Dani coniniri raise guiñedomoi. Danirie omoi atica guillena guitomoi. Jiaionna guillena iñedomoi. Damerie omoimo ailluena guille ite. Damerie omoimo guille raise iñede. Jiaionna guillena omoi iñena jira, damerie jaca aimetaitimaci; iadedi jiaino monidimaci. Damerie guilla motomo jiai jifaidimaci. Conini nabaiñedomoi. Ie jirari Cristo fiodailla rafuena raise comecinidomoi. <sup>22</sup> Ero, omoi jofue ite, jamai guillena. Omoi ofcabia, ¿bue ñe guillaredomoi? ¿Bue ñe jiaionno guille fecaacaiñedomoi? Jiaie creyentia omoi isruuiñenamona, Jusiñamuina jiai isruuiñedomoi. Janore guille itinona duere finodomoi, naimacina omoi eacañena jira. Iese omoi illa jira, omoiri iobiñedicue.

#### *Cristo fiodailla rafuena llofuiacino*

<sup>23</sup> Navui omoina biena llofueticue; iadedi omoi raise inoñena jira, iena dane llofueticue. Cai Nama iena cuemo jai lloite. Cai Nama Jesús ie gaitatarari facaiseconi, ie llofueoicagano diga ia, naimaci guia, llomeniconna llinote. <sup>24</sup> Iena llinuanona, Jusiñamuimo iobillacinona fecade. Ie mei iena tairuanona raite: “Mai, biena guiño. Bie llomenicodi omoi guillamona, cue fiodaillana omoi comeci. Cue fiodaillemona omoi jeacinomona jilloitomoi. Biena omoi guillamona cuena comeci. Bie llomenicodi cue abi facai ie. Cue llua isoi iena omoi finocabi” raite. Ie mei iena guitimaci. <sup>25</sup> Ie mei jiroracomo jai totaca vino Jesús llinuanona, Jusiñamuimo iobillacinona fecade. Ie comecina facade: “Adán micori facaiseomona cominina imaci jeacino facaina Jusiñamui duere finoñellena, toniaina atuidimaci, naimiemo fecallena”. Iemo ie comecina facajano, raite: “Cue fiodaillemona, dama cue diaillemona, Jusiñamuidi omoimo jiaie rafuena birui lloite. Omoi jeacinona oni

dotajana llote. Bie vinodi naie rafue facai ie. Cue llua isoi, bie vinona omoi jiruamona, cuena comeci. Mai, iena jiro” raité. Ie mei jirodimaci. <sup>26</sup> Naga icaiño Cristo facaina llomeniconona omoi guia, Cristo facaina vinona omoi jiroia, omoi jeacino facaina cai Nama fiodaillana uifnotomoi. Naimie nia abido dane bille dinori naiena comeci.

*Cristo fiodailla rafuena raise comeciadicai*

<sup>27</sup> Cristo fiodailla rafuena raise comeci. Naie llomeniconona Cristo rafuedo raise jaiacaiñedimie naie vino ebena jiroia, iena jamaide. Naimie jeacinomona Cristo naimie jilluana naimie inoñena jira, Cristomo jeacinona finode. <sup>28</sup> Jeacino omoi comeciaino illamo omoi comeciaina faca. Jeacino omoi comeciaino ia, iena guifeno. Iena jiroñeno. Jeacino omoi comeciaino inenia, iena guifno. Iena jiro. Jeacino ia, Jusiñamui iena llono. Jiaimie diga nicino ia, iena raise fino. Ie mei iena guifno. Iena jiro. <sup>29</sup> Jeacino naimie comecimo nia illamona, iena guia, iena jiroia, marañede. Naimie jeacino facaina Cristo fiodailla jira, Cristo fiodaillana naimie jai jamaide. Ie muidona Jusiñamui naimiena duere finoite. <sup>30</sup> Ie muidona omoimona ailluena irasiede. Ie jira omoimona damierie fiodaite. <sup>31</sup> Cai comeciaina raise cai facajamona, jeacinona cai faionocaia, Jusiñamui caina duere finoite. <sup>32</sup> Jusiñamui caina birui duere finoia, caina naimie dibeimo raise illena itataiacade. Jesucristo abido bia, naimiena inoñedinona duere finoite. Naimaci diga cai duere sefuifnellena, birui caina duere finode.

<sup>33</sup> Cue amatai, Cristo fiodailla rafuena omoi comecillena omoi ofia, daacaiño omoi guillesa, jiaino riñedinona seda. <sup>34</sup> Bu eo aimetaia, jofomo nano guilla. Guillanona omoi ofillinomo bi. Dani coniniri raise omoi guiacaiñenia, Jusiñamui omoina duere fino raillano, jofomo guifno. Nana naie rafuena nia lloñedicue; iadedi omoi dine dane cue ia, iena lloiticue.

## 12

*Cristo facaina raise maijillena, Jusiñamui Joreño naga creyentena canode*

<sup>1</sup> Cue amatai, jiaie rafuena cuemo jai jicanotomoi. Iena ja ñaiticue. Jusiñamuiomona diga uaina feifnoticai. Naimiemona naimie facaina maijia uaina feifnoticai. Naimie facaina cai maijillena, jiaie creyentiaina cai canollena, naimiemona cai oga uaina ñaiticue. Iena omoi raise uifnuana jitaidicue.

<sup>2</sup> Ero, Cristona nia omoi inoñenia, Jusiñamuiñedimiede jiraraina sedauidomoi. Iedo jaietainodo jai-jaisoidomoi. Taife iedo omoina jifue. <sup>3</sup> Ie jira buena omoi raise uifnuana jitaidicue. Jusiñamui Joreño uaido nie creyente ñaia, Jesús Joreñona jeare ñaifite. “Jesúdi Jusiñamui Jitoñede” raiñeite; iadedi Jusiñamui Joreño uaido nie creyente ñaia: “Jesúdi Jusiñamui Jito” raité. “Jesús cue Nama” raité. Naie isoide creyentedi Jusiñamui ie. Naimiemo cacarei; iadedi iese raiñedinona cacareiñeno.

<sup>4</sup> Jusiñamui Joreño caimo jai illa jira, Jusiñamui Joreñomona cai maijia uaina oticai. Naga creyente daje isoi oñedicai. <sup>5</sup> Naga creyente Cristo facaina daje isoide uai diga maijifedicai; iadedi Cristo facaina nana maijidicai. <sup>6</sup> Jusiñamuidi diga uai llua motomo naga creyentena maijitate, naimie jitailla rafuena naimaci finollena. <sup>7</sup> Jusiñamui Joreño naga creyentemo jai illanona, naga creyentemo ie uaina itatate. Conini naga creyentena naimaci canollena, ie uaina itatate. Iemona Jusiñamui Joreño caimo jai illana uifnoticai. <sup>8</sup> Damierie creyentemo Cristo rafue jino lolle uaina itatate. Damierie creyentemo Cristo rafue llofuelle uaina itatate. <sup>9</sup> Damierie creyentemo Jusiñamui siño rafue finuana inotaja uaina itatate. Damierie creyentemo duidinona jillotaja uaina itatate. <sup>10</sup> Damierie creyentemo siño rafuena finua uaina itatate. Damierie creyentemo jino lolle uaina itatate. Naimacimo Jusiñamuidi ie rafuena llocabite, jainomo jino lollena. Dajerie creyentemo uaina itatate, nie isoide uaido Cristo rafuena railla lloraia llua uañollena. Jusiñamui Joreño uaido nie lloraia lloia, iena uifnote. Taife uaido nie lloraia lloia, iena jai uifnote. Damierie creyentemo naimaci uifnoñega uaido ñaia uaina itatate. Damierie creyentemo naie uifnoñega uai oni dobaiñolle uaina itatate, comini iena raise uifollena. Iena naimaci nia dobaiñoenia, iena jai raise uifnoñedicai. <sup>11</sup> Naga creyentemo itatate uaina Jusiñamui Joreñomona bite. Naimie jitailla isoi, naga creyentena ie uaina itatate.

*Cristomo dajena duidicai*

<sup>12</sup> Cai abimo diga ra ite. Cai jefo ite. Cai uisi ite. Cai onolli ite. Cai eilli ite. Diga ra ite; iadedi cai abidi jaca dajede. Dajemo duide. Ie isoide. Diga creyentiaidicai; iadedi dajena Cristomo duidicai. <sup>13</sup> Dama Jusiñamui Joreñodi dajena Cristomo nana creyentiaidicai; duidicai. Dajerie judiuidicai; dajerie judiuidicai; dajerie patrón anamo iticai; dajerie patrón anamo inedicai. Diga nairaiaidicai; iadedi dajena Jusiñamui Joreñona nana feifnoticai.

<sup>14</sup> Cai raise maijillena, cai raise illena, cai abimo diga ra ite. Naga ra dama oni eneno inide. Ie isoide. Cristomo dajena cai duillanona, diga creyentiaidicai; iadedi Cristo facaina dajena maijidicai. <sup>15</sup> Ero, cai abimona cai eilli nibai facaite: “Onolli isoifedicue. Onolli cue bai femo

faite. Bie abimo duiñedicue” facaite. Iese facaia, jaca iese iñede. Cai abimo jaca duide. Onolli eilli baifemo fañede. Dafoconi ite. <sup>16</sup> Ero, cai jefo nibai facaite: “Uisi isoñedicue. Uisi cue baifemo faite. Bie abimo duiñedicue” facaite. Iese facaia, jaca iese iñede. Cai abimo jaca duide. Uisi jefo baifemo fañede. Ie isoide. Dajena Cristomo omoi duilla jira: “Jiaime baifemo iticue” raiñeno. Jiaie creyentena abina uradoiñeno. <sup>17</sup> Ero, dama uisi cai abimo itena, cai jefo iñedena, jiaie ra cai abimo iñedena, ¿niese rana cacaiticai? ¿Niese niadedi ra sorillana cacadica? Ie isoide. Dajena Cristomo omoi duilla jira, naga creyentena jitaidomoi, Cristomo dajena inocana omoi jaillena. Jiaie creyentena uaitañeno. <sup>18</sup> Jusiñamui cai abimo diga rana comuitate. Naimie jitailla isoi, cai abimo naga rana comuitate. <sup>19</sup> Cai abimo diga ra iñedena, ¿buedo cajenitica? <sup>20</sup> Diga ra cai abimo ite; iadedi jaca dajede cai abi. <sup>21</sup> Rana cai cioillena, cai uisi ite; iadedi cai onolli iñedena, cai ciua rana llinonidica. Ra feitañellena, cai comei ite; iadedi cai eilli iñedena, macarinidica. Ie isoide. Cristomo dajemo cai duilla jira, naga creyentena dajena inocana jaillana jitaidica. Jiaie creyentemona abina iedoñeno. <sup>22</sup> Naga cai abimo ite rana jitaidica, raise cai illena. Naga cai abimo ite ra jiaie ra baifemo iñede. Nana daje isoi itena, mare; <sup>23</sup> iadedi dajerie ra ebire eruaillena, cai abi jfollena, iniroina jitaidica. Meiruiñellena, cai abi bainillena, iniroina jia jitaidica. <sup>24</sup> Cai uiecomo meiredino iñena jira, iena jifoñedica. Ero, Jusiñamui cai abina finode. Dajerie ra jiaie ra baifemo iñede. <sup>25</sup> Jusiñamui naga cai abimo ite ra dajena maijana itate. Dajena maijicana jaide. <sup>26</sup> Cai abimona daje ra isireniadedi, nana cai abi daacaiño isirede; iadedi cai abi caimare marena ia, nana iobidica. Ie isoide. Cristomo dajena duidica. Jiaie creyente duere sefua, naimiena cai canoia, Cristo dibeimo caimare marena itica. Naimiena cai canoñena, caimare marena iñedica.

<sup>27</sup> Ero, caidi naimie cominina jira, Cristomo dajena nagasaia duidica. <sup>28</sup> Ie jira Jusiñamui naimiena inotinomona damierena nano fetuanona, Cristo naimacina orete, ie rafuena lollena. Ie mei jiaiona fetode, naimacimo ie rafuena llua mei, jianomo ie rafuena jino lollena. Jiaiona fetode, ie rafuena llofuellena, cominina ie rafuena raise uñotallena. Jiaño ie uaina itatate, naimie facaina naimaci maijillena, jiaie creyentiaina naimaci canollena. Damierie creyentemo siño rafuena finua uaina itatate. Damieriemo duidinona jilloitaja uaina itatate. Damieriemo jiaie cominina canua uaina itatate. Damieriemo jiaie cominina sedaja uaina itatate. Ja muidomo damieriemo naimaci uññoñega uaido ñaia uaina itatate. Iese omoina fetode, naimie facaina dajena nana omoi maijillena. <sup>29</sup> Ero, Jusiñamui nana omoina fetofede, ie rafuena jino lollena. Damieriena fetode. Nana omoina fetofede, ie rafuena llofuellena. Damieriena fetode. Nana omoina fetofede, siño rafuena finollena. Damieriena fetode. <sup>30</sup> Nana omoina fetofede, duidinona jilloitallena. Damieriena fetode. Nana omoina fetofede, omoi uññoñega uaido ñaillena. Damieriena fetode. Nana omoina fetofede, naie uññoñega uai jino dobaifollena. Damieriena fetode. <sup>31</sup> Naga creyentemo Jusiñamui ie maijia uaina itatate; iadedi damierie uai jiaie uai baifemo ite. Iena omoina illena, Jusiñamui jica; iadedi jiaie rafuena omoi ollena, omoina lloiticue. Nana jiaie rafue baifemo ite. Jiaie cominina omoi isiruillena lloiticue.

## 13

### *Nana jiaie cominina cai isiruillafue*

<sup>1</sup> Cai uññoñega uaido ñaia uaina cai ñaia, Jusiñamui jaienisa isoi cai ñaia, cominina cai isiruiñena, jamai ñaiafugena ñaitica. <sup>2</sup> Jusiñamui rafue jino lolle uaina caimo ia, nana Jusiñamui caina uñnotaga rafuena cai uññoia, nana Jusiñamui omoi ie rafuena cai uññoia, Jusiñamui siño rafuena finuana cai eo inoia, cominina cai isiruiñena, Jusiñamui omoina jamai bue isoidica. <sup>3</sup> Jiaie cominina cai canollena nana caimo ite rana cai fecaia, Cristo rafuena cai lollena cai niadi fiodaicania, cominina cai isiruiñena, jaca buena oñedica. Jusiñamui jaca iobitañedica.

<sup>4</sup> Cominina cai isiruia, naimaci diga raire iciriñedica. Naimacina canocabidica. Naimaciri abina uradoiñedica. Abina birioicaiñedica. <sup>5</sup> Cominina cai isiruia, abina iedoñedica. Naimacimo cai comeciaina facacabidica. Cai rana caidicabiñedica. Naimaci diga iciricabiñedica. Naimaci caina jeare finoia, ibana ocabiñedica. <sup>6</sup> Cominina cai isiruia, naimaci jeare finoca rari iobicabiñedica. Naimaci uanaí mare finoca rari iobicabidica. <sup>7</sup> Cominina cai isiruia, naimaci caina duere finoia, ibana ocabiñedica. Cai joreñona bu ñaia, caina taño lloia, iena inocabiñedica. Cai marena illamo ocuiridica. Cai comeciaina ocuiñocana jaidica.

<sup>8</sup> Jusiñamui cominina jaca cai isiruillana jitaide; iadedi caimo ie rafuena jino lolle uaina jaca itatañeite. Naie uaidi ico saite. Caimo cai uññoñega uaido ñaia uaina jaca itatañeite; iadedi naie uai ico saite. Caimo ie llofuelle uaina jaca itatañeite; iadedi nai uai ico saite. <sup>9</sup> Nana Jusiñamui caina uñnotagacinona nia raise cacaiñedica. Nana Jusiñamui rafuena nia



raise jino lloñedicai; <sup>10</sup> iadedi Jesucristo dane abido bia, Jusiñamui Joreño caimo itataja uaidi saite. Naimie diga cai illemona naimiēna raise uiñoiticaí. Naimiemo ite rafuena jiaí raise uiñoiticaí.

<sup>11</sup> Jiaie rafuedo iena llofueticue. Jiaie nia cue uruenia, urue isoi ñaiticue. Urue isoi comecina facadicue; iadedi eimiēna cue jaillamona, urue isoi jaiñedicue. Cue uruenamona ite rafuena fainonocaidicue. Eimie comecina facajacínodo birui jaidicue. Urue isoi Jusiñamui rafuena birui janore uiñoiticaí; iadedi monamo cai ia, eimie isoi iena raise uiñoiticaí. <sup>12</sup> Ero, jacaie acaranimona cai joreñodi raise bainide. Ie isoide. Jusiñamuimo ite rafuena nia raise uiñoñedicai. Iena raise cacaiñedicai; iadedi Cristona íco cioiticaí. Naimiemo ite rafuena birui janore cacadicue; iadedi naimie dine cue ria, Jusiñamui cuena jai uiñua isoi, jiaí raise uiñoiticaí. <sup>13</sup> Ja muidomo lloiticue. Jesucristo billanona, Jusiñamui Joreñomona caimo ite uaidi saite; iadedi Jusiñamui llogacínodo jai abina ñnoticaí. Naimie llogacino suillemo jai ocuridicaí. Jusiñamuina cai isiruillamona, jiaie cominina jiaí isiruiticaí. Naie isiruillacino jiaicino baifemo faite. Ie jira coninina isiruicana omoi jai.

## 14

### *Omoi uiñoñega uaido omoi ñaia rafue*

<sup>1</sup> Nana cominina isiruicana mai omoi jai. Jusiñamui Joreñomona bite maijia uaina uana omoi nicido. Jusiñamui rafuena jino lolle uaina ua nicido. <sup>2</sup> Ero, omoi uiñoñega uaido ñaia uaina omoi ñaicabia, jaca buna omoína cacaiñena jira, cominina canollena ñaiñedomoi; iadedi Jusiñamuina íobitallena ñaitomoi. Omoi uiñoñega rafuena omoi comeciama ñaitomoi. <sup>3</sup> Jusiñamui rafuena jino omoi lloia, cominina canodomoi. Naimacina Jusiñamuina ñnotodomoi. Naimie dibeimo raise itatatomoi. Naimaci comeciaina ocuñnotodomoi. <sup>4</sup> Nana creyentiaína canodomoi; iadedi naie uiñoñega uaido omoi ñaia, dani omoi comeciaina canodomoi.

<sup>5</sup> Rollena omoi oficabia, naie uiñoñega uaido omoi ñaia, cuemona mare; iadedi Jusiñamui rafuena jino omoi lloia, cuemona ua eo mare. Naie jino llua uaidi naie uiñoñega uai baifemo faite. Naie uiñoñega uaido omoi ñaia, nana creyentiaí iena raise cacarellena, iena omoi oní dobaiñoia, cuemona jiaí mare. Ie mei naie ñaiamona, Jusiñamui rafuena naimaci cacajamona, creyentiaína canodomoi. <sup>6</sup> Cue amatiaí omoi dine cue jaiacanana uiñotomoi. Omoi dine cue ria, cue uiñoñega uaido cue ñaiticuedena, omoína canoñedicue; iadedi Jusiñamui cuemo jai lloga rafuena omoimo cue lloticuedena, omoína canodicue. Jusiñamui rafuena raise cue jai uiñua jira, omoína cue llofueticuedena, omoína jiaí canodicue.

<sup>7</sup> Ero, quena jamai tainuaido bu fia, ie figana uiñoñedicai. Guitarra bu jamai tainuaido taia, ie taillana uiñoñedicai. <sup>8</sup> Ejércitomo trompetana jamai tainuaido fia, soldaduái maijillena raise uiñoñedimaci. <sup>9</sup> Ie isoide. Cai cacaiñena uaido omoi ñaia, omoi ñaiana uiñoñedicai. Iese omoi ñaia, jamai tainona ñaite isoi cacadicaí. <sup>10</sup> Eo ailluena nairaiái ite. Naga nairai ie uai ite dani naimaci ñaillena; <sup>11</sup> iadedi nie nairai ie uaina cue uiñoñenia, naimacimona jiaie nairai imiēna eruaidicue. Cuemona naimaci jiaie nairaina eruaidimaci. Conini diga ñaiana cacaiñedicai. <sup>12</sup> Ie isoide. Jusiñamui Joreñomona bite ñaia uaina omoi eo jitaillanona, diga uaina Jusiñamuimo jica, dani conini Cristo rafuena ñnocana omoi jaillena. Jusiñamui Joreñomona dani daje uaina nicidoñeno; iadedi nana nicido.

<sup>13</sup> Ie jira ie uiñoñega uaido bu ñaia, ie oní dobaiñua uaina naimiemo illena, jiaie creyentiaí iena cacaillena, Jusiñamuimo jicaja. <sup>14</sup> Jusiñamui diga cue uiñoñega uaido cue ñaia, Jusiñamui Joreño cuena ñaitatate; iadedi iena cacaiñedicue. Iena uiñoñedicue. <sup>15</sup> Ie jira, ¿niese cue nibaille? Jusiñamui diga cue ñaia, cue uiñoñega uaido ñaiticue; iadedi comini cue ñaiana raise uiñollena, Jusiñamui diga jamai cue uaido jiaí ñaiticue. Jusiñamuimo cue roia, cue uiñoñega uaido roiticue; iadedi comini cue ruana raise uiñollena, Jusiñamuimo jamai cue uaido jiaí roiticue. <sup>16</sup> Iobillacinona Jusiñamuimo omoi fecajano, omoi uiñoñega uaido omoi ñaianona, ¿niese omoína cacaiñedinno: “Jee” raitimaci? <sup>17</sup> Iobillacinona Jusiñamuimo raise fecadomoi; iadedi omoína cacaiñedinona Jusiñamuina uiñotañedomoi. Ie jira omoi uiñoñega ñaia uaina oní dobaiñotimie omoi roracomoi iñenia, naie uaido ñaiñeno. <sup>18</sup> Cue uiñoñega uaido cue ñaicabilla jira, Jusiñamuimo iobillacinona fecadicue. Omoi baifemo naie uaido cue ñaiana uiñoticue; <sup>19</sup> iadedi roracomoi cue ia, cominina raise cue llofuellena, janore cue ñaiadi, mare; iadedi eo are cue uiñoñega uaido cue ñaia, cominina Jusiñamui rafuena cue llofueñenia, cuemona maraiñede.

<sup>20</sup> Cue amatiaí, omoi uiñoñega ñaia uaido dani jai jaidomoi; iadedi jiaie Jusiñamui Joreño itataja uaimo omoi comeciaina facañedomoi. Omoi abina jai uiñuamona, jiaie uaimo omoi comeciaina faca. <sup>21</sup> Jusiñamui facaina lloraima micori jaie cuela: “Jusiñamui llote: ‘Cue comini dine jiaie nairaina cue oretajamona, cue cominina cuena ñnotallena, naie jiaie nairai uaido cue cominimo lloiticue; iadedi iena jitaíñeitimaci’. Cuenaa jaca uiñoñeitimaci’ llote”.

<sup>22</sup> Ie isoidé. Uifñoëga uaido omoi ñaiamona, Cristona ñnoñédino iena raise cacaiñédimaci; iadedi Cristona ñnotino iena cacadimaci. Iemona fueotimaci. Jusiñamui rafuena omoi llofuiaimona, Cristona ñnoñédino iena cacajamona, Cristona ñnoñédimaci; iadedi Cristona ñnotinona canodomoi. <sup>23</sup> Danomo nana omoi ofia, omoi uifñoëga uaido nana omoi ñaia, Cristona ñnoñédino iena cacajanona, omoïna; “Uairico” raitimaci; <sup>24</sup> iadedi omoi ofia, Jusiñamui rafuena omoi jino lloia, iena Cristona ñnoñédimie cacajamona, naimiedi jeacino naimie comecimo illana uifñoite. Naie rafue naimiemo riire baite. <sup>25</sup> Naimie comecimo ite jearede rafue naimie uifñuamona, Jusiñamuimo ie jeacïnona lluanona, Jusiñamuina ñnoite. Ie muidona raite: “Uanai, Jusiñamui omoi motomo ite”.

*Roracomo omoi ia, raise marena omoi i*

<sup>26</sup> Cue amatiai, rollena omoi oficabia, ¿niese omoi ñibaille? Iena ja ñaiticue. Omoi ofia, omoïmona damierie ñibai roite. Jiaimie Cristo rafuena llofueite. Jiaimie naimiemo Jusiñamui como lloga rafuena jino lloite. Jiaimie ie uifñoëga uaido ñaite. Jiaimie naie uaina oni dobaiñóite. Cristo dibeimo creyentiaïna raise itatallena, nana omoi finua rafuena raise fino. <sup>27</sup> Uifñoëga uaido bu ñaia, damie amani naiedo ñaite. Damierie ñaite. Jiaimie ñaille ifomo jiaimie ñaite. Ie mei damie naie ñaiana oni dobaiñóite. <sup>28</sup> Naie ñaiana oni dobaiñótimie iñenia, naie uifñoëga uaido ñaitimie roracomo ñaiñena; iadedi naimie ñaiacania, Jusiñamuimo dama ie jofomo ñaia. <sup>29</sup> Jusiñamuimona ite rafuena bu jino lloiacania, damie amani iena lloite. Damierie lloite. Jiaïno llorainidi Jusiñamuimona naie llucino billana uifñuana llua. <sup>30</sup> Jusiñamui rafuena bu nia lloia, naimie ecimo jiaimiena rafuena Jusiñamui Joreño llotataia, nano llotimie raire llucilla. Iemei jiaimie lloite. <sup>31</sup> Iese damierie nana lloïtomoi, naie lluamona Jusiñamui rafuena raise omoi uifñollena, omoi comeciai jiaï ocuifñollena. <sup>32</sup> Naga llotimiedi ie uifña diese llua uifñoite. Ie jira jiaimie nia lloia, iena cacarei. Iemei jiaimie llua. <sup>33</sup> Iese iñenia, daacaiño omoi lloia, buna Jusiñamui rafuena raise cacaiñeite. Omoi raise illena Jusiñamui jitailla jira, omoi uri illena Jusiñamui jitailla jira, cue llucinodo omoi jai.

<sup>34-35</sup> Jiaie creyentiaï illanuaimo isoi omoi roracomo riñoniaïdi uaina uaitañena. Nainomo lloga rafuena nainomo naiñaiñuai siadoñena; iadedi naiñaiñuai jofomo rillanona, naiena ie ñimo jicanoïtimaci. Roracomo naiñaiñuai ia, Moisés micori jiaie llua isoi, naiñaiñuai ñi anamo naiñaiñuai illa jira, nainomo ite lloraima uaina naiñaiñuai uaitañena. Roracomo naiñaiñuai uaina uaitaia, maraiñede, nainomo ite jino lloraima uaina naiñaiñuai raise cacaiñena jira.

<sup>36</sup> ¿Niese cue llucinodo jaiacaiñedomoi? Jusiñamui rafue omoïmona comuiñede. Dani omoi naie rafue duiñede; iadedi nana creyentiaïmo duide. Dani omoïmo Jusiñamui ie rafuena lloñede. Nana creyentiaïmo iena lloite. <sup>37</sup> “Rafuena Jusiñamui cuemo lloite” omoïmona ie comecina bu facaia, “Jusiñamui Joreño ie ñaia uaina cuemo itatate” ie comecina bu facaia, “Cai Namamona ite uaina omoïmo cueticue” naimiedi uifñoite; <sup>38</sup> iadedi naimie iese uifñoenia, Jusiñamui Joreñomona naimie uai iñenana uifñoïcaï.

<sup>39</sup> Cue amatiai, Jusiñamui omoïmo ie rafuena llua uaina naimiemo jica; iadedi naimaci uifñoëga uaido jiaie creyentiaï ñaia, iena rairuifño. <sup>40</sup> Omoi ofia, cue llua isoi, Jusiñamuina raise marena seda.

## 15

*Fiodaillamona Cristo jai jillode*

<sup>1</sup> Cue amatiai, iena omoi feitañellena, bie rafuena dane lloïticue. Cristo ie mare rafuena omoïna navui llofueticue. Fiodaillamona Cristo jilluana llofueticue. Cue llofuiaïnona feifnotomoi. Iena ñnocana jaidomoi. <sup>2</sup> Naiena omoi ñnuamona, Jusiñamui omoi jeacïnomona omoïna jillotate. Naiedo nia omoi jaia, iena raise omoi ñnoia, jai jillobidomoi.

<sup>3</sup> Nanoca rafuena omoïna llofueticue. Jiaie creyentiaïmona biena jai cacadicue. Jusiñamui facaina lloraini micoriaï jiaie ciegafuiai isoi cai jeacïno facaina Cristodi fiodaite. <sup>4</sup> Raiafomo naimiedi jonega. Darui amani illanona naiemona Jusiñamuidi naimiena jillotate, Jusiñamui facaina lloraini micoriaï jiaie llua isoi. <sup>5</sup> Ie mei Pedro naimiena ciode. Ie mei ie once llofueoicaïgano naimiena cioidimaci. <sup>6</sup> Ie mei quintientos naimiena ñnotino naimiena daruido cioidimaci. Naimacimona damierie jai fiodaitimaci; iadedi ailluena nia fiodaiñédimaci. Cristo jilluana uifñotimaci. <sup>7</sup> Ie mei Jacobo naimiena ciode. Ie mei nana ie oretagano naimiena cioidimaci.

<sup>8</sup> Ie mei naimiena jiaï ciodicue. Ie jira fiodaillamona naimie jilluana uifñoïcaï. Ie doce llofueoicaïgano fetua mei, diga años illanona, naimiena nia cue uifñoëna facaise cuena fetode. Ie mei ie rafuena cue llollena, cuena oretate. <sup>9</sup> Ailluena creyentiaïna jiaie cue duere finua jira, nana jiaie Cristo oretagano cue baifemo faitimaci. Jamaï bue isoidicue; iadedi Cristo cuena fetode. <sup>10</sup> Jusiñamui cuena duenaillamona, Cristo oretagamiëna

jaidicue. Jusiñamui cuena jamai tainomo duenaiñede. Nana jiaie Cristo oretagano bai femo Cristo rafuena llofuecabiticue. Dama cue comecimona llofuecabiñedicue; iadedi Jusiñamui cuena canuamona, iese llofuecabiticue. <sup>11</sup> Jiaie oretagano Cristo rafuena llofueia, iena cue llofueia, daje isoide rafuena llocana jaidicai. Naie rafuena omoi cacajamona, iena iñotomoi.

*Fiodaillamona nana creyentiai ico jilloitimaci*

<sup>12</sup> Fiodaillamona Jusiñamui Cristona jillotajana llofuecabiticai; iadedi omoimona dajerie raitomoi: “Fiodaillamona, nana comini imaci abiai diga ico jilloñeitimaci?”. <sup>13</sup> Ero, omoi llua isoi fiodaillamona comini ico jilloñedena, ie isoi Cristo jiai nia raiafomo ite. Niade jilloñede. <sup>14</sup> Cristo jilloñenia, Cristo rafuena jai tainona lloticai. Naie rafuena jiai tainona iñotomoi. <sup>15</sup> Cristo fiodaillamona Jusiñamuidi naimiena jillotajana llofuecabiticai. Fiodaillamona creyentiana ico Jusiñamui jilloñenia, Cristona jiai niade jilloñede. Jusiñamui rafuena tainona jai llofueticai. <sup>16</sup> Fiodaillamona nana creyentiai ico jilloñenia, Cristo jiai jai jilloñede. <sup>17</sup> Cristo nia jilloñenia, naimiena tainona iñotomoi. Jusiñamui omoi jeacinona niadedi oni dotañede. <sup>18</sup> Cristona iñuanona jai fiodaitinodi jiai jai faifidimaci. Jusiñamui illanomo jaca iñeitimaci; iadedi iraimo jaca iitimaci. <sup>19</sup> Nana cai ille dinori dani Cristo caina jilloitallemo cai ocurria; iadedi naimie jilloñenia, jai duere iticai. Jai tainomo ocuriridicai.

<sup>20</sup> Ero, tainomo ocurriñedicai; iadedi fiodaillamona Jusiñamui Cristona jai jillotate. Naimie jillua mei, naimiena ciodicai. Ailluena fiodaitino jai itimaci; iadedi Cristo jai jillode. Ie jira nana jai fiodaite creyentiai jai jilloitimaci. <sup>21</sup> Adán micori jeacinona finua jira, fiodaite. Fiodaillamona jilloñede. Jeacino naimie finua jira, fiodaicana jai jaidicai; iadedi fiodaillamona Cristo jai jillua jira, fiodaillamona ico jiai jilloiticai. <sup>22</sup> Adán micorimona cai comuilla jira, nana fiodaicana jaidicai; iadedi Cristomo cai duilla jira, jilloitici, naimie diga jaca cai illena. <sup>23</sup> Cristo jai jillode. Cai fiodailla mei, naimie cai duilla jira, ico dane abido naimie bille facaise jilloitici. <sup>24-25</sup> Ie mei naimie dinena nana naimie dibeimo iñedinona anafefitaite. Nana naimie dibeimo iñede joreñuaina jai anafefitaite. Illaimana Cristo illamona, nana naimie dibeimo iñedinona anafefitaite. “O uai cuemo o illamona, nana o jitailla rafuena jai fuidodicue” ie Moomo lloite. <sup>26</sup> Nana naimie dibeimo iñedinona naimie anamo jai illa mei, Cristo muidona naimie comini jai jilluamona dane fiodaiñeitimaci. <sup>27</sup> Jusiñamuidi nana cominina Cristo anamo itataite. Ie muidona creyentiaidicai dane fiodaiñeiticai; iadedi Cristo anamo Jusiñamui iñeite. Cristona oretaja jira, Cristo anamo Jusiñamui iñede. <sup>28</sup> Naga ra Cristo anamo illa mei, ie maijia fuilla mei, Jusiñamui ie Moona jira, Jusiñamui anamo Cristo jai iite. Jusiñamui nanocamienna jira, nana naimie finoca ra naimie anamo iite. Nana comini naimie anamo iitimaci.

<sup>29</sup> Cristo jilloñedena, fiodaillamona jilloñeitomoidena, ¿niese bautizagaomoi? Fiodaillamona omoi jilloñenia, ¿bue ñellena bautizagaomoi? Tainomo jai bautizagaomoi; iadedi iese iñoñedomoi. Dajerie creyentiai marena illamona, omoimona dajerie creyentiana jaidomoi. Naimaci jai fiodaitimaci; iadedi fiodaillamona ico jilluana iñotimaci. Iena omoi iñuanona, bautizagaomoi. <sup>30</sup> Cristo jilloñenia, cue jilloñedicuedena, ¿bue ñellena nagarui Cristo rafuena cue llofuiamona, eo jaciredo ramona niadedi fiodaibiticue? <sup>31</sup> Cue amatiai, cai Nama Jesucristomo omoi duilla jira, omoi iobidicue; iadedi nagarui niadedi fiodaibiticue. Cristo rafuena omoimo cue llocabilla jira, jiaie comini iciritimaci. Icirillamona, cuena meineiacadimaci. <sup>32</sup> Efeso railla nairaimo birui cue illamona, diga comini cue lloga uaina eo uaitaside. Duere sefuidicue. Cristo jilloñenia, cue lluaamona jaca buena oñeticue. Ie muidona fiodaillamona cai jaca jilloñeiticaidena, Cristo rafuena fañonocaida, ico raire jamai cai fiodailla jira, jamai ua jai jaicaillafuena cai jaiacaiticai. Ie ia iese iñede. Cristo jai jillode.

<sup>33</sup> Ie jira omoi abiaina jifueñeno. “Jilloñeiticai” railla comini diga omoi nabairia, naimaci llogacinodo jai jaitomoi. Ie muidona naimaci diga nabairiñeno. <sup>34</sup> Ie jira raise abina uñuanona, mai jai. Jeacinona finocana jaiñeno. Omoimona dajerie Jusiñamuina raise uñiñena jira: “Jusiñamuidi cominina jillotañeite” raitimaci. Omoi meidallena, omoimo iese lloticue. Jusiñamui rafuedo raise mai omoi jai.

*¿Niese creyentiai jilloitimaci?*

<sup>35</sup> Omoimona damie nibai jicanoite: “¿Niese fiodaillamona creyentiaidicai jilloitici? Naimaci abiai nibai jai rifaidimaci. ¿Nie isoide abiai diga dane iiticai?” <sup>36</sup> Iese bu jicanoia, raise comecina facañede. O illimo buena o ria, janore sicua meinoconi, o riga radi jai abidi rifaide. <sup>37</sup> Nie isoide icofona o ria, nie isoide ijina o ria, nie isoide idona o ria, naie ra sicua mei, jai jiaifo eruaiñede. O riga rana eruaiñede. <sup>38</sup> Naga riarra daje isoi eruaiñede. Jusiñamui jitailla isoi, jiaiforie eruaiñede. Ie isoide. Naga fiodaitimie jillua mei, Jusiñamui jitailla isoi, ie abina jiaiforie itataite. <sup>39</sup> Diga isoide cai abiaina Jusiñamui jai comutate. Naga abi isoide ite. Cai maijillena, comini abi ite. Eniruedo macarillena, ocaina abi ite. Fellena, silli abi ite.

Jnuimo illena, llicia: abi ite. Ua diga isoide abi ite. Jusiñamuidi cai jiaiforie eruaite abiaina finorede. <sup>40</sup> Jusiñamui dine ico cai ia, cai abia: iite, nainomo cai illena. Bene cai abia: jia: ite, bene cai illena. Monamo cai ia, ebirenitica: . Bene cai ia, jia: ebire itica: ; iadedi daje isoi ebire ifñedica: . <sup>41</sup> Jusiñamuidi monamo ite rana finode; iadedi daje isoi lligaiñoñede. Jitoma fivui isoi lligaiñoñede. Fivui ucua: isoi lligaiñoñede. Naga ucua: daje isoi lligaiñoñede. Monamo cai ico illena, naimie jitailla diese cai abia: caimo iite. <sup>42</sup> Ie isoide. Fiodaillamona cai jillua mei, cai abia: jia:ifo eruaite. Cai fiodaillamona cai abia: rifaide; iadedi cai jilluamona, cai abia: dane jai rifaiñeite. <sup>43</sup> Cai fiodaillamona cai abia: jai ebinide; iadedi cai jilluamona, cai abia: ebirenite. Fiodaicana cai jailla jira, cai abia: birui raise mairiñede; iadedi ico cai jilluamona, cai abia: jitailla diese cai abia: erua: idica: . <sup>44</sup> Cai fiodaia, come abia: isoi caimo birui ite; iadedi cai jilluamona monamo ico caimo cai abia: jia: iite. Enirue iena cai abia: birui caimo ite. Ie jira monamo cai jia:ifo eruaite abia: caimo iite.

<sup>45</sup> Adán micori comuilla rafuena Moisés micori jaie cuega: “Jusiñamuidi nano comuidimie dofomo jafaicina firaiñuamona, naimie micori comena jaide” cuega. Naimiemono cai comuilla jira, fiodaitica: . Fiodaillamona Cristo jillua jira, ico cai jia: jilloille jira, caina jia:ifo eruaite abia:ina ico itataite. <sup>46</sup> Eniruemo birui cai illa jira, caimo birui ite abia: diga itica: . Fiodaillamona ico cai jillua mei, monamo cai ia, jia:ifo eruaite abia: diga iitica: . <sup>47</sup> Adán micoridi enirue ie. Imuicimona Jusiñamuidi naimiema finode. Cristodi eniruemo billanona, iimana jaide; iadedi Jusiñamui dinena monamona naimie bite. <sup>48</sup> Imuicimona Adán micori finua jira, naimie fiodailla mei, dane imuicina jaide. Naimiemono cai comuilla jira, cai fiodaia, jia: imuicina jaitica: ; iadedi Cristomo jia: duidica: . Cai jillua mei, naimie isoi ico iitica: . <sup>49</sup> Adán micorimona cai comuilla jira, naimiema erua: idica: . Eniruemo Cristo jaie ia, naimie ab: ite. Fiodaillamona naimie jillua mei, naimiemo jia:ifo eruaite ab: naimiemo ite. Cai jillua mei, Cristona erua: itica: .

<sup>50</sup> Cue amatia: , biena lloticue. Caimo jai ite abia: diga monamo Jusiñamui ie cominina sedajanomo ifñeitica: . Cai abia: rifailla jira, cai fiodailla facaise naie isoide abia: diga nainomo jaca ifñeitica: . <sup>51</sup> Ero, Jusiñamui cuena uiñotaga rafuena omoimo ja lloticue. Iena navui jaca uiñofñedica: . Nana creyentia: idica: fiodaiñeitica: ; iadedi Jusiñamui cai abia:ina jia:ifo meidotaite. <sup>52</sup> Omo: uisi jarire cuirorilla isoi, iena ua raire meidotaite. Ie trompeta fillanona, jai fiodaite creyentia:na Jusiñamuidi jillotajanona, naimaci abia:ina meidotaite. Nia fiodaiñedinodica: cai abia:ina jia: meidotaite. Dane fiodaiñeitica: . <sup>53</sup> Cai abia: birui rifaicade. Ie jira birui fiodaicana jaidica: . Jusiñamuidi cai abia:ina ico meidoite. Ico monamo jia:ifo abia: caimo ia, cai abia: rifaiñeite. Fiodaiñeitica: . <sup>54</sup> Iese caimo suia, Jusiñamui facaina lloraima micori jaie cuega uai jia: suite. Cuega: “Nairuimona creyentia: jaca fiodaiñeitimaci”. <sup>55</sup> Cai jaca illa jira, fiodaicana jaiñeitica: . Fiodaillana jaciruiñeitica: , dane cai fiodaiñeitica:ina jira. <sup>56</sup> Jeacino illa jira, birui fiodaicana jaidica: . Moisés micori jaie llogacino illa jira, iena cai raise finonina jira, jeacino caimo illana uiñotica: ; <sup>57</sup> iadedi cai jeacino facaina cai Nama Jesucristo fiodailla jira, jeacino anamo jai ifñedica: . Cai fiodailla mei, dane fiodaiñeitica: . Jusiñamui caina iemono jai jillotate. Ie muidona naimieri cai iobillasa.

<sup>58</sup> Cue amatia: , fiodaillamona nana creyentia: ico jillua jira, Cristo rafuena inocana jai. Naganomo ifño; iadedi Cristo rafuena llocana omo: jai. Naimie jitailla rafuena finocana omo: jai. Naimie facaina omo: maijia, tainona maijñedomo: . Naiemono diga mare rafue comuite. Iena jai uiñotomo: .

## 16

### *Jerusalémo itinomo ucubena oredimaci*

<sup>1</sup> Jiaie rafuena cuemo jcanotomo: . Jerusalémo ite creyentia:mo ucubena oretaia-cadomo: . Galaciamo ite creyentia:mo cue llua isoi, omoimo lloticue. <sup>2</sup> Naga domingo omo: ucubemona daje diese eneno oni eneno. Omo: maijia bailla diese ucubemona cue bille dinori iena eneno. Iese naga domingo omo: enoñenia, ico cue bia, ¿niese dacaño ofrendamo ailluena ucubena joneitomo: ? <sup>3</sup> Omo: dine cue rilla mei, omo: enenga ucubena uillena, Jerusalémo ite creyentia:mo omo: fetocanona oretaiticue. Cartana jia: oretaiticue, omo: fetocano mareuidinona Jerusalémo itino uiñollena. <sup>4</sup> Jerusalémo cue comeci jia: jaiacania, cue diga jaitimaci.

### *Pablo jai macariacade*

<sup>5</sup> Macedonia railla eniruemo nano jaiticue. Creyentia:na cioillena, dajerie nairaimo jaiticue. Ie mei omo: dine jaiticue. <sup>6</sup> Diga irui omo: diga niba: iiticue. Nana rollime facaise omo: diga niba: iiticue. Niba: daje amani fivui iiticue. Ie mei cuena omo: canollemona oni jaiticue. Omo: dinomona cue jaia, cue jaillinona nia uiñofñedicue. <sup>7</sup> Omo: dine birui nia jaiñeiticue. Omo: dine birui cue jaia, dallu omo: diga iiticue; iadedi jaiiruido omo: dine cue

jaia, cai Nama jitaia, omoi diga are iiticue. <sup>8</sup> Beno Efesomo nia iiticue. <sup>9</sup> Beno diga comini Cristo rafuena cacaacadimaci. Naimacimo iena llofueiacadicue. Diga comini cue lluana uaitatimaci. Cue lluana jitaifnedimaci Ie jira bene nia lloiacadicue. Pentecostés railla rafue fuille mei, jaiticue.

<sup>10</sup> Omoi dine Timoteo ria, naimiena raise marena nafue. Cue isoi cai Nama facaina naimie maijicabide. <sup>11</sup> Ie muidona naimie llucanona jamaiñeno. Omoimona naimie jaiacania, cue dine abido naimie raise rillena, naimiena raise cano. Naimie jaiacania, naimie caimare caimaduano oreta. Jiaie creyentiaia diga naimie billemo ocuiridicue.

<sup>12</sup> Apolona jicanotomoi. Jiaie creyentiaia diga omoi dine naimie jaillana naimiemo lloticue; iadedi naimie comeci nia jaiacaiñede. Jiairuido abi juarenia, omoi dine jaite.

#### *Fuiduacino*

<sup>13</sup> Jeacinomona abina rairui. Cristo rafuena ñnocana omoi jai. Eimie isoi omoi comeciaina ocuiño. <sup>14</sup> Jiaie cominina omoi isiruillamona, nana omoi finoacalle rafuena fino.

<sup>15</sup> Cue amatiaia, Acaya railla eniruemo Estéfanadi, ie comini diga, nano creyentiaidimaci. Iena uifnotomoi. Naimaci jitailla jira, jiaie creyentiaina canocabidimaci. <sup>16</sup> Naie isoidino lloga uaina cacarei. Naga Cristo dibeimo maijidino uaina cacarei. Iedo omoi jai. <sup>17</sup> Omoimona cue dine Estéfnas bite. Fortunato diga, Acaico diga naimie billa jira, iobidicue. Cue dine ifedomoi; iadedi naimaci billa jira, omoi isoi cuena canodimaci. <sup>18</sup> Naimaci billamona cue comeci caimataide. Omoi comeci jiaia caimataide. Naie isoidinomo: "Marena maijidomoi" omoi railla.

<sup>19</sup> Diga creyentiaia Asia railla eniruemo itimaci. Imaci uaina oredimaci. Aquila, ie ai Priscila diga, ie uaina jiaia orediaimaiaia. Iaimaiaia jofomo dajerie creyentiaia rocabitimaci. Cristomo naimaci duilla jira, omoina isiruillanona, nana naie creyentiaia imaci uaina jiaia oredimaci. <sup>20</sup> Nana bene ite creyentiaia imaci uaina oredimaci. Nana creyentiaina eo caimare uaido.

<sup>21</sup> Omoimo cue uaina jiaia oredicue. Cuena canollena, naimiemo cue llua isoi, jiaimie bie carta cuega; iadedi cue mameci bene dama cueticue. Nana iena ñno. Pablodicue.

<sup>22</sup> Omoimona Cristona bu isiruifñenia, Jusifñamui naimiena duere finollesa. Cai Nama abido dane billesa.

<sup>23</sup> Cai Nama Jesús omoina duenailasa. <sup>24</sup> Jesucristomo cai duilla jira, omoina cue isiruillana omoi uifñuana jitaidicue. Mai. Macaibaite.

## CORINTOMO ITE CRISTONA HNOTINOMO IE EMODOMO PABLO ORETAGA RABE

### *Corintomo ite creyentiaimo Pablo cartana orede*

<sup>1</sup> ¿Nigacino? ¿Nie isoidomoi? Pablodice. Corintomo ite creyentia, omoi dine bie carta oredicue. Nana Acaya railla eniruemo ite creyentiaimo bie carta jiai oredicue. Jusiñamui jitailla jira, ie rafuena cue jino lollena, Jesucristo oretagamiedicue. Cue diga Timoteo illa jira, naimie ie uaina omoi dine jiai orede. <sup>2</sup> Cai Moo Jusiñamui, cai Nama Jesucristo diga, omoína duenaite. Iena uñocana mai omoi jai. Iaimaiaí omoína uri jai itatate. Iena omoi uñocana mai omoi jai.

### *Pablo ie duere sefuilla rafuena cuete*

<sup>3</sup> Cai Moo Jusiñamuimo iobillacinona cai fecacabillasa, naimiedi cai Nama Jesucristo ie Moo illanona. Jusiñamui cai Moo illanona, caina jaca duenaite. Cai comeciaina jaca ocuiñotade. <sup>4</sup> Nie isoide rafuemonona cue duere sefuia, nie isoide ramo cue jiria, naimie cue comecina jaca ocuiñotade. Ie jira jiaínona canoredicue. Nie isoide rafuemonona naimaci duere sefuia, nie isoide ramo naimaci jiria, Jusiñamui caina ocuiñotaja isoi, naimaci comeciaina ocuiñotaredicue. <sup>5</sup> Cristomo jai cue duilla jira, naimie isoi cue duere sefuia, naimie cue comecina ocuiñotade. Iemonona jiaíno comecina ocuiñotajana raise uñoticue. <sup>6</sup> Duere cue sefuillamona, omoína canoredicue. Jusiñamui jitaillacino omoi finocana jaillana jitaídicue. Cuena naimie ocuiñotajamona, Cristona omoi fainonocaiñellena, cue isoi omoi duere sefuia, omoína ocuiñotaredicue. <sup>7</sup> Cue isoi omoi duere sefuia, cue isoi Cristo omoi comeciaina ocuiñotaite. Iena raise uñoticue.

<sup>8</sup> Cristomo cai duillamona, cue amatiaí isoi itomoi. Asia railla eniruemo jaié eo duere sefuídicue. Iena omoi raise uñollena, ie rafuena dane omoímo lloiacadicue. Eo duere cue sefuilla jira, cue comeci niadedi ocuiñoneídicue. Niadedi fiódaiticue. <sup>9</sup> “Naie facaise fiódaiticue” raillanomo cue comecina facadicue. Cue finoca rafuemonona dama jillonidicue; ia Jusiñamui uai siñona jira, naimie cuena jillotate. Fiódaitinona naimie jillotarede. Niadedi fiódaitinona jiai jillotarede. Naimiedi naimie cuena jillotajana cue ñnuana jitaide. <sup>10</sup> Naie facaise eo duere sefuillamona cuena jillotate. Ico cue duere sefuia, iemonona dane cue jilloillena ñnoticue. <sup>11</sup> Iena cue facaina omoi jicabi. Jusiñamui fairiua meinomo, ailluena comini cue facaina Jusiñamuimo iobillacinona fecaitimaci. Cuena Jusiñamui canua jira, iobillacinona fecaitimaci.

### *Pablo Corintomo navui jaiñede*

<sup>12</sup> Cuena gaiñedino cuena nibai jeare ñaitimaci; ia daje rafueri abina iedoticue. Cue comecimona iena uñoticue. Cristona ñnoñedinona marena finodicue. Omoína marena finodicue. Jusiñamui jitaillacino finocana jaidicue. Jusiñamuimona jeacínona finoñecana jaidicue. Cue comecina facajacinomona iese jaiñedicue; ia Jusiñamui cuena canuamona, iese jaidicue. <sup>13</sup> “Iese cuetio; iadedi o comecimo jiaie rafue ite diga caimo cuetio” raitomoi. Omoína jifueiacaiñedicue. Cue cuega cartaiaina jai facadomoi. Cue cuega rafue omoi raise cacajana jitaídicue. <sup>14</sup> Cuena nia eo raise uñoneídomoi; ia cuena uñocana omoi jaillanona, cueri omoi iobillana jitaídicue. Cai Nama Jesús abido bia, omoiri cue iobilla isoi, cueri omoi iobillana jitaídicue. <sup>15</sup> Omoímo iese cue comecina facajamona, omoi dine navui jaiacadicue. Macedoniamona cue jaiacadicuemo, raise omoína cue iobitallena, omoi dine nano navui jaiacadicue. <sup>16</sup> Macedoniamona cue abido bia, omoi dine navui dane jaiacadicue. Judeamo cue diga jaillena, omoimona damieriena omoi oretajana jitaídicue. Iese cue jaillemo navui comecina facadicue. <sup>17</sup> Omoi dine cue jaiñena jira, cue comeci naganomo illa isoi, comeciaina facadomoi. Damierie ie lloga uaina jaca finoñedimaci. Dani naimaci rafuemo comeciaina facadimaci. “Jii” raitimaci; ia: “Dama ite” comeciaina facadimaci. <sup>18</sup> Iese iñedicue. Jusiñamui uanaicínona jaca llua isoi, cue comeci naganomo iñede. Omoímo cue lloga uai finodicue. <sup>19</sup> Jusiñamui jito Jesucristo rafuena omoímo navui lloticue. Cristo ie llogacinona jaca meidoñede. Silvano iena jiai llofuede. Timoteo iena jiai llofuede. Nagarui daje isoide rafuena llofueticai. Jaiaruido jiaie Cristo rafuena llofueñedicai. <sup>20</sup> Nana Jusiñamui jai lloga uai Cristo finoca rafuemonona suicabide. Jusiñamuina cai sedaia: “Cristo ie rafuena raise finode” cai lloia, Jusiñamuina iobitadicai. <sup>21</sup> Jusiñamui Cristo dibeimo caina jai itatate. Ie rafuena cai lollena, caina jai fetode. <sup>22</sup> Ie comínina caina itatate. Iena cai uñollena, ie Joreño caimo jai itatate. <sup>23</sup> Jusiñamuidi cue uanaicínona llua uñote. Uanaicínona cue lloñenia, Jusiñamui cuena duere finuana jitaídicue. Omoi finoca rafue jai cue uñuamona, omoímo cue riire lloi raillano, omoi dine navui dane jaiñedicue.

<sup>24</sup> Cristona jai omoï ñnuana uiñoticue. Cristona ñnocana omoï jailla jira, omoï ñnolle rafuena lloñedicue; ia omoï iocire illana jitaïdicue.

## 2

<sup>1</sup> Omoï dine nia cue jaiñellemo comecina facadicue. Omoï dine navui cue ia, iocire coniniri iñedicai. <sup>2</sup> Omoïna jai icidicue. Cueri omoï iobillana jitaïdicue; ia omoïna cue dane iciia, coniniri iocire iñeïticai. <sup>3</sup> Omoïmo cartana navui oredicue. Omoï dine ite rafuena raise finollena, iena oredicue. Cuen a iobitajana uiñotomoi. Omoï dine ite rafuena omoï raise finoia, coniniri iocire iiticaï. “Cuen a iobitaitomoi” raillanomo cue comecina facadicue. <sup>4</sup> Cue comeci eo sunaillamona, cue comeci eo eiamona, carta navui oredicue. Omoïna iciaicaiñedicue; ia omoïna cue eo isiruillana omoï uiñuana jitaïdicue. Ie jira omoï dine ite rafuena raise fino.

### *Maraiñede rafuena finodimie rafuena feita*

<sup>5</sup> Maraiñede rafue navui damie ñnuua jira, sunaiticaï. Naimie muidona cue comecido duere jaide; ia daje isoi omoï comeciaï jiaï duere jaide. <sup>6</sup> Omoï nabei dine ite cominimona naimie jai duere sefuilla jira, dama iesede. Naimiena dane duere finoñeno; <sup>7</sup> ia naimie finoca rafuena mai feita. Iena dane llinoñeno. Naimie comecina ocuiñota. Naimiena iese omoï canoñenia, omoïmona duere sefuillamona, abido danomo jaite. <sup>8</sup> Ie jira: “Ona nia isiruiticaï” naimiemo llono. Iena eo jitaïdicue. <sup>9</sup> Nana cue lluaña omoï ñnuana cue facacillena, carta omoï dine navui cueticue. <sup>10</sup> Naimie finoca rafuena omoï feitaia, iena cue jiaï feïtaïticue. Cristo rafuena omoï ñnocana jaillana cue jitailla jira, naimie rafuena feïtaïticue. Cristo cuena uiñuamona, iena feïtaïticue. <sup>11</sup> Taife ramo cai faiana uiñoticai. Cristo rafuedo cai raise jaiñellena, naimie jitaillana uiñoticai. Cristo dibeimona caina Taife itañañenia, omoï motomo itimie finoca rafuena feïtaïticaï.

### *Troamo navui Pablo ia, uri iñede*

<sup>12</sup> Troamo navui jaidicue. Cristo rafuena cue lollena jaidicue. Cai Nama comini comeciaina jetajamona, naimie dibeimo cue maijiamona, ie rafuena lloticue. <sup>13</sup> Tito nainomo cue cioñena jira, uri iñedicue. Naimiedi cue ama isoide. Ie jira nainomo ite creyentiaïna facaduanona, Macedoniamo jaidicue.

### *Jusiñamuidi Cristo dibeimo iñedinona anafesitaite*

<sup>14</sup> Jusiñamui fue eo mare. Cristo dibeimo iñedinona naimie anafesitajanona, Cristo cominina cai illamona, naimie rafuena uicana jaidicaï. Ie rafuena cai lloia, iena comini ñnoia, Jusiñamui naimacina jai caïmare itatate. <sup>15</sup> Cristomo cai duillamona, ie rafuena cai lloia, Jusiñamuina iobitadicaï. Cai lluañona, damierie jillodimaci. Iena jitaïñenamona, damierie faïfidimaci. <sup>16</sup> Iena cacajamona, damierie faïficana jaidimaci. Jusiñamui illanomo jaca iñeïtimaci. Iena cacajamona, jiaïno Jusiñamui illanomo jaca iitimaci. Jamai bue isoidicue; ia bie rafue llocana jaidicue. <sup>17</sup> Damierie Jusiñamui rafuena lluañona, ucubena oiacadimaci. Omoïmo comecina facañedicue; ia iese llofueñedicue. Omoïmo cue comecina facajanona, bie rafue cue lluañona, buena oñedicue. Jusiñamuimona cue llogacinona oticue. Jusiñamui cuena ciua jira, Cristomo cue duilla jira, uanaicimona jaca lloticue.

## 3

### *Cristo caimo lloga rafuedo birui jaidicaï*

<sup>1</sup> Omoï dine damierie llofueraini jaia, cartaiaina uicabitimaci. Naimaci cartaiaimo jiaïnodi: “Bie llofueraini mare” raillanona cuetimaci. Omoïmona jiaïno cuega cartaiaina: “Bie comini mare” raillana jitaïñedicue. Cuemona jiaïno cuega cartaiaina: “Pablo mare” raillana jiaï jitaïñedomoi. <sup>2</sup> Omoï marenana jai uiñoticue. Cue mareñenana jai uiñotomoi. Carta isoidomoi. Jusiñamui dibeimo omoï comeciaï meïduamona, cue comecimona omoïna raise uiñoticue. Omoï birui illamona, omoïna fidiamona, nana comini omoïna raise uiñotimaci. Ie jira jiaïnodi: “Bie comini mare” raillana omoïmona jitaïñedicue. <sup>3</sup> Cristo rafuena omoïmo lloticue; ia Cristo omoï comeciaina jai meïdotaja jira: “Omoï mare” raillanona naimie jai cuegadana, nana comini uiñotimaci. Tinta diga naimie cueñede. Jusiñamui Moisés micorimo jaie lloga rafue jamai noficimo cuega. Cai cajede Jusiñamui birui iese cueñede; ia naimie Joreño uaido omoï comeciaina birui meïdote. <sup>4</sup> Cristomo cue jai duilla jira, Jusiñamuina cue ñnuamona, omoïna iese lloticue. <sup>5</sup> Cue finoca rafueimona iese lloñedicue; ia Jusiñamui uai cuemo illamona, iese omoïmo lloticue. <sup>6</sup> Jiaïe rafuedo birui cue jaillena, Jusiñamui cuena fetode. Ie uai cuemo illamona, cuemo lloga rafuena llocabiticue. Moisés micorimo lloga rafuena birui lloñedicue. Moisés micorimo lloga rafue ñnuamona, Jusiñamui illanomo jaca buna itañañede. Jusiñamui Joreño llotataga rafuena

birui llocabiticue. Iena cai ñnuamona, Jusiñamui Joreño Jusiñamui illanomo caina jaca itatate.

<sup>7</sup> Moisés micorimo lloga rafuedo jaillamona, Jusiñamui dine buna jaca iñena. Noficimo Jusiñamui cuela. Moisés micorimo Jusiñamui llua mei, Jusiñamui uai ebirena jira, Moisés micori uieco eo quenirecaide. Jusiñamuimona naimie abido bia, Israel comini Moisés micori uiecomu eruainidimaci. Nagarui Jusiñamui diga naimie ñaifñena, naimie micori uieco ja muidomom queninide. <sup>8</sup> Jusiñamui Moisés micorimo jaie lloga uai ebirede; ia Jusiñamui Joreño birui caimo lloga uai baifemo ebirede. <sup>9</sup> Moisés micori rafuedo bu jaia, faificana jaide; ia naie rafue ebirede. Birui ite rafuedo bu jaia, Jusiñamuimona marebaicaide. Ie muidona birui ite rafue jaie ite rafue baifemo ua eo faite. <sup>10</sup> Moisés micori rafue jaie ebirede; ia jaie rafue birui illa jira, Moisés micori rafue jai birui ebinide. <sup>11</sup> Birui ite rafue jaca saifñena jira, ua eo ebirede.

<sup>12</sup> Iena cai uñnuamona, bie rafuena marefodo jaciruiñeno lloticue. <sup>13</sup> ñiroi diga, Moisés micori isoi cue uiecona ibaifñedicue. Naimie micori ie uieco ibaide, ja muidomom ie uieco quenirena feioicaillana comini cioifñellena; ia cue lloga rafuena marefodo llocabiticue. <sup>14</sup> Moisés micori comini Jusiñamui rafuena jaca ñnoñedimaci. Naimiaci comecia jitaifñena jira, ñnoñedimaci. Moisés micori rafuena birui judiua comini facaia, iena nia raise cacaiñedimaci. Dani Cristona ñnuamona, naimiaci comecia raise cacareitimaci. <sup>15</sup> Cristo rafuena birui naimiaci ñnoñena muidona, Moisés micori rafuedo nia jaidimaci. <sup>16</sup> Cai Nama dibeimo bu jaia, naimie comeci raise cacade. Moisés micori rafuedo naimiedi cai jaiñenana raise uñnote. <sup>17</sup> Cai Nama Joreñona lloticue. Cristo dibeimo cai jaia, naimie Joreño caimo jiaie ite. Cristona cai nabaillamona, jeacino anamo jai iñedicai. Moisés micori rafue anamo jai iñedicai. <sup>18</sup> Cristomom jai cai duilla jira, naimiena cai comeciaimona raise uñnuua jira, ie ebirede uaina uñnoticai. Acaranimo cai eruailamona, cai abina ciodicai. Ie isoide. Cai illamona jaie comini Cristona uñnotimaci. Cai Nama Joreño caina canuamona, naimie ebirena isoi cai illena, icana jaidicai.

## 4

<sup>1</sup> Jusiñamui cuena duenaillamona, cue comecina ocuiñocaida, Cristo rafuena llocana jaidicue. <sup>2</sup> Meirede rafuena llofueñedicue. Iena bainio llofueñedicue. Jifuanona omoina llofueñedicue. Omoiri iobitallena, Jusiñamui rafuena meidoñedicue. Jusiñamui cuena ciuana cue uñnuamona, naimie rafuena uanaicinsona llofuecabiticue. Cue llofuiana bu raise cacaia, uanaicino cue llofuecabilana uñnote. <sup>3</sup> Faificana jaidinodi cue mare lloga rafuena raise cacaiñedimaci. <sup>4</sup> Taife anamo naimiaci illamona, naimie naimacina cacarefitañede. Cristo uai ebirede. Jusiñamui isoi naimie ite. Taifei Cristo rafuena naimiaci raise uñnuana jitaifñede. <sup>5</sup> Cue finoca rafuena llofueñedicue; ia Jesucristodi cai Namanana llofuecabiticue. Naimie dibeimo cue maijamona, omoina canollena, naimie rafuena llofuecabiticue. <sup>6</sup> Enirue finua facaie Jusiñamui llote: “Jitiredino nana eniruemom iñellena, useredino mai ite”. Naimiena cue nia uñnoñena, jeacino anamo cue illamona, cue comeci jitiredinomo ite isoide. Naimiena cuena naimie jai uñnotaja jira, cue comeci useredinomom jai ite isoide. Jesucristo monamo illanona jaie cue ciuanona, Jusiñamui uai ebirede siñonana llofueticue.

### *Cai comecia ocuiñocaida ñnocana jaidicai*

<sup>7</sup> Enirue ie imuicimona comuidicue; ia Cristo ie mare ebirede rafue cuemom jai ite. Iemona cue lloga rafue cuemona iñenana uñnotomom; ia ie uai siñonana illamona, Jusiñamui illana uñnotomom. <sup>8</sup> Bie mare rafue cue llofuiamona, navui duere sefuidicue; ia nia llofuecana jaidicue. Iena sefuiruiñedicue. Naga cuemom suide rafuemom raise cacarefñeno comecina ocuiñocana jaidicue. <sup>9</sup> Damierie cuena duere finodimaci; ia Jusiñamui cuena faionocaiñeno cuena canode. <sup>10</sup> Eniruemom jaie Jesús ia, duere sefuillamona, ja muidomom fioidate. Jesús isoi duere sefuicana cue jaia, naimemona niadedi nagarui fioidaiticue. Iemona cuena naimie jillotaja muidona, Jesús siño uaina uñnocana jaidicue. <sup>11</sup> Jesús rafuena cue llua muidona, nagarui damierie cuena meineiacade. Iemona cue jillocabilla jira, Jesús siño uaina uñnotomom. <sup>12</sup> Naimie rafue cue llua muidona, cuena meineiacadimaci; ia bie rafuena omom ñnuamona, Jusiñamui illanomo jaca iitomom. <sup>13</sup> Jusiñamui facaina lloraima jaie cuela: “Cue ñnuua jira, iena llofueticue”. Naimie isoi cue ñnuua jira, bie rafuena jiaie llofuecabiticue. <sup>14</sup> Jesús fioidaillamona Jusiñamui naimie jaie jillotate. Iena cue uñnuamona, cai fioidaille mei, caina jiaie jillotaite. Jesúmo cai duilla jira, naimie illanomom danomom caina ñco itataite. <sup>15</sup> Omom facaina nana cue rafue finodicue. Cristo rafuena comini uñnollena, duere sefuidicue. Iemona Jusiñamui naimiacina duenaillana uñnotimaci. Jusiñamui dibeimo naimiaci illamona, naimiemom iobillacinsona fecacabitimaci. Ieri naimiena iobitaitimaci. <sup>16</sup> Ie jira iena sefuiruiñedicue. Cue mairici fuicana nagarui jaide; ia cue comeci nagarui ñnocana



ocuiricana jaidicue. <sup>17</sup> Birui duere sefuidicue; ia iemo cue comecina eo facañedicue. Cristo rafue muidona birui duere cue sefuiá, Jusiñamui illanomo ico cue ia, nainomo ebire marena iiticue. Iemo cue comecina eo facadicue. <sup>18</sup> Cuemo birui suide rafuemo comecina eo facañedicue. Jusiñamui illanomo cue nia cioñena rafuemo comecina eo facadicue. Bene ite rafue fuite; ia monamo ite rafue jaca fuiñeite. Bene cue duere sefuillacino fuite; ia nainomo cue Nama diga icire jaca iiticue.

## 5

<sup>1</sup> Caimo ite abi rifaillemona, Jusiñamui illanomo cai illemona, Jusiñamui jiaie isoide abi caimo itataite. Nainomo nai abi jaca rifañeite. <sup>2</sup> Birui cue duere sefuillamona, Jusiñamui cuemo ico itatalle abina eo oiadicue. <sup>3</sup> Cue fiodailla mei, Jusiñamui cue joreñomo jiaie isoide abina itataite. <sup>4</sup> Cue jiaie isoide abi cuemo illena, cue jamai fiodaiaicañedicue; ia iena eo oiadicue. Jusiñamui cuemo jiaie isoide itataiacade abina eo oiadicue. Cue fiodailla abi ifomo jaca ille abina cuemo iite. <sup>5</sup> Jusiñamuidi ie Joreño caimo itatajamona, cai abiana iese jiaí itatajana uiñoticaí. <sup>6</sup> Iena cue uiñuamona, nie isoide rafue ia, ñnocana jaca jaidicue. Nia cue fiodañenia, cai Nama illa ecimo nia iñedicue. <sup>7</sup> Naimiena birui cioñedicue; ia naimiena ñnocana jaidicue. <sup>8</sup> Iese jaidicue. Cue Nama diga cue illena, fiodaiaicadicue; <sup>9</sup> iadedi nia cue fiodañenia, naimiena jaca iobitaiadicue. Cue fiodaia, naimiena jiaí jaca iobitaiadicue. <sup>10</sup> Naimie llua jira, Cristo uicomo ico nana iiticaí. Cai bene finoca rafuena uiñotaita. Marañede rafuena cai bene finua diese, naimiemona ibana feiñoñeíticaí. Mare rafuena cai bene finua diese, naimiemona ibana feiñoiticaí. Ie muidona naimie jitaillacinona jaca finoadicue.

### *Jusiñamui diga cai uri illafue*

<sup>11</sup> Cue Nama uicomo ico cue illemona, iena cue jaciruillamona, naimie dibeimo cominina jai itatacana jaidicue. Jusiñamui cue illana raise uiñote. Cue illana raise omoi uiñuana jitaicadicue. <sup>12</sup> “Cuedi maremedicue” lloñedicue; ia cue abi facaina omoi riidollena, bie rafuena lloticue. Omoi motomo damerie llofueraini naimaci llofuaiacino diga abina iedotimaci; ia naimaci comeciáimo iticino diga abina iedoñedimaci. <sup>13</sup> “Naimiedi uairico” cuena raitimaci. Iese cue iticuedena, Jusiñamui facaina iese iticue; ie iadedi uairicoñedicue. Omoína llofuellena, omoi facaina maijadicue. <sup>14</sup> Nie isoidicuenta, Cristo cuena isiruillana cue uiñuamona, jaca llofueiacadicue. Nana comini facaina damie fiodaillana jai ñnoticue. Naimaci jeacino iefomo naimie jai fiodaite. <sup>15</sup> Nana cai facaina naimie fiodaite. Fiodaillamona Jusiñamui naimiena jai jilloitate. Naimiena nia cai ñnoñenia, dani cai comeciáimo ite rafue diga iobidicaci; ia naimiena jai cai ñnua mei, dani cai comeciáimona naimiena cai iobitajana naimie jitaie. Ie jira cue illana jai uiñotomoi.

<sup>16</sup> Damerie llofuerainidi jianomero eruaillamona, naimaci comeciáina facajamona: “Naimaci mare” raitimaci. Jiaicaíño: “Naimaci marañede” raitimaci; iadedi Cristona cue ñnua facaiseimona iese cominimo eruañedicue. Naimiena nia cue ñnoñenia, Cristona jiaie raise uiñoñedicue. “Naimiedi jamai ñma” raillamo comecina facadicue; ia iese naimiemo birui comecina facañedicue. <sup>17</sup> Cristona cai ñnua mei, naimiemo jai cai duillamona, cai comeciáí uaina meidoticaí. Jai jiaie isoidicaí. Jiaie rafuedo jai jaidicaí. Jiaie caimo ite rafuedo jai jaiñedicaí. <sup>18</sup> Jusiñamui cai comeciáí uaina meidotade. Cristo fiodaillamona, Jusiñamui dibeimo caina itatate. Iemona naimiena jai nabairedicaí. Naimacimo ie rafuena llollena, cuena fetode, jiaie cominina ie dibeimo itatallena. <sup>19</sup> Cristo finoca rafue muidona, Jusiñamui ñnena cominina nabaiacade. Naimaci jeacino facaina ibana jai oiacañede. Bie rafuena llollena, cuena jai fetode. <sup>20</sup> Cristo cuena oretajamona, naimie facaina llofuecabiticue. Cue llogacinomona Jusiñamui uiñotomoi. Omoimona naimiena bu nia ñnoñenia, Cristo facaina cue illa jira, Jusiñamuina omoi nabaiillanona, naimie diga uri i. <sup>21</sup> Cristo jeacino jaca ñnoñede; ia cai jeacino facaina, Jusiñamui jitailla jira, jeacino ñnodimie isoi jaiide. Naimiemo cai duillamona, Jusiñamui jitailla isoi, jai marebicaidicaí.

## 6

<sup>1</sup> Bie rafuena nia lliacadicue. Jusiñamui facaina cai maijiamona, naimie dibeimo cominina itataticai. Naimie caina duenaillana uiñoticue. Iena omoi ñnocana jaillana jitaicadicue. <sup>2</sup> Jiaie Jusiñamui cuetatate:

Cue jitailla facaise omoi jitaillacinona jai cacadicue.  
Omoi jilloillena, omoína jai canodicue.

Ero, Jusiñamui birui omoína cacaacade. Birui omoína canuanona, omoína jillotaicade. Ie muidona naimiena ñnocana jai. <sup>3</sup> Bie rafuena omoi ñnoñellena, cue llofuaiacinona omoi jamañellena, bu diga rafuena comuitaiacañedicue. <sup>4</sup> Jusiñamui dibeimo cue maijiamona, nie isoide rafuemono ramo cue jiria, cue illamona naimiedi: “Mare” cuena raillana

jitaídícué. Eo duere sefuidícué. Diga icaíño damierie cuena duere finodímáci. Diga icaíño ramo jiridícué. <sup>5</sup> Damierie cuena fatímáci. Cárcelmo cuena jonetímáci. Naimáci illanuáimona cuena riire dotadímáci. Eo cue maijía jira, diga icaíño eo raise iníñedícué. Aime guisoidícué. <sup>6</sup> Jearede rafuena eburíñedícué. Cristo rafuena uíñocana jaidícué. Iciríñedícué. Jiainona canocabidícué. Jusiñámui Joreño anamo itícué. Comínina raise isirúitícué. <sup>7</sup> Uanaicínona llocabítícué. Jusiñámui uai cuemo illamona, llofuecabítícué. Cue comecina riídollena, Taífena emodófillena, Jusiñámui jitailla isoi, marecínona finocana jaidícué. <sup>8</sup> Damierie cuena marena jai ñaitímáci. Jiaino cuena jeare nia ñaitímáci. Damierie cueri jai lobidímáci. Jiaino cue joreñoña jai ñaitímáci. Damierie: “Caina jifuetío” cuena raitímáci; ia nia uanaicínona llocabítícué. <sup>9</sup> Damierie: “Jamái bue isoidío” cuena raitímáci; ia jiaino cuena raise uíñuamona, naimáci dinena jamái bue isoiñedícué. Nagarui niadedí fodaicabítícué; ia nia itícué. Duere sefuicana jaidícué; ia Jusiñámui cue comecina ocuñotacana nia jaidícué. <sup>10</sup> Sunaitícué; ia iocire jaca itícué. Dueredícué; ia ailluena comíní comeciána eo caimaretadícué. Buenidícué; ia Jusiñámui mona ailluena marecínona feñotícué. Iese jaca jaidícué. Cue illamona: “Naimíedi mare” cuena omoí raillana jitaídícué.

<sup>11</sup> Corintomo itino, cue nabaiñíai, cue comecimo ite rafuena marefodo jai llotícué. Cue comecimona omoí diga marena iacadícué. <sup>12</sup> Cuemona omoína raise isirúitícué; ia omoí dinena nia cuena eo isirúíñedomoí. <sup>13</sup> Cue uruíaí omoí isoilla jira, omoí diga ñaitícué. Omoína cue isirúilla isoi, cuena omoí isirui.

*Jusiñámui cai comeciáimo illanodícai*

<sup>14</sup> Creyentedímimo jearede ramo faitatai raillano, daje isoide rafuedo iaímaiaí jaiñena jira, daje isoi rafuena iaímaiaí comeci lloíñena jira, creyente creyenteñedímie diga daje rana namatañena. Aina illena, creyentena íñediñaiñona creyentedímie oñena. Íñina illena, creyentena íñedímiena creyentedíñaiño oñena. Marecínodo jaiacadímiedi marañedícinodo jaiacadímie daje isoi diga nabairínide. Jusiñamuina uanaicínona uíñotímiedi useredínomo jai ite isoide. Jeacino anamo nia ítimie jítiredínomo nia ite isoide. Cristo rafuena naimie uíñoñede; ia Cristo rafuena omoí uíñuamona, useredínomo jai itomoí isoidomoí. <sup>15</sup> Cristodí Taífe diga jaca nabairínide. Creyentemiedi creyenteñedímie diga daje isoi inide. Daje isoi comecina facañede. <sup>16</sup> Creyenteñedímiedi Jusiñamuina sedañede; ia jiraráina sedade. Creyente comecimo Jusiñámui illamona, Jusiñamuina sedade. Nana creyentíaí comeciáimo Jusiñámui ite. Iena jaíe Jusiñámui llote: Comíní motomo íitícué.

Naimacina nabaitícué.

Naimáci Jusiñámui nitícué. Cue comíní nitímáci.

<sup>17</sup> Ie muidóna cuena íñoñedíno diga daje rana namatañeno.

Naimáci jearede jetaca rafuena abímo oñeno.

Iemona omoína raise feñotícué.

<sup>18</sup> Omoí Moona íitícué. Cue uruíaína jaitomoí.

Siño jítodícué.

## 7

<sup>1</sup> Cue isiruíganodomóí. Bie llogacino Jusiñámui cáimo jai llua jira, naga marañede rafuena fainonocáida, cai jailla. Naga cai comeciána jearetade rafuena fainonocáida, maí cai jailla. Jusiñamuina cai jaciruillamona, nana naimie jitaillacínona finocana maí cai jailla.

*Pablo cartamo cuegacino díese finodímáci*

<sup>2</sup> Omoí comeciáimona cuena raise feñío. Buna jeare fínoñedícué. Buna jifueñedícué. <sup>3</sup> Marañede rafuena jai omoí finuana lloñedícué. Omoímo cue comecina nagarui facadícué. Iena aillí llotícué. Nia cue ia, raire cue fiodaia, omoína jaca ubiñocabítícué. <sup>4</sup> Cue llucínona omoí íñuana raise uíñotícué. Omoí lobidícué. Omoí diga jai urí itícué. Duere sefuidícué; ia iocire itícué.

<sup>5</sup> Macedoníamo navuí cue jaidícuemo, cue comeci urí íñede. Cue díbeimo íñedinomona nagarui duere sefuillamona, cue comeci jarire ite. Cristo díbeimona creyentíaína naimáci ítatállemo cue comeci jarire ite. <sup>6</sup> Comeciána ocuñedínona Jusiñámui ocuñotacabilla isoi, Tito billamona, Jusiñámui cue comecina ocuñotade. <sup>7</sup> Cue díne naimie ría, iocire itícué. Omoímo ite rafue cue cacajamona, jiaí iocire itícué. Cuena omoí cioacanana llote. Cue comeci jarire íllarí sunaitomoí. Cuena riídoiacadomoí. Iena cue cacajanona, iocire itícué. <sup>8</sup> Carta omoí díne navuí oredícué. Iena omoí feíñua meí, sunaitomoí; ia iena cue oretajari biruí sunañedícué. Navuí íerí sunaitícué; ia iena omoí feíñua meí, íemona dallu omoí sunailla jira, jai iocire itícué. <sup>9</sup> Omoí sunaillana jitaíñedícué; ia íemona Jusiñámui díbeimo omoí comeci íuai omoí meídua jira, iocire itícué. Cue cuega carta muidóna íciríñedomoí;

ia Jusiñamui jitailla isoi sunaitomoi. <sup>10</sup> Jusiñamui jitailla isoi, ie jeacino facaina bu sunailamona ie comeci uai Jusiñamui dibeimo meidoia, sunaiñede; ia bu jamai sunaillamona ie comeci uai Jusiñamui dibeimo meidoñenia, faifite. Jusiñamui diga jaca iñeite. <sup>11</sup> Jusiñamui jitailla isoi omoi sunaillamona, omoi comeciaina raise finodomo. Maraiñede rafue dibeimo iacaiñedomoi. Iena eo jitañedomoi. Jusiñamui duere sefuitallicino anamo iacaiñedomoi. Cueno dane cioacadomoi. Jusiñamui jitaillacinona eo finoacadomoi. Jusiñamui dibeimo naimie illena, maraiñede rafuena finodimienna duere finodomo. Nana bie rafuena raise fuidodomo. <sup>12</sup> Carta navui omoi dine cue oretai, maraiñede rafuena finodimiemo cue comeciina eo facañedicue. Naimiemono duere sefuidimiemo cue comeciina eo facañedicue. Cueno omoi comeciaina facajana omoi uifollena, navui cueticue. Jusiñamui iena uifote. <sup>13</sup> Ie jira cue comeciina ocuifoticue. Tito jiai iocire illa jira, dane iobidicue. Naimie comeciina caimare omoi itataja jira, iobidicue. <sup>14</sup> Omoi dine Tito nia jaiñenia, naimiemo omoina lloticue. “Naimaci ona feiñoitimaci. Naimaciri iobidicue” naimiemo navui lloticue. Iese naimiema omoi feiñua jira, ieri meidaiñedicue. Omoimo uanaicinsona jaca lloticue. Naimiemo cue llua isoi jiai suide. <sup>15</sup> Naimie llofuicacino omoi inoiacana jira, naimie omoina birui raise isiruite. Meiruiocaida, comeciari jarire illamona, naimiema feiñotomoi. <sup>16</sup> Omoina raise uifoticue. Cristo inocana omoi jaillana raise inoticue. Omoiri iocire iticue.

## 8

### *Creyentiai Jusiñamuimo ucubena fecaja rafue*

<sup>1</sup> Cue amatai, omoimo jiaie rafuena lloiacadicue. Jusiñamui naimacina canuamona Macedoniamoi ite creyentiaina omoi uifuanu jitaidicue. <sup>2</sup> Eo duere sefuidimaci. Jiai eo dueredimaci; ia iocire illamona, jiaie creyentiaimo ucubena caidiñeno fecacabidimaci. <sup>3</sup> Naimacimo ite ucube diese fecadimaci. Iena uifoticue. Naimaci jitailla jira, naie baifemo fecadimaci. Naimacimo iese fecajana jaca lloñedicue. <sup>4</sup> Naimacimo iese lloñedicue; ia iena naimaci eo fecaacana jira, jiaie creyentiaina canollena, cuemo iena eo jicantimaci. Ucube diga jiaio creyentiaina naimaci canuana cue llua eo jitaidimaci. <sup>5</sup> Cue comeciina facaja isoi, fecañedicue. Ucubena fecadimaci; ia: “Cai Nama dibeimo maijiacadi?” jiai llotimaci. Nie isoide rafuena naimaci finuana cue ocuillena, Jusiñamui jitailla isoi, jitaidimaci. <sup>6</sup> Omoi dine Tito dane jaillana jitaidicue. Omoi dine naimie navui ia, ucube omoi uana naimie canode. Iemona janore tainedomoi. Jiaie creyentiaina omoi canuana raise fuiduana jitaidicue. <sup>7</sup> Cristona inocana jaidomoi. Iena jiaionomo llocabitomoi. Cristo rafuena raise uifotomoi. Cristo jitaillacinona eo finocana jaidomoi. Cueno jiai isiruitomoi. Ie muidona omoi ucube diga, jiaie creyentiaina omoi raise canuana jiai jitaidicue. <sup>8</sup> Omoina iese riire lloñedicue. Macedoniamoi ite creyentiaina eo canuana omoi uifuanu, jiai creyentiaina omoi canoia, Cristona omoi isiruillana uifotitaci. <sup>9</sup> Cai Nama Jesucristomona cai fueua. Naimie cana duenaillana uifotomoi. Ie Moo ecimo naimie nano illamona, naga ra naimiemo ite; ia enruemo ite billamona, cana canollena, imana jaillanona, duere ite. Iemona Jusiñamui rafuena cai cacaja jira, duere iñedici. <sup>10</sup> Ie jira omoimo bie rafuena lloiacadicue. Navuidi año ucube eenuana tainedomoi. Iena finoacadomoi. Ie fuiduana jai jitaidicue. <sup>11</sup> Omoi jitaillamona bie rafuena fuido. Omoimo ite ucube diese feca. <sup>12</sup> Ailluena ucubena omoimo iñenia, dama iesede. Omoi jitailla jira, omoimo ite ucube diese omoi fecai, Jusiñamuimona mare; <sup>13</sup> ia omoi jitailla rana omoi ollena, omoi ucube iñeni raillano, omoi jitailla baifemo omoi fecajana lloñedicue. <sup>14</sup> Jiaie creyentiaimo ra birui raise iñenia jira, naimacina omoi canuana jitaidicue. Omoi ra ico iñenia, naimaci dinena omoina canuana jitaidicue, nana omoimo daje isoi omoi ra illena. <sup>15</sup> Moisés micori illa facaise ite cominimona cai fueua. Naimacina jai iese cuega: “Jusiñamui oretaga guiga ramona ailluena guillena, nagarui damierie iraiuidimaci. Jiaio janore guillena, iraiuidimaci; ia coniniri fecajamona, imaci jitailla diese nagarui nana guitimaci”. Ie muidona omoimo ite ucubemona naimaci jitailla ra illena, jiaie creyentiaimo omoi fecajana jitaidicue.

### *Pablo Titona ñaite*

<sup>16</sup> Omoi dine Tito dane oretaiacadicue. Cue isoi naimie omoimo comeciina facade. Omoina canoacade. Naimie comeciina Jusiñamui iese itataja jira, Jusiñamuri iobidicue. <sup>17</sup> Omoi dine jaillena naimiemo lloticuemo, naimie dinena: “Jee” raite. Naimiemo nia iese cue lloñenia, omoina naimie eo canoiacana jira, naimie omoi dine jaillamo ite comeciina facade. Omoi dine raire jaite. <sup>18</sup> Naimie diga jiaimie oretaiticue. Naga nairaimo ite creyentiaidi: “Cristo rafuena eo raise llofuecabite” naimiema raitimaci. <sup>19</sup> Cue diga jaillena, naimiema fetodimaci. Dueredonomo omoi ucubena cue uillena, cue diga naimie jaite. Iemona cai Namana iobititaci. Iemona nana creyentiaidi naimacina cue canuana uifotimaci. <sup>20</sup> Omoi ucubena raise cue sedajana jitaidicue. Iemona: “Pablo cai ucube fiide” omoi llua jitañedicue. “Iena Pablo raise fecañede” omoi llua jitañedicue. <sup>21</sup> Iena

raise marena sedaacadieue. Jusiñamui iena uifnote. Nana creyentiaí iena uifnuana jiaí jitaídíeue. <sup>22</sup> Iaimaiaí diga jiaimiena jiaí oretaitíeue. Naimie Cristona eo inócana jaillana raise uifnotíeue. Omoí rafuena naimie fidiano, jiaie creyentiaína omoí canuana naimie inuanona, omoí dine naimie eo jaiacade. <sup>23</sup> Omoímo Titona bu jicanoía, naimacimo naimiena raise llono. Danomo Cristo díbeimo maijídíeue. Cue diga omoína canode. Jiaie iaimaiaína bu jicanoía: “Jiaie creyentiaí iaimaiaína fetuamona bitiaímaiaí” llono. Cristona iobitaiacadiaímaiaí. <sup>24</sup> Cuena omoí isiruillamona: “Omoí mare” omoína cue lluamona, naimacina raise nafue. Nana cue jitailla rafuena omoí finuana naimaci uifnuana jitaídíeue. Omoí ucubena eenuana raise fuiduana jitaídíeue. Iena omoí finuamona, abído naimacia, naimacina oretaga creyentiaímo iena lloítimaci.

## 9

*Jiaie creyentiaína canollena, omoí ucube olle rafue*

<sup>1</sup> Bie rafuena omoí jai uifnuana jira, iena dane lloíeítíeue. <sup>2</sup> Ucubena omoí jai fecacana uifnotíeue. “Benomo Macedoniamó ite creyentiaímo omoíri iobídíeue” llocabítíeue. “Navuidí añomona fecacadomó” llocabítíeue. “Acaya railla provinciamó ite creyentiaí fecacadimaci” llocabítíeue. Iese omoí illamona, bene ite creyentiaí jiaíno creyentiaína jiaí canoacadimaci. <sup>3</sup> Iese uifnotíeue; ia omoína cue canollena Titona oretaitíeue, cue jitaillacino omoí raise fuidollena. Ucubena dajena uana raíre jitaídíeue. <sup>4</sup> Omoí dine Macedoniamó ite creyentiaí diga cue rillanona, omoí ucube dajena nia íñenia, íese omoína cue lluaconi meidaitíeue. Omoí dí jiaí meidaitomó. <sup>5</sup> Ie muidona Títo idai jaillana jitaídíeue. Ucube dajena uana omoí llua ísoi, omoína canoíte. Omoí ucube dajena uana lloiacafíedíeue; ia omoí comeciamona jiaíno creyentiaína canuana omoí jitailla jira, iena jitaídíeue. <sup>6</sup> Jiaie rafuedo iena lloítíeue. Janore iduaina bu ría, janore lloíllana oíte. Ailluena iduaina bu ría, ailluena lloíllana oíte. Cue llua jira, omoí ucube dajena oía, eo caímare íñeítomó; ia omoí comeciaí jitaillamona omoí ucubena dajena oía, eo caímataítomó. <sup>7</sup> Ucube dajena omoí oía, nagamie íe comecina facajamona fecaja. Naimie jitaíñenia fecañena. Naimie jitailla jira, naimie fecaja. Jiaímie omoína ñaí raillano. “Cai ucubena fecaitiaí” raíñeno; ia o jitaillamona iena feca. Comeciaí íocíre illamona omoí fecaja, Jusiñamuina iobitadomó. Iena Jusiñamui jitaide. <sup>8</sup> Jusiñamui omoí jitailla baífemo omoímo fecarede. Nana omoí jitailla ra omoímo naimie illamona, jiaíno omoí fecaja, naimacina canorenitomó. <sup>9</sup> Jusiñamui facaina lloraíma micorí iena jae cüega: “Jusiñamuina inotímie dueredinona canocabide. Mare rafuena finócana jaide”. Ie omoí finollemo, Jusiñamui omoína canoíte. <sup>10-11</sup> Ero, illimo maijiraínimo Jusiñamui iduaina ítatate. Iena sicuamona, monaillamona, nainomo maijiraínidí naíemona guicabite. Ie ísoide. Omoímo Jusiñamui nana omoí jitailla rana jaca ítaítaite. Iemona jiaie creyentiaína raise canorenitomó. Omoí ucubena cai uía, iena jiaí creyentiaí feiñoía, Jusiñamuimo iobillacinona eo fecaitimaci. <sup>12</sup> Ucubena omoí oretaña, dueredo creyentiaína canodomó. Omoí muidona naimaci Jusiñamuimo iobillacinona jiaí fecadimaci. <sup>13</sup> Iemona Cristona omoí raise inuana uifnotíeue. Ieri Jusiñamuimo iobillacinona fecaitimaci. Omoí iga ucube facaina iobillacinona Jusiñamuimo fecaitimaci. Naimacina canoítomó. Iemona nana jiaie creyentiaína canoítomó. <sup>14</sup> Omoí facaina Jusiñamuimo jiaíitimaci. Omoína naimaci isiruillamona, Jusiñamui omoína eo canuana naimaci uifnuamona, omoí facaina jiaíitimaci. <sup>15</sup> Jusiñamui caína eo canua jira, iobillacinona naimíemo cai fecallena, cai uai raise íñede. Uainicaídíeue. Naimie eo mare. Naimiena cai iobillasa.

## 10

*Cai Nama Pablona fetua jira, íe uai Pablomo íte*

<sup>1</sup> Jiaie rafuena lloiacadíeue. Omoímona damíerie lloítimaci: “Cai díne Pablo ía, naimíedí caína jacírúite. Ríire caímo naimie rafuena lloíñede; ía cai díne naimie íñenia, ríire caímo naimie rafuena llote” lloítimaci. Ero, Cristo ícírícabíñena ísoi íacadíeue. Naimie ísoi omoímo lloiacadíeue. <sup>2</sup> Ríire omoímo lloiacafíedíeue. Omoímona damíerie cuena raitimaci: “Pablodí Cristona inoíñedímie ísoi ícabíte”. Naimaci íese nia lloía, omoí díne cue ría, naimacimo jacírúíñeno ríire lloítíeue. <sup>3</sup> Comena ítíeue; ía comíní diga cue rafue íñede. <sup>4</sup> Taífe díbeimo ítíno diga cue rafue ílla jira, jamái cue uai diga naimacina llícaítaíeítíeue; ía Jusiñamui uai diga naimacina llícaítaítíeue. <sup>5</sup> Cristo uai diga Jusiñamui díbeimo íñedíno llucinoconi uaincaítíeue. Abína íedotimaci; ía Jusiñamuina uifnoiacafíedínona uaincaítíeue. Naimaci comeciaína facajacinona uaincaítíeue, naimacina Cristo rafuena cue inotallena. <sup>6</sup> Cristo anamo omoí raise ía, cue lloga uaina omoí raise inócana jaía, omoímona raise inoíñedínona duere fínotíeue. <sup>7</sup> Comínímo jamái eruáíllamona: “Naimaci mare” raitomó. Jiaícaíño: “Naimaci maraíñedimaci” raitomó; ía naimaci

comeciaina uiñoñedomoi. Omoimona damie nibai comecina facade: “Cristomona cue uai illamona, Pablo baifemo faiticue”. Cue dinena raiticue: “Cristomona cue uai illamona, daje isoidicoco. Cue baifemo naimie faifede”.<sup>8</sup> Abina iedoñedicue; ia cue abi iedoia, ieri meidañedicue. Cristomona cue uai illa jira, cue uai ite, naimie dibeimo omoi raise itatallena. Omoina cue canollena cue uai ite. Cristo dibeimona omoina itataiacañedicue.<sup>9</sup> Omoimo riire lollena cue uai ite; ia cue carta diga omoina jacinaitaicañedicue. Omoina canoiacadicue.<sup>10</sup> Omoimona damierie cuena raitimaci: “Cartana Pablo cueia, eo riire caimo llot; ia cai motomo naimie ia, ie uai rinide. Cristo rafue raise lluaana raise uiñoñede”.<sup>11</sup> Iese iñedicue. Omoi motomo cue ia, cartana cue cueia, daje isoi llofuecabiticue.<sup>12</sup> Omoimona damierie coniniri raitimaci: “Maredicai”. Iese coniniri naimaci comeciaina facaia, abina uiñoñedimaci. Naimaci isoi cue illemo cue comecina facañedicue.<sup>13</sup> Jusiñamui cue maijana cuemo llot. Naimie llua baifemo jaiñeiticue. Omoi dine ie rafue cue llofuellena, naimie jitaillanona, omoi dine navui jaidicue.<sup>14</sup> Jusiñamui jitailla rafue baifemo jaiñedicue. Cristo rafuena omoi motomo nano llofueraimadicue.<sup>15</sup> Jiaie llofueraini llofuiamona buena oiacañedicue. Cristo rafuena omoi inocana jaillamona, omoi motomo cue illamona, Jusiñamui jitailla diese omoina canoacadicue.<sup>16</sup> Jiaie nairaia illanuaimo Cristo rafuena nia lloiacadicue; ia nainomo jiaie llofueraima llofuiamona buena oiacañedicue.<sup>17</sup> Bu abina iedoianca, cai Nama finua rafueri naimie abina iedua.<sup>18</sup> Ie llofua diga bu abina iedoia, Jusiñamui naimie llofuacinona: “Mare” raiñeite; ia Jusiñamui finoca rafueri bu abina iedoia, Jusiñamui naimiena: “Mare” raite.

## 11

### *Pabloti Cristo oretaganona abi caitadinona llot*

<sup>1</sup> Abina cue raise uiñoñena, cue diga iciriñeno. Cue lluaomo nia cacarei.<sup>2</sup> Omoimo Jusiñamui comecina facaja isoi, omoimo comecina facadicue. Cue muidona Cristo rafuena omoi cacaja jira, Cristona uiñotomoi. Ima diga nia iñediñaiño, ie inina illena, ie jitaillamiemo ie moo fecaja isoi, Cristomo omoina feaacadicue. Omoimo jeacino iñena isoilla jira, omoina Cristomo feaacadicue.<sup>3</sup> Jiaie rafuemo omoi comeciaina facacana omoi jaillamo jacinaiticue. Jiaie jaiona eruailamona, Taife Eva micorina jifue. Jiaie llofueraini Cristo rafuedo omoi raise jaiñenana itatajamo jacinaiticue.<sup>4</sup> Diga llofueraina feiñotomoi. Jesús rafuena jiaiforiedo llofuecabitimaci. Cristo rafuena cue isoi llofuecabiñedimaci. Jusiñamui Joreño omoimo illana cue isoi llofuecabiñedimaci. Cue mare lloga rafue isoi llofuecabiñedimaci; ia naimacina jaca feiñotomoi. Ie jira Cristo dibeimona omoi jaillemo jacinaiticue.<sup>5</sup> “Cristo oretaganodicai” raitimaci; ia naimaci cue baifemo faimo cue comecina facañedicue.<sup>6</sup> Naimaci isoi rafuena jino lluaana eo uiñoñedicue; ia Cristo rafuena eo raise uiñoticue. Nana cue finoca rafuemonona omoina iena diga icaiño uiñotadicue. Uanaicinona omoina jaca llofuecabiticue.<sup>7</sup> Omoimo Jusiñamui rafuena navui cue lloia, omoina ibatañedicue. Omoimona ucubena jicañedicue. Cue ucube ollena, dama jiaie rana maijadicue. Iese cue illa jira, damieriemona marañede rafuena finodicue; ia cuemonona eo mare rafuena jai uiñotomoi. Iemona abina jai uiñotomoi.<sup>8</sup> Omoina cue canollena, jiaie creyentiamona ucubena feiñoticue. Omoi facaina naimacimona feiñoticue.<sup>9</sup> Rana cue jitailla facaise omoimona ucubena jicañedicue; ia Macedoniamona bite creyentia cuena canodimaci. Omoimona navui ucubena cue ofena jira, birui cue ofena jira, cuemonona ibana ofeitomoi.<sup>10</sup> Cristo cue illana uiñuamona, naimie uanaicinodo cue jaillamona, nana Acaya railla provinciamona iena jaca lloiticue.<sup>11</sup> Omoina cue isiruilla jira, ucubena omoina jicañeiticue. Jusiñamui cue comecina raise uiñote.<sup>12</sup> Abina ieduaomona omoi motomo damierie: “Pablo isoi llofueticai” raitimaci. Ucubena omoimona feiñotimaci. Naimaci isoi iacañedicue. “Daje isoi maijidicai” naimaci raiñellena, ucubena omoimo jaca jicañeiticue.<sup>13</sup> Cristo oretaganona abi caitadinodimaci. Cristo dibeimo raise maijiedimaci. “Cristo caina oretate” raicabitimaci; ia Cristo naimacina oretañede. Jifuecana jaidimaci. Cristo oretaganona itamacina jaidimaci.<sup>14</sup> Ieri rajicaiñedicue. Cominina jifuellena, Taifedi Jusiñamui jaienicina abi caitadimienna jaicabide.<sup>15</sup> Taife dibeimo itinodi Jusiñamui ie mare rafuena llofueraina jaicabidimaci. “Cai lloga rafuedo omoi jiaia, Jusiñamuimona marebicaitomoi” llofuecabitimaci. Naimaci finolle rafue diese Jusiñamuimona duere sefuitimaci.

### *Cristo oretagamiena naimie illa jira, Pablo duere sefuide*

<sup>16</sup> “Pablo abina uiñoñedimie” raillamo omoi comeciaina facañeno; ia iese cuena omoi comeciaina facaia, cue lluaomo nia cacarei. Omoi motomo ite llofueraini abina iedua isoi, iacañedicue; ia janore cuemo iticino diga abina iedoticue.<sup>17</sup> Abina ieduaomona cue lloia, cai Nama Cristo isoi lloñeiticue. Naimie cuemo llua jira, iena lloñeiticue; ia abina uiñoñedimie isoi lloiticue.<sup>18</sup> Omoi dine damierie llofueraini naimaci illa diga abina

iedua isoi lloiticue. <sup>19</sup> Abina uiñoñedimaci; ia: “Abina eo raise uiñoñotica!” omoi llua-mona, naimaci llofuaiacina cacacabidomoi. <sup>20</sup> Naimaci anamo omoina itataiacadimaci. Omoimo ucubena jicacabidimaci. Omoina ocuicabidimaci. Icirillamona, omoi uiecuaina bofedimaci. Iese omoina finocabidimaci; iadedi buena naimacimo finoñedomoi. Išana oñedomoi. <sup>21</sup> Iese omoimo finoñedicue, omoina cue jaciruilla jira.

Cue illana omoimo ja lloiticue. Nibai abina raise uiñoñedicue; ia naie llofueraini isoi cue illa diga abina iedoiticue. <sup>22</sup> Omoi motomo ite damierie llofuerainina ja lloiticue. Judíuai uaido ñaitimaci. Iena jiai ñaiticue. Judíuai nairai imaci. Daje isoidicue. Judíuai nairai imiedicue. Abraham micori uruaidimaci. Jiai naimie micori uruedicue. <sup>23</sup> “Cristo dibeimo maijidica!” raitimaci. Abina uiñoñedimie isoi lloiticue; ia naimaci baifemo Cristo dibeimo maijidicue. Naimaci baifemo duere sefuidicue. Diga icaíño cárcelmoo iticue. Diga icaíño fajamona duere sefuidicue. Diga icaíño niadedi fiodaicabiticue. <sup>24</sup> Judíuai comini cinco digacaiño cuena fatimaci. Naga icaíño treinta y nueve digacaiño rao diga cuena jicuidimaci. <sup>25</sup> Dacaiño amani radosi diga cuena fatimaci. Nofici diga cuena dacaiño fairinotimaci. Dacaiño amani bote diga namo anabaiticue. Darui naio monaillaimo botedo jamai furi baiticue. <sup>26</sup> Eo jacirede illedo jaicabidicue. Firiruidino eo illa jira, jaciruioicaida jaicabidicue. Cue judíuai cominimona duere sefuicabidicue. Judíuaiñedinomona duere sefuicabidicue. Naimaci illanuaimo cue ia, diga icaíño duere sefuicabidicue. Naisodo cue macaria, duere sefuicabidicue. Monailaido cue jaija, duere sefuicabidicue. Cristo rafuena llorainina abi caitadinomona jiai duere sefuicabidicue. <sup>27</sup> Cue ucube ollena, duere maijicabidicue. Diga icaíño raise iniñedicue. Diga icaíño aime guiticue. Rollimemona duere sefuicabidicue. Iniroinamona jiai duere sefuidicue. <sup>28</sup> Diga jiaie rafuemona duere sefuicabidicue. Duenailamona naga creyentiaí illanuaimo cue comecina nagarui eo facadicue. Iemo nagarui cue comecina cue facaia, duere sefuicabidicue. <sup>29</sup> Nie creyente Cristo rafuedo nia raise inoñenia, naimiemo cue comecina eo facadicue. Nie creyentena jiaimie jeacino finotia, naimiemo cue comecina facadicue. <sup>30</sup> Cue abina iedoiacania, jamai bue isoidimiedicuena lloiacadicue. <sup>31</sup> Cai Nama Jesús Moona Jusíñamui illanona, Jusíñamuimo jaca cai iobillasa. Naimiedi uanaicinona cue lluaana uiñote. <sup>32</sup> Cue illana nia lloiacadicue. Damasco jaie creyentena cue jailla facaise cuena gaitatallena, Aretas railla illaima anamo ite gobernadori nairai llaiga nasena sedatate; <sup>33</sup> iadedi llaigafu ecimo ite jofo a ite ventanamona cirigai isoide diga ana jaillanona, naiemona jillodicue.

## 12

### *Pablo nicaírilla isoide rafuena ciodo*

<sup>1</sup> Abina iedoiacañedicue; ia cue illana janore nia lloiticue. Iemona bue oñeiticue; ia cue illa abina riidoiacadicue. Cristo cuemo acataga rafuena lloiacadicue. Cristo cuemo jai llua rafuena jiai lloiacadicue. <sup>2-3</sup> Cristomo cue duillamona, catorce años jaie illanona, monamo naimie illamona, naimie dine Cristo cuena uite. Nicaírilla isoi cue joreño, cue abi diga, uillana raise uiñoñedicue. Nibai dama cue joreñona uite. Dama Jusíñamui iena uiñote. Naimie mare illanomo iticue. <sup>4</sup> Nainomo cue ñainina rafuena cacadicue. <sup>5</sup> Ie diga abina iedoñeiticue. Cue jamai bue isoidimie diga abina iedoiticue. <sup>6</sup> Uanaicinona cue lluaamona cue abina iedoiacania, tainona abina iedoñeiticue. Omoi cuena ciuamona, cue lloga rafuena omoi cacajamona, cuena uiñotomoi. Ie baifemo cuena omoi comeciaina facajana jitañedicue. <sup>7</sup> Naimie rafuena cuemo acataya jira, bie rafuena cue cacaya jira, ie diga eo abina cue iedoñellena, tagairede ra cuemo illa isoi Jusíñamui cuemo illamona, duere sefuidicue. Taife jaienici cuena duere finua isoi, duere sefuicabidicue. <sup>8</sup> Cuemona iena naimie oni oretallena, cai Namamo dacaiño amani jiidicue; <sup>9</sup> ia cuemo llote: “Ona jillotañeiticue; ia cue ona duenailacinodo jaca ocuiñoitio. O abi eo mairiñenia, ona cue canuana raise uiñoitio” llote. Cue abi eo mairiñenia, ieri iocire iobiticue. Naimie uaido cue jaillamona, cuena naimie canuana raise uiñoiticue. <sup>10</sup> Cristo muidona duere cue sefuia, cue comecina ocuiñoiticue. Cue jamai bue isoia, cuena bu jeare ñaia, bumona duere cue sefuia, cuena bu duere finoia, cue comecina ocuiñoiticue. Cue duere sefuia, cue Nama cuena eo canode.

### *Pablo Corintomo ite creyentiaimo comecina eo facade*

<sup>11</sup> Abina uiñoñedimie isoi iticue. Cue illana cue cuia jira, abina uiñoñedimie isoi iticue; ia iese cuena itatatomoi. Cuena riidoñedomoi; ia jiaimo eo mare railla llofuerainina raise feiñotomoi. Jamai bue isoidicue; ia naimaci cue baifemo fañedimaci. <sup>12</sup> Omoi motomo siño rafuena cue finua jira, Jusíñamui cuena oretajana uiñotomoi. Cristo rafuena sefuiruñeno omoi motomo iticue. <sup>13</sup> Cuemona duere sefuñedomoi. Jiaie creyentiaí omoi baifemo faimo cue comecina facañedicue. Nibai iese omoi comeciaina facadomoi. Omoimo ucubena cue jicañena jira, jiaie creyentiaí isoñedomoi. Iena omoi gaiñenia, iena feita. Cue diga iciriñeno.

<sup>14</sup> Menacaiño navui omoi ðine jaidicue. Omoi ðine dane jaiacadicue. Omoimo ucubena jicañeiticue. Omoi rana jitañedicue; ia Cristo ðibeimo omoi illana, naimiena omoi raise ñnuana jitañedicue. Cue uruiái isoidomoi. Rana eenoñedomoi, omoi mootiaí iena; ia omoi mootiaí rana eenotimaci, omoi ena. Ie isoide. Cue uruiái isoi omoi illamona, omoi mona rana jitañedicue; ia omoimo rafuena iacadicue. <sup>15</sup> Nana cuemo ite ra omoimo fecaacadicue. Nana cue comecimo iticinona omoimo jai iacadicue. Omoína eo isiruiticue; ia cuena janore isiruitomoi. <sup>16</sup> “Caimona ucubena jicañedio; ia jifuecana caimona otio” raicabitomoi. <sup>17</sup> Ero, omoi ðine menamiena cue oretajamona, omoi mona ðnie isoide rana otiaímaiaí? ðÑiese omoína jifuetiaímaiaí? <sup>18</sup> Omoi ðine Titona oretaticue. Jiasie creyente imiena Tito ðiga oretaticue. ðÑiese Tito omoína jifue? Omoimo coco comecina ðaje isoi facadicoco. ðaje rafuedo jaca jaidicoco. Omoína jaca jifueñedicoco. ðÑiese omoi comeciaina raitomoi? <sup>19</sup> “Caimona ie abina riidote” cuemo nibaí comecina facacabidomoi. Jusiñamui cuena uñuamona, Cristomo cue duillamona, bie rafuena lloticue. Cue isiruiganodomoi. Cristo ðibeimo omoi raise illana, naimiena raise omoi ñnollena, bie rafuena llocabiticue. <sup>20</sup> Omoi ðine cue ria, cue jitailla isoi omoi ññenamo jacinaiticue. Iese omoi ia, omoi ðiga cue illana jiaí nibaí gaiñeitomoi. Ieri cue comeci jarire ite. Nibaí nia uaina uaitatomoi. Nibaí nia abina iedotomoi. Nibaí nia iciricabitomoi. Nibaí nia omoi rana caidicabidomoi. Nibaí nia jianona jeare ñaicabitomoi. Nibaí nia jiaino joreña ñaicabitomoi. Nibaí nia abina uradoidomoi. Nibaí ðaje isoi comeciaina nia lloññedomoi. Omoi iese illari cue comecidi jarire ite. <sup>21</sup> Omoi ðine dane cue ria, omoi muidona Jusiñamui cuena meidaitajamo jacinaiticue. Cristo ðibeimo omoi raise ññenia, sunaiticue. Jearede rafuena omoi nia fañonocañenia, omoi aññede riño ðiga illana omoi fañonocañenia, omoi ñññede ñma ðiga illana omoi fañonocañenia, sunaiticue.

## 13

### *Iraicaiño Pablo naimacina llofue*

<sup>1</sup> Menacaiño omoi ðine navui jaidicue. Omoi ðine dane jaiticue. Coninimo omoi rafue ia, iena raise fino. Moisés micori jaie llote: “Mena iaímaiaí ðaje isoi lloillamona, ðaje amani ðaje isoi lloillamona, marañedicinona finodimiena duere finua”. <sup>2</sup> Marañede rafue finodinomo navui riire lloticue. Nana omoimo riire lloticue. Omoi ðine navui cue illa isoi, iena dane riire lloiacadicue. Omoi ðine cue ria, naimaci comeciái iuai nia meidoñenia, naimacina duere finoiticue. <sup>3</sup> Iemona Cristo uai cuemo illana uññoitomoi. Naimiena omoi ñnuamona, naimie uai siñonana uññotomoi. Jamaí uaido naimie omoína jillotañede; ia ie siño uaido omoína jai jillotate. <sup>4</sup> Jamaí bue isoidimie isoi cruzmo naimie fiodaite; ia fiodaillamona Jusiñamui uaido jillode. Cristomo cue duillamona, jamaí bue isoidimienaiticue; ia Jusiñamui uai cuemo illamona, omoimo ite rafuena raise finoiticue. <sup>5</sup> Cristona ñnocana omoi raise jaillamo omoi comeciaina faca. Cristo jitaillacino omoi finollemo comeciaina faca. Cristomo omoi duillamona, Cristo omoi ðiga illana uññoitomoi. Cristomo omoi ðuiñenia, naimie omoi ðiga nia ññede. <sup>6</sup> Cristo omoi ðiga illana omoi uññuamona, Cristo uai cuemo illana jiaí uññoitomoi. <sup>7</sup> Marañedicino omoi finocana jaillana jitañedicue. Jusiñamui iena jñititue. Omoi comeciái iuai omoi meidoñenia, Cristo uai ðiga omoína duere finoacañedicue. Omoi comeciái iuai meiduana jitañedicue; ia Cristo uai ðiga omoína cue duere finoñenia, Cristo uai cuemo illana nibaí uñññeitomoi. <sup>8</sup> Cristomona cue uai illana omoi uññollena, marañedicino omoi finuana jitañedicue. Mare rafuena omoi finocana jaillana jitañedicue. Iena finocana jiaí jaiacadicue. <sup>9</sup> Cristo rafuena ñnocana omoi raise jaia, iobidicue. Omoimo cue riire lloññenia, iobidicue. Cristo jitaillacino eo raise finocana omoi jaillana jñcabidicue. <sup>10</sup> Birui bie rafuena cueticue. Omoi ðine ññedicue; ia bie cartana omoi feññua mei, omoi comeciaina raise finuana jitañedicue. Cai Namamona cue uaina feññotitue. Iedo omoimo riire lloiacañedicue; iadedi iedo naimie ðibeimo omoi raise itataiacadicue. <sup>11</sup> Cue amatiaí, bie carta cuiana jai fuidoacadicue. Marena omoi i. Omoi comeciaina raise fino. Cue lloga rafuemo raise cacarei. Nana omoi creyentiaí comeciái ðaje isoi lloicana jai. Coniniri uri omoi i. Iemona Jusiñamui omoína isiruillana uññoitomoi. Jusiñamui omoína uri itatajana uññoitomoi. <sup>12</sup> Nana creyentiaína eo caimare uaido. <sup>13</sup> Nana cue ðiga ite creyentiaí imaci uaina oredimaci. <sup>14</sup> Cai Nama Jesucristo omoína jaca duenaite. Jusiñamui omoína jaca isiruillamona, coninina omoi isirui. Naimie Joreño omoimo illamona, coninina omoi nabaí. Iese jitañedicue. Mai. Macañbaite. Pablocue.

## GALACIAMO ITE CRISTONA HNOTINOMO PABLO ORETAGA RABE

### *Uaiduacino*

<sup>1-2</sup> Galaciamo ite creyentiaí, omoí dine bie carta oredicue. Pablodicue. ¿Nigacino? ¿Nie isoidomoi? Omoímo cue uai oredicue. Nana cue diga ite creyentiaídi imaci uaina jiaí oredimaci. Jesucristo fetocamedicue. Cai Moo Jusiñamui jiaí fetocacue. Jesucristo fiodail-lamona, Jusiñamuidi naimiena jillotate. Mare rafuena cue llollena, cuena orediaímaiaí. Comini cuena oreñedimaci. Cue lloga uaina cominimona jiaí oñedicue. <sup>3</sup> Cai Moo Jusiñamui, cai Nama Jesucristo diga, omoína jai duenaite. Iena uiñocana mai omoí jai. Omoína uri jai itatataímaiaí. Iena omoí uiñocana mai omoí jai. <sup>4</sup> Cai Moo Jusiñamui jitailla isoi, birui ite maraiñedicinomona cai jilloillena, cai jeacino facaina Cristo fiodaite. <sup>5</sup> Cai Moona jaca cai iobillasa. Iena jitaídicue.

### *Pablo lloga rafuedi jaca dajede*

<sup>6</sup> Jusiñamuina raire omoí fainonocaillari rajjicaídicue. Cristo díbeimo omoí illena, omoína Cristo duenaillamona, Jusiñamui omoína jai uaidote; iadedi omoí jeacinomona omoí jilloillena, jiaíe rafuedo jai jaidomoi. <sup>7</sup> Jiaíe mare rafue jaca iñede; iadedi Cristo rafuena jiaíforiedo llofuiamona dajerie omoí comeciaina uri itañedimaci. <sup>8</sup> Jesucristo rafuena omoímo jaié lloticaí. Jiaíe rafuena lloticaídena, Jusiñamui riicaillafue anamo nia cai illasa. Jusiñamui jaienici jiaíe rafuena llotena, Jusiñamui riicaillafue anamo jiaí naimie illasa. <sup>9</sup> Omoímo jaié iese lloticue. Dane ja lloticue. Cai llua isoi Cristo rafuena omoímo bu lloñenia, Jusiñamui riicaillafue anamo naimie illasa. <sup>10</sup> Comini cueri iobillana jitaíñedicue; iadedi Jusiñamui cueri iobillana jitaídicue. Cominina iobitaícadicuena, Cristo díbeimo nia maijñedicue.

### *Ie oretagamiña jaillena, Cristo Pablona fetua rafue*

<sup>11</sup> Cue amataí, cue lloga rafuena omoí raise uiñuana jitaídicue. Omoí jeacinomona omoí jilluana jaié lloticue. Bie rafuena comini comeciái facajacinomona oñedicue. <sup>12</sup> Cominimona oñedicue. Bu jaca cuena iena llofueñede; iadedi Jesucristo cuena uiñotade. <sup>13</sup> Jesucristona nia cue ñoñenia, cue judíuai einamaci lloga rafuedo cue jaillana jai fididomoi. Cristona ñnotinona jaié eo duere finodicue. Naimacina fuidoacaducue. <sup>14</sup> Cue einamaci jaié llua isoi, Jusiñamuina raise ñnoticue. Naimaci llogacinuaido eo duere cue jailla jira, daje facai cue diga itino baífemo ñnoticue; <sup>15</sup> iadedi nia cue jeiciñenia, Jusiñamui cuena fetode, naimie iena. Cuena duenaillanona, cuena uaidote. <sup>16</sup> Omoí judíuaiñedomoímo naie Jito rafuena cue llollena, cuemo ie Jitona jaié bairetate. Naie facaise cuemo jai suide rafuena bu diga ñañedicue; <sup>17</sup> ia Arabia railla eniruemo jaidicue. Nainomo comini iñena jira, cuemo jai suide rafuemo comecina facadicue. Jerusalémo Jesucristo nano oretagano dine jaiñedicue. Cuena Jesucristo nia oretañenia, naimacina orede, ie uai llollena. Arabia railla eniruemo cue illa mei, Damasco railla nairaímo abido jaidicue. <sup>18</sup> Cristo cuemo bairia facaise tres años illamona, naimiena cue uiñollena, Jerusalémo Pedro dine jaidicue. Naimie dinomo quince digarui iticue. <sup>19</sup> Naie facaiseconi nana Jesucristo oretaganona cioíñedicue. Pedrona ciodicue. Jacobona jiaí ciodicue. Naimiedi cai Nama ie ama Jiaínona cioíñedicue. <sup>20</sup> Omoímo nana cue cuegosinodi uanaicino. Tainona cueñedicue. Tainona cue cueia, Jusiñamui cuena duere finuana uiñoticue. <sup>21</sup> Jerusalémo cue illa mei, Siria railla eniruemo jaidicue. Cilicia railla eniruemo jai jaidicue. <sup>22</sup> Judeamo ite Cristona ñnotinodi cuena nia cioíñedimaci. <sup>23</sup> Cuena iese fididimaci: “Navui caina duere finocabidimiedi Jesucristo rafuena jai llote. Jesucristona cai ñnuana navui jitaíñede. Caina fuidoacade”. Jiaíe cue finoca rafuena fidiñedimaci. <sup>24</sup> Ie fidiámona, cueri Jusiñamuimo iobillacinona jai fecadimaci.

## 2

### *Jerusalémo Pablo jailla rafue*

<sup>1</sup> Catorce años illanona, Jerusalémo dane jaidicue. Bernabé cue diga jaide. Titona uiticue. <sup>2</sup> Jusiñamui cuemo llua jira, nainomo ite creyentiaímo jaidicue. Judíuaiñedino Cristo rafuena jai ñnuana cue llollena, jaidicue. Cue llofuiana naimaci raise uiñollena, creyentiaí illaícominimo anado nano lloticue. Cue llofuiana: “Mare” naimaci raillana uiñoiacaducue. Tainona Cristo rafuena cue lloi raillanona uiñoiacaducue. Naimaci diga cue ñaía mei, cue llofuiana: “Mare” raitimaci. <sup>3</sup> Tito cue diga ite. Naimiedi judío nairaí imeñede; iadedi naimaci abina detacabilla isoi, creyentiaí illaícomini dinena naimie abi detatajana lloñedimaci. <sup>4</sup> Creyentiaína abi caitadino billa jira, Tito abina detatajana siadoticaí. Naimacina cai uaidoñeno bitimaci. Moisés micori llogacinuai anamo cai iñenana



naimaci uifollena, bitimaci. Cristo Jesús cai #nua jira, Moisés micori llogacinuaido jai jaiñedicai. Moisés micori llogacinuai anamo caina dane itatallena, iena uifoiacadimaci. <sup>5</sup> Cai mare rafuena jiaiena jaca meidoñellena, naimaci ñaiana dallu cacareifñedicai. Uanaicinona omoi uifuaana jitaidicai. <sup>6</sup> Naie creyentiai illaicomini omoi mo llorella, cuemo jiaie rafuena lloñedicaci. Illaicominina raillanodimaci; iadedi cuemona jamai bue isoidimaci. Jusiñamui nana comini daje isoi feiña jira, naimaci uai cue uai baifemo faiñede. <sup>7-9</sup> Cue llofuiana rairuiñedicaci; iadedi creyentiai illaicomini cuena Bernabé diga marena feiñotimaci. “Daje isoi comeciaina facadica” raillamona, cue llofuiana: “Jai mare” raitimaci. Creyentiai illaicominidi Jacobo, Pedro, Juan digamie. Judíuai dine Pedrona Jusiñamui oretaja isoi, cue llamona judíuaiñedinone Jusiñamui cuena oretajana uifñotimaci. Pedro llamona Jusiñamuidi ailluena judíuaina creyentiaina itatate. Cue llamona, Jusiñamuidi ailluena judíuaiñedinona creyentiaina jai itatate. Iemona Jusiñamui uai cuemo illana jai uifñotimaci. Judíuaiñedinomo Jesucristo rafuena llocana nia coco jaillana jitaidimaci; iadedi judíuaimo Jesucristo rafue llocana nia jaidimaci. <sup>10</sup> Daje rafue cocomo llotimaci. “Duerede creyentiaina canocabi” llotimaci. Iena iocire finoacadicue.

### *Antioquíamo suide rafue*

<sup>11</sup> Antioquíamo cue jailla mei, Pedro nainomo jai jaide. Nainomo Pedro bia, marañedifue naimie finua jira, naimie uiecomo naimiemo riire lloticue. <sup>12</sup> Nainomo Pedro nano rilla mei, nana creyentiai diga nainomo naimie guisoide. Judíuai creyentiai diga, judíuaiñede creyentiai diga, danomo guisoide. Temei Jacobo dinena damerie bitimaci. Moisés micori llogacinodo jaisoidimaci. Moisés micori llogacinodo Pedro jai jaiñede; iadedi naimaci billa mei, naimacina naimie jaciruilla jira, judíuaiñede creyentiai diga Pedro jai guifñede. Ie #noga rafuedo naimie jai jaiñede. <sup>13</sup> Naimie iese illamona, judíuai creyentiaidi judíuaiñede creyentiai diga jai jai guifñedicaci. Pedro illa isoi, Bernabé iedo jai jaide. <sup>14</sup> Naimaci iese illa jira, Jesucristo rafuedo raise jaiñedicaci. Uanaicinodo jaiñedicaci. Iena cue uifua jira, nana comini uiecomo Pedromo lloticue: “Judío nairai imedio; iadedi o jeacinomona o jilloillena, cai einamaci llucacinodo birui jaiñedio. Ie jira, ¿bue ñellena judíuaiñedinone cai einamaci llucacinodo jaillana jai jitaideo?”

### *Judíuaidi creyentiaina jailla mei, Moisés micori llogacinuaido jai jaiñedicaci*

<sup>15</sup> Nia lloticue: Judíuaiñedinodi Moisés micori lloga uaina jai uifñedicaci. Caidi judíuaina jeicigacai. Ie muidona Moisés micori llogacinuai anamo jai jeicigacai. <sup>16</sup> Iese iticai; iadedi Moisés micori llogacinuaido jaillamona, Jusiñamui jitailla isoi, jaca bu marebicaiñede. Jusiñamui jitailla isoi, Jesucristona #nuamona marebicaidicai. Iena uifñotimaci. Ie jira Cristo Jesúsna #noticai, cai marebicallena. Cai marebicallena, Moisés micori llogacinuaina #noñedicai. Moisés micori llogacinuaina #nuamona, jaca buna marebificainide. <sup>17</sup> Jusiñamui mona cai marebicaiacallena, Cristona cai #nuamona jeacino finorainiñedicai. “Cuena #nuamona, marebicaitomoi?” Cristo iese llofueuide. Naimie llua isoi cai marebicaiñena, cai jeacinomona nia cai jilloñena, Cristo muidona; iadedi iese iñedicai. <sup>18</sup> Moisés micori llogacinuai jai jamaiñocaidicue. Ie jira naicinuai dane abido cue oia, iena birui cue #noñena jira, jai jeacino finoraimiedicue. <sup>19</sup> Iemona cue marebicaiñena jira, Moisés micori llogacinuai cuemo jai duiñede. Ie anamo jai iñedicue. Ie muidona Jusiñamui llogacinuaido jai jaidicue. Cristo anamo jai iticue. <sup>20</sup> Naimie dibeimo jai iticue. Cristo cuemo ite. Cristo cuena namatade. Jusiñamui Jitona cue #nocana jai jaidicue. Cuena isiruillamona, naimie jitaillamona, cueri fiodaite. <sup>21</sup> Jusiñamui caina duenailana jamaiñedicue. Jusiñamui jitailla isoi, Moisés micori llogacinuaina cai #nuamona marebicaidicaina, Cristo tainomo niade fiodaite.

## 3

### *Jesucristona #nuamona judíuaidi Jusiñamui Joreño feiñotimaci*

<sup>1</sup> Gálatas imaci, abina jai uifñedomoi. Jiaino omoia birui jifue. Omoi mo Jesucristo cruzmo fiodailla rafuena jai marefodo lloticue. Iena raise cacadomoi. <sup>2</sup> Ie jira omoi mo biena jicanoiacadicue: ¿Niese Jusiñamui Joreño jai feiñotomoi? Moisés micori llogacinuaido jaillamona iena feiñedomoi. Jesucristo rafuena omoi cacajamona, #notomoi. Ie mei Jusiñamui Joreño feiñotomoi. ¿Niese birui abina uifñedomoi? <sup>3</sup> Omoi marebicallena, Jusiñamui Joreño omoi mo jai ite; iadedi Moisés micori rafuena dane omoi jaiacanamona, omoi jaiie finolle rafuemona jai marebicaiacadomoi. <sup>4</sup> Jusiñamui Joreñomona diga marecinuaina feiñotomoi; iadedi iena jai jitañedicomoi. Iese omoi illana #noñedicue. <sup>5</sup> Dane jicanoiaticue: ¿Niese Jusiñamuidi ie Joreño omoi mo fecade? ¿Niese siño rafuena omoi ri finode? Moisés micori llogacinuaido omoi jaillamona ie Joreño omoi mo fecañede. Moisés micori llogacinodo omoi jaillamona, siño rafuena omoi ri finoñede; iadedi

Jesucristo rafue omoi cacajamona, iena omoi inua jira, ie Joreñona fecade. Iemona siño rafuena omoiri jiai finode.

*Abraham micori Jusiñamuina inua muidona marebicaide*

<sup>6</sup> Abraham micori ie rafuena lloiticue. Naimie micorimona fueoiticai. Moisés micori naimiena cuete: “Abraham micori Jusiñamuina inua jira, Jusiñamuimona naimiedi marebicaide”. <sup>7</sup> Iena cai cacajamona, Abraham micori isoi cai inuamona, naimie ua cominina cai illana uifoticaí. <sup>8</sup> Jusiñamuidi judíuafinedino ico marebicaillena jaie uifote. Naimiena ico naimaci inollena jaie jiai uifote. Iena uifumona, Jusiñamuidi ico suille rafuena Abraham micorimo jaie llote. Mare rafue naimiemo llote: “Nana cuena o isoi inotinona marebicaitaicue” llote. <sup>9</sup> Abraham micoridi inote. Jusiñamui naimiena marebicaitate. Ie isoide. Nana Jusiñamuina inotinona marebicaitate; <sup>10</sup> iadedi nana Moisés micori llogacinuaido jaidino jai faidobidimaci. Moisés micori iena jaie cuela: “Nana cue lloga uaido jaiñedino jai faidobide”. Buna nana naie lloga uaido jaiñena jira, nana faidobidicai. <sup>11</sup> Biena uifoticaí. Moisés micori llogacinuaido jaillamona, Jusiñamuimona jaca buna marebicaiñede. Jusiñamui facaina lloraima iena jaie cuete: “Jusiñamuina inuamona marebicaidimaci. Ie mei jaca iitimaci”. <sup>12</sup> Moisés micori llogacinuai daje isoifede. Nana Moisés micori llogacinuaina finuamona comini marebicaide. Moisés micori iena jaie cuela: “Cue lloga uai finuamona, marebicaidimaci. Iemei jaca iitimaci”. Jusiñamuina inuana lloñede: ia ie lloga uai finollena cominimo llote. Nana ie lloga rafuena finuamona, cominidi marebicaidimaci.

<sup>13</sup> Moisés micori llogacinuai anamo jaie cai illa jira, faidobidicai; iadedi cai facaina naimie fiodailla jira, Cristodi iemona caina jillotate. Cruzmo Cristo cuinaja jira, cai facaina naimie jai faidobide. Moisés micori iena jaie cuela: “Cruzmo cuinacame Jusiñamuimona jai faidobide”. <sup>14</sup> Jusiñamuina naimie inua jira, Abraham micori jaie marebicaide. Jesucristo fiodailla muidona, naimiena judíuafinedino inuamona, Abraham micori isoi marebicaidimaci. Jusiñamuidi ie Joreñona caimo fecallena jaie llote. Ie muidona Jesucristona inuamona, Jusiñamui Joreñona birui feifoticaí.

*Jusiñamui lloga rafue*

<sup>15</sup> Cue amatiai, bie rafuemo comeciaina faca. Nie isoide rafuena menamie finoacania, naie rafuena feitañellena, rabemo cuetiainmaiaí. Iaimaiaí mamecina nainomo cuia mei, jaiaruido damie naie rafuena jiaifo dama meidonide. <sup>16</sup> Ie isoide. Jusiñamuidi Abraham micorimo ico suille rafuena jaie llote. Iena naimie llua jira, iena meidonide. Ie uruaimo ico suille rafuena lloñede; ia daje uruemo ico suille rafuena llote. Cristona ñaite. <sup>17</sup> Biena lloiacadicue. Naimie jilloillena, Jusiñamuina naimie inuamona, Jusiñamui Abraham micorimo rafuena llote. Cuatrocientos treinta años illanona, Moisés micorimo Jusiñamuidi jaie rafuena llote; iadedi Abraham micorimo jaie lloga rafuena meidoñede. <sup>18</sup> Jusiñamui llua jira, Abraham micori jillode; iadedi Moisés micori llogacinuaido cai jaillamona, cai jilloiadedi, Abraham micori isoi jilloñedicai. <sup>19</sup> Iese itena, ¿bue ñellena Jusiñamui Moisés micorimo jaie rafuena llote? Naiemona jeacina cai uifollena, iena llote. Naie rafue ite, Cristo eniruemo nia biñenia. Jusiñamuidi Abraham micorimo lloga rafue Cristomo duide. Naimie billamona Moisés micorimo lloga rafuena ofñedicai. Jusiñamuidi ie jaienisaimo naie rafuena llote, Moisés micorimo iena lloillena. Ie mei Moisés naie rafuena cominimo llote; <sup>20</sup> iadedi Jusiñamuidi Abraham micorimo ie rafuena atona llote. Jaiamiemo iese lloñede, Abraham micorimo iena lloillena.

<sup>21</sup> Moisés micorimo Jusiñamui rafuena llote; ia naiemona Abraham micorimo llogacino nia saifede. Cai jilloillena, cai jaca illena, Moisés micorimo Jusiñamuidi rafue finuana lloillena, naie rafuena cai finuamona marebicaidicai; <sup>22</sup> iadedi Moisés micori cuelañeñe nana comini jeacino anamo illana llote. Moisés micori llogacinuaido jaillamona, jeacino anamona jilloñedicai. Jesucristona cai inuamona Jusiñamui llua isoi, jeacino anamona jilloñedicai. <sup>23</sup> Jesucristona inuana nia cai uifofñenia, Moisés micori llogacinuai anamo iticai. Jesucristo billamona, naimiena inuana uifoticaí. <sup>24</sup> Moisés micori llogacinuidi cai lletarafue. Cristo dibeimo cai illena caina lletade. Cristona cai uifumona, naimiena cai inuamona, marebicaidicai. <sup>25</sup> Naimiena inuana jai cai uifumona, naie lletarafuena jai ofñedicai.

*Abraham micori ua uruiai*

<sup>26</sup> Cristo Jesúsna inuamona, nana omoi Jusiñamui cominidomoi. <sup>27</sup> Cristo dibeimo omoi illamona, bautizagamoi. Iemona naimie Moodi jiai omoi Moo. <sup>28</sup> Jusiñamuimona dajena itomoi. Naimiedi nana cominina feifote. Judíuaina omoi illamona, omoína feifote. Judíuafinedinona omoi illamona, omoína feifote. Mullaiana omoi illamona, omoína feifote. Mullaiañedinodomoidena, omoína feifote. Fiñaina omoi illamona, omoína feifote. Riñoniaia omoi illamona, omoína feifote. Jesucristona omoi inua jira, jaca damacidomoi.

<sup>29</sup> Cristomo omoi jai duiaidedi, Abraham micorí cominidomoi. Ie jira Jusiñamui Abraham micorimo lloga rafuemo jai jainaiaidomoi.

## 4

### *Jusiñamui uruiaina jaidicai*

<sup>1</sup> Moisés micorí llogacínona dane lloiticue. Jiaie rafuedo iena lloiticue. Riaí uruiái moo fiodailla mei, ie moo raruiaídi nano doforamiemo fiebide. Naie nano doforamiemo uruenia, naimie mamecido naimiemo jüide. Naimiemo nia raise jüüñede. Naimiedi nia jamai ite isoide. Naimie ie jofomo mullaiaí isoi ite. <sup>2</sup> Naimie moo llua dinorí jiaíno anamo naimie ite. Ie moo raruiaí jiaíno anamo jiaí ite. Naimie jai eimiena illemona naimie moo raruiaídi naimiemo raise jai duite. <sup>3</sup> Jaié daje isoidicai. Uruiaí isoidicai. Cai jaiagai llogacínuaí anamo iticai; <sup>4-5</sup> iadedi ie jitailliruimo Jusiñamuidi ie Jitona orede, naicinomona caina jilloitallena. Jusiñamui uruiaina cai jaillena, ie Jitodi naicino anamo riñomona jeiciga. <sup>6</sup> Naimie uruiaidicaina jira, Jusiñamuidi ie Jito Joreño cai comeciaino orede. Naimiena cai feiñuanona, naimiedi caina Jusiñamuina: “Cai Moo” raitatate. <sup>7</sup> Ie jirari jiaíno anamo jai iñedomoi; iadedi Jusiñamui uruiaidomoi. Jusiñamui uruiaidomoina jira, nana naimie lloga rafue omoimo jai duide.

### *Moisés micorí llogacínuaí anamo omoi jaiá, danomo abido jaidomoi*

<sup>8</sup> Jaié Jusiñamuina nia omoi uiñofenia, ua jusiñamuillañede ra anamo itomoi. Naie isoide rana sedauidomoi. <sup>9</sup> Jusiñamuina jai uiñotomoi. Naimie omoína jai uiñote. ¿Bue ñellena omoína marebicaitañede rafuedo dane jaiacadomoi? Omoína jilloitañede rafue anamo dane iacadomoi. <sup>10</sup> Judíuaí cominí rafuena finocabillaruimo jiaí finocabidomoi. Iemona: “Marebicaiticai” raillanona iese finocabidomoi. <sup>11</sup> Cue lloga uai omoi finofena jira, omoimo tainona jai lloiticue. Nibai jai tainomo maijidicue.

### *Pablo naimací diga illana uibiñote*

<sup>12</sup> Cue amataí, omoi dine nano cue jaiá, Moisés micorí llogacínuaí anamo iñedomoi. Naie llogacínuaí anamo jaié iticue; ia biruí ie anamo iñedicue. Biruí cue illa isoi omoi illana jiaí jitaídicue. Omoi dine cue nano ia, cuena raise feiñotomoi. <sup>13</sup> Cristo rafuena omoimo nano cue llua facaiseconí duidicue. Iena uiñotomoi. <sup>14</sup> Cue duico omoimona jacire eruaié; iadedi cuena jearuiñedomoi. Jusiñamui jaienicí omoi dine billa isoi, cuena feiñotomoi. Jesucristo omoi dine billa isoi, cuena jiaí feiñotomoi. <sup>15</sup> Jaié caimare iticai. ¿Niese biruí cue diga caimare iñedomoi? Cuena omoi canoitena, cuemo fecallena, omoi uisí jaié jino juiconoiacadomoi. <sup>16</sup> Omoimo jicanoicadicue: ¿Uanaicínuaí omoimo cue llua jira, omoi enoillamiéna jai jaidicue? <sup>17</sup> Moisés micorí llogacínuaí jaidino omoína eo nabairitimací; iadedi mare rafuena finoacaiñedimací. Naimací diga omoi nabairillena, cue diga omoi nabairillana jai jitaíñedimací. <sup>18</sup> Mare comeciainona cuena omoi jaca jitaia, eo mare. Omoi dine cue ia, iese omoi jitaia, mare. Omoi dine cue iñenia, iese omoi jitaia, jiaí mare. <sup>19</sup> Cue uruiaí, Cristo omoi comeciainona raise namataja dinorí, omoiri cue comeci eo duere dane llicidaite. <sup>20</sup> Omoi diga ja iacadicue, omoi diga atona raise ñaillena. Omoimona are cue illa jira, dane raise cai nabairillena, omoimo cue llua raise uiñofedicue.

### *Jesucristo rafue Moisés micorí llogacínuaí baifemo faite*

<sup>21</sup> Moisés micorí llogacínuaí anamo iacadino, omoimo daje rafuena jicanoicadicue: ¿Moisés micorí cuegafuina raise iacadomoi? <sup>22</sup> Moisés micorí jaié cuega: “Abraham micorimo mena jito ite. Daje jito ie mullaíñomona comuide. Jiaie jito ie mullaíñediñaiñomona comuide. Naiñaiñodi ie nanoca ai. <sup>23</sup> Abraham micorí jitailla jira, ie mullaíño jitona comuitate; iadedi ie mullaíñediñaiñiño jito comuide, jusiñamui llua jira”. <sup>24-25</sup> Naie rafuemonona cai fueolle. Ie iaiñuaídi mena jai lloga rafue isoidiaíñuaí. Abraham micorí mullaíño mameci Agar micorí. Naiñaiñodi Sinaí railla anedumona lloga rafue isoide. Arabia railla eniruemo Sinaímona Jusiñamuidi Moisés micorimo rafuena llote. Naiñaiñiño mullaíñona jira, ie urue mullaímana jeiciga. Ie nama anamo jaca ite. Ie isoide. Moisés micorimo llogacínuaí jaidinodi naie rafue anamo itimací. Jerusalémo itino Moisés micorí llogacínuaí anamo jai nia illa jira, Agar micorí Jerusalén railla nairai isoide. <sup>26</sup> Jiaíñaiñodi jiaie lloga rafue isoide. Naiñaiñiño Abraham micorí ai. Naiñaiñodi Sara micorí. Naiñaiñodi monamo ite Jerusalén isoide, naiñaiñiño mullaíñofena jira. Nainomo jainaiaidicai, Moisés micorí llogacínuaí anamo jai cai iñena jira. <sup>27</sup> Isaías micorí iena jaié cuete: Oiniño, mai iobi.

Urue nia jocoñediñaiñiño, ado iobi.

Ñirediñaiñiño baifemo eo uruiairenitio.

Iemona Moisés micorí llogacínuaí anamo iñedinomona Cristona ñnotinona ailluena jaillana uiñoticaí.

<sup>28</sup> Cue amatai, bie rafue omoimo duide. Jusiñamui llua jira, Abraham micori jito Isaac micori comuide. Ie isoide. Jusiñamui llua jira, caidi ie uruiaina jaidica. <sup>29</sup> Ero, mullaiño jitodi mullaiaifediñaiño jitona jaie duere finouide. Daje isoi Moisés micori llogacinuai anamo itinodi Jusiñamui Joreño anamo itinona birui duere finocabidimaci. <sup>30</sup> ¿Niese cai nibaille? Moisés micori Sara micori llua jaie cuete: “ Mullaiño, nainaiño jito diga, oni dota. Ie moo fodailla mei, mullaiño jito ie moo raruiaina feiñoite. Dama mullaiaifediñaiñede jito ie moo raruiaina feiñoite’ llote”. <sup>31</sup> Ie jira mullaiño urue isoifedica Moisés micori llogacinuai anamo jai cai iñena jira, mullaiaifediñaiño urue isoificai.

## 5

### *¿Nie isoide rafuedo jaitomoi?*

<sup>1</sup> Moisés micori llogacinuai anamona Cristodi caina jai jillotate. Ie jira omoi comeciaina ocoiño. Jaie omoi illa isoi, dane jaiñeno. Omoi marebicaitañede rafue anamo jaie itomoi. Ie jira Moisés micori llogacinuai anamo iñeno. Iemona marebicaitañeitomoi. <sup>2</sup> Jeacinomona omoi jillobillena, Moisés micori llogacinodo omoi jaiacanamona, omoi abiana omoi detataia, Cristo rafuena jai jitaiñedomoi. <sup>3</sup> Dane lloiticue: Jeacinomona omoi jillobillena, naga abina detatagamie nana Moisés micori llogacinuaina iñua. Nana iena iñoñenia, naimie jilloñeite. <sup>4</sup> Moisés micori llogacinuaina iñuamona omoi marebicaia cania, Cristo rafuena jai duiñedomoi. Jusiñamui caina duenaillamona, Cristona jaie cai dine orede. Moisés micori llogacinodo omoi jaiacania, Cristo rafuena jai jitaiñedomoi. <sup>5</sup> Moisés llogacinuaina iñuamona marebicaitañedica; iadedi Jesucristona cai iñuamona, Jusiñamui Joreño caina canuamona, cai marebicaillemo iocire ocuridica. <sup>6</sup> Abina detatajamona, cai jeacinomona jilloñedica. Abina cai detatañenamona, jai jilloñedica. Dama Cristona cai iñuamona jillobidica. Naimiena cai iñua jira, nana cominina isiruicana jaidica. <sup>7</sup> Cristo rafuedo navui marena jaidomoi; ia damerie uanaicinona omoi iñuana jai jitaiñedimaci. <sup>8</sup> Jusiñamui naimaci uaina oñedimaci. Jusiñamui omoina navui uaidote, naimie dibeimo omoi illena.

<sup>9</sup> Jai rafuedo iena lloiticue: Janore jisa siritate ra ifecimo joneia, jai nana siritate. Ie isoide. Damié jaié rafuedo jaia, diga cominina jifuerede, naimie jailla dibeido jaillena. <sup>10</sup> Jaié rafuedo omoi jaiñelmo cue comecina jai facadicue. Cai Nama cue iñua jira, cue lloga uaido omoi jaillmo cue comecina jai facadicue. Omoi comeciaina naganomo itatamiena uiñoñedicue; iadedi Jusiñamui naimiena duere finoite.

<sup>11</sup> Cue amatai: “Abina detataja” omoimo cue lloiadedi, cuena jai duere finoñedomoi, omoi jilloillena Jesucristo fodailla rafuena jai cue lloñena jira. <sup>12</sup> Omoi comeciái naganomo itatatinodi raitimaci: “Janore jisa abina detatajamona, cai jeacinomona jillobidica”. Iese itena, Jusiñamuina uiñoñedino finua isoi, naimiena naimaci abiaí diana jai jitaidicue.

<sup>13</sup> Moisés llogacinuai anamona Jusiñamui omoina jai jillobitade; iadedi marañede rafuena omoi finollena jillobiñedomoi. Omoi jillobilla jira, naimacina omoi isiruilla jira, jaie cominina cano. <sup>14</sup> Moisés micori iena jaie llote: “O abi o isiruilla isoi, o ecimo itinona isirui”. Iena omoi finoia, nana Moisés micori llogacinuaina jai finodomoi. <sup>15</sup> Iese omoi finoñenia, comina diga omoi raire iciria, jaca danomo iñeitomoi.

### *Jaié cominina omoi isiruilla rafue*

<sup>16</sup> Omoimo nlla lloiticue. Jusiñamui Joreño omoi comeciaino namatajano omoi i. Omoi comeciaino ite marañedicinodo omoi jaiñeno. <sup>17</sup> Cai comeciaino ite marañedicinodi Jusiñamui Joreño jitaillacinodo daacinodo jaiñede. Conima abido jaide, cai jitailla ra cai finoñellena; <sup>18</sup> iadedi Jusiñamui Joreño anamo omoi raise ia, naimie llua omoi raise iñoia, Moisés micori llogacinona jai jitaiñedomoi. <sup>19</sup> Ero, marañede comeciaino itcinodo omoi jaia, bie isoidicinona finocabidomoi: añede riño diga illacina, iniñede iima diga illacino, jeare ñaiacino, diga eo jearede rafuena finuacino, <sup>20</sup> jiraraina sedajacino, aima ra finuacino, comena enoillacino, uaina uaitajacino, abina uradoillacino, icirillacino, dama ie abi ramo comecina facajacino, nana cominina uaitaillacino, damacina iñenacino, <sup>21</sup> dama abina uradoillano, rana bairuacino, comena meiniacino, jifaillacino, aifuerillacino, ie isoidicino. Omoimo jaie lloiticue. Dane lloiticue: Bie isoide rafuena bu finocabia, naimie cominina naimaci iñena jira, Jusiñamui ie cominina sedajanomo jainaiñeite. <sup>22</sup> Jusiñamui Joreño omoi comeciaino namataia, bie isoidicinona finocabidomoi: nana comini isiruillacino, comeciáimare illacino, uri illacino, raire iciriraininacino, duenaillacino, jaié cominina canuacino, ie lloga uaina finuacino, <sup>23</sup> uai oñenacino, abina eenuacino. Moisés micori llogacinuai bie isoidicinona ñañede. <sup>24</sup> Cristo Jesúsimo jainaiainododi naimaci marañede comeciái jitaillacino anamo iñedimaci. <sup>25</sup> Jusiñamui Joreño caimo illa jira, naimie cai comeciaina namatajacinodo cai jaillena. <sup>26</sup> Iemona abina cai birañellessa. Abina jai cai iedoñellessa.

## 6

*Jiaie llofuiacino*

<sup>1</sup> Cue amatai, omoimona damie ebena jamai jeacinona finoia, dane Jusiñamui dibeimo naimie raise illena, naimiemo fecuise iciñeno llono. Omoi cominimona Jusiñamui Joreño comeciaino raise namatadinodi iese naimiemo llofuellesa. Jeacino finoi raillano, nagamiiai abi rairuillesa. <sup>2</sup> Bu duere sefua, bu Taife ramo faia, coninina cano. Iese omoi canoia, Cristo llogacinuaina jai inotomoi. <sup>3</sup> “Cuemo iese suiñeite. Dama abina sedadicue. Jamai bue isoiñedicue” comecina facadimie dama abina jifujete. Naimie jamai bue isoide. <sup>4</sup> Maraiñeni raillano, ie finoca rafueconi iobillena, nagamiiai ie finoca rafuena abido facaja. Dama ie maijia rafueconi iobilla. Dama ie maijia rafuedi naimiemo duide. Jiaimiero ite maijia rafuedi naimiemo duiñede. <sup>5</sup> Naimie finoca rafuemonaga naimie jeacinona finoia, dama naimie muidona. <sup>6</sup> Naga Jesucristo rafuena fueotimiedi ie llofuegamiemo mare ra fecalle. <sup>7</sup> Dama o abina jifueñeno. Budi Jusiñamuina jifuenide. Jeacinona bu finoia, Jusiñamui ibana jaca oite. Marecinona bu finoia, Jusiñamuimona iba feiñoite. <sup>8</sup> Ie comecimo ite maraiñede jitaillacino finodimiedi ie abina faifite. Fiodaite; iadedi Jusiñamui Joreño jitaillacinona finodimiedi monamo jaca iite. Faiñeite. <sup>9</sup> Jusiñamui Joreño jitaillacinona finuana sefuiruiñeno. Cai comeciai cai ocuiñoia, Jusiñamui jitailla facaiseconi ibana feiñoitica. <sup>10</sup> Ie jira nana cominina canocabi. Nana creyentiaina ua eo canocabi.

*Facaduacino*

<sup>11</sup> Ero, jerie cuiano omoimo bie facaimo cueticue. <sup>12</sup> Jiaie cominimona iobillacinona omoi abiaina detatajana jitaicino feiñoiacana jira, omoi abiaina detatajana jitaicimaci. Cristo rafue lloticainadedi: “Cristo rafuena uiñoñedinodi niade duere caina finodimaci” raillanomo comeciaina facajamona, iese jitaicimaci. <sup>13</sup> Omoi abiaina detatajana jitaicidinodi Moisés micori llogacinodo raise jaiñedicimaci. Nana iena inoñedicimaci. Omoiri abina iedoiacana jira, omoi abiaina detatajana jitaicimaci; <sup>14</sup> iadedi Jusiñamuidi jiaie rafueri abina cue ieduanana jitaicinede. Dama Cristo cueri fiodailla rafueri abina iedoticue. Ie jira Jusiñamuiñede rafuemo jainaicinedicue. Naie rafue anamo jai inedicue. <sup>15</sup> Abina diamona cai jeacinomona jilloñedicai. Abina deñenanomona jaca jilloñedicai; iadedi Jusiñamui Joreño caina comonori comuitajamona jillobidicai. <sup>16</sup> Jusiñamuidi nana bie llucacino jaidino uri itatatesa. Naimie naimacina duenailasa. Jusiñamui cominidi ua jaca iese illasa.

<sup>17</sup> Bie isoide rafue illamona, cuena duere finoñeno. Jesucristo rafuena cue llua jira, diga icaiño cue abimo bofellañona jai oticue.

<sup>18</sup> Cue amatai, cai Nama Jesucristo omoina duenailasa. Mai. Pablocicue.

## EFESOMO ITE CRISTONA HNOTINOMO PABLO ORETAGA RABE

*Efesomo ite creyentiaimo Pablo cartana orede*

<sup>1</sup> Efeso railla nairaimo ite creyentiai, Pablodicue. Bie carta omoi dine oredicue. Ie rafue llollena, Jusiñamui jitailla jira, Jesucristo oretagamiedicue. Naimiemo omoi jai jainaiaila jira, Jesucristona inocana jai jaidomoi. <sup>2</sup> Cai Moo Jusiñamui, cai Nama Jesucristo diga, omoina duenaicabillana uifnocana mai omoi jai. Iaimaijai omoi comeciaina uri itatajacabillana uifnocana mai omoi jai.

*Cristomo jai cai jainaiaila jira, Jusiñamui marena itatajacinona feiñoticaí*

<sup>3</sup> Cristomo cai jainaiaila jira, Jusiñamui caina eo marena itatate. Ie jira cai Moo Jusiñamuimo iobillacinona cai fecacabillasa, naimiedi Cai Nama Jesucristo ie Moo illanona. Cristomo cai jainaiaila jira, cai comeciái marena itatajacinona Jusiñamuimona jai feiñoticaí. <sup>4</sup> Iena ja lloiticue. Enirue nia ifenia, Jusiñamui nana naimiena inotinona jaiie fetode. Cai facaina Cristo ico fiodaillena naimie uifnuamona, caina jaiie fetode. Naimiemona cai marebicaillena, jeacinona cai finoñellena, caina fetode. <sup>5</sup> Caina isiruillamona caina fetode. Naimie eo jitailla jira, naimie uruiaina cai jaillena, caina fetode. Jesucristo fiodaillamona Jusiñamui uruiaina jaidicaí. <sup>6</sup> Naimie caina fetuamona, naimie caina duenaillana jai uifnoticaí. Iemona naimiedi eo mareuidimiena jai jai uifnoticaí. Ie isiruiga Jitomo cai jainaiailamona iena uifnoticaí. Naimiemo buena cai finoñenia, caina duenaite. Naimiena cai iobitallena, caina fetode. <sup>7-8</sup> Caina eo duenaillanona, ie Jito fiodailla jira, Jusiñamuidi jeacino anamona caina jai jillotade. Cai jeacino oni dotajamona, ibana jai oñeite. <sup>9</sup> Naimiena cai raise inollena, caina abina jai uifnotade. Jusiñamui caina naimie nana caina birui jilloitaiacanana jai uifnotade. Cai cominidi iena jaiie uifnoñedimaci; iadedi Jusiñamui jitailla diese Cristo finoca rafuedo caina iena jai uifnotade. <sup>10</sup> Naimie jitailla facaiseconi, nana caimo ie finoacalle rafue fuiduanona, Cristo anamo naimie nagamiena raise itataite. “Cristo cai Nama” raitimaci.

<sup>11</sup> Ie jira naga suide rafue suicana jaide, Jusiñamui jitaillacinona fuidollena. Nana naimie jitailla diese, naimie comeci jitailla jira, nana iena finode. Nano facaiseconi naimie cominina cai jaillana naimie uifnuanona, caina jaiie fetode. Ie muidona naimie cominina jai jaidicaí. <sup>12</sup> Naimie caina fetuanona Cristona jaiie inoticaí. Naimie diga ico jaca cai illemo birui ocuridicaí. Naimiena cai iobitallena caina fetode. “Naimie fue eo mare” cai raillena caina fetode. <sup>13</sup> Cristona jai birui inotomoi. Uanaicino rafue omoi jai cacajamona, naie mare rafue omoi cacajamona, omoi jeacinomona jai jillobidomoi. Jusiñamui Joreño omoimo illano, navui Cristo llua isoi, naimie dibeimo omoi illana uifnotomoi. <sup>14</sup> Jusiñamui Joreño caimo jaca illa jira, Jusiñamui diga ico cai jaca illena uifnoticaí. Jusiñamuidi caina ie cominina jai jaitate, naimiena cai iobitallena. “Naimie fue eo mare” cai raillamona, naimiena iobitaiticaí. Naimiemo cai jainaiaila jira, naimiemona nana cai comeciái marena itatajacinona feiñoticaí.

*Naimiaci facaina Pablo jinde*

<sup>15</sup> Cai Nama Jesuna omoi inuana jai fididicue. Nana jiaie creyentiaina omoi isiruillana jai fididicue. <sup>16</sup> Ie jirari Jusiñamuimo cue jiaia, omoina feitañedicue. Omoi facaina naimiemo iobillacinona jaca fecadicue. <sup>17</sup> Cai Nama Jesucristo Jusiñamuimo duilla jira, cai Moo Jusiñamui uai siñonana jira, naimiemo cue jianona, omoi facaina jicanoticue. Naimie Joreño uaido naimie rafue raise uifnocana omoi jaillena jicanoticue. Naimiena raise uifnocana omoi jaillena jicanoticue. Iese omoi facaina jicanocabiticue. <sup>18</sup> Naimie dibeimo omoina naimie jai uaidua jira, naimie diga ico jaca omoi illemona, iena omoi raise uifnuana jitaidicue. Naimie cominina omoi jai jailla jira, naimie illanomo ico eo marena iocire iitomoi. Iena omoi raise uifnuana jitaidicue. <sup>19</sup> Naimie uai ua eo siñonana omoi uifnuana jitaidicue. Naimiena cai inua muidona, ie uaido naimie caina canorede. Iena omoi raise uifnuana jitaidicue. <sup>20</sup> Fiodaillamona Cristona ie uaido Jusiñamui jai jillotaja jira, naimie uai siñonana uifnotomoi. Fiodaillamona Cristo jillua mei, monamo Cristo abido jailla mei, ie ecimo Jusiñamuidi Cristona illaimana dane itatate. <sup>21</sup> Ie jira Cristo nana Jusiñamui jaienisai afemo ite. Ua nana comini afemo naimie ite. Taife afemo naimie ite. Janaba afemo naimie ite. Naie iaimaijai isoide joreñuai afemo naimie ite. Birui iese ite. Ico iese nia iite. <sup>22</sup> Jusiñamuidi naga ra Cristo anamo ua jai itatate. Cristona nana creyentiai imaci illaimana jai ua jai itatate. <sup>23</sup> Cristomo daajena nana cai creyentiaidicaí duidicaí. Naimie anamo cai illanona, naimie nana caina ocucabide. Ie jira marena cai illena naimie jitailla isoi, naimie nana caina birui canocabide.

## 2

*Jusiñamui caina isiruilla jira, cai jeacinomona jai jillobidica*

<sup>1</sup>Jusiñamuina jaie omoi nia ñnoñenia, naimiemo omoi duñena jira, naimiemonona fiodaitino isoidomoi. Jeacino anamo omoi illa jira, naimiemonona fiodaitino isoidomoi. Jeacino finocana jaidomoi. Marañedicinona finocana jaidomoi. <sup>2</sup>Jeacino eburitomoi Jusiñamui dibeimo iñedino rafuedo jaidomoi. Taife dibeido jai jaisoidomoi. Jusiñamuina oiacañedino Taife jitailla rafuedo jaisoidimaci. <sup>3</sup>Naimaci isoi jaie nana iticai. Cai comeciaino ite jearede jitaillacinona finodica. Iedo jai jaisoidicai. Ie jira Jusiñamui rücaillafue anamo jaie iticai. Iese jaie nana iticai. <sup>4-5</sup>Jeacino jaie cai finua jira, jeacino anamo iticai. Jusiñamuina ñnoñedicai; iadedi Jusiñamui caina eo duenaillanona, caina eo isiruillamona, naimie diga ico jaca cai illena, naimie dibeimo caina itatate. Fiodaillamona Cristona Jusiñamui jillotaja jira, jeacino anamona caina jai jillotate. Ie muidona monamo ico iiticai. <sup>6</sup>Cristona jillotaja mei, Jusiñamui ie ecimo naimiena dane itatate. Cristomo cai jai jainaiaila jira, Jusiñamui nainom caina jai jainaiatate. <sup>7</sup>Cristo finoca rafuemonona caina iese jai itatate. Caina iese jai itatajamonona, nana cominidi Jusiñamui caina eo duenaillana uiñoitimaci. <sup>8</sup>Naimie caina duenaillanona, caina jai jillotate. Jaca buena cai finuamona jilloñedicai; iadedi naimie jitailla jira, naimie caina jai jillotate. <sup>9</sup>Cai jilloillena jaca buena cai finoñena jira, abina iedoñedicai. <sup>10</sup>Jesucristomo cai jainaiailamona, ie cominina cai jaillamona, cai illa isoi naimie caina itatate. Iese cai illamo Jusiñamui comeci jaie facajano, mare rafuena finocana cai jaillena, naimiedi cai comeciaina marena itatate.

*Cristomo jai cai duilla jira, jiaie nairaii diga birui uri iticai*

<sup>11</sup>Omoi jaie isoillana uiñotomoi. Iena comecitomoi. Jusiñamuina jaie uiñoñedomoi. Judiuaiñedinona omoi jeicifena jira, cai judiuai comini isoi abiaina detatañedomoi. Ie jira cai cominimona marañedomoi. <sup>12</sup>Omoi jeacinomona Cristo omoina jilloitaiacanana naie facaiseconi uiñoñedomoi. Cai judiuai nairaimo jainaiañedomoi. Ie muidona Jusiñamui cai judiuai cominimo jaie lloga rafuena uiñoñedomoi. Jusiñamuina nabaillana uiñoñedomoi. Jusiñamui diga omoi ico jaca illena uiñoñedomoi. Jusiñamuina omoi uiñoñena jira, naimiena sedañedomoi. <sup>13</sup>Naimie dibeimo jaie jaiñedomoi; iadedi Jesucristomo birui duidomoi. Jusiñamui jaie ñnoñedomoi; iadedi Cristo jai fiodailla jira, naimiena birui ñnotomoi. Naimiena omoi jai ñnuamona, cai diga naimie dibeimo jai itomoi. <sup>14</sup>Naimie omoi comeci jai uri itatate. Cai comeci jai jai uri itatate. Cai judiuaimona omoina jaie jearuiticai. Iese jaie iticai; iadedi Cristo muidona dan cominina nana birui nabaidicai. <sup>15</sup>Cristo fiodaillamona Moisés micori jaie llogacino anamo jai iñedicai. Naie llogacino dan cai judiuaimo duilla jira, Jusiñamui dibeimo jaie iñedomoi; iadedi Cristo finoca rafue muidona, birui daajena jaidicai. Omoina jaie cai gaiñena jira, omoina jaie nabaiñedicai; iadedi Cristomo daajena cai duilla jira, birui nabaiñedicai. <sup>16</sup>Cruzmo Cristo fiodailla jira, Jusiñamui dibeimo cai illamona, mena nairaimona caina daje nairaina jai itatate. Ie jira daje nairaina uri iticai. <sup>17</sup>Cristo jaie billanona, mare rafuena llote. Omoi judiuaiñedinomo, cai judiuaimo, comeci uri illana llote. Nana caina jilloitaiacanana llote. <sup>18</sup>Naimie muidona Jusiñamuina jai nabaiñedicai. Jusiñamui Joreño caina canuamona, naimie diga birui nabaiñedicai. <sup>19</sup>Jusiñamui cominina omoi jai illa jira, nana naimiena ñnotino caina Jusiñamuimo daajena duidomoi. Caimona birui jiaie cominiñedomoi. <sup>20-22</sup>Jofo isoidicai. Jofona cai finoacania, naie ibiri nano finodica. Ie mei diga rana cai atiamona, iena niticai. Ie isoide. Diga jiaie isoide cominaina iticai; iadedi Cristomo daajena jai duidicai. Naimiedi birui nana cai Nama. Cristo facaina llorainimona naimie rafuena jai caudicai. Jusiñamui Joreño caina canuanona iena ñnoticai. Iena cai ñnuamona, naimie jitailla isoi, mare rafuena finocana jaidicai. Cai diga Cristomo omoi jai duillamona, Jusiñamui Joreño nana cai comeciaino jai ite.

## 3

*Judiuaiñedinomo Pablo Cristo rafuena llofuate*

<sup>1</sup>Jesucristo rafuena omoi judiuaiñedinomo cue llofueuilla jira, cárcelmo iticue. <sup>2</sup>Omoina naimie duenaillanona, omoina llofueuilla, Jusiñamui cuena oretate. Iena jai uiñotomoi. <sup>3</sup>Jusiñamui cuemo jaie uiñoñega rafuena jai llote. Naie rafuena janore como jai cueticue. <sup>4</sup>Bie carta omoi facaia, Cristona jaie uiñoñega rafuena cue jai uiñuana uiñotomoi. <sup>5</sup>Jusiñamuidi cominimo iena jaie raise uiñotañede; iadedi ie Joreño Cristo facaina llorainina iena birui jai uiñotade. <sup>6</sup>Iena lloiticue. Judiuaiñedomoi; iadedi Jusiñamui cuemo jaie llote: “Judiuaiñedino Cristona ñnuanona, omoi judiuai isoi jilloitimaci” llote. Omoi facaina Cristodi fiodaite. Naimiena omoi ñnoia, omoina ie uruiaina cai isoi jai itatate. Naimiedi nana cai Moo. Jai daje nairaidicai. Cristomo daajena duidicai. Cristo rafuena omoi ñnuamona, naimie jai llua isoi, Jusiñamui diga ico jaca itomoi. Jusiñamui cuena

iena jaie uifnotade. <sup>7</sup> Jusiñamui jitailla jira, cuena naimie duenailanona, naimie uai cuemo illamona, naie mare rafuena llofuecabiticue. <sup>8</sup> Creyentena nia cue jaiñena facaiseconi, creyentiaina jaie cue duere finouilla jira, jamai bue isoidicue. Nana jiaie creyentiaie cue baifemo faitimaci; iadedi Jusiñamui cuena duenailanona, ie rafuena cue llollena, cuena oretate. Cristo caina eo raise marena canocabillana llofuecabiticue. <sup>9</sup> Naie jaie uifnoñega rafuena nana comini birui uifnollena, cuena oretate. Jusiñamui naga rana finode; iadedi naimie jitailla jira, naie jaie uifnoñega rafuena jaca buna jaie raise uifnotañede. Nana comini iena birui raise uifnollena, cuena oretate. <sup>10</sup> Judiuaiñedino judiuai diga creyentiaina jaillamona, Jusiñamui jaienisaie naimie uai siñonana uifnoitimaci. “Naimie fue eo mare” raitimaci. <sup>11</sup> Jusiñamui jaca jitailla isoi, naie rafue suicana jaide. Cai Nama Jesucristona naimie oretajanona, cai facaina Cristo fiodaite. Iemona Jusiñamui jitailla rafuedi suide. <sup>12</sup> Cristona cai ñnua jira, Jusiñamui diga jaciruifeno birui jai ñairedicai. Naimie caina cacajana jiaie uifnoticai. <sup>13</sup> Cristo rafuena omoimo cue llua jira, birui duere sefuidicue. Cárcelmo cue duere sefuilla jira, Cristo rafuedo jaillena omoie comeciaie sefuiruisiñeno; iadedi Cristo rafue omoimo cue lluanona cue duere sefuia, iobicana omoie jai.

*Cristo caina eo isiruite*

<sup>14</sup> Cai Moo Jusiñamui caina eo canocabillanomo cue comecina facaia, naimiemo juidicue. <sup>15</sup> Naimiedi nana creyentiaie imaci Moona jira, naimiemo juidicue. <sup>16</sup> Naimiemo cue jiaanona, omoie facaina juidicue. Naimiemo eo ebirede siño iticino illamona, ie Joreño do naimie omoie comeciaina raise ocuifnotallena jicanoticue. <sup>17</sup> Cristona omoie ñnuamona, naimie omoie comeciaina raise namatallena jicanoticue. Jusiñamuina omoie isiruicana jaillana juidicue. Jiaie cominina omoie isiruicana jaillana jiaie juidicue. <sup>18-19</sup> Cristo caina jaca eo isiruillana, nana jiaie creyentiaie diga jaca eo isiruillana, omoie eo raise uifnana juidicue. Naimie caina eo isiruillacino cai comeciaie facajacino baifemo uailla jira, naimie caina eo isiruisoillacinona jaca raise uifnoñedicai; iadedi iena janore cai uifnuamona, Jusiñamui omoie comeciaina namatallena juidicue. Iese omoie facaina jicabidicue. <sup>20</sup> Ie jira Jusiñamuimo iobillacino cai fecajasa. Ie uaido cai comeciaie marena icana jaitate. Naimiemo cai jicajacino baifemo naimie fecarede. Cai comeciaie facajacino baifemo naimie jiaie finorede. <sup>21</sup> Ie muidona naimiemo iobillacinona nana cai creyentiaidicaidei fecacabillasa. Jesucristo finoca rafue muidona iobillacinona jiaie cai fecacabillasa. Mai.

**4**

*Jusiñamui Joreño jai caimo illa jira, cai comeci daje isoi lloide*

<sup>1</sup> Cárcelmo nia cue illamona, omoimo rafuena nia lloiticue. Cristo rafuena cue llofuia jira, cárcelmo iticue. Creyentiaina omoie jai jailla jira, Cristo jitailla isoi omoie i. Jusiñamui omoina jai fetode naimie jitailla rafuena omoie finollena. <sup>2</sup> Ie muidona abina jaca iedoñeno. Raire icirifeno. Jiaimie ona duere finoaia, ibana ofeno; iadedi uai ofeno naimiena jaca isirui. <sup>3</sup> Jusiñamui Joreño omoimo illamona, omoie comeciaie daje isoi lloicana jai. Daje isoi omoie comeciaie lloillamona, omoie jitaillamona dani uri omoie i. <sup>4</sup> Tena nia lloiticue. Cristona cai ñnuamona, daajena naimiemo jainaiadicaie. Jusiñamui Joreño nana caimo illamona, dani omoie comeciaie lloicana omoie jai. Jusiñamui caina jai fetode. Ie muidona naimie diga jaca cai illena, naimie isoi cai illemo ocuridicai. <sup>5</sup> Jaca dajede Nama sedacabidicai. Caina jilloitallena, da naimiena ñnoticai. Dama naimie facaina bautizaganodicai. <sup>6</sup> Cai Moo Jusiñamui jaca dajede. Jaca dajede Jusiñamuina nana cai creyentiaidicaidei sedadicaie. Naimie anamo nana iticai. Naimie jitaillacinona cai finollena, caina canocabide. Caina canollena, naimie Joreño caimo jaca ite.

<sup>7</sup> Naimie jitailla diese, caina fetuanona, naimie facaina cai maijillena, ie uai caimo fecade. Jiaie creyentiaina naimiemo ñnotacana jaillena, ie uai caimo fecade. <sup>8</sup> Iena cai raise uifnollena, David micori jaie cuegafuemona fueoiticai. Naimie cuega: “Monamo abido naimie jaillanona, illaimana naimie illamona, ie cominina naimie ifuanona, naimacimo rana fecade”. Cristona ñaite. Iemona Cristo cai maijacino caimo illana uifnoticai. <sup>9</sup> Biemo omoie comeciaina faca. Monamo abido naimie jailla jira, monamona eniruemo Cristo nano billana uifnoticai. <sup>10</sup> Eniruemo bite; iadedi monamo abido jaide. Nana cominina birui sedade. Naimie baifemo jaca buna ifñede. <sup>11</sup> Ie jira caimo ie uai jai fecajanona, caimona ie llofueoicaiganona fetuanona, ie rafue raise llofuellena, naimacina oretate. Damieriemo ie facaina ie rafuena jino llollena, ie uaina fecade. Ie rafuena nia ñnoñedinomo llollena, damieriemo ie uaina fecade. Creyentiaina ie rafuena llofuellena, damieriemo ie uaina fecade. <sup>12</sup> Iese ie uaina fecade, naimie facaina raise cai maijillena, nana jiaie creyentiaina cai canollena, Ie meí Cristo rafuena daajena ñnocana jaiticai. <sup>13</sup> Iena cai ñnuamona, Jusiñamui Jitona raise uifnocana jaiticai. Cai comecidei daje isoi lloicana jaiticai. Naimie jitaillacinodo raise jaiticai. Naimie marena icana illa isoi jaiticai. <sup>14</sup> Cai uruiaie facaise cai



comeciai naganamo ite. Naie facaise nie isoide rafuena cai cacajia, iena raire inoticaí. Cristo inocana cai jaillamona, uruiái isoi cai iacaiñena. Damierie naga llofueraíma uaido jaidimaci. Damierie llofueraíni di Cristo rafuena raise llofueñedimaci; iadedi jifuetimaci. Tainona llotimaci. Iedo cai jaiñena;<sup>15</sup> iadedi jiaie cominina cai isiruillamona, uanaicinodo cai jailla. Cristo isoi icana cai jaillamona, abina uiñoiticaí. Cristodi cai illaimana jira, caina ocuide.<sup>16</sup> Naga creyente naimiemo jainaiáide. Aillosiedicaí; iadedi daajena naimiemo jainaiáidicaí. Daajena naimiemo cai jainaiáillamona, naimie jitaillacino cai finoia, naimiena inocana jaiticaí. Temona dani coninina isiruicana jaiticaí. Daajena naimiemo cai jainaiáilla jira, cai comeciai daje isoi lloicana cai jailla.

*Cristomo jai cai duilla jira, naimie rafuedo birui jaidicaí*

<sup>17</sup> Omoimo nia lloiticue. Cai Namamo cue duilla jira, biena lloiticue. Jusiñamuina inoñedinó isoi dane omoí ifeno. Jaiie naimaci isoi itomoi. Naimaci comeciái di tainomo jai jaiie isoide. Cacarefiacaiñedimaci.<sup>18</sup> Jusiñamui rafuena uiñoñedimaci. Iena cacaiñedimaci. Abina naimaci uiñoñena jira, Jusiñamui díbeimo illana jaca uiñoñedimaci. Uanaicinona uiñoiacaiñedimaci.<sup>19</sup> Jearede rafuena naimaci finoia, meiruñedimaci. Naimaci comeciái oi acana rafuedo jai jaidimaci. Naga jearede isoide rafuena eo finocana jaidimaci;<sup>20</sup> iadedi Cristo rafuena omoí cacajamona, naimiena omoí raise uiñuamona, naimaci isoi omoí illena fueoñedomoi. Cristo rafuena omoí cacajamona, jaiena illena jai fueotomoi.<sup>21</sup> Naimiena cacajamona iena inotomoi. Naimiena cue llofuíamona, naimiena Cristo facaina lloraini llofuíamona, danomo omoí roracomo omoí ofia, Cristo uanaicinona cacadomoi.<sup>22</sup> Biena omoína llofuecabiticue. Cristona jaiie nia omoí inoñena isoi, omoí jaiñeno. Omoí comeciáimo jaiie iticinodo jaiñeno. Naga jearede rafue omoí comeciái oi acanamona faifcana jaiie jaidomoi. Iedo birui jaiñeno;<sup>23</sup> iadedi Cristo díbeimo omoí jai illanona, naimiemo omoí comeciái facajano. Jusiñamui omoína canuamona, omoí comeciái uaiállana meidocana jai.<sup>24</sup> Cristo rafuena birui inotomoi. Naimie jitaillacinodo omoí mai jai. Jusiñamuidi jeacino finocana omoí jaiñenana jitaide. Naimie marena isoi, marena icana omoí jaillana jitaide.<sup>25</sup> Ie jira tainona lloñeno. Cristomo daajena jai jainaiáilla jira, coninimo uanaicinona jaca omoí llono. Jainona omoí jifueñeno.<sup>26</sup> Maraiñedinona bu finoia, naimiemo riire llono; iadedi iese o lloia, naimiena jeare ñaiñeno. Jiaimie ona iciaia, naimiena jeare ñaiñeno. Naimie diga o rafue ia, naie rafue nairuido marena fino,<sup>27</sup> Taife ramo o fai raillano. Bu diga o nicino ia, iena raire marena o finoñenia, íbana oi acanaitio. Naie raire o feitañena jira, Taife ona jeacinona finotaite. Iese suiñellena, naicino raire marena fino. Iena feita. Iena dane abido llinoñeno.<sup>28</sup> Naimiemo ra illena, fíamona omoimona navui bu ia, creyentena naimie jai jailla jira, naimie dane fíñena; iadedi ra naimie jitaia, naimie maijíte. Ie maijiamona ie ra ollena, ucubena feñitoite. Ie mei dueredinona naimie jiaí canoite.<sup>29</sup> Jeare ñaiñeno; iadedi nie isoide rafue ia, marecinona ñaino. Ie mei naiemona jiaie cominina canoítomoi, Jusiñamui díbeimo naimaci raise illena.<sup>30</sup> Jusiñamuimo omoí jai jainaiáilla jira, jeacinona finoñeno. Jeacino omoí finoia, Jusiñamui Joreñodi sunaite. Naimiena sunaitaño. Naimie caimo illamona, caina jillotajana uiñoiticaí. Cristo dane abido billemona, naimie dine cai jaca illena, caina jai jillotata.<sup>31</sup> Jiaie cominina icifeno. Iciríñeno. Uaina uaitaño. Jiaie cominina jeare ñaiñeno. Naimacina duere jeare finoñeno;<sup>32</sup> iadedi coninina canua. Jiaie cominina duenai. Jiaimie diga omoí nicino ia, naimie finoca rafuena feítajanona, naimie diga marena ñaino. Naie rafuena dane abido llinoñeno. Cristo finoca rafue muidona, Jusiñamui omoí jeacinona jai feítaja isoi, jiaimie diga omoí rafue ia, naifuena omoí feita.

## 5

*Jusiñamui cominina jai cai illamona, naimie jitaillacinona finoiticaí*

<sup>1</sup> Jusiñamui isiruiga uruaidomoi. Naimie marecinona finua isoi, omoí fino.<sup>2</sup> Cristo caina isiruilla isoi, coninina isiruicana omoí jai. Naimie jitailla jira, caina isiruillamona, cai facaina naimie fiodaite. Cai jeacino oni dotallena naimiedi fiodaite. Naimie iese fiodailla jira, Jusiñamuina eo iobitade.<sup>3</sup> Jusiñamui cominidomoi. Omoí aiñede riño diga ifeno. Omoí iniñede iima diga ifeno. Rana nicidoñeno. Jearede rafue finuamo omoí comeciána facañeno.<sup>4</sup> Jearede rafuedo jaiñeno. Jamai ebena ñaiñeno. Meiredinona ñaicana jaiñeno. Naie isoide rafuedo creyentedi jaiñena; iadedi Jusiñamuimo iobillacinona fecacana omoí jai.<sup>5</sup> Ie aiñede riño diga icabitimiedi Jusiñamui illanomo duiñede. Cristo ie cominina sedajanomo duiñede. Ie iniñede iima diga icabitíñaiñodi Cristo ie cominina sedajanomo jiaí duiñede. Ie rana Jusiñamui ifomo naimie sedaja jira, rana nicidocabitimiedi Cristo ie cominina sedajanomo duiñede. Cue lloga rafuena jai raise cacadomoi.<sup>6</sup> “Creyente naie isoide rafuena finorede” bu lloia, naimie omoína jifueiacade. Naimie iese lluaña inoñeno. Jusiñamui naie jeacinona finocana jaidinona duere finoite.<sup>7</sup> Ie jira naimaci jearede finoca

rafuedo jaiñeno. Naimacina nabaiñeno. <sup>8</sup> Jusiñamuina jaie omoi uifñoñena jira, jitiñedinomo itomoi isoidomoi; iadedi cai Namamo omoi duillamona, uanaicinona ñinocana omoi jai. <sup>9</sup> Jusiñamuina omoi jai uifñoia, jeacinona omoi ñainonocaia, Jusiñamui jitaillacinona finocana jaitomoi. Uanaicinona llocana jaitomoi. <sup>10</sup> Buena o finoacania, Jusiñamui jitaillacinona o finuacinomo o comecina nano faca. Cai Nama jai lloga uaido omoi jaicabillamona, naimie jitaillacinodo jaca jai. <sup>11</sup> Jitiñedinomo ñia itino finoca rafuedo omoi jaiñeno. Naimaci finoca rafuemona marecinodi jaca comuiñede. Naimacimo: “Maraiñede” llono. <sup>12</sup> Iena cue meidaiilla jira, naimaci jearede bainino finoca rafuena ñaiacaiñedicue. <sup>13</sup> Marecinona omoi jaca finuamona, jiaie comini naimaci finoca rafue eo maraiñenana raise uifnotimaci. <sup>14</sup> Cai ofia, ñaena rocabiticaí:

Mai casi. Inñiñeno.

Jai fioidaitino isoidomoi;

iadedi omoi comeciaina Cristo jai lligaiñoite.

<sup>15</sup> Ie jirari omoi marena illena, abina rairuicana omoi jai. Jusiñamuina ñinoñedinomo ebena jaicabidimaci. Naimaci isoi jaiñeno. <sup>16</sup> Diga maraiñede rafue birui comuicabilla jira, cominina Cristo ñibeimo raise omoi itatajallena, nagarui Cristo jitaillacinona finocana omoi jai. <sup>17</sup> Ie jira ebe isoi jaiñeno; iadedi Cristo jitaillacinona uifñocana omoi jai. <sup>18</sup> Iocire omoi iacania, ñaiemona diga maraiñede rafue comuilla jira, jifaiñeno; iadedi omoi comeciaina naimie namatallena, Jusiñamui Joreño anamo raise omoi mai i. Iemei ñaiemona diga mare rafue comuite. Iocire jiai iitomoi. <sup>19</sup> Danomo omoi ofia, nana omoi comeciainomona diga isoide ruana iocire ro-rona. Omoi ruamona jiaie creyentiaí comeciaina ocuiñota. Cai Namamo omoi ruamona, omoi fillamona, omoi taillamona, naimiëna iobitaitomoi. <sup>20</sup> Cai Nama Jesucristomo omoi duillamona, ñie isoide rafue omoimo ia, cai Moo Jusiñamuimo iobillacinona jaca feca.

*Cristomo jai cai duilla jira, cai comini diga marena iacadicaí*

<sup>21</sup> Cristo anamo omoi illa jira, jiaie creyente baifemo omoi ñaiacinomo omoi comeciaina facañeno; iadedi cominina nagamiainana cano.

<sup>22-23</sup> Inrediñaiñuái, omoimo rafuena lloiacadicue. Cai Nama Cristomo omoi jainaiñaiilla jira, naimie jitailla jira, omoi ñiñiaí anamo raise omoi i. Naimaci uaina raise ñino. Cristo nana creyentiaí afemo illamona, naimacina naimie sedaja isoi, naga ini ie ai afemo illamona ñaiñaiñona sedaja. Cristodi nana creyentiaí imaci jeacinomona jillotajamona, naimie anamo itimaci. <sup>24</sup> Cristo anamo nana creyentiaí illa isoi, ñaiñaiñuái ñiñiaí uaina jaca ñnuu. <sup>25</sup> Airedino, omoimo jiai lloiticue. Nana creyentiaína Cristo isiruilla isoi, omoi ainiaina isirui. Nana caina naimie isiruillamona, naimie jitailla jira, cai facaina naimie fiodaite. Ie isoi omoi ainiaina omoi isirui. <sup>26</sup> Nana creyentiaí marena illena naimie fiodaite. Jusiñamui jitailla isoi, caina marebicaitate. Cristo fiodailla jira, Cristo jai lloga rafuena cai ñnuamona, cai jeacinomona jai jillobidicaí. <sup>27</sup> Fiodaite, nana cai creyentiaí comeciain marena illena. Cai comeciain jeaninana jitaide. Cristo abido bille facaisemo, Jusiñamui jitailla isoi cai marenana jitaide. <sup>28</sup> Naimie abi naimie isiruilla isoi, naga ini ie aina isiruilla. Iaimaiaí daajena jira, ie aina isiruitimiedi ie abina jiai isiruite. <sup>29</sup> Jaca bu ie abina enoiñede; iadedi ie abina sedade. <sup>30</sup> Naimiemo nana cai creyentiaí duilla jira, Cristo caina isiruillamona, caina sedade. Ie isoi nagamie ie aina isiruilla. <sup>31</sup> Bie jaiie lloga uaimona iena uifnoticaí. Moisés micori Jusiñamui lluaña jaie cuega: “Ie aina ollena, iima ie moona, ie ei diga ñainonocaite. Iemei dajena iitiñaiñaiñai”. <sup>32</sup> Naie llofuaiacinomona jiai rafuena fueoiticaí. Cristona ñaiticue. Creyentiaína ñaiticue. Naimiemo cai duillamona, daajena iticaí. <sup>33</sup> Dane lloticue: Ie abina isiruilla isoi nagamie ie aina isiruilla. Nagañaiño ie ini uai uaitañeno ñnuu.

## 6

<sup>1</sup> Uruiaí, omoimo rafuena lloiacadicue. Cai Nama jitailla jira, omoi eiñiaí uaina ñino. Omoi mootiaí uaina jiai ñino. Jusiñamuimona marenana jira, iaimaiaí uaina ñino. <sup>2-3</sup> Moisés micori Jusiñamui lloga uaina jaie cuega: “O moo uai ñino. O ei uai ñino. Marena o illena, raire o fiodaíñellena, iaimaiaína o isiruillamona, iaimaiaí uaina ñino” cuega. Jusiñamui diga lletarafuena lloite; iadedi bie nanoca rafuena lloite. <sup>4</sup> Mootiaí, omoimo lloiticue. Omoi uruina jamaí iciñeno; iadedi naimacina cai Namana naimaci uifñollena llofue. Naimaci ñinoiacañenia, abina naimaci uifñollena, naimacina isiruillamona, naimacina duere fino.

<sup>5</sup> Patrón anamo itino, omoimo lloiticue. Omoi patrones ocuica uaina ñino. Omoi maijiana naimaci ocuica, naimacina iobitallena, jaciruiocaida raise maiji. Omoi comeciainomona naimaci jitailla rana maiji. Cristo iedena, naimaci ocuica uaina ñino. <sup>6</sup> Omoimo naimaci eruiaí, naimacina iobitallena, marena maiji; iadedi omoimo naimaci eruiaíñenia, naimacina iobitallena, ñia marena maiji. Naimacina iobitallena maiji; iadedi Cristomo omoi duilla jira, Jusiñamui jitailla jira, omoi comeciain maiji raillamona, marena omoi

maiji. <sup>7</sup> Patrón facaina maijiacinomo dani comecina facañeno; iadedi iocire maiji, cai Nama facaina omoi maijidoi dena. <sup>8</sup> Biena uifotici: Marena bu maijiia, cai Nama Cristomona ibana ico feiñoite. Patrón anamo itino iena feiñoitimaci. Patrón anamo ifedino iena jiai feiñoitimaci. <sup>9</sup> Patrones, omoimo lloiticue. Omoi Nama Cristo monamona omoimo eruaila jira, Cristo monamona naimacimo jiai eruaila jira, omoi anamo itinona marena fino. Naimacina riire ocuiñoeno. Naimacina jeare finoñoeno. Cristo nana naimie cominimo daje isoi comecina lloide. Ie jira omoi anamo itinona marena fino.

*Cristomo jai cai duilla jira, naimie cai comeciaina ocuiñotaite*

<sup>10</sup> Ie muidona nia lloiticue. Cai Namamo omoi duilla jira, naimiedi omoi canocabillamona, omoi comeciaina ocuiñotacana omoi jai. <sup>11-12</sup> Ero, Taife caina ramo jifueoicaida faite. Caina anafeditiacade. Naimie isoidino caina jiai anafeditiacadimaci. Naimacidi aillosie. Naimaci anamo nana Jusiñamuina ifnoñedino jai itimaci. Jitiredinomo naimaci illanona, Jusiñamui dibeimo ifnedimaci. Beno enruemo itimaci. Jusiñamui illanomo duiñedimaci. Cominina ñaifedicue. Taifena, Janabana, Dofina, jananiaina, Dusiñifona ñaiticue. Naimaci isoide joreñuaina ñaiticue. Cai dibeimo ifnedimaci. Naimacimona abina omoi rairui. <sup>13</sup> Jobaime illa facaiseconi, soldaduai imaci ra diga imaci abiaina riidotimaci. Cinturón jitadimaci. Lloemamona finoca ra jogobemo jitadimaci. Zapatona jitadimaci. Uico riidollena, naimaci uico riidua rana llinotimaci. Ifogi icona jitadimaci. Lloebina llinotimaci. Ie isoide. <sup>14</sup> Cristomo omoi comeciaina facajanona, uanaicinona jaca llono. Jusiñamui jitailla isoi, marecinona finocana omoi jai. <sup>15</sup> Cristo rafuemona omoi comeciaina uri itatajamona, iena meiruiñoeno llocana uiño. <sup>16</sup> Taifemona nana jearede rafuedi comuide. Naimiedi ramo faiacana jai jaide. Cristona omoi ifnuamona, Taife ramo faiacinona jamai. <sup>17</sup> Jusiñamui caina jai jilloitajana jai uifotomoi. Iena omoi uifnuamona, Taife ramo faiacinona ifnoñoeno. Taifena anafenollena, Jusiñamui Joreño Jusiñamui uaimona fueo. <sup>18</sup> Jusiñamui Joreño omoina canuamona, Jusiñamui diga ñaicabi. Taife ramo omoimo faia, iena omoi ifnoñellena, Jusiñamui omoina canoite. Iese abina omoi rairuia, Taifena anafeditaitomoi. Taife ramo faiacino naimaci ifnoñellena, nana jiaie creyentiaia facaina jiai jicabi. <sup>19</sup> Cue facaina jiai omoi jii. Marefodo nana Cristo ie rafuena cue lluaana omoi jii. Cristo nana cominina jilloitaiacanana nia lloiacadicue. <sup>20</sup> Naie rafue cue lloana, Cristo cuena oretate. Naie rafuena cue llua muidona, cárcelmo iticue. Cue jitailla diese iena marefodo cue lluaana mai omoi jii.

<sup>21-22</sup> Tíquico omoi dine oretaiticue. Naimiedi cue isiruiga ama. Naimiedi ifnogamie. Cristo rafue facaina cuena canocabide. Omoimo cue illana lloite. Cue finoca rafuena lloite. Naimiemona cue rafuena fidiitomoi. Iena cacajamona omoi comeciaina ocuiñoitomoi. <sup>23</sup> Cai Moo Jusiñamui, cai Nama Jesucristo diga, omoina uri itatajamona, Cristona jai omoi ifnuamona, coniniri uri icana jaillana jitaidicue. Iaimaiaia omoina isiruillamona, iaimaiaia omoi ifnuamona, nana jiaie creyentiaia isiruicana omoi jai. <sup>24</sup> Cai Nama Jesucristona omoi eo isiruilla jira, Jusiñamuidi omoina duenailasa. Mai. Pablodicue.

## FILIPOMO ITE CRISTONA HNOTINOMO PABLO ORETAGA RABE

### *Uaiduacino*

<sup>1-2</sup> Filipomo ite creyentiaí, Jesucristomo jai omoi duillamona, bie carta omoi dine oredicue. Pablodicue. Timoteo cue diga ite. Naimie cominina coco illamona, Jesucristo dibeimo maijicabidicoco. Omoimo coco uaina oredicoco. Omoi creyentiaí illacomínimo coco uaina ua oredicoco. ¿Nigacino? ¿Nie isoidomoi? Cai Moo Jusiñamui, cai Nama Jesucristo diga, omoína jai duenaite. Iena uiñocana mai omoi jai. Iaimaiaí omoína uri jai itatate. Iena omoi uiñocana mai omoi jai.

### *Jusiñamuimo iobillacino fecade*

<sup>3</sup> Naga icaiño omoína cue comeciá, Cristo rafuedo omoi jailla jira, Jusiñamuimo iobillacinona fecadicue. <sup>4</sup> Naga icaiño Jusiñamui diga cue ñaia, omoi facaina caimare jüdicue, <sup>5</sup> Jesucristo rafuena cue llua cuena omoi canua jira. Nano bie rafuena omoi cacajamona, cuena canodomoi. Cuena nia canodomoi. <sup>6</sup> Jusiñamuidi omoi comeciaina jaié marena itataja facaiseconi mare rafuena tainede. Omoi comeciaino mare rafue illicinona tainede. Cristo Jesús dane billiruiamo Jusiñamui bie rafuena fuidoite. Iese fuidollemo ocuridicue. <sup>7</sup> Omoimo iese cue comeciina cue facajia, omoína cue isiruilla jira, cuemona mare. Cárcelmo cue illamona, Jesucristo rafuena cue riiduanu, Jesucristo rafuedi unaicino cue llua, Jusiñamui cuena canocabide. Iemona naimie caina duenaillana jai uiñoticaí. <sup>8</sup> Cuena omoína Cristo Jesús isiruitajamona, nana omoína isiruiticue. Jusiñamuidi unaicinona cue llua uiñote. <sup>9</sup> Jaié cominina eo isi-isiruicana omoi jaillana, Jusiñamuina raise omoi uiñollena, nie isoide rafue omoimo ia, abina raise omoi uiñollena, Jusiñamuimo jicabidicue. <sup>10</sup> Iese omoína jitaicue. Mare rafuedo omoi jaiacanana jitaicue. Jaiiruido Cristo abido biite. Ie jira omoi comeciá jeanillena jitaicue, Jusiñamui jitailla isoi omoi comeciá marena illena. <sup>11</sup> Jusiñamui jitailla isoi omoi illamona, mare rafuena jaca omoi finuana jitaicue. Jesucristona omoi ñnuamona, naimie omoína iena finotarede. Iese omoi finocana omoi jaia, Jusiñamuina eo iobitaitomoi.

### *Cárcelmo Pablo illamona, diga comini Jesucristo rafuena cacadimaci*

<sup>12</sup> Cue amataiaí, bie rafuena omoi uiñuana jitaicue. Cárcelmo cue illamona, diga comini Jesucristo rafuena cacadimaci. <sup>13</sup> Cai illaíma jofomo itino cacadimaci. Nana bene itino jai cacadimaci. Jesucristo rafuena cue llua jira, cárcelmo iticue. Iena jai uiñotimaci. <sup>14</sup> Cárcelmo iticue; ia jaciruiñeno Cristo rafuena nia lloticue. Iemona diga creyentiaí naimaci comeciaina ocuiñuanona, Jusiñamui uaina jaciruiñeno marefodo birui cue isoi llotimaci. Navui jaciruitimaci.

<sup>15</sup> Cuena uradoillamona, cue afemo iacanamona, damierie Cristo rafuena llofuetimaci. Jaié llofueraini marecinona finuacanamona llofuetimaci. <sup>16</sup> Cuena naimaci isiruilla jira, llofuetimaci. Cristo rafuena cue riiduanona, cárcelmo cue illana uiñotimaci. <sup>17</sup> Cue afemo iacadino mare comeciainona llofueñedimaci. Iemona cuena duere finoacadimaci. <sup>18</sup> Iese itimaci; iadedi uradoillamona naimaci llofuaia, marecinona finuacanamona naimaci llofuaia, cuemona damamei iesede. Cristo rafuena llocana jaidimaci. Iena jai iobidicue. Nia iobiticue. <sup>19</sup> Cueri Jusiñamuimo omoi jiiano, Jesucristo Joreño cuena canuano, nana cuemo ite rafuemona jilloiticue. Iena cue uiñuamona, nia iobiticue. Jesucristo Joreño ie Moo diga daje. <sup>20</sup> Cue finolle rafuemona cue meiruñellena eo jitaicue. Jaié cue finocabilla isoi, Cristona marefodo birui iobitaiacadicue. Cue nia fiodaíñenia, naimiema iobitaiacadicue. Cue fiodaíllemona naimiema jaié iobitaiacadicue. Iemona jaié creyentiaídi Jusiñamuimo iobillacinona fecaitimaci. <sup>21</sup> Nia cue fiodaíñenia, Cristo rafuena nia lloiticue. Mare; iadedi cue fiodaia, naimie dine cue illena jaié eo mare. <sup>22</sup> Nia cue fiodaíñenia, diga comínimo Cristo rafuena nia lloiticue. Ie jira nie isoide cue illana cue comeci niese rainide. <sup>23</sup> Nia raise uiñoñedicue. Jiaicaiño fiodaicaiñedicue. Jiaicaiño fiodaicadidicue. Cue comeci Cristo dine jiaicade. Nainomo cue illena cuemona eo mare; <sup>24</sup> iadedi omoína cue canollena, nia fiodaicaiñedicue. Cue nia fiodaíñenia, omoína nia canoacadicue. <sup>25</sup> Cue comeciina jai facajano, raité: “Nia fiodaíñeiticue. Omoi diga nia cue illana uiñoticue”. Cristona omoi ñnotacana omoi jaillana jitaicue. Omoi ñnuamona, caimare omoi illana jaié jitaicue.

<sup>26</sup> Iemei omoi dine dane cue illa jira, cueri Cristomo iobillacinona eo fecaitomoi.

<sup>27</sup> Cue fiodaia, cue fiodaíñenia, Cristo ie mare rafuedo omoi jai. Omoína cue cioia, omoína cue cioíñenia, mare rafuena omoi finuana fidiacadidicue. Cristo rafuena ñnocana omoi jaillana, omoi comeciá daje isoi lloillana, Cristo rafuena omoi riiduanu fidiacadidicue. <sup>28</sup> Omoi dibeimo ifedinona omoi jaciruiñenana fidiacadidicue. Iese omoi ia, Jusiñamuidi omoi

dibeimo iñedino faifillana uifñotaite; iadedi naimiedi omoina omoi jilluana uifñotaite. Naimie diga omoi jaca illena, omoina jai jillotate. <sup>29</sup> Jusiñamui Cristona omoi ñnollena omoina fetode; iadedi Cristori omoi duere sefuillena omoina jai fetode. <sup>30</sup> Omoi nairaimo cue nano illa facaise Cristona ñnoñedinomona duere sefuidicue. Iena ciodomoi. Cárcelmo birui cue illamona, naimacimona iese nia birui duere sefuidicue. Iena birui fididomoi. Naimacimona cue isoi birui jai duere sefuidomoi.

## 2

### *Jiaie creyentiai diga raise omoi illacino*

<sup>1</sup> Jiaie creyentiai diga omoi marena illena, dajerie rafuena lloiacadicue. Cristomo omoi duilla jira, coninina omoi comeciai ocuiñotajamona, Cristo omoina isiruillana omoi uifñuamona, Jusiñamui Joreño nana omoina nabaitajamona, coninina omoi comeciai eo duenaillacino illamona, <sup>2</sup> cue comecina caimare itata. Omoi comeciai daje isoi lloillamona, coninina omoi isiruillamona, daje uaido omoi comeciai lloillamona, cue comecina caimare itata. <sup>3</sup> Jaca buena finoñeno, jiaimie afemo jamai omoi illena. Abina iedumona buena finoñeno. Abina iedoñeno jiaimacimo comeciaina faca: “Naimaci cue baifemo faite”. <sup>4</sup> Omoi abimo ite rafuemo omoi comeciaina faca; iadedi jiaimaci abimo ite rafuemo comeciaina jai faca. <sup>5</sup> Cristo Jesús illa isoi omoi illa. Ie rafuemo comecina janore facade; iadedi naimacina canollena, jiaie cominimo ite rafuemo naimie comecina eo facade. <sup>6</sup> Naimiedi jaca Jusiñamui; iadedi naimiedi Jusiñamui diga danomo jaca illana jitañede. Naimie comecina iemo facañede; <sup>7</sup> iadedi iena fañonocaida, ie Moo ocuica rafuena finollena, iimana naimie jaide. <sup>8</sup> Jamai bue isoidimiena jaide; iadedi ie Moo uaina ñnote. Ie Moo jitailla jira, fodaite. Maraiñede rafue finodimie isoi, cruzmo fodaite. <sup>9</sup> Ie jira, naimiena iobitallena, Jusiñamui naimie ecimo naimiena abido ote. Nana jiaie mameci baifemo faite mamecina jitade. <sup>10</sup> Jesúsna nana comini sedallena, naimiemo iobillacinona naimaci fecallena, Jusiñamui naimiena iese iobitate. Jusiñamui jaienisai naimiemo iobillacinona fecaitimaci. Nana comini naimiemo iena fecaitimaci. Fiodaitino jillobillamona, naimiemo jai fecaitimaci. <sup>11</sup> Nana lloitimaci: “Jesucristodi cai Nama”. Iese naimaci llua jira, cai Moo Jusiñamuina iobitaitimaci.

### *Maraiñedino comeciaina lligaiñotomoi*

<sup>12</sup> Cue isiruiga amatiaidomoi. Ie Moona Jesucristo ñnua jira, cue llua nia ñnocana omoi jai. Jai omoi diga cue ia, Cristo rafuena raise ñnotomoi. Birui omoi diga iñedicue; iadedi Jusiñamuina omoi ñnua jira, naimie jitailla rafuena jacruioicaida, finocana omoi jai. <sup>13</sup> Ie jitailla rafuena omoi finollena, Jusiñamui omoi comeciaina birui marena itatate. Naimie omoina iena finotaiacade. Naimie mare jitaillacinomona, omoina iena finotaite. <sup>14</sup> Nana omoi finolle rafuemo abi jafueoicaiñeno fino. Uai uaitañeno fino, <sup>15</sup> jiaie comini omoiñi ñai raillanona, Jusiñamui uruiaina omoi illa jira, omoi comeciai jeañidomona marena omoi i. Maraiñede comini motomo itomoi. Naimaci comeciai jearede. Naimaci comeciaina lligaiñotomoi, naimacimo ite jeacinona uifñotallena. <sup>16</sup> Jesucristo rafuena llocana uitomoi. Iena naimaci ñnuamona, bie rafue Jusiñamui dine cominina jaca itatate. Cristo dane billirui omoiñi cue iobiacana jira, omoi dine: “Tainona jaiel lloticue” cue raillano, Jesucristo rafuena llocana nia omoi jai. <sup>17</sup> Jusiñamuina omoi ñnua jira, naimiemo ailluena ucubena caidiñeno fecadomoi. Ie baifemona cue fodaillana Jusiñamui jai jitaia, iobiticue. Omoi diga jai caimataiticue. <sup>18</sup> Ie muidona caimare itomoi. Cue diga caimataitomoi.

### *Pablo Timoteona orede*

<sup>19</sup> Cai Nama Jesús jitaia, omoi dine Timoteona raire oretaiacadicue. Cue dine abido naimie bia, omoi rafuena cue fidiano jai iobiticue. <sup>20</sup> Cue dine jiaimo naimie isoi iñede. Dama naimie omoi ite rafuemo comecina facade. <sup>21</sup> Jiaimo dani naimacimo ite rafuemo comeciaina facadimaci. Jesucristo rafuemo comeciaina facañedimaci. <sup>22</sup> Timoteodi mareuidimiena uifñotomoi. Cue jito isoide diga, Cristo rafuena lloticoco. <sup>23</sup> Cárcelmo cue illa rafuedi nia fufñede. Iena cue uifñollemona, naimie omoi dine raire oretaiacadicue. <sup>24</sup> Cárcelmona cue jino jaillena cai Nama jitaia, omoi dine jai raire jaiacadicue.

### *Pablo Epafroditona abido orede*

<sup>25</sup> Epafroditodi cue ama isoide. Danomo Cristo rafuena lloticoco. Danomo Cristo rafuena riidoticoco. Naimiena oredomoi, cuena canollena. Naimiena omoi dine abido oretaiacadicue, <sup>26</sup> omoi dine naimie illemo naimie comecina facaja jira. Naimie navui duillana omoi fidia jira, naimie uri iñede. <sup>27</sup> Navui niadedi fodaicanamona jillode, Jusiñamui naimiena duenailla jira. Naimie fodaillamona, eo cue duere sefuiñellena, Jusiñamui cuena jai duenaite. <sup>28</sup> Ie jira Epafroditona eo raire oretaiacadicue, naimiena omoi ciuanona omoi iobillena. Iemei jai uri iiticue. <sup>29</sup> Cai Nama mamecidi naimiena eo caimare feño.

Jiaie naimie isoidinona omoi dine ia, naimacina iobita. <sup>30</sup> Cristo facaina navui naimie llofuiamona, omoi facaina cuena canollena, niadedi fiodaite. Omoi facaina naimie cuena canuano, cue dine omoi iñena jira, cue muidona niadedi naimie abina faifitate.

### 3

*Moisés micori llogacinuaido jaidinomona abina rairui*

<sup>1</sup> Cue amatai, omoimo nia lloiticue. Cai Namamo omoi duilla muidona, iobi. Omoi bie rafuena dane cue cueia, cuemona sefuinide. Iena dane omoi cacajamona, omoina canoite. <sup>2</sup> Jearede rafue finode cominimona abina rairui. Jiconiai isoidimaci. Jillobillena abi diana llofuetimaci; iadedi cuemonadedi jamai ebena tuquica isoidimaci. Naimaci abiaina detatatimaci; iadedi naimaci comeciai nia raise finoñedimaci. <sup>3</sup> Cai abiaina detatajamona, cai comeciai raise finoñede. Cai comeciai raise finuamona, Jusiñamui Joreñodi caina Jusiñamui raise sedatate. Cristo Jesúri iobidicai. Cai jillobillena, cai abiaina detatañedicai. <sup>4</sup> Buena cai finuamona cai illamona jillobidicaidena, cue jilluana raise uiñoticue. Cue cominimona jamai cue isoiñedicue. <sup>5</sup> Iena ja ñaiticue. Cue jeicimona ocho digarui illamona, cue abina degacue. Cue eirue jitodi Israel micori. Benjamín isie imiedicue. Cue cominidi judiui imacina jira, cue uruenamona judiui uaido ñaiticue. Fariseo cue imiēna jira, Moisés micori llogacinuaido fainonocaiñeno iedo eo jaidicue. <sup>6</sup> Iena eo cue jitailla jira, Cristona inotinona duere finodicue. Nana Moisés micori llogacinuaido eo raise jaidicue. Iena raise finodicue. <sup>7</sup> Iese jiaie iticue. Cue comeci iena: “Mare” raite; iadedi Cristona jai cue inua jira, birui nana bie rafuedi cuemona ieñedicuui. Naie isoide rafue cuemo illamona, cue jeacinomona jilloñedicue. <sup>8</sup> Dane lloiticue: Cue Nama Cristo Jesúsna cue uiñoiacana jira, jiaie rafue cuemona ieñedicuui. Naimiēna cue uiñuacínodi nana jiaie rafue baifemo faite. Jeacuai isoi jai maraiñena jira, naimie muidona cue jiaie illacinona jai sofecaidicue. Iena sofeticue, Cristo dibeimo raise cue illena, <sup>9</sup> naimiemo raise cue duillena. Moisés micori llogacinuaido cue jillamona marebicaiñedicue; iadedi Cristona cue inuamona marebicaidicue. Cristona cue inua muidona, Jusiñamui cuena jai marebicaitate. <sup>10</sup> Cristona raise uiñoiacadicue. Naimie fiodaite; ia iemona jillode. Naiemona cue comeci marena illena, naimiēna jillotate uaina uiñoiacadicue. Naimie rafuena cue llamona, naimie isoi duere sefuiticue. Iemona niba fiodaiticue. <sup>11</sup> Cue fiodaille mei, fiodaillamona naimie isoi cue jillolemo ocuridicue. Ie jira naimiēna uiñocana jaiacadicue.

*Pablo jitaillacino*

<sup>12</sup> Jusiñamui jitailla isoi, nia raise marebicaiñedicue. Nia fiebidicue; iadedi nia jai jaicaidicue, iena illena. Iena cue illena, Cristo Jesús cuena jiaie uaidote. <sup>13</sup> Cue amatai, iena nia iñedicue; iadedi jiaie cue finoca rafuemo comecina facañedicue; iadedi cuemo nia suiñede rafuemo birui eo ocuridicue. <sup>14</sup> Cue risaillinomo iocire jaidicue, ibana cue feiñollena. Ieri Cristo Jesúsdo Jusiñamui cuena uaidote, monamo cue illena. <sup>15</sup> Caimona Cristo rafuena raise abina uiñocaidino, bie rafue diga cai comeciai lloicana mai cai jailli. Dajerie jiaiforie comecina lloia, Jusiñamui naimacina uanaicinona raise uiñotaite; <sup>16</sup> iadedi caimo jai ite uiñuacínodo mai cai jailli.

*Pablo illa isoi cai illa*

<sup>17</sup> Cue amatai, Cristona cue inua isoi, naimie rafuedo cue jailla isoi, nana omoi jiaijai. Cai illa isoidinomo omoi eruai, naimaci isoi omoi illena. <sup>18</sup> Jiaie omoimo llouidicue. Cue sunaillamona dane lloiticue. Ailluena comini Cristo fiodailla rafuena birui jitañedimaci. <sup>19</sup> Ja muidomo faiftimaci. Naimaci Jusiñamuidi imaci guille, dani guille ramo naimaci comeciai facaja jira. Jearede rafue finuamona, meiruñeno naie rafueri iobidimaci. Naimaci ecimo ite ramo comeciaina facadimaci. Naimaci isoi cai iñena. <sup>20</sup> Monamo ite Jusiñamui mo cai jainaiilla jira, monamona cai Jilloitaraima abido dane billemo ocuridicai. Cai Nama Jesucristodi cai Jilloitaraima. <sup>21</sup> Naimie bia, cai fiodaille abina meidoite, naimie ebirede abi isoi cai illena. Nana ra naimie anamo itatate uaido caina iese meidoite.

### 4

<sup>1</sup> Ie jira Cristo rafuena inocana nia omoi jai. Cue amatai, omoina isiruiticue. Omoina cioacadicue. Omoiri iobidicue. Cue llamona Cristona jiaie inotomoi. Ie rafuedo omoi jailla jira, iobidicue. <sup>2</sup> Evodia raillañaiñomo rafuena lloiacadicue. Síntique raillañaiñomo jai lloiacadicue. Cai Namamo iaiñuui duilla jira, iaiñuui comeci daje isoi lloillana jitaicue. Coniño diga icirillana jitañedicue. <sup>3</sup> Cue mare nabai, omo jicanoticue, iaiñuaina canollena, coniño diga iaiñuui dane marena ñaillena. Cristo rafuena cue diga llotiañuui. Clemente diga llotiañuui. Cue diga llofueuidino diga llotiañuui. Monamo ite rabenicomo nana naimaci mameciai jai cuega. Jusiñamui diga monamo jaca iite comini mameciai diese cuega.

*Iobillacino, uri illacino diga*

<sup>4</sup> Cai Namamo omoi duilla jira, jaca iobi. Dane lloiticue: Iobi. <sup>5</sup> Omoi riinana nana comini uifuaana jitaidicue. Cai Nama dane abido billirui iaiei ite. <sup>6</sup> Ie jira buemo omoi comeciaina facajanona, jaca llicidaiñeno. Naga omoi jitaillacino Jusiñamuimo lloño. Naimiemo jica. Naimiemo omoi jiiia, naimiemo iobillacinona jiaie fecae. <sup>7</sup> Iemei Jusiñamui omoi comeciaina uri itataite. Omoi comeciai facajacino baifemo omoina uri itataite. Cristo Jesúsna omoi iñuano, omoi comeciaina eenoite. <sup>8</sup> Cue amatiaie, ie muidomo daje rafuena nia lloiticue. Uanaicinomo comeciaina faca. finogafuemo comeciaina faca. Mare rafuemo comeciaina faca. Ebirede jeanide rafuemo comeciaina faca. Iobillafuemo comeciaina faca. Bie isoide mare rafue ia, iemo comeciaina faca. Nana bie isoide rafuemo comeciaina faca. <sup>9</sup> Nana cuemona omoi fueoga rafuedo omoi jai. Nana cuemona omoi feiñoga rafuedo omoi jai. Nana cuemona omoi cacaja rafuedo omoi jai. Nana cue finoca rafuena omoi ciua rafuedo omoi jai. Iemei omoi comeciaina uri itatajanona, Jusiñamui omoi diga iite.

*Filipomo ite comini Pablona eo canodimaci*

<sup>10</sup> Cai Namari iobidicue, diga irui illamona dane cuena omoi comecia jira. <sup>11</sup> Cuemo comeciaina facadomoi; iadedi bu jaca binide, ucubena cue dine atillena. Bumo cue jitaillacinona lloñedicue. Janore ra cuemo ia, ailluena ra cuemo ia, caimare jai iticue. Cuemo ite ra diga caimare illana jai uifnoticue. <sup>12</sup> Duere cue illana uifnoticue. Duenino cue illana jiaie uifnoticue. Nie isoi cue ia, uri cue illana jai uifnoticue. Cue monia, cue aimetaia, janore ra cuemo ia, ailluena ra cuemo ia, jaca uri iticue. <sup>13</sup> Nie isoide rafue cuemo ia, Cristo cue comecina oculiñotaja jira, naga rafuena finocana jaiticue. <sup>14</sup> Cue duere sefuillamo cuena omoi duenaillamona, cuena omoi canua jira, cuemona mare. <sup>15</sup> Omoimo Cristo rafuena nano cue llamona, cuena canodomoi. Macedoniamona cue jailla mei, jiaie creyentiaie cuena canoñedimaci. Dani omoi cuena canodomoi. Iena uifnotomoi. <sup>16</sup> Tesalónicamo nia cue ia, diga icaiño ucube cuemo oredomoi; <sup>17</sup> iadedi omoi ucubena nicidoñedicue; iadedi cuena omoi canuamona, Jusiñamuimona ibana omoi feiñuana jitaidicue. <sup>18</sup> Nana cue jitaillena rana jai feiñoticue. Ailluena cuemo ite. Epafroditomona cuemo omoi oretaga rana feiñoticue. Jusiñamuimo fecadomoi isoide. Jusiñamui dibeimo cue maijia jira, mare rana finodomoi. Ie jira Jusiñamui iena gaide, caimare soride rana cai gaia isoi. Naimie iena jiaie feiñote. <sup>19</sup> Naimiemo ailluena ite ramona cue Jusiñamui nana omoi jitaillena rana fecate, Cristo Jesúsna cai duilla jira. <sup>20</sup> Cai Moo Jusiñamuimo iobillacino jaca cai fecacabillasa. Iena jitaidicue.

*Fuiduacino*

<sup>21</sup> Cristo Jesús mamecido cue facaina nana creyentiaimo cue uaina lloño. Cue diga amatiaie imaci uaina jiaie oredimaci. <sup>22</sup> Nana benomo ite creyentiaie imaci uaina oredimaci. Cai illaima César jofomo maijidino imaci uaina ua oredimaci. <sup>23</sup> Cai Nama Jesucristo omoi comeciaina jaca caimare itatajana jitaidicue. Mai. Pablocicue.

## COLOSAMO ITE CRISTONA HNOTINOMO PABLO ORETAGA RABE

### *Colosamo ite creyentiaimo Pablo carta orede*

<sup>1-2</sup> Colosas railla nairaimo ite creyentiai, Pablodicue. ¿Nie isoidomo? Bie carta omoi dine oredicue. Timoteo cue diga ite. Coco uaina oredicoco. Cristomo naimie jiai duilla jira, naimiedi cai amana eruaide. Jusiñamui jitailla jira, ie rafue lllollena, Jesucristo oretagamiedicue. Naimiemo jai duidomoi. Naimiena raise ñnocana jaidomoi.

### *Naimaci facaina Pablo jüde*

<sup>3</sup> Cai Nama Jesucristo Moodi Jusiñamui. Omoi facaina Jusiñamuimo coco jüia, naimiemo iobillacinona jaca fecadicoco. <sup>4</sup> Jesucristona nia omoi ñnuana coco fidia jira, nana creyentiaina nia omoi isiruillana coco fidia jira, iobillacinona jaca fecadicoco. <sup>5</sup> Jusiñamui dine ico omoi illemo omoi ocurilla jira, iese icana jaidomoi. Jesucristo rafuena nano omoi cacajamona, Jusiñamui dine illemo ocuridomoi. Omoi jai cacaja rafuedi uanaicino. <sup>6</sup> Diga illanomo, diga comini iena jiai jai cacadimaci. Iena ñnuamona Cristo dibeimo naimaci comeciai jai meidoga. Iena ñnuamona marecinodo jai jaidimaci. Ie isoidomoi. Jusiñamui omoina duenaillana jai uñnotomoi. Uanaicinona omoi raise uñnuamona, iedo jaidomoi. Ie marecinona finocana jaidomoi. <sup>7</sup> Epafrafr luamona naie rafuena cacadomoi. Naimiena isiruiticai. Jesucristo dibeimo coco isoi, naimie jiai llofuiana maijide. Omoi motomo cai iñena jira, Cristo dibeimo cai facaina naimie raise maijuide. <sup>8</sup> Naimiemono omoimo ite rafuena fididicoco. Jusiñamui Joreño omoina canuamona, jiaie creyentiaina omoi isiruillana fididicoco.

<sup>9</sup> Ie jirari omoi facaina jaca jüdicoco. Omoi rafuena coco fidiomona, Jusiñamuimo omoi finolle rafuena omoi eo raise uññollena jüdicoco. Nana naimiemo ite abi uñnuacinona omoi eo raise uñnuana jitaidicoco. <sup>10</sup> Cai Nama: “Mare” omoina raillana jitaidicoco. Naga mare rafue omoi finocana jaillana jitaidicoco. Jusiñamuina raise omoi uññocana jaillana jitaidicoco. <sup>11</sup> Nie isoido ramo omoi jiria, nana naimie siño ebirede uaido naimiedi omoi comeciaina ocuñnotajana jitaidicoco. Iocire omoi illana jitaidicoco. <sup>12</sup> Caina ie cominina naimie jai itataja jira, nana ie comini diga naimie illanomo ico jaca iitica. Ie muidona naimiemo iobillacinona omoi fecacabillasa. <sup>13</sup> Jeacino anamo navui cai illa jira, jitiiredinono iticai isoidicai. Jeacino anamona caina Jusiñamui jai jillotajamona, caina ie isiruiga Jito cominina itatate. <sup>14</sup> Naimie Jito muidona cai jeacinomona jillobidicai. Naimiedi cai jeacinona oni dotajamona, naiena jai feitate. Naiena ico abido llinofeite.

### *Cristo muidona Jusiñamui ricacillifue anamo iñedicai*

<sup>15</sup> Jusiñamuina cionidicai; iadedi Cristomona naimiena uñnoticai. Jaca bue nia iñenia, Crsito nano jaca ite. <sup>16</sup> Cristo uaido Jusiñamui nana rana finode. Monamo ite rana finode. Eniruemo ite rana finode. Cai ciua rana finode. Cai cioiñena rana finode. Cominina finode. Ie jaienisaina finode. Janabana finode. Dofina finode. Taifena finode. Cristo uaido nana rana finode. Cristona iobitallena, nana rana finode. <sup>17</sup> Nano dofoconi Cristo jaca ite. Naimie uaido naga ra marena icana jaide. <sup>18</sup> Naimiedi nana creyentiai imaci illaima. Fiodaitinomona naimie nano jillodimiena jira, cai fiodaia, ico jiai jilloitica. Naimiedi naga ra baifemo faite. Naimiedi nana comini baifemo jiai faite. <sup>19</sup> Jusiñamui isoi naimie ite. Jusiñamui jitailla jira, Cristomo nana Jusiñamuimo ite siño uaidi ite. <sup>20</sup> Cristo finoca rafue muidona, Jusiñamui nana cominina naimie dibeimo itataiacade. Ua nana naimie dibeimo iñedinona naimie dibeimo itataiacade. Cruzmo Cristo fiodailla jira, Cristo diaillamona, Cristona cai ñnoia, Jusiñamui ricacillifue anamo jai iñedicai. <sup>21</sup> Jusiñamui dibeimo navui iñedomoi. Naimiena nabaillana jitañnedomoi. Omoi comeciainona naimiena enoidomoi. Maraiñedinona finouidomoi; <sup>22</sup> iadedi cruzmo naimie abi illanona, nainomona Cristo fiodailla jira, naimiedi naimie dibeimo omoina itatate. Jusiñamuimona mareuidinona omoi illena, omoimo nicino iñellena, Jusiñamui dine ico omoi ia, naimie dibeimo omoina jai itatate. <sup>23</sup> Naimiena raise ñnocana omoi jaia, danomo abido omoi jaiñenia, iese iitomoi. Cristo rafuena navui cacadomoi. Ie jira Cristo dine omoi illemo ocuridomoi. Diga comini naie rafuena jai cacadimaci. Naie rafuena llocana jaidicue.

### *Pablo Cristo rafuena llofuecabite*

<sup>24</sup> Omoimo Cristo rafue cue lua muidona, duere sefuidicue; iadedi iocire nia iticue. Omoi creyentiai facaina Cristo isoi duere sefuidicue. <sup>25</sup> Jusiñamui cuena oretaja jira, naimie rafuena ailluena cominimo eo raise cue lllollena, omoi creyentiai facaina llofueticue. <sup>26</sup> Cai jaiagai bie rafuena uññedimaci; iadedi Jusiñamuina ñnotinodi iena birui uñnotimaci.



<sup>27</sup> Jusiñamui naimacina iena uiñotade. Naie rafuedi eo ebirede. Judíuafiñedinodomo; iadedi bie rafue omoimo jai duide. Omo; comeciaino Cristo illana jai uiñoticaí. Ie jira naimie ebirede illanomo iico omo; jaca illemo ocuridomo. <sup>28</sup> Cristo rafuena llofueticaí. Nana cominimo Cristo dibeimo naimaci iacanana lloticaí. Cristona naimaci eo raise inollena, Cristo isoi naimaci marebicaillena, naimaci abi uiñuana lloticaí. <sup>29</sup> Ie jira bie rafuena llofuecabiticue. Nana Cristo cuemo iga uaido eo llofuecabiticue.

## 2

<sup>1</sup> Omoimo eo comecina facadicue. Iena omo; uiñuana jitaídicue. Laodicea railla nairaimo jiai eo comecina facadicue. Diga comini cuena nia cioifedimaci. Naimacimo jiai eo comecina facadicue. <sup>2</sup> Omo; comeciaina ocuiñotallena, iese omoimo comecina facadicue. Dani omo; isiruillamona, ni Jusiñamui rafuena omo; eo raise marena uiñollena, omoimo comecina facadicue. Naie rafuedi Cristona llote. <sup>3</sup> Cristodi nana rafuena uiñote. Eo abina uiñote. Naimie rafue raise cai uiñollena, naimie caina canocabide. <sup>4</sup> Naimaci ñaiamona omoína bu jifuei raillanona, buena omoimo lloticue. <sup>5</sup> Omo; dine iñedicue; iadedi cue comecidi omo; dine ite. Omoimo cue comecina facadicue. Danomo omo; marena illa jira, Cristona omo; raise inocana omo; jailla jira, iobidicue. <sup>6</sup> Cai Nama Jesucristona omo; inuamona, naimie lloga rafue finocana omo; jai. <sup>7</sup> Naimie dibeimo raise icana omo; jai. Naimiena inocana omo; jai. Omo; lloraini omoína llofua isoi, naimiena inocana omo; jai. Jusiñamuimo iobillacino eo fecacana omo; jai.

### *Cristona cai inuano, cai illa rafue*

<sup>8</sup> Jiaie comini naimaci jamai comeciai facajacinomona omo; jifuei raillanona, abina omo; rairui. Uanañedicinomo comeciaina jamai facadimaci. Naimaci einamacimona iena otimaci. Naie rafuedo omo; jaillana jitaídimaci. Cristo rafuedo omo; jaillana jitaíñedimaci.

<sup>9</sup> Ero, Cristomo nana Jusiñamui uai ite. Eniruemo billanona, Cristo imana jaide. Naimiemona Jusiñamuina uiñoticaí. <sup>10</sup> Cristomo omo; jainaiailla jira, naimiemona nana omo; jitaíllacinona otomoi. Nana comini naimie anamo itimaci. Nana illaicomini naimie anamo itimaci. Taife naimie anamo ite. Janaba naimie anamo ite. <sup>11</sup> Cristomo omo; duilla jira, omo; comeciaino ite jeacino anamona omoína naimie jillotate. Omo; abiaína detatajamona naimie iena finoñede; iadedi omo; comeciaino ite jearede iuai meiduamona jillobidomo. Naimie iena finode. <sup>12</sup> Naimie dibeimo cai illamona, jai bautizagacai. Naimie dibeimo cai illamona, cai jeacino anamo jai iñedicaí. Cristo fiodaite; iadedi fiodaillamona Jusiñamui naimiena jillotate. Jusiñamuina omo; inua jira, jeacino anamo jai iñedomoi. Naie anamona Jusiñamui omoína jai jillotate. <sup>13</sup> Jeacino anamo jaie omo; illamona, naimiemona fiodaitino isoidomoi. Omo; marañede jitaíllacino anamo jaie itomoi. Cristomo omo; jai duillamona, omo; jeacinona oni dotajamona, naie anamona Jusiñamui omoína jai jillotate. Cristo dibeimo omoína itatate. <sup>14</sup> Moisés micori jaie llogacinona jaie cai inoñena jira, Jusiñamui ricacillifue anamo iticaí; iadedi cruzmo Cristo fiodailla jira, naie llogacino anamo jai iñedicaí. Ie muidona Jusiñamui caimo ibana oñeite. <sup>15</sup> Cruzmo Cristo fiodailla facaiseconi Taifedi anafefide. Janabadi anafefide. Dofidi anafefide. Dusisiñodi anafefide. Naimie siño rafuena finuamona, Cristo uai naimaci uai baifemo uaillana uiñoticaí.

### *Cristomo ite rafuedo omo; jai*

<sup>16</sup> Cristo rafuedo omo; jailla jira, omo; guiga rana bu fimaia, naimaci ñaiamo cacarefiñeno. Judíuafiñedimaci rafue dine omo; jaiñenia: “Omo; mareñedomoi” bu raia, naimaci ñaiamo cacarefiñeno. <sup>17</sup> Naie isoide rafuedo jaie jaidicaí; iadedi iedo birui jaiñedicaí. Cristo rafuedo birui jaidicaí. <sup>18</sup> Dajerie llofueraini jiaie rafuedo jaidimaci. “Abina iedoñeno” raitimaci. “Jusiñamui jaienisaína seda” raitimaci. Nicairillacinodo jaidimaci. Naimaci isoi omo; jaiñenia: “Marañedomoi” omoína naimaci raia, naimaci ñaiamo cacarefiñeno. Naimaci illa isoi iñeno. Naimaci lluacino anamo iñeno. Naimaci lluacino omo; jai, omo; jitaíllanomo Cristo dine riñeitomoi. Naimaci comeciai jearena jira, jamai buena uiñoñenano abina iedotimaci. <sup>19</sup> Cristo rafuedo jaiñedimaci. Cristomo cai duilla jira, naimie caina ocuicabide. Naimiemona cai illena Jusiñamui jitailla isoi, fueoticaí. Jusiñamui jitailla isoi, naimie dibeimo cai raise illena, naimiena cai raise inollena, naimiemona fueoticaí. Cristomo cai duilla jira, dani coninina nabaidicaí. <sup>20</sup> Cristo fiodaillamona, jiaie rafue anamo jai iñedicaí. Naimiena inoñedinu rafue anamo jai iñedicaí; iadedi naie rafuedo nia jaidomoi. Damierie llofuerainidi diga rana fimaidimaci. <sup>21</sup> “Buena jetañeno. Buena guiñeno” raitimaci. <sup>22</sup> Ero, naie fimaica guille ra ite, cai guillena. Iena cai guilla mei, jai buena iñede. Naimaci fimaiduacino cominimona otimaci. Jusiñamuimona oñedimaci. <sup>23</sup> Naie fimaiduacino di eo abi uiñuacino isoide. Naiedo bu jaia: “Jusiñamuina eo raise sedadicaí” raitimaci. “Abi iedoñedicaí. Cai abina isiruñedicaí” raitimaci; iadedi naie isoide lluacino do bu jaia, naimie comecimo ite jeacinomona jilloñede. Naimiedi jeacino finocana nia jaide.

## 3

<sup>1</sup> Jeacino anamo jaie itomoi. Fiodaillamona Cristo jillua jira, jeacino anamona jai jillobidomoi. Ie jira Cristomo ite rafuedo omoi jai. Monamo Jusiñamui ecimo Cristo ite. Jusiñamui naimieri iobilla jira, naimie ecimo ite. <sup>2</sup> Cristomo ite rafuemo omoi comeciaina facacana jai. Bene ite maraññede rafuemo omoi comeciaina facañño. <sup>3</sup> Bene ite maraññede rafue anamo jai iñedomoi; iadedi Jusiñamui ecimo naimie jai illa jira, Cristomo omoi duilla jira, naimie finoacaga rafuena omoi finollena, omoina naimie canoite. <sup>4</sup> Cristomo jai duidomoi. Naimie abido bia, naimie bairenia, naimie cominina omoi illa jira, naimie diga jaca iitomoi.

*Omoi comeciaino ite jeacinona fainonocai*

<sup>5</sup> Cristomo omoi jai duilla jira, omoi comeciaino ite jeacinona fainonocai. Omoi aññede riño diga iñeno. Omoi iniññede iima diga iñeno. Jeare finoca rafuemo omoi comeciaina facañño. Omoi maraññede jitaillacinodo omoi jaiñeno. Rana nicidoñeno. Rana omoi nicidoia, Jusiñamuina raise sedaññedomoi; iadedi naimie ifomo rana sedadomoi. <sup>6</sup> Naie isoidicinona comini finua jira, naimiena naimaci iñoñena jira, Jusiñamuidi naimacina duere finoite. <sup>7</sup> Naie isoide rafuedo jaie jaidomoi. <sup>8</sup> Nana bie isoide rafuedo jaiñeno. Icirriñeno. Omoi ecimo itinona jeare finoñeno. Jiaie cominina jeare ñaiñeno. Jearede rafuena ñaiñeno. <sup>9</sup> Tainona lloñeno. Omoi comeciaino ite jeacino anamo jaie itomoi. Naicino anamo omoi jai iñena jira, naicinodo jaiñeno; <sup>10</sup> iadedi jiaie rafuedo birui jaidomoi. Bie rafue omoi comeciaina marena itatate. Omoi comeciaino bie rafue itatacana jaillamona, Jusiñamui rafuena uiñocana jaidomoi. Naimie isoi omoi illena, naimie omoi comeciaina iese itatate. <sup>11</sup> Cristo rafuedo birui omoi jailla jira, Jusiñamuimona nana creyentiaidomoi daje isoidomoi. Dajerie judíuai itinodomoi. Dajerie judíuaiññedinodomoi. Dajerie judíuai isoi abina detatatinodomoi. Dajerie abina detataññedinodomoi. Dajerie abina uiñotinodomoi. Dajerie abina uiññedinodomoi. Dajerie patrón anamo itinodomoi. Dajerie patrón anamo iññedinodomoi. Cominino iese itomoi; iadedi Jusiñamuimona daje isoidomoi. Cristo dibeimo omoi illa jira, jai amatiaina eruaidomoi. Cristomo omoi duillacino jiaie rafue baifemo faite. <sup>12</sup> Jusiñamui omoína fetode. Omoi comeciaina maretate. Omoína isiruite. Ie jira jiaie cominina duenai. Jiaie cominina cano. Abi iedoñeno. Abi biriñeno. Icirriñeno. <sup>13</sup> Dani omoi ibana oñeno; iadedi bu diga omoi icirillafue ia, naiena raise fino. Iena raise finuanona, abido ietañeno. Iena feita. Ie mei naimie diga marena ñaino. Ero, cai Nama omoi jeacinona oni dotade. Ie muidona omoi ecimo itino diga icirillafue omoi finoia, iena feita. <sup>14</sup> Coninina omoi isirucana jai. Isiruillacino nana jiaie llucacino baifemo faite. Coninina omoi isiruaia, danamo marena iitomoi. <sup>15</sup> Jusiñamui omoína fetua jira, Cristomo daajena jai duidomoi. Cristo omoi comeciaina uri itatajamona, nana comini diga uri i. Omoi comeciaino uri illamona, Jusiñamuimo iobillacinona feca. <sup>16</sup> Cristo rafuena omoi eo iinuana jitaicicue. Naie rafuena coninimo omoi llofue. Iena raise uiñollena, coninina omoi cano. Nie isoide Jusiñamui rafuena omoi roia, Jusiñamuimo iobillacinona fecajanona, nana omoi comeciainona iocire rono. David micorí cuega salmos omoi roia, Jusiñamui Joreño omoína birui cuetataga ruana omoi roia, omoi comeciainona iocire rono. <sup>17</sup> Buena omoi lloia, buena omoi maijia, cai Namamo omoi comeciaina facajano, iena fino. Cai Nama muidona, cai Moo Jusiñamuimo iobillacinona jiai feca.

*Coniniri creyentia illa rafue*

<sup>18</sup> Inirediñaiññuai, omoimo rafuena lloiacadicue. Cai Namamo omoi jainaiailla jira, naimie jitailla jira, omoi iniññai anamo raise omoi i. Naimaci uaina raise iño.

<sup>19</sup> Airedino, omoimo jai lloiacadicue. Omoi ainiaina isirui. Naiñaiññuai diga iciricabiñeno. Naiñaiññuimo riire lloñeno.

<sup>20</sup> Uruiaia, omoimo rafuena lloiacadicue. Nana omoi mootia uaina iño. Nana omoi eiñiaia uaina iño. Iena omoi iñoia, cai Nama eo iobite.

<sup>21</sup> Mootiaia, omoi uruiaina jamai icíñeno. Naimacina omoi jamai iciaia, comecina fa-caitimaci: “¿Niese cai mootiaia uaina raise iñoiticaia? Iena eo sefuiruiticaia?”. Ie muidona omoi uaina raise iñoñeitimaci.

<sup>22</sup> Patrones anamo itino, nana omoi patrones ocuica uaina iño. Omoimo naimaci eruaiññenia, omoi patrones facaina raise maiji. Cai Namana omoi iñua jira, cai Namana raise omoi iobitaiacana jira, omoi patrones facaina raise maiji. <sup>23</sup> Buena omoi maijia, omoi comeciainona maiji. Dani comini facaina maijiññedomoi; iadedi cai Nama facaina maijidomoi. Ie jira raise maiji. <sup>24</sup> Naimie jai llua isoi, cai Namamona ibana ico feiññoitomoi. Cai Nama Cristo facaina omoi maijidomoi; <sup>25</sup> iadedi Jusiñamui raise maijiññedinona duere finoite. Jusiñamuimona naga maijidimie ie maijia diese feiññoite.

## 4

<sup>1</sup> Patrones, omoïmo lloiticue. Naimaci omoï anamo illa jira, omoï diga maijidinona raise iba. Naimacina jifueñeno. Omoï Nama monamo illamona, omoïmo eruaide. Naimie anamo omoï illa jira, omoï anamo itinona marena raise fino.

<sup>2</sup> Jusiñamui diga ñaicana jai; iadedi omoï comeciaina facajanona omoï jii. Naimiemo iobillacinona feca. <sup>3</sup> Cristo rafuena llocana cue jailla jira, cárcelmo birui iticue; iadedi naie rafue nia lloiacadicue. Jusiñamui nana comini Cristo dibeimo jai jitaillana lloiacadicue. Te jira cai facaina omoï jii. Jusiñamuidi comini comeciaina jetajana omoï jii. Naimaci comeciaina Jusiñamui jetajamona, naimacimo naie rafuena lloiacadicue. <sup>4</sup> Naimaci iena raise cacaillena, naie rafuena raise lloiacadicue. <sup>5</sup> Creyentiañedino motomo omoï ia, marena omoï i. Naimacimo Cristo rafuena lloño. <sup>6</sup> Bu diga omoï ñaia, caimare ñaino. Nie isoide Cristo rafuena omoïmo bu jicanoia, raise marena fairio.

*Damierie ie uaina orede*

<sup>7</sup> Tíquicodi nana cuemo ite rafuena omoïmo lloite. Naimiena isiruiticai. Naimiedi Cristona eo ñnote. Cristo rafuena eo raise llocabite. Cai Nama facaina cue diga eo maijide. <sup>8</sup> Cai illana omoï uiñollena, omoï dine naimiena oredicue. Omoï comeciaina ocuiñotaitaite. <sup>9</sup> Naimie diga Onésimo jiai oredicue. Naimiedi creyente. Cristo rafuedo raise jaide. Naimiena jiai isiruiticai. Naimiedi omoï comini imie. Nana bene jai suide rafuena omoïmo lloitiiaimaia. <sup>10</sup> Cárcelmo Aristarco cue diga ite. Omoïmo ie uaina orede. Marcos ie uai jiai orede. Naimiedi Bernabé ama. Omoïmo naimiena navui lloticue. Omoï dine naimie ria, naimiena feiño. <sup>11</sup> Jesús ie uai jiai orede. Naimie mameci jiaicidi Justo. Judíuaimona dani naimaci cuena canode. “Naimaci jeacinona naimaci fainonocaillamona, Jusiñamui ie dibeimo cominina jai jitaide” naimaci llumona, cue comecina ocuiñotadimaci. <sup>12</sup> Epafras ie uaina jiai orede. Naimie omoï comini imie. Jesucristo dibeimo naimie maijide. Jusiñamui diga naimie ñaia, omoï facaina jaca duere jücabide. Jusiñamui rafuedo raise omoï jaillena, ie omoïmo raise itabillena, Jusiñamui jitaillacinona omoï raise finollena, omoï facaina jücabide. <sup>13</sup> Omoï facaina naimie eo maijide. Laodiceamo itino facaina eo maijide. Hierápolismo itino facaina jiai eo maijide. <sup>14</sup> Cai médico Lucas ie uaina jiai orede. Naimiena isiruiticai. Demas ie uaina jiai orede. <sup>15</sup> Laodiceamo ite creyentiaimo cue uaina cue oretajana lloño. Ninfasmo cue uaina cue oretajana lloño. Naiñaiño jofomo oficabide creyentiaimo cue uaina cue oretajana lloño. <sup>16</sup> Bie cartana omoï facaja mei, Laodiceamo ite creyentiaina bie cartana facata. Naimacimo jiaie cartana jiai oredicue. Iena omoï jiai faca. <sup>17</sup> Arquipomo lloño: “Cai Nama fetocamiedio. Naimie rafuena llocana raise o jai” lloño. <sup>18</sup> Cue uaina omoïmo oredicue. Dama bie uaina cueticue; iadedi nana bie carta cuemona illana uiñotomoi. Cárcelmo cue illana cue facaina feitaño omoï jii. Jusiñamui omoïna duenaioillasa. Mai. Cue cuega rafue jai fuite. Pablocicue.

## TESALÓNICAMO ITE CRISTONA HNOTINOMO PABLO NANO ORETAGA RABE

### *Uaiduacino*

<sup>1</sup> Tesalónicamo ite creyentiaí, omoimo cartana cueticue. Pablocue. ¿Nigacino? ¿Nie isoidomoi? Silvano cue diga ite. Timoteo cue diga jiaí ite. Iaimaiaí uaina orediaímaiaí. Cai Moo Jusiñamuimo, cai Nama Jesucristomo jai jainaíaidomoi. Ie jira iaimaiaí omoi duenaillana uifocana omoi jaillana jitaídicaí. Iaimaiaí omoi uri itatajana omoi uifocana jaillana jiaí jitaídicaí.

### *Tesalónicamo ite creyentiaí Jusiñamui uaina raise inotimaci*

<sup>2</sup> Jusiñamuimo cai jiaí, naimiemo omoi facaina iobillana jaca fecacabidicaí. Omoi facaina jicabidicaí. <sup>3</sup> Cai Moo Jusiñamuimo cai jiaí, omoína cometiciaí. Jusiñamuina inotomoi. Naimiena isiruitomoi. Ie jira naimie facaina duere maijidomoi. Cai Nama Jesucristo billemo eo ocuridomoi. Iese omoína cometiciaí. <sup>4</sup> Omoína naimie isiruillamona, Jusiñamui omoína fetuana uifocataí. <sup>5</sup> Jamaí cai uaido Cristo rafuena omoína llofueñedicaí; ia siño uaido iena llofueticaí. Jusiñamui Joreño uaido iena llofueticaí. Naie rafuena inuanona llofueticaí. Omoi diga cai jaie ia, nie isoi cai illana raise uifotomoi. <sup>6</sup> Cai illa isoi ifcaidomoi. Cai Nama illa isoi ifcaidomoi. Iemona duere sefuidomoi; ia Jusiñamui Joreño omoína iocire itatajamona, Jusiñamui uaina iocire feifotomoi. <sup>7</sup> Ie jira nana Macedoniamoi ite creyentiaí omoímona fueotimaci. Nana Acayamo ite creyentiaí omoímona jiaí fueotimaci. <sup>8</sup> Omoímona Macedoniamoi ite comini cai Nama uaina fididimaci. Acayamo ite comini jiaí fididimaci. Ailluena nairaiaí Jusiñamuina omoi inuana jai fididimaci. Ie jira naimacimo Cristo rafuena omoi inuana jai lloñedicaí. <sup>9-10</sup> Omoi dine nano cai ria, caimare caina feifotomoi. Cristo rafuena omoi cacajamona, jiraraina sedajana faínonocaida, cajede nanoca Jusiñamuina jai sedadomoi. Jusiñamui Jito abido billemo birui jiaí ocuridomoi. Iese jiaie creyentiaí omoína birui ñacabitimaci. Cristo fodaillamona Jusiñamui naimiena jaie jillotate. Naimiena cai inuamona, Cristo Jusiñamui ricaillifuemona caina jai jillobitade.

## 2

### *Pablo Tesalónicamo llofuaí rafue*

<sup>1</sup> Cue nabaiñiaí, omoi diga jaie cai ia, tainomo jaiñedicaí. <sup>2</sup> Omoi dine cai nia riñenia, Filipomo iticaí. Nainomo itinodi caina jeare finodimaci. Iena jai uifotomoi. Caina jeare finodimaci; ia cai comecina Jusiñamui ocuiñotajamona, Jusiñamui rafuena omoína llofueticaí. Ailluena comini iena jitaíñedimaci; ia iena llofueticaí. <sup>3</sup> Uanaíñediciona jaca llofueñedicaí. Jearediciona jaca llofueñedicaí. Jifuerillacinona jaca llofueñedicaí; <sup>4</sup> iadedi Jusiñamui uifoganodicaí. Ie jira caina naimie oretajamona, ie rafuena llofueticaí. Cominina iobitallena llofueñedicaí; iadedi Jusiñamuina iobitallena llofueticaí, Jusiñamui cai comecina raise uifua jira. <sup>5</sup> Cai llofuiacino diga omoína bifueñedicaí. Omoímona ucube ollena, iese llofueñedicaí. <sup>6</sup> Cominimona iobillacinona jitaíñedicaí. Omoímona jitaíñedicaí. Jiaínomona jiaí jitaíñedicaí; iadedi Cristo oretaganona cai illa jira, cai jitaia, omoímona iobillacinona jicaredicaí. <sup>7</sup> Uruiaína raise sedaraíño isoi, fecuise omoína llofueticaí. <sup>8</sup> Jusiñamui rafuena omoi raise uifollena, omoína cai eo isiruillamona, niadedi omoi facaina fodaíacadicaí. <sup>9</sup> Omoi motomo cai ucube ollena, jiaie rana maijuídicaí. Omoína cai duere finoñellena, nagarui iese maijuídicaí. Iena raise uifotomoi. Iese Jusiñamui rafuena omoína llofueticaí.

<sup>10</sup> Omoi motomo cai illana raise uifotomoi. Jusiñamui jitaílla isoi, nainomo iticaí. Maraíñede rafuena finoñedicaí. Mare rafuedo jaca jaídicaí. Iena uifotomoi. Jusiñamui iena jiaí uifote. <sup>11</sup> Omoi uruiaí omoi llofuaí isoi, omoína llofueticaí. Omoímo diga icaiño Jusiñamui rafuena llofueticaí. <sup>12</sup> Jusiñamui jitaíllacinona omoi finollena, iena llofueuidicaí. Monamo ie cominina sedajanomo omoi jaca illena, naimie omoína jai fetode. Nainomo ie siño uai anamo jaca itomoi.

<sup>13</sup> Jusiñamuimo cai jiaí, omoi facaina iobillacinona fecacabidicaí. Jusiñamui rafuena caimona omoi jaie cacajamona, iena raise feifotomoi. Cominimona cai oga rafue isoi feifotomoi; ia Jusiñamuimona cai oga rafuena feifotomoi. Cai lloga rafue omoi comeciaí uai meidocana jaide. Ie jira Jusiñamuimo iobillacinona fecacabidicaí. <sup>14</sup> Judeamo ite creyentiaí isoi duere sefuidomoi. Omoi cominimona duere sefuidomoi. Naimaci judíuaí cominimona duere sefuidimaci. <sup>15</sup> Judíuaí comini cai Nama Jesúsna jaie meinetimaci. Jusiñamui facaina lloraini micoriaína jiaí jaie meinetimaci. Caina jiaí birui duere finodimaci. Jusiñamuina iobitañedimaci. Jusiñamui rafue dibeimo jiaí inedimaci. <sup>16</sup> Judíuaíñedinomo

Cristo rafuena cai lluaana jitaifñedimaci. Jusiñamui judiuaifñedinona jillotajana jitaifñedimaci. Iese jeacino finocana nia jaidimaci; ia ja muidomo Jusiñamui ricaiillifue anamo jai itimaci.

*Tesalónica comini dine Pablo abido jaiacade*

<sup>17</sup> Omoimona cai billa mei, nigarui illanona, omoina dane cioacadicai. Omoina cioifñedica; iadedi omoimo comecina facadicai. Omoi dine eo jaiacadicai. <sup>18</sup> Ua eo jaiacadicue. Diga icaiño jaiacadicai; ia Taife cai jaillana jitaifñede. <sup>19-20</sup> Caina omoi jaca iobitaja jira, omoina cioacadicai. Jesús abido bia, naie facaise omoi ei iobitica. Iemo ocuiridica. Caina iocire itaitaitomoi. Omoi muidona iobitica.

**3**

<sup>1</sup> Cai comeci jarire illamona, Atenas railla nairaimo fiebidicoco; <sup>2</sup> iadedi Timoteo omoi dine oredicoco. Naimiedi coco ama isoide. Cristo rafuena cai diga Jusiñamui facaina llofuecabite. Cristo rafuena omoi raise inotallena, omoi comeciaina ocuiñotallena, naimiena oretaticoco. <sup>3</sup> Duere sefuillamona bu bie uai sefuiruillana jitaifñedica. Creyentena cai illamona, jaca duere cai sefuillana uiñotomoi. <sup>4</sup> Omoi motomo jai ei ia, iena llofuetica. Omoi birui duere sefuillamona cai lluaana raise uiñotomoi. <sup>5</sup> Cue comeci jarire illamona, Cristona omoi inuana raise uiñoiacadicue. Omoina Taife ramo faicabillamona, tainomo cai maijana jacinaitica. Ie jira Timoteona oredicoco. <sup>6</sup> Omoimona Timoteo jai abido billamona, omoie mare rafuena cocomo lote. Cristona inocana jaidomoi naimie lote. Coninana isiruitomoi. Cocona caimare comecitomoi. Omoina coco cioacana isoi, cocona dane cioacadomoi naimie lote. <sup>7</sup> Birui duere sefuidica; iadedi omoie rafuena cai cacajano, cai comeci marena ite. <sup>8</sup> Cristo rafuena inocana omoi jaillana jai cai uiñuamona, cai comeci marena ite. <sup>9</sup> Omoi ei caimare jai itica. Ie jira Jusiñamuimo iobillacinona eo fecaacadicai. <sup>10</sup> Omoina dane cai cioillena, naimiemo nagarui jidica. Naimiena nia omoi raise inoñenia, omoina naimiena raise inotaacadica. Ie jira omoina cioacadicai. <sup>11</sup> Iese omoi facaina, cai Moo Jusiñamuimo, cai Nama Jesús jicabidica. Omoi dine caina naimie oretajana jidica. <sup>12</sup> Cai Nama coninana isiruitacana omoi jaillana jitaidica. Caina omoi isiruilla isoi, nana jainona omoi isiruillana jidica. <sup>13</sup> Omoi comeci ocuiñollena, omoi comeci Jusiñamui jitailla isoi, marena illena jidica. Nana ie comini diga cai Nama Jesús abido bia, Jusiñamui dine omoi ia, omoi comeci marena illena jitaidica. Iese omoi facaina jicabidica.

**4**

*Naimaci marena illena llofuate*

<sup>1</sup> Jiaie rafuena lloiacadicue. Cai Nama Jesús omoi jai duilla jira, Jusiñamui jitailla isoi omoi illana jitaidica. Iese birui itomoi; ia nagarui iese omoi illana jitaidica. Ie jira cai lua isoi, omoi jai. <sup>2</sup> Cai Nama Jesús jitailla jira, navui iena llofuetica. <sup>3</sup> Jusiñamui jitailla isoi omoi marena illena, omoi aifñede riño diga iñeno. <sup>4</sup> Nagamiai riñona ie aina otena, mare; ia maraifñede rafuena finoñeno. Nagamiai dajena daje riño uana Jusiñamui jitaide. Dañaiño diga ia imaijai jionaillena jai jitaide. <sup>5</sup> Naimiena inoñedino isoi, omoi ai uana jitaifñede. Naitaiñu ai abina jamai cioillena riñona otimaci. <sup>6</sup> Jiaie creyentemo jeacinona finoñeno. Naimie aina jamai aifñedoñeno. Naie isoide rafuena bu finoi, cai Nama naimiena duere finoite. Iena navui omoimo lloticue.

<sup>7</sup> Jearede rafuena cai finollena, Jusiñamui caina fetofñede; iadedi mare rafuena cai finollena caina fetode. <sup>8</sup> Bie llofuicacino nie creyente inoñenia, cue llofuicacina jamaide; ia Jusiñamui Joreño naimiemo illamona, Jusiñamui llofuicacina jai jamaide. <sup>9</sup> Jiaie creyentiana omoi isiruillana omoimo eo llofueticue. Jusiñamui omoina coninana isiruillana jai uiñotade. <sup>10</sup> Nana Macedoniamoi ite creyentiana jai isiruitomoi; iade nia isiruicana omoi jai. <sup>11</sup> Uri omoi i. Dani omoimo ite rafuena omoi uiuicai. Jainomona ucubena jicañeno; ia omoi ucube ollena, omoi onolli diga rairuioicaiñeno omoi maiji. <sup>12</sup> Ie mei omoi jitailla ra ite. Iemona Cristona inoñedino omoina jai mameriñeitimaci.

*Jesucristo dane abido billena lote*

<sup>13</sup> Omoi raise uiñollena, daje rafuena lloiticue. Omoi creyentiamona dajerie jai fiodaitimaci. Jesús inoñedinomona bu fiodaia, fiodaillamona jilluamo naimaci ocuirifñena jira, sunaitimaci; iadedi naimaci sunailla isoi, omoi illana jitaifñedicue. Fiodaillamona jilluamo jai ocuiridomoi. <sup>14</sup> Jesús fiodaillamona naimie jilluana inotica. Ie jira Jesús abido billa facaise, jai fiodaite creyentiana Jusiñamui jilloitajana jai jai inotica. <sup>15</sup> Cai Nama llofuia isoi, bie rafuena lloiticue. Jesús abido bia, jai fiodaite creyentia, nia fiodaifñede creyentia diga, daacaiño naimie dine a jaitica. <sup>16</sup> Cai Nama Jesús abido bia, Jusiñamui dinena naimie billanona, caina jidaite. Ie jaienicai caina uaidoite. Jusiñamui ie trompeta daacaiño jai fiite. Jai fiodaitino nano jilloitimaci. <sup>17</sup> Iemei nia fiodaifñedinodi como jillodino

diga uillie motomo naimiemo dafai fillena, Jesús caina uite. Iemei naimie diga jaca iiticaí.  
 18 Bie llofuaiacino diga conini comeaiaina omoi ocuiño.

## 5

1 Bie rafue suilliruina uiñoñedicaí. Bie rafuena omoi jai uiñua jira, iena dane eo cueñeiticue. 2 Cai Nama abido billana jai uiñotomoi. Fii redimie naiona ebena billa isoi, naimie abido biite. 3 “Uri iticaí. Marena iticaí” Cristona iñoñedino raia, naie facaise naimacimo duere sefuillifue suite. Urue riño jigicomo casilla isoi, ebena suite. Naiemona jilloñeitimaci. 4 Naie facaise suia, Cristo billena omoi jai uiñuamona, fii redimie naiona ebena billa isoi, jacinaiñeitomoi. Cristona iñoñedino isoi, iñedomoi. 5 Uanaicinona omoi jai uiñuamona, Cristo ie cominina jai jaidomoi. Jeacino anamo omoi jai iñena jira, Cristona iñoñedino díbeimo jai duiñedomoi. 6 Ie jira abina sedacana omoi jai. Abina rairuioicaída omoi jai. Jifaidino isoi ebena omoi jaiñeno. 7 Cristona iñoñedino abina sedacana jaiñedimaci. Rairuioicaída ebena jaidimaci. 8 Cristo ie cominina jai cai illa jira, ebena cai jaiñena. Imaci abina riidollena, soldaduai jogobe icodi ite. Imaci ifogi icodi jai ite. Ie isoide. Cai comeaiaina eenollena, Cristona iñocana mai cai jailli. Jiaino isiruicana mai cai jailli. Jusiñamui dine ico cai illemo ocuricana mai cai jailli. 9 Caina duere finollena, Jusiñamui caina fetoñede; iadedi cai Nama Jesucristo finoca rafue muidona, duere finollemona cai jilloillena, caina fetode. 10 Cristo cai facaina jai fiodaite. Ie jira birui cai fiodaia, naimie bille facaise nia fiodaíñedinona cai ie, naimie diga jaca iiticaí. 11 Ie jira coninina ocuiñotacana omoi jai. Cristo díbeimo coninina itatacana omoi jai. Iese birui jaidomoi; ia nia iese omoi jai.

### *Omoi creyentiaina llofueraíni uaina iño*

12 Cue amatiaí, jiaie rafuena lloiticue. Omoi creyentiaina llofueraíni uaina iño. Cristo jitailla jira, omoi afemo itimaci. Cristo díbeimo omoína raise itatallena, omoi facaina llofuetimaci. 13 Omoína naimaci canua jira, naimacina isiruillanona, naimaci uaina raise omoi iño. Coniniri uri omoi i. 14 Omoi motomona maijiacaíñedinona imaci maijillesa ocui. Duere sefuillamona jai comeaina ocuiñonidinona comeaina ocuiñota. Raise iñollena, Cristona nia raise iñoñedinona jai cano. Fecuisse naimacina ui-uillanona, naimacina cano. 15 Omoína jiaimie duere finoia, ibana oñeno; iadedi naimiemo mare rafuena fino. Nana cominimo mare rafuena fino. 16 Nie isoide rafue omoimo ia, caimare omoi i. 17 Jusiñamuimo nagarui jii-jii. 18 Nie isoide rafue omoimo ia, Jusiñemui jitailla jira, naimiemo iobillacinona feca. Jesucristomona Jusiñamui jitaillacinona jai uiñoticaí. 19 Jusiñamui Joreñoa jamaiñeno. 20 Jusiñamui Joreño uaido lloraini llofuiana jamaiñeno; 21 iadedi Jusiñamui Joreño uaido naimaci llofuiana facaci. Mare rafuedo jaca omoi jai. 22 Nana maraiñede rafuemonona eneno oni omoi i. Naie isoide rafuena omoi abimo omoi oñeno. 23 Ie jira Jusiñamuimo omoi facaina jiiiticue. Naimie omoína jai uri itatate. Naimie omoína nagarui marena itatacana jaillana jitaídicae. Iese omoi jai, cai Nama Jesucristo dane abido bille facaise, naimie jitailla isoi, omoi comeai marena iite. 24 Jusiñamuidi iñogamiena jira, iese omoína finoite.

25 Cue amatiaí, Jusiñamuimo cai facaina omoi jicabi. 26 Cue facaido nana creyentiaina caimare uaido. 27 Cai Namamo cai duilla jira, naimie jitailla jira, bie cartana nana creyentiaí uicomo faca. 28 Cai Nama Jesucristo omoína duenaillasa. Mai. Pablodicue.

## TESALÓNICAMO ITE CRISTONA HNOTINOMO PABLO IE EMODOMO ORETAGA RABE

### *Uaiduacino*

<sup>1-2</sup> Tesalónicamo ite creyentiaí, omoímo cartana cueticue. Pablodicue. ¿Nigacino? ¿Nie isoidomo? Silvano cue diga ite. Timoteo cue diga jiaí ite. Iaimaiaí uaina orediaímaiaí. Cai Moo Jusiñamuimo, cai Nama Jesucristomo jai jainaiaidomoi. Ie jira iaimaiaí omoi duenaillana uifocana omoi jaillana jitaídicaí. Iaimaiaí omoi uri itatajana omoi uifocana jaillana jiaí jitaídicaí.

### *Cristo dane abido bia, naimiena inoñedinona duere fnoite*

<sup>3</sup> Jusiñamuimo cai jüia, omoi facaina naimiemo iobillacinona fecacabídicaí. Cristona inocana raise jaidomoi. Coniniri isiruicana raise jaidomoi. <sup>4</sup> Ie jira marena omoi illana jiaie creyentiaí illanomo llocana uiticaí. Duere sefuidomoi; iadedi danomo abido jaiñedomoi. Cristona inocana jaidomoi. Iena llocana uiticaí. <sup>5</sup> Jainomona birui duere sefuidomoi; ia inocana jaidomoi. Iemona Jusiñamui omoi facaina illana uifoticaí. Omoi duere sefuillamona, fueocana jaidomoi. Iemona naimie jitailla isoi, ja muidomo monamo ie cominina sedajanomo iitomoi.

<sup>6</sup> Jusiñamui omoína duere finodinona ico duere fnoite. Omoi facaina ibana oite. Iese naimie fnoia, naimiemona mare. <sup>7</sup> Cai Nama Jesús abido bia, duere sefuillamona jilloiticaí. Monamona ie siño jaienisaí diga biite. Irai boua isoi ana biitimaci. <sup>8</sup> Jusiñamuina inoñedinona diese duere fnoitimaci. Cai Nama Jesús rafuena naimaci inoñena jira, naimacina duere fnoitimaci. <sup>9</sup> Inoñena jira, jaca faifitimaci. Jaca legi cacaitimaci. Jusiñamui illanomo jaca ifeitimaci. Ie ebirede uaina uifofeitimaci. <sup>10</sup> Cristo bille facaise naimiemo iobillacinona fecaiticaí. Naimieri nana naimiena inotino rajicaitimaci. Omoímo cai lloga rafuena omoi jai inua jira, iese iitomoi.

<sup>11</sup> Ie jira omoi facaina jicabídicaí. Naimie jitailla isoi, omoína naimie marena itatajana jüidicaí. Omoína naimie fetuamona, ie uaido mare rafuena finocana omoi jaillana jüidicaí. Ie uaido naimiena inocana omoi jaillana jüidicaí. <sup>12</sup> Iese omoi jaillemona, naimie abido bille facaise naimiena iobitaitomoi. Omoiri naimie jiaí iobite. Jusiñamui, cai Nama Jesucristo diga, caina duenaillamona iese iiticaí.

## 2

### *Jesucristo abido bille rafue*

<sup>1</sup> Cai Nama Jesucristo abido billena lloiacadicue. Naimiemo ico cai dafañillena jiaí lloiacadicue. <sup>2</sup> “Cai Nama jai abido bite” raillana omoi cacaia, raire jarire ifeno. Rucacuierifeno. “Jusiñamui Joreño iena cuemo jai llo” damie raia, iena inoñeno. Nie lloraima iena lloia, iena inoñeno. “Pablomona cue feiñoga carta iena llo” damie raia, iena inoñeno. <sup>3</sup> Naie isoide rafue diga omoína jaino jifueiacania, iena inoñeno. Cai Nama nia biñena facaise, eo ailluena comini naimiena enoitimaci. Iemei Taife dinena damie biite. Ja muidomo naimie faifite; <sup>4</sup> iadedi nano jiaie rafuena fnoite. Taife dinena naimie billanona, jirarai baifemo iacanite. Jerusalémo Jusiñamui jofomo illanona, “Jusiñamuídicaí” raite. <sup>5</sup> Omoi dine navui cue ia, bie rafuena omoímo lloticue. <sup>6</sup> Jusiñamui Joreño naimie nia billena rairuillana jai uifotomoi. Jusiñamui jitaillirui facaise naimie biite. <sup>7</sup> Taife marañede rafuena birui bainino finotate. Jusiñamui Joreño naimiena marañede rafuena birui marefodo finuana rairuide. Jusiñamui Joreño naimie rairuifena mei, <sup>8</sup> Taife dinena marañedimie biite; ia cai Nama Jesús abido ebire bia, firañuamona naimiena meinite. <sup>9</sup> Cai Nama Jesús nia abido biñena, comini jifuellena, Taife uaido bie marañedimiedí diga siño rafuena fnoite. <sup>10</sup> Cominina eo marañedicinodo jifueite. Naie comini ico faifitimaci. Jusiñamui ie uanaicinona naimaci inoñena jira, jilloiacañeitimaci. <sup>11</sup> Ie jira Jusiñamui naimacina tainocinona inotaitaí. <sup>12</sup> Jusiñamui ie uanaicinona naimaci inoñena jira, marañede rafuena naimaci eburilla jira, Jusiñamui naimacina duere fnoite.

### *Jusiñamui omoína jai fetode*

<sup>13</sup> Jusiñamuina inoñedino isoi Jusiñamui omoína duere fnoñeite. Naimie omoína jai fetua jira, naimiemo iobillacinona jaca fecacabídicaí. Omoi jilloillena, nano dofoconi omoína fetode. Ie Joreño uaido naimie jitaillacinona omoi finollena, naimie uanaicinona omoi inuamona, omoína fetode. <sup>14</sup> Ie rafuena cai luamona, Jusiñamui omoína jai jillotate. Iemona cai Nama Jesucristo ebirede illanomo jaca iitomoi. <sup>15</sup> Ie jira, Cristona inocana omoi jai. Cai llogacinodo omoi jai. Iena caimona jai cacadomoi. Cai cartamona iena

jiaí cacadomoi. <sup>16</sup> Omoi facaina cai Nama Jesucristomo, cai Moo Jusiñamuiimo, jüicabidicai. Naimie caina isiruite. Cai comeciaina jaca ocuiñotade. Caina duenailamona naimie lloga rafue suillemo raise ocuiridicai. <sup>17</sup> Naimie omoi comeciaina nia ocuiñotallena jüidicai. Nie isoide rafuena omoi finoia, naie rafue omoi marena finollena jüidicai. Buena omoi ñaia, omoi marena ñaillena jiaí jüidicai.

### 3

#### *Cai facaina omoi jüiana jitaídicaí*

<sup>1</sup> Daje rafue nia lloiacadicue. Cai facaina omoi jüiana jitaídicaí. Cai Nama rafue llocana jaillana jitaídicaí. Omoi ñnua isoi, jiaíno ñnuana jiaí jitaídicaí. <sup>2</sup> Maraiñedinomona cai jillobillena, omoi jüiana jitaídicaí. Ailluena comini Cristona ñnoñedimaci; <sup>3</sup> ia cai Nama jaca ñnogamie. Omoi comeciaina ocuiñotaite. Maraiñedinomona omoína eenoite. <sup>4</sup> Cristomo cai duilla jira, cai llogacinona omoi jai ñnuana jai uiñoticaí. Iena nia ñnoitomoi. <sup>5</sup> Cai Nama Jesús omoína Jusiñamui omoína isiruillana uiñotajana jitaídicaí. Cristo duere sefuide; iadedi ie Moo jitailla rafuena sefuiruiñeno finocana jaide. Iese Jusiñamuiimo omoi facaina jüiticue.

#### *Maijuillasa*

<sup>6</sup> Cai Nama Jesucristo jitailla jira, jiaie rafuena nia lloticue. Jiaie creyente maijiacaiñenia, naimie diga eo nabairiñeno. Iena navui omoiimo lloticue; ia damierie iese ia, naimaci diga eo nabairiñeno. <sup>7</sup> Caimona fueo. Navui omoi motomo iticaí; ia cai ucube ollena, jaca maijidicai. <sup>8</sup> Guillena ibaíño guíñedicai; ia nagarui eo maijidicai, omoína duere cai finoñellena. <sup>9</sup> Cristo facaina cai maijia jira, omoimona ra jamai cai jicallena, caímo uai ite; iadedi caimona omoi fueollena iese jicañedicai. Omoi ra ollena, omoi maijiana jitaídicaí. <sup>10</sup> Navui omoi motomo cai illa facaise lloticaí: “Bu maijiacaiñenia, guíñena”. <sup>11</sup> Omoi motomo damierie jai maijiñenana jai fididicai. Maijiñeno jai itimaci. <sup>12</sup> Cai Nama Jesucristomo cai duilla jira, naie isoidinomo maijillena lloticaí. Uainino maijiamona ucube naimaci uana jitaídicaí. <sup>13</sup> Cue amatiai, nie isoide mare rafuena finollena sefuiruiñeno. <sup>14</sup> Cue jai cuega cartamo ite rafuena bu ñnoñenia, nana creyentiaina naimiena uiñota. Naimie meidallena, naimie diga nabairiñeno. <sup>15</sup> Naimiena enoiñeno; ia creyentena naimie nia illamona, naimiena fecuise llofue.

#### *Fuiduacino*

<sup>16</sup> Cai Nama omoi jaca uri itatajana jitaídicaí. Naimie omoi diga jaca iite. <sup>17</sup> Cuenanollena, naimiemo cue llua isoi, jiaimie bie carta cuega; iadedi cue mameci buene dama cueticue. Nana cartamo iese cue mamecina cueticue. Pablodicue. <sup>18</sup> Cai Nama Jesucristo nana omoína duenailasa. Mai. Macaibaite.



## TIMOTEO PABLO NANO ORETAGA RABE

### *Pablo Timoteona uaiduacino*

<sup>1-2</sup> Timoteo, bie carta omo cueticue. ¿Nigacino? ¿Nie isoidio? Pablodicue. Cristo Jesús oretagamiedicue. Ie rafue llollena, naimie cuena orede Naimiena cue cioillena, naimie isoi cue illena, naimie abido billemo ocuridicue. Jusiñamui cuena jiai orede. Naimiedi cai Jilloitaraíma. Cue llofuaiacinomona Cristona o raise inua jira, cue jito isoi cue mamecao. Cai Moo Jusiñamui, cai Nama Jesucristo diga, ona jai duenaite. Iena uiñocana mai o jai. Ona jai uri itatatiáimaiai. Iena uiñocana mai o jai.

### *Cristo rafuena tainona llofueraíni llofuaiacinodo jaiñeno*

<sup>3-4</sup> Macedoniamio jaie jaidicue, Efesomo o fiebicallena omo lloticue. Nainomo dajerie Cristo rafuena raise llofueñedimaci; iadedi jiaiforie llofuetimaci. Diga igaiaina facafacadiimaci. Imaci usumatai mamecido siadocabitimaci. Iemona conini uaina uaitaside. Jusiñamui jitailla isoi comini marena illana llofueñedimaci. Jusiñamuina cai inuamona, marena iticai. Iena llofueñedimaci. Ie jira naimaci uaina llícaita. <sup>5</sup> Jusiñamuina comini isirullena, jiaie cominina jiai naimaci isirullena, Jusiñamui uaina llofueticai. Naimaci comeciáí jeaninana jitaídici. Jusiñamuina raise naimaci inuana jiai jitaídici. Ie jira Jusiñamui rafuena llofuecabiticai. <sup>6</sup> Dajerie llofueraíni iese llofueñedimaci; iadedi jamai ñaitimaci. <sup>7</sup> Moisés micori jaie llogacinuaido llofueiacadimaci; iadedi iena llofuiana uiñofueñedimaci. Naie llogacinuaina ua uiñofueñedimaci.

<sup>8</sup> Iena raise llofuegana, Jusiñamuina uiñofueñedinona naimiena uiñotallena, mare. Iena uiñotici. <sup>9-10</sup> Moisés micori llogacinuaidi mareuidinomo jainaiaíñede. Jaiinomo jainaiaide: Jusiñamui uaina inofueñedinomo lloga uaina inorainidinomo, Jusiñamuina jitaíñedinomo, jeacino finorainimo, jeare ñaicabitinomo, Jusiñamuina enoidinomo, eina meinetinomo, moona meinetinomo, jiaie cominina meinetinomo, aiñede riño diga itinomo, iniñede ima diga itañaiñuaimo, daje isode ima diga conini aifuedotinomo, comena fuidinomo, taino llorainimo, taino lluaña jifueridinomo, uanai rafue facaisena ifueñedinomo. Nana Cristo rafue facaina ifueñedinomo Moisés micori llogacinuai ua jainaiaide; <sup>11</sup> ia naie rafue cuemo jai jainaiaíñede. Ie mare rafuena cue llollena, Jusiñamui cuena jai orede. Maremiena Jusiñamui illamona, naimie rafue jiai eo ebirede.

### *Jusiñamui caina duenailla jira, Pablodi iobide*

<sup>12</sup> Cuena fetua jira, cai Nama Cristo Jesús iobidicue. Naimiena cue inollena, naimie cuena uiñuamona, cuena fetode, naimie rafue cue llollena. Iena llollena, cue comecina jiai ocuiñotade. <sup>13</sup> Jaie naimiena jeare ñaiticue. Naimiena inotinona jiai duere finodicue. Abina cue uiñofueña jira, naie facaiseconi naimiena nia cue inofueña jira cuena duenaillamona, naimie cuena fetode. <sup>14</sup> Cuena eo duenaite. Iemona naimiena inotidicue. Naimiena jiai isiruiticue.

<sup>15</sup> Bie lludi mare cue uiñuamona, nana comini biena inuana jitaídici. Marañedínona naimaci jeacinomona jilloitallena, enruemo Jesucristo bite. Ero, nanoca jeacinona finoramadicue; <sup>16</sup> iadedi Jesucristo cuena duenaite. Naimiena cue inuamo jaie fecuise ocuride. Nana jeacinona finorainimo fecuise ocuride, naimiena inollena. Naimiena cai inuamona, Jusiñamui diga jaca iticai. Cuena duenailla jira, biruimona naimiena inoitinodi naimie naimacina duenaillana uiñofueñedimaci. <sup>17</sup> Jusiñamuidi nanocamie. Jaca fiodiaíñeite. Naimiena cionidicai. Naimie damiede. Jaiena ifuede. Naimiena jaca iobicabillasa. Iena jitaídici.

<sup>18</sup> Ero, Timoteo, cue jito, omo rafue lloiacadici. Nano o llofueraimana jaiacana facaise ailluena Cristo rafuena llofueraíndi ona jaie llotimaci: “Naimie raise marena llofueite” llotimaci. Iena comecianona, o comeci ocuiñocana o jai, Cristo rafuena riidocana o jaillena. <sup>19</sup> Cristona inocana o jai. O comecina marena finocana o jai. Dajerie naimaci comeciáí iuaimo comeciaina facañedimaci. Ie jira Cristona jai inofueñedimaci. <sup>20</sup> Iese ite Himeneo. Alejandro jiai jai daje isode. Jai inofueñedimaci. Ie mei iaamaiaia Taise anamo jai itabicaítaticue, duere sefuillena. Iaamaiai fueollena, Jusiñamuina jeare ñaiñellena, iese itabicaítaticue.

## 2

### *Nana comini facaina juiticai*

<sup>1</sup> Diga rafue omo llotidicue; iadedi daje rafue motomo ite. Nanoca rafue. Iena omo llotidicue. Jusiñamui diga omoi ñaia, nana comini facaina jii. Naimaciri iobillacinona Jusiñamuimo feca. <sup>2</sup> Uri cai illena, Jusiñamuina raise cai sedallena, Jusiñamui jitailla rafuena

cai finollena, illaicomini facaina cai jii. <sup>3</sup> Iese cai jiiia, Jusiñamuimona mare. Naimiedi cai Jilloitaraima. <sup>4</sup> Naimiedi nana comini naimaci jeacinomona jilluana jitaide. Uanaicinona naimaci uifhuana jiai jitaide. <sup>5</sup> Nana nairaijai imaci Jusiñamuidi jaca dajede. Comini diga Jusiñamui facaisena ñairaima jaca dajede. Naimiedi Cristo Jesús. Comini Jusiñamui facaisena naimie ñaicabite. Comini facaisena ñairaima jaca dajede. Naimiedi Cristo Jesús. Naimie iimananona, comini facaisena ñairede. Ie muidona comini diga Jusiñamui jai nabairede. Jusiñamui diga comini jiai jai nabairedimaci. <sup>6</sup> Cai jeacinomona cai eneno illena, Jesucristo nana cai facaina jai fiodaite. Naimie jitailla facaiseconi Jusiñamuidi cominina bie rafuena jai uifnotade. <sup>7</sup> Bie rafue cue llollena, Jusiñamui cuena fetode. Judíuifñedinomo cue llollena, bie rafue naimaci ñnollena, uanaicinona naimaci uifnollena, cuena orede. Tainona lloñedicue.

<sup>8</sup> Ie jira naga roracomo ite iññiai, cai comini onolliai a ñuitacabilla isoi, comeciaino jeacino iññenanomona, Jusiñamuimo jiiana jitaide. Naimaci comeciaino icirillacino iññedemo, Jusiñamuimo jii. Naimaci comeciaino uaitajacino iññedemo, Jusiñamuimo jii. <sup>9-10</sup> Riñoniaimo jiai lloiticue. Roracomo omoi jaija, abi ieduamo comeciaina facañenamona, omoi ifotiena fino. Jamai ebinai raillano, abi ieduamona abina finora jitañeno. Jamai ebinai raillano, abi ieduamona eo raifide iniroina jitañeno; iadedi mare rafuena omoi finuamona, ebinaitomoi. “Jusiñamuina iñnoticai” omoi raillanona, naimie jitailla isoi, marena omoi finolle. <sup>11</sup> Rollena comini ofia, ñaiññenanomona, uaitañenamona omoi fueo. <sup>12</sup> Omoi ofia, omoi iññiaina llofuiana jitañedicue. Nainomo omoi ñaiññena. Iññiai omoi anamo illana jitañedicue. Iese omoi riñoniaimo lloiacadicue. <sup>13</sup> Jusiñamui Adán micorina nano finua jira, iese lloticue. Adán micori finua mei, Eva micorina jiai finode. <sup>14</sup> Taifedi Adán micorina jifueñede; iadedi Eva micorina jifue. Ie mei naie riño jeacinona finode. <sup>15</sup> Iemona jilloite; iadedi uruijai jococana jaita. Riñoniaidi Jusiñamuina iñnoia, jiaie cominina isiruija, Jusiñamui jitailla rafuena finoia, ie abina enoia, jilloitimaci.

### 3

#### *Creyentiaina sedaraini illa rafue*

<sup>1</sup> Bicinodi uanaicino. Creyentiaina llofueraimana bu jaiacania, naimie comecimo mare jitaillacino ite. <sup>2</sup> Bie isode llofueraimana jaiacadimiena jitaide. Naga comini naimie mare raillamie. Dañaiñona airedimie. Abi eenotimie. Ebena iññedimie. Inogamie. Jiaie comini naimie jofomo riadedi, raise nafuecabitimie. Jusiñamui uaina raise llofuecabitimie. <sup>3</sup> Jifairuññedimie. Fuirirainidimie. Raire icirirainidimie. Ucubena nicidoñedimie. <sup>4</sup> Naimie cominina raise sedadimie. Naimie anamo naimaci illanona, naimie uruijai ie uaina raise iñnotadimie. Ie isoidimie llofueraimana jaillana jitaide. <sup>5</sup> Iese naimie iññenia, ie anamo itinona naimie raise sedañenia, ¿niese jiaie creyentiaina raise sedaite? <sup>6</sup> Como creyentena jaidimiena creyentiaina llofueraimana fetoñeno, naie diga naimie abi iedoi raillano. Abi ieduamona, Taife isoi jeacino finoite. <sup>7</sup> Llofueraimana jaiacadimiena creyenteñedino: “Mare” raiñenia, naimiena fetoñeno. Iese naimiena raiñenia, naimie joreñona jeare ñaitimaci. Iemei Taife ramo jiai faite, naimie abido danomo uaillena. Ie muidona naimie uaina jaca cacareññeitimaci.

#### *Diáconuai illa rafue*

<sup>8</sup> Diáconuai creyentia llofueraini isoi marena illa. Inouiganona illa. Jifairaiññena. Ucubena nicidoñena. <sup>9</sup> Naimacidi Cristona cai inua rafuena jeanide comeciainomona inua. <sup>10</sup> Bu omoi fetoacania, naimacina nano facaci. Roracomo jiaie rana nano majjita. Iena raise finoia, diáconuaina jaita. <sup>11</sup> Diáconuai ainjai jiai inogañaiññuaina illa. Jiaie comini joreñona ñaiññena. Jirorainina. Naga rafuena marena raise finua. <sup>12</sup> Nana diáconuai aidi dañaiññorie. Diáconuai uruijai naimaci uaina raise inua. Diáconuai imaci anamo itinona raise sedajana uifhuana. <sup>13</sup> Diáconuai marena majjia, comini naimacimo iobillacinona fecaitimaci. Cristo Jesúna inuano, naimiena marefodo jiai lloitimaci.

#### *Jusiñamuina iñnotino*

<sup>14</sup> Timoteo, raire o dine jaiacadicue; iadedi uicodo bie rafuena omo cueticue. <sup>15</sup> Are cue riññenia, dani omoi creyentia diese ofia, Jusiñamui ie cominina marena omoi illana omoi uifnollena, omo cueticue. Cajede Jusiñamuina jai sedadica. Uanaicinona riidotica. <sup>16</sup> Jusiñamui caina Cristona jai uifnotagafuedi jiaie rafue baifemo faite. Iena cai uifhuana, raiticai:

Enruemo Cristodi iimana jai bairede.

Jusiñamui Joreñodi caina naimie uai siñonana uifnotade.

Jusiñamui jaienisai naimiena jiai ciodimaci.

Jiaie nairaiññaimo naimiena lloticai.

Iena cacajamona, ailluena cominidi diga nairaimona naimiena birui iñnotimaci.

Monamo naimie abido jai jaide.

## 4

### *Jiainodi jiaiforie rafuena lloitimaci*

<sup>1</sup> Jusiñamui Joreño caimo raise llote: “Jesucristo nia abido biñena facaiseconi damierie creyentiaí Cristona fainonocaitimaci. Taife díbeimo ite lloraini lluana cacarefillamona, Janabamona ite lluacinodo jaitimaci. Taifemona ite lluacinodo jaitimaci”. <sup>2</sup> Naie llorainidi: “Uanaicinona lloticaí” raitimaci; iadedi taino llocabiitimaci. Naimaci comeciaí jai tainomo ite. <sup>3</sup> Iima riño ie aina ollena rairuitimaci. Riño iima ie inina ollena rairuitimaci. Dajerie guille rana fimaidoitimaci. Jusiñamui iena fimaidoñede; ia creyentiaí uanaicinona uifñuanona, iobillanona guillena, naimiedi naga rana finode. <sup>4</sup> Nana Jusiñamui comuitaga guille radi mare. Iobillano iena cai feifñuanona, guiticai. <sup>5</sup> Jusiñamui llua jira, Jusiñamuimo cai jiia, nana guille radi jai mare. Iemona marañede rafue jaca caimo comuifeite.

### *Jesucristo rafuedo raise inocana jai*

<sup>6</sup> Timoteo, cue lluana creyentiaímo o lloia, Jesucristo díbeimo raise maijidio. Cristo uaina inocana o jailla jira, mare llogacinodo o jailla jira, raise maijidio. <sup>7</sup> Jamai rafuemo, jamai inogaiimo o comecina facañeno; iadedi Jusiñamui jitailla rafuena finocana o jai. <sup>8</sup> Mañillena o abillarocaiadedi, mare; iadedi Jusiñamui rafuena o facajia, eo mare. Abillarocaja baifemo Jusiñamui uaidi eo faite. Jusiñamui rafuedi o comecina birui ocuifñotaite. Jusiñamui díne jiairuido o jaillena, o comecina marena jiaí raise finotaite. <sup>9</sup> Bie lluacinodi uanaicino. Ie jira iena cai inua. <sup>10</sup> Cai jillobillena, cajede Jusiñamuimo ocuridicaí. Ie jira duere sefuillano maijidicaí. Jeacinomona Jusiñamuidi nana cominina jillobitaacade. Naimiena inotinona jai jillotate.

<sup>11</sup> Nana creyentiaímo cue lluana raise llofue. <sup>12</sup> Naimacina o llofueia, conirruena nia o illamona: “O afemo iticaí” naimaci raiadedi, damamai iese raitimaci. Mare illacinodo o jai. Ie meí iese raiñeitimaci. Marena o ñaiamona, marena o illamona, jiaie cominina o isruillamona, Jusiñamuina o inuamona, o jeanide rafuena o finoñenamona, naimacidi fueoitimaci. <sup>13</sup> O díne nia cue riñenia, creyentiaí ofia, Jusiñamuina cuegafuaina ado faca. Iena llono. Iena llofue. <sup>14</sup> Creyentiaína llofueraini navui ofidemo, Jusiñamuimo o baitajacina o feifñollena, naimaci onolliaí o ifogimo jonetimaci onolliaí o ifogimo jonetimaci. Naie facaiseconi Jusiñamui naimacina naicinona ona llotatate. Naicinona birui fainonocañeno. <sup>15</sup> Iena eo uuiucaí, nana comini Cristona inocana o jaillana uifñollena. <sup>16</sup> O comecina raise eeno. Marena raise llofue. Cristo uaina inocana o jai. Iese o jiaia, jeacino finuamona jilloitio. Iese ona cacadino jai jilloitimaci.

## 5

### *Timoteo afemo itino diga ie illa rafue*

<sup>1-2</sup> Eimiaína illamona, o afemo itinona riire llofueño; iadedi o moomo o llua isoi, naimacina fecuise llofue. O anafemo itinona o amataímo o llua isoi, llofue. O afemo itañañuaina o eimo o llua isoi, llofue. O anafemo itañañuaina o miriñotiaímo o llua isoi, llofue. Nañañañuaimo jeare comecina facañeno. <sup>3</sup> Nañañañuaina canollena, feciñuái comini inenia, nañañañuaina cano. <sup>4</sup> Feciñomomo uruiaí ia, naimaci nañañañona canua, nañañaño naimacimo duilla jira. Einamacina illamona, iemona nañañañodi ibana oite. Iese itena, Jusiñamuimona mare. <sup>5</sup> Feciñomomo uruiaí inenia, da Jusiñamuimo nañañaño ocuridie, naimie nañañañona canollena. Jusiñamuimo nagarui jicabite. Bie isoide feciñuaina cano; <sup>6</sup> iadedi Jusiñamuimo duiñede rana ebiruiga feciñona canoñeno. Jusiñamui anamo nañañaño jai raise inenamona, Jusiñamuimona nañañañodi jai fiodañañaño isoide. Fiodaite cominina jaca canoñedicaí. <sup>7</sup> Ie jira creyentiaímo buena llono, feciñuaina jeare bu ñai raillanona.

<sup>8</sup> Ie cominina canoñedimie Cristo uaina jai fainonocaide. Naimiedi Cristona inoñedimie baifemo eo jearedimie. <sup>9</sup> Creyentiaína sedarainina canolle feciñuái mameciaína o joneia, iese jone: jai jionañañañuái diese mameci jone. Dajede iniredañañuái mamecina jone. <sup>10</sup> Mare rafue nañañañuái finocabilla jira, jiaie cominidi nañañañuaidi mareñañuái railañañuái. Ie uruiaí raise sedañañañuái. Cominina nafuecabitañañuái. Jai creyentiaína abina iedoñeno canocabidñañañuái. Duidinona canocabidñañañuái. Diese mare rafuena finocabidñañañuái mameci jone. <sup>11</sup> Feciñuái diese mameci o joneia, nia jionañañede feciñuái mameciaína joneñeno. Nañañañuái nano llotimaci: “Inina dane oñeiticaí. Da Cristona sedañañañ” llotimaci. Ie meí uri inenanomona, imana niciduamona, inina jitaitimaci. Ie jira nañañañuái mameci joneñeno. <sup>12</sup> Nañañañuái navui lluacinona jai fainonocaila jira, jiaie comini nañañañuái joreñuaina ñaitimaci. <sup>13</sup> Nañañañuái diga jofomo macariruillamona, rairañedimaci. Eo ñaillaredimaci. Nañañañuái ñañenacinuaido ñaitimaci. <sup>14</sup> Nia jionañañede itañañuái iese inellena, nañañañuái inina dane uana jitaidicue. Ie meí uruiairenitimaci.

Naiñaiñuái jofona sedaitimaci. Ie mei budí naiñaiñuaina jeare ñaiñeite. <sup>15</sup> Cristona dajerie fainonocaida, Taife dibeimo jai jaidimaci. <sup>16</sup> Creyente cominona feciño iade, da naimie naiñaiñona canua. Jiaie creyentiaimo naiñaiñona canolle rana jacañena. Ie muidona cominide feciñuaina canorenitimaci.

<sup>17</sup> Creyentiaina llofueraini marena majiia, raise ibauiga. Naimaci lloia, naimaci jiai llofueia, eo raise ibauiga. <sup>18</sup> Moisés micori jaiie cuegafuiai iena llofe: “Trigo oni juillena jurareta saisiia, ie fuena maiñeno, ie guillena”. Guillamona ibana jai ote. Cristo jaiie llofe: “Maijdimiedi ibauiga”. <sup>19</sup> Creyentiaí llofueraimana damie llogidoia, iena cacarefiñeno. Mena comini, nibai daje amani comini iese naimiëna llogidoia, iemo cacarei. <sup>20</sup> Creyentiaí llofuerainimona bu jeacinona finocabia, nana creyentiaí uicomo naimiemo riire lloño, jiaie creyentiaí daje isoi iñellena. <sup>21</sup> Dacinodo naga jeacino finoraimamo lloño. Nagamiemo riidoñeno lloño. Fecuisse damiemo lloñeno, naimiedi o nabaina jira. Jusiñamui caina ciode. Jesucristo caina ciode. Jusiñamui fetoca jaienisai caina jiai ciodimaci. Ie jira dacinodo lloño. <sup>22</sup> Jeacino naimiemo ia, naimie jeacino facaisena o iñellena, creyentiaí llofueraimana jaillena, buna raire fetofiñeno. Jeacinomona oni eneno o i. <sup>23</sup> Eo o duia, da jinuina jiroñeno. O duicabilla jira, janore vino jiro, o jebe manollena. <sup>24</sup> Jeacino dajerie finoia, iena uiñoticaí, juez isoi Jusiñamui iena nia lloñenia. Jeacino jiaino finoia, iena uiñofedicaí; iadedi jiairuido Jusiñamui lloia, iena uiñoticaí. <sup>25</sup> Ie isoide. Mare rafue bu finoia, iena uiñoticaí; iadedi birui iena cai uiñofenia, jicarena finoñena jira, jiairuido iena uiñoticaí.

## 6

<sup>1</sup> Jusiñamuina ñnote majirainidi naimaci patrones eo ñnua. Ie mei Jusiñamuina ñnoñedino Jusiñamuina jeare ñaiñeitimaci. Cai llofuiacinona jamañeitimaci. <sup>2</sup> Jesucristona naimaci patrones ñnoia, majiraini naimaci uaina jiai ñnua. Naimaci comeciaí facañena: “Patrón creyentena illa jira, dani comina cai isiruilla jira, raise majiñeiticaí”; ia: “Raise majiñiticaí” comeciaina facaja.

### *Uanañedicinona llucacino*

<sup>3-4</sup> Cai llogacinodi uanaicino. Cai Nama Jesucristona lloticaí. Bie llogacinomona naimie jitaile isoi cai illanona, raise uiñoticaí. Jiaicinodo bu llofueia, abi iedote. Abi uiñofede. Uai eo uaitaacadade. Ie meinoconi comini abina uradoidimaci. Daajena comeciaina lloñedimaci. Jiaie comini joreñona ñaitimaci. Cai fiëna bitimaci. <sup>5</sup> Uai uaitatimaci, naimaci comeciaí marañeno illa jira. Uanaicinsona jai uiñofedimaci. “Cristo uai llumona, ailuena ucubena oiticaí” raillanomo comeciaina facadimaci. “Temona caimare iiticaí” raillanomo comeciaina facadimaci. <sup>6</sup> Ie iadedi iese iñede. Cristona eo raise cai ñnuamona, caimo diese ite ra diga caimare iticaí.

<sup>7</sup> Cai jeiciaí, jaca buenidicaí. Cai fiodailla mei, cai rana uiñeiticaí. Cai radi benomo fiebicaite. <sup>8</sup> Ie jirari, cai guille ia, cai iniroi ia, caimare bene cai illa. <sup>9</sup> Eo ucuberedinona jaiacadinona Taife eo ramo faite. Taife uaina ñnuanona ucube ollena, ucuberedinona jaiacadinodi diga marañede rafuena finodimaci. Ja muidomo imaci abi faifitimaci. <sup>10</sup> Ucubena ebiruillanona, ucuberedinona jaiacadino naga jeacinona finocabidimaci. Ucube ollena, dajerie Cristona jai fainonocaidimaci. Ie muidona eo duere sefuidimaci.

### *Jusiñamui uaina ñnocana jai*

<sup>11</sup> Ero, Timoteo, odi Jusiñamui fetocamiedio. Nana cue como lloga rafuemonona oni eneno o i. Mare rafuedo o jai. Jusiñamui jitailla rafuena finocana o jai. Jesucristona ñnocana o jai. Jiaie cominina isirui. Mare rafue dibeimo o comecina jone. Riicinodo cominina llofueño. <sup>12</sup> Jeacino dibeimo o iñellena, Jesucristona ñnuanona, llocana o jai. Jaca itatajacinona marena raise ñno. Jusiñamui ona fetode, o jaca illena. Navui diga cominimo Jesucristona o ñnuana marefodo llotio. <sup>13</sup> Ie isoide Jesucristo. Poncio Pilato dine jaiie naimie itemo, marefodo: “Imiedicue” llofe. Jusiñamuidi nana rana cajetade. Naimie caina jaca ciode. Jesucristo caina jiai jaca ciode. Ie jira uanaicinsona omo lloticue. <sup>14</sup> Cai Nama Jesucristo nia abido biñuena, nana omo cue llogacinuai ñno. Jearede rafuena finoño, jiaie comini naie llogacinuaina uaitañellena. <sup>15</sup> Naimie jitaillirui Jusiñamuidi enirumo Jesucristona dane oretaita. Jusiñamuidi maremie. Nanocamie. Cai nanoca cai moto illaima. Cai nanoca Nama. <sup>16</sup> Da jaca naimie fiodañeite. Eo isire lligañote ra dinomo naimie ite. Nainomo jaca bu lairei rinide. Bu naimiëna jaca cionide. Naimiedi jaca siñonasa. Naimiemo iobillacinsona jaca cai fecacabillasa. Iena jitaidicue.

<sup>17</sup> Eo ucuberedinomo lloño: “Abina iedoñeno. Ucubedi fuirede. Ie jira ucubena uamo ocuiriño; iadedi Jusiñamuimo ocuiri”. Cai comeciaí jaisillena, naimiedi caimo rana eo raise fecacabide. <sup>18</sup> Ucuberedinomo jiai lloño: “Omoi ucube diga mare rafuena fino. Jiaie cominimo ucubena caidñeno fecajana cano”. <sup>19</sup> Ie muidona iese naimaci finoia, monamo

naimaci isiruiga rana iite, jiairuido iena. Iese naimaci jaia, jaca itatajacinona marena raise ua uiñoitimaci.

*Fuiduacino*

<sup>20</sup> Timoteo, cue omo llogacinona faiñoeno raise uiuicai. Jamai rafuemo cacarefiñoeno. “Uanaicinona eo uiñotica;” dajerie raitimaci; iadedi uiñoñedimaci. Naimaci ñaiana cacarefiñoeno. <sup>21</sup> Dajerie iena cacajano, Cristona nia uiñoñedimaci. Jusiñamui ona duenailasa. Jaca dinori omo rafuena lloticue. Mai. Pablocicue.

## TIMOTEOMO PABLO IE EMODOMO ORETAGA RABE

### *Uaiduacino*

<sup>1-2</sup> Timoteo, carta omo dane cueticue. ¿Nigacino? ¿Nie isoidio? Pablocicue. Jusiñamui cuena jitailla jira, Cristo Jesús oretagamicue. Cominimo jaca itatajacinona llollena, cuena oretate. Cristo Jesús cai ñnuamona, naimie diga jaca iiticaí. Cue isiruiga jito isoidio. Cai Moo Jusiñamui, cai Nama Jesucristo diga, ona jai duenaite. Iena uñocana mai o jai. Ona jai uri itatatiamaiaí. Iena uñocana mai o jai.

### *Jusiñamuimo iobillacinona fecade*

<sup>3</sup> Mare cue comecimona cue usumatiaí micoriaí isoi, Jusiñamuina sedadicue. Timoteo, nagarui Jusiñamuimo cue jüia, o facaisena iobillacinona fecadicue. <sup>4</sup> Cue comeci caimareficaillena, ona eo cioacadicue. Navui cue o facadoia, o eiana comeciticue. <sup>5</sup> Cristo Jesús o ñnuana dane jiaí comeciticue. O usuño Loidadi ñnote. O ei Eunicedi jiaí ñnote. Ie mei ñnotio. Naimiena o ñnuana jai uñotícue.

<sup>6</sup> Ie jira o comecina dane ocuiño, Jusiñamui uai o llofuellena. Cue onolli o ifogimo navui joneticue, ona fetollena, naimie uaina o llollena. Jusiñamuimona o baitajacinona naie facaiseconí feiñotio. <sup>7</sup> Jusiñamuidi cominina o jaciruillana jitaíñede. Cai comeciaina ocuiñotajanona, caina jiaie cominina isiruitallena, cai comeciaina eenotallena, ie Joreño caimo fecade. <sup>8</sup> Ie jira cai Nama rafuena o lluaña meiruiñeno. Cárcelmo cue illa jira, cuena jiaí meiruiñeno. Cristo Jesús rafue muidona duere sefuidicue. Naie rafue muidona duere o jiaí sefua, rairuioicaíñeno i. Jusiñamui o comecina ocuiñotaita. <sup>9</sup> Naimie isoi cai marena illena, caina jiaie fetuano, jeacinomona caina jillotata. Cai finoca rafue muidona caina jillotañede; iadedi naimie jitailla jira, caina jillotata. Enirue nia finoñena facaiseconí caina jiaie duenaite. Cristo Jesús caina iena jai uñotade. <sup>10</sup> Cai Jilloitaramadi Cristo Jesús. Caimo Jesús jai bairia jira, Jusiñamui caina duenaillana jai uñoticaí. Fiodaillamona naimie jai jillode. Iemona jiaí jilloiticaí. Naimie mare rafuena naimie caina Jusiñamui díbeimo jaca illacinona jai uñotade. <sup>11</sup> Bie rafuena llollena, cuena fetode. Cuena oretaja jira, biena llofueticue. <sup>12</sup> Ie jira duere sefuidicue; iadedi cue illana meiruiñedicue. Cue ñnogamiena cue uñua jira, naimie bille dinori naimiedi nana cuemo naimie jai iga rafuena cue llofuellena, cuena raise eenoite. <sup>13</sup> Cue llua isoi o i. Uanaicinona lloticue. Cristo Jesús ñnocana o jai. Jiaie cominina isirucana o jai, Cristo Jesús mo jainaiaila jira. <sup>14</sup> Jusiñamui Joreño caimo illa jira, omo naimie lloga uanaicinona fainonocaiñeno uiuicaí. Uanaicinona o fainonocaiñellena, naimie ona canoite.

<sup>15</sup> Diga Asiamo ite cominidi cuena fainonocaidimaci. Naimacimona Figelo cuena fainonocaide. Hermógenes cuena jiaí fainonocaide. <sup>16</sup> Onesíforo daje isoíñede. Diga icaiño naimie cue comecina ocuiñotade. Cuena meiruiñede. Cai Namadi Onesíforo jofomo itino duenaillasa. <sup>17</sup> Romamo Onesíforo navui ria, cuena isire jenuano, cuena baite. <sup>18</sup> Efesomo jae cue ia, naimie cuena jiaí canode. Iena raise uñotio. Cai Nama ico abido bia, cai Namamona naimie iba feiñuana jitaidicue.

## 2

### *O majia rafuena raise fuido*

<sup>1</sup> Cuena fainonocaidino isoi iñeno; iadedi cue jito, Cristo Jesús ona canuano, Cristo díbeimo o comecina ocuiñocana jai. <sup>2</sup> Diga cominimo cue lluaña navui cacadio. O uaina ñnotinomo cue lluaña llono, iena jiaie cominina naimaci llofuellena. <sup>3</sup> Cristo Jesús rafue muidona duere o sefua, rairuioicaíñeno i. Cai Nama rafuena o riiduamona, naimie soldado isoidio. <sup>4</sup> Ie illaíma uai naimie ñnoiacania, soldadodi soldadoñede rafuena majiacaiñena. Ie illaíma iobitallena, ie illaíma ocuica rafuena ñnoacanite. Ie isoide. Da Cristo Jesús rafuena o fino, naimiena iobitallena. <sup>5</sup> Reglamentos llua isoi naimie raise jifanoñena, jifanoramadi bue isoide rana cioíñede. Ie isoide. ñbana o feiñollena monamo o jaia, Cristo Jesús lluaño raise o jai. <sup>6</sup> Illimo duere majjiraimadi majia jira, naiemona naie guilledi oga. Ie isoide. Duere o majji, ñbana feiñollena. <sup>7</sup> Cue lluaño o comecina facacabi. Cai Nama ona canoite, iena uñollena.

<sup>8</sup> Jesucristo fiodaillamona jillode. Iena comeci. Naimie usumadi David micori. Jesucristona cue llua jira, <sup>9</sup> marañedimie isoi cárcelmo duere jai sefuidicue; iadedi Jesucristo rafue nia llocana jaide. <sup>10</sup> Ie jira Jusiñamui fetocano facaina duere sefuidicue, Cristo Jesúsna naimaci ñnuamona naimaci jilloillena, monamo naimaci jaca illena. <sup>11</sup> Bie llucinodi uanaicino: Naimie díbeimo cai jaillamona, naimie diga jaca iiticaí.

<sup>12</sup> Naimie muidona cai duere sefua, naimie diga iitica, ie cominina naimie sedalle facaisconi.

Naimiena cai janoia, naimie caina jiai janoite.

<sup>13</sup> Naimie raise cai inoñenia, naimie uai meidoñena muidona, naimiedi nia inogamie.

#### *Timoteo illa rafue*

<sup>14</sup> O cominimo biena dane llono, iena comecillena. Jusiñamui facaina naimacimo llono: Uaina jamai uaitaño, mare rafuena naicinomona comuiñena jira, naicinona cacadino comeciaina maretañena jira. <sup>15</sup> Marena maiji, Jusiñamui ori iobillena. O meiruiñellena, naimie o maijia jibuia, marena maiji. Uanaicino o uiñuamona, naimie uaina marena raise llofue. <sup>16</sup> Jamai ñaiana cacarefiñeno. Comini jamai ñainoicaia, Jusiñamui jitailla rafuena finocana jaiñedimaci. <sup>17</sup> Diga rafue naiemona comuide. Mocollonaitate duico cai abimo illa isoi, naie rafue llocana jaide. Himeneo naie rafuedo jaide. Fileto dajedo jiai jaide. <sup>18</sup> Uanaicinona fainonocaidiaimaia. Coco inua isoi, llofueñediaimaia. “Cai fiodaia, cai abi ico jilloñeite” llofuetiaimaia. “Cristona cai inua facaise jai jillo dica. Cai fiodaia, cai joreño jaca iite” llofuetiaimaia; iadedi cai abi ico jillollena inoñediaimaia. <sup>19</sup> Ie ia Jusiñamui comini jaca inocana jaidimaci. Ie cominimo Moisés micori jaie lluamona, iaimaia; finoca rafuena jiai ñaite: “Jusiñamuidi ie cominina uiñote. ‘Jusiñamuina inoticue’ raitimedi marañede rafuemona eneno illasa” llote. Ie jira iaimaiaimona eneno o i.

<sup>20</sup> Ero, ucuberedimie jofomo diga guillirue joneuilla ra jai ite. Eo jitarede rana jai ite. Janore jitarede rana jai jai ite. <sup>21</sup> Ie isoide. Jusiñamui dibeimo itinomona naga isoide comini ite; iadedi jeacinomona eneno bu ia, Jusiñamui naimiena fetote, ie eo jitailla rafuena finollena. Jusiñamui dibeimo raise maijite. <sup>22</sup> Ie jira conirueni comeciai jitailla marañede rafuemona eneno o i. Marena i, Jusiñamui jitailla isoi. Jesucristona inocana jai. Nana cominina isirui. Uri i. Mare comeciainomona nana cai Namana sedadino diga iese i. <sup>23</sup> Jamai ebena rafuemo ineno. Naiemona icirillacinodi comuide. Iena uiñotio. <sup>24</sup> Jusiñamui facaina llofueraimadi raire iciriñena. Nana cominina nabairilla. Marena fecuise llofuega. Ricaiñena. <sup>25</sup> Naimie uaina jitañedinona fecuise llofuega. Ie mei Jusiñamui naimaci comeciai iuaina nibai meidotaite, uanaicino dibeina uiñollena. <sup>26</sup> Ie mei abi uiñuamona, Taife anamona jilloitimaci. Taifedi naimacina ie anamo jai itatate.

### 3

#### *Jusiñamui dibeimo inedinomona abina rairui*

<sup>1</sup> Bie llucinomo comecina raise faca. Jesucristo abido bille facaise iairei ia, creyentena illena eo sefuironeite. <sup>2</sup> Naie facaiseconi comini dani imaci abina isiruitimaci. Ucubena ollena eo nicidoitimaci. Abina iedoitimaci. Abina biriitimaci. Jusiñamuina eo jeare ñaitimaci. Naimaci moo uaina, naimaci ei uaina inoñeitimaci. Jiaie cominimo iobillaciona jaca fecañeitimaci. Jusiñamuina jaca jitañeitimaci. <sup>3</sup> Jiaie cominina duenaiñeitimaci. Comeciaina jaiarenitimaci. Jiaie comini joreñoa eo jeare ñaitimaci. Naimaci comeciaina eenoñeitimaci. Ebe isoi naga rana duere finoitimaci. Mare rafuena jitañeitimaci. <sup>4</sup> Naimaci nabairiaina janoñeitimaci. Jiaie cominimo comeciaina facañeitimaci. Eo abina iedoitimaci. Naimaci comeciai jitailla rafuena finoacanitimaci. Jusiñamui rafuena isiruiñeitimaci. <sup>5</sup> “Jusiñamuina sedadica” raitimaci; iadedi Jusiñamui uaina jamaitimaci. Bie isoide comini diga nabairiñeno. <sup>6</sup> Naimacimona dajerie jiaie jofuemo macaraitimaci, naie jofuemo ite riñoniaina jifuiamona llofuellena. Diga jearede rafuena finuano, naie riñonia ebena itimaci. Naimaci comeciai iuailai raire meidocana uitimaci. <sup>7</sup> Naga lloraime lluomo naiñaiñuacacareidimaci; iadedi uanaicinona jaca uiñoñedimaci. <sup>8</sup> Naimaci comeciai eo marañede. Jusiñamui uaina inoñedimaci. Jannes, Mambres diga, Moisés micori lloga uai jaie uaitatiaimaia. Ie isoi bie comini uanaicinona birui jai jitañedimaci. <sup>9</sup> Nana comini naimaci rafue jamai ebe isoi finoca rafue uiñuamona, Jannes iaimaia; Mambres rafue jaie fuilla isoi, naimaci rafue raire fuite.

#### *Timoteo uanaicinona inuanona jailla*

<sup>10</sup> Timoteo, cuena uiñotio. Cue lloufiana uiñotio. Cue illana uiñotio. Cue jitailla rafuena uiñotio. Cristona cue inuana uiñotio. Icirineno fecuise lloticue. Cominina isiruiticue. Duere cue sefua, cue comecina ocuiñoticue. Iena uiñotio. <sup>11</sup> Antioquíamo, Iconiomo. Listramo cuena duere finodimaci. Duere sefuicue; iadedi nana naiemona cue Nama cuena jillobitate. <sup>12</sup> Jusiñamui jitailla rafuena finuano, Cristo Jesús uaido jaidinodi duere sefuitimaci. <sup>13</sup> Ie facaiseconi marañedinodi marañede rafuena finocana jaitimaci. Jifueraini daje isoi jifuericana jaitimaci. Naimacidi abido naimacina jiai jifueitimaci. Iese jaitimaci; <sup>14</sup> iadedi cue llofua uaido inocana odi jai. Cuemona jai fueotio. O usuñomona jai fueotio. O eimona jai fueotio. Ie jira uanaicinona jaie inotio. <sup>15</sup> O uruenamona Jusiñamuina mare cuegafuiaina cacadio. Naie cuegafuiacai cai jilluana caimo llote. Cristo

Jesúna cai ñnuamona, jillobidicai. Iena caimo jai llote. <sup>16</sup> Comini nana naie cuegafuiaina cuetimaci; iadedi Jusifiamui jitailla isoi, naga cuetímie cuete. Ie jira nana naie cuegafuiái Jusifiamuimona ite. Cominimona ññede. Ie jira naie cuegafuiaimona uanaicinona uifñoticai. Cai marañedicinona caimo llote. Cai começiai marena illena, Jusifiamui jitailla isoi, caimo llote. <sup>17</sup> Iese llote, naimiemo cai duillamona, nana Jusifiamui rafuena cai raise uifñollena. Raise uifñuamona, Jusifiamui rafuena raise llofuereniticaí. Naga Jusifiamui jitailla rafuena jiai raise finoreniticaí.

#### 4

<sup>1</sup> Jiairuido Cristo Jesúdi illaimana enruemo abido biite. Illaima isoi ie cominana sedajite. Naimiena ññoñenamona nia cajedinona duere finoite. Jai fiódaitinona jillotajanona, naimiena ññoñenamona, naimacina duere finoite. Jusifiamuidi birui caina jaca ciode. Cristo Jesús birui caina jaca ciode. Iena cue uifñuamona, bie uai omo lloiticue. <sup>2</sup> Naimiena ññoñedinona Cristo duere finoñellena, naimie rafuena naimacimo jaca llono. Comini o dafaifia, comini ofia, comini o dine ria, naimacimo iena lloitiosa. Naimaci jitaia, llono. Jitaifñenia, jai llono. Jeacinona bu finoia, naimacimo llono. Marena naimaci illena, naimacimo llono. Fecuisse jaca llofue. <sup>3</sup> Jiairuido dajerie uanaicinona jitaifñeitimaci. Jiaifñena jitaítimaci. Naimacimo dani naimaci cacaacana rafuena llollena, diga llofuerainina jenoítimaci. <sup>4</sup> Uanaicinona fainonocaida, ñgáiaí icinuaido facajítimaci. <sup>5</sup> Timoteo, o começina eeno. Duere o sefua, rairuioicaiñeno i. Jesucristo rafuena llocana o jai. O llofuiacinona marena fuido.

<sup>6</sup> Jai iaírei ite cue meinellirui. <sup>7</sup> Cai Nama rafuena llocana cue jaillano, iena marena jai riidoticue. Cue illa ññori jai fuiacade. Cai Namana fainonocaiñedicue. <sup>8</sup> Cai Namamona marena cue illa jira, monamo ibana feiñoíticue. Iemo jai ocuiridicue. Iena cai Nama cuejena eenote. Naimie abido billiruiemo iena feiñoíticue. Caina raise uifñuamona, dama cuemo fecañeite; iadedi nana naimie abido billena jitaídnomo ibana jiai fecaite.

#### *Pablo damierena ññaia rafue*

<sup>9</sup> Timoteo, raíre cue dine bí. <sup>10</sup> Biniemo ite rafuena Demasdi eo eburuilla jira, Tesalónicamo naimie jaillano, cuena fainonocaiide. Galaciamo Crescentedi jai jaide. Dalmaciamo Tito jai jaide. <sup>11</sup> Dama Lucas cue diga ite. Marcos o diga ati. Cuen a canollena, naimiena jitaídícue. <sup>12</sup> Efesomo Tíquicon a oredicue. <sup>13</sup> O bia, cue fiebide iniroina ati. Troasmo Carpio jofomo fiebide. Cue libros ati, cue rabiaí diga. <sup>14</sup> Alejandro raillamie navui cuena jeare finode. Naimiedi lloemona rana finoraíma. Cai Nama naimiemo iba oite. <sup>15</sup> Naimiemona o abi rairui. Naimie cue lluaña eo jitaíñede. Iena uaitate. <sup>16</sup> Illaicomini dine cue rafue nano cue riidoia, jaca buna cue facaina riidoñede. Nana cuena fainonocaidimaci. Jusifiamuidi naimacimo iba uana jitaíñedicue. <sup>17</sup> Cai Nama cue facaina ite. Cue começina ocuiñotade, nana judiuaiñedinomo naimie uai raise cue llollena. Naimie muidona cue fiódaisailanomona jillobidicue. <sup>18</sup> Cai Nama naga marañede rafuemona cuena eenoite, monamo ie cominana sedajanomo cue raise rillena. Iobillacino naimiemo jaca fecacabillasa. Iena jitaídícue.

#### *Fuiduacino*

<sup>19</sup> Diga cominimo cue uai oredicue: Priscamo, Aquilamo, Onesiforo jofomo itinomo. <sup>20</sup> Corintomo Erasto fiebide. Miletomo Trófimo duide fainonocaidicue. <sup>21</sup> Rollime nia ññenia, cue dine bí. Diga comini omo naimaci uai oredimaci: Eubulo, Pudente, Lino, Claudia, ua nana creyentiaí.

<sup>22</sup> Cai Nama o começi ocuiñotajasa. Naimie nana omoína duenaillasa. Mai. Pablocicue.



## TITOMO PABLO ORETAGA RABE

### *Uaiduacino*

<sup>1</sup> Tito, omo cartana oretaiacadicue. ¿Nigacino? ¿Nie isoidio? Pablocicue. Naimie cominina cue illamona, naimie jitailla rafuena cue finuamona, Jusiñamui anamo llofuecabiticue. Ie rafuena llofuellena, Jesucristo ie oretagamiedicue. Jusiñamui fetocanona ñnotallena, naimacina uanaicinona uifñotallena, Jusiñamuina naimaci raise sedallena, cuena oretate. <sup>2</sup> Naimie diga jaca cai illemo cai ocuirilla jira, Jusiñamuina sedadica. Enirue nia iñena facaiseconi, Jusiñamuidi cai jaca illena jaie llote. Naimie taino jaca lloñede. <sup>3</sup> Iemei naimie jitaillarui caina ie rafuena jai uifñotade. Naie rafuena cue llollena, naimie cuena oretate. Naimiedi cai Jilloitaraima. <sup>4</sup> Tito, bie carta omo cueticue. Cue isoi o ñnua jira, cue jitona cue mamecao. Coco Moodi Jusiñamui. Coco Jilloitaraimadi Jesucristo. Iaimaiaí ona jai duenaitiaímaiaí. Iena uifñocana mai o jai. Ona uri jai itatatiamaiaí. Iena uifñocana mai o jai.

### *Creylentiaína sedaraini illacinuái*

<sup>5</sup> Nainomo ite rafue o fuidollena, Creta railla uiasimo ona fainonocaidicue. Creylentiaína sedallena, naga nairai illanomo llofuerainina o fetuana navui omo lloticue. <sup>6</sup> Creylentiaína llofuerainina o fetoia, nagamie bie isoidimiena feto: Nana comini naimie mare raillamie. Dañaiñona airedimie. Nana naimie uruiai creylentiaína itimie. Nana comini naimie uruiai mare raillamie. Naimie uruiai ie uaina ñnotimie. <sup>7</sup> Jusiñamui facaina naimie maijia jira, creylentiaí sedaraimadi maremiena illa. Abina iedoñena. Raire iciriñena. Jifairuiñena. Fuiriruiñena. Ucubena nicidoñena. <sup>8</sup> Ie jofomo cominina raise feiñua. Mare rafue icinona isiruilla. Ie comecina eenua. Marena illa. Jusiñamui jitailla rafuena finua. Ie abina eenua. <sup>9</sup> Naie uai raise llofuiamona comini comeciaina ocuifñotallena, naimie uaina uaitatinona llucaitallena, cai llofua isoi uanaicinona ñnocana naimie jailla.

<sup>10</sup> Ie isoidinona feto, ailluena comini Cristo rafuena raise ñnoñena jira. Tainocinuaina ñaicabitimaci. Cominina jifuecabitimaci. Judíuai creylentiaímona diga comini iese itimaci. <sup>11</sup> Ie jira naimacina llucaita. Naimacidi diga cominina uri itatañedimaci. Uanaifñedimona llofuetimaci, ucube bifuiano ollena. <sup>12</sup> Naimacimona comini rafuena lloraima navui raite: “Cai Creta cominidi jaca tainona llouidimaci. Naimaci comeciadi jico comeci isoide. Jearedimaci. Guillardimaci. Rairaidimaci” raite. <sup>13</sup> Naimiedi uanaicinona llote. Ie jira creylentiaímo riire llono, naimaci Jusiñamui uaina raise ñnollesa. <sup>14</sup> Judíuai ñgaiaina naimaci ñnoñellena, comini lletarafuena naimaci ñnoñellena, naimacimo riire llono. Damierie uanaicinona jitaiñedimaci. <sup>15</sup> Ero, mareuidinomona naga ra mare. Jusiñamuina ñnoñedinomona naga ra jearede. Naimaci comeciadi jai jearena jira, jearerie comeciaina facacabidimaci. <sup>16</sup> “Jusiñamuina uifñoticaí” raitimaci; iadedi Jusiñamuina uifñedimaci. Naimaci finoca rafuemono iena uifñoticaí. Jusiñamui naimacina eo gaiñede. Buena ñnoñedimaci. Ie jira mare rafuena finuana uifñedimaci.

## 2

### *Creylentiaí marena illena, uanaicinona llofue*

<sup>1</sup> Tito, Jusiñamuina ñnoñedino isoi iñeno. Odi uanaicino llofue, naimaci marena raise illana uifñollena. <sup>2</sup> Uaicimaína llofue. Canamacina jai llofue: Jifaiñeno. ñnogamiéna jai. Uairico isoi iñeno. Jusiñamui uaina raise ñno. Omoi ecimo itinona isirui. Duere omoi sefuiá, omoi comeciaina ocuifño. <sup>3</sup> Uaicifñuaina llofue. Cañaiñuaina iese jai llofue: Marena omoi i, Jusiñamui jitailla isoi. Jiaie comini joreñuaina ñaiñeno. Jifaiñeno. Mare rafuedo omoi jaillamona, omoi anafeñaiñuái mare rafuedo jaitimaci. <sup>4</sup> Naiñaiñuái inina isiruillena, naiñaiñuái uruiaína jai isiruillena, <sup>5</sup> uairico isoi iñellena, jearede rafuena finoñellena, jofomo raise maijillena, cominina duenaillena, naiñaiñuái inifñai uaina ñnollena, jiaie comini Jusiñamui uaina jamaiñellena, naie cañaiñuáimona fueoitimaci. <sup>6</sup> Einamacimo llono. Coniruenimo jai llono: Ieñede ramo omoi comeciaina facañeno. Uairico isoi iñeno. <sup>7</sup> Tito, naga rafue o finua diese, mare rafuedo o jai. O llofua, uanaicinona llono. Jamai ebe isoi llofueñeno. <sup>8</sup> Marena llofue. Marena o llofua, ¿niése comini o uai uaitaitimaci? Uaitañeitimaci. Iemei o díbeimo iñedino meidaitimaci, caimo jearede rafue iñenia. Ie jira cairi ñaiñeitimaci. <sup>9</sup> Patrón anamo itinomo iese llono: Omoi patrón uaina ñno. Naimie jitailla rafuena raise fino. Naimie uaina oñeno. <sup>10</sup> Rana fiñeno. Naimie raruiaí raise seda. Iese naimaci ia, naimaci raise maijia, naimaci patrón: “Jusiñamui uai mare” raite. Jusiñamuidi cai Jilloitaraima.

<sup>11</sup> Jusiñamui caina duenaillana jai cai uifñua jira, naicinona llofue. Naimiedi nana cominina jillotaiacade. <sup>12</sup> Naimie uai caimo llote: “Cue díbeimo iñede rafuena eneno

fainonocai. Maraiñede rafuena jitañeno. Uairico isoi iñeno. Omoi ecimo itinomo, jiaie cominimo taino lloñeno. Naimaci rana fiñeno. Jusiñamui uaina ñnocana jai”. Iese cai illana Jusiñamui birui jitaide. <sup>13</sup> Jiai caimo llote: “Jesucristo abido billemo caimare ocuiri. Naimiedi ebire biite. Ie uai siño. Naimiedi cai Jusiñamui. Jiai cai Jilloitarañma”. <sup>14</sup> Cairi naimiedi fiodaite, cai jearedicinomona cai jilloillena. Naimie cominina cai illena, mare rafuena iocire cai finollena, cai comeciaina marena dote. <sup>15</sup> Naie rafuena llofue. Maraiñede rafue comini finoia, naimacimo llono. Illañma uai isoi llono. Cominidi o uaina jamaiñellena, raise llofue.

### 3

#### *Creyentiañ illacinuain*

<sup>1</sup> “Omoi illaicomini uai anamo i” creyentiañmo dane llono. Omoi illaicomini llucinona ñno. Mare maijille ia, iena raise fino. <sup>2</sup> Jiaie cominina jeare ñaiñeno. Fuiriñeno. Fecuisse uiuicai. Nana comini diga marena ñaino. <sup>3</sup> Jaiie cai jiai ebe isoidicai. Jusiñamuina ñnoñedicai. Taife caina jifuate. Dani cai comeciñ jitaillacino railla isoi finouidicai. Diga ie jearede rafuena finouidicai. Jiaie cominina jeare finouidicai. Marairañidicai. Abina uradoisoidicai. Cominidi caina enoisoidimaci. Coninina jiai enoisoidicai. <sup>4</sup> Ie ia Jusiñamuidi maremienana jai fididicai. Naimie caina isiruillana jiai fididicai. <sup>5</sup> Ie mei Jusiñamui caina jillotate. Mare rafuena cai finoñedicai; iadedi caina duenaillamona, caina jillotate. Cai jeacinona oni dotajanona, cai comeciaina dote. Ie jira naimie dibeimo cai comeciaina dobaññotocai. Jusiñamui Joreño cai comeciaina marena finode. <sup>6</sup> Ie Joreño caimo raise fecade, Jesucristo finua muidona. Jesucristo cai Jilloitarañma. <sup>7</sup> Ie jira naimiemona marebicaidicai. Caina duenaillamona, marebicaidicai. Caina ie cominina itatate. Iemona naimie diga jaca illemo ocuiritidicai.

<sup>8</sup> Tito, cue llucinodi uanaicino. Jusiñamuina ñnotino marena maijillena, cue llucinona llo-llocai. Cue llucinona mare. Ie jira nana cominidi iena cacacabillasa. <sup>9</sup> Ebena ñaiñeno. Omoi usumatiañ mameciañna jamai sia-siadoñeno. Moisés micori llogacinuainna uaitañeno. Naicino diga buena oñedicai, Jusiñamui jitaillacinona cai finollena. <sup>10</sup> Roracomo comini comeciñ jiañfocaitatimie ia, naimiemo llono: “Iena finoñeno”. Dacaiño o lluamona naimie ñnoñenia, dane llono. Ie mei ñnoñenia, naimie diga omoi ñaiñeno. Naimie diga omoi nabairiñeno. <sup>11</sup> Uanaicinodo naimie jai jaiacañede. Jeacinona jai finode. Naimie iena jai uññote.

#### *Fuiduacino*

<sup>12</sup> Artemas o dine cue oretaia, Tíquico o dine cue oretaia, Nicópolis railla nairaimo are sedañeno raire bi. Nainomo rollime facaiseconi cue comeciñ illana jitaide. <sup>13</sup> Zenas railla abogado Apolos iañmaiañ diga cano, iañmaiañ oni jaiacana jira. Iañmaiañ jitaillena rana fecu. <sup>14</sup> Dueredino ia, naimacina canollena, creyentiañmo: “Marena maiji” jiai llono. Naimaci jamai ñnellena, iese llono.

<sup>15</sup> Cue diga itinomo naimaci uaina omo oredimaci. Jesucristona cai ñnua jira, caina isiruitinomo cue uaina llono. Jusiñamui nana omoina duenaillana uññocana omoi jaillana jitaidecuc. Mai. Pablodiecuc.

## FILEMÓMO PABLO ORETAGA RABE

### *Filemómo Pablodí carta orede*

<sup>1</sup> Filemón, bie carta o dine oredicue. ¿Ñie isoidio? Pablodícue. Jesucristo rafue cue lluamona, cárcelmo itícue. O dine cue uai oredicue. Timoteo cue diga ite. Ie uai jiaí orede. Cai Moo Jusiñamui mo jai cai jainaiailla jira, naimiedi coco ama. Coco diga Cristo facaina o maijia jira, ona isiruiticoco. <sup>2</sup> Coco uaina Apiamo jiaí oredicoco. Cristo díbeimo naiñaiño illamona, naiñaiñodi coco miriño. Coco uaina Arquipomo jiaí oredicoco. Naimiedi coco isoi Cristo rafuena llocana jaide. O jofomo rollena oficabidinomo coco uaina jiaí oredicoco. <sup>3</sup> Cai Moo Jusiñamui, cai Nama Jesucristo diga, omoina jai duenaite. Iena mai uiñocana omoi jai. Iaimaiaí omoina uri jai itatate. Iena omoi uiñocana mai omoi jai.

### *Filemón Cristona ñinocana jaide*

<sup>4</sup> Jusiñamui diga cue ñaia, o facaina cue jüia, naimiemo iobillacinona fecadicue. Mare rafuena o finuana cue fidiá jira, naimiemo iobillacinona fecadicue. <sup>5</sup> Cai Nama Jesúsna ñinocana o jaillana fididícue. Nana creyentiaína o isiruillana jiaí fididícue. <sup>6</sup> Cristo díbeimo cai illa muidona, naimiemona diga marecinona feiñotícai. Cristona o ñinuamona, jiaie creyentiaína o nabaia, omona naie marecinona uiñoitimaci. Naga mare ra uiñocana naimaci jaillana jitaídícue. <sup>7</sup> Cue ama, creyentiaína o isiruilla jira, iobidícue. O muidona creyentiaí comeciá caimare uri illa jira, cue comeci iocíre ite.

### *Onésimo facaina Pablo ñaite*

<sup>8</sup> Cue comeci iocíre ite; iadedi daje rafuena o diga ñaiacadícue. Cristo uai cuemo illamona ñaiñeítícue; <sup>9</sup> iadedi conima coco isiruilla jira, o diga ñaitícue. Jai uaicimadícue. Jesucristo rafuena cue llua muidona, cárcelmona jai ñaitícue. <sup>10</sup> Onésimo facaina ñaiacadícue. Cárcelmo cue illa facaiseconi, cue muidona Cristona naimie ñnua jira, naimie cue jítóna jaide. <sup>11</sup> Omo naimiedi marañede rafue navui finode. O mullaima naimie illanona, raise maijífede. Bene aisiamona, Cristona naimie ñnote. Cuena birui eo canode; iadedi birui o diga raise iacade. <sup>12</sup> O dine naimiena abido oretaitícue. Dama naimiena oretañeítícue; iadedi naimiena cue eo isiruillamona cue comeciña jiaí oretaitícue. <sup>13</sup> O facaina naimie cuena birui canode. Cue diga naimie fiebillana jitaídícue; <sup>14</sup> iadedi: “Jee” o nia rañena jira, iese finofeítícue. Iena omo jicañeítícue. Omo cue jicanuamona buena o finuana jitañeítícue; iadedi dama o comeci jitailla jira, mare rafuena o finuana jitaídícue. <sup>15-16</sup> O anamo naimie nia ite; iadedi Cristona naimie jai ñnua jira, naimie o isiruiga amana feiño. Naimiena isiruitícue. O dine naimie jaca abido illena, o dinena janorena facaise cue dine navui bite. Naimiedi o mullaima; ia naimiedi jiaí birui o ama. Naimiena isiruillanona feiño. <sup>17</sup> O nabaina iticuena cuena o feiñua isoi, naimiena feiño. <sup>18</sup> Naimie marañede rafuena omo navui finode. Omo naimie nia debia, cue facaina jone. <sup>19</sup> Iena íbaitícue. Bie carta dama cue cuiamona, naimie debiana cue íbajana uiñotío. Omo eo lloñeítícue; iadedi cue muidona Cristona o ñnua jira, ailluena cuemo debedio. <sup>20</sup> Cue ama, coco Nama Cristomo coco jainaiailla jira, cue jitailla rafuena fino. Ie mei cue comeci uri iite. <sup>21</sup> Cue jitailla rafue o finollena uiñotícue. Cue jitailla rafue baífemo o finollena uiñotícue. <sup>22</sup> Jiaie rafuena lloiacadícue. O jofomo daje cuarto cuejena fino. Cue facaina o jüia, Jusiñamui jitaia, o dine jaitícue.

### *Damierie imaci uaina jiaí orede*

<sup>23</sup> Omo Epafras ie uaina orede. Jesucristo rafue llua muidona, cárcelmo cue diga naimie ite. <sup>24</sup> Marcos ie uaina orede. Aristarco ie uaina orede. Demas ie uaina orede. Lucas ie uaina orede. Cristo rafue naimaci lluanona, naimaci cue diga maijide. <sup>25</sup> Cai Nama Jesucristo nana omoi creyentiaí comeciaina ocuiñotajamona omoina duenaillasa. Mai. Macaibaite. Pablodícue.

## HEBREOS COMINIMO ORETAGA RABE

*Jesucristo rafuena jai cai cacajamona, Jusiñamuiña jai uññoticaí*

<sup>1</sup> Jusiñamuidi caina ie rafuena jai uññotade. Iena omoímo ja lloiticue. Cai jaiagai micoriaímo Jusiñamuidi ie rafuena llote. Naimacimo ie rafuena llollena, jiaicaiño ie jaienisaina orede. Jiaicaiño nicai anado Jusiñamui ie rafuena llote. Iena llollena, jiaicaiño ie facaina lloraini micoriaína orede; <sup>2</sup> iadedi eniruemo ie Jito billamona, Jusiñamui rafuena jai cai cacajamona, Jusiñamuina birui jai uññoticaí. Ie Jito uaido, mona diga, eniruena jaie finode. Ie Jito uaido nana rana jaie finode. Na comini diga jai finode. Jusiñamuidi nana ra, nana comini diga ie Jito anamo ico illena jai llote. <sup>3</sup> Ie Jito uaido nana naie rana finocana uite. Naimie muidona Jusiñamui marena ebirenana uññoticaí. Jusiñamui marena naimie illa isoi, naimiemona Jusiñamuina uññoticaí. Eniruemo billanona, cai comecimo ite jeacino facaina naimie fiodaite. Monamo abido jaillanona, illaimana naimie illamona, Jusiñamui abimo naimie jaide. Naimieri Jusiñamui iobillamona, Jusiñamui abimo naimie jaide. Illaimana naimie dane illa jira, Jusiñamui abimo naimie jaide.

*Jusiñamui Jito Jusiñamui jaienisai baifemo faite*

<sup>4</sup> Jusiñamui Jitona naimie illamona, naimie illano Jusiñamui jaienisai illano baifemo faite. Ie illanomona naimie Jusiñamui jaienisai baifemo faiana uññoticaí. <sup>5</sup> Jusiñamuidi: “Cue Jitodio” Cristomo llote; iadedi ie jaienisaimo iese lloñede. Jiaicaiño llote: “Naimie Moodicue. Naimie cue Jito” llote. Ie jaienisai ie Jito baifemo fañena jira, ie jaienisaimo iena jaca lloñede. <sup>6</sup> Ie dajede Jito eniruemo oretaja facaiseconi Jusiñamui llote:

Nana cue jaienisai naimiemo iobillacinona fecaja;

<sup>7</sup> iadedi jiaie rafuedo ie jaienisaina ñaite:

Cue ocuilla rafuena naimaci finollena, cue ocuilla diese naimacina oretacabitue.

<sup>8</sup> Ie Jitona ñaianona raite:

Cue isoi o illa jira, cominina o sedajafue jaca iite.

Eo marecinodo cominina jaca sedadio.

<sup>9</sup> Mare rafue finuana jitaíedio.

Maraiñedicinona finuana jitaíñedio.

Ie jira ona caimare jai itataticue.

Monamo o abido billanona, cue jaienisai baifemo ona caimare itataticue

raite. <sup>10</sup> Jiaicaiño Jusiñamui ie Jitona raite:

Cue isoi o illa jira, o uai diga nanodofoconi eniruena jaie finodio.

Mona jai finodio.

<sup>11</sup> Bie eniruedi mona diga ico fuite.

Eniroi fuilla isoi, iñeite;

iadedi odi jaca iitio.

<sup>12</sup> Eniruena mona diga meidotaitio;

iadedi odi jaca daje isoitio.

Jaca iitio

raite. <sup>13</sup> Ie Jitomo buena llote; ia ie jaienisaimona damiemo iese lloñede. Ie Jitomo llote:

Illaimana o illamona, cue nabei dine ana rai.

Nana o dibeimo iñedinona o anamo itataticue.

<sup>14</sup> Ie jaienisaimo iena lloñede; iadedi naimacina oretacabite, ie Jitona ñnotinona canollena.

Ie jira nana naiemona, ie Jito ie jaienisai baifemo faiana uññoticaí.

## 2

*Jusiñamui caina jillotaja rafuena cai jamañena*

<sup>1</sup> Jusiñamui Jito siño jitonana jira, naimie birui lloga rafuena eo raise cai cacajasa. Naiemona abido cai jaiñellena, naiena cai feitañellena, naiena eo raise cai ñnuasa. <sup>2-3</sup> Ero, Jusiñamui ie jaienisaina jaie oretajanona, Moisés micorimo diga rafuena jaie llote. Naie lloga rafuena bu raise finoñenia, iena bu raise ñnoñenia, Jusiñamui naimiema eo duere finode. Jusiñamui jaienisai lloga rafue mare; iadedi Cristo birui lloga rafue jaienisai jaie lloga rafue baifemo faia jira, Cristo rafuena cai ñnoñenia, Jusiñamui caina duere finollemona ua jilloñeíticaí. Ero, naimie cai jeacinomona caina jillotaíacade. Naie rafuena cai jamaia, iena cai ñnoñenia, naimie caina duere finollemona ua jilloñeíticaí. Cai Nama Cristo naie rafuena jaie llote. Naimiema cacadinodi caimo iena jai llotimaci. Cristo rafuedi uanaicinona llotimaci. <sup>4</sup> Jusiñamui uai diga jiaíforiede siño rafuena naimaci finuamona, Cristo rafuedi uanaicinona uññoticaí. Naimie jitailla diese naga creyentemo Jusiñamuidi ie uaina itatate.

Naga croyente naimie díbeimo raise maijillena, ie uaina itatate. Naga croyentemo naie uai illamona, Cristo rafuedi uanaicinona uifotícaí. Ie jira naie rafuena cai ñnuasa.

*Cai isoi illena, Jesucristo imana jaide*

<sup>5</sup> Jusiñamuidi ie jaienisaína oretauide, ie jitailla rafuena naimaci finollena; iadedi naimaci anamo comíni ico illena jaca lloñede. Cristo anamo comíni ico illena llote. <sup>6</sup> Jusiñamuimo David micorí iena jaie llote:

Cai jamai bue isoidicai; iadedi caimo comecina facadio.

Jamai cominidicai; iadedi caina canodio.

<sup>7</sup> Caina comínina o finua jira, o jaienisaí isoi iñedicai.

Fiodaiñedimaci; iadedi nana enirue rana o finuanona, Adán micorí anamo iena jaie o itataja jira, caina eo iobitadio.

<sup>8</sup> Nana rana naimie anamo o itatajana jaie llotio.

Iese llote; iadedi nana naie lloga rafue nia suiñede, jeacinona Adán micorí jaie finua jira. <sup>9</sup> Jesúna dane lloitícue. Naimiena uifotícaí. Eniruemo naimie jaie billamona, Jusiñamui ecimona naimie billa jira, Jusiñamui jaienisaí illa isoi, dallu naimie iñede. Comena jaide. Cai facaina duere sefuillanona, naimie fiodaite. Caina Jusiñamui dueruillanona, nana cai facaina Jesús fiodaite. Naimie fiodailla jira, ie abimo naimiena Jusiñamui abido itatajamona, Jusiñamui naimiena iobitade. <sup>10</sup> Jusiñamui nana rana finode. Nana comínina comuitate. Naimiena iobitallena, nana finode. Naimie jitailla jira, naimiemona marena jira, Jusiñamui ie Jitona orede. Cai facaina fiodaillena, ie Jitona orede. Cai jeacino facaina fiodaite. Ie Jito fiodaillamona, ailluena Jusiñamui comínina jaidícaí. Naimie illanomo ico iitícaí. Naimie jitailla jira, ie Jito duere sefuillanona fiodaite. Duere sefuillana ie Jito jai uifnuamona, naimiena ñnotinodícaína jai raise canorede. <sup>11</sup> Naimie fiodaillamona marebicaídícaí. Naimie díbeimo jai cai illa jira, daajena mooredícaí. Ie jira naimiedi: “Cue comínidomo!” caina meiruifeno llote. <sup>12</sup> Jusiñamui facaina llorainí micoríai llogacinomona naie rafue uanaicinona uifotícaí. Jesús ie ico finolle rafuena jaie llotimaci:

Ie comínimo ie Moo rafuena lloite.

Ie comíni diga naimie ofia, daajena Jusiñamuimo roitimaci

jaie llotimaci. <sup>13</sup> Jesúna dane ñaitimaci:

Ie comíni diga naimiedi Jusiñamuina ñnocana jaite.

Jusiñamui comínina damierie jailla jira, naimacídí jai naimie comíni

ñaitimaci. Naimaci ñaia isoi, Jusiñamui comínina birui jaidícaí. <sup>14</sup> Jusiñamuina ñnotinodí comínina jira, cai isoi naimie illena, Jesúsí comena jaide. Cai fiodailla isoi, naimie jai fiodaite. Taife uaina cai ñnoja, jeacino finodícaí. Iemona fiodaicana jaidícaí. Jeacino anamona caina Jesús jai jillotaja jira, Jusiñamuimona Taife uai jai saide. Jusiñamui díbeimo iñenanomona jai jillodícaí. <sup>15</sup> Jesús nia fiodaifenia, nana cai illa dínorí fiodaillana jacruicana jaidícaí. Jesús jai fiodailla jira, caina jaciruillacino anamona jillobitade. <sup>16</sup> Jeacino anamo naimaci iñena jira, Jusiñamui jaienisaímo ie comecina facañede; iadedi Abraham micorí isoi ñnotinomo naimie comecina facade. Naimacina naimie jilloitallena, naimiedi comena jaide. <sup>17</sup> Comena naimie illena, Jusiñamui naimiena orede. Cai isoi naimie duere sefuillena, naimiena orede. Cai isoi ramo naimie Taife faiamona, naimie fueollena, naimiena orede. Cai illana raise uifnote. Iemona caina dueruite. Jusiñamui jitaillacino finuana raise uifnote. Ie jira Jusiñamui diga cai facaina nanoca ñairaimana naimie raise jaide. Ie jira cai jeacinona oní dotajana Jusiñamuimo jicanote. <sup>18</sup> Naimie duere sefuilla jira, naimie ramo Taife faia jira, cai ramo Taife faia isoi, naimie caina canorede. Taife uai naimie ñnoñena jira, caina canorede. Taife uaina cai finofellena, cai comeциаína ocuifnotade.

### 3

*Jesús Moisés micorí baifemo faite*

<sup>1</sup> Cue amatíai, jeacino anamo omoi jai iñena jira, ie díbeimo omoína Jesús jai fetua jira, naimie siño jitona jira, naimiemo omoi comeциаína faca. Naimiena ja ñaitícue. Ie rafuena llollena, Jusiñamui naimiena orede. Naimie lloga rafuena jai cai ñnuamona, naimiedi Jusiñamui diga cai facaina nanoca ñairaima. <sup>2</sup> Ie Moo comínina naimie raise sedajanona, naimiedi ie Moo uaina ñnuanona, iena finode. Nana Israel comínina naimie sedajanona, Moisés micorí Jusiñamui uaina ñnuanona, iena finode. <sup>3</sup> Jusiñamuimona Jesúsí Moisés micorí baifemo faite. Moisés micorí mare; iadedi naimie caina jillotañede. Jesús caina jillotaja jira, Moisés micorí baifemo Jesúsí Jusiñamui iobide. Cai jillua jira, Jusiñamui comínina jaidícaí. <sup>4</sup> Buena cai finuamona, naimie comínina jaiñedicai; iadedi naimie caina ie comínina dama itatarede. <sup>5</sup> Naimie facaina maijano, Jusiñamui llua isoi, Moisés micorídí nana hebreos comínina raise sedade. Ie comínimo Moisés micorí Jusiñamui naimiemo lloga uaina raise llote. Naimiemona Jusiñamui ico llole uaidí uanaicinona uifotícaí. <sup>6</sup> Jusiñamui facaina

maijianona, Moisés micori ie cominina sedade; iadedi Cristodi Jusiñamui Jitona jira, naimie ie cominina sedade. Naimiena cai ñnocana jaia, naimiemo caimare cai ocuiria, Jusiñamui ua cominidicai.

*Jusiñamuimona abido cai jaiñellena, bie rafuemonca cai fueua*

<sup>7</sup> Jusiñamui Joreño caimo birui lloia, iena cacarei. Ero, Jusiñamui jaie lluaña cuetatate:

<sup>8</sup> Omoi jaiagai isoi iñeno.

Jofue iñenanomo omoi jaiagai ia, cue uaina ñnoñedimaci.

<sup>9</sup> “Naimie uaina raise uñnotica” raillanona, cuena facacibitimaci.

Cuarenta años cue siño finoca rana ciódimaci; iadedi jaca ñnoñedimaci.

<sup>10</sup> Naimacimo lloticue: “Omoi diga iciriticue.

Cue dibeimo omoi illamo omoi comeciaina facañedomoi.

Cue lloga uaido jaiacañedomoi”.

<sup>11</sup> Omoi diga cue icirilla jira, nainomo uri illena, omoimo cue lloga eniruemo jaca jaiñeitomoi.

<sup>12</sup> Cue amatiái, cai jaiagai rafuena cai uññuamona, cai fueua. Uanai Jusiñamuimona abido omoi jaiñellena, naimie jai lloga rafuena omoi ñnocana jai. Omoimona bu raise ñnoiacañenia, naimiemo llono. <sup>13</sup> Jusiñamui rafuena omoi raise ñnollena, nagarui conini omoi comeciaina ocuñota. Omoimona jeacina eburñellemona, jeacino anamo omoi iñellesa, birui Jusiñamui rafuena raise ñno. Jeacino anamo omoi dane jaia, Jusiñamui rafuena ñnoñeitomoi. Iemona naimie riicallafue anamo dane iitomoi. <sup>14</sup> Cristomo cai duilla jira, naimie caina jaca canuanona, cai comeciaina marena caimare jaca itataite. Nana cai ille ñnori naimiena cai nano ñnuua isoi, cai ñnocana jaia, marena caimare iiticaí. <sup>15</sup> Ie jira naimiena ñno. Bie jaie cuega:

Jusiñamui lloga uaina birui cacarei.

Jofue iñenanomo cai jaiagai ia, Jusiñamui uaina ñnoñedimaci

cuega. Naimaci isoi iñeno.

<sup>16</sup> Egiptomona Moisés micori anado jaidimaci. Diga icañño Jusiñamui uaina cacadimaci; iadedi iena raise ñnoñedimaci. <sup>17-18</sup> Cuarenta años jofue iñenanomo itimaci; iadedi naimiena naimaci ñnoñena jira, Jusiñamui naimaci diga icirite. Naimiena ñnoñena jira, naimacimo Jusiñamui llote: “Omoimo cue lloga eniruemo jaca jaiñeitomoi” llote. Ie jira jofue iñenanomo naimacimo Jusiñamui jai lloga eniruemo jaiñeno fióditimaci. <sup>19</sup> Jusiñamui uaina naimaci ñnoñena jira, naie Canaán railla eniruemo jaca jaiñedimaci. Naimaci comeciái jaca uri illana uññoñedimaci.

## 4

<sup>1</sup> Jusiñamui dibeimo raise cai illamona, Jusiñamui cai comeciái birui uri illana jitaide. Naimie lloga uai nia sañede. Caimona damierie iese iñellesa, cai jaiagai isoi cai iñellena, abina rairuicana mai cai jailla. <sup>2</sup> Jusiñamuidi comini comeciái uri illana jitaide. Cai jaiagaimo iena llote. Diga icañño naie mare rafuena cacadimaci; iadedi iena naimaci ñnoñena jira, iemona buena ofedimaci. <sup>3</sup> Jusiñamuidi cai comeciái uri illana birui caimo jai llote. Cristo ie mare rafuena jai cacadicaí. Naimie uaina cai ñnuua jira, cai comeciái jai uri ite. Cai jaiagai comeciái uri iñede. Moisés micori cuiamona iena uñnoticaí. Cuega:

Naimaci diga Jusiñamui icirilla jira, naimacimo lloga eniruemo jaiñedimaci

Comeciái uri illana jaca uññoñedimaci

cuega. Jusiñamuidi nana comini comeciái uri illana jitaide. Eniruena naimie finocamo,

comini comeciái uri illana jitaide. <sup>4-9</sup> Iena Moisés micori jaie cuega:

Seis digarui raifi illanona, Jusiñamui nana rana finode.

Naimiemonca nana naimie finoca ra mare.

Naimie comeci caimare uri illamona, siete iruimo jafaici ote

cuega. Jusiñamuidi nana comini comeciái uri illana nia jitaide. Moisés micori facaise cai jaiagai comeciái uri illana jitaide; iadedi naimiena naimaci ñnoñena jira, naimaci comeciái jaca uri iñede. Moisés micori fiódailla mei, bie eniruemo Josué micori cai jaiagaina ifode; iadedi naimaci rilla mei, Jusiñamuina naimaci ñnoñena jira, naimaci comeciái jaca uri iñede. Josué micori illa facaisemona diga años illanona, David micori comeciái uri illana jai llote:

Naimie uaina birui omoi cacaia, iena ñno

llote. Naimiemonca Jusiñamui cai comeciái uri illana jitaillana uñnoticaí. Naimiena

ñnotinodicaimo naie rafue jai duide. <sup>10</sup> Jusiñamuina cai ñnuamona, cai comeciái jai uri ite.

Cai comeciái uri illena, jaie rafuedo jaiñedicaí. Naimiena cai ñnuamona, naimie illanomo ico iiticaí. Nana naimie finoca rafuena naimie fuidua mei, nainomo uri iiticaí.

<sup>11</sup> Cai jaiagai ñnoñedimaci. Cai faifiñellena, naimaci isoi cai jaiñena; iadedi Jusiñamui

uaina ñnocana mai cai jailli. Jusiñamuina cai ñnuamona, naimiedi cai comeciái uri itatate.

<sup>12</sup> Naimiena cai ñnoñena, naimie iena uñnote. Naimie jaca ite. Naimie siño. Ie jira naimie

lloga uai jaca saifede. Jaca siño. Cai comeciaino riire baite. Eo jairede lloebi bue isoide jaitaia, iena oni econuanona, nana nainomo fo ite rana bairetate. Ie isoide Jusiñamui lloga uai. Nana cai comeciaino iticinona riire bairetate. Nana cai comeciaina facajacinuaina riire bairetate. <sup>13</sup> Jusiñamuimona buna reirinde. Jusiñamui nana caina ciode. Nana cai finoca rafuena uifote. Nana cai comeciaino iticinona uifote. Ie jira naimie uaina inocana mai cai jailli

*Jesúdi cai facaina Jusiñamui diga nanoca ñairaima*

<sup>14</sup> Jesúdi naie uaina cai inuamo canoite, naimiedi cai facaina Jusiñamui diga nanoca ñairaimana jira. Ie Jito illamona, monamo Jusiñamui abimo birui naimie illamona, cai facaina Jusiñamui diga naimie ñaicabite. Ie jira naimiena inocana jaiticai. <sup>15</sup> Taife cai ramo faia, cai comeciai raise cai ocuiñoñenia, Jesús caina canorede. Cai ramo faia isoi, Taife naimie naga isoide ramo faite; iadedi Taife uaina naimie inoñede. Iemona Taife ramo faia cinona inoñenana naimie uifua jira, jeacinona oñede. Caina canorede. “Naimacina cano” ie Moomo llocabite. <sup>16</sup> Cai facaina ie Moo abimo naimie illa jira, cai comeciaina naimie ocuiñotaiacana jira, Jusiñamuina jaciruiñeno naimiemo cai jia. Naimie caina duenailamona, cai jeacinona feitaite. Cai comeciaina jia ocuiñotaite.

## 5

<sup>1</sup> Naga Jusiñamui diga ñairaima comini facaina ñaia jira, caina naimie jai feiñua jira, Jusiñamui diga jaciruiñeno jai ñaiticai. Moisés micorimo Jusiñamui jaie llua isoi, Aarón micorina Jusiñamui fetuanona, jeacino facaina comini Jusiñamuimo faga toiniaina fecaidimaci. Cominina Jusiñamui feiñollena, imaci ñairaima Jusiñamui diga ñaite. <sup>2</sup> Nana comini isoi naimiedi jeacino finuamona, comini facaina Jusiñamui diga ñairaima ñaiana raise uifote. Jusiñamui dibeimo raise jaiñedinona fecuise canorede. <sup>3</sup> Comini facaina toiniaina fecauide; iadedi naimiemo jeacino illa jira, naimie facaina toiniaina jia fecauide.

<sup>4</sup> Naimie jitailla jira, Jusiñamui diga ñairaimana buna jaiñede; iadedi naimiena Jusiñamui fetua jira, iena jaide. Jusiñamui Aarón micorina fetuana uifotica. <sup>5</sup> Cristo jitailla jira, cai facaina Jusiñamui diga ñairaimana naimie jaiñede; iadedi naimiena Jusiñamui fetua jira, cai facaina ñairaimana jaide. Ie Jitona naimie illamona, Jusiñamui naimiena fetode. David micori jaie cuegafuaimona iena uifotica. David micori Jusiñamui llua jaie cuega:

Cue Jitodio. Jai o Moodicue

cuega. <sup>6</sup> Ie Jitona jiaicaiño Jusiñamui ñaite:

Melquisedec micori isoi ona comini facaina cue diga ñairaimana jaca itataticue.

<sup>7</sup> Eniruemo Cristo ia, imana naimie jailla jira, duere sefuide. Naimie fiadaiacana iaie ia, Jusiñamuimo eo jide. Naimie fiadañena Jusiñamui jillotarede; iadedi Jusiñamuimo ado llote: “Cuenalegi cacaitaño; iadedi cue comeci jitailla isoi finoño. O comeci jitailla isoi fino” llote. Jusiñamui uaina naimie raise inua jira, Jusiñamui naimie jiaana cacajano fairiote. <sup>8</sup> Naimiedi Jusiñamui Jito; iadedi Jusiñamui naimiena llegi cacatate. Iemona Jusiñamuina inocana jaca jaillana naimie uifote. <sup>9</sup> Naimiena ie Moo oretajanona, ie jitailla rafuena naimie raise marena fuidua jira, Jusiñamui ecimo naimaci jaca illena, nana naimiena inotinona jillotaite. <sup>10</sup> Melquisedec micori isoi comini facaina ñairaimana jaca illena, Jusiñamuidi naimiena fetode. Melquisedec micori uai jaca saifena jira, naimie ifomo illena, jiaimiena jaca fetoñede. Ie isoi Jesús uai jaca saifede.

*Cristo dibeimona abido danomo jaiñeno*

<sup>11</sup> Bie isoide rafuena omoimo lloiacadicue. Bie rafue irirede; iadedi Cristo rafuena omoi raise cacaiñena jira, omoi comeciai iena raise jitañena jira, omoimo iena raise llonidicue. <sup>12</sup> Cristo rafuena are omoi cacaja jira, iedo omoi raise jaidomoidena, llofuerañina jaidomoi; iadedi iedo nia raise omoi jaiñena jira, jiaimie omoina llofuiana nia jitaidomoi. Cristo dibeimo omoina itatate rafuena nia jitaidomoi. Cristona nano omoi cacaja rafuena nia jitaidomoi. Cristo rafuena inocana nia raise jaiñedomoi. Eo janorede janosa monoi ijina jitaicabide. Einamaci isoi guillena nia jitañede. Janosa isoidomoi. Creyentena bu como jaia, Cristo rafuedo nia eo jaiñede. Iena eo uifote. Monoi ijina jitaide isoide. Janosa monoi iji jirua mei, jiaie guille guillamona moonaitie. Cristo rafuena are cacadomoi; iadedi janosa isoi nia itomoi. Nia moonaitiedomoi isoidomoi. <sup>13</sup> Janosa monoi ijina nia jitailla jira, naimie nia moonaiñenana uifotica. Naimie nia abina uifote. Jusiñamui jitailla isoi marecinona finuana nia uifote. <sup>14</sup> Guilledi moonaitimie ie. Ie isoide. Cristo rafuedo raise jaidimiedi Cristo rafuena uifocana jaide. Iemona marecinona finollena, llofuiana uifote. Marañedicinona finoñellena, llofuiana jia uifote.

## 6

<sup>1</sup> Diga icaño bie rafuena jai cacadomoi. Cristona nano cai cacaja rafuena raise cai ñnuamona, jiaie Cristo rafuena raise uñocana mai cai jailla. Cai nano cacaja rafuena cai fueoiacana siadocabiñelli. Cristo dibeimo caina itatañede rafuedo navui jaidicai; iadedi cai comeciai uai birui jai meidoticaí. Cristo dibeimo itatate rafuedo birui jaidicai. Jusiñamuina ñnuamona, naimie dibeimo jaidicai. <sup>2</sup> Cristo dibeimo bautizajana jai uñoticaí. Llofueraimana jaillena fetuana jai uñoticaí. Creyentiaína naimaci sedallena, naimacimo cai onolli jonianona, Jusiñamuimo cai jianona, naimaci fetuana jai uñoticaí. Nana creyentiaí fiodaillamona jilluana jai ñnoticaí. Jusiñamuidi naimiena ñnoñedinona ico jaca duere finollena jai ñnoticaí. <sup>3</sup> Naie isoide rafue mare; iadedi iena cai raise ñnuamona, Jusiñamui jitailla jira, naimie caina canuamona, jiaie Cristo rafuena fueocana mai cai jailla. <sup>4</sup> Uanaicinona omoi comeciai uñuamona, Cristona omoi ñnuamona, Jusiñamui Joreño omoi moimono illamona, <sup>5</sup> Jusiñamui uaina mare omoi uñuamona, Cristo uai siñonana omoi uñuamona, abido danomo omoi jaiñellena, abina rairuicana omoi jai. <sup>6</sup> Cristo dibeimona omoi mona bu sofetena, jiaimie naimiena jillotanide. Jeacinona finocana naimie jaia, Jusiñamui ie jeacino oni dotañeite. Cristona naimie jitaiñena jira, Cristo fiodaillana jai jitaiñede. Cristona jeare jai finode. Cristo finoca rafuena jamaide. Cristona naimie jitaiñena, ñniese naimie jillobite? Jillobiñeite. Ie jira abido danomo omoi jaiñellena, abi rairuicana omoi jai. <sup>7</sup> Ero, iena jiaie rafuedo lloiticue. Jusiñamui noci deitacabilla jira, enirue naimie riatacabilla jira, iemo riará sicuanona, iena ie nama raitia, naimona ie llisillana naimie uamona, Jusiñamui iobide; <sup>8</sup> iadedi naie eniruemona riará sicoñenia, maraiñede. Monaigi cuiraio diga naimona dama sicoia, maraiñede. Jusiñamui nainomo noci deitate; iadedi naimona llisillana onide. Naie enirue caimanide. Maraiñede. Ie nama iobiñena jira, iena fainonocai. Naie enirue isoidomoi. Jusiñamui mona mare rafuena cacadomoi. Iena ñnocana omoi jaia, naimie omoi ñnaitaite. Iena omoi jitaiñena, naimiemona duere sefuitomoi.

*Jusiñamui llua jira, cai comeciai ocuiñocana jaidicai*

<sup>9</sup> Cue isiruigaomoi, abi rairuillacinona omoi moimono lloticaí; iadedi cai llofuicino omoi moimono duiñenamo cai comeciaina facañedicaí. Cristona ñnocana omoi jaillamo cai comecina facadicaí. <sup>10</sup> Jusiñamui omoi ñnaita raise uñote. Naimiena omoi isiruillamona, jiaie creyentiaína omoi isiruillamona, naimacina navui canodomoi. Naimacina ñnaita canodomoi. Ie jira naimiemona duere sefuitomoi. <sup>11</sup> Omoi comeciaina jiaie creyentiaína omoi canua isoi, Cristo rafuedo nana omoi ille ñnaita ñnocana omoi iocire jaillana jitaídicaí. Naimie diga ico jaca omoi ille jira, iese omoi jaillana jitaídicaí. <sup>12</sup> Cristo rafuedo omoi jaillamona omoi sefuiruñenana jitaídicaí. Jusiñamui lloga uaina ñnocana jaidino isoi, omoi jaillana jitaídicaí. Naimiena naimaci ñnuamona, naimie lloga uai fecuise naimaci ocuirillanona, naimie lloga uaina oitimaci. Naimaci isoi omoi jaia, naimie lloga uaina jai oitomoi.

<sup>13</sup> Ero, Jusiñamuidi Abraham micorimo lloga uaina uñotomoi. Naimiedi Jusiñamuina jira, uanaicinona lote. Tainona lloñede. <sup>14</sup> Abraham micorimo lote: “Ona jaca canoiticue. O diga jaca iticue. Cue llua jira, o jito comuete. O uruina eo jebuitaticue” lote. <sup>15</sup> Abraham micori naimie lloga uaina ñnote. Iena suillemo fecuise ocuiride. Ie jito Isaac micori, Jusiñamui llua isoi, comuide. <sup>16</sup> Uanaicino cai llocabillana jiaie comini uñollena, Jusiñamui mamecina llñoticaí. “Jusiñamui caina cide” lloticaí. “Uanaicinona cai lloñenia, Jusiñamui caina duere finoite” lloticaí. Ie jira cai lloga uaina buna uaitañede. <sup>17</sup> Ie isoide. Jusiñamuidi ie finolle rafuena caimo jai lote. Naimie lloga uai meidonillana cai uñuana naimie jitaide. <sup>18</sup> Naimiedi Jusiñamuina jira, ie uai naimie jai llua jira, naimie tainona llonillana uñoticaí. Ie jira naimie lloga uai naimie finuana uñoticaí. Naimiena cai ñnuamona, naimie anamo cai illa jira, caina naimie eenua jira, cai comeciai ocuiñocana jaidicai. Naimie illanomo ico cai jaca illemo ocuiridicaí. <sup>19</sup> Naie rafuena Jusiñamui llua jira, cai comeciai ocuiñocana jaidicai. Ie lloga uaina naimie finollemo ñnoticaí. Monamo Jusiñamui illanomo ico cai illena eo raise uñoticaí. Nainomo fiebillena, barco ie lloelluna illemo dotaja isoi, cai comeciai naganomo ñnellena, Jesús caina eenote. <sup>20</sup> Jesús nainomo jai illa jira, naimie muidona nainomo jai iticaí. Cai facaina nainomo ie Moo diga ñaicabite. Cai facaina nanoca ñairaimana jaca ite. Melquisedec micori ñaia uai sañena isoi, Jesús cai facaina ñaia uai jaca sañeite.

## 7

*Melquisedec micori illa isoi, Jusiñamui diga ñairaimana Jesús jaidicai*

<sup>1</sup> Iena omoi raise ubiñollena, Melquisedec micori rafuena omoi moimono lloiticue. Naimie micoridi Salem railla nairai ie illaima. Naimiedi comini facaina cai Moo Jusiñamui diga ñairaima. Cinco illaimana Abraham micori anafetitaja mei, ie jofomo Abraham micori abido billano, naisomo naimie dine Melquisedec micori bite. Abraham micorimo



marecinona Melquisedec lloste: “Birui Jusiñamui ona canode. Naimie ona jaca canollena uiñoticue” lloste. <sup>2</sup> Jusiñamui diga ñairaimana Melquisedec illa jira, naimiemo Abraham micori dajerie rana fecade. Naie cinco illaimana anafefitajanona, naimaci rana bairuanona, nana naie ramona, riái uaimona ie décima facaina rana Melquisedecmo fecade. Melquisedec micoridi Salem railla nairái illaíma. Melquisedec mameci oni dobaifumona, “Cominina raise marena sedadimie” railla. Ie cominina raise sedajamona, ie comini uri illa jira, comini illano Salem railla mamecina jonega. <sup>3</sup> Naimie moona, naimie eina, naimie cominina uiñofedicaí. Naimie jeiciaruina uiñofedicaí. Naimie fiodaillaruina uiñofedicaí; iadedi Jusiñamui Jito isoi Jusiñamuimona naimie feiñoga uai saiñena jira, comini facaina Jusiñamui diga ñairaimana jaca jaide. Naimie ifomo jiaimie iñena jira, naimie ñairaimana nia ite isoide.

<sup>4</sup> Ero, cai cominimona Abraham micori cai jaigai baifemo faite; iadedi Melquisedec micori Abraham micori baifemo faite. Ie jira naimiemo ie décima facaina rana fecade. <sup>5</sup> Moisés micorimona Abraham micori uruiai Jusiñamui lloga uaina cacadimaci. Naimicimo Jusiñamui ie sedaja jofu finuana lloste. Nainomo maijidinomo nainomo maijiana lloste. Abraham micori uruiaimona Leví railla nairaina fetode. Nainomo maijidino comini facaina Jusiñamui diga ñaiuidimaci. Jusiñamui ocuica rafue naimaci maijia jira, naimaci comini ramona décima facaina rana feiñouidimaci. <sup>6</sup> Melquisedec micorimo Abraham micoridi ie rana fecade; iadedi Melquisedec micori Abraham micori cominiñede. Leví railla nairái imieñede. Naisomo Abraham micori dine Melquisedec micori billanona, Abraham micorimo marecinona lloste: “Jusiñamui ona jaca canoite. O diga jaca iite” lloste. <sup>7</sup> Melquisedec micori Abraham micori baifemo faia jira, naie marecinona naimicimo lloste. <sup>8</sup> Ero, Melquisedec micorimo Abraham micori rana fecade; iadedi Melquisedec micori fiodaillaruina uiñofedicaí. Naimie uai saiñena jira, jiaimie naimie ifomo jaca iñede. Comini facaina Jusiñamui diga ñairainimo naimaci ramona décima facaina cai judiúi cominidi fecauidimaci; ia naie ñairaini fiodaicana jaillana uiñoticaí. Naimaci uai sailla jira, jiaíno naimaci ifomo meidouidimaci. <sup>9-10</sup> Leví micoridi Abraham jito. Leví micorimona Leví railla nairái comuide. Naimacidi Jusiñamui diga ñairainina jaidimaci. Cominimona décima facaina rana feiñouidimaci. Leví micori nia comuiñenia, Melquisedec micorimo Abraham micori décima facaina rana fecajamona, Abraham micori Leví ie usumana jira, Melquisedec micoridi Leví nairái baifemo faiana uiñoticaí. Melquisedec micoridi Jusiñamui diga ñairaini baifemo faiana uiñoticaí. Melquisedec isoi Cristo illa jira, Cristodi Leví baifemo faiana uiñoticaí. Cristodi nana naie ñairaini baifemo faiana jiaí uiñoticaí.

<sup>11</sup> Jusiñamui diga ñairaini finouilla rafuedo Jusiñamui jitailla isoi marebicaiñedicaí. Naimaci finouilla rafuedo cai jillobidicaidena, jiaie rafuena jitaíñedicaí. Naie rafuedo cai jillobiñena jira, Jusiñamuidi Cristona orede. Cai facaina Cristo ñairaimana jaillena, naimiena orede. Caina jillobitallena, naimiena orede, jiaie rafuedo cai jillobiñena jira. Jusiñamui Moisés micorimo jaie lua isoi, comini facaina nano ñairaimadi Aarón micori. Naimiedi Leví railla nairái imie. Naimie jitoniamona comini facaina ñairainina itimaci. Iena uiñotomoi. Aarón jitoniamona Cristo iñede. Aarón maijia rafuemo Cristo duíñede; iadedi Melquisedec rafuemo duide. <sup>12</sup> Comini facaina ñairainina jaillana jai meidua jira, Jusiñamuidi naimaci rafuena jiaí meidote. <sup>13</sup> Iena lloiticue. Aaróndi Leví railla nairaimo duide. Dani Leví nairaidi comini facaina ñairainidimaci. Dani naimacidi comini facaina Jusiñamuimo rana fecauidimaci. Cristo naie nairaimo duíñede. <sup>14</sup> Cristo jiaie nairaimo duide. Judá nairaimo duide. Judá nairaimona Jusiñamui Jito comuillana uiñoticaí. Naie nairaimona comini facaina ñairaimana bu jaillana Moisés micori jaie jaca lloñede.

<sup>15</sup> Cristo billa jira, Moisés micori lloga rafue meiduana uiñoticaí. Melquisedec micori illa isoi, comini facaina ñairaimana Cristo jaca iite. <sup>16</sup> Moisés micori lloga rafue isoi, Cristodi ñairaimana jaiñede; iadedi Jusiñamui uaido ñairaimana naimie jaide. <sup>17</sup> Jusiñamui lloga uaimona iena uiñoticaí. David micori naimiena jaie cuega:

Melquisedec micori illa isoi, odi comini facaina ñairaimana jaca iitio

cuega. <sup>18</sup> Comini facaina ñairaimana jaillena Moisés micori jaie cuega. Naiemona jilluana comini oñena jira, naie uai jai saide. Naiedo jaillamona, naimaci jeacinomona jilloñedimaci. Naiedo jaillamona, naimaci comeciaina ocuiñotañedimaci. Naiedo jaillamona, naimaci Jusiñamuina nabaiñedimaci. <sup>19</sup> Naiedo jaillamona, Jusiñamui jitailla isoi marebicaiñedicaí. Iedo birui jaiñedicaí. Jiaie rafuemo birui ocuiridicaí. Cristo finoca rafue muidona, Jusiñamuina cai nabaillamona, Jusiñamui diga birui ñairedicaí.

<sup>20</sup> Jusiñamui llua jira, Cristo cai facaina ñairaimana jaide. <sup>21</sup> Leví micori jitonaiidimaci jeiciamona, comini facaina ñairainina jaidimaci. Naga icaíño Jusiñamuidi naimacina ñairainina jaillana fetofede; iadedi ie lloga uaina jira, Cristo cai facaina ñairaimana jaide. David micori Jusiñamui llua jaie cuega:

Cue jai llua jira, cue lluaana finoiticue.

Cristomo lloticue: “Comini facaina ñairaimana jaca iitio”

cuega. <sup>22</sup> Jesús ñairaimana jaca illa jira, naimie jailla rafue Moisés micori lloga rafue baifemo uaide. <sup>23</sup> Moisés micori lloga rafue anamo ailluena ñairainidi itimaci. Naimaci fiodaicana jailla jira, ailluena ñairaini jitaide, fiodaitino ifomo meidollena. <sup>24</sup> Naimie jaca illa jira, Cristo ñairaimana jaca iite. Naimie ifomo jaca buna meidoñeite. <sup>25</sup> Naimie jaca illa jira, comini facaina Jusiñamui diga jaca ñaicabite. Ie jira Cristodi nana Jusiñamui dibeimo iacadinona, naimaci jeacinomona, ua jaca jillotarede. <sup>26</sup> Caina canollena, naimie isoide nanoca ñairaimana jitaideicai. Ie Moo isoi naimiedi mareuidimie. Naimiemo jeacino jaca iñede. Jeacino finouidino dibeimo naimie iñede. Jusiñamuidi ie ecimo naimiena itatate. Ie jira naimie caina canorede. <sup>27</sup> Jusiñamuimo fecallena, naimaci jeacino facaina naimie iba oñellena, Moisés micori llua isoi, nanoca ñairainidi nagarui toiniaina fatimaci. Dani naimaci jeacino facaina nagarui iese finodimaci. Iemei comini facaina nagarui iese jiai finodimaci. Cristo naimaci isoñede. Naimie jitailla jira, comini jeacino facaina naimie fiodailla jira, comini facaina dacaño fiodaite. Naimaci jeacino facaina naimie dane fiodañeite. <sup>28</sup> Moisés micori facai ñairainidi jeacinona finocana jaidimaci. Fiodaicana jiai jaidimaci; iadedi jiaie rafue birui illa jira, ie uaido Jusiñamuidi ie Jitona ñairaimana jaillana jai fetode. Naimiedi jaca mareuidimie. Jeacino jaca finoñede.

## 8

*Cristo muidona jiaie rafue birui ite*

<sup>1</sup> Cristomo ite rafuena lloticue. Cai facaina ñairaimana birui naimie ite. Illaimana naimie illa jira, monamo Jusiñamui ecimo ite. <sup>2</sup> Jusiñamui illanomo naimie illanona, nainomo cai facaina birui ñaicabite. Moisés micori facaise comini finoca jofomo Jusiñamui diga ñaiuidimaci; ia birui Jusiñamui finoca illanomo Cristo illanoma, cai facaina ñaicabite. <sup>3</sup> Moisés micori naga ñairaima jeacino facaina Jusiñamuimo faga toiniaina fecauillena llote. Cristodi comini jeacino facaina toiniaina fecañede; iadedi naimie jitailla jira, cai jeacino facaina naimie dama fiodaite. <sup>4</sup> Moisés micori jaie llua isoi, benomo ite ñairaini faga toiniaina fecauilla jira, eniruemo Cristo nia ia, ñairaimana naimie jainide. <sup>5</sup> Comini facaina Jusiñamui diga ñaillena, Moisés micori facaise naie ñairaini Jusiñamui jofomo jaisoidimaci. Iemona Cristo monamo finocabilla rafuena uiñotica. Monamo cai facaina Jusiñamui diga Cristo birui ñaicabite. Iemo naimie comecina facajanona, Jusiñamui jofona Moisés micori jaie niacania, Jusiñamui naimiena llofueite: “Monamo iticue; ia cue jofo eniruemo jiai finoitomo. Sinaí railla anedu navui o ia, ona llofueticue. Ona cue llofua isoi, cue jofona fino” llofueite. <sup>6</sup> Eniruemo Cristo birui iñenamona, monamo cai facaina Jusiñamui diga birui ñaicabite. Cristomona cai cacaja rafuedi Moisés micori facaise ñairainimona cai cacaja rafue baifemo faia jira, Cristodi Moisés micori facaise ñairaini baifemo faite. Cristomona cai cacaja rafuedi cai comechia marena itatate. Ie jira, bie rafue jiaie rafue baifemo faite. <sup>7</sup> Moisés micori facaina rafuedo jaillamona, Jusiñamui jitailla isoi buna marebicaiñede. Ie jira Jusiñamui jiaie rafue illena llote.

<sup>8</sup> Moisés micori lloga uaina cai jaiagai ñnoñena jira, Jusiñamui jai llote: Naie cominimo jiaie rafuena ico jaiiruido lloticue.

<sup>9</sup> Naimaci jaiagaimo cue lloga rafuena jaie lloticue.

Naie facaiseconi Egiptomona naimacina canuanona, naimacina atidicue; iadedi Moisés micorimo cue lloga rafuedo jaiñedimaci.

Ie jira naimacina fañonocaidicue.

<sup>10</sup> Naimacimo jiaie rafuena ico jaiiruido lloticue.

Iena naimaci uiñuamona, cuena raise ñnoitimaci.

Naimaci Jusiñamuidicuenta jira, naimaci cuena sedaitimaci.

Cue anamo raise naimaci illa jira, cue comininitimaci.

<sup>11</sup> Nana naimaci cuena uiñoitimaci.

Ie jira naimacimo: “Cai Namana omoi ñno” buna ñiese lloñeite.

Jamai bue isoidinomona cuena ñnoitimaci.

Jamai bue isoñedinomona cuena jiai ñnoitimaci.

<sup>12</sup> Naimacina cue duenaillamona, naimaci jeacinona jaca feitaiticue

llote. <sup>13</sup> Jiaie rafuena Jusiñamui jai llumona, Moisés micorimo lloga rafue jai saillana uiñotica. Moisés micori lloga rafue caimo jai duiñede. Cristomona jiaie rafuena birui jai cacadica.

## 9

*Hebreos comini Jusiñamui jofona eniruemo jaie nitimaci. Monamo Cristo birui illanona, Jusiñamui ecimo naimie ite*

<sup>1</sup> Jusiñamuidi Moisés micorimo diga rafuena jaie llote. Naie rafuemona cai fueollena, iena lloiticue. Naimiena sedajana llote. Naimie sedalle jofo finuana jiai llote. <sup>2</sup> Jusiñamui llua isoi, hebreos comini naie jofona nitimaci. Jedaciede iniroimona finoca jofona nitimaci. Naie jofo jeraimo mena cuartos ite. Nano fo jailla cuartomo Jusiñamuina nagarui sedadimaci. Nainomo lamparin isoide ra ite. Siete diga naie boadi ite. Mesa jiai ite. Nainomo doce lloimenico joide. <sup>3</sup> Mena cuartos illena iniroina sebiñoga. Naie baifemo iticuartodi Jusiñamui illano. <sup>4</sup> Naie iniroi facai oromona finoca mesa ite. Nainomo caimare soride rana jobaisoidimaci. Baifemo iticuartomo cajón ite. Ie emodo oro iena jonega. Cajón jeraimo oromona finoca nogo ite. Nainomo ite maná railla fariñana eruaide guille. Aarón micori jiguída nainomo jiai ite. Jusiñamui uaido naie jiguída daciaño llisilla jira, nainomo ite. Jusiñamui cuega nofici ibici jiai ite. <sup>5</sup> Cajón emodo ibaillabicidi ite. Ie emodomo nagafebei dine oromona finoca mena Jusiñamui jaienici joreño ite. Conimamo fo eruaide. Naie motomo Jusiñamui quenirena baireuide. Naie rafuena raise omoi jai uñua jira, iena omoimo are lloñeiticue.

<sup>6</sup> Naie isoide rana finodimaci. Iemei Jusiñamui diga ñairainimona damierie nano fo jailla cuartomo nagarui jaidimaci. Moisés micori llua isoi, nainomo ite rafuena finollena, iedo jaidimaci. <sup>7</sup> Baifemo iticuartomo jaca jainidimaci. Nanoca ñairaima naga año nainomo darui dama jaide. Jurareta faja mei, fo jaillanona, diruena naie cajón ibaillabicimo llerede. Dama naimie jeacino facaina diruena nano llerede. Chivo fajanona, dane fo jaide, ie comini jeacino facaina diruena llerellena. Iena finuamona, cominina duenaillamona, Jusiñamui naimaci jeacino facaina ibana oñede. <sup>8</sup> Jusiñamui Joreño caina llofuiamona, biena birui uñoticaí. Naie jofo nia ia, jamai comini fo jainina jira, Jusiñamui diga, cominidi atona nabairinidimaci. <sup>9</sup> Bie rafuena birui nia finodimaci. Moisés micori lloga uaido bu jaia, ie jeacino facaina faga toñiaina Jusiñamuimo fecallena jobaide. Iena finocabidimaci; iadedi Jusiñamui jitailla isoi, naiemona naimaci comeciaina raise finonidimaci. <sup>10</sup> Jusiñamuina naimaci raise sedallena, Moisés micoridi diga guille fimaide. Jiruaña jiai fimaide. Naimaci abiaña finollena jiai llote. Nie isoide guille, nie isoide jirolle, niese naimaci abiañ finollena, nana naie isoide rafuedo jaidimaci. Cristo nia biñena facaiseconi iese jaidimaci, naimaci comeciaina raise finobitallena; iadedi Cristo billamona, jiaie rafue birui ite.

<sup>11</sup> Moisés micori finoca jofomo Jusiñamui dine Cristo jaiñede; iadedi Jusiñamui abimo monamo Cristo jai jaide. Nainomo cai facaina Cristodi ñairaimana jai jaide. Ie jira Jusiñamuina jai nabaidicai. Cai comeciñ raise jai finobide. <sup>12</sup> Naimie fiodailla mei, dane jilluanona, Jusiñamui dine monamo naimie abide jaide. Toñiañ diruena Moisés facaise ñairaini fecaja isoi, cai jeacino facaina Jusiñamuimo Cristo naga año fecañede; iadedi daciaño naimie fiodaillamona, naimie diruedo cai jeacino facaina caina jillotate. <sup>13</sup> Maraiñede rafuena finoa, Moisés micori llogacino anamo itino Jusiñamuina sedallena, naimie jofomo jainidimaci. Moisés micori jaie llua isoi, toñiañ diailla mei, jobaide toñiañ ie jusefo oni faianona, Jusiñamui jofomo jairedimaci. Nainomo naimiena sedallena, fo jairedimaci. Iemona Jusiñamui naimacina duere finoñede. <sup>14</sup> Toñiaina fañeno Jusiñamuina birui sedadicaí. Cristo fiodaicana jira, naimie diaillamona, cai jeacino facaina Jusiñamui caina duere finoñeite. Cristo comeci jitailla jira, Jusiñamui Joreño naimiena oretaja jira, naimie fiodaite. Cristodi Jusiñamui Jitona jira, naimiemo jeacino iñena jira, cai jeacino facaina naimie fiodaillamona, cai comeciaina raise finobitate. <sup>15</sup> Cristo jai finoca rafue muidona, Cristo monamo jailla jira, jiaie rafue birui ite. Bie rafuedi comini Jusiñamui diga jaca illena llote. Nana Jusiñamuina ñnotino ie. Moisés micori lloga uai anamo itinodi jeacinona finocana jaidimaci. Naimaci jeacino facaina faga toñiaina Jusiñamuimo jaie fecauidimaci; iadedi Cristo jai fiodailla jira, naimiena bu ñnoia, naimie jeacino facaina Jusiñamui birui ibana oñeite. Nana Jusiñamuina ñnotinodi naimie jai llua isoi, naimie diga jaca iitimaci.

<sup>16-18</sup> Jusiñamui jofo jaie finua mei, Moisés micorimo Jusiñamui llote: “Cue lloga rafuena raise finodomo. Bie jofomo cuena sedallena, faga toñiañ dirue diga bie jofona llereca. Nana naiemo ite rana jiai llereca. Iena o finuamona iobiticue. Cue lloga uai finocana mai o jai” llote. Iese naie rafue jaie tainede. Cristo fiodailla jira, Jusiñamuimona birui jiaie rafue caimo ite. Cristo diailla jira, Cristo fiodaillamona, bie rafue jai tainede. Bie rafuedo cai jaillamona, cai jeacinomona jai jillobidicai. <sup>19</sup> Ie cominimo nana naimiemo Jusiñamui lloga rafuena Moisés micori llua mei, faga jurareta dirue diga, faga chivo dirue diga, nana naie lloga rafue cuegabiana llerede. Cominina jiai llerede. Naie dirue jinui diga nano faite. Febecode ra jiairede iniroi diga maiga. Iemei naie ra diga naie diruena llerede. <sup>20-21</sup> Jusiñamui jofona dirue diga llerede. Nana nainomo ite rana jiai llerede. Llote: “Jusiñamui llua isoi, biena finodicue. Naimie llua jira, bie dirue illa jira, naimie caina duere finoñeite”. <sup>22</sup> Moisés micorimo Jusiñamui llua isoi, raise finobillena, nana rana dirue diga

llerede. Toñiaí fajamona, dirue illa jira, Jusiñamuidi jeacino facaina ibana oñede; iadedi jeacino facaina iba oñellena, jiaie rafuena Moisés micorimo lloñede.

*Cristo fiodailla jira, Jusiñamui cai jeacinona oni dotade*

<sup>23</sup> Jusiñamuidi Moisés micorimo toñiaina fajana jaie llote. Naie lluaña finuamona, Jusiñamui iba oñede. Birui cai jeacino oni dotallena, Jusiñamuidi Cristo fiodaillana jitaide. Cristo fiodaillafue faga toñiaí baifemo faia jira, monamo cai jaca illena, jeacinona oni dotallena, Cristo fiodaite. <sup>24</sup> Naimie fiodaillamona, cai facaina ñairaimana Cristo jaide. Cai facaina Jusiñamui diga ñaillena, enirue ite Jusiñamui jofomo jaiñede; iadedi monamo Jusiñamui abimo naimie jaillanona, Jusiñamui diga cai facaina ñaicabite. <sup>25</sup> Dacaiño cai facaina monamo Jusiñamui dine naimie jaide. Moisés micori facaise nanoca ñairaima Cristo isoñede. Naimie naga año Jusiñamui jofomo fo iticuartomo darui jaide. Naimie dirue uiñede; iadedi toñiaina fajanona, ie diruena uite. <sup>26</sup> Cristo iese itena, nano facaisemona diga icaiño comini jeacino facaina naimie fiodaite. Iese iñena jira, eniruemo birui dacaiño naimie billanona, naimie jitailla jira, naimie dacaiño fiodaite. Jeacino anamo cai iñellena fiodaite. <sup>27</sup> Nana dacaiño fiodaiticai. Iena uiñoticaí. Fiodailla mei, Jusiñamui uicomo iiticaí. Naimiena cai iñoia, caina feñoite. Naimiena iñoñedinona duere finoite. <sup>28</sup> Dacaiño Cristo jai fiodaillana uiñoticaí. Comini jeacino facaina dacaiño jai fiodaite. Naimie dane bia, fiodaillena biñeite; iadedi dane bia, naimiedi ie billemo iocire ocuiritinona monamo Jusiñamui illanomo uite.

## 10

<sup>1</sup> Moisés micori facaise naie ñairainidi Jusiñamuimo fecallena, toñiaina fajanona uisoidimaci; iadedi Jusiñamui jitailla isoi, naiemona marebicaiñedimaci; iadedi Moisés micori lloga uaimona jeacino cai finuana uiñoticaí. Jusiñamui cai jeacino oni dotajana uiñoticaí. Jusiñamui jaca mareuidimiena uiñoticaí. Jusiñamuina nabaillena janore uiñoticaí. Cristo jiaie rafue caimo jai iga. Naimie fiodailla jira, cai jeacino jai feide. Jusiñamuina raise nabairedicaí. <sup>2</sup> Naie faga toñiaí Jusiñamuimo fecajamona comini marebicaidena, naiena fecarainidimaci. Naimaci jeacino dacaiño dotaiadedi, faga toñiaina dane fecañedimaci; iadedi naimacimo jeacino jaca illa jira, faga toñiaina fecauidimaci. <sup>3</sup> Naiena fecauillamona, jeacinona finocana naimaci nia jaillana uiñotimaci. <sup>4</sup> Toñiaí dirue illa jira, Jusiñamuidi comini jeacinona jaca feitañede. Dama Jesús dirue illamona, Jusiñamuidi comini jeacinona feitate. <sup>5</sup> Eniruemo jiaie billanona, Jusiñamuimo iena Cristo llote:

Jeacino facaina toñiaí fajana jai jitañedio.

Ie jira eniruemo comena jaillena, comini jeacino facaina cue fiodaillena, cuena oredio.

<sup>6</sup> Jeacino facaina ailluena faga toñiaina jai jitañedio.

<sup>7</sup> Iena cue uiñuamona, eniruemo cue billanona, o jitailla rafuena finoiticaie.

O facaina lloraini micoriai iena jaie cuetimaci

llote. <sup>8</sup> Cristo lluaña dane ñaiticaie. Cristodi Jusiñamui Moisés micorimo llogacinona ñaite. Jusiñamui jaie llua isoi, naimiemo cominidi jeacino facaina faga toñiaina jaie fecauidimaci. Iena Jusiñamui birui jai jitañede. <sup>9</sup> Cristodi: "Jusiñamui jitailla rafuena finuaititicaie" lluañona, Moisés micorimo llogacino jai saillana uiñoticaí. Jiaie rafue birui illana jai uiñoticaí. <sup>10</sup> Jusiñamui jitailla jira, Jesucristona orede. Cai facaina naimie fiodaillena naimiena orede Jesucristo ie Moo jitaillacinona finuamona, cai jeacinomona jai jaca jillobidicaí. Jai marebicaidicaí.

<sup>11</sup> Nana Moisés micori llogacino jaide ñairainidi nagarui comini jeacino facaina faga toñiaina Jusiñamuimo fecauidimaci; iadedi naie rafue naimaci finuamona, Jusiñamui naimaci jeacinona feitañede; <sup>12</sup> iadedi dacaiño Cristo fiodaillamona, Jusiñamuidi nana cai jeacinona feitate. Bene naimie finoacaga rafue fuilla jira, illaímana jira, Jesús Jusiñamui ecimo abido jaide. <sup>13</sup> Nana naimie dibeimo iñedinona naimie emodofillemo naimie birui ocuiride. <sup>14</sup> Dacaiño Cristo fiodaillamona, naimiena cai iñuamona, Jusiñamuimona jaca marebicaidicaí. <sup>15</sup> Jusiñamui facaina lloraima micori cuegafuemona Jusiñamui Joreño caina iena uiñotade. Naimie facaina lloraima micori Jusiñamui lluaña jaie iese cuega:

<sup>16</sup> Hebreos cominimo jiaie rafue ico jairuido lloiticaie.

Cue rafuena naimaci uiñuamona, cuena raise iñoitimaci.

<sup>17</sup> Jai cuega:

Naimaci jeacino jaca feitaiticaie.

<sup>18</sup> Cristo jai fiodailla jira, jeacinona Jusiñamui jai faitaja jira, faga toñiaina naimiemo fecajana dane jai jitañede.

*Jusiñamuina cai nabaiilla*

<sup>19</sup> Cue amatiaí, Jesús fiodailla jira, Jusiñamuina jaciruiñeno birui nabairedicaí. Naimie cai Moo jai illanona, naimie diga meiruiñeno jaciruiñeno birui jai ñairedicaí. <sup>20</sup> Moisés micori

facaise nanoca ñairaima fo iticuartomo jaillena, sebiñoga ñiroi oni ðibeimo jaidimaci. Iese Jusifamui illanomo ridimaci. Jamai comini nainomo jainidimaci; iadedi Cristo jai fodailla jira, Jusifamuina atona birui nana nabairedicai. Naimie diga birui atona nana ñairedicai. <sup>21</sup> Cristona jai cai ñnua jira, cai facaina nanoca ñairaimana naimie illa jira, <sup>22</sup> cai mare comeciãmona Jusifamui diga birui cai ñailli. Naimiena eo cai ñnuamona, cai comeciã jeanillamona, naimie ðibeimo cai bautizajamona, naimiena mai cai nabaili. <sup>23</sup> Cristo caina jilluana ñnoticai Monamo naimie diga cai illemo ocuridicai. Jusifamui ñnogamiãna jira, naie rafuena ñnocana mai cai jailli. <sup>24</sup> Jiaie creyentiammo cai comeciãna cai facaja. Conini cai isiruitacana cai jailli. Coninimo cai mare rafue finocana cai jailli. <sup>25</sup> Rollena omoimona damierie ofcabiñedimaci. Naimaci isoi omoi ñeno; iadedi Jusifamuina sedallena ofcabi. Abido omoi danomo jaiñellena, conini comeciãna ocuiñotallena, ofcabi. Jesucristo abido billirui iaiei illa jira, naimiena raise ñnollena, conini omoi comeciã ocuiñocana mai omoi jai.

<sup>26</sup> Cristo finoca rafuena bu uifua mei, iena naimie ñnoñenia, jeacinona naimie finocana jailla jira, Jusifamui naimie jeacinona feitañeite. Cristo fodaillana bu jamaia, Jusifamui ie jeacinona feitañeite; <sup>27</sup> iadedi Jusifamuidei naimiena duere finoite. Eo jacirede rafue anamo iite. Iramo Jusifamui nana naimie ðibeimo ñnedinona duere finoite. <sup>28</sup> Moisés micori jaiie cuega: “Jusifamui llote: ‘Menaimie naimiena daje isoi lloillamona, Moisés micori llogacinona jamaidimiena dueruiñeno meinega’”. <sup>29</sup> Iese duere sefuillana jaiie llote; iadedi birui ite lloga rafue bu jitaifenia, bai duere sefuite. Jusifamui Jitona bu jitaifenia, Jusifamui birui lloga uaina bu jitaifenia, Cristo fodaillana bu jamaia, Jusifamui Joreña jeare bu ñaia, Jusifamuimona naimie eo duere sefuite. Cristo fodaillamona, Jusifamui naimiena ñnotimiena marebicaitarede. Jusifamui Joreño naimiena duenaite; iadedi iena naimie jai jamaitaia, iena naimie jai jitaifenia, Jusifamui naimiena bai duere finoite. <sup>30</sup> Ero, Jusifamui jaiie llote: “Maraiñediciona bu finoia, ñbana oiticue. Cuenã ñnoñedinona duere finoiticue” llote. <sup>31</sup> Jusifamui duere finollicino anamo bu ia, eo jacirede rafue anamo jai ite. Naie duere finollicino anamo omoi ñnellena, Jusifamui lloga rafuena jamaiñeno.

<sup>32</sup> Creyentiana nano omoi jaillamo dane comeciãna faca. Creyentiañedinomona eo duere sefuidomoi; iadedi Cristona ñnocana jaidomoi. <sup>33</sup> Omoimona damierie marefomo navui duere sefuidomoi. Omoiri jaisitimaci. Omoina jifanododimaci. Omoina jeare finodimaci. Damieriena meinetimaci. <sup>34</sup> Cárcelmo jonetinona duenaillamona, naimacina canocabidomoi. Cristomo omoi duilla jira, creyentiañedino omoi rana bairodimaci; iadedi omoi comeciã nia icire itomoi. Omoi ramo omoi comeciãna eo facañedomoi; iadedi Cristomo jai omoi duilla jira, naimie omoi comeciãna jaca marebicaitaja jira, iemo omoi comeciãna facajamona, icire itomoi. <sup>35</sup> Jusifamuimona ñba ico omoi feifua jira, Cristona nia ñnocana omoi jai. <sup>36</sup> Jusifamui jitaillacino omoi finollena, monamo jaca omoi illena, ñie isoide ramo omoi jiria, Jusifamuina nia ñnocana omoi jai. <sup>37</sup> Jusifamui biena llua jira, iese suite:

Cristo abido billirui iaiei illa jira, naimiena ñnocana omoi jai.

<sup>38</sup> Naimie nia abido biñenia, omoina cue jai marebicaitaja jira, cuena ñnocana mai omoi jailli;

iadedi cuena jitaifedinori iobiñedicue.

<sup>39</sup> Naie isoidino jillobiñeitimaci. Naimaci isoi ñnedicai. Jusifamuina ñnocana cai jaillamona, jaca jillobidicai. Ie jira naimiena ñnocana mai cai jailli.

## 11

### *Jusifamuina ñnocana jaidicai*

<sup>1</sup> Jusifamuina cioñnedicai; iadedi naimie illana ñnoticai. Naimie lloga uaina ñnocana jaidicai. Naimie lloga uai sullena ñnoticai. Ie lloga uai sulllemo ocuridicai. <sup>2</sup> Cai jaiagaimona damierie iese ñnocana jailla jira, Jusifamuimona marebicaidimaci. <sup>3</sup> Jusifamui finoca rana birui ciodicai; iadedi jaiie nano dofoconi jaca buena ñnede. Naie facaiseconi dama ie uaido Jusifamuidei eniruena finode. Mona finode. Nana rana finode. Nana rana comuitate. Iena ñnoticai.

<sup>4</sup> Cai jaiagai rafuena ja lloiticue, naiemona cai fueollena. Abel micori Jusifamuina jaiie ñnuamona, naimiemo faga toica llaudana fecade. Ie feifuaomona, Jusifamui naimieri iobide. Jusifamuina ie ama Caín raise ñnoñena jira, naimie fecaca rari iobiñede. Iena feiñede. Abel micori Jusifamuina ñnua jira, Jusifamuimona naimie marebicade. Abel micori jaiie fodaite; iadedi Jusifamuina cai raise ñnollena, naimiemona nia fueoiticai.

<sup>5</sup> Enoc Jusifamuina jaiie ñnote. Naimiedi Jusifamuina eo iobitate. Moisés micori cuegafuaimona iena uifnoticai. Jusifamuina ñnuamona, Jusifamuina eo iobitaja jira, naimie fodaifede; iadedi fodaifeno monamo Jusifamui naimiena namiãna uite. <sup>6</sup> Jusifamuina

caí #noñenia, naimiēna iobitañedicaí. Jusiñamuina caí nabaiaçania, naimiēna caí raise sedaacania, naimie illana #noticaí. Naimiēna caí nabaiaçania, caí jitai raillano, çaina canollena #noiticaí.

<sup>7</sup> Noé micorí Jusiñamuina jaie jiaí #note. Jusiñamui ico suille rafuena naimiēmo llotē. Enirue buillena llotē. Iēna #nuanona, Noé micorí aillue balsa emodomo jofona finode. Enirue buillamona iē cominí diga jilloiacana jira, Jusiñamui llua isoi, balsana finode. Jusiñamui llua Noé micorí #nua jira, jillode. Noé micorí Jusiñamui llua #note; iadedí naimie facaise ite cominí #noñēna jira, Jusiñamui ricaiçallafue anamo itimaci. Jusiñamuina naimie #nua jira, Jusiñamui uruena naimie jailla jira, Jusiñamuimona Noé micorí marebicaide.

<sup>8</sup> Abraham micorí Jusiñamuina jaie jiaí #note. Iē moo eniruēmona naimie jaianillena Jusiñamui naimiēmo llotē. Are ite eniruēmo naimie jaianillena llotē. “Jiaie enirue omo iitiecue” Jusiñamui llotē. Abraham micorí #note; iadedí iē jaillinona uiñofēde. <sup>9</sup> Jusiñamui lloga eniruēmo Jusiñamuina #nocana jaide. Naie eniruēmo ride; iadedí naie enirue naimiēmo nia raise duiñēde. Chivo itiraçmona niga iniroimona sebiñoga jofomo naimie jaca ite. Iē jito, Isaac micorí, naie isoide jofomo jiaí ite. Isaac micorí jito, Jacob micorí, naie isoide jofomo jiaí ite. Jusiñamuidí nana naimacimo daje isoide rafuena llotē: “Bie enirue omoimo iitiecue” llotē. <sup>10</sup> Abraham micorí mare jofona finofēde, naie eniruēmo naimie jaca iacaiñēna jira; iadedí Jusiñamui diga monamo jaca illemo naimie ocuride. Monamo Jusiñamui mare finolle illanomo ocuride.

<sup>11</sup> Abraham micorí aidi Sara micorí. Jusiñamuina Sara micorí #nua jira, Jusiñamui naiñaiño abina mañitate. Naiñaiño eo jionaide; iadedí uruesite. Naiñaiñomo Jusiñamui llua isoi, naiñaiño uruesillana #note. <sup>12</sup> Abraham micorí jiaí eo jionaide; iadedí jítōna comutate. Naimie jítōmona naimie nairai eo jebuide. Facadonide ucuaí isoi jebuidimaci. Facadonide conillie isoi jebuidimaci. Ailluena ucuaí illa jira, naimaci facadonidicaí. Ailluena conillie illa jira, iēna facadonidicaí. Iē isoide. Eo ailluena Abraham micorí uruaí illa jira, naimacina facadonidicaí.

<sup>13</sup> Abraham micorí, Isaac micorí, Jacob micorí Jusiñamuina #nocana jaidimaci. Nana naimacimo Jusiñamui lloga uaina suiñēdemo fiōdaitimaci. Nia fiōdaiñēna, Jusiñamui llogacinona cacadimaci. Iēna #notimaci. Iē jira bie eniruēmo naimaci jaca illemo comēna facañēdimaci; <sup>14</sup> iadedí monamo jaca illemo comēciaina facadimaci. <sup>15</sup> Naimaci jaie billa eniruēmo comēciaina naimaci facadena, nainomo abido jaidimaci; <sup>16</sup> iadedí jaie illanomo comēciaina facadimaci. Jusiñamuina nabaillemo, monamo Jusiñamui diga jaca illemo comēciaina facadimaci. Naimiēna naimaci #nua jira: “Jusiñamuidí caí Moo” naimaci raia, Jusiñamui naimaciri meidaiñēde. Iē jira monamo Jusiñamui naimaci illinona jai finode.

<sup>17-18</sup> Jusiñamuina Abraham micorí #nua jira, iē jítōna comutate. Jusiñamui Abraham micorimo llotē: “O jito Isaacmona o nairai eo jebuite” llotē. Iēmei Jusiñamui Abraham micorina facacite. Abraham micorí naimiēna #nuana raise uiñollena, facacite. “O jítōna fano” Abraham micorimo llotē. Abraham micorí Jusiñamuina #nuanona, iē jito façacade. <sup>19</sup> Iē jito fiōdaillemona, Abraham micoridí Jusiñamui naimiēna jilloitallena #note. Isaac micorí fiōdaiñēde; iadedí fajamona jillode.

<sup>20</sup> Isaac micorí Jusiñamuina jiaí #note. Naimie fiōdaiçania, Jusiñamui iē llogacino finollena #nuamonā, mena iē urue iaímaiamo iē uaina fecade. Llotē: “Jusiñamui llua isoi, jebucana jaitomico”. <sup>21</sup> Jacob micorí Jusiñamuina jiaí #note. Naimie fiōdaiçania, Jusiñamuimo #ñanona, iē jiguidamo juita naidaidemo, José micorí iē mena urue iaímaiaimo marecinona llotē. Jusiñamui iē llogacino finollena #nuanona, llotē: “Jusiñamui llua isoi, jebucana jaitomico. Naimie omicōna canoite” llotē. <sup>22</sup> José micorí fiōdaiçania, iē cominimo llotē: “Jusiñamui omoína canuano, Egiptomona ico jairuido omoí jaillena #notiecue. Omoí jaia, cue illaiciaina omoí diga uiño. Canaán railla eniruēmo omoí ria, nainomo cue illaiciaina raíno”.

<sup>23</sup> Moisés micorí moo, iē ei diga Jusiñamuina jiaí #notiaímaiaí. Hebreos cominí jebuiñellena, naie facaiseconí Egipto illaíma nana hebreos isaiaína meiniana llotē. Iaímaiaí jito jēiciaí mei, iaímaiaí uruena daje amani fivui reidíiaímaiaí. Jusiñamuina #nuanona, naimie maresana eruaila jira, jaciruiñēno naimiēna jofomo fo reide. Illaíma llumomona Jusiñamui naimiēna jillotajana #notiaímaiaí. Iē jira Faraón jisa anamo comuide. Faraónidí Egipto nairai illaíma. <sup>24</sup> Moisés micorí Jusiñamuina #note. Naimie eimienamona, naimiedí Faraón jisa iē jítōna mamecireaçaiñēde; <sup>25</sup> iadedí naimiedí Jusiñamui naimiēna iē cominina Egiptomona jillotajana #note. Jusiñamui naimie fetua jira, iē cominí illaíma llumomona iacade. Iē cominí diga duere sefuiacade. Jusiñamuina #noñēdino diga iē comēci jamaí iobitaçaiñēde. <sup>26</sup> Faraón jisa anamo naimie comuilla jira, naimiēmo eo aillue rana ite; iadedí Egiptomona ite ebirede ramo iē comēcina eo facañēde. Jusiñamuimona iba naimie ico feiñoiacana jira, Jusiñamui jito billemo iē comēcina facajano, duere sefuide. <sup>27</sup> Iē jira

Egiptomona Moisés micori Faraóna jaciruiñeno oni jaide. Jusiñamui naimiena eenuana ñnote. Jusiñamuina cioñede; iadedi Jusiñamui illana naimie ñnua jira, ñnocana jaide.

<sup>28</sup> Jusiñamui ie cominina jillotajana Moisés micori ñnua jira, Jusiñamui llua isoi, pascua railla rafuena finode. Ie cominimo toica llauda fallena llote. Ie dirue nase fuemo jidellena llote. Naie naio Jusiñamui jaienici nana nano doforanina meinesifellena, Jusiñamui llua finodimaci. <sup>29</sup> Egiptomona naimaci billa mei, jiairede railla monaillai ruica dine jaillena, Jusiñamuina ñnotimaci. Jusiñamui Moisés micorimo llua naimaci ñnuamona, jinui motodo saferedifodo ruica jaidimaci; iadedi Egipto soldaduai daje isoi ruica jaiacaidimacimo, nana corobaitimaci.

<sup>30</sup> Canaán railla eniruomo hebreos comini rilla mei, Jericó railla nairai dine ridimaci. Jusiñamuina ñnuanona, Jusiñamui llua isoi finodimaci. Siete digarui Jericó ecimo naimaci macarilla mei, Jusiñamui llua isoi, naie llaigafu ana bijide. Naie nairaina emodofidimaci.

<sup>31</sup> Naie facaiseconi Jericómo Rahab micori fiodañede. Nairañañodi callirediñañi. Nana Jericó comini Jusiñamuina ñnoñena jira, fiodaitimaci; iadedi jofue iñenanomo, nia Canaámo hebreos comini riñena facaise, Jusiñamui finoca rafuena nairañiño fidiano, nairañiño Jusiñamuina ñnote. Mena hebreos comini iaimaiana nairañiño feiñua jira, Jericó nairaina emodofilla facaise nairañiñoa meineñedimaci.

<sup>32</sup> Diga jiaie comini Jusiñamuina ñnocana jaidimaci; iadedi nana naimaci finoca rafuena cue cuellena, abi juanide. Naimacimona damierie mameciaina jamai cueiticue: Gedeón micori, Barac micori, Sansón micori, Jefeé micori, David micori, Samuel micori Jusiñamui facaina jaié llorainina jiaí eo cueñeticue. <sup>33</sup> Jusiñamui naimacina canuamona, ñnotimaci. Ie jira damierie naimaci bacauaina emodofidimaci. Illaíma isoi jiaíno naimaci cominina raise marena sedadimaci. Jusiñamui llogacino suillana ciodimaci. Leones naimacina riacanamona damierie jillode. <sup>34</sup> Iraimo usillamona damierie jillodimaci. Lloebi diga meiniamona damierie jillodimaci. Jiaíno jamai bue isoidino; iadedi jamai bue isoiñedinona jaidimaci. Jobaime raise finuamona, jiaíno imaci bacauai soldaduaina judaisitade.

<sup>35</sup> Dañañiñorie riñonaiamona uruai fiodailla mei, fiodaillamona Jusiñamui damierena jillotate. Illaicominimona jiaíno duere fiodaitimaci. Jusiñamuina fainonocaiacaiñena jira, naimacina meinetimaci. Naimaci fiodaicania, monamo Jusiñamui diga ico jaca illena naimaci ñnua jira, Jusiñamuina fainonocaiñeno fiodaitimaci. <sup>36</sup> Jiaíno duere sefuidimaci. Naimaciri jaisitimaci. Naimacina jeare ñaitimaci. Rao diga naimacina duere fatimaci. Damierena maianona, cárcelmo jonetimaci. <sup>37</sup> Damierie nofici diga fairinuamona, meinetimaci. Damierie ramo faitimaci. Meinellena, naimacina serrucho diga denaisite. Damierie lloebi diga meinetimaci. Jiaíno buenidimaci. Naimaci iniroi jamai igoí ie. Dueredimaci. Naimaci iniroi raise iñede. Aime guisoidimaci. Jiaie cominimona duere sefuisoidimaci. <sup>38</sup> Jiaie cominimona jamai bue isoidimaci; iadedi Jusiñamuimona jamai bue isoiñedinaci. Damierie jofonidimaci. Ie jira jamai jai jaicaisoidimaci. Jofue iñenanomo jaidimaci. Eniruomo jamai biita ñniuidimaci. <sup>39</sup> Jusiñamuina ñnocana jaidimaci. Naimaci finoca rafuamona Jusiñamui comini naimaci illana uñnoticai. Jusiñamuina ñnotimaci; iadedi nana naimacimo Jusiñamui lloga rafue naimaci illa facaise suiñede. <sup>40</sup> Jusiñamui jitailla jira, naimaci illa facaise nana naimacimo lloga rafue suiñede; iadedi naimie jitailla jira, fiodaillena Cristona jai orede. Ie cominina birui cai jiaí jaillena, Cristona jai orede. Ie jira cai diga danomo monamo Jusiñamuina nabaitimaci. Nana naimie lloga rafue jaca suite.

## 12

### *Jesús finoca rafuemo cai comeciaina cai facalli*

<sup>1</sup> Cai jaiagai Jusiñamuina ñnocana jaillana uñnoticai. Ie jira caidi naimaci isoi, Jusiñamuina ñnocana birui mai cai jailli. Marena riire cai aisiacania, ailluena rana abñedicaí. Ie isoide. Jecinona cai finofellena, naimiena raise cai ñnollena, jecino finuacinona mai cai fainonocailli. Nie isoide rafue caímo ia, Jusiñamui jitaillacinona finocana mai duere cai jailli. <sup>2</sup> Jesús finoca rafuemo cai comeciaina cai facalli. Cai jecino facaina naimie fiodailla jira, cai comeciaina naimie ocuiñotajanona, Jesúsna ñnoticai. Cruzmo marañedimie isoi fiodaite. Fiodaillamona jilluana naimie uñnuamona, naimie fiodaite. Ie Moo ecimo dane illena naimie uñnuamona, iocire fiodaite. Illaímana naimie illamona, ie Moo ecimo birui ite. Jesúsno cai comeciaina facajamona, caímare mai cai jailli. <sup>3</sup> Jusiñamui dibeimo iñedinomona Jesús eo duere sefuide. Ie isoi cai duere sefuia, Jesúsno cai comeciaina facajamona, cai comeciaina ocuiñotacana mai cai jailli. <sup>4</sup> Jusiñamui dibeimo iñedinomona duere sefuillamona, Jesús isoi duere nia sefuiñedomoi. Omoína nia meineñedimaci. <sup>5</sup> Duere omoi sefuia, bie jiaie cuegafuainana feitañeno. Naimie cominina omoi illamona, Jusiñamui llote:

Cue uruai, omoína cue duere finoiá, cuena nia ñno.

Duere sefuillamona, cuena fainonocaiñeno.

<sup>6</sup> Omoina cue isiruillamona, omoina duere finodicue.

Cue dibeimo omoina raise itatallena, omoina duere finodicue.

Nana cue cominina cue llofuecabillamona, naimacina duere finodicue

llote. <sup>7</sup> Naimie jitaillacinona cai finollena, caina duere finode. Ie uruiaina cai illamona, caina duere finode. Ero, nana ie uruiaina isiruillamona, naimaci ie jitaillacinona finollena, naga eniruemo ite moo ie uruiaina duere finocabide. Ie isoide Jusiñamui. Ie jitaillacinona cai finollena, caina duere finocabide. <sup>8</sup> Caina inotallena, Jusiñamui caina duere finoñenia, naimie cominifedicaí. Naimiedi nana ie cominina duere finocabide. <sup>9</sup> Cai eniruemo ite cai mootiai caina duere finoia, naimaci uaina inoticaí. Ie isoide. Cai Moo Jusiñamui caina isiruillamona, caina duere finoia, naimie uaina cai inua. Naimiena cai inuamona, monamo naimie diga ico jaca iiticaí. <sup>10</sup> Naimaci comeciaí lua isoi, cai eniruemo ite mootiai dallu caina duere finode. Cai Moo Jusiñamui caina llofuellena, caina duere finode. Naimie illa isoi, mare rafue dibeimo caina itataicade. <sup>11</sup> Jusiñamuimona duere cai sefua, iena gaiñedicaí. Iena jitañfedicaí; iadedi naiemona cai fueoia, jeacinona dane cai finoñellena, naimie jitailla isoi marecinona finocana jaiticaí.

*Jusiñamui rafuena cai cacaia, iena cai aruiruiñena*

<sup>12</sup> Nie isoide ramo caimo jiria: “Jusiñamui caina nibai canoñede” raiticaí. Iemona naimiena fainonocaiacadicaí; ia iemo cai comeciaina cai facañena. Jusiñamui rafuena cai sefuiruia, duere cai sefua, nie isoide rafue caimo ia, cai comeciaina ocuiñocana mai cai jailli. Jusiñamui caina canuamona, naimiena cai raise inuamona, cai comeciaí ocuiñocana mai cai jailli. <sup>13</sup> Jiaie rafuedo cai jaiñena; iadedi Cristo rafuedo raise inocana mai cai jailli. Iese cai jaja, Cristo rafuedo naimaci jiaí raise jaillena, jiaie creyentia canoñicaí. <sup>14</sup> Nana comini diga uri omoí i. Jusiñamui jitailla isoi, marecinona feno. Iese bu inñena, Jusiñamui jitailla isoi bu marebicaiñenia, Jusiñamui illanomo jaca inñete. <sup>15</sup> Jusiñamui caina duenaillamona, nana cominina jillotaicade. Omoimona buna Jusiñamui duenaillacinona fainonocailana jitañfedicue. Omoimo iese suia, iemona conini gaiñenacino comurede. Iena jitañfedicue. Omoí comeciaí daje isoi lloillana jitañdicue. <sup>16</sup> Jearede rafuena jaca finoñeno. Esaú micorí jae finoca rafuena uñotomoi. Jusiñamui ie moo Isaac micorimo mare rafuena suillena llote. Esaú nano doforamiena illamona, ie moo fiódaille mei, Jusiñamui jai lloga rafue ie moo uai diga, ie moo ra diga, naimie feiñoiacade. Naimie moo nai fiódaiñena facaise dacaiño Esaú aimetaiilla jira, ie amamona guillena jicade. Iemei naie guille ifomo ie momona feiñolle uaina ie amamo fecade. Naie facaise dama ie jitailla ramo comecina facade. <sup>17</sup> Ie amamo ie uaina fecaja mei, ie comeci uai meidote. Naie uai naimiemo dane illana abido jitaide; iadedi ie moo ie amamo jai fecade. Esaú eo eede; iadedi ie moo ie uai naimiemo jai fecanide. Jusiñamui lloga rafuemo Esaú comecina facañede. Naimie isoi Jusiñamui rafuena omoí jamaiñeno.

<sup>18</sup> Moisés micorí facaise cai hebreos cominimo Jusiñamui ie rafuena jae llote. Sinaí railla anedumona llote. Iena cacajanona, naie comini eo jaciruitimaci. Jusiñamui naie anedumo billanona, anedumona irai boode. Jiaí jitibicaide. Nainomo aifi eo ite. Eo boruiude. Eo gurude. <sup>19-20</sup> Trompeta ficirenana cacadimaci. Iena cuanona, iena cacajanona, eo jaciruitimaci. Jusiñamui naimacimo jai llote: “Bene cue illa jira, jaca buna bie anedumo biñena. Nainomo bu bia, nie toinaí nainomo macaria, nofici diga fairinuamona, naimiena omoí meine” llote. Jusiñamui llwana cacajamona, eo jaciruitimaci. Moisés micorimo: “Jusiñamui caimo nia llwana jai jitañfedicaí” llotimaci. <sup>21</sup> Eo jacirede ra illa jira, nana comini diga Moisés jiaí jaciruite. <sup>22</sup> Sinaí anedumona lloga rafuedo birui jaiñedicaí; iadedi jiaie rafuedo birui jaidicaí. Birui Jusiñamuina atona nabaidicaí. Cai hebreos comini isoi, Sion railla anedumo Jerusalémo Jusiñamui jofomo naimiena nabaiillena jaiñedicaí. Monamo Jusiñamui ite; iadedi birui naimiena atona nabairedicaí. Cai fiodaia, naimie dine jaiticaí, naimie diga jaca cai illena. Nainomo ie jaienisaí naimiemo iobillacinona fecacabidimaci. <sup>23</sup> Ailluena comini diga, Cristona birui inoticaí. Nana caina Jusiñamui fetuanona, cai mameciaí monamo ite rabenico jai cuega. Jusiñamui nana comini comeciaina uñote. Naimiena inotinomona ailluena jai fiódaitimaci; ia naimie ecimo naimaci joreñuai jiaí jai itimaci. <sup>24</sup> Jesús fiódaille jira, Jusiñamuina nabairedicaí. Naimie fiódaille jira, caimo jiaie rafue birui ite. Naie rafuena cai inuamona, cai comeciaí jai marena iticaí. Jiaí cai jeacinona oni dotade. Iena jiaí jai feitate. Abel micorí jae fiodaia, naiemona Jusiñamui buna ie jeacinona feitañede; iadedi Jusiñamui Abel micorí meinetimemo ibana ote.

<sup>25</sup> Ero, Jusiñamui rafuena omoí cacaia, iena jamaiñeno. Iena aruiruiñeno. Moisés micorí facaiseconi naie comini Jusiñamui lloga rafuena cacadimaci. Jiaíno iena jitañfedimaci. Iena inoñedimaci. Ie jira Jusiñamui naimacina duere finode. Cristomona jiaie rafue birui cacadicaí. Bie rafuedi Moisés lloga rafue baifemo faite. Jusiñamui duere finollicinomona



buna jillobinide. Cai duere sefuiñellena, Cristo rafuena cai ñnua. <sup>26</sup> Moisés micorimo ie rafue llua facaise, Jusiñamui naie eniruena niraidotade. Jusiñamui jairuido jiai llote: “Eniruena dane niraidotaiticue. Ucuaina, fiuina, jitoma diga, jiai niraidotaiticue” llote. <sup>27</sup> Naimie lloga uaimona enirue fuillena uifnoticai. Monamo ite ra fuillena jiai uifnoticai. Nana naie rana naimie fuidoite; iadedi naimiena cai ñnua jira, naimie caina fuidoñeite. Ico cai illinona jai finode. Iena naimie fuidoñeite. <sup>28</sup> Illaimana naimie illamona, naimie caina sedaite. Ie jira naimiemo iobillacinona cai fecaja. Naimiena cai ñnuamona, naimiena cai raise sedajamona, naimiena cai iobitaja. <sup>29</sup> Naimiena ñnoñedinona Jusiñamui eo duere finolle jira, naimiena jaciruilanona naimiena cai ñnua.

## 13

### *Jusiñamuina cai iobitaja*

<sup>1</sup> Dani conini jiaie creyentiaina isirucana omoi jai. <sup>2</sup> Abraham micori Jusiñamui jaienisaina uifnoñeno jaiie nafuete. Jiaie illanomona jiaie creyentiai bia, naimaci ñmillno ifena jira, naimacina nafue. Jusiñamuimona ibana feifnotomoi. <sup>3</sup> Cristo rafue muidona damerie creyentiai cárcelmo itimaci. Nainomo omoi jiai itomoidena, naimacina feitañeno. Naimacina isiruillamona cano. Damerie creyentiai duere sefui, naimacina jiai cano. Jiairuido naimaci isoi nibaie duere sefuiotomoi. <sup>4</sup> Airedimie jiaie riño diga illemo ie comecina facañena. Inirediñaiño jiaie iima diga illemo ie comecina facañena. Ie aifñe riño diga bu ia, ie inifñede iima diga bu ia, marañede. Iena finoñeno. Iena bu finoia, ie jeacino Jusiñamuimo lloñenia, Jusiñamui naimiena duere finoite. Naiñaiñona jiai duere finoite. <sup>5</sup> Ailluena ucube ollena, iemo nificño. Omoimo ite ra diga caimare i. Iena Jusiñamui facaina lloraima jaiie cuela: “Jusiñamui llote: ‘Omoina jaca canoiticue. Omoina jaca fainonocaiñeiticue’ llote”.

<sup>6</sup> Naiena cai uifnuamona, cai comeciaina ocuiñoiticai. Jaiie cuela fuae isoi lloiticai:

Cai Nama caina canoite.

Ie jira cai comeciai jarire finoñeiticai.

Buena jaciruiñeiticai.

Jiaimie buena caina jaciruitanide.

<sup>7</sup> Cristo rafuena omoimo navui lloganomo omoi comeciaina faca. Naimacimona Cristo rafuena nano cacadomoi. Cristo dibeimo naimaci illamo omoi comeciaina facajanona, naimaci isoi Jesucristona ñnocana mai omoi jai. <sup>8</sup> Naimie jaca ñnogamiñena uifnoticai. Naimie ie lloga uaina jaiie jaca finode. Iena birui finode. Ico iena jaca finoite. Ie jira naimiena cai ñnua. <sup>9</sup> Cristo iefñede rafuedo jaiñeno. Diga jiaie llofuiacino ite; iadedi iedo jaiñeno. Jusiñamui caina canuamona, cai comeciaina birui ocuiñocana jaiticai. Moisés micorimo lloga rafuedo navui jaidicai. Diga ra fimaide; iadedi naiedo cai jaillamona, cai comeciai raise illena, buena ofedicai. <sup>10</sup> Cruzmo Cristo fiodaillamona, cai jeacino facaina fiodaite. Moisés micori lloga rafuedo nia jaidino Cristo rafuemo duiñedimaci. Naie comini facaina ñairaini Cristo rafuemo duiñedimaci. <sup>11</sup> Moisés rafue llua isoi, nanoca ñairaima toñiaia faja mei, naie dirue dacañño naga año fo iticuartomo uite; iadedi naie toi abi naimaci comini illanomona jino uite. Iena jai jitaiñena jira, nainomo iena jobaide. <sup>12</sup> Ie isoide. Cristona comini jitaiñena jira, ie comini nairaimona jino uillanona, naimiena meinetimaci. Nainomo jeacino facaina fiodaite, comini comeciaina raise finollena. <sup>13</sup> Ie jira Moisés micori lloga rafuena cai fainonocaida, dani Jesucristo rafuedo cai jailli. Naimiena jeare finodimaci. Caina jeare finoia, naimiena jaca ñnocana cai jailli. <sup>14</sup> Beno jaca cai illemo ocuirifñedicai; iadedi monamo Jusiñamui diga cai jaca illemo ocuiridicai. <sup>15</sup> Jesús finoca rafue muidona, Jusiñamuimo iobillacinona jaca cai fecaja. Jusiñamuina cai uifnuamona, naimiemo iobillacinona jaca cai fecaja. <sup>16</sup> Marcinona finocana mai cai jailli. Jiaie creyente jitaí raillano, omoi raruaimona naimiena omoi cano. Iena omoi finoia, Jusiñamui omoiri iobite.

<sup>17</sup> Omoi llofuerañi uaina ñno. Naimaci anamo raise omoi i. Cristo dibeimo omoina raise itataiacadimaci. Iese naimaci finoacaiñenia, Jusiñamui naimacina duere finoite. Naimaci uaina omoi ñnoia, Cristo dibeimo caimare majiñtimaci. Naimaci uaina omoi ñnoñenia, sunaitimaci. Sunailla jira, naimaci llofuiacinomona buena ofñeitomoi.

<sup>18</sup> Jusiñamui diga omoi ññaia, cai facaina omoi jii. Jusiñamuimona cai comeciai marena illana uifnoticai. Naimie jitailla isoi, mare rafuena finocana jaiacadicai. <sup>19</sup> Omoi dine cue raire illena cue facaina Jusiñamuimo eo omoi jii.

### *Naimaci marena jaca illana jitaide*

<sup>20</sup> Jusiñamui conini omoi comeciaina uri itatajana jitaideicue. Cai Nama Jesús fiodailla mei, Jusiñamui naimiena jai jillotate. Jusiñamui llua isoi, Jesús fiodaite. Naimie fiodailla jira, Jusiñamui cai jeacinona feitate. Naimie fiodailla jira, naimie anamo cai illamona, caina raise sedarede. <sup>21</sup> Jusiñamui ie jitaillacino omoi finuana canoite. Cristona omoi ñnuana

canoite. Mare rafuena omoi finuana canoite. Jesucristo uaido omoina canoite, naimie jitaillacinona omoi finollena, Jesucristomo iobillacinona cai jaca fecajasa. Iena jitaidicue.

<sup>22</sup> Cue amatiai, bie cartana caimare feiño. Eo are rafuena cueñedicue. Janore cueticue. <sup>23</sup> Cai ama Timoteo cárcelmona jai jino bite. Cue dine naimie raire bia, omoi dine naimiena atititicue. <sup>24</sup> Nana omoi llofuerañimo cue uaina oredicue. Ua nana creyentiaimo cue uaina oredicue. Italiamoná bitino imaci uaina jai oredimaci. <sup>25</sup> Jusiñamui omoina jaca duenallana omoi uiñuana jitaidicue. Mai. Macabaite.

## SANTIAGO ORETAGA RABE

### *Uaiduacino*

<sup>1</sup> Caimaci, omoimo cartana oredicue. Santiagodicue. Cue mameci jiaicidi Jacobo. ¿Nigacino? ¿Nie isoidomoi? Jusiñamui jitailla rafuena cue finuamona, bie rafuena llofuecabiticue. Cai Nama Jesucristo facaina jiai llofuecabiticue. Cai doce nairaiaimo omoi duillamona, omoi jai judaisilla jira, omoimo cue uaina oredicue.

### *Ramo omoi jiriadedi, omoi comeciaina mairita*

<sup>2</sup> Amatiai, diga ie ramo omoi jiriadedi, eo iobilla. <sup>3</sup> Ramo omoi jiriadedi, Jusiñamui uaina raise omoi ñnuana uiñoitomoi. Iemona omoi comeciai mairillemona, ñnocana omoi jaitomoi. Biena omoi uiñua jira, iobilla. <sup>4</sup> Mairicana omoi comeciai jaiia, omoi comeciadi marebicaite. Marebicaillamona, omoi comeciaino buena fiebicaiñeite. Nana Jusiñamui llogacinuaina ja muidomo ñnoitomoi; <sup>5</sup> iadedi omoimo rafue ia, niese nibaiana omoi uiñoñenia, Jusiñamuimo jica. Ie mei omoimo naimiedi abi uiñoracinona iite. Jusiñamuidi nana naimiemo llotinomo iena caidiñeno icabilla jira, omoimo iena jiai iite; <sup>6</sup> iadedi omoi jicaia, uai ñnuanona jica. Omoi comeciai ñnoñenia, jicañeno. Comecina ñnoñedimiedi aifi betaja jorai isoide. Naimie comeci naganomo ite. <sup>7</sup> Naimiedi Jusiñamuimona ra feiñollemo tainona sedate. <sup>8</sup> Naie isoidimiedi nana naimie illa dinori ie comeci naganomo iite.

<sup>9</sup> Naimie ramo jiriadedi, Jusiñamuimona naimie jamai bue isoñena jira, duerede creyente iobilla; <sup>10</sup> iadedi ramo jirillamona ie ucubena naimie faifia, Jusiñamuimona naimie ucubedi ieñena jira, ucuberede creyente iobilla. Safia isoi, naimie ico safenaite. <sup>11</sup> Jitoma a ia, eo ecasillamona, safia safenaite. Llrirde. Ie mei jai ebinide. Jai iñede. Ie isoi ucuberedimie safenaite, naimie maiñanona. Ie mei naimie ucube bene jamai fiebite; ia Jusiñamui diga naimie jaca illamona, naimie jaca iobite.

### *Nana mare rafue Jusiñamuimona feiñotica*

<sup>12</sup> Ramo jiritimiedi ie comeci mairia, caimare iite. Jai naimie facacifilla mei, naimie comeci mairilla mei, Jusiñamuidi naimiena caimare itataite. Jusiñamui jai llote: “Cuen a isiruitinona cue illanomo jaca itataiticue”. <sup>13</sup> O ramo bu faia, lloñeno: “Jusiñamuidi cuena ramo faite”. Maraiñede rafue dibeimo naimie iñena jira, naimiedi buna ramo jaca fañede. <sup>14</sup> Cai comecimo naie jitaillacino illa jira, ramo faia uai ñnoticai. Naie facaiseconi caimona ebirena jirari, iena finoacadicai. <sup>15</sup> Cai jitailla jira, jeacinona finodicai. Jeacinona finocabillanona jaillano, faifitica. <sup>16</sup> Ero, cue isiruiga amatiai, Jusiñamui omoimo ramo faitatañena jira, naimiemona da mare rafue billa jira, dani omoi abina jifueñeno. <sup>17</sup> Nana mare rafue cai Moomona feiñotica. Naimiedi monamo ite lligaiñoranaiaina jaiie finode. Naie radi nagarui daje isoi lligaiñofede; iadedi naimie daje isoñede. Naimie comeci jacanano danoconi nagarui ite. <sup>18</sup> Naimie jitailla jira, ie uai llvano, naimie caina ie uruaiina itatate. Ie uruaiimona nano doforanidicai.

### *¿Nie isoide rafuena finoacadicai?*

<sup>19</sup> Cue isiruiga amatiai, Jusiñamui rafuemo raise cacarei. Ie mei naie uaina uaitañeno. Jiai raire iciriñeno. <sup>20</sup> Icirillamona, Jusiñamuidi cai marena jitailla isoi, buna jaca marebicañede. <sup>21</sup> Ie jira nana maraiñediconona oni faionocai. Jusiñamui uai omoi comecimo fecuise abi iedoñeno nagarui feiñocana omoi jai. Naimie ie uai omoi comecimo jai itatate, iduai eniruemo cai rilla isoi. Iduai sicuamona, llisilladi ite. Jusiñamui uai cai comeciaino itabillamona, caina jillotarede. <sup>22</sup> Cacajamona iena ñnocana jai. Cacajanona iena omoi ñnoñenia, dani abina jifuetomoi. <sup>23</sup> Bu naie uaina cacajamona ñnoñenia, naimiedi acaraino eruaidimie isoide. <sup>24</sup> Ie uiecona eruaide. Naimie jailla meinoconi, ie eruaiilla ie uiecona jai raire feitate. <sup>25</sup> Jusiñamui llogacinona bu eo facajia, iena feitañede. Iena ñnote. Naie uaidi jearedicino ie finuamona naimiena marena itatate. Jusiñamui uaina naimie feitañena jira, iena ñnua jira, naimie comeci caimare ite.

<sup>26</sup> “Jusiñamuina sedadicue” raillanona ie comecina facadimiedi jeare ñaia, maraiñeno ñaia, dama naimie abina jifueite. Jusiñamuina taino sedate. <sup>27</sup> Cai Moo Jusiñamuina bu marena raise sedaacania, diga rafuena finoite: Naimiedi moonidinona canoite. Feciñuaina canoite, imaci sure illa facaiseconi. Jeacinona jiai finoacaiñeite. Jusiñamui dibeimo iñedino isoi iacaiñeite. Jusiñamui naimie iese sedajia, Jusiñamuimona eo mare.

## 2

*Nana cominimo comeciaina lloitaiadicai*

<sup>1</sup> Amatai, cai Nama Jesucristo uai eo ebirede. Naimiēna omoi iinua jira, naimacimo daje isoi comeciai lloillamona, nana cominina daje isoi nafue. <sup>2</sup> Ero, omoi roracomē mena iima bia, ¿nie iimana nafueitomo? Damie ucuberedimie. Naimiemo oro ie anillos ite. Eo mare iniroina jitate. <sup>3</sup> Ucuberedimiemo llotomoi: “Bai bene bancomō rai”. Dueredimiemo llotomoi: “Bai bene naidai. Raiacania, eniruemo rai”. <sup>4</sup> Iese omoi lloia, damiēna jai raise nafuetomoi; ia damiēna jai raise nafueñedomoi. Iaimaiāi iniroimo omoi eruaiillamona, nafuetomoi. Mare rafuemo comeciaina facañedomoi.

<sup>5</sup> Cue isiruiga amatai, cacarei. Jusiñamuidi dueredinona fetode. Cominimona dueredimaci; ia Jusiñamuimona duenidimaci, naimiēna naimaci eo iinua illa jira. Naimiēna naimaci isiruilla jira, naimie cominina jai jaidimaci. Naie isoidinomo jai lloite: “Omoimo cue illanona iiticue”. <sup>6</sup> Ero, Jusiñamui dueredinona nafuete; iadedi dueredimienā jai nafueñedomoi. Dueredinomona duere sefuicabidomoi; ia ucuberedimienā jai duere finodomoi. Ucuberedinomona duere sefuicabidomoi; ia ucuberedimienā jai duere nafuetomoi. Maijitallena, juez dine ucuberedino omoina uitatimaci, omoina llogidollena. Dueredino iese omoina finoñedomaci; ia ucuberedinodi iena finocabidimaci. <sup>7</sup> Cristomo omoi jainaiillamona, ucuberedino naimiēna jeare jiai ñaitimaci.

<sup>8</sup> “Cristo llogacino finodica?” raillanomo comeciaina facajamona ucuberedimienā omoi nafueia, cuemona mare. Cristo naiēna iese caimo lloite: “O jofō ecimo itinona isirui, dama o abina o isiruilla isoi”. Iese omoi ia, cuemona mare; <sup>9</sup> iadedi nana cominina daje isoi omoi nafueñenia, jeacina jai finodomoi. Jai Jusiñamui llogacinona iinoñedomoi. Jusiñamui llogacinomona jai marañēno itomoi. <sup>10</sup> Nana Jusiñamui llogacinuaimona daje llogacinona omoi iinoñenia, Jusiñamuimona nana naie llogacinuaina jai iinoñedomoi. <sup>11</sup> Jusiñamui caimo jai lloite: “O añēde riño diga iñeno. O iñiñēde iima diga iñeno”. Jiai lloite: “Jaiimienā meineño”. O añēde riño diga iñedio; iadedi jaiimienā o meineia, nana Jusiñamui llogacinuai jai iinoñedio. <sup>12</sup> Jaiirujō Jusiñamuidi juez isoi omoimo lloite. Omoi comeciāmo iticino diēse omoimo lloite. Ie jira marena ñaino. Marena i. <sup>13</sup> Ero, omoimo naimie lloia, jaiē cominina omoi birui duenaiñenia, Jusiñamui naie facaise omoina duenaiñeite. Omoimo riire lloite. Omoina duere finoite; iadedi jaiē cominina birui omoi duenaia, Jusiñamui naie facaise omoina jiai duenaite. Duere sefuillena omoimo lloñeite.

### *Jusiñamuina cai iinuamona, diga rafuena cai finua*

<sup>14</sup> Amatai, “Jusiñamuina iinoticue” raitimiedi mare rafuena jaca finoñenia, ¿niēse naie iinoracinodi naimiēna jillotaite? Jillotañeite. <sup>15</sup> Jaiē rafuedo iena lloiticue. Omoimona daje creyente iniroinia, guille iñenia, <sup>16</sup> naie creyente omoi dine bia, naimiemo omoi lloia: “Mai jai. Rosiruiñeno. Marena ailluena guiño”; ia naimiemo jaca buena omoi fecañenia, ¿bue ñellena iese naimiemo raitomoi? <sup>17</sup> Ero, Jusiñamui omoi iinuamona mare rafuena omoi finoñenia, omoi iinoracino iēñede. <sup>18</sup> Omoimona damie cuemo nibai lloite: “Jusiñamuina raise iinoticue”. Jaiimie cuemo nibai lloite: “Mare rafuena finocabidicue”. Iaimaiāimo lloiticue: “Jusiñamuina cai raise iinoia, mare rafuena finocabitca. Mare rafuena cai finuamona, Jusiñamuina cai raise iinuana uiñotica”. <sup>19</sup> Dajede Jusiñamuidi illana iinotio. Iena o iinuano, mare; iadedi jananai iena jai iinotimaci. Ie jira Jusiñamuina jacrutimaci. <sup>20</sup> “Jusiñamuina raise iinoticue” nibai nia raitio. Abina raise nia uiñoñedio. Mare rafue o jiai finoñenia, dama abi o iinoracinodi iēñede. <sup>21</sup> ¿Niēse Jusiñamuimona cai usuma Abraham micoridi marebicaide? Naimiedi mare rafuena finuamona marebicaide. Jusiñamui jitailla rafuena naimie finuamona, faga ocaina isoi, naimiedi Jusiñamuimo ie jitona fecade. Naimie jitodi Isaac micori. <sup>22</sup> Abraham micori iinote. Mare rafuena jiai finode. Mare rafue naimie finuamona, naimie jai raise iinote. <sup>23</sup> Iemona Jusiñamui ie llogacino suide. Iena Moisés micori cuete: “Abraham micori Jusiñamuina iinote. Ie jira Jusiñamuimona naimie marebicaide”. Jiai cuete: “Naimiedi Jusiñamui nabai”. <sup>24</sup> Abraham micori rafuemona daje rafuena uiñotica. Dama ie iinoracino diga jaca bu marebicañede; iadedi Jusiñamuina iinuano, mare rafuena finuano, marebicaide. <sup>25</sup> Jaiē rafuedo iena lloiticue. Jaiē Rahab raillañaiño ite. Naiñaiño callirediñaiño. Mare rafuena finuano, naiñaiñodi Jusiñamuimona marebicaide. Naiñaiñodi ie jofomo Josué ie rafuena uiraimaiāna feñote. Naiñaiño nairaidi iaimaiāina meinellena jenodimaci. Meineñellena, naiñaiño iaimaiāina reide. Ie mei iaimaiāina bainino oretate. Mare rafuena naiñaiño finuamona, Jusiñamuimona naiñaiño marebicaide. <sup>26</sup> Ero, bumo ie joreño jai iñenia, cajeñede. Ie isoide. Mare rafue bu finoñenia, ie iinoracinodi iēñede.

## 3

### *Cai fuaimona jeacinodi comuide*

<sup>1</sup> Amatai, omoimona diga comini creyentiaina llofuerañina jaiñeno. Jusiñamuidi juez isoi ico lloite. Llofuerañi jaiē comini baifemo uifuaamona, Jusiñamui rafuena naimaci eo

raise ñnoñenia, Jusiñamui naimacina jiaño baifemo duere finoite. Iese riire naimacimo llwana jaciruillano, llofuerañina ailluena jaiñeno. <sup>2</sup> Nana caidi diga maraiñede rafuena finocabidicai. Maraiñedicinona bu ñaiñenia, jai marebicaide. Naimie nana ie comeci namarede. <sup>3</sup> Jiaie rafuedo iena lloiticue. Caballos cai jitailla rana finollena, imaci fuemo lloemamona finoca janorede rana joneticai. Ie mei nana caballo ie abina namatadicai. <sup>4</sup> Riire aifi aillue botena nine uacade; iadedi eo janorede quilla diga, ie jailla dine piloto botena dataoicaide. <sup>5</sup> Ie isoide cai fuiái. Eo janorede; iadedi cai fuiáimona diga rafuena comuide. Ero, eo janorede iraimona nana rasillaina bootate. <sup>6</sup> Cai fuiáidi irai isoide. Caimo jeacinona eo finotate. Nana cai comeciaina jearetatate. Taifemona ie uai ote. Nana cai ille dinori caina jearedicinona finotaicade.

<sup>7</sup> Nana rana toiredicai: ocainaiaí, sillíñiaí, ofomaiaí, eniruemo biicaidino, lliciaí. Nana toiredicai; <sup>8</sup> iadedi jaca bu ie fuena namatanide. Cai fuiái jaca eo maraiñede. Iemona eo maraiñede rafue icabite. <sup>9</sup> Cai fuiái diga cai Namamo, ua cai Moomo, marecinona lloticaí. Caina naimie finuamona Jusiñamuina eruaidicai; iadedi cai fuiái diga naimiena jeare jiaí ñaiticai. <sup>10</sup> Cai fuedi dajede; iade marecinona ñaiticai. Maraiñedicinona jiaí ñaiticai. Amatiaí, iese cai ñaiñena. <sup>11</sup> Ero, daje pozomona mare jinuí, erirede jinuí diga, oñedicai. <sup>12</sup> Amatiaí, higuera railla riaramona aceitunadi comuiñede. Uvas railla riaramona higo railla riaradi jiaí comuiñede. Cuerede jinuímona mare jinuína oñedicai. Cai fuiáimona jeacino comuiñellena, cai fuiaina cai namataja.

#### *Ua abi uiñoracino*

<sup>13</sup> Omoimona, ¿bu ua abi uiñote? Naimie ua abi uiñoia, naimie mareña illamona, iena uiñoitomoí. Abi iedoñeno mare rafuena naimie finoia, naimiemo ua abi uiñoracino illana uiñoitomoí; <sup>14</sup> iadedi naimie abi eo uradoia, dama naimiemo ite ramo comecina facaia, naimie abi uiñoracino diga naimie abina iedoñena. Jai tainona llote. Naimie llua isoi iñede. <sup>15</sup> Naie isoide uiñoracino Jusiñamuimona iñede. Bie eniruemo ie. Comini ie. Taife ie. <sup>16</sup> Comini abina uradoia, daní naimacimo ite ramo comeciaina naimaci facaia, comini uri iñedimaci. Diga maraiñede rafue naimacimo ite. <sup>17</sup> Jusiñamuimona ite ua abi uiñoracino mare. Bumo ia, uri ite. Riinide. Comeci jinide. Jiaie cominina duenaite. Mare rafuena finocabide. Cominina raise nafuete. Abi tainona jifueñede. <sup>18</sup> Bu uri ia, jiaie cominina uri itatate. Ie jira naimie mareña iite, Jusiñamui jitailla isoi.

## 4

#### *¿Bue ñellena uri iñedicai?*

<sup>1</sup> ¿Bue ñellena fuiriruidomoí? ¿Bue ñellena iciriruidomoí? Omoí comeciaino maraiñedicino illa muidona. Omoí comeciaino maraiñeno jitaillacino illa muidona. Naie jitaillacino omoí comeciaino namataacana muidona. <sup>2</sup> Rana jitaidomoí. Iena omoí feiñoñena jira, naimaci rana fiüllena, comena meinetomoí. Eo uradoidomoí. Omoí jitailla rana feiñoñena jira, fuiridomoí. Omoí jitailla rana Jusiñamuimo omoí jicañena jira, iena feiñoñedomoí. <sup>3</sup> Jiaicaiño Jusiñamuimo jicadomoí; iadedi raise jicañedomoí. Ie jira iena feiñoñedomoí. Daní omoí jitailla ra feiñoñena, omoí comeci jaisillena, jicadomoí. <sup>4</sup> Jusiñamuina birui raise jitañedomoí; ia naimie dibeimo iñedinona jai jitaidomoí. Bie eniruemo ite rafuena omoí isiruillamona, Jusiñamuina jai raise nabaiñedomoí. ¿Ñiese iena uiñoñedomoí? Bu naie rafuena isiruillacana, Jusiñamui dibeimo jai icaiñede. <sup>5</sup> Jusiñamui cuetatagafuina raise facañedomoí. Naiedi caimo llote: “Jusiñamui omoí jai fecaca Joreñodi omoí comecina eo raise namataacade”. <sup>6</sup> Caina eo duenailla jira, naimie dibeimo cai raise illena, Jusiñamuidi caina eo canoacade. Jusiñamui cuetatagafuiai iena llote: “Jusiñamuidi abi iedotimiena canoñede; iadedi abi iedodimiena canode”. Naimie dibeimo icaiñedimiena ñaite. Naimie dibeimo icadimiena canuena jiaí ñaite.

<sup>7</sup> Ie jira Jusiñamui anamo omoí i. Naimiena raise omoí ñno. Taife uaina jitañenanona, naimie uaina oni caiño. Ie mei omoimona naimie oni jaite. <sup>8</sup> Jusiñamuina nabaillena, naimie dine iaire omoí i. Ie mei naimie omoí dine iaireno iite. Jeacinona finoraini, omoí comeciái uaiñallaina meido. Naganomo omoí comeciaina facañeno. Omoí comeciaina mareña fino. <sup>9</sup> Maraiñede rafue omoí jai finuamona, omoí sunai. Jaisiñeno, ie ia omoí jeacino facaina omoí mai ee. Caimare iñeno; ia omoí jeacino facaina omoí mai sunai. <sup>10</sup> Jusiñamui dibeimo abina iedoñeno omoí i. Ie mei naimie omoí comeciaina iobitaite.

#### *Jiaino jinafomo jeare ñaiñeno*

<sup>11</sup> Amatiaí, maraiñede rafuena naimaci finoiadedi, jiaino jinafomo jeare ñaiñeno. Creyente jinafomo bu jeare ñaia, creyentena bu jicoia, creyentena naimie isiruiñena jira, Jusiñamui uaina raise ñnoñede. Jusiñamui uaina naimie ñnoñenamona, Jusiñamui uaina jiaí jamaiñocaide. <sup>12</sup> Jusiñamuidi maraiñede rafuena finodimiena duere finoite. Cai jeacinomona caina jillotarede. Cai jeacino facaina caina duere finorede. Ie jira jiaie creyentena jicoñeno.

*Ico are cai mo suite rafuena uiñoñedicaí*

<sup>13</sup> Jiaie rafuena lloiacadicue. Nibai llotomoi: “Birui jiaie nairaímo jaiticaí. Birui cai jaiñenia, ico are jaiticaí. Rana fecajamona ucube cai ollena, nainomo daje año iticaí”. <sup>14</sup> Iese llotomoi; iadedi nie isoide rafue ico are illena uiñoñedomoi. Cai ille dinori uillie illa isoi iticaí. Dallu bene iticaí. Ie mei jai iñedicaí. <sup>15</sup> Ie muidona omoi llua: “Cai Nama jitaia, nia iticaí. Cai Nama jitaia, nie isoide rafuena fiñoiticaí”. <sup>16</sup> Tena lloñedomoi; iadedi daní omoi comeciaina facajano llotomoi. Iemona eo abina iedotomoi. Abina ieduadaí marañedede. <sup>17</sup> Mare rafuena finuana uiñoñimiedi mare rafuena fiñoñenia, jeacino jai finode.

**5***Ucuberedinomo llucino*

<sup>1</sup> Ucuberedino, daje rafuena omoi mo jiaí lloiacadicue. Omoi mo ramo jirite. Ja eo duere sefuitomoi. Ie jira cuiri-cuiri ee. <sup>2</sup> Omoi raruiaí ja sabite. Omoi mare iniroí ja sabite, ibuisaí guilla jira. <sup>3</sup> Omoi ucube ja ieñeite. Ieñena jira, cominí omoi faifillana uiñoñitmaci. Abina faifitomoi, iraimo ra boa isoi. <sup>4</sup> Ero, ailluena ucube irairuillaí iena jai eenotomoi. Naie facaisedí jai ride. Omoi maijirainí maijiamona ucubedi omoi mo nia ite. Omoi eniruemo maijidimaci; ia naimacina raise ibañedomoi. Jai eedimaci. Cai nanoca Nama iena cacade. <sup>5</sup> Omoi illa dinori ailluena raruiaí omoi mo ite. Nana omoi comeciaí jitailla rafuena finodomoi. Omoi comeci jitailla isoi itomoi. Naie iba ollirui jai ride. <sup>6</sup> Maredinona duere finodomoi. Nie isoide rafuena omoi mo fiñoñedimaci. Abina riidoñedimaci; iadedi naimacina meinetomoi. Ie jira Jusiñamuimona ja duere sefuitomoi.

*Cai Nama billemo fecuise omoi ocuiri*

<sup>7</sup> Amatiai, cai Nama billemo fecuise omoi ocuiri. Cominídi imaci illimona riará feiñuana sedadimaci. Noci deillemo fecuise ocuiridimaci. Ie mei riará llisillana otimaci. <sup>8</sup> Ie isoi cai Nama billemo fecuise ocuiri. Omoi comeciaí rucaicuieriñeno, cai Nama bille iaire illa jira. <sup>9</sup> Duere omoi sefuiá, Jusiñamui juez isoi omoi mo lloi raillano, “Jiaie creyente muidona duere sefuidicue” raiñeno. Jusiñamui omoi illana raise uiñote. <sup>10</sup> Amatiai, Jusiñamuina llorainí micoriaimona cai fueua. Cai Nama dibeimo ñaitimaci. Duere sefuidimaci; iadedi eecuñedimaci. <sup>11</sup> Naimaci Jusiñamuina faínonocaiñena jira: “Naimaci comeciáidi caimare itimaci” raiticaí. Job micorina jiaí comeciticaí. Naimie jaie ite. Naimie eeñeno duere sefuide. Duere sefuide; ia Jusiñamuina faínonocaiñede. Ie mei ja muidomo nie isoide cai Nama naimiena finuana uiñoñiticaí. Cai Namadi naimiena duenailla jira, naimiena raise canode. Caina jiaí duenaite. Ie jira caina jiaí canoite.

<sup>12</sup> Cue amatiai, nanoca rafuena nia lloiacadicue. Omoi lloga uai omoi finollena jiaie cominí uiñollena, Jusiñamui mamecina llinotomoi. “Tena cai llinoia, cai lloga uaina cai fiñoñenia, Jusiñamui caina duere fiñoite” raitomoi. Omoi lloga uai omoi finollena, Jusiñamui mamecina jamai ebena llinoñeno. Monamo ite ra mamecina jamai ebena llinoñeno. Eniruemo ite ra mamecina jamai ebena llinoñeno; iadedi nie isoide rafuena omoi llua mona, uanaicinona jaca llono. Iese llono, Jusiñamui omoi na duere finoi raillano.

<sup>13</sup> Omoi mona duere sefuidimie ia, naimie Jusiñamuimo jicaja. Comeci caimare itimie ia, Jusiñamuimo iobillacinona rua. <sup>14</sup> Duidimie ia, naimaci naimieri Jusiñamuimo jiiñena, creyentiaina sedarainina uaidua. Naimacidi farena naimie abimo gia, cai Namamo jiiñanona, naimie ie duicomona jilloillena. <sup>15</sup> Inuano jiiñá, jilloite. Cai Nama naimiena jillotaite. Naimie finoca jeacinona oni jiaí dotajite. <sup>16</sup> Ie jira coninimo omoi marañedecinona llono. Ie mei Jusiñamuimo coninaiñena omoi jii, omoi duicomona omoi jilloillena. Jusiñamuimo marebicaidimie jiiñá, diga rafuena finorede. <sup>17</sup> Eliana comecitomoi. Jaie ite; ia naimiedi cai isoide. Jusiñamuimo jiiñede, noci deiñellena. Ie mei daje amaní fiemona abimo atomonado jaca deiñede. <sup>18</sup> Ie mei dane jiiñede, noci deillena. Ie jira noci deide. Ie mei riará dane sicode.

<sup>19</sup> Amatiai, omoi mona damiedi Jusiñamui ie uanaicino dibeimona jaia, dane Jusiñamui dibeimo naimiena bu itataia, eo mare. <sup>20</sup> Iena bu finoia, naimiena ie uañedecinomona itatate. Faifillemona jai jillotate. Jusiñamuidi naimie jeacinuaina oni dotajamona, iemona jiaí jillotate. Mai. Santiagodicue.

## PEDRO NANO ORETAGA RABE

### *Tuude cominimo Pedrodi cartana cuete*

<sup>1</sup> ¿Nigacino? ¿Nie isoidomoi? Bie carta omoimo oredicue. Pedrodicue. Jiaie comini motomo birui itomoi. Ponto railla eniruemo itomoi. Galacia railla eniruemo itomoi. Capadocia railla eniruemo itomoi. Asia railla eniruemo itomoi. Bitinia railla eniruemo itomoi. Diga eniruemo omoi tuua jira, bie rafuena omoimo lloiacadicue. <sup>2</sup> Naimie jitaillamona, cai Moo Jusiñamui omoina fetode. Naimie Joreñodi omoimo illamona, omoi comeciaina marebicaitate. Jesucristona omoi inollena, omoi jeacinomona omoi jilloillena, Jusiñamui omoina fetode. Jesucristo fiodailla jira, naimie diailla jira, naimie cominina jaidomoi. Jusiñamui omoina duenaillana uifocana mai omoi jai. Jusiñamui omoina uri itatjana uifocana mai omoi jai.

### *Jesucristo diga jaca cai illemo ocuridicai*

<sup>3</sup> Naimiedi cai Nama Jesucristo ie Moo illanona, cai Moo Jusiñamuimo iobillacinona cai fecacabillesa. Naimie caina eo dueruillamona, naimiedi cai comeciaina raise finode. Fiodaillamona Jesucristo jillua jira, naimie diga jaca cai illena, inocana cai jaillamo jiai ocuridicai. <sup>4</sup> Omoi ocurillafuedi monamo ite. Fafifneitomoi; ia nainomo caimare marena jaca itomoi. Jusiñamui iese omoina itataite. <sup>5</sup> Jusiñamuina omoi inuua jira, naimie illanomo ico omoi illena, ie uaido naimiedi omoina birui sedade. Ico Cristo bia, iena raise uifnotomoi. <sup>6</sup> Teri iobidomoi; iadedi dallu diga rafuemonona duere sefuidomoi.

<sup>7</sup> Jiaie rafuedo iena lloiticue. Ero, ua oro raise omoi uifollena, orona facacitomoi. Irai emodomo rainajamona, cocuillamona, gajamona, difai oro jai fiebide. Iena “Mare” llotomoi. Oro eo raifide; iadedi jaca inede. Ie isoide. Cristona omoi ua inuana facacillena, diga rafuemonona duere sefuidomoi. Inocana omoi jaillamona, Jesucristo abido bille faicaseconi Jusiñamuidi omoina: “Mare” lloite. Omoiri eo iobite. <sup>8</sup> Jesucristona jaca cioifnedomoi; iadedi naimiena jai isiruitomoi. Naimiena jaca cioifnedomoi; iadedi naimiena jai inotomoi. Ie jira eo iocire itomoi. <sup>9</sup> Cristona omoi inuamona, jeacinomona jai jillobidomoi. <sup>10</sup> Jusiñamui facaina lloraini micoriaidi Jusiñamui omoina jai duenaillana jaie llotimaci. Jusiñamui omoina jilluana jaie llotimaci. Iena naimaci raise cacafienia, naiemo comeciaina facauidimaci. <sup>11</sup> Cristo Joreño naimacina uifnotajamona, Cristona llotimaci. Cristo duere sefuillena llotimaci. Fiodaillamona naimie jilloillena jiai llotimaci. Monamo naimie abido jaillena llotimaci. Bumo iese ico suillena uifnotadimaci. Naie faicase illemo comeciaina jiai facadimaci. <sup>12</sup> Jusiñamuidi naie rafue naimacimo duiñenana uifnotade. Naimacina naie rafue caimo duillana jiai uifnotade. Jusiñamui ie Joreñona monamona naimacimo oretajanona, ie uaido naimaci lluumona, naimie facaina llorainimona bie mare rafuena birui jai cacadomoi. Jusiñamui jaienisa; bie rafuena jiai raise uifnotadimaci; ia cai isoi iena uifnotedimaci.

### *Naimie jitaillacinona cai finollena, Jusiñamui caina fetode*

<sup>13</sup> Ie jira omoi comeciaina raise marena fino. Ebena jaiñeno. Jesucristo abido bia, Jusiñamui omoina jai jilloitajana ua raise uifnotomoi. Iemo iocire ocuiri. <sup>14</sup> Jusiñamuina omoi nia uifnotena faicase dani omoi comeciaina jitaillu rafuedo jaisoidomoi. Naimiena omoi jai inua jira, naimiena omoi nia uifnotena faicase finoca rafuedo birui omoi jaiñeno. Mare uruiaci imaci moo uaina inotimaci. Jusiñamui uruiaina omoi jai illa jira, naimie uaina ino. <sup>15</sup> Jusiñamui ie uruiaina omoi illena, jai omoina fetode. Naimie mareuilla jira, marena omoi i. <sup>16</sup> Iena naimiedi jaie cuetatate: “Cue mareuidimiena isoi, marena omoi i”.

<sup>17</sup> Cai Moona Jusiñamui illamona, naimiemo birui inodomoi; iadedi juez isoi nagamiemo ico Jusiñamui llua jira, nana omoi ille dinori jacirucana omoi jai. Nagamiema ie marañede finoca rafue diese duere finoite; ia marañede rafuena finoñedimiena duere finoite. <sup>18</sup> Omoi einamac; rafuedo jaie jaisoidomoi. Naie rafue jamaifue. Naifuemonona Jusiñamui omoina jai jillotate. Batajamona omoi jeacinomona jillotañede. Ucubedi raie cueruide. Raie cueruide ra diga omoina jillotañede; <sup>19</sup> iadedi Cristo diruedo naimie dacaño fiodaillamona, omoina jaca jillotate. Cai comini imaci jeacino facaina mare toica llaudana fauidimaci; ia Cristomo jeacino inena jira, cai jeacino facaina birui dacaño fiodaite. <sup>20</sup> Caina jilloitallena, enirue nia inena faicaseconi Jusiñamui Cristona jaie fetode. Naimiena omoi uifollena, birui bene eniruemo Jusiñamui naimiena oretate. <sup>21</sup> Cristo muidona Jusiñamuina inotomoi. Cristo fiodaite; ia iemona Jusiñamui naimiena jillotate. Ie mei monamo ie ecimo naimiena dane itatate. Ie jira Jusiñamuina inotomoi. Omoi fiodaia, dane jilloillemo jiai jai ocuridomoi. <sup>22</sup> Uanaicinona omoi inuamona, omoi comeciaina jai jeanidimaci. Ie muidona jiaie creyentiana isirucana omoi jai. Omoi comeciaina conini omoi isirui. <sup>23</sup> Jusiñamui

cominina jai jaidomoi. Naimie uaido iese jaidomoi. Comini uaido iese jaiñedomoi. Naimie uai jaca fuiñeite. Jaca iite. Naie uaido naimie cominina jaca iiticaí. <sup>24</sup> Jusiñamui facaina lloraima micori iena jaie cuete:

Nana cominidi raiticiai isoidimaci.

Safia dallu ebirede; iadedi raiticiai ie safia diga are ifede.

Ie isoide. Diga rafuena finuana, dallu iticaí.

Are ifedicaí; <sup>25</sup> iadedi Jusiñamui uai jaca ite

cuete. Naie uaidi mare rafue. Naie rafuena birui jai cacadomoi.

## 2

<sup>1</sup> Jusiñamui cominina cai illa jira, jiaie cominina gaiñenacinona fainonocai. Nana jifuuacinona fainonocai. Abina caitajacinona feita. Nana abi uradoillacinona feita. Jiaie comini joreña ñaifeno. <sup>2</sup> Ero, raise moonailena, raise ecairellena, janosa monoi ijina jitaide. Ie isoide. Omoi comeciaí raise marena illena, Jusiñamui rafuena jitaídomoi. <sup>3</sup> Cai Nama omoina duenaillana jai omoi uiñuamona, naimie uaina ñnocana jai.

### *Cristodi jofomo ite nanoca nofici isoide*

<sup>4</sup> Ie cominina raise omoi illena, Jusiñamui rafuena finocana jai. Naimie omoina jai fetode. Naimiemo omoi raise duillana jitaide. Iena omoi raise uiñollena, jiaie rafuedo iena lloiticue. Naimiedi jofona niacade isoide. Noficimona niacade. Diga noficina jitaide. Naimie naie noficiaina jai fetode. Nanoca nofici diga naie jofo nillana tainede. Cristodi naie nanoca nofici isoide. Cai nairai Cristona jaie jitaíñedimaci; iadedi Jusiñamuimona naimie maredimena jira, Jusiñamui naimiena fetode. Caidi jiaie noficiái isoidicaí. Ie jofona nillena isoillena, Jusiñamui caina fetode. <sup>5</sup> Naimiena cai jai ñnua jira, naimie cominina jai jaidicaí. Naimie diga jai atona ñairedicaí. Naimie diga jiaie comini facaina jai ñaicabiticaí. Naimiena cai raise sedallena, Jesucristo caina canuamona, Jusiñamui jitaillacinona finocana jaidicaí. <sup>6</sup> Jusiñamui facaina lloraima iena jaie cuega:

Ero, Jerusalémo cue jofona nillena, daje noficina fetoiticue.

Eo mare noficina fetoiticue. Cue Jitona ñaiticue.

Naimiena jai fetodicue. Naimiedi eo mare.

Naimiena ñnuamona, comini iobitimaci

cuega. <sup>7</sup> Naimiena omoi ñnoia, Jusiñamui omoina iobitaite. Naimiena omoi ñnoñenia, faifitomoi. Jusiñamui facaina lloraima micori iena jaie cuega:

Jofona finoraini jitaíñena noficidi nana naie jofomo ite noficiái baifemo jai faiga

cuega. Ie isoide. Cai nairai Cristona jitaíñede; iadedi Jusiñamui naimieri eo iobide. <sup>8</sup> Dane cuega:

Nine naimaci macaria, naie noficimona eicaitaillamona, uaitimaci

cuega. Cristona cuete. Cristo uaina naimaci ñnoñena jira, Jusiñamui llua isoi faifitimaci.

### *Pedro Jusiñamui fetocanona llofuate*

<sup>9</sup> Jusiñamui jai fetocanodomoi. Naimiemo omoi jai duillamona, naimie diga atona ñairedomoi. Jusiñamui ua cominidomoi. Naimiena omoi ña ñnoñenia, jeacino anamo omoi illa jira, jitreñinomo itomoi isoidomoi. Naimemona omoina jai jillobitade. Naimie anamo jai omoi illamona, useredonomo jai itomoi isoidomoi. Eo mare rafue omoimo naimie finua jira, iena llocana omoi jai. <sup>10</sup> Jiaie Jusiñamui cominiñedomoi; iadedi birui Jusiñamui cominidomoi. Naimie omoina duenaillana jaie uiññedomoi. Birui iena uiñotomoi.

### *Pedro Jusiñamui jitaillacinona finocana cai jaillana llofuate*

<sup>11</sup> Cue isiruiganodomoi. Jusiñamui illanomo omoi birui jainaiaila jira, eniruemo jaca ññeitomoi. Eniruemo jaca omoi ññena jira, jeacinona finocana jaiñeno. Jeacino omoi comeciaina namataacana jira, iena ebiruñeno, naie anamo omoi i raillano. <sup>12</sup> Jusiñamuina ñnoñedino motomo omoi illamona, mare rafuena finocana jai. Omoina birui jeare ñaitimaci; iadedi omoi marena illana naimaci uiñuamona, Jusiñamuina ico naimaci ñnoia, naimiemo iobillacinona fecaitimaci. <sup>13</sup> Cai Namamo omoi duilla jira, illaicomini anamo raise i. Riai diga omoi nanoca illaima uaina ñno. <sup>14</sup> Naimacina omoi illaicomini fetua jira, omoi gobernadores uaina ñno. Maraiñede rafue omoi finoa, omoina duere finoitimaci; iadedi mare rafuena omoi finoa, omoi iobitimaci. <sup>15</sup> Jusiñamuidi mare rafuena omoi finuana jitaide. Iena omoi finua jira, omoina ebena ñaitino uaina llcaitaitomoi. <sup>16</sup> Jusiñamui anamo cai illamona: “Jiaie illaima uaina ñnoñeiticaí” raiñeiticaí. Cai enirue illaima uaina cai ñnoñenia, jeacinona finodicaí. Jusiñamui dibeimo cai illa jira, naimie jitaillacinona finocana cai jailli. <sup>17</sup> Nana cominimo marena fino. Nana creyentiaína isirui. Jusiñamuina jacruoicaida ñno. Riai diga omoi illaima uaina ñno.

*Cristo duere sefuilla rafuena fueoiticaí*



<sup>18</sup> Patrón anamo damierie itomoi. Omoi patrón ocuica uaina ñinocana omoi jai. Omoi patrón marena fecuise ocuica, naimie uaina ñino. Naimie raire iciría, naimie ocuica uaina jiaí ñino. <sup>19</sup> Maraiñede rafuena omoi finoñenia, omoi patrón omoína duere finoía, Jusiñamui omoi começiaina facajanona, ibana oñeno. Ibana omoi oñenia, Jusiñamui mona mare. <sup>20</sup> Maraiñede rafuena omoi finoía, omoi patrón mona duere sefuitomoi; iadedi maraiñede rafuena omoi finoñenia, omoi patrón omoína duere finoía, ibana omoi oñenia, Jusiñamui mona mare. <sup>21</sup> Duere omoi sefua, ibana oñeno. Iese omoi illena, Jusiñamui omoína fetode. Cristo cai facaina ibana oñeno duere sefuide. Naimie isoi cai illena, naimie isoi rafuena finocana cai jailli. <sup>22</sup> Naimiedi maraiñede rafuena jaca finoñede. Tainona jaca lloñede. <sup>23</sup> Comini naimiena jeare ñaitimaci; iadedi naimiedi uai oñede. Naimie duere sefuide; iadedi: “Omoína ico duere finoiticue” raiñede. Naimiedi Jusiñamui naimacina ico raise duere finollena uiñote. <sup>24</sup> Cruzmo naimie fiodaillamona jeacino anamo cai ñhellena, cai jeacino facaina naimie fiodaite. Jusiñamui jitailla isoi naimie fiodaite. Naimie jai duere sefuilla jira, cai jeacino mona jai jillodicai. <sup>25</sup> Sedañega toica lauðai isoi jai ebena jaisoidicai. Cai sedaraima anamo jai iticai. Naimiedi cai começiaina jai eenote.

### 3

#### *Pedrodi ñireðiñaiñuaina, aireðino ðiga llofujete*

<sup>1-2</sup> Ñireðiñaiñuái, omoimo jai lloiacadicue. Omoi ñiñiaí uaina ñino. Nibaí birui Cristo rafuena ñinoñedimaci; iadedi omoi marena illamona, Cristo ðibeimo naimacina itataitomoi. Jusiñamui uaina omoi ñnuamona, omoi marena illamona, damierie Cristona ñnoitimaci. <sup>3</sup> Ðañaiñorie abina eo finocabidimaci, naiñaiñuaina jiaie comini ebinaillena. Naiñaiñuái ifotiena eo finocabidimaci. Eo raifide rana jitacabidimaci. Eo ebirede raifide ñiroina jitacabidimaci. Naie isoide ra começina marena itatañede; ia Jusiñamui jitaillacinodo jaillamona, começi marena ite. Jiaie comini omoína ebinai raillano, iese omoi ñeno; <sup>4</sup> iadedi jiaie comini omoína ebinaillena, omoi começi marena fino. Omoi ñiñiaí uaina oñeno. Naimaci jitailla rafuena fino. Omoi começi iese ia, Jusiñamui mona eo mare. <sup>5</sup> Cai jaiagai facaise Jusiñamuina ñnotiñaiñuái iese itimaci. Cue birui llofua isoi, naiñaiñuái abina jai finodimaci. Naiñaiñuái ñiñiaí uaina ñnotimaci. <sup>6</sup> Iese Sara micori ie ñi Abraham micori uaina ñnote. Ie anamo naiñaiño illa jira, ie ocuica uaina jaca ñnote. Mare rafuena finocana omoi jai, buena omoi jaciruiñenia, naiñaiño isoi itomoi. Iemona naiñaiño uruaina jaitomoi isoitomoi.

<sup>7</sup> Aireðino, omoimo jai lloiacadicue. Omoi ainiaimo começiaina faca. Cai isoi naiñaiñuái mairiñena jira, naiñaiñuaina isiruillamona, naiñaiñuaina marena raise seda. Jusiñamui omoína duenaillamona, naimie cominina jai jaidomoi. Omoína jai jillotate. Omoi ainiaina omoi raise sedañenia, Jusiñamui daajena raise jünidomoi.

#### *Cristo ðibeimo cai illa rafue*

<sup>8</sup> Ðaje isoi começi marena jai. Coninina duenai. Naga creyentena isirui. Jiañona cano. Abina iedoñeno. <sup>9</sup> Omoína jiaie comini duere finoía, ibana oñeno. Omoína naimaci jeare ñaia, ibana oñeno; iadedi naimaciri marena ñaino. Mare rafuena cai finollena, Jusiñamui caina fetode. Iese cai jai, Jusiñamui dinena: “Mare” caina raito. <sup>10</sup> Jusiñamui facaina lloraima micori iena jai cuela:

Marena uri jaca bu iacania, jeare ñaiñeno.

Tainona lloñeno.

<sup>11</sup> Jearede rafue finuana fainonocai. Mare rafuedo jai.

Omoi ecimo itino ðiga, uri icana omoi jai.

<sup>12</sup> Naimie jitailla rafue omoi finoía, Jusiñamui iena uiñuamona, omoína raise sedade.

Naimie ðiga omoi ñaia, iena cacade;

iadedi maraiñede rafue bu finoía, Jusiñamui naimie ðiga icrite.

<sup>13</sup> Mare rafuena omoi finocana jai: “Maraiñede rafuena naimaci finua jira, naimacina duere finoiticai” rainidimaci; <sup>14</sup> ia mare rafuena omoi finuamona omoi duere sefua, Jusiñamui omoína canoite. Omoína duere finodinona jaciruiñeno. Jarire ñeno; <sup>15</sup> ia omoi começi jitaillamona Cristona seda. Naimiedi cai Nama. “¿Bue ñellena Cristona ñnotomoi?” omoimo bu jicanoía, uaina raise ono. Fecuise iciriñeno, uaina ono. <sup>16</sup> Mare rafuena finocana jai. Omoína jaino jeare ñaia, mare rafuena omoi finocabillamona meidaitimaci. Omoi marena illamona, tainona naimaci lluaña bairenite. <sup>17</sup> Mare rafuena omoi finuamona, Jusiñamui jitaillamona omoi duere sefua, dama iese duere sefuitomoi; ia maraiñede rafuena omoi finuamona omoi duere sefua, omoi muidona. <sup>18</sup> Cristomo omoi começiaina faca. Ðacaiño cai jeacino facaina naimie fiodaite. Naimie mareuidimie; iadedi maraiñedino facaina fiodaite. Jusiñamui ðibeimo caina itataiacade. Naimiena meinetimaci; iadedi naimie Joreño jaca ite. <sup>19</sup> Ie Joreño naimie jaillanona, jai fiodaitino imaci

joreñuái eenoranomo ie finoca rafuena lluaide. Naimaci nia fiodaifñenia, Jusiñamuina jaca iñoñedimaci; ia Cristo ie finoca rafuena naimaci joreñuáimo lluaide. <sup>20</sup> Jusiñamui rafuena jaié iñoñedimaci. Noé micorí facaise Jusiñamuidi naimaci naimiena iñuamo fecuise ocuiride. Jinuimona jillobillena, Noé micorí ie balsana finode. Ocho digamie jillobidimaci. <sup>21</sup> Ie isoide. Omoí bautizaia: “Jusiñamui díbeimo jai iticai” llotomoi. “Jeacinomona jai jillobidicai?” llotomoi. Omoí abimo ite jearenamona jillobiñedimoi; iadedi omoí comeciái jai marena ite. Fiodaillamona Jesucristo jillua muidona, jillobidicai. <sup>22</sup> Naimie jillua mei, monamo abido jai jaié. Jusiñamui ecimo naimie illamona, Jusiñamui uai naimiemo ite. Nana Jusiñamui jaienisai naimie anamo jai itimaci. Taifena Jesucristo anafefilla jira, Jesucristo anamo naimie ite; ia naimiena nia janafefitañede.

## 4

### *Jusiñamuimona cai feiñoga uai diga, naga jiaie creyentena cai canua*

<sup>1</sup> Cai isoí naimie illamona, Cristo duere sefuide. Naimie duere sefuide; ia jeacinona finofede. Duere omoí sefua, naimie illamo omoí comeciaina faca. <sup>2</sup> Nana omoí ille dinorí cominí jitaillacinodo jaiñeno; iadedi Jusiñamui jitaillacinodo omoí jai. <sup>3</sup> Jusiñamuina uifñoñedino isoí jaié bie isoide rafuena finouidomoi: Omoí aiñede riñonái diga isoidomoi. Omoí iniñede iññái diga isoidomoi. Jearede rafuena eburitomoi. Jifairuidomoi. Jiruana eburitomoi. Jusiñamui rairuica jiraraina sedauidomoi. <sup>4</sup> Naie isoide rafuena omoí jai finoñenia, Jusiñamuina uifñoñedinodí omoíri rajicaidimaci. Omoína jeare ñaitimaci. <sup>5</sup> Iese itimaci; iadedi Jusiñamui uicomo ico iitimaci. Naimacina duere finoite. Nia fiodaifñedinona duere finoite. Jai fiodaitinona jaié duere finoite. <sup>6</sup> Naimaci nia fiodaifñena facaise, Jesucristo rafuena cacadimaci. Jeacino muidona nana fiodaitimaci; iadedi naimaci navuí iñoia, naimaci joreñuái, Jusiñamui isoí, jaca iitimaci.

<sup>7</sup> Bie enirue raire fuite. Ie jira ebena jaiñeno. Comeciaina raise faca. Jusiñamuimo raise jillena, iese omoí jai. <sup>8</sup> Coninina isiruicana omoí jai. Omoí isiruillacino jiaie rafue baifemo faite. Jiaimie diga nicino ia, naimiena omoí isiruillemona, naicinona raire feitaítomoi. <sup>9</sup> Jiaie cominina jafueoicaida feiñoñeno; ia camare feiño. <sup>10</sup> Creyentiaína omoí jailla facaise Jusiñamuimona omoí uaina feiñotomoi. Naimie díbeimo omoí majillena feiñotomoi. Nagamiemo daje isoide uai iñede. Omoí uai diga, naga jiaie creyentena cano. <sup>11</sup> Cristo rafuena bu llofueia, Jusiñamui naimiemo llua isoí, naimie llofueia. Jiaie creyentena bu canoia, naimiena Jusiñamui canuamona, naimie canua. Jusiñamuina cai iobitallena, nana cai finua rafuemona Jesucristo mamecido iese cai jailla. Illaimana naimie illamona, caina jaca sedade. Naimiemo iobillacinona jaca cai fecacabillasa. Iena jitaídícue.

### *Cristo díbeimo cai illamona, duere sefuitica*

<sup>12</sup> Cue isiruiganodomoi. Eo duere omoí sefua, rajicaiñeno. Creyentiaína omoí jailla jira, duere sefuitomoi. Jusiñamuidi Cristona raise omoí iñuana facacite. <sup>13</sup> Cristo jai duere sefuide. Naimie isoí omoí duere sefua, ieri iobi. Naimie dane bene bia, naimie bairiari eo iobitomoi. <sup>14</sup> Creyentiaína omoí illamona, omoína bu jeare ñaia, camare omoí i. Iemona Jusiñamui joreño omoímo illana uifñoitomoi. Naimie: “Mare” omoína raite. <sup>15</sup> Jiaínodi cominina meinetimaci. Rana fiidimaci. Maraiñede rafuena finodimaci. Naimacimo duide rafuena abimo oñeno. Naie isoide rafuena bu finoia, duere sefuite. Iena omoí finoñeno. Naie isoide rafuena omoí finuamona omoí duere sefuillana jitaíñedicue. <sup>16</sup> Creyentiaína omoí illamona omoí duere sefua, ieri meiruiñeno; iadedi creyentiaína omoí illamona, iobillacinona Jusiñamuimo feca.

<sup>17</sup> Jeacino facaina Jusiñamuidi cominí birui duere finocabide. Jeacino facaina ie cominina nano duere finode. Ie mei naimie cominiñedinona duere finode. Naimie cominina cai illamona, caina janore duere finoite; iadedi naimie cominiñedinona cai baifemo eo duere finoite. <sup>18</sup> Jusiñamui facaina lloraíma micorí iena jaié cueba: “Mareuidinodí niadedí jillobiñedimacimo, ¿niese comeciaina jearedinodí jillobitimaci? ¿Niese maraiñedinodí jillobitimaci? Nibai jaca jillobiñeitimaci” cueba. <sup>19</sup> Iena omoí uifñuamona, mare rafuedo jai. Jusiñamui jitaillamona duere omoí sefua, mare rafuedo jai. Jusiñamui caimo finuana omoí uifñuamona, naimie anamo raise i. Naimie omoína raise enoite. Ie lloga uaina jaca finoite.

## 5

### *Pedro creyentiaína nia llofueite*

<sup>1</sup> Creyentiaína llofuerainí, omoímo rafuena lloiacadicue. Cuedi jai llofueraimadicue. Cristo fiodalana cidícue. Naimie ebire abido bia, jiaie creyentiaína diga iena cidícue. Iese cue illamona, omoímo lloiacadicue. <sup>2</sup> Omoí anamo ite creyentiaína raise seda. Naimacina raise llofue. Jiaimie railla jira, llofueñeno; iadedi omoí jitailla jira, llofue. Rana ollena llofueñeno; iadedi iocire llofue. <sup>3</sup> Omoí anamo itinona riire llofueñeno; iadedi mare rafuedo

omoi jaillamona, naimacina llofue. <sup>4</sup> Cai creyentiaí nanoca sedaraimadi Cristo. Naimie abido bia, naimiemona ibana feiñoitomoi. Naimie diga jaca iitomoi.

<sup>5</sup> Conirueni, omoi llofueraini uaina raise iino. Coninimona abina iedoñoeno. Jusiñamui facaina lloraima micori iese jaie cuega:

Bu abina iedoia, Jusiñamuimona marañíede;  
iadedi bu abi iedoñenia, Jusiñamuimona mare.

Jusiñamui naimiena duenaite

cuega. <sup>6</sup> Iese illa jira, cai Jusiñamui siñona jira, naimie anamo abina iedoñoeno mai raise omoi i. Iemona naimie jitailliruido omoína iobitaite. <sup>7</sup> Nie isoide rafue ia, Jusiñamui omoína canocabillana omoi uifñuamona, omoi comeciaí jarire finoñoeno. Naimie omoína eenoite.

<sup>8</sup> Ebona jaiñoeno. Jeacino finuamo abina rairui. Taife caina ramo faicabite. Janallari ie rille jenua isoi, Taife omoína jenocabide. Jeacino omoi finuana jitaide. <sup>9</sup> Naimie ra faia uaina iñoñoeno; ia Cristona iñocana jai. Omoi duere sefuilla isoi, nana jiaie creyentiaí duere sefuidimaci. Iena omoi uifñuamona, omoi comeciaí ocuiñocana jai. <sup>10</sup> Cai Jusiñamui caina eo duenaite. Cristomo jai cai duilla jira, Jusiñamui illanomo ico jaca iiticaí. Dallu birui duere cai sefua, Jusiñamui cai comeciaina raise finoite. Cai comeciaina raise ocuiñotaite. <sup>11</sup> Illaimana naimie illamona, caina jaca sedade. Naimiemo iobillacino cai fecacabillasa. Iena jitaide.

*Naga creyentiaímo carta oria rafue*

<sup>12</sup> Silvanona uifñotomoi. Naimiena bie cartana cuetataticue. Cristomo naimie duilla jira, cue ama isoi naimie ite. Cuemona naimiedi raise iñogamie. Omoi dine oretallena, janorede cartana cuetataticue. Bie rafuena dane lloiacadicue: Bie rafuedi Jusiñamui ie. Naimie caina duenaillana omoi uifñuamona, bie rafuena iñocana jai.

<sup>13</sup> Babiloniamo ite creyentiaí omoi dine imaci uaina oredimaci. Naimacina Jusiñamui jai fetuamona, creyentiaína jaidimaci. Marcos ie uaina jiaí orede. Cristomo naimie jai duilla jira, naimie cue jitona eruaide. <sup>14</sup> Conini omoi isiruillamona, nana creyentiaína eo caimare uaido. Cristomo jai omoi duilla jira, naimie omoi comeciaina uri itatajana uifñocana mai jai. Macaibaite. Pedrodicue.

## IE EMODOMO PEDRO ORETAGA RABE

### *Pedro creyentiaimo carta orede*

<sup>1</sup> ¿Nigacino? ¿Nie isoidomoi? Bie carta omoimo oredicue. Simón Pedrodicue. Jesucristo dibeimo maijiamona, ie rafuena lloticue. Cuen a oretajamona, ie lloga uaina finodicue. Cai isoi jai ñnotomoi. Cai Jusiñamui marena illa jira, Jesucristo marena illa jira, Jesucristo omoina jillotaja jira, jai ñnotomoi. Jusiñamuimona cai isoi omoi illa jira, bie carta omoi dine oredicue. <sup>2</sup> Jusiñamuina omoi uñuamona, cai Nama Jesús omoi uñuamona, iaímaiaí omoina duenaillana uñocana jai. Iaimaiaí omoi uri itatajana uñocana jai.

### *Creyentiaí marena illa rafue*

<sup>3</sup> Jesús siñona illamona, bene cai marena illena, naimiedi nana rafue caimo jai iga. Naimiena cai uñocana jaillamona, caimo ite. Naimie uai ebirede. Naimie jaca mareuidimie. Naimie isoi cai illena, caina jai fetode. <sup>4</sup> Naimie iese illamona, eo mare rafuena caimo jai llote. Jiaie rafue baifemo faite. Bie rafue muidona jeacinomona jillobidicai. Cai comeciaí jaie jitailla jira, faificana jaidicai; iadedi naimie rafuena cai iñuamona, naimie illa isoi, icana jaidicai. <sup>5</sup> Jesucristona jai ñnotomoi. Naimiemo omoi duillamona, mare rafuena finocana jai. Jusiñamui jitaillacinona finocana jai. Iemona abina uñocana jai. <sup>6</sup> Jearede rafue finocana jaiñeno; iadedi omoi comeciaina eeno. Iena ocuiñocana jai. Jusiñamuina sedacana jai. <sup>7</sup> Jiaie creyentiaina isiruicana jai. Nana cominina isiruicana jai. <sup>8</sup> Naie isoidicinona jitaidomoi. Iedo omoi raise jaia, cai Nama Jesucristona eo raise uñocana jaitomoi; <sup>9</sup> iadedi iedo omoi jaiñenia, abina nia raise uñofedomoi. Omoi jeacinomona jai jilluana jiaí jai feitatomoi. Mare rafuena finocana jaillena, omoi jeacinomona jillobidomoi. Iena feitañeno. <sup>10</sup> Cue amataí, naie isoidicinona finocana jai. Iemona Jusiñamui omoina fetuana raise uñoitomoi. Abido danomo jiaí jaiñeitomoi. <sup>11</sup> Iese omoi jaia, cai Jilloitaraimana naimie illamona, cai Nama Jesucristo ie illanomo omoina eo marena feñote. Nainomo naimie anamo jaca iitomoi.

<sup>12</sup> Ie jira bie isoide rafuena diga icaíño omoimo lloticue. Bie rafuena uñotomoi. Bie rafue uanaicinona jai raise uñocaidomoi. <sup>13-14</sup> Cai Nama Jesucristo cuemo jai llua jira, raire cue fiodaillena uñotocue. Nia cue fiodañenia, bie rafuena omoimo diga icaíño lloticue. Iese omoimo cue lloia, cuemona mare. <sup>15</sup> Bie rafue omoi raise nagarui uñollena, omoina birui canoiticue. Cue fiodaile meí, nagarui bie rafuena omoi feitañenana jitaidicue. Ie muidona bie rafuena jai cueticue.

### *Pedro Cristona ebirenana jaie ciode*

<sup>16</sup> Jamaí rafue omoimo lloñedicai. Omoina jifueiacaiñedicai. Cai Nama Jesucristo siñonana lloticai. Naimie abido billena jiaí lloticai. Naimiena ebirenana jaie ciodicai. <sup>17-18</sup> Eniruemo naimie jaie ia, anedu muidomo naimie diga jaidicai. Jusiñamui nainomo jiaí illa jira, naie illano mare. Naie facaise Jusiñamui llua cadadicaí. Jusiñamui naimiena iobitaiacade. Ebire llote: “Bimie cue isiruiga Jito. Naimieri iobidicue”. Iena jaie cai cuanona, birui naimie siñonana lloticai. <sup>19</sup> Naiemona Jusiñamui facaina jaie lloraini micoriaí lloga rafue suillena jai raise uñotocai. Naimaci lloga rafuemo omoi comeciaina faca. Lamparín jitiñedinomo lligaiñua isoi, naie rafue cai comeciaina uanaicinona uñotade. Monairacuduna cai cioia, iaírei monaille ua illana uñotocai. Ie isoide. Cristo dane baíreia, iena raise uñotocai. Jusiñamui facaina lloraini micoriaí rafuena cai uñuamona, uanaicinona ua uñotocai. <sup>20</sup> Biena uñotocai. Dani comeciaina Jusiñamui facaina lloraini micoriaí; naimaci lloga uaina llofueñedimaci. <sup>21</sup> Dani naimaci comeciaí jamaí facajamona naie rafuena oñedimaci; iadedi Jusiñamui Joreño naimacimo illamona, naimacina iena uñotajamona, Jusiñamui rafuena jino llotimaci.

## 2

### *Pedro tainona llofueraína llot*

<sup>1</sup> Cai jaiagai facaise tainona llofueraíni itimaci. Birui ie isoide. Omoi motomo tainona llofueraíni iitimaci. Jusiñamui rafuena raise llofueñeitimaci; iadedi naie rafuemonona omoina itataicanitimaci. Naimaci facaina Jesucristo fiodaite; iadedi: “Jesucristo cai Nama” raiñeitimaci. Naimaci finolle rafue muidona, raire ebena faifitimaci. <sup>2</sup> Naimaci jearede rafuedo ailluena comini jaitimaci. Naimaci muidona, ailluena comini Cristo rafuena jearuitimaci. Cristo rafue uanaicino; ia iese lloñeitimaci. <sup>3</sup> Ucube ollena, naimaci tainona llofuacinodo omoina jifueiacanitimaci; iadedi Jusiñamui riicaillafue anamo jai itimaci. Jusiñamui naimacina ico duere finoite.

<sup>4</sup> Naimie ecimo ite jaienisaïmona damierie jeacino jaie finua jira, Jusiñamui naimacina jai oni dotade. Naimie ricaillafue anamo naimaci jai illamona, naimacimo ite uai jai ifede. Jitiredinomo jai itimaci. Naimacina duere finoite, nana comini Jusiñamui dine illirui ia. <sup>5</sup> Jusiñamui Noé micori facaise ite cominina jaie duere finode. Noé micori Jusiñamui ie mare rafuena naimacimo llote; iadedi Jusiñamuina ñnoiacaifenedimaci. Eo noci deitajamona, enirue buillamona, Jusiñamui naimacina duere finode. Naiemona Noé micorina, ie siete comini diga, jillotate. <sup>6</sup> Sodoma railla nairai, Gomorra railla nairai diga, Jusiñamuidi bootate. Naimiena naimaci ñnoñena jira, naimacina fuidode. Naiemona naimiena ñnoñedinodi fueua. <sup>7</sup> Sodomamona Jusiñamui Lot micorina jillotate. Lot micori maremie. Eo jearede rafuena naie nairai finua jira, Lot micori comeci jarire ite. <sup>8</sup> Naimaci motomo naimie illamona, nagarui naimaci marañfede rafue naimie ciuamona, naimie comeci uri ifede. <sup>9</sup> Naimiena jaie ñnoñedinona Jusiñamui jai duere finode; iadedi Jusiñamui naimiena ñnotino ramo faiamona jilloitajana uifnote. Jusiñamui naimiena ñnoñedinono naimie ricaillafue anamo illana jai uifnote. Ico naimacina duere finoite.

<sup>10</sup> Jearede jitaillacino finocabidinona ua duere finoite. Jusiñamui uaina jamaidinona ua duere finoite. Bie tainona llofueraini marefodo llofuecabitimaci. Naimaci jitaillacinona llofuecabitimaci. Jusiñamui jaienisaïna jaciruiñeno jeare ñaitimaci. <sup>11</sup> Jusiñamui jaienisaï uai naimaci baifemo faite; iadedi Jusiñamui illanomo naimaci illamona, bie tainona llofuerainina jeare ñañfededimaci. <sup>12</sup> Ocainai ai abina raise uifnoñena muidona, cai rillena naimacina fatikai. Bie tainona llofueraini ocainai ai isoidimaci. Naimaci raise uifnoñega rafuena jeare ñaitimaci. Ocainai ai faillla isoi, faifitimaci. <sup>13</sup> Jiaie cominina naimaci duere finua dinori duere sefuitimaci. Birui ite rafuena nagarui eburitimaci. Danomo omoi guicabia, naimaci illa jira, raise nabairinidomoi. Jearedimaci. Jearede rafuena naimaci eburilla jira, raise comini diga nabairinidomoi. <sup>14</sup> Riñona naimaci cioia, naiñaiño diga eo iacadimaci. Jeacinona finocana jaicabidimaci. Cristona nia raise ñnoñedinona jeacinona finotaicadimaci. Rana eo nicidotimaci. Jusiñamui naimacina duere finoite. Jaca faifitimaci. <sup>15</sup> Cristo rafuena faïnonocaillanona, jiaie rafuedo birui jaidimaci. Balaam micori rafuedo jai jaidimaci. Balaam micori Beor micori jito. Ucube ollena, Balaam micori uanaicinona jaie lloiacañfede; iadedi jiaie rafuena lollena, jiaie nairai dine jaide. <sup>16</sup> Naisona naimie jaidemo, ie burra naimie diga ñaite. Jeacino naimie finofellena, ie burra naimie diga ñaite. Uairico isoi Balaam micori jaiñellena, naimie diga ñaite. Birui bie tainona llofueraini, Balaam isoi, jiaie rafuedo jaidimaci.

<sup>17</sup> Omoina canoñedimaci. Jinui iñena pozo isoidimaci. Naiemona buena oñedomoi. Monamo ite uillie isoidimaci. Riire aifi bia, naie uillie oni ñaitade. Bie tainona llofuerainimona buena oñedomoi. Naimaci comeci ai daje isoi lloifnedimaci. Jusiñamui naimacina ico duere finoite. Jusiñamui illanomo naimaci iñenano, jitiredinomo jaca iitimaci. <sup>18</sup> Jamai ñaia diga abina idotimaci. Uanaifede rafuemona, como Cristomo ñnotinona ramo faitimaci. “Jearede rafue finuana mare” raitimaci. <sup>19</sup> “Cai jitailla rafuena finoredicaï” raitimaci. Iese raitimaci; iadedi jeacino anamo jai itimaci. Jeacino finocana naimaci jailla jira, ie anamo jai itimaci. <sup>20</sup> Cai Nama Jesucristo. Naimiedi cai jilloitarama. Naimiena naimaci jaie ñnuamona, marañfedinico anamona jai jillodimaci; iadedi marañfedinona dane finocana jaidimacina, naie marañfedinico anamo dane itimaci. Eo fodo jai jaidimaci. <sup>21</sup> Cristo rafuena jaie uifnoñedimaci. Birui iena uifnotimaci; iadedi naie mare rafuedo raise jañfededimaci. Iena faïnonocaillamona, eo jai fodo jaidimaci. <sup>22</sup> Cai comini iena iese llocabitimaci; “Jico cicuia mei, ie cicuiana dane abido guite. Chanchona cai jocua mei, ie jearede illanomo raire abido jaicabide”. Cristo rafuemona danomo abido jaidinodi daje isoidimaci.

### 3

#### *Pedro cai Nama Cristo dane billena llofuede*

<sup>1</sup> Cue isiruiganodomoi. Navui jiaie carta omoïmo oredicue. Birui dane cueticue. Bie rafuena jai uifnotomoi; iadedi iena omoi ua raise uifollena, iena dane cueticue. Iemo omoi comeci ai raise facajana jitaidicue. <sup>2</sup> Jusiñamui facaina jaie lloraini micoriai lloga rafuena jai uifnotomoi. Cai Nama caina oretajanona, ie lloga rafuena omoïmo jai lloticai. Naimie muidona jillobidomoi. Bie rafuemo omoi comeci ai facajana jitaidicue. <sup>3</sup> Biemo nano omoi comeciaina faca. Cristo nia abido biñena, Cristo rafuena uaitatino iitimaci. Naimaci jitailla rafuedo jaitimaci. <sup>4</sup> Jicanoitimaci: “¿Niese Cristo nia abido biñede? Enirue finua facaisemona nana ra daje isoi comunicana jaide. Cai mootiai jai fiodaicana jaidimaci. Cristo jaca biñeite”. <sup>5</sup> Iese raitimaci; iadedi iese ifede. Jaie suide rafuemo comeciaina facaicaifenedimaci. Jusiñamui jaie luamona, ie uaido mona finode. Enirue jiaï finode. Jinuimona iena finuamona, jinuimona eniruedi bairedo. <sup>6</sup> Jinui diga Jusiñamuidi Noé micori facaise cominina jaie fuidode. <sup>7</sup> Jusiñamui mona, enirue diga, ico fuidollena jai llote. Mona,

enirue diga, bootaite. Ie jitaillirui Jusiñamui naimiēna iñoñedinona iese duere fiñoite. Ie uai jai llote; ia nia suiñede.

<sup>8</sup> Cue isiruiganodomoī. Biena feitañeno. Ie lloga uai jaca suite. Cai Namamona daruidi mil años isoide. Naimiemona mil añodi daruibicaide isoide. <sup>9</sup> Damierie comeciāi facadimaci: “Are suiñena jira, cai Nama ie lloga uaina nibai finoñeite”. Iese cai Nama iñede; iadedi comini naimiēna iñuana fecuise sedade. Comini imaci uai meidollena sedade. Naimiaci faifillana jitañede. Ie muidona nia abido biñede. Ie lloga uai nia suiñede.

<sup>10</sup> Fiirairaima billa isoi, cai Nama ebena abido biite. Naimie bia, mona eo ficirenamona fuite. Jitoma, fivui diga, ucuai diga, bootajamona, fuite. Enirue, nana benomo ite ra diga, bootaite. <sup>11</sup> Bie rafue suillena uiñotici. Naie cai uiñuamona, Jusiñamui jitailla rafue finocana cai jailla. Naimiēna raise cai sedajasa. <sup>12</sup> Naie facaise billemo iocire cai sedaja. Raire suillena, naimie jitailla rafuena raise fino. Naie facaise Jusiñamui mona bootajamona, iena fuidoite. Jitoma, fivui diga, ucuai diga bootajamona iena fuidoite. <sup>13</sup> Naimie jai llua isoi, jiaie mona, jiaie enirue diga illena sedadici. Nainomo Jusiñamui jitailla isoi marena jaca iitici. Nainomo mare rafue finocana jaitici.

<sup>14</sup> Cue isiruiganodomoī. Bie rafue nia suiñena jira, naimie abido nia biñena jira, jecino finoñeno i. Uri icana omoi i. Iese omoi ia, naimie abido bia, omoīna: “Mare” raite. Omoi iobite. <sup>15</sup> Raire abido cai Nama biñena, naimiedi comini naimiēna iñuamo ocuiride. Iena uiñotici. Cai isiruiga ama Pablo, bie isoide rafue omoimo navui cuete. Cristo naimiēna uiñotaga rafue diese cuete. <sup>16</sup> Nana naimie cartaiamo bie isoide rafuena cuete. Naimie cartaiamo diga rafue ite. Dajerie rafue iñirede. Cristo rafuena raise uiñoñedino, Cristona raise iñoñedino iena tainonana llofuecabitimaci; iadedi iemona faificana jaidimaci. Jiaie Cristona ciegafuiaina tainonana llofuecabitimaci.

<sup>17</sup> Bie rafue birui uiñotomoī. Iena omoi uiñuamona, jearede rafue finocabidino rafuedo jaiñeno. Abido danomo omoi jaiñellena, iemona abina rairui. <sup>18</sup> Cai Nama cai duenaillana uiñocana jai. Naimiedi cai Jilloitaraima. Naimiēna omoi uiñocana jaillamona, naimiēna nabai. Naimiēna birui cai iobitajasa. Naimiēna ua jaca cai iobitajasa. Mai. Macaibaite. Pedrodicue.

## JUAN NANO FUEÑE ORETAGA RABE

*Jusiñamui diga cai jaca illena, Juan cuete*

<sup>1</sup> Cue uruiaina omoï isoilla jira, omoïmo cartana oredicue. ¿Nie isoidomoi? Nano dofoconi itimiëna lloiacadicue. Naimiedi Jesucristo. Jiaie llofueoicaigano diga, jaie cai motomo naimie illamona, naimie llofuiana cacadicai. Naimiëna ciodicai. Naimiëna jiaie jetadicai. Caina Jusiñamuina uifnotade. Jusiñamui diga cai jaca illena, jiaie caina llofueite. <sup>2</sup> Jusiñamui dinena billanona, iimana jaide. Naimiëna jaie raise cai ciua jira, naimie rafuena birui omoïmo lloiacadicue. Ie Moo diga nano jaca ite; ia cai dine naimie billamona, naimiëna jai ciodicai. <sup>3</sup> Cai ciua rafuena, cai cacaja rafuena, omoïmo lloiticue. Jusiñamuina cai diga omoï nabaillena jitaïdicue. Jusiñamui Jito Jesucristona, cai diga omoï nabaillena jiaie jitaïdicue. <sup>4</sup> Omoï comeciäi caimareficaillena, omoïmo bie rafuena cueticue.

*Jusiñamuidi jaca mareuidimiëna jira, useredinomo ite isoide*

<sup>5</sup> Jesucristomona cai cacaja rafuena omoïmo ja lloiticue. Jusiñamuidi jaca mareuidimiëna jira, useredinomo ite isoide. Naimie comecidi jaca jeanina jira, jitreidinomo iñede isoide. <sup>6</sup> “Jusiñamuina nabaïdicai” cai raia, iadedi jeacinona finocana cai jaia, tainona lloticai. Uanaicinodo nia jaiñedicai. <sup>7</sup> Jusiñamui jeacino jaca finoñede. Naimie isoi jeacino finoñeno cai jaia, coninina nabaïdicai. Jesucristo fiodaillamona, naimie diaillamona, Jusiñamui cai jeacinona oni dotade. Iena faitate. <sup>8</sup> “Caimo jeacino jaca iñede” cai raia, dani cai abina jifueticai. Uanaicinodo nia jaiñedicai. <sup>9</sup> Naimiemo cai finoca jeacino cai lloia, Jusiñamui cai jeacinona dotaita. Nana cai maraiñedicinona dotaita. Naimie inogamiëna jira, naimie maremiëna jira, iese finoite. <sup>10</sup> “Omoïmo ite jeacino” Jusiñamui llote; iadedi: “Jeaçino finocabiñedicai” cai raia, “Jusiñamui tainona llote” raiticai. Iemona naimie uaina jai uaitaticai.

## 2

*Cai facaina riidotimiedi Cristo*

<sup>1</sup> Cue uruiäi isoi cue mamecaomoi. Jeaçino finocana omoï jaiñellena, omoïmo birui cueticue. Jeaçinona omoï finuana jitaïñedicue; ia jeacino bu finoia, Jusiñamuimona naimie facaina riidotimie jai ite. Jesucristo maremiëna jira, cai facaina caina riidoite. <sup>2</sup> Cai jeacino facaina naimie fiodaite. Iemona Jusiñamui riicallifue anamona jillobidicai. Jesucristo cai facaina fiodaite; ia nana comini facaina jiaie fiodaite. <sup>3</sup> Jusiñamui llogacinona cai inuamona, naimiëna cai uifnuana jai uifnoticai. <sup>4</sup> “Naimiëna uifnoticue” raitimiedi ie llogacinuai inoñeniä, naimiedi tainona lloraïma. Uanaicinona uifnoñede; <sup>5</sup> ia Jusiñamui llogacinuaina inotimiedi Jusiñamuina eo isiruicana jaite. Naimiëna cai isiruillamona, naimiëna cai nabaillana jai uifnoticai. <sup>6</sup> “Cristona nabaïdicue” raitimiedi, Cristo isoi, mare rafuena finoite.

*Cristo rafuedo jaidomoi*

<sup>7</sup> Cue isiruiiganodomoi. Creyentiäina omoï jailla facaie bie rafuena cacadomoi. Ie jira jiaie rafuena birui omoïmo cueñeiticue; <sup>8</sup> ia naicinona abido dane lloiticue. Cristo iedo jaide. Iedo jiaie jai jaidomoi. Jeaçino anamo omoï jaie illamona, jitreidinomo itomoi isoidomoi; ia Cristo rafuena omoï jai uifnuamona, useredinomo jai itomoi isoidomoi. <sup>9</sup> “Cristo rafuedo jaidicue” raitimiedi jiaie creyentena enoia, Cristo rafuedo nia jaiñede. Jitreidinomo naimie nia ite isoide. <sup>10</sup> Jiaie creyentena bu isiruia, Cristo rafuedo raise jaide. Iedo naimie jaia, jiaimiëna jeacinona finotañeite; <sup>11</sup> iadedi jiaie creyentena bu enoia, jitreidinomo nia ite isoide. Jeaçino anamo nia ite. Uisinidimie ie jaillinona raise uifnoñena isoi, Jusiñamui dine rillena raise uifnoñede. Ie isoi abina uifnoñede.

<sup>12</sup> Cue uruiäi isoi cue mamecaomoi. Cristo muidona omoï jeacino Jusiñamui jai dotajamona, nana omoïmo bie cartana cueticue.

<sup>13-14</sup> Einamac, Jusiñamuina are omoï jai inuamona, omoïmo bie cartana cueticue. Naimie nano dofoconi jaca ite. Coniruëni, jeacinona finoñellena omoï comeciäina ocuiñuamona, Jusiñamui uai omoï comeciäimo raise itabillamona, maraiñedimiëna omoï jai anafetitaja jira, omoïmo bie cartana cueticue. Naimiedi Taife. Uruiaie, Jusiñamui uaina omoï como inuamona, omoïmo bie cartana cueticue. <sup>15</sup> Omoï ecimo maraiñede rafuena ebiruiñeno. Iena bu ebirua, cai Moo Jusiñamuina isiruiñede. <sup>16</sup> Cai comeciäimo ite maraiñede jitaillacinodi Jusiñamui iëñede. Cai uisido ebire jaide rafuedi Jusiñamui iëñede. Raruiaie diga, abi ieduaçinodi Jusiñamui iëñede. <sup>17</sup> Jusiñamui iëñede rafue jaca fuite. Naie isoide rafuedo jaidinodi jiaie faifitimaci; iadedi Jusiñamui jitaillacinona finodimie Jusiñamui illanomo jaca ite.

*Cristona abi caitadino rafue*

<sup>18</sup> Cue uruiaí isoidomoi. Jesucristo abido billirui iaiei jai ite. Nanoca Cristona abi caitadimie billena jai fididomoi. Ailluena Cristona abi caitadino birui jai bairedimaci. Iemona Jesucristo abido billirui iaiei illana jai uifnotomoi. <sup>19</sup> Cai creyentiaí motomo nano itimaci; ia Cristo dibeimo naimaci ifhena jira, naimaci llofuiana cai nafuefena jira, cai motomo birui febiñedimaci. Caímona naimaci jailla jira, Cristomo naimaci duiñenana jai uifnoticai. <sup>20</sup> Jesucristomona Jusiñamui Jorefona jai omoi feifua jira, nana omoi Jusiñamui dibeimo ite rafuena jai uifnotomoi. <sup>21</sup> Ie jira uanaicinona bu llofueia, iena jai uifnotomoi. Uanaifhedicinona bu llofueia, iena jai uifnotomoi.

<sup>22</sup> Tainona llofuerainina ja cueiticue. “Cristo cai jilloitaraimañede” llotinodi taino llofueraini. “Jusiñamuidi cai Mooñede” llotinodi taino llofueraini. “Jesúdi Jusiñamui Jitoñede” llotinodi taino llofueraini. <sup>23</sup> Cristona ifnoñedinodi Jusiñamuina jai ifnoñedimaci. Cristona ifnotino Jusiñamuina jai ifnotimaci. Jusiñamui Jorefo omoimo illamona, iena jai uifnotomoi. <sup>24</sup> Ie jira creyentiaina omoi jailla facaise omoi cacaja rafuedo ifnocana nia omoi jai. Iedo omoi ifnocana jaia, Jusiñamui Jitona raise nabaitomoi. Jusiñamuina jai raise nabaitomoi. <sup>25</sup> Jusiñamui caimo jai llua isoi, naimie diga jaca iticai. <sup>26</sup> Omoína damierie jifueiacana jira, bie rafuena jai cueiticue. <sup>27</sup> Jusiñamui Jorefona jai feifnotomoi. Omoína Jusiñamui rafuena naimie uifnotaja jira, jaiie rafuena llofuerainina jai jitaifhedomoi. Jusiñamui Jorefo uanaicinona omoína uifnotacabide. Naimie omoína uifnotaja isoi, Cristona nabaicana omoi jai. <sup>28</sup> Cristo íco abido biite. Omoi jacinaiñellena, naimiëna omoi meiruifnellena, naimiëna birui raise omoi nabai. <sup>29</sup> Jusiñamui maremiëna cai uifnuamona, nana mare rafuena finocabidino naimiemo duillana jai uifnoticai.

### 3

*Juandi Jusiñamui cominina llua rafue*

<sup>1</sup> Jusiñamui caína isiruillamona, naimie cominina jai jaidicai. Iemo omoi comeciaina facajana jitaidicue. Naimiëna naimaci uifnotena jira, Jusiñamuina ifnoñedino cai uifnoga rafuena jai raise uifnoñedimaci. <sup>2</sup> Ero, birui Jusiñamui cominidicai. Cristo dane bia, cai illena nia raise uifnoñedica; ia naimie illa isoi cai íco illena jai uifnoticai. Íco naimiëna cai cioillemona, iena raise uifnoticai. <sup>3</sup> Iemo cai ocuirillamona, naimie marena illa isoi, cai comeciá marena itataja. <sup>4</sup> Jeacinona finocana bu jaia, Jusiñamui llogacinuaina ifnoñede. Jusiñamui llogacinuaina bu ifnoñenia, jeacinona jai finode. <sup>5</sup> Jusiñamui dinena Cristo billanona, imana jai jaide. Cai jeacinona oni dotallena, enruemo naimiedi bite. Naimiemo jeacino jaca ifhena jira, jeacino dibeimo naimie jaca ifhede. <sup>6</sup> Naimiëna nabaidimiedi jeacino finocana jaiñede. Jeacinona finocana jaidimiedi Cristona nia raise cacaiñede. Naimiëna nia raise uifnoñede. <sup>7</sup> Cue uruiaí isoidomoi. Cristo llua isoi tainona llofueraini birui itimaci. Jeacino finuana rairuifhedimaci. Naimaci omoína jifueñellena, abina rairui. Jesucristo jaca maremie. Mare rafuena finocana cai jaia, naimie isoi marenitica; <sup>8</sup> ia jeacino finocana bu jaia, Taifemo duide. Nano dofomona Taifedi jeacino finocana jaide. Ie jira Jusiñamui Jito bite, Taife rafuena anafetitallena. <sup>9</sup> Naimiemo Jusiñamui uai illamona, Jusiñamui cominina jaidimiedi jai jeacinona finocana jaiñede. Jusiñamui cominina jaillamona, jeacino finocana naimie jainide. <sup>10</sup> Iemona Jusiñamui dibeimo itinona raise uifnoticai. Taife dibeimo itinona jai raise uifnoticai. Mare rafuena finocana jaiñedimie Jusiñamuimo duiñede. Jiaie creyentena isiruifhedimie Jusiñamuimo jai duiñede.

*Coninina cai isiruilla rafue*

<sup>11</sup> Creyentiaina omoi jailla facaise: “Coninina isirui” raillana cacadomoi. Jiaie creyentiaina nia omoi isiruifhena, Jusiñamuimo nia duiñedomoi. <sup>12</sup> Caín micorimona cai fueua. Naimie ie amana isiruifhena jira, Taife naimiëna ramo faiamona, ie amana meinete. Ie ama Jusiñamui jitailla rafuena finouide; ia Caín micorí Jusiñamui jitailla rafuena finoñede. Uradoillamona ie amana meinete. <sup>13</sup> Ie isoide. Jusiñamui jitailla rafuena birui cai finuamona, Jusiñamui dibeimo ifhedinodi caína enoidimaci. Ieri jacinaiñeno. <sup>14</sup> Cristona nia cai ifnoñena facaise jeacino anamo cai illa jira, Jusiñamuimona fisiruillano isoidicai. Jiaie creyentena cai isiruia, Cristomo jai cai duillana jai uifnoticai; ia jiaie creyentena bu isiruifhena, jeacino anamo naimie nia ite. <sup>15</sup> Jiaie creyentena bu enoia, naimiemo ie meinelle uai jai ite. Naie isoidimie Jusiñamuimo nia duiñede. <sup>16</sup> Cristomona cai fueua. Naimie jitailla jira, cai facaina fiodaite. Iemona jiaie creyentiaina cai isiruillano uifnoticai. Ie jira naimaci facaina naimaci ramo jiriñellena fiodaicanicitica. <sup>17</sup> Jiaie creyentiaina cai isiruillamona, naimacina canoiticai. Omoimo ra ia, jiaie creyentemo ra ifhena, naimiëna omoi canoñenia, Jusiñamuina raise isiruifhedomoi. <sup>18</sup> Cue uruiaí isoidomoi. “Jamai uaido jiaie creyentiaina isiruifhena” cai raiñena; iadedi cai finoca rafuëmona naimacina cai canua.

*Jusiñamuimo jaciruiñeno juredicai*



<sup>19</sup> Jiaie creyentiaina isiruicana cai jaja, Jusiñamui cominina cai illana raise uifnoticai. Jusiñamui muidona cai comeci uri ite. <sup>20</sup> Cai comecimo iticinona uifnoticai. Siñonamiēna jira, Jusiñamui iena jiaie uifnote. <sup>21</sup> Cai comecimo jeacino iñenia, Jusiñamuimo jaciruiñeno jüredicai. <sup>22</sup> Naimie llogacinona cai inoia, naimie jitaillacinona cai finoia, naimiemo cai jicaca rafuena birui feifnoticai. <sup>23</sup> Naimie Jito Jesucristo cai inuana jitaide. Cristo llua isoi, coninina cai isiruillana jiaie jitaide. <sup>24</sup> Naimie llogacinuaina cai inoia, naimiēna nabaidicai. Caina jiaie nabaide. Naimie Joreño caimo illamona, naimie caina nabaillana jai uifnoticai.

## 4

### *Juan tainona llofuerainina llua rafue*

<sup>1</sup> Omoina isiruiticue. Naga llofueraima uaina inoñeno. Ailluena tainona llofueraini birui illa jira, Jusiñamuimona naimaci feifoga uaina nica naimacina facaci: <sup>2</sup> “Jusiñamui dinena Jesucristo billanona, imana jaide” naimaci lloia, Jusiñamuimona naimaci uaina otimaci; <sup>3</sup> ia “Jusiñamui dinena Jesucristo biñede” naimaci lloia, Jusiñamuimona naimaci uaina oñedimaci. Cristona abina caidaimiēmona naimaci uaina otimaci. Naimie billena jai fididomoi. Comini comeciaina feidocana birui jaidimaci. <sup>4</sup> Ero, Jusiñamuimo jai cai duillamona, Jusiñamui caimo ite. Taino llofueraini dibeimo omoi jaiñena jira, naimaci llofuiana oñedomoi. Naie taino llofuerainimo Taife ite; ia Jusiñamui Taife baifemo faite. <sup>5</sup> Naie tainona llofueraini Jusiñamuina inoñedinomo duidimaci. Naimaci ecimo ite rafuena llofecabitimaci. Jusiñamuina inoñedino naimaci llofuiana ebruitimaci. <sup>6</sup> Jusiñamuimo jai duidicai. Jusiñamuina inotino cai llofuiana cacaacadimaci; ia Jusiñamuina inoñedino cai llofuiana cacaacañedimaci. Iemona Jusiñamui uaina llofuerainina uifnoticai. Iemona tainona llofuerainina jiaie uifnoticai.

### *Jusiñamui caina isiruilla rafue*

<sup>7</sup> Omoina isiruiticue. Coninina cai isiruilla. Jusiñamui caina isiruillamona, caina jiaionona isiruitade. Ie isoi isiruitinodi Jusiñamui comini. Jusiñamui rafuena uifnocana jaidimaci. <sup>8</sup> Jusiñamuimo cai duillamona, caina jiaionona naimie isiruitaja jira, jiaionona isiruiñedimiedi Jusiñamui rafuena nia uifnoñede. <sup>9</sup> Jusiñamui caina isiruillamona, ie dajede Jito eniruemo orede. Naimie fiodaillamona, Jusiñamui dine jaca iiticai. Ie finoca rafuēmona Jusiñamui caina isiruillana jai uifnoticai. <sup>10</sup> Jusiñamuina cai isiruillana ñañedecue; ia Jusiñamui caina isiruillana ñaiticue. Cai jeacino facaina fiodaillena, ie Jito eniruemo orede. Iemona cai jeacinona feitate. Iemona isiruillana raise uifnoticai. <sup>11</sup> Caina Jusiñamui isiruilla isoi, coninina cai isiruilla. <sup>12</sup> Buna Jusiñamuina jaca cioifede; iadedi coninina cai isiruillamona, Jusiñamui caimo illana jai uifnoticai. Naimiēna isiruicana jiaie jaidicai. <sup>13</sup> Naimie Joreño caimo itatajamona, naimiēna cai nabaillana uifnoticai. Caina naimie nabaillana jiaie uifnoticai. <sup>14</sup> Bie rafuena jiaie uifnoticai. Jusiñamui ie Jitona eniruemo jiaie oretate. Naimiēna inoñedinona jilloitallena, naimiēna oretate. Naimie Jitona cidicai. Ie jira iena birui lloticai. <sup>15</sup> “Jusiñamui Jitodi Jesús” llotimiedi Jusiñamuina nabaide. Jusiñamui naimiēna jiaie nabaide. <sup>16</sup> Ie jira Jusiñamui caina isiruillana uifnoticai. Caina jiaionona naimie isiruitade. Iedo cai jaillamona, caina nabaide. Naimiēna jiaie nabaidicai. <sup>17</sup> Iemona Jusiñamuina isiruicana jaiticai. Naimie uicomo ico nana cai ille facaise naimiēna jaciruiñeiticai. Jusiñamui Jitona Cristo illanona, Jusiñamui cominina cai jiaie illanona, naimiēna birui jaciruiñedicai. <sup>18</sup> Jusiñamuina cai isiruia, naimiēna jaciruiñedicai. Eo raise naimiēna cai isiruia, ¿niese naimiēna jaciruiticai? Naimiēna cai jacirua, naimie caina duere finuana jaciruiticai. Jusiñamuina jaciruitimiedi Jusiñamuina nia raise isiruiñede. <sup>19</sup> Nano Jusiñamui caina isiruilla jira, caidi naimiēna isiruiticai. <sup>20</sup> “Jusiñamuina isiruiticue” raitimiedi jiaie creyentena enoia, jai taino llote. Creyentena ciodē; ia naimiēna isiruiñede. Jusiñamuina cioifede. ¿Niese ie cioifenamienā isiruite? <sup>21</sup> Jusiñamui iena caimo jai llote: “Cuenta isiruitimie jiaie creyentena jiaie isiruite”. Ie jira coninina isirui.

## 5

### *Taife ie rafuena anafefitaticai*

<sup>1</sup> Jusiñamuimona Jesús billana cai inoia, Jesús cai Jilloitaraimana cai inoia, Jusiñamui cominina jaidicai. Jusiñamuina cai isiruia, nana naimie cominina jiaie isiruiticai. <sup>2</sup> Jusiñamuina cai raise isiruia, naimie llogacinuaina cai inoia, naimie cominina jiaie isiruiticai. <sup>3</sup> Jusiñamuina cai isiruia, naimie llogacinuaina jiaie jai inoticai. Naimie uai raise inuamona, iena finollena sefuiruiñedicai. <sup>4</sup> Jusiñamui dibeimo itinodi Taife ie rafuena anafefitaticai. Cristona cai inuamona, Taife ie rafuena anafefitaticai. <sup>5</sup> Jesúdi Jusiñamui Jitonana cai inuamona, Taife rafuena anafefitaticai.

### *Jesucristodi Jusiñamui Jito*

<sup>6</sup> Jesucristona dane ñaiticue. Naimiedi Jusiñamui Jitona ñnoticai. Naimie bautizajamona, naimie fiodaillamona naimiedi Jusiñamui Jitonana uiñoticai. <sup>7</sup> Uanaicinona naimie uiñuamona, Jesucristo bautizaja facaise Jusiñamui Joreño caina iena jiai uiñotade. <sup>8</sup> Jusiñamui Joreñomona, Jesús bautizajamona, Jesús fiodaillamona, Jesúdi Jusiñamui Jitonana raise uiñoticai. <sup>9</sup> Jesús bautizaja facaise “Jesúdi cue Jito” Jusiñamui caimo llote. Jesúna comini lloia, iena feiñoticai. Comini llua baifemo Jusiñamui llua faia jira, Jusiñamui llua jiai ua feiñoticai. <sup>10</sup> Jesúdi Jusiñamui Jitonana cai ñnuamona, cai comeciai daje isoi lloide; ia Jusiñamui ie Jitona llua ñnoñedinodi: “Jusiñamui taino llote” raitimaci. <sup>11</sup> Biena ñaiticue. Jusiñamui naimie diga caina jaca itataiacade. Naimie Jitona cai ñnuamona, iese caina jai itatate. <sup>12</sup> Jusiñamui Jitona ñnotino Jusiñamui diga jaca iitimaci; ia naimiena ñnoñedino Jusiñamui diga jaca iñeitimaci.

*Jusiñamui caina raise uiñote*

<sup>13</sup> Jusiñamui diga ico omoi jaca illena omoi raise uiñollena, bie cartana jai cueticue. <sup>14</sup> Jusiñamuina cai ñnuamona, naimiena jai jaciruiñedicai. Naimiemo cai jüia, naimie jitailla isoide rafuena cai jicaia, naimie caina cacajana raise uiñoticai. <sup>15</sup> Iese cai jüia, naimie jaca fairuana jiai uiñoticai. <sup>16</sup> Jiaie creyente jeacino finuana omoi cioia, naimie facaina Jusiñamuimo jüi. Iemona Jusiñamui dibeimo naimiena dane itataitomoi. Jusiñamui rafuena jamaidimie facaina omoi jüana lloñedicue. Naimie faificana jaiacade. <sup>17</sup> Jusiñamui llogacinona bu ñnoñenia, jeacino jai finode; ia naimie facaina omoi jüia, Jusiñamui iena feitaite. Faificana jaiacadimie facaina omoi jüana lloñedicue. <sup>18</sup> Jusiñamui comini jeacinona finocana jaiñedimaci. Naiemona Cristo caina eenote. Ie jira Taife caina duere finonide. <sup>19</sup> Jusiñamuimo jai duidicai. Naimie anamo jai iticai; ia naimiena ñnoñedino Taife anamo jai itimaci. <sup>20</sup> Jusiñamui Jito jai eniruemo billana uiñoticai. Iemona caina nanoca Jusiñamuina uiñotade. Naimiena cai ñnuamona, nanoca Jusiñamuimo jai duidicai. Jesucristomo jiai jai duidicai. Ie jira Jusiñamui diga ico jaca iiticai. <sup>21</sup> Cue uruijai isidomoi. Daje rafuena nia lloiticue. Jiraraïmona abina rairui. Jusiñamui ieñede rafuedo omoi jaiñeno. Mai. Juandicue.

## JUAN IE EMODOMO ORETAGA RABE

### *Uanaicinona coninina cai isiruilla*

<sup>1</sup> Juandicue. Creyentiaina sedaraimadicue. Ñoo, ¿nie isidio? Cue uaina o dine oredicue. O uruiaimo cue uaina jai oredicue. Jusiñamui ona jai fetuamona, Cristo ie uanaicinona cue uiñua jira, omoina isiruiticue. Nana naie uanaicinona uiñotinodi omoina isiruitimaci. <sup>2</sup> Naie uanaicinona cai uiñua jira, omoina isiruiticai. Iena uiñocana jaca jaiticai. <sup>3</sup> Cai Moo Jusiñamui ie Jito Jesucristo diga, caina jaca duenaite. Iaimai caina jaca uri itaite. Uanaicinona cai uiñuamona, iaimaiaina cai isiruillamona, iese iiticai.

<sup>4</sup> Caimo cai Moo lua isoi, uanaicnodo o uruiaimona dajerie jailla jira, iobidicue. <sup>5</sup> Ñoo, daje rafue omo lloiacadicue. Bie rafuena navui uiñotio. Cristo rafuena nano cai ñnoia, bie rafuena uiñotica. Coninina cai isiruillana ñaiticue. <sup>6</sup> Iena ñaiacadicue. Coninina cai isiruillanona, Jusiñamui llogacinona ñnocana jaidicai. Cristona nano omoi ñnoia, Jusiñamui llucinona cacadomoi. Coninina cai isiruillana cacadomoi.

### *Diga taino lloraini ite*

<sup>7</sup> Diga taino lloraini illa jira, iena ñaiticue. Jesucristo monamona jai billanona, imana jaiñenana llofuecabitimaci. Bu iese llofueia, cominina jifue. Naimiedi Cristona abi caitadimie. <sup>8</sup> Cristo rafuedo omoi jailla jira, Jusiñamuimona buena omoi faifñellena, omoi abina rairui. Jusiñamuimona ibana feñotomoi. <sup>9</sup> Cristo llogacinona bu fañonocai, Cristo rafuedo bu jaiñenia, Jusiñamuina ua uiñofede; iadedi Cristo rafuedo bu jai, cai Moo Jusiñamuina uiñote. Ie Jitona jai uiñote. <sup>10</sup> O jofomo Cristo rafuedo jaiñedimie bia, Cristo rafuena cue llofui isoi naimie llofueñenia, naimiena nafueño. “Jusiñamui ona canuamona, marena o jai” lloño. <sup>11</sup> “Marena jai” o lloia, naimie marañede rafue facaina jai itio.

### *Rafuena nia lloiacade*

<sup>12</sup> Diga rafue ite omoimo cuellena; iadedi allue cartana cueñeticue. Omoi dine raire cue illemo ocuiridicue. Danomo cai rillamona ñaiticai, cai comeciai caimarecailena. <sup>13</sup> O dine o euño uruiaidi imaci uaina oredimaci. Naiñaiñodi Jusiñamui fetocañaiño. Mai. Juandicue.

## JUAN IE EMODOMO JIAIE ORETAGA RABE

### *Gayo mare rafue finocana jaide*

<sup>1</sup> Juandicue. Creyentiaina sedaraimadicue. Gayo, bie carta o dine oredicue. ¿Nie isoidio? Cristo ie uanaicinona coco uifua jira, ona isiruiticue. <sup>2</sup> Cue isiruigamedio. Nana o finua rafue marena jaillana jitaidicue. O ecairenana jiai jitaidicue. O comeci marena illana jai uifnoticue. <sup>3</sup> Cue dine dajerie creyentiai bite. Uanaicinodo omoi jaillana llote. Cristo rafuedo omoi jaillana llote. Ie jira iobidicue. <sup>4</sup> Uanaicinodo omoi jailla jira, eo iobidicue. Cue muidona Cristona omoi inua jira, cue uruiaidomoi isoidomoi. Uanaicinodo omoi jailla jira, eo iobidicue. <sup>5</sup> Cue isiruigamedio. Naga icaifio jiaie creyentiaina o canoia, eo mare. Nia o uifnoega creyentiai o illanomo ria, naimacina o canoia, ua eo mare. <sup>6</sup> Naie isoide creyentiaina o isiruillana jiai fididicue. Rollena creyentiai ofia, ona marena naitimaci. Naimaci jaillanomo naimaci jiaia, naimacina o canoia, Jusiñamui jitailla isoi, ua eo mare. <sup>7</sup> Naimie rafue llua muidona, jai macaritimaci. Jusiñamuina uifnoedinomona jaca buena feifnoedimaci. <sup>8</sup> Creyentiaina cai illa jira, naimacina cai canua. Naimacina cai canua jira, uanaicinona llocana jaidicai.

### *Diótrefes marañede*

<sup>9</sup> O dine ite creyentiaimo cartana jai oredicue. Diótrefesna janore ñaiacadicue. Naimiedi eo uicoidimie. Naimiedi cue uaina uifnoiacañede. <sup>10</sup> O dine cue ria, naimie finoca rafuena omoimo lloiticue. Cuena jeare ñaite. Jiaie illanomona bite creyentiaina feifnoiacañede. Naimaci feifnuana rairuide. Roracomo naimaci bia, naimacina jino dotade.

<sup>11</sup> Jeacino finoraini isoi omoi ifeno; iadedi marecinona finoraini isoi omoi i. Marecino finocabidimiedi Jusiñamui ie. Jeacino finocabidimiedi Jusiñamuina ua uifnoñede.

### *Demetrio marena ite*

<sup>12</sup> Nana creyentiaidi Demetriona marena naitimaci. Uanaicinodo naimie jaide. Iese naimiena jiai naiticai. Cai llucinodi uanaicinona uifnotio.

### *Rafuena nia lloiacade*

<sup>13</sup> Diga rafuena cueiacadicue; iadedi cueñeiticue. <sup>14</sup> Raire ona cue cioillemo ocuridicue. Ie mei naiticoco. <sup>15</sup> Uri o i. Cue dine ite o nabaiñiaidi uaina omo oredimaci. O dine ite cue nabaiñiaimo cue uaina oredicue. Mai. Juandicue.

## JUDAS ORETAGA RABE

*Judadi Jusiñamui fetocanomo cartana orede*

<sup>1</sup> Cue nabaiñiai, bie carta omoi dine oredicue. ¿Nie isidomoi? Judadicue. Ie rafuena llollena, Jesucristo dibeimo jai maijdicue. Jacobo cue ama. Jusiñamui omoina jai fetuena cue uiñuamona, bie cartana oredicue. Cai Moo Jusiñamui omoina isiruite. Jeacinona omoi finoí raillano, Jesucristo omoina jai sedade. <sup>2</sup> Jusiñamui omoina eo duenaillana omoi uiñocana omoi jaillana jitaidicue. Naimie omoi comeciaina raise uri itatajana omoi uiñocana omoi jaillana jitaidicue. Naimie omoina eo isiruillana omoi uiñocana omoi jaillana jitaidicue.

*Tainocinona llofueraini ite*

<sup>3</sup> Cue isiruigano, omoimo Jusiñamui caina jai jillotaja rafuena iocire cueiacadicue; iadedi jiaie rafue birui illa jira, omoimo cueticue. Jusiñamuimona cai feiñoga rafuena omoi eo riiduna jitaidicue. Naie rafuena Cristo oretaganomona cacadicai. Naie rafuena meidonidicai. Ieconí duide. Jusiñamui jiaie rafuena lloñeite. <sup>4</sup> Caimo ite rafuena omoi eo riiduna jitaidicue. Cai creyentiai motomo dajerie tainocinona llofueraini illa jira, iena jitaidicue. Uanaicinona llofuecana naimaci illamo cai comeciaina facadicai; iadedi Jusiñamui jitaillacinona finoñedimaci. “Jusiñamui caina duenaillamona, jeacino finocana cai jai, cai jeacinona oni dotaite” llofuecabitimaci. “Cai jeacino facaina caina duere finoñeite” llofuecabitimaci. “Jeacino finocana cai jaiacania, caimona mare” llofuecabitimaci. “Jesucristo cai Namana” llofueñedimaci. Naimie lloga rafuedo jaiacaiñedimaci.

“Naimaci isoidinona duere finoiticue” Jusiñamui jiaie llote. Naimie duere sefuillacino anamo jai itimaci.

<sup>5</sup> Iemona omoi raise fueollena, bie rafuemo omoi comeciaina faca. Bie rafuena navui llofueticai. Iena raise cacadomoi; iadedi iena dane uibiño. Tena lloiticue. Ero, bie eniruemo naimaci billena, Egiptomona Jusiñamui cai jaiagaina bitatate. Naimiena naimaci ñinoñena jira, bie eniruemo riñedimaci; iadedi Jusiñamuí jofue iñenanomo naimaci fiodaillena llote. Iemona naimaci fiodaitimaci. Ie isoide. Naimiena birui omoi ñinoñena, omoina duere finoite. <sup>6</sup> Ero, bie rafuemonona omoi fueua. Jusiñamui ecimo ite jaienisaimona dajerie imaci illanona jiaie jitañedimaci. Naimie isoi iacadimaci. Naimaci illano naimie ecimo jiaie itimaci. Naimaci jitailla rafuena naimaci finollena, naimie ecimo illana fainonocaidimaci. Iemona naimie naimacina jai oni dotade. Naimie illanomo dane iñeitimaci. Naimacimo ite uai jai iñede. Naimie ricacallafue anamo jai itimaci. Naimie dine nana comini illurui ia, naimacina duere finoite. Naimacimona omoi fueua. Jeacinona Jusiñamui dibeimo itino finoia, Jusiñamui naimacina duere finoite. <sup>7</sup> Ero, bie rafuemonona omoi fueua. Sodoma railla nairai micoriai marañedicinona jiaie eo finouidimaci. Gomorra railla nairai micoriai daje isoidimaci. Nainomo ianori ite nairai daje isoidimaci. Naimaci aifede riñonai diga itimaci. Nairaiñuai iniñede iñiaí diga itimaci. Coninina aifedotimaci. Iemona Jusiñamui naimacina jiaie duere finode. Nana naimaci illanona raise jiaie jobaitate. Naimacimona omoi fueua. Jusiñamui nana jeacinona finodinona duere finoite.

<sup>8</sup> Naie tainocinona llofueraini daje isoidimaci. Nicairillafuedo jaillamona, ebena jaidimaci. Naimaci abimo jearede rafuena finodimaci. Jusiñamui uaina jamaidimaci. Jusiñamui jaienisaina jeare ñaitimaci. <sup>9</sup> Miguelna mameciredre jaienici isoi iñedimaci. Miguel Jusiñamui nanoca jaienici. Moisés micori fiodailla mei, Miguel Moisés micori abina raicade. Taife diga Moisés micori abina uaitate. Taife Moisés micori abina bairocade. Miguel iena jiai jitaide. Miguel Taife diga riire ñaite; iadedi Taifena jeare ñañede. Miguel ie comecina facañede: “Cuemo ite uai Taifena oni oretallena”; iadedi naimiemo llote: “Jusiñamui ona duere finoite”. <sup>10</sup> Naie taino llofueraini iese iñedimaci. Jusiñamui jaienisaina jeare ñaitimaci. Ocainai imaci comeciái uiñuacinodo jailla isoi, naie taino llofueraini imaci uiñoga rafuedo jaidimaci. Iemona ja muidomo faifitimaci. <sup>11</sup> Caín micori isoi naimaci illa jira, Jusiñamui naimacina duere finoite. Jusiñamui jitailla rafuena Caín micori finoacaiñena jira, ie ama micori diga icirite. Icirillamona Caín micori ie ama micorina jiaie meinete. Caín micori rafuedo naie taino llofueraini jaidimaci. Naimaci jitailla rafuena naimaci finua jira, Jusiñamui naimacina duere finoite. Balaam micori isoi naimaci illa jira, naimacina duere finoite. Ucube ollena, Balaam micori uanaicinona jiaie lloñede; iadedi cai juduái cominina jeacinona finotate. Ucube ollena, naie taino llofueraini Balaam micori rafuedo jaidimaci. Uanaicinona jaca llofueñedimaci. Coré micori isoi naimaci illa jira, Jusiñamui naimacina duere finoite. Moisés micori uaina Coré micori ñinoñena jira, Jusiñamui naimie micorina meinete. Jusiñamui uaina naie taino llofueraini ñinoiacaiñena jira, jiai faifitimaci. <sup>12</sup> Dani

omoi nabairillamona danomo omoi guia, naie taino llofueraini jiai bitimaci. Naimaci illa jira, raise nabairinidomoi. Meiruiñeno eo guitimaci. Dani naimaci comecimo ite jitaillacinona finodimaci. Omoina canoacaiñedimaci. Maraiñedimaci. Monamo jamai ite uillie isoidimaci. Aifi naie isoide uillie oni ñaitade. Ie mei noci deide. Noci deiñenia, enirue saferena jira, buena sicoñede. Maraiñede. Naie taino llofueraini maraiñedimaci. Naimacimo marecino iñena jira, llisiñede riará isoidimaci. Llisilla facaise riará llisiñenia, maraiñede. Riará llisiñenia, iena oni aiñodicai. Maraiñena jira, safenaite. Naimaci maraiñena jira, naie taino llofueraini jiai safenaitimaci. <sup>13</sup> Naie taino llofueraini jearede rana finocabidimaci. Eo bagode monaillai isoidimaci. Monaillai eo bagoia, monaillai fuemo jearede rana oni ñaicosite. Ucuaina eruaillamona naiona cai macarillana uiñotica; iadedi ucudu ana feia, cai macarillana raise uiñoñedicai. Naie taino llofueraini ana fede ucudu isoidimaci. Comini uanaicinona uiñotañedimaci. Naimaci llofuaiacinomona Jusiñamui jitailla rafuedo cai raise jaillana uiñoñedicai. Jusiñamui naimacina duere finoite. Naimie illanomo jaca iñeitimaci. Jitiredinomo jaca iitimaci.

<sup>14</sup> Naimacina Enoc jaie llote. Adán micori facaisemona Enoc facaisemo Adán cominimona siete moodi comuide. Enoc llote: “Ero, cai Namadi ie ailluena jaienisai diga biite, <sup>15</sup> nana naimiena iñoñedinona duere finollena. Naimie jitailla rafuena naimaci finoñena jira, maraiñedinona naimaci finua jira, naimiena naimaci jeare riire ñaia jira, naimacina duere finoite” llote. <sup>16</sup> Naie taino llofueraini creyentiaina sedarainina uaitaside. Jusiñamuina jeare ñaoidimaci. Dani naimaci jitailla rafuena finuidimaci. Eo abina biruidimaci. Jiaie cominimona rana jamai feiñollena, nano naimacina iobitadimaci. Iobitajano, rana jamai jicadimaci. Naimaci isoi omoi iñeno.

#### *Cristona iñotonomo llucino*

<sup>17</sup> Cue isiruiga amatiai, cai Nama Jesucristo oretagano jai llogacinona omoi comeci. <sup>18</sup> Raitimaci: “Jesucristo ñia abido biñena facaiseconi naimie uaina iñoñedino jaca iitimaci. Naimaci jearede jitaillacinodo jaitimaci” raitimaci. <sup>19</sup> Naie taino llofueraini comini comeciai daje isoi lloillana itatañedimaci. Jusiñamui dibeimo iñede rafuena gaidimaci. Jusiñamui Joreño naimacimo iñede.

<sup>20</sup> Cue isiruigano, naimaci isoi omoi iñeno; iadedi Jusiñamui rafue iñocana mai omoi jai. Naie rafuedi mare. Jusiñamui Joreño omoina canuacínodo Jusiñamuimo omoi jii. <sup>21</sup> Jusiñamui omoina isiruillacinona uiñocana omoi jai. Jusiñamui ecimo cai jaca illemo fecuise ocuiri. Caina cai Nama Jesucristo duenailla jira, naimie ecimo jaca iitica. <sup>22</sup> Diga comini naie taino llofueraini rafuedo jaidimaci. Iemona dajerie Jusiñamui uaina raise ñia iñoñedimaci. Naimacimo llono: “Mai iño. <sup>23</sup> Dajerie cominina Jusiñamui duere sefuillacinomona jillote”. Taino llofueraini rafuedo naimaci jailla jira, ñadi faiftimaci. Naie rafuedo naimaci jailla jira, damierie jeacinona eo finodimaci. Jeacinona naimaci finua isoi omoi finoi raillanona, naimacina jaciruoicaida duenai.

#### *Jusiñamuimo iobillacinona cai fecacabillasa*

<sup>24</sup> Jusiñamuidi omoina jeacinona finoñenana itatarede. Naimie uicomo omoina ico itataite. Omoina jeacinona omoi jaca finoñedena nainomo itataite. Nainomo iocire iitomoi. <sup>25</sup> Jusiñamuidi jaca dajede. Cai facaina cai Nama Jesucristo fiodaillamona, caina cai jeacinomona jai jillotate. Jusiñamuimo iobillacinona cai fecacabillasa. Naimiedi siño. Naimie uai ebirede. Nana radi naimie anamo ite. Naga rana naimie ocuillena, naimiemo siño uaidi ite. Jaie jaca iese naimiedi ite. Birui jaca iese naimie ite. Ico jaca iese naimie iite. Mai. Macaibaite. Judadícue.

## JUAN ICO SUILLE RAFUENA CUIAFUE

### *Jesucristo ico suille rafue lluana cueticue*

<sup>1</sup> Jesucristona cueticue. Juandicue. Jesucristo facaina maijicabidicue. Ie dibeimo itinomo iena Jesucristo lollena, Jusiñamui naimiena bie rafuena uñotade. Jaiiruido ico ebena suille rafuena uñotade. Cuen a iena uñotallena, iena cuemo lollena, ie jaienici cue dine oretate. <sup>2</sup> Jusiñamui cuena birui uñotaga rafuena jai cueticue. Jesucristo cuemo birui lloga rafuena jai cueticue. Nana birui cue ciua rafuena jai jai cueticue. <sup>3</sup> Bie ico suille rafuena ado facacabidinodi caimare iitimaci. Biena cacacabidino iena inuamona, caimare iitimaci. Bie rafue suillirui iaiei illa jira, iemo raise cacarei.

### *Siete creyentiaí illanuaimo bie carta oredicue*

<sup>4</sup> Asia railla eniruemo ite creyentiaí, omoi dine cue uai oredicue. Siete illanomo omoi illamona, bie rafue omoi uñuana jitaidicue. Iena omoi uñollena, biena cueticue. Jusiñamui ie Joreño diga, Jesucristo diga, omoína duenaicabide. Omoína uri itatacabite. Iena omoi uñocana mai omoi jai. Jusiñamui jaie jaca ite. Birui naimie jaca ite. Ico jaca iite. Ie Joreño naimie abimo illamona, omoína bie rafuena raise cacataite. Iena inotaite. <sup>5</sup> Ie Moo uaina raise inuamona, eniruemo naimie illa facaise Jesucristo ie Moo rafuena raise atona llouide. Naimie fiodaite; iadedi naiemona jillode. Naimie dane fiodañena jira, nana illacomini naimie anamo jai itimaci. Caina jaca isiruite. Naimie fiodaillamona caina cai jeacinomona jai jillobitade. <sup>6</sup> Naimie fiodaillamona naimie cominina jaidicai. Naimie anamo illaima isoi caina sedallena, caina itatate. Naimie cominina cai illa jira, naimie Moo Jusiñamui diga atona birui ñairedicai. Ie muidona naimiemo iobillacinona jaca cai fecacabillasa. Naimie caina sedajasa. Iena jitaidicue.

<sup>7</sup> Ero, eniruemo uillie motodo Jesucristo biite. Naimie bia, nana comini naimiena cioitimaci. Naimiena jaie meinete nairaidi naimiena cioitimaci. Duere sefuillana jacinaillamona nana comini eecuitimaci. Iese jaca suite.

<sup>8</sup> Cai Nama Jusiñamui cuemo lote: “Jaca bue nia iñenia, jaie jaca iticue. Nana rana finodicue. Nana ra cue uaido icana jaide. Birui iticue. Nana ra fuilla mei, jaca iiticue. Siño jitodicue”.

### *Juan Cristona ciodé*

<sup>9</sup> Daajena Cristomo cai duilla jira, omoi amadicue isoidicue. Cristomo cai duillamona, birui duere sefuidicai. Cominina ico naimie sedaia, nainomo iiticai. Naimie cai comeiciaina ocuiñotajamona iemo birui ocuiridicai. Jusiñamui uaina cue llua jira, Cristo rafuena cue llua jira, duere cue sefuillena, Patmos railla uasimo birui iticue. Cárcelmo illa isoi duere sefuillena, illacomini bene cuena birui oredimaci. <sup>10</sup> Jusiñamuina cue sedajamona, naimie Joreño cuena namatajamona, inifenamona nicairilla isoi cue jinafo dine damie ado llua cacadicue. Trompeta isoi ie uaidi ficirede. <sup>11</sup> Cuemo lote:

—O cioacalle rafuena cueno. O cacaacalle rafuena cueno. Ie mei bie siete illanuaimo iena oreta: Efesomo, Esmirnamo, Pérgamomo, Tiatiramo, Sardimo, Filadelfiamo, Laodiceamo. Dese illanuaimo oreta —lote.

<sup>12</sup> Cuemo llotimiena cue cioillena, jinafo dine erodaticue. Siete oromona finoca lampariniaí ciodicue. Naga lamparin ie oromona finoca rairacomo raide. <sup>13</sup> Naie lampariniaí motomo imana eruaidimiena ciodicue. Naimiedi Cristo. Areroína jitade. Oromona finoca cinturóna jitade. <sup>14</sup> Naimie ifotirai userede iniroi isoi eo userede. Naimie uisi irai boa isoi erauide. <sup>15</sup> Naimie eillidi bronce eo dua isoi quenirede. Naimie uai aillue ille tua isoi eo ficirede. <sup>16</sup> Ie nabeillimo siete ucuduna lliide. Naimie fuemo nagafebei eo jairede lloebi ite. Naimie uieco eo quenirede, jitoma eo lligañua isoi.

<sup>17</sup> Naimiena cue cuamona, naimie uicomo fiodaitimie isoi ana uaidicue; iadedi ie nabeilli diga cuena jetajamona raite:

—Cuen a jaciruiñeno. Siño jitona cue illamona, jaie jaca iticue. Ico jaca iiticue. <sup>18</sup> Jaie fiodaiticue; iadedi naiemona jaie jillodicue. Jaca iiticue. Dane fiodañeiticue. Cue uai siñona jira, comini fiodailliruina lloticue. Cuen a inoñedino fiodailla mei, naimaci joreñuaí illinona jai lloticue. <sup>19</sup> O cuemo ciua rafuena cueno. Omo cue ja lolle rafuena cueno. O ciolle rafuena jai cueno. <sup>20</sup> Ailluena rafue omo lloticue. Ona iena uñotaiticue. Cue nabeillimo siete ucuduaina ciodio. Bie siete ucuduaidi bie siete creyentiaí llofueraini isoide. Bie siete lampariniaídi bie siete illanomo ite creyentiaí isoide. Bie creyentiaína ja ñiacadicue —raite.

## 2

*Cristo Efesomo ite creyentiaimo lloga rafue*

<sup>1</sup> Cristo cuemo llote:

—Efesomo ite creyentiaimo llollena, nainomo ite llofueraimamo cue lluaña cueno: “Cue nabeillimo siete ucuduai ite. Siete oromona finoca lamariniai motomo iticue. Omoina ñaiticue. Omoï llofueraima cue anamo ite. Omoï motomo cue illamona, cuena nabaidomoi. <sup>2</sup> Omoï motomo cue illa jira, omoï illana raise uñotícue. Omoï comeciai ocuiñocana iciriñeno itomoi. Marañedicinona finoraini diga nabairiñedomoi. Omoï motomo damierie ‘Cristo oretagaca?’ raitinona facaciamona, naimaci tainona llorainina uñotomoi. <sup>3</sup> Omoï comeciai ocuiñocana jaicabidomoi. Cue muidona duere sefuidomoi; iadedi iena sefuiruñedomoi. Cuena ñinocana nia jaidomoi. <sup>4</sup> Iese itomoi; iadedi omoï abi rafue cuemona birui janore ite. Creyentiaina omoï nano jailla facaise cuena eo isiruitomoi; iadedi birui iese cuena isiruiñedomoi. <sup>5</sup> Iemo omoï comeciaina faca. Cue dibeimo dane raise i. Cuena omoï nano isiruilla facaiseconi omoï illa isoi, cue jitaillacinona birui omoï fino. Cue dibeimo omoï comeciai dane raise iñenia, omoina duere finoiticue. Iemona omoï lamparín oni uiticue. Omoï creyentiaina ñaiticue. Cue dibeimo raise omoï iñenia, jairuido omoï illanomo creyentiai iñeitimaci. <sup>6</sup> Omoina marecinona jiai lloiticue. Nicolaítas railla comini finoca rafuena gaiñedomoi. Iena jiai gaiñedicue. Eo marañede rafuena finocana jaidimaci. <sup>7</sup> Jusiñamui Joreñomona cue lloga rafue ite, omoï creyentiai iena. Bie rafue bu cacajia, iena jiai ñnua. Cuena raise ñnotinomo Jusiñamui illanomo ite riarana iiticue. Ie lillumona jaca iitimaci?” cueno.

*Cristo Esmirnamo ite creyentiaimo lloga rafue*

<sup>8</sup> Cristo cuemo llote:

—Esmirnamo ite creyentiaimo llollena, nainomo ite llofueraimamo cue lluaña cueno: “Jaié jaca iticue. Eniruemo jaié cue ia, fiódaiticue; iadedi naiemona jai jillodícue. Jaca iiticue. <sup>9</sup> Cue cominina omoï illa jira, duere sefuidomoi. Omoï duerenana uñotícue. Benomo dueredomoi; iadedi Jusiñamui mona duenidomoi. Naimie dine ico omoï ia, buerenitomoi. Damierie omoina jeare ñañana uñotícue. Naimacidi judíuai comini; iadedi cue dibeimo iñeditimaci. Taiñe anamo itimaci. <sup>10</sup> Ico omoï duere sefua, jaciruiñeno. Taiñe cárcelmo omoina damieriena itataite. Abido danomo omoï jaillena, iese omoina duere finoite. Diez digaru duere sefuitomoi. Omoï ille dinori cuena ñinocana omoï jai. Duere sefuillamona bu fiódai, cue diga jaca iite. <sup>11</sup> Jusiñamui Joreñomona cue lloga rafue ite, omoï creyentiai iena. Bie rafue bu cacajia, iena jiai ñnua. Jusiñamuidi cuena raise ñnotinona naimaci jeacino facaina ibana oñeite. Iraimo faññeitimaci; ia Jusiñamui dine jaca iitimaci?” cueno.

*Cristo Pérgamomo ite creyentiaimo lloga rafue*

<sup>12</sup> Cristo cuemo llote:

—Pérgamomo ite creyentiaimo llollena, nainomo ite llofueraimamo cue lluaña cueno: “Nagafebei eo jairede lloebi cuemo ite. <sup>13</sup> Omoï illana uñotícue. Taiñe anamo itino motomo itomoi; iadedi cuena ñnocana nia jaidomoi. Omoimona Antipas micorina navui meinetimaci. Naimie micoridi cue rafuena raise llofueuide. Naié facaise cuena fañnocaiñedomoi; <sup>14</sup> iadedi cuemona janore rafue omoï diga birui ite. Omoimona damieriedi Balaam micori llofuaiacínodo jaidimaci. Balaam micori Balac micorimo jaié llua jira, omoï jaiagai jeacino finodimaci. Balac cominimo omoï jaiagai diga nabairillena llote. Ie jira omoï jaiagai jiraraimo fecaca guillena naimaci diga guitimaci. Iemei naimacimona ainiaina otimaci. Jusiñamuina ñnoñedinomona ainiaina otimaci. Naiemona jearede rafue comuide. Omoimona birui damierie iese isoidimaci. Cuena ñnoñedinomona ainiaina otimaci. <sup>15</sup> Omoimona damierie nicolaítas railla llofuaiacínodo jiai jaidimaci. Naimaci llofuaiacínodi uañañedicino. <sup>16</sup> Naié llofuaiacínomona enemo mai omoï i. Iedo jaiñeno. Naié llofuaiacínodo jaidinomo: ‘Omoï comeciai iuai dane meido’ llono. Iena naimaci finoñenia, cue dibeimo naimaci raise iacaiñenia, cuemo ite lloebi diga cuena ñnoñedinona duere finoiticue. <sup>17</sup> Jusiñamui Joreñomona cue lloga rafue ite, omoï creyentiai iena. Bie rafue bu cacajia, iena jiai ñnua. Judíuai jaiagaímo maná railla guille cue illa isoi, cuena raise ñnotinomo monamo jai ite maná isoi iiticue. Biena ñaiticue. Imaci comeciaina ocuiñotajacinona iiticue. Cue cominina naimaci illamona, naimacimomo userede noñicina jiai iiticue. Nainomo mameci ite. Dani naiena feñotino naie mamecina uñoitimaci?” cueno.

*Cristo Tiatiramomo ite creyentiaimo lloga rafue*

<sup>18</sup> Cristo cuemo llote:

—Tiatiramomo ite creyentiaimo llollena, nainomo ite llofueraimamo cue lluaña cueno: “Jusiñamui Jitona cue illanona, bie rafue omoimomo lloiacadicue. Cue uisi irai isoi boode.



Cue eilli bronce eo dua isoi quenirede. <sup>19</sup> Omoi finoca rafuena uifnoticue. Jusiñamuina omoi isiruillana uifnoticue. Jiaie cominina omoi isiruillana uifnoticue. Cuena omoi inuana uifnoticue. Jiaie creyentiaina omoi canocabillana uifnoticue. Duere sefuidomoi; iadedi omoi comeciai ocuifnuana uifnoticue. Navui iese icana jaidomoi. Birui bai liai jaidomoi; <sup>20</sup> iadedi cuemo omoi diga rafue ite. Omoi motomo marañede riño ite. Jezabelna ñaiticue. Naiñaiña omoi oni dotañena jira, cuemo omoi diga rafue ite. Jusiñamui rafuena jina lua uai cuemo ite' naiñaiño llote. Uanaiñedicinona llofuecabilla jira, omoimona damierena jifute. Jearede rafuena llofuecabite. Omoi aiñede riño diga illana llofue. Omoi inifede ima diga illana llofue. Jiraraimo fecaca guille guillena llofue. Iena guilla jira, omoimona damierie naie jiraraina sedade. Iese naiñaiño llofuecabite. <sup>21</sup> Naiñaiño comeci uai meidollena are sedadicue; iadedi naiñaiño naie jearede rafuena fainonocaiacaiñede. <sup>22</sup> Naiñaiño duere sefuillena, naiñaiño duitaiticue. Naimaci comeciai uai naimaci meidoñenia, naiñaiño llofuacinodo jaidinona jiaie eo duere finoiticue. <sup>23</sup> Naiñaiño dibeimo itinona meineitcue. Nana creyentiaidi nana comini comeciai uaillaina ue uifnuana jiaie uifnotimaci. Nana comini comeciai facajacinona cue uifnuana jiaie uifnotimaci. Ie jira omoi finolle rafue diese cuemona duere sefuitomoi. <sup>24</sup> Jezabel llofuacinodo jaiñedinomo ja lloiticue. Taife come uifnoñega rafuena uifnote. Iena nia uifnoñedomoi. Omoimoi jiaie rafuena llofeiticue; <sup>25</sup> iadedi cue nia abido biñenia, cuemona omoi uifnoga rafuena inocana mai jai. <sup>26</sup> Cue Moomona cue uaina feifnoticue. Cuena raise inuamona, abido cue bia, cue jitaillacinona finocabidinomo cue uaina iitcue. Naie facaise cue uai diga cue anamo ite nairaiaina raise sedaitimaci. <sup>27</sup> Naimacina riire raise sedaitimaci, cue jitailla rafue naimaci finollena. Iena naimaci finoñenia, naimacina duere finoitimaci, lloedosi diga, nogo eo llaila isoi. <sup>28</sup> Cuena inotonomo monairacuduna jiaie iitcue. <sup>29</sup> Jusiñamui Joreñomona cue lloga rafue ite, omoi creyentiaie iena. Bie rafue bu cacajia, iena jiaie inua” cueno.

### 3

#### *Cristo Sardimo ite creyentiaimo lloga rafue*

<sup>1</sup> Cristo cuemo llote:

—Sardimo ite creyentiaimo llollena, nainomo ite llofueraimamo cue llua cueno: “Jusiñamui Joreño cuemo ite. Naimie Joreño omoina canocabide. Omoina sedacabide. Siete ucuduai cuemo jiaie ite. Omoi llofueraimana ñaiticue. Omoi finoca rafuena uifnoticue. ‘Cristona raise inotica’ raitomoi; iadedi omoi comeciaimona raise inedomoi. <sup>2</sup> Cue dibeimo raise dane i. Cuena dane raise inocana jai. Cuena jai fainonocaiacadomoi. Jusiñamui omoi finoca rafueri iobiñede. <sup>3</sup> Cue rafuena jiaie cacajamona, iena inotomoi. Iedo dane jai. Omoi comeciai uaina dane meido. Cue dibeimo dane raise omoi iacaiñenia, firiraíma bainino billa isoi, omoina duere finollena, ebena biitcue. Omoi dine cue billiruina uifnoñeitomoi. <sup>4</sup> Omoimona damierie jearede rafuena finocana jaiñedinomoi. Jusiñamuimona naimaci comeciai marena jira, cue dine naimaci illena, userede iniroina jitaítimaci. <sup>5</sup> Cuena inocana jaidinodi userede iniroina jitaítimaci. Cuemo ite rabenicomona naimaci mamecaina doñeiticue. Cue illanomo jaca iitimaci. ‘Naimacidi cue comini’ cue Moomo lloiticue. Naimie jaienisaimo iena jiaie lloiticue. <sup>6</sup> Jusiñamui Joreñomona cue lloga rafue ite, omoi creyentiaie iena. Bie rafue bu cacajia, iena jiaie inua” cueno.

#### *Cristo Filadelfiamo ite creyentiaimo lloga rafue*

<sup>7</sup> Cristo cuemo llote:

—Filadelfiamo ite creyentiaimo llollena, nainomo ite llofueraimamo cue llua cueno: “Mareuidimedicue. Uanacinona jaca lloiticue. David micori jitona cue illamona, illaimana cue illa jira, siño uai cuemo ite. Ie muidona cue jitailla diese cominina feifnoticue. Jusiñamui illanomo naimaci illena, naimacina feifnoticue. Cue jitailla diese cominina feifnoticue. <sup>8</sup> Omoi finoca rafuena uifnoticue. Omoina cue canua jira, jaca buna cue rafuena omoi llua itatanide. Jamai bue isoidomoi; iadedi cue rafuena inocana jaidomoi. Cuena janofedomoi. <sup>9</sup> Omoi dine damierie Taife anamo itimaci. Naimacidi judíuai; iadedi cue dibeimo inedinomoi. Tainona llocabitimaci. Ero, omoi dine naimacina cue bitatajamona, omoina cue isiruillana uifnotimaci. Cue dibeimo naimaci jailla mei, cuemo iobillacinona fecaitimaci. <sup>10</sup> Nana cuena inofedinona ico eo duere finoiticue. Iemona cuena naimaci inofenana uifnoticue. Omoi duere sefuifnellena, naie facaiseomona omoina jillotaiticue. <sup>11</sup> Eniruemo ebena abido biitcue. Cuemona ibana omoi feifnoñeni raillano, cue dibeimo inocana omoi jai. Cue dibeimo raise omoi jaiñenia, cuemona jaimie omoi facaina ibana feifnoite. <sup>12</sup> Cuena raise inotino comeciaina ocuifnotaiticue. Cue illanomo jaca iitimaci. Cuemo naimaci duilla jira, cue jiaie mamecina naimaci abimo cueitcue. Jusiñamui mamecina naimaci abimo cueitcue. Jusiñamui illano mamecina naimaci abimo cueitcue. Naimie illanodi comue

Jerusaléna mameciredede. Naimiemona, monamona ico ana biite. <sup>13</sup> Jusiñamui Joreñomona cue lloga rafue ite, omoi creyentiaia iena. Bie rafue bu cacajia, iena jiaia inua” cueno.

*Cristo Laodiceamo ite creyentiaimo lloga rafue*

<sup>14</sup> Cristo cuemo llote:

—Laodiceamo ite creyentiaimo llollena, nainomo ite llofueraimamo cue lluaña cueno: “Siño Jitodicue. Cue lloga uaina jaca finocabidicue. Uanaicinona jaca llocabiticue. Cue uaido Jusiñamui nana finode. Nana comuitate. <sup>15</sup> Omoi finoca rafuena uñoticue. Cue rafuedo jaillana nia fainonocañedomoi; ia cue rafuedo eo raise jaiñedomoi. Janore ñinocana jaidomoi. <sup>16</sup> Omoi finoca rafuena cue gaiñena jira, cuemona omoína oni dotaiticue. <sup>17</sup> ‘Ucuberedicai’ raitomoi. ‘Raruiaredicai. Nana cai jitailla ra caimo ite’ raitomoi. Cuemona iese ñedomoi. Cuemona dueredomoi; ia iena uññedomoi. Cuemona caimare ñedomoi. Cuena omoi raise ñinoñena jira, uisínidino isoidomoi. Taimiedomoi isoidomoi. <sup>18</sup> Ie jira omoína dajerie rafuena llofueiticue. Cuemona omoi eo duerena jira, omoi comeciara raise ñena jira, omoimo fiebidicinona cuemo jica. Cuemona ono. Omoi duenillena, cuemona eo mare oro isode rana ono. Omoi taimieñelle isoiñellena, cuemona omoi meiruiñellena, userede ñiroi isode ra cuemona ono. Omoi uisina cioille isoillena, cuemona manue ono. Omoi comeciaina ñaiticue. Cuena raise omoi ñinoia, buena omoi comeciaino fiebiñeite. <sup>19</sup> Cue isiruiquano cue dibeimo raise illena, naimacimo riire llocabiticue. Cue uaina naimaci ñinollena, naimacina jiaia duere finocabidicue. Ie jira cue dibeimo raise omoi i. Jecino omoimo ia, iena fainonocai. <sup>20</sup> Ero, nase tuticue isoidicue. Bu cuena cacajia, cue fo billena cuena uaidoia, nasena bu econoia, fo jaiticue. Naimiena nabaillanona, naimie diga guiticue. Omoi comeciaina ñaiticue. Cue rafuena omoi cacaja mei, iena omoi ñinoia, cuena feññotomoi. Iemona conini nabaiticai. <sup>21</sup> Eniruemo cue Moo jitailla rafuena jaiie cue fuidua mei, naimie ecimo abido jai iticue. Cueri naimie iobillanona, illaimana cue illamona, naimie ecimo jai iticue. Ie isode. Cuena raise ñinotino monamo cue ecimo itataiticue. Cue cominina naimaci illa jira, naimacina iobitallena, cue ecimo naimacina nabaiticue. <sup>22</sup> Jusiñamui Joreñomona cue lloga rafue ite, omoi creyentiaia iena. Bie rafuena bu cacajia, iena jiaia inua” cueno.

## 4

*Juan Jusiñamui illanomo ciua rafue*

<sup>1</sup> Dallu illanona monamo cue eruaia, jiaie rafuena cidicue. Nainomo Jusiñamui illanomo econoga nasena cidicue. Ailli cue diga ñaitimiedi cuena uaidote. Naimie uai trompeta isoi ficiredede. Llote:

—Monamo bi. Jiairuido sulle rafuena omo acataiticue.

<sup>2</sup> Jusiñamui Joreño anamo cue illanona, nicairilla isoi Jusiñamui illanona cidicue. Nainomo naimie ana raillana cidicue. <sup>3</sup> Naimie eo queniredede. Eo raifide ebiredede noticina eruaide. Jaspe railla noticina eruaide. Jaspe enefebecodo cide. Cornalina railla noticina eruaide. Cornalina jiairede. Naie illano ecimo ameona cidicue. Ameo mocorena jira, esmeralde railla noticina eruaide. <sup>4</sup> Naie illano ecimo veinticuatro rairabici jiaia ite. Nainomo userede ñiroina jitajanona veinticuatro einamacia ana raídímaci. Naimaci ifogimo oromona finoca nuicirai ite. <sup>5</sup> Jusiñamui illanomona boricabide. Jiaia gurucabide. Bue isoi eo ficiredede. Naie illano uicomo siete reitirai boode. Naie reitiraidi Jusiñamui Joreño mamecido nainomo boode. <sup>6</sup> Jusiñamui illano uicomo vidriona eruaide joraina cidicue. Eo queniredede. Naimie illano ecimo cuatro cajedino ite. Diga uisi naimaci uiecomo ite. Diga uisi naimaci emodomo ite. <sup>7</sup> Damie leónna eruaide. Jiaimie jurareta jitona eruaide. Jiaimie ie uieco come uiecona eruaide. Jiaimie feede majañona eruaide. <sup>8</sup> Nagamiaino seis iaico ite. Ailluena uisi naimaci iaicuaimo ite. Naimaci abimo uisi jiaia eo ite. Nagarui ñiñeno jaca llotimaci:

Mare, mare, mare.

Cai siño Nama Jusiñamuidi eo mareuidimie.

Jaiie jaca ite. Birui ite. Ico jaca iite.

<sup>9</sup> Naimaci iese llua jira, Jusiñamuina iobitadímaci. Naimiemo iobillacinona naimaci iese fecaia, <sup>10</sup> naie veinticuatro einamacia Jusiñamui uicomo ana bitadajanona, naimiemo iobillacinona jiaia fecadímaci. Naimieri iobillanona, naimaci nuiciraina naimie dine faianona, <sup>11</sup> rotimaci:

Cai Nama Jusiñamui, ona eo iobitaiacadícaia.

Odi mareuidio.

Nana rana comuitatio.

Nana cominina comuitatio.

O jitailla jira, naimaci itimaci.

Ie jira iobillacinona omo fecacabidicai.

## 5

*Juan Jusiñamui illanomo ferinoga rabe illana ciode*

<sup>1</sup> Jusiñamui illanomo cue nia eruaia, naimie nabellimo ferinoga rabe illana ciodicue. Nagafebeimo cuega rafue jai ite. Siete nitaca ra illamona, naie rabe raise ìbaidibe.

<sup>2</sup> Jusiñamui ie nanoca jaienici ado lluana cacadicue. Naimie jicanote:

—¿Bumo ite uaidi nitaca rabe econollena, naie rabena facallena?

<sup>3</sup> Monamo itinomona, enirue itinomona, jai fioidaitinomona, bummo ie uai iñede, naie rabe oni econollena. Naie rabe facanidimaci. <sup>4</sup> Jaca bummo naie uai iñena jira, eo eedicue. <sup>5</sup> Naie facaise naie veinticuatro einamacimona damie cuemo lote:

—Mai eñeno. Judá nairai ie Leónna mameciredimiedi iena econorede. Naimiedi David micori comini imie. Ie dibeimo iñedinona jai emodofilla jira, naimiemo uai ite, naie siete nitaca rana oni suiñollena, naie rabena econollena.

<sup>6</sup> Naie facaiseconi Toica Llaudana ciodicue. Jusiñamui illano uicomo naimie ite. Naie cuatro cajedino naimie ecimo ite. Naie veinticuatro einamací naimie ecimo jiai itimaci. Faga llaudana eruaide; iadedi jai jilluamona naidaide. Naie Toica Llaudadi Cristo. Naie Llaudamo siete sigai ite. Siete uisi naimiemo jiai ite. Naie uisidi Jusiñamui Joreño mamecido ite. Nana cominina canollena, naimacimo Cristodi Jusiñamui Joreña jai orede. <sup>7</sup> Naie facaise Jusiñamui ie nabellimona naie rabena ote. <sup>8</sup> Iena naimie ua mei, naie cuatro cajedino, naie veinticuatro einamací diga, naimiema sedallena, naimie uicomo ana bitadatimaci. Nagamiemo guitarrana eruaide arpa ite. Nagamiemo oromona finoca copa ite. Naga copamo caimare soride ra boode. Naie radi Jusiñamuimo comini jiaicino mamecido ite. <sup>9</sup> Llaudana sedallena, naimaci arpas taillanona, comue ruana rotimaci:

O marena jira, o uai ite, naie rabe econollena.

Ie nitaca rana oni suiñoitio.

Jiaino jaie ona meinetimaci.

O fioidailla jira, o diaillamona, Jusiñamui dibeimo naga nairaimona cominina itatatio.

Naimaci jeacinomona jillotatio.

<sup>10</sup> Naimacina jai fetodio.

O comini naimaci illamona, Jusiñamui diga atona ñaicabitimaci.

Naimie anamo jairuido eniruemo ite cominina sedaitimaci.

Ie jira naie rabena oni suiñoedio.

<sup>11</sup> Temei dane eruaillamona, naimie ecimo eo ailluena Jusiñamui jaienisaina ciodicue. Naie cuatro cajedino ecimo, naie veinticuatro einamací ecimo itimaci. Diga illa jira, facanide. <sup>12</sup> Ado llotimaci:

Bie Toica Llauda isoidimie jaie fiodaite; ia jai jillode.

Naimie eo mareuidimiena jira, Jusiñamui ie uai naimiemo jai illamona, Jusiñamui nana naimiemo jai illamona, Jusiñamui naimiema eo abina uifnotajamona, naimiema jiai iobitaicadicai.

Naimiema cai inuanona, naimiemo iobillacinona feaacadicai.

<sup>13</sup> Ie facaise nana comini, nana Jusiñamui comuitaga ra diga, lluana cacadicue. Monamo itino, enirue itino, jai fioidaitino, monaillaimo itino lluana cacadicue. Llotimaci:

Jusiñamuina jaca cai iobicabillasa. Toica Llauda isoidimiena jaca cai iobicabillasa. Iobillacinona jaca feaacadicai. Caina jaca sedallesa.

<sup>14</sup> Naie cuatro cajedino raitimaci:

—Ie isoi jiai lloiacadicai.

Ie facaise naie Llauda isoidimiena sedallena, naie veinticuatro einamací ana bitadatimaci.

## 6

*Juan siete nitaca ra oni suiñuana ciode*

<sup>1</sup> Toica Llauda isoidimie iobillacinona naimaci fecaja mei, Llauda isoidimie daje nitaca ra oni suiñuana ciodicue. Naie cuatro cajedinomona damiedi gurua uai isoi lluana cacadicue. Naimie llote:

—Mai bi.

<sup>2</sup> Naimie llua mei, userede caballo billana ciodicue. Caballo emodo itimie sicuira ite. Illaimana jira, naimie ifogimo nuicirai jide. Ie bacauai anafetallena, oni jaide.

<sup>3</sup> Temei Llauda isoidimie jaie nitaca ra oni suiñode. Suiñua mei, naie cuatro cajedinomona jiaimie llote:

—Mai bi.

<sup>4</sup> Naimie llua mei, jiairede caballo billana ciodicue. Caballo emodo itimie are lloebi illamona, Jusiñamui jitailla jira, caballo emodo itimie eniruemo itinona uri itatañede. Naimaci uri iñena jira, conini icirilla jira, conini meinetimaci.

<sup>5</sup> Iemei Llauda isoidimie jiaie nitaca ra oni suiñode. Suiñua mei, naie cuatro cajedinomona jiaimie llote:

—Mai bi.

Naimie llua mei, jitirede caballo billana ciodicue. Aime guille facaise illa jira, caballo emodo itimie onollimo ra facaradi ite. <sup>6</sup> Naie cuatro cajedino motomona damie llote:

—Guille raise iñena jira, comini aime guitimaci. Daje kilo trigo ie core darui maijia ua ucube ñese raifide. Iemona llomenicono finoia, dacaiño guille raifi ite. Tres kilos cebada ie core darui maijia ua ucube ñese raifide. Iena damie oia, iemona llomenicono finoia, dacaiño amani guille raifi ite. Illimo riará nia ite; ia iena iballena ucube baiñede. Ie muidona aime guitimaci —llote.

<sup>7</sup> Iemei Llauda isoidimie jiaie nitaca ra oni suiñode. Suiñua mei, naie cuatro cajedinomona jiaimie llote:

—Mai bi.

<sup>8</sup> Naimie llua mei, liai usereoido caballona ciodicue. Ie emodo itimie mamecidi Fiodaitadimie. Jusiñamui uai naimie illa jira, naimie jailla mei, ailluena fiodaitino itimaci. Jobairillemona, aime guillemona, duicomona, riirede ocainaiamona fiodaitimaci. Atuedo meinetasifeite; iadedi eo ailluena meinetasiite. Riai uaimona ie cuarta facaina comini fiodaitimaci.

<sup>9</sup> Iemei Llauda isoidimie jiaie nitaca ra oni suiñode. Suiñua mei, Jusiñamuimo caimare soride boode rana jobaisoillanona ciodicue. Naie illano anamo comini joreñuaina ciodicue. Jusiñamui rafuena naimaci llua jira, “Jusiñamui cominidicai” naimaci llua jira, Jusiñamuina iñoñedino naimacina meinetimaci. Jai fiodaillamona naimaci joreñuai Jusiñamui illanomo jai itimaci. <sup>10</sup> Jusiñamuimo ado llotimaci:

—Cai Nama, siño jitodio. Mareuidimiedio. O uaina jaca finodio. ¿Niruido caina meinetinona duere finoitio? ¿Niruido ibana oitio?

<sup>11</sup> Jusiñamui cominina illamona, naimacimo Jusiñamuidi userede areroina jitallena fecade. Llote:

—Janore jisa seda. Ibana nia oñeiticue. Cue dibeimo omo maijia isoi, cue cominina nia meinetimaci. Naimacina meinia mei, ibana oiticue.

<sup>12</sup> Iemei Llauda isoidimie jiaie nitaca ra oni suiñuana ciodicue. Suiñuana, aillue ñuisaño suide. Jitoma eo jitireficaide. Fivuidi ñaruena eruaide. Jiairede. <sup>13</sup> Riirede aifi riará ana llutaja isoi, monamona eniruemo ucuai llude. <sup>14</sup> Ferinoga rabe oni uilla isoi, mona iñebicaide. Naga anedu, naga uiasi diga jiaí oni jaide. <sup>15</sup> Ie jira illaicomini, jamai bue isoñedino, ucuberedino, patrón anamo itino, patrón anamo iñedino, ua nana comini jaciruillamona reiritimaci. Damierie nofici moto ifomo reiritimaci. Damierie anedu motomo reiritimaci. <sup>16</sup> Anedumo llotimaci. Noficimo llotimaci:

—Caina ibaillena, cai emodomo ana uai. Jusiñamui riicaillafuemono caina reirita. Llauda isoidimie riicaillafuemono caina reirita. <sup>17</sup> Iaimaiaí riicaillarui jai ite. Naiemona buna jillobinide —lloimaci.

## 7

### *Juan ailluena Israel comini Jusiñamui sello diga nitajana ciodi*

<sup>1-2</sup> Naie facaise jiaie ico suille rafuena ciodicue. Cuatro Jusiñamui jaienicina ciodicue. Damie jitoma billanomo ite. Jiaimie jitoma jaillanomo ite. Jiaie iaimaiaí beicimo itiaimaiaí. Aifi biñellena itimaci. Ie muidona monaillai ñene aifi iñede. Aifi iñena jira, amenaiaí nirairiñede. Eniruena monaillai diga maraiñoño finollena naimacimo uai ite. Naie facaise jiaie jaienici jitoma billanomona billana ciodicue. Naimiedi cai cajede Jusiñamui ie sellona uite. Jiaie jaienisaímo ado llote:

<sup>3</sup> —Eniruena aifi diga maraiñoño nia finoñoño. Monailaina maraiñoño nia finoñoño. Amenaiaína maraiñoño nia finoñoño. Jusiñamui dibeimo itino uiecuai itofiaí sello diga nia cai nitañenia, eniruena maraiñoño finoñoño.

<sup>4</sup> Ailluena comini sello diga nitade. Ciento cuarenta y cuatro mil ñese nitajana cacadicue. Nana naimaci Israel cominimona itimaci. <sup>5</sup> Judá micori cominimona doce mil ite. Rubén micori cominimona doce mil ite. Gad micori cominimona doce mil ite. <sup>6</sup> Aser micori cominimona doce mil ite. Neftalí micori cominimona doce mil ite. Manasés micori cominimona doce mil ite. <sup>7</sup> Simeón micori cominimona doce mil ite. <sup>8</sup> Zabulón

micorí cominimona doce mil ite. José micorí cominimona doce mil ite. Benjamín micorí cominimona doce mil ite. Dese nitade.

*Juan ailluena comini userede iniroina jitajana ciode*

<sup>9</sup> Naie facaise ailluena cominina ciodicue. Ailluena jira, naimacina facadonicue. Naga nairaiamona itimaci. Naga jiaie ñaia uaido ñaitino itimaci. Jusiñamui uicomo itimaci. Toica Llauda isoidimie uicomo itimaci. Userede iniroina jitadimaci. Naimaci onollimo raforuai ite. <sup>10</sup> Ado llotimaci:

Bie Llauda isoidimie jaiie fiodaillamona, cai jeacinomona Jusiñamui caina jai jillotate.

<sup>11</sup> Naie facaise nana Jusiñamui jaienisaí naimie ecimo naidailana ciodicue. Naie veinticuatro einamaci ecimo, naie cuatro cajedino ecimo jiaí naidaidimaci. Naie facaise Jusiñamui uicomo ana bitadajanona, naimiena sedadimaci. <sup>12</sup> Raitimaci:

Bie comini isoi omo iobillacinona jiaí feaacadicai.

Odi mareuidimedio. Abina eo uñotio. Odi jaca siño jitodio.

Ie jira iese lloticai.

Ona jaca cai iobitajasa.

<sup>13</sup> Naie facaise naie veinticuatro einamacimona damie cuemo jicanote:

—¿Userede iniroina jitadinodi nímaci? ¿Ninena bitimaci?

<sup>14</sup> Uai oticue:

—Uñofedicue. Cuemo llono.

Naimie uai ote:

—Bimacidi eo duere sefuilla facaise Jusiñamuina ñnofedino meinegano. Naimaci iniroina jai jocoritimaci. Llauda isoidimie jaiie fiodailla jira, naimie diruedo jocuamona, naimaci iniroi jai userede. Naimaci iniroina lloticue; ia naimaci comeciaina jiaí ñaiticue. Llauda isoidimie fiodailla jira, naimaci comeciái jai jeanide. <sup>15</sup> Ie jira Jusiñamui uicomo itimaci. Nainomo naimiena jaca sedaitimaci. Naimiena jaca iobitaitimaci. Naimie ocuilla rafue jaca finoitimaci. Naimacina naimie raise nabaillamona, naimacina raise eenoite. <sup>16</sup> Dane duere sefuiñeitimaci. Nana naimaci jitailla ra naimacimo iite. Aime dane guñeitimaci. Naimaci jiroacalle ra jaca iite. Eo ecasillamona dane duere sefuiñeitimaci. Iemona dane usitañeitimaci. <sup>17</sup> Jusiñamui illanomona Llauda isoidimie naimacina raise sedaja jira, raise marena iitimaci. Naimacina naimie raise sedajamona, jaca iitimaci. Jusiñamui naimacina raise duenaillamona, duere sefuillamona dane eñeitimaci. Dane sunaiñeitimaci.

## 8

*Juan Llauda isoidimie iraiie nitaca ra oni suiñuana ciode*

<sup>1</sup> Toica Llauda isoidimie iraiie nitaca ra oni suiñuana, media hora monamo tii raiñoicaide. <sup>2</sup> Iemei siete Jusiñamui jaienici naimie uicomo illana ciodicue. Nagamiemo daje trompetana fecade. <sup>3</sup> Naie facaise jiaie jaienici billanona, Jusiñamuimo caimare soride ra jobaisoillano ecimo naidaide. Naie jobaisoillanodi oromona finoca. Ie onollimo oromona finoca cucharón eruaide ra ite. Ailluena caimare soride ra naimie feiñua mei, iena jobaide. Ie facaise nana Jusiñamuina ñnotino jiacino Jusiñamuimo jaide. <sup>4</sup> Jobaillamona Jusiñamui uicomo a jaide. Nana Jusiñamuimo jiacino diga a jaide. <sup>5</sup> Naie facaise Jusiñamuimo jobaisoillanomona boode reici jaienici uanona, cucharóna eruaide ramo iena jonianona, eniruemo iena ana dotade. Ie jira gurucabide. Bue isoi eo ficirede. Naganomo boricabide. Ñuisaño suide.

*Juan trompetas fillana cacade*

<sup>6</sup> Iemei naie siete jaienici naimaci trompetas fillena llinote. <sup>7</sup> Damie ie trompetana fite. Filla jira, monamona janorede hielo, boode ra diga, dirue diga, eniruemo uaide. Atuedo enirue boofede; ia ailluena boode. Riai uaimona ie tercera facaina boode. Nainomo nana amenaiaí boode. Nainomo nana raiticño boode.

<sup>8</sup> Jiaie jaienici ie trompeta fite. Filla jira, Jusiñamui anedu isoide boode ra monaillaimo faite. <sup>9</sup> Iemona monaillai diruena jaide. Atuedo iese jaiñede; ia ailluena iese jaide. Riai uaimona ie tercera facaina diruena jaide. Ie muidona ie tercera facaina lliciaí fiodaite. Nainomo ite botemona ie tercera facaina jiaí anabaite.

<sup>10</sup> Jiaie jaienici ie trompetana fite. Filla jira, monamona aillue boode ucudu eniruemo uaide. Iemona ie tercera facaina illeniaí, ie tercera facaina jorainiaí diga erireficaide. <sup>11</sup> Ie muidona naie ucudu Ajenjona mameciredede. Riai uai oni dobañuamona “Eriredimie”. Iemona jinui erireficaide. Iena jiruamona, ailluena comini fiodaitimaci.

<sup>12</sup> Jiaie jaienici ie trompetana fite. Filla jira, jitoma, fivui diga, ucuai diga, fuiride. Iemona aremona cuatro horas raise usenide. Naiona cuatro horas eo jitirede.

<sup>13</sup> Iemei jaienici ado cuiριοillana cacadicue. Monamo feianona llote:

—Eniruemo itino ua eo duere ja sefuitimaci. Daje amani jaienici imaci trompetana nia fiñede. Iena naimaci fia, comini eo duere sefuitimaci.

## 9

<sup>1</sup> Jjaie jaienici ie trompeta fite. Filla jira, naie facaise monamona eniruemo damie ucudu mamecido jai uaillana ciodicue. Naimiemo Jusiñamui daje llavena fecade. Enirue eo ana ite ifo nase ie. Nainomo Taife comini, Janaba comini diga itimaci. <sup>2</sup> Llave diga naie ifo ie nasena econote. Ie facaise ifomona eo ailluena uillie jino bite. Ie muidona jitoma raise bainide. Mona jitireficaide. <sup>3</sup> Uilliemona fioduaina eruaillanona, Taife comini, Janaba comini diga jino billanona, nana eniruemo bitimaci. Jusiñamui llua jira, acaido isoi fioduai eruaidinodi maitimaci. <sup>4</sup> Raiticño naimaci guillena, ibena naimaci guillena Jusiñamui rairuide. Naimie jitailla jira, naimie sello diga nitañeganona duere finodimaci. <sup>5</sup> Jusiñamui jitailla jira, cinco fivui naimacina duere finoitimaci; ia cominina meineñeitimaci. Acaido isoi isire maitimaci. Eo isirenite. <sup>6</sup> Iese ico suia, eo duere comini sefuilla jira, fiodaillana jitaitimaci. Naimaci abina meinecanitimaci. Fiodaiacanitimaci; ia fiodainitimaci.

<sup>7</sup> Fioduaidi jobaime dine jaide caballuaina eruaidimaci. Naimaci ifogimo oromona finoca nuicirai eruaide radi ite. Naimaci uiecuai cominina eruaidimaci. <sup>8</sup> Naimaci ifotie arena illanona, riño ifotiena eruaide. Naimaci isiduai leones isiduaina eruaide. <sup>9</sup> Naimaci abiaimo ico isoi ra ite. Lloeomona finoca rana eruaide. Naimaci feiamona, ailluena caballuaina jobairillanomo jaillena riire sonode carretas isoi ficedimaci. <sup>10</sup> Naimaci omacai acaido isoide. Naie diga maillanona, cinco fivui cominina duere finoitimaci. <sup>11</sup> Naimaci illaimadi naie ana ifona sedadimie. Judíuai uaimona naimie mamecidi Abadón. Griego uaimona naimie mamecidi Apolión. Oni dobaiñuamona naimie mamecidi Cominina Fuidodimie. <sup>12</sup> Daje duere sefuilla rafue jai fuite. Mena nia suiñede.

<sup>13-14</sup> Naie facaise jjaie jaienici ie trompeta fite. Jusiñamui uicomo ite caimare soride ra jobaisoillano ite. Oromona finoca. Nainomo cuatro sigai ite. Nainomona jaienicimo damie llote:

—Eufrates railla ille fuedo cuatro maiga jaienicina suiño —llote. <sup>15-16</sup> Iena finode. Naimaci anamo eo ailluena soldaduai ite. Doscientos millones soldaduai illana fididicue. Bie facaise, bie hora, birui, bie fivui, bie año, Jusiñamui jitailla facaise ailluena cominina meinetimaci. Atuedo meineñedimaci. Riaí uaimona ie tercera facaina meinetimaci. <sup>17</sup> Soldaduai caballos emodo itimaci. Soldaduai jogobemo ra ite. Daje facaise eo jjairede. Daje facaise mocorede. Daje facaise borarede. Caballos ifogiai leones ifogiai ena eruaide. Naimaci fuemona boode radi, uillie diga, azufre boa isoi jino bite. <sup>18-19</sup> Naimaci fuemona bite rado ailluena cominina meinetimaci. Ie tercera facaina meinetimaci. Caballos omacai jaiona eruaidimaci. Naimaci omacaimo jaiona eruaide ifogi itimaci. Ailluena cominina jjai duere finodimaci.

<sup>20</sup> Iese ie tercera facaina meinetimaci; ia fiebidino naimaci jeacinomona naimaci comeciai iuaina jaca meidoñedimaci. Taifena nia sedaacadimaci. Janabana nia sedaacadimaci. Oromona, platamona, bronceomona, nificimona, amenamona finoca jiraraiaina nia sedaacadimaci. Naie isoide radi cajeñena jira, jaca cioñede. Naie isoide radi jamai rana jira, jjai jaca buena cacaiñede. Jaca macariñede. Cajeñede; ia iena sedacabidimaci. <sup>21</sup> Conini meinecabitimaci. Aimaniai dine jaicabidimaci. Naimaci aiñede riño, naimaci iniñede iima diga icabitimaci. Rana fiicabidimaci. Jeacinona finocana nia jaidimaci.

## 10

*Juan Jusiñamui jaienici, econoga rabenico diga, billana ciodie*

<sup>1</sup> Ie facaise Jusiñamui illanomona eniruemo jjaie jaienici billana ciodicue. Naimiemo Jusiñamui uai eo ite. Uillie motomo naimie ite. Naimie ifogi afemo ameo ite. Naimie uieco jitoma isoi quenirede. Naimie idai eo boode amena isoi eruaide. <sup>2</sup> Naimie onollimo econoga rabenico ite. Eniruemo naimie ria, naimie nabei eilli monaillai emodomo naidaide. Ie jarifebei eilli eniruemo naidaide. <sup>3</sup> León eo irilla isoi, ado llote. Naie facaise siete gurus ñaia isoidino uai cacadicue. <sup>4</sup> Naimaci lluaana cacaja mei, iena cueiacadicue; iadedi monamona damie cuemo llote:

—Naie lluaana lloñeno. Iena cueñeno.

<sup>5</sup> Naie jaienici ie nabei onolli mona dine ñuitajanona, <sup>6</sup> Jusiñamuimo llote:

—Jaca itio. Monana nainomo ite ra diga finodio. Eniruena nainomo ite ra diga jjai finodio. Monailai nainomo ite ra diga jjai finodio. Cue baifemo o faia jira, uanaicmona cue lluaana uinotio. O lloga uaina jaca suite. <sup>7</sup> Iraie jaienici ie trompeta ja fiite. Filla mei, bie facaise Jusiñamui ie facaina lloraini micoraimo jjaie lloga rafue suite. Comini naie rafue jjaie raise cacaiñedimaci; ia iena ja raise cacaitimaci —llote.

<sup>8</sup> Monamona cuemo ailli llotimie dane llote:

—Jaienici onollimo econoga ite rabeniconna llinuai.

<sup>9</sup> Ie jira jaienici dine cue jaillanona:

—Iena cuemo ine —lloiticue.

Uai ote:

—Iena ono. Iena mai guiño. Ciifo isoi o fuemo iena cacaitio; iadedi o jebemo erirede ra isoi iena cacaitio.

<sup>10</sup> Llinua mei, iena guticue. Ciifo isoi naimerede rana cacadicue; ia guilla mei, erirede ra isoi cue jebemo ite. <sup>11</sup> Cuemo dane llote:

—Omo cue llole rafuena lloitio. Ailluena cominimo ico suille rafuena lloitio. Illaicominimo ico suille rafuena lloitio.

## 11

*Juan menamie Jusiñamui rafuena lluaana cacade*

<sup>1</sup> Cuemo Jusiñamui radosina fecade. Jerusalémo ie jofona facallena, cuemo fecade. Llote:

—Mai jai. Cue jofomo niga metros ite facajai. Atona ruica jiai faca. Nainomo cuemo jobaisoillanona jiai faca. Niga comini naie jofomo ite jiai faca. <sup>2</sup> Cue jofo ecimo ite taibirina facañeno. Naie illano judiuaifedinomo jainaiaide. Cue jitailla jira, Jerusaléna naimaci emodofillamona, daje amani años abimo atomonado iena duere finoitimaci. <sup>3</sup> Naie facaise menamiemo cue uaina iiticue. Iaimaiai cue llole rafuena daje amani años abimo atomonado lloitiaimaiai. Comini comeci iuai meiduana iaimaiai jitailla jira, sunaillamona, ebinide iniroina jitaitiaimaiai —llote.

<sup>4</sup> Iaimaiai mena olivos railla riaru mamecido itiaimaiai. Enirue Namana Jusiñamui illanona, naimie uicomo mena ite lamparin ie rairaco mamecido itiaimaiai. <sup>5</sup> Iaimaiaia duere bu finoacania, naimiena meineitiaimaiai. Iaimaiai fuemona boode ra billanona, naimiena meinetiaimaiai Iaimaiaia duere finodino iese fiodaitimaci. <sup>6</sup> Iaimaiai Jusiñamui rafue llole facaiseconi noci deitañellena, iaimaiaimo Jusiñamui uai iite. Jini diruena jaitallena iaimaiaimo uai iite. Iaimaiai jitaicabilla facaise, diga isoi rafue finua jira, Jusiñamui cominina duere finoitiaimaiai; <sup>7</sup> iadedi Jusiñamui rafue iaimaiai llua mei, eo ana ite ifomona ocaianana eruailanona, Taife jino biite. Jino billanona, iaimaiai diga fuirite. Iaimaiaia anafefitaja mei, iaimaiaia meineite. <sup>8</sup> Raiafomo joneñeitimaci; iadedi iaimaiai abi Jerusalén naisomo jamai fiebite. Jerusalén comini jearede rafue finua jira, Jusiñamui rafuena naimaci jitañena jira, Sodoma jaie ite nairai isoidimaci. Egipto jaie ite nairai jiai isoidimaci. Jerusalémo Jesúsna jaie jiai meinetimaci. <sup>9</sup> Raiafomo iaimaiai joniana rairuitimaci. Darui amani abi atomonado ailluena comini, naga nairaiaimona iaimaiaia jibuisaibitimaci. <sup>10</sup> Nana eniruemo ite comini iaimaiai fiodaillari iobitimaci. Iaimaiaimona comini duere sefuilla jira, iaimaiai jai fiodailla jira, iobitimaci. Rafuena finuanona, dan cominina rana fecaitimaci. <sup>11</sup> Darui amani abi atomonado illanona, fiodaillamona iaimaiaia Jusiñamui dane jillotaite. Ie muidona naidaitiaimaiai. Nana iaimaiaia ciodino eo jacinaitimaci. <sup>12</sup> Naie facaise monamona damie iaimaiaia uaiduana cacadiaimaiai. Llote:

—Bene mai bi.

Iecon iaimaiaia enoidimacidi uillie motomo monamo iaimaiai jaillana ciodimaci. <sup>13</sup> Naie facaise aillue ñuisaño suide. Ie jira janore facai Jerusalén goide. Riai uaimona ie décima facai goide. Naiemona siete mil comini fiodaitimaci. Fiodañedino jacinailamona:

—Jusiñamuidi ua siño jito —lloitimaci. <sup>14</sup> Mena duere sefuilla facaise jai fuite. Nia daje suiñede; ia raire suite.

*Juan iraiie trompeta fillana cacade*

<sup>15</sup> Naie facaise jaie jaienici ie trompetana fite. Monamo itino ado llotimaci: Jusiñamui, Cristo diga, illaia isoi, eniruemo ite cominina biruimona jaca sedaite. Naie comini naimie anamo raise iitimaci.

<sup>16</sup> Naie veinticuatro einamaci Jusiñamui ecimo illanona, naimie uicomo ana bitadajanona naimiena sedadimaci. <sup>17</sup> Llotimaci:

Jusiñamui, cai Nama, omo iobillacinona feaacadicaí.

Siño jítodio. O jitailla rafuena jaca finodio.

O uaido bie cominina jai sedadio.

<sup>18</sup> Ona naimaci inoñenamona, o diga iciritimaci; iadedi naimacina emodofidio.

Bie facaise jai fiodaitino jillotajamona, ona naimaci inoñena jira, naimacimona ja ibana oitio.

Jearede rafuena naimaci finua jira, naie facaise ona inoñedinona duere finoitio.

O dibeimo maijídino, o facaina lloraini, nana ona inotino omona ibana feiñoitimaci.

Nibai jamai bue isoidimaci.

Níbai jamai bue isoifédimaci; iadedi omona ibana feiñoitimaci.

<sup>19</sup> Naie facaise monamo ite Jusiñamui sedajano nase econuana ciodicue. Naie fo ite cajóna ciodicue. Ieconí horicabide. Bue isoi eo ficirede. Gurucabide. Ñuisaño suide. Monamona noci deilla isoi, ailluena hielu ana llude.

## 12

*Juan daje riñona, eo aillue jaio diga, ciode*

<sup>1</sup> Naie facaise monamo daje riñona ciodicue. Naiñaiñona cue ciuamona, Jusiñamuidi eniruemo itinomo ico suille rafuena cue uñuana jitaide. Naiñaiño iniroidi jítoma isoi bairede. Naiñaiño eilli anamo fivui ite. Naiñaiño ifogimo nuicirai isoi doce ucuduai ite. <sup>2</sup> Jai uruesite. Jocoacana jira, como isirede. <sup>3</sup> Ie facaise monamo jiaimiena ciodicue. Naimiedi Taife. Naimie illamona jiaie rafue suillena uñotícue. Naimiedi eo aillue jaiona eruaide. Jiairede. Siete ifogi naimiemo ite. Diez sigai naimiemo ite. Naga ifogimo nuicirai ite. Riaí uaimona naimiedi dragón. <sup>4</sup> Naimie omacai diga ailluena ucuaina eniruemo ana butade. Riaí uaimona ie tercera facaina butade. Ie uruena gutallena, riño uicomo naidaita naiñaiño jocollena sedade. <sup>5</sup> Naiñaiño iimana jocode; ia jaiu naimiena gutañede. Nana nairaiaí naimie anamo ico illanona, naimacina ie jitaillacinona finotajamona, naimacina eo riire sedaite. Naimacina naimie nia sedañenia, monamo Jusiñamui ie illanomo naimiena uite. Ie ecimo Jusiñamui naimiena itatate. <sup>6</sup> Iemei naie riño jofue iñenanomo raire jaide. Nainomo Jusiñamuidi ie illinona jai finode, naiñaiño ie. Daje amani años abimo atomonado naiñaiñona sedaite.

<sup>7</sup> Naie facaise monamo Jusiñamui jaienisaidi jaiona eruaidimie diga fuiridimaci. Jaiona eruaidimie jaienisai diga jai fuiridimaci. Jusiñamui jaienisai illaíma mamecidi Miguel. <sup>8</sup> Naimaci dinena emodofidimaci. Jaio ie jaienisai anafefilla jira, Jusiñamui illanomo naimaci illano jai iñede. <sup>9</sup> Eniruemo jaiona eruaidimie ie jaienisai diga dotadimaci. Naie jaiodi Taife. Satanás. Jaiona Taife jaiie jaillanona, eo ailluena cominina jai jifujete. <sup>10</sup> Monamo damie ado lluna jai cacadicue:

—Jusiñamui lloga uai jai suide. Ie cominina raise jillotate. Naimie uai eo siño. Ie uai Cristomo illanona, Cristodi cominina raise sedaite. Eniruemo Taifena jai dotaja jira, Jusiñamuina bu raise iñoñenia, jeacinona bu finoia, Jusiñamui uicomo birui naimie finocabilla isoi, Taife caina llogidoñeite. <sup>11</sup> Toica Llauda isoidimie naimaciri fiodailla jira, naimie rafuena naimaci lluaamona, Taifena emodofidimaci. Fiodaitimacina, naie rafuena llocana jaiacadimaci. <sup>12</sup> Ie muidona iobi. Monamo omoi illanona, iobi; iadedi eniruemo bu ia, monaillaimo bu ia, eo duere sefuite. Eniruemo Taife jai illa jira, naimiemona duere sefuitimaci. Naimie eo icirite. Nainomo naimie are iñellena uñote. Naimie icirillamona eniruemo itino eo duere sefuitimaci —llote.

<sup>13</sup> Eniruemo jaiona eruaidimie dotajamona, naiñaiñona duere finollena, naimiedi iimana jai jococa riñona racade. <sup>14</sup> Naimiemona jilloillena, Jusiñamui mena iaico, majaiño iaico isoi, naiñaiño mo ite. Feianona, jofue iñenanomo daje amani años abimo atomonado illena nainomo jaide. Naiñaiñona Jusiñamui eenollena, nainomo jaide. <sup>15</sup> Ie facaise jaiona eruaidimie fueamona eo ailluena jinui bite. Ille isoi tote, naiñaiñona corobaitallena; <sup>16</sup> ia enirue bojuamona, nana jinui nainomo ana jaide. Enirue naiñaiñona canua jira, naiñaiño corobañede. <sup>17-18</sup> Naie facaise jaiona eruaidimie riño diga icirillamona, naiñaiño comini diga jobairiacade. Nana Jusiñamui llogacino iñotino diga, nana “Jesúmo duidicai” raitino diga, jobairiacade.

## 13

*Juan mena riirede ocainana ciode*

<sup>1</sup> Naie facaise monaillai fueomo cue naidailanona, daje riirede ocaina monaillaimona billana ciodicue. Naimiemo diez sigai ite. Naga sigaimo nuicirai raide. Naimiemo siete ifogiai ite. Ie ifogiamo Jusiñamuina jeare ñaia mameci ite. <sup>2</sup> Naie ocaina abi janallarina eruaide. Ie eilli oso eillina eruaide. Ie fue león fuenta eruaide. Eniruemo itinona sedallena, naimiemo aillue jaiona eruaidimiedi ie siño uaina fecade. <sup>3</sup> Naimiemo ite ifogimona daje jai bofede. Fiodaitena eruaide; ia naiemona jai jillode. Naimieri rajicacillamona, nana eniruemo ite comini naimie dbeimo jaidimaci. <sup>4</sup> Ocainamo ie uaina aillue jaiona eruaidimie fecaja jira, jaiona sedajanona, iobillacinona naimiemo fecadimaci. Ocainana jai sedajanona, iobillacinona fecadimaci. Raitimaci:

—Naimie siño jito. Naimiena buna emodofinide.

<sup>5</sup> Naimiemo Taife uai illa jira, abina uradoillamona, Jusiñamuina eo jeare ñaite. Taife jitailla jira, cuarenta y dos fivui iese nana cominina sedade. <sup>6</sup> Jusiñamuina eo jeare ñaicabite. Naimie illanona eo jeare ñaicabite. Nana Jusiñamui ecimo itinona eo jeare ñaicabite.



<sup>7</sup> Taife uai naimiemo illa jira, Cristona eniruemo ite #notino diga jobairite. Naimacina emodofide. Imona nana comini naga nairaiamona naimie anamo itimaci. <sup>8</sup> Nana Jusiñamui rabenicomo cueñega mameciai die se ocaimana sedaitimaci. Jusiñamuidi naimaci mameciaina naimiemo ite rabenicomo eniruena nia finoñena facaise jaca cueñede; ia Toica Llauda isoidimie fiodailla jira, Jusiñamui naimiena #notino mameciaina naie rabenicomo jai cuete. Naimie illanomo jaca illena, naimaci mameciaina cuete.

<sup>9</sup> Omoi jeforena jira, raise fueollena, bie rafuemo cacarei. <sup>10</sup> Duere sefuillena, naie facaise cárcelmo Cristona #notinona joneitimaci. Naimacina meinia mei, naimacina meinetino Jusiñamuimona daje isoi ibana feiñoitimaci. Ie muidona Cristona #notino comeciai ocuiñoacada #nocana jailla.

<sup>11</sup> Naie facaise jiaie riirede ocaina eniruemona billana ciodicue. Toica Llauda isoi naimiemo mena sigai ite. Aillue jaiio isoi ñaite. <sup>12</sup> Monailaimona bite ocaina uai eniruemona bite ocainao jiai ite. Ie uai diga, nana cominina monailaimona bite ocainao sedatate. <sup>13</sup> Eo siño rafuena finocabite. Comini cioillena, monamona eniruemo boode ra ana bitatate. <sup>14</sup> Siño rafuena finuamona, Taife jitaila jira, eniruemo itinona jifute. Iena naimaci sedallena, cominina monailaimona bite ocaina joreño finuana ocuide. Monailaimona bite ocaina lloebi diga navui bofiamaona jai jillode. <sup>15</sup> Joreño finua mei, eniruemona bite ocaina iena ñaitatate. Iena bu sedañenia, ocaina naimiena meiniana ocuide. <sup>16</sup> Nana cominimo naimie númerona cuetatate. Número cuetatañenia, naimie mamecina cuetatate. Ie nabellimo cuetatañenia, ie uiecomo cuetatate. Jamai bue isoidinomo cuetatate. Jamai bue isoiñedinomo cuetatate. Ucuberedinomo cuetatate. Ucubenedinomo cuetatate. Patrón anamo itinomo cuetatate. Patrón anamo ifedinomo cuetatate. <sup>17</sup> Iese bumo iñenia, rana ibanide. Rana fecanide. Bie mamecidi bie ocaina ie mameci. Mamecina cuetatañenia, naimie ie númerona cuetatate. <sup>18</sup> Iena raise cacaillena, iemo omoi comeciaina faca. Abina uiñotimie bie númerona uiñoite. Come mamecido iite. Bie númerodi seiscentos sesenta y seis.

## 14

### *Juan 144,000 comini ruana cacade*

<sup>1</sup> Naie facaise Jerusalémo Sion railla anedu muidomo Toica Llauda isoidimie naidaillana ciodicue. Naimie diga ciento cuarenta y cuatro mil comini itimaci. Naimaci uiecuai itofiaimo naimie mameci, ie Moo mameci diga, jai cuega. <sup>2</sup> Monamona damie ñaiana cacadicue. Aillue ille surua isoi, eo ficirede. Eo gurua isoi jiai ficirede. Ailluena comini arpas tailla isoi, naimie ñaiana cacadicue. <sup>3</sup> Jusiñamui illanomo bie ciento cuarenta y cuatro mil comini comue ruana rotimaci. Naie cuatro cajedino nainomo ite. Naie veinticuatro einamaci nainomo itimaci. Dani bie ciento cuarenta y cuatro mil comini bie comue ruana rotimaci. Jiaino iena fueonidimaci. Bie ciento cuarenta y cuatro mil comini eniruemona naimaci dibeimo iñedinomona jai jillodimaci. <sup>4</sup> Bie ciento cuarenta y cuatro mil comini jearede rafuena ebiruiñedinomaci. Llauda isoidimie rafuena #nocana jaidimaci. Llauda isoidimie fiodailla jira, eniruemo itinomona naimacidi nano jillodino Jusiñamui iena, Llauda isoidimie iena. <sup>5</sup> Cristo rafuedo jeacinona finocabiñeno raise jaidimaci.

### *Juan daje amani jaienici rafue lluaana cacade*

<sup>6</sup> Naie facaise mona motomo jaienici feiana ciodicue. Naga nairaimo, nana eniruemo itinomo mare rafuena luaide. <sup>7</sup> Ado llote:

—Jusiñamuina #nuanona naimiena seda. Naimiemo iobillacinona feca. Naimiemo #noñedinona ja duere finoite. Monana, enirue diga, monailla diga, ille diga, naimie finua jira, naimiena seda.

<sup>8</sup> Jiaie jaienici billanona llote:

—Babilonia railla nairai illano eo aillue; iadedi ja iñeite. Nainomo itino ja fuitimaci. Jeacinona nainomo itino eo finua jira, jiaie nairaiaina jeacinona jiai eo finotatimaci. Babiloniamo jai itino isoi, Jusiñamuimona duere sefuitimaci.

<sup>9</sup> Naie facaise jiaie jaienici billanona, ado llote:

—Monailaimona bite ocaina bu seda, ie joreño bu sedaia, ie uieco itofemo, ie onollimo ocaina cuetataga ra bumo ia, <sup>10</sup> Jusiñamui riccaillafuemonona, naimacina dueñaiñenamona, jaca eo duere sefuitimaci. Irai motomo jaca duere sefuitimaci. Azufre boa isoi irai boode. Jusiñamui jaienisaidi Llauda isoidimie diga, iena cioitimaci. <sup>11</sup> Naie irai illano jaca bouamona, ie uillie jaca baireite. Nainomona naie duere sefuidino jaca jilloñeiteimaci. Iese naimaci fiodañeno jaca duere sefuitimaci —llote.

<sup>12</sup> Bie rafue sulle facaise Jusiñamui lloga uaina raise #nuanona, Jesús dibeimo raise illanona, comeciai ocuiñocana naimaci jailla.

<sup>13</sup> Iemei monamona Jusiñamui Joreño llote:

—Biena cueno: “Biruimona Jesúna ñnuamona, meineganodi caimare iitimaci. Jesús dibeimo naimaci illamona, navui duere sefuidimaci. Iemona uri iitimaci. Ieri Jusiñamuimona ñbana feiñoitimaci”.

*Juan Jusiñamui eniruemo itinona duere finua rafuena cacade*

<sup>14</sup> Naie facaise monamo cue eruaia, userede uilliena ciodicue. Uillie emodo Cristo raide. fimana eruaide. Naimie ifogimo oromona finoca nuicirai ite. Ie onollimo jairede lloebi ite.

<sup>15</sup> Jusiñamuina sedajanomona jiaie jaienici billanona, Cristomo ado llote:

—O lloebi diga eniruemo ite riarana cota, iena ollena. Jai einaite —llote.

Iese llote; ia cominina duere finollena ñaite. Naimaci duere finua facaisena ñaite.

<sup>16</sup> Jaienici llua isoi, ie lloebi diga Cristo cotade. Nana iena finode. Cominina duere finode.

<sup>17</sup> Jusiñamuina sedajanomona naie facaise jiaie jaienici bite. Naimie onollimo jairede lloebi jiai ite. <sup>18</sup> Ieconí Jusiñamuimo jobaisoillanomona jiaie jaienici bite. Eniruemo boode ra dotaja uaidi naimiemo ite. Lloebiredimiemo ado llote:

—Jai einailla jira, naimacina o ollena, o lloebi diga illimo ite uvaiaina tino.

Iese llote; iadedi cominina duere finollena ñaite. <sup>19-20</sup> Jaienici llua isoi, ie lloebi diga tinode. Uvas ua mei, Jerusalén ecimo iji ollena ifomo dotade. Naie iji jino eo tote. Cominina ñaiticue. Jusiñamui riicaillafue anamo eo duere sefuitimaci. Eo diaitimaci. Trescientos kilómetros dirue enirue emododo toite. Caballo ifogi facaise a llerite.

## 15

*Juan siete jaienisaí cominina duere finoacana ciodie*

<sup>1</sup> Naie facaise monamo jiaie rafuena ciodicue. Ieri eo rajicaidicue. Iena cue ciuamona, Jusiñamuidi eniruemo itinomo suille rafuena cue uñuana jitaide. Siete jaienisaína ciodicue. Nagamie cominina duere finoacade. Naimaci finoacalle rafue diga, Jusiñamuidi cominina duere finuana fuite. Iemona ie riicaillafue saite.

<sup>2</sup> Aillue joraina eruaide rana jiai ciodicue. Quenirede. Uifinide. Boode ra diga tamiana eruaide. Jorai fuemo monaillaimona bite ocainana emodofidinona ciodicue. Ocaina joreño anamo jai ñfedimaci. Ie cuetataga número anamo jai ñfedimaci. Naimaci onollimo Jusiñamui arpas illanona, naimacina taillanona, <sup>3</sup> jai emodofilla jira, Moisés micori ie ruana rotimaci. Moisés micori Jusiñamui facaina jai maijiuide. Jecinomona naimaci jiai jai jillua jira, Toica Llauda isoidimie ie ruana jiai rotimaci:

Eo siño ebirede rafuena finodio.

Jusiñamuina o illanona, jaca siño jitodio.

Mare rafuena jaca finocabidio. O lloga uai jaca finodio.

Naga nairai o anamo jai itimaci.

<sup>4</sup> Cai Nama, nana comini ona jaciruillamona, ona ñnoitimaci.

O marena jira, omo iobillacinona fecaitimaci.

O duere finoca rafue muidona nana comini ona sedaitimaci.

<sup>5</sup> Jusiñamuina sedajanomo dane eruaidicue. Ie fo iticuartomo ciodicue. <sup>6</sup> Naiemona siete jaienisaí billana ciodicue. Nagamie cominina duere finoacade. Eo userede linomona finoca ñiroina jitade. Oromona finoca cinturones naimaci jogobemo jitade. <sup>7</sup> Naie cuatro cajedinomona damie naga jaienicimo oromona finoca copana fecade. Copamo Jusiñamui eniruemo itinona eo duere finollicino ite isoide. Jusiñamui jaca illa jira, ie lloga uai suicana jaita. <sup>8</sup> Jusiñamui ebirede siño uai illamona, ie sedajanomo uillie o illana ciodicue. Bie siete jaienisaímo ite rafue nia suiñena jira, Jusiñamuina sedajanomo buna fo jainide.

## 16

*Juan eniruemo copas oni totajanona ciodie*

<sup>1</sup> Ie sedajanomona Jusiñamui naie siete jaienisaímo ado llote:

—Cue riicaillafue omoi copamo illa jira, eniruemo itinona duere finollena, omoi copas oni tota.

<sup>2</sup> Daje jaienici iena finode. Eniruemo ite cominina duere finode. Monaillaimona bite ocaina cuetataganona jiai duere finode. Ocaina joreño sedadinona duere finode. Naimaci abiaímo jodollaiaína comuitate. Iemona duere sefuidimaci.

<sup>3</sup> Iemei jiaie jaienici ie copa oni totajamona, monaillaina duere finode. Nana monaillaidi fiодaitino dirue isoi jaide. Eo jearedena eruaide. Nana nainomo ite cajedino fiодaitimaci.

<sup>4</sup> Iemei jiaie jaienici ie copa oni totajamona, nana illiaí, nana jorainiaí diga, duere finode. Diruena jaide.

<sup>5-6</sup> Naie facaise nana jinuina sedacabide jaienici llote:

—Jusiñamui, o jaca mareuidimedio. Ona ñnotinona eniruemo itino meinia jira, o facaina llorainina naimaci meinia jira, naimacina o raise uñuamona, naimacina duere finodio. O

cominina naimaci meiniamona, naimaci finua isoi, ibana oitio. O cominina naimaci meinia jira, diruena ja jiroitimaci.

<sup>7</sup> Jusiñamuimo caimare soride ra jobaisoillanomona jiaie jaienici llote:

—Cai Nama Jusiñamui, ua siño jitodio. Naimaci finocabilla isoi naimacina jai duere finodio.

<sup>8</sup> Naie facaise jiaie jaienici ie copa oni totajamona, jitomana duere finode. Eo lligaiñotajamona, eniruemo itino eo usidimaci. <sup>9</sup> Eo usidimaci; iadedi Jusiñamuina jeare nia ñaitimaci. Naimacina duere finollena, naimiemo uai illana uñotimaci; ia naimie dibeimo naimaci comeciai iuaina meidoiacañedimaci. Jeacinona finuana fainonocaiacañedimaci. Naimiemo iobillacinona feacaacaiñedimaci.

<sup>10</sup> Naie facaise jiaie jaienici ie copamona ie duere sefuillacinona monaillaimona bite ocaina sedajano dine totade. Ie muidona nana enirue jitireficaide. Eo duere sefuillamona, comini imaci iifena ainitimaci. <sup>11</sup> Duere sefuillamona, Jusiñamuina jeare ñaitimaci. Naimaci abiaimo ite jodollai ai isirede; iadedi naimaci comeciai iuaina meidoñedimaci. Jeacinona finuana fainonocaiñedimaci.

<sup>12</sup> Naie facaise jiaie jaienici ie copamona ie duere sefuillacinona Eufartes railla ille dine totade. Ie muidona naie aillue ille safenaita. Safenaillamona, jitoma billanomo ite nairai ai illaicomini, imaci soldaduai diga, ruica dine raise birenitimaci.

<sup>13</sup> Naie facaise aillue jao fueмона, monaillaimona bite ocaina fueмона, naimie facaina lloraima fueмона, daje amani jananiai billana ciodicue. Nagamiemona daje janaba bite. Nai jananiai jerocina eruaide. <sup>14</sup> Taifemona bite. Siño rafuena finocabite. Nana illaicomini, imaci soldaduai diga uaidollena, naimacina oreite. Danomo ofillena illaicominina uaidoite. Jusiñamui diga jobairillena, danomo ofitimaci. Naimie diga jobairillamona, Jusiñamui ua siño jitona nana comini uñotimaci. <sup>15-16</sup> Armagedón railla illanomo ofitimaci. Naie illano mamecidi juduai uai mameci. Ieconai cai Nama cuemo llote:

—Fuiraima isoi ebena biiticue. Cue billemo ocuiridimie iocire iite. Cue billemo naimie ocuiria, cue bia, naimie cue jitaillacinona finuamona, naimie meiruiñeite.

<sup>17</sup> Naie facaise jiaie jaienici jafaici dine ie copamona ie duere sefuillacinona totade. Ieconai ie sedajanomona Jusiñamui llote:

—Bie duere sefuillacino diga, cominina cue duere finoacanacino ja fuite.

<sup>18</sup> Teconi boricabide. Bue isoi eo ficirede. Gurucabide. Eo aillue ñuisaño suide. Comini comuilla facaisemona iese ñuisaño jaca suiñede. <sup>19</sup> Iemona nanoca nairai illano daje amani facaina goide. Nana jiaie illanuai jiai goidimaci. Jusiñamuidi Babilonia railla nairaina raise uñuamona, nana ie ricaillafuemona iena eo duere finode. <sup>20</sup> Naie ñuisañomona naga uiasi jai cioñena. Naga anedu jiai cioñena. <sup>21</sup> Monamona noci deilla isoi, hielu jiai ana jurude. Naga hielu cuarenta kilos nibai merede. Cominimo baillanona, eo duere sefuidimaci. Eo duere sefuillamona, Jusiñamuina nia jeare ñaitimaci.

## 17

*Juan eo marañede riñona duere sefuillana ciode*

<sup>1</sup> Naie facaise naie siete copas diga ite jaienisaimona cue dine damie billanona cuemo llote:

—Cue diga bi. Eo marañede riño duere sefuillana omo acataiticue. Monaillai emodomo naiñaiño jai raide isoide. Naiñaiñodi nanoca nairai illano mamecido ite. Nana illaicomini naie nairai anamo itimaci. <sup>2</sup> Naiñaiñona sedajamona, naiñaiño diga, illaicomini di jearede rafuena finocabidimaci. Naiñaiñona nabaillamona, eniruemo ite comini jearede rafuena eo eburitimaci —llote.

<sup>3</sup> Nicairilla isoi, jaienici cue joreñona uillanona, jofue iñenanomo cue joreñona uite. Eo jiairede riñede ocaina emodomo naie riño raillana ciodicue. Jusiñamuina eo jearede ñaiacino ocaina abimo eo ite. Ocainamo siete ifogiai ite. Diez sigai jiai ite. <sup>4</sup> Naie riño jiduirede iniroi, jiairede iniroi diga jitade. Eo raifide quenirede ra diga, naiñaiño abi eo finobide. Dajerie ra oromona finoca. Dajerie perlas railla ramona finoca. Ie diga ie abi eo finobide. Naiñaiño onollimo oromona finoca copana uite. Nainomo eo marañede jearede rafuena finocana uite isoide. <sup>5</sup> Jusiñamui naiñaiño finoca rafuena uñotaiacana jira, naiñaiño uiecom mameci jai cuetataga: “Nanoca Babilonia raillañaiñodicue. Cuemona eo jearede rafue comuicana jaicabide. Cue muidona comini jearede rafuena finocabide”. <sup>6</sup> Naiñaiñodi ailluena Jusiñamuimo duidinona, ailluena ua Jesúna inotinona meinetajana eo eburite. Naiñaiñona cue cioia, eo rajicaidicue. <sup>7</sup> Jaienici cuemo jicanote:

—¿Bue ñe rajicaidío? Naiñaiño mo ite rafuena omo lloiticue. Naiñaiñodi ocaina emodomo raide. Naie ocaina rafuena jiai lloiticue. <sup>8</sup> Naie ocaina navui ite; ia birui jai iñede. Ico eniruemona, eo ana ite ifomona, dane biite; iadedi faifite. Ieri Jesucristona inoñedino

raijicaitimaci. Jesucristona naimaci #noñena jira, monamo Jusifamuidi ie rabenicomo enirue nia finoñena facaise naimaci mameciaina jaca cueñede. Naimie illanomo jaca iñeitimaci. <sup>9</sup> Ocaina rafuena omo ja lloiticue. Jusifamui ona uifotajanona iena cacaitio. Bie siete ifogidi siete anedu mamecido ite. Riño nainomo raide. <sup>10</sup> Te siete ifogidi siete illacomini mamecido ite. Naimacimona cinco illacomini jai iñede. Damie cominina birui sedade. Jiamie cominina nia sedañede. Cominina naimie sedaia, are naimacina sedañeite. Dallu sedaite.

<sup>11</sup> Ifomona bite ocainana dane lloiticue. Cominina jai sedaite; ia bie siete illacomini sedajacinomo dute. Cominina naimie sedaja mei, naimie faifite. <sup>12</sup> Te diez sigaidi diez illacomini mamecido ite. Diez nairaina sedaitimaci; iadedi nia sedañedimaci. Cominina dallu sedallena, ocainamona naimaci uaina feiñoitimaci. <sup>13</sup> Daje isoi começina lloitimaci. Ocainana nabaitimaci. Naimie jitailla rafuena finuanona, naimie anamo iitimaci. <sup>14</sup> Toica Llauda isoidimie diga jobairitimaci; ia Llauda isoidimie ie comini diga emodofite. Llauda isoidimie nana illacomini baifemo faia jira, nanoca imiema jira, naimacina emodofite. Ie cominina naimie fetode. Naimiema #notimaci. Jai emodofitimaci —llote.

<sup>15</sup> Jaienici nia llote:

—Riño monallai emodomo raillana ailli ciodio. Monallaidi nana comini mamecido ite. Naga nairai mamecido ite. <sup>16-17</sup> Naie diez illacomini, ocaina diga riñoa enoitimaci. Naiñañoa duere finoitimaci. Jusifamui jitailla jira, naimie jitailla rafue fuidollena, naimie lloga uai suillena, naimaci começina daje isoi lloitaite. Ocaina anamo naimacina itataite. Riñoa lese fuidoitimaci. Naiñaño iniroina oni dotatajanona, naiñaño taiñañoa iite. Naiñañoa meineitimaci. Ie llicisina riitimaci. Ja muidomo iraimo naiñañoa dotaitimaci. Iese naiñañoa duere finuanona, naiñañoa fuidoitimaci. <sup>18</sup> Bie riñodi nanoca nairai illano mamecido ite. Naie nairai anamo nana eniruemo ite illacomini iitimaci —llote.

## 18

*Juan Babilonia railla nairai illano goilla rafuena ciodie*

<sup>1</sup> Ie facaise monamona jaiie jaienici ana billana ciodicue. Naimie uai siño. Naimie uai siñoa jira, eniruena lligaiñote. <sup>2</sup> Ado llote:

—Tena Jusifamui duere finuanona, Babilonia nairai illano jai nana goide. Comini nainomo jai iñedimaci. Nainomo Taife jaienisai birui itimaci. Janani ai nainomo birui itimaci. <sup>3</sup> Nia goiñenia, bie nairai jeacinona eo finuanona, nana nairai iena ebiritimaci. Bie nairaina nabaillamona, nana illacomini jearede rafuena jaii finocabidimaci. Jearede rafuemona nana rana fecaraini bie nairaimona ailluena ucubena ganacabidimaci —llote.

<sup>4</sup> Naie facaise monamona damie llote:

—Cue comini, bie nairaimona birui mai eneno oni i. Jeacinona omoi finoi raillano, naie facaise omoi duere sefui raillano, birui eneno mai oni i. <sup>5</sup> Bie nairai jeacino eo finocana jaidimaci; iadedi iena Jusifamui uifnuamona, naimacina jai duere finoacade. <sup>6</sup> Jusifamui, naimaci finua diese ibana ono. Naimacina ua eo duere fino. <sup>7</sup> Jeacino finuanona iobidimaci. Iemona abi iedotimaci. Jeacino finuana eo ebiritimaci. “Illaicominiacai. Nana cai jitailla ra caimo ite. Feciño isoi duere jaca sefuiñeticai” começiaina facadimaci; <sup>8</sup> iadedi cai Nama Jusifamui naimacina ebena eo duere finoite. Duicomona, sure illamona, aime guillamona fioidaitimaci. Naimaci jofue booite. Jusifamui siño jitona jira, naimacina raire fuidoite —llote.

<sup>9</sup> Bouamona uillie naimaci cioia, sunaillamona, naie nairai diga nabairite illacomini eo eeditimaci. <sup>10</sup> Duere sefuillena naimaci jaciruilla jira, aremona lloitimaci:

—Ero, Babilonia eo aillue nairai illano; iadedi duere finuanona ua raire fuite —lloitimaci.

<sup>11</sup> Naimaci rana naie nairai jai oñena jira, rana fecaraini eo sunaillamona eo eeditimaci. <sup>12</sup> Iese fecacabidimaci: oro, plata, abi finollena raifide ra, diga eo mare raifide iniroi, diga caimare soride rabiciai, elefante sigainiai, jofona nille ra, bronce, lloona, mare nofici, <sup>13</sup> guille caimaretade ra, caimare soride ra, vino, guille ie aceite, mare harina, core, juraretaiai, toica llaudaiai, caballos, carretas, comini. Vendellena, cominina aticabidimaci. <sup>14</sup> Sure illamona lloitimaci:

—Caimona omoi começiai jitailla rana ja oñeitomoi. Omoi ebiruiga rana ja oñeitomoi.

<sup>15</sup> Duere sefuillena naimaci jaciruilla jira, nainomona ucubena jai oñenamona, rana fecaraini aremona ado eo eeditimaci. Sunaitimaci. <sup>16</sup> Lloitimaci:

—Naie nairai eo duere sefuidimaci. Nia duere sefuiñenia, eo mare rana, mare iniroi diga ebiritimaci. Eo raifide abina finolle rana eo ebiritimaci. Oromona finoca ra, perlamona finoca rana eo ebiritimaci; <sup>17</sup> iadedi nana naie nairai, ie raifide ra diga, jai raire fuite —lloitimaci.

Nana botes imaci capitanes, nana botemo maijiuidino diga, nainomo jaidino diga, botedo rana fecaraini diga, <sup>18</sup> aaremona uilliena ciuamona, naie nairai bouana fidiano, lloitimaci: —Naie nairai nana jiai nairai ai baifemo navui faite. Jiaie nairai ie isoi ebinide.

<sup>19</sup> Sure illamona, naimaci ifogimo imuicina faianona, eeditimaci. Lloitimaci:

—Bie nairai eo duere sefuide. Bie nairaimona boteredinodicai navui ailluena ganadicaí. Bie nairai jai raire fuite.

<sup>20</sup> Naie facaise monamona damie llote:

—Monamo itino, naie nairai fuillari mai iobi. Jusiñamui cominina jai jaidomoi. Naimie facaina navui maijidomoi. Naimie rafuena navui llofueuidomoi. Naie nairaimona duere sefuidomoi; iadedi omoi facaina Jusiñamui ibana jai ote.

<sup>21</sup> Naie facaise jiaie jaienico sño uai illanona, eo aillue nofici llinuanona, monaillaimo iena faite. Llote:

—Bie nofici dane cai cioñena isoi, Babilonia railla nairai dane iñeite. Jusiñamui iena eo riire fuidoite. <sup>22</sup> Nainomo buna dane roñeite. Buna guitarrana eruaide arpas jaca taiñeite. Buna firacaina jaca fiñeite. Buna trompetana jaca fiñeite. Nainomo buna rana jaca niñeite. Rana jaca fiñoñeite. Buna jaca doberñeite. Llomenicono finollena, buna dane maijiñeite. <sup>23</sup> Nainomo naiona lamparinai dane booñeite. Rafue dane iñeite. Eo caimare iobitaja rafue dane iñeite. Iraisñeitimaci. Saiñeitimaci. Naie nairai rana fecarainidi navui nanoca fecaraini. Naimacina Taife canua jira, ailluena nairaiaina navui jifuecabidimaci. <sup>24</sup> Naie nairai ailluena Jusiñamuina ñnotinona meinetimaci. Ailluena Jusiñamui facaina llorainina meinetimaci; iadedi naimacina Jusiñamui duere finua jira, ua eo mare —llote.

## 19

<sup>1</sup> Ie facaise monamo eo ailluena comini ado lluaana cacadicue. Jusiñamuimo llotimaci:

Ona cai iobitajasa. Caina jai jillotatio.

O uai ebirede. Odi sño jitodio.

<sup>2</sup> O anamo itinona raise uñuamona, uanaicinona o uñuamona, naimacina duere jai finodio. Naie jearede rafuena finode riñona jai duere finodio.

Naie riño ailluena cominina jearede rafuena finotate.

Ailluena o facaina maijidinona jai meinetade;

iadedi iba jai otio.

<sup>3</sup> Iemei dane llotimaci:

—Ona cai iobitajasa. Duere sefuillena, naie nairai jaca boode. Naimaci jaca duere sefuitimaci —llotimaci.

<sup>4</sup> Naie veinticuatro einamaci, naie cuatro cajedino diga, Jusiñamui ecimo ana bitadajanona, naimiema sedadimaci. Llotimaci:

—Omoi llucacino mare. Ie isoi jiai lloiacadicaí. Jusiñamuina cai iobitajasa.

<sup>5</sup> Jusiñamui illanomona damie llote:

Nana cai Jusiñamuina facaina maijidino iobitajasa.

Nana naimiema ñnotino naimiema iobitajasa.

Jamai bue isoidino naimiema iobitajasa.

Jamai bue isoiñedino naimiema iobitajasa.

*Juan Toica Llauda isoidimie aina ua rafuena cacade*

<sup>6</sup> Naie facaise monamo eo ailluena comini lluaana cacadicue. Ailluena jinui surua isoi ficirede. Eo gurucabilla isoi ficirede. Llotimaci:

Cai Nama Jusiñamuina cai iobitajasa.

Naimie sño jito. Nana cominina birui jai sedade.

<sup>7</sup> Eo iobidicaí. Naimiemo iobillacinona eo cai fecajasa.

Llauda isoidimie ie aina ua rafue facaise jai suide.

Naññaiño jai finobide.

<sup>8</sup> Mare iniroi naññaiño jai ite. Eo userede. Quenirede. Jeanide

llotimaci. Iese iniroina llotimaci; ia Cristo, ie comini diga, jaca illena ñaitimaci. Ie ai diga, ini ie riño jaca caimare illa isoi, nana naimie comini diga, naimie caimare jaca iite. Naie mare iniroidi, Jusiñamui jitaillacinona finuamona, naimie ñnotino imaci mare finoca rafue isoide.

<sup>9</sup> Jaienici cuemo llote:

—Biena cueno: “Llauda isoidimie aina ua rafue dine uaidoganodi caimare iitimaci”. —Iemei llote:

—Jusiñamui iena llua jira, uanaicinona omo lloticue.

<sup>10</sup> Jaienici uicomo eillimo ana bitadaticue, naimiema sedallena; ia cuemo llote:

—Dama ite. Cuen a sedañeno; ia dama Jusiñamuina seda. Jesús ie dibeimo itinona uanaicinona jai uñotade. Ie jira naga o diga naimiēna iñotino isoi, Jusiñamui facaina jiai maijidicue. Naga Jusiñamui facaina maijidimie Jusúna llocabite. Ie muidona dama Jusiñamuina seda.

*Juan userede caballo emodomo itimiēna ciede*

<sup>11</sup> Naie facaise mona ecorillana ciodicue. Nainomo userede caballona ciodicue. Naie emodomo itimiēmo mena mameci ite. Inogamiēna mameciēre. Uanaicinona Llocabitimiēna jiai mameciēre. Naimacina raise uñuamona, naimie dibeimo iñedinona duere finollena, naimaci diga jobairite. <sup>12</sup> Naimie uisidi irai isoiēde. Illaīmana jira, naimie ifogimo ailluena nuicirai ite. Naimiēmo cuega mamecina buna uñofēde. Dama naimie iēna uñote. <sup>13</sup> Naimie jitaca iniroi ie dibeimo iñedino diruēmo mutaca. Jusiñamuina naimie uñotaja jira, Jusiñamui Uairedimiēna mameciēre. Naimiedi Jesucristo. <sup>14</sup> Naimie jinafona soldaduai isoi Jusiñamui facaina itino monamona billana jiai ciodicue. Eo mare userede jeanide iniroina jitadimaci. Userede caballuai emodomo itimaci. <sup>15</sup> Eniruēmo ite nairaiaina emodofillena, naimie fuemo jairede lloebi ite. Naimacina emodofilla mei, naimacina naimie jitaillacinona finotallena, naimacina eo riire sedaite. Jusiñamui siño jitona jira, naimie riicallifue anamo itinona eo duere finoite. <sup>16</sup> Naimie iniroimo, naimie idaīmo jai cuega: “Nanoca Illaīma. Nanoca Nama”.

<sup>17</sup> Naie facaise jaiēnici jitoma lligaiñuanomo ciodicue. Nana inoniaīna uaidote:

—Llicisina mai riabi. Jusiñamuidi ailluena cominina ja meiniamona rille eo iite. <sup>18</sup> Naimacina emodofillamona, ailluena llicisi ja iite. Ailluena cominina ja meineite. Illaīcomini itimaci. Soldaduai illaīcomini itimaci. Caballuai itimaci. Caballuai emodomo jaicabidino itimaci. Diga comini ite. Jamai bue isoidino itimaci. Jamai bue isoiñedino itimaci. Patrones anamo itino itimaci. Patrones anamo iñedino itimaci. Naimaci llicisi mai riabi —llote.

<sup>19</sup> Naie facaise monaillaimona bite riirede ocainadi enirue illaīcomini diga ofide. Naimaci soldaduai jiai ofidimaci. Userede caballo emodomo itimie diga, naimie dibeimo itino diga jobairiacadimaci. <sup>20</sup> Userede caballo emodomo itimie ie dibeimo itino diga naimacina emodofide. Ocainana gaitadimaci. Naimie facaina tainona lloraīmana jiai gaitadimaci. Naie lloraīma ocaina uai diga cominina jifuecabite. Siño rafuena finuamona, ocaina cuetataga ra itinona, ie joreñona sedadinona jifuecabite. Naie iaīmaiaīna gaitaja mei, eo boode iraimo iaīmaiaīna cajena dotadimaci. Azufre boa isoi irai boode. <sup>21</sup> Caballo emodomo itimiedi ie fuemo ite lloebi diga iaīmaiaī soldaduaīna meinete. Jaiēnici llua isoi, inoniaī naimaci llicisina ritimaci. Temonā eo monidimaci.

## 20

*Juan mil años Taife maiāna ciede*

<sup>1</sup> Naie facaise monamona jaiēnici billana ciodicue. Eniruēmo eo ana ite ifo llave naimiēmo ite. Aillue lloeo ie onollimo ite. <sup>2</sup> Aillue jaiona eruaidimiēna gaitade. Naimiedi Taife. Riāi uaimona Satanās. Jiaici dragón. Mil años iēse illena lloeo diga naimiēna maite. <sup>3</sup> Ana ite ifomo naimiēna dotade. Llave diga ifona ibaide. Cominina ramo faifillena, naimacina jeacinona finotañellena, naimie uaina itatañede. Mil años cominina jifuenide. Mil años fuilla mei, dallu naimiēna jino oretaitē, cominina ramo faillena.

<sup>4</sup> Ie mei monamo diga jueces illanuaina ciodicue. Jusiñamui uai diga nainomo itinodi marañede rafue finodinomo jamai duere sefuillacinona lloitamaci. Ie facaise jai meineganona jiai ciodicue. Eo duere sefuilla facaise “Jesús cominidicai” naimaci llua jira, Jusiñamui uaina naimaci llua jira, naimaci ifogiaīna jaitajanona, naimacina meineganodimaci. Monaiillaimona bite ocainana sedañedimaci. Ie joreñona sedañedimaci. Ie cuetataga ra naimaci uiecomo, naimaci onollimo iñede. Navui fiodaitimaci; ia iēmona bie facaise jai jillobitimaci. Imaci abiaī diga Jusiñamui naimacina jillotaite. Cristo diga mil años eniruēmo itinona sedaitimaci. <sup>5</sup> Naimaci di nano jillodino. Naie mil años nia fuiñena, jiaie jai fiodaitino nia jilloñeitimaci; ia mil años fuilla mei, jilloitimaci. <sup>6</sup> Nano jillodino caimare marena iitimaci! Dane fiodañenamona Jusiñamui illanomo jaca iitimaci. Fafifñeitimaci. Cominina sedajanona, comini Jusiñamuina raise uñollena, comini Cristona raise uñollena, naimacina canoitimaci. Cristo diga mil años naimacina sedaitimaci.

<sup>7</sup> Bie mil años fuilla mei, Jusiñamuidi ana ite ifomona Taife jino oretaitē. <sup>8</sup> Nana eniruēmo ite nairaiaina jifuaibite. Gog railla illaīcominina, Magog railla nairaiāi diga, jifueite. Naimaci nairaiaina ofitaite. Eo ailluena naimaci illa jira, conillieña caī facadonina isoi, naimacina facadonicue. Jusiñamuina iñotino diga jobairillena, ofitimaci. <sup>9</sup> Danomo ofillanona, Jusiñamuina iñotinona ciribitaitimaci. Jerusaléna, Jusiñamui isiruiña nairaina, ciribitaitimaci. Naie facaise monamona boode ra billanona, jobairiacadinona fuidoite.

<sup>10</sup> Cominina eo jifuecabite; ia ie facaise Jusiñamuidi Taifena eo boode iraimo dotaite. Azufre boa isoi irai boode. Nainomo monaillaimona bite ocaïnana jaie dotade. Nainomie facaina tainona lloraïma jaie dotade. Nainomo ua jaca duere sefuitimaci

*Juan aillue rairabicina ciode. Nainomona Jusiñamui duere fnollicinona lluaana cacade*

<sup>11</sup> Naie facaise aillue userede rairabicina ciodicue. Illaïmana naimie illamona, nainomo Jusiñamuina jiai ciodicue. Naimie siño illamona, mona enirue diga jai iñede. <sup>12</sup> Naie facaise Jusiñamui uicomo nana fioidaitino naidailana ciodicue. Jamai bue isoïñedino itimaci. Jamai bue isoidino itimaci. Naimacimo juez isoi Jusiñamui lllollena, itimaci. Ie rabenicuaimo naimaci jai finoca rafuena jibuide. Naimaci finoca rafue nainomo jai cuega. Iemei Jusiñamui jiaie rabenicona jibuide. Naimie diga jaca ille comini mameciai nainomo jai cuega. Naimaci mameciai nainomo iñenia, naimaci finoca rafue diese Jusiñamui naimacimo duere sefuïllena llote. <sup>13</sup> Monaillaimo ite corobaitino abiai, joreñuiai diga, jilloitimaci. Raïgano abiai joreñuiai diga jilloitimaci. Naimaci finoca rafue diese Jusiñamui naimacimo duere finollena llote. <sup>14</sup> Naimaci abiai naimaci joreñuiai diga iraimo dotaite. Jaca faïfitimaci. Naiemona jaca jilloñeitimaci. Jusiñamuimona eneno jaca itimaci. <sup>15</sup> Monamo ite rabenicomo cueñega comini mameciai diese itinona iraimo dotaite.

## 21

*Juan comue monana, comue enirue diga ciode*

<sup>1</sup> Birui ite mona, birui ite enirue diga jai iñede. Monaillai jiai jai iñede. Iemei comue mona ciodicue. Comue eniruenta jiai ciodicue. <sup>2</sup> Comue nairai illanona ciodicue. Comue Jerusaléna ciodicue. Jusiñamui illanomona, Jusiñamuimona bite. Naimiemona billa jira, naie nairai eo mare. Eo ebirede finobide riño ie inina ua facaise isoi, eo ebirede. <sup>3</sup> Jusiñamui illanomona damie ado llote:

—Comini motomo Jusiñamui illano jai ite. Naimaci diga naimie iite. Naimie comininitimaci. <sup>4</sup> Naimaci illanomo naimie iite. Naimacina naimie nabaillamona, naimie jitailla jira, naimacina caimadoite. Dane eeñeitimaci. Fiodaiñeitimaci. Sunaiñeitimaci. Duere sefuiñeitimaci. Birui ite rafuemo comeciaina naimaci nainomo facañena jira, ie facaise sunaiñeitimaci —llote.

<sup>5</sup> Jusiñamui llote:

—Ero, nana ra comuena birui finoiticue. Cue lluacino uanaicïnona jira, cue lluacïnona cue finua jira, bie rafuena cueno.

<sup>6</sup> Iemei cuemo llote:

—Bie rafue jai fuite. Jaca bue nia iñenia, jaie jaca iticue. Nana rana finodicue. Nana ra cue uaido icana jaide. Nana rana fuilla mei, jaca iiticue. Jaca siño jitodicue. Naimaci illena comini jinuina eo jiroacana isoi, cuena inotino comeciari eo caimare itataiticue. Ibañaño cue diga illena, naimacina jaca itataiticue. <sup>7</sup> Cuena raise inotïnona iese itataiticue. Jaca naimaci Jusiñamuiniticue. Naimaci jaca cue comininitimaci. <sup>8</sup> Jiaïno jaca eo boode iraimo jaca iitimaci. Azufre boa isoi irai booite. Naiemona jaca jilloñeitimaci. Cuemona eneno jaca iitimaci. Diese nainomo iitimaci: abido danomo jaidino, cuena raise inoñedino, jearede rafue finocabidino, cominina meinetino, aiñede riño diga icabidino, iniñede ïma diga icabidino, aiñinaï, jiraraina sedacabidino, tainona llocabidino —llote.

*Juan comue Jerusaléna llote*

<sup>9</sup> Naie facaise naie siete jaienisaïmona damie cue dine bite. Naie jaienisaï imaci copamo cominina duere fnollicinona navui ite isoide. Naimie cuemo llote:

—Cue diga mai bi. Iima ie aina jai ua isoi, Toïca Llauda isoidimie ie cominina jai ote. Ie ai isoidimaci. Llauda isoidimie jai oga comini illanona omo acataiticue.

<sup>10</sup> Nicaïrilla isoi, Jusiñamui joreño cue joreñoa eo a ite aillue anedumo uite. Nainomona, Jusiñamuimona, monamona Jerusalén billana ciodicue. Jusiñamui iena jira, eo mare.

<sup>11</sup> Nainomo Jusiñamui illa jira, naie illano eo quenirede. Eo mare raifide nofici isoi quenirede. Jaspe railla noficierna eruaiïlla jira, enefebecodo ciode. <sup>12</sup> Ie llaïgafo eo a ite. Eo jedaciede. Doce nasiaï ite. Naga nasemo daje jaienici ite. Israel micori uruiai mameciai naie nasiaïmo cuega. Doce uruiai illa jira, naga naserie daje mameci cuega. <sup>13</sup> Jitoma bicabillano dine eruaiïde llaïgafomo daje amani nase ite. Jitoma jaicabillano dine eruaiïde llaïgafomo daje amani nase ite. Naga beici dine eruaiïde llaïgafomo daje amani nase ite. <sup>14</sup> Naie llaïgafo anamo doce nofici ite. Nainomo Toïca Llauda isoidimie ie doce llofueoicagano mameciai cuega.

<sup>15</sup> Cue diga ñaite jaienicimo oromona ra facara ite. Naie nairai facallena ite. Ie nase, ie llaïgafo diga, facallena ite. <sup>16</sup> Naie nairaina naimie facajamona, nagafebei daje isoi illana uïñoticue. Dos mil doscientos kilómetros nagafebei are ite. Dos mil doscientos kilómetros

nagafebei a ite. <sup>17</sup> Ie llaigafona jiai facade. Sesenta y cuatro metros a ite. Comini facaja isoi, jaienici iena facade.

<sup>18</sup> Ie llaigafo jaspe railla noficimona finoca. Bie nairai difai oromona finoca. Enefebecodo ciode. <sup>19</sup> Diga eo quenirede noficina eruaide ra llaigafomo ite noficimo jai nitade. Nano jaspe. Enefebecodo ciode. Lemei zafiro. Mocorede. Jiaie ágata. Mocorede. Jiaie esmeralda. Mocorede. <sup>20</sup> Jiaie ónice. Jiairede userede diga faiga. Jiaie cornalina. Jiairede. Jiaie crisólito. Orona eruaide. Jiaie berilo. Mocorede. Jiaie topacio. Borarede. Jiaie crisoprasa. Mocorede. Jiaie jacinto. Jiduirede. Jiaie amatista. Jiduirede. Naie llaigafo anamo ite noficiái doce diga ite. <sup>21</sup> Ie doce nasiaidi perlas. Userede. Naga nase daje perlamona finoca. Bie nairai naisuaidi difai oro. Enefebecodo ciode.

<sup>22</sup> Bie illanomo Jusiñamuina sedajanona cioñedicue. Nana bie illanodi naimie sedajano. Cai Nama Jusiñamui, Toica Llauda isoidimie diga, nainomo illa jira, iaimaiaí uicomo sedaiticai. <sup>23</sup> Jusiñamui siñona jira, nainomo comini jitomana jitañeitimaci. Fivuina jitañeitimaci. Jusiñamui, Llauda isoidimie diga, iena lligaiñoite. <sup>24</sup> Nana comini iaimaiaína nabaicai jaitimaci. Nana illaicomini iaimaiaí dine billanona, iaimaiaimo iobillacino jaca fecaitimaci. <sup>25</sup> Bie nairai nasiaí jaca ibaiñeite. Nainomo naionadi jaca iñeite. <sup>26</sup> Iaimaiaimo iobillacinona fecallena, nana comini nainomo biitimaci. <sup>27</sup> Nainomo jeacino jaca iñeite. Jearede rafue finodino nainomo biñeitimaci. Tainona lloraini biñeitimaci. Dani Llauda isoidimie ite rabenicomo cuega mameciai itinodi nainomo biitimaci. Bie rabenicomo Jusiñamui illanomo jaca iitino mameciai jai cuega.

## 22

<sup>1</sup> Naie facaise jaienici cuena daje ille acatate. Nainomo ite jinui jiruamona cominina jaca itataite. Uifinide. Jusiñamui, Llauda isoidimie diga, illanomona tote. <sup>2</sup> Nanoca naiso motodo tote. Nagafabelle dine jaca itataite amenaiaí ite. Naga fivui llisillamona, naga fivui llisilla ite. Ie ibiaí illamona, comini caimare marena itimaci. <sup>3</sup> Jeacino nainomo iñena jira, Jusiñamui jaca buna duere finoñeite. Jusiñamui, Llauda isoidimie diga illamona, naimie comini naimiena jaca sedaitimaci. <sup>4</sup> Naimiena marefodo cioitimaci. Naimiemo naimaci duillamona, naimaci uiecuai itofiaimo naimie mameci cueite. <sup>5</sup> Nainomo naionadi iñeite. Lamparina jitañeitimaci. Jitomana jitañeitimaci. Cai Nama Jusiñamui naimacina lligaiñoite. Illaicomini isoi jaca iitimaci.

### *Juan Jesucristo billirui iairei illana cacade*

<sup>6</sup> Jaienici cuemo llote:

—Bie luacinodi uanaicino. Naimie facaina llorainimo ie rafuena llollena, ie uaina itatate. Naimiena inotinona ico suille rafuena ja uifnotaiacade. <sup>7</sup> “Raire biiticue” Cristo llote.

Bie rabenicomo ite ico suille rafuena inotinodi caimare iitimaci.

<sup>8</sup> Juandicue. Bie rafuena cacadicue. Iena ciodicue. Iena cue cacaja mei, iena cue cúa mei, iena cuemo acataga jaienici uicomo ana bitadaticue. Naimiena sedaacaducue; <sup>9</sup> iadedi cuemo llote:

—Dama ite. Cuena sedañoeno. O diga, naimie facaina lloraini isoi, bie rabenicomo ite llogacinona inotino isoi, naimie dibeimo jai maijodicue. Dama Jusiñamuina seda. <sup>10</sup> Bie rafue suillirui iairei illa jira, iena jino llono. Iena uifnota. <sup>11</sup> Bie rafuena bu inoñenia, naimie jitailla jira, marañede rafue naimie finoacania, iena nia finoite. Jearede rafue bu finoacania, iena nia finoite; ia bie rafuena naimie inoia, naimie jitailla jira, mare rafue naimie finoacania, mare rafuena finocana jailla. Jusiñamui jitaillacinona bu finoacania, naimie jitaillacinona nia finocana jailla.

<sup>12</sup> Jesucristo cuemo llote:

—Ero, raire biiticue. Naimie finoca rafue diese nagamiemo ibana fecaiticue. <sup>13</sup> Jaca bue nia iñenia, jaie jaca iticue. Nana rana finodicue. Nana ra cue uaido icana jaide. Nana rana fuilla mei, jaca iiticue. Jaca siño jitudicue. <sup>14</sup> Naimaci iniroina naimaci jocoia, caimare iitimaci. Naimaci comecina ñaiticue. Ie jeacinona oni dotacame jaca itataite amena llisillamona lliite. Cue cominina naimie illamona, Jusiñamui illanomo ie nasedo jaicabite; <sup>15</sup> ia naimacina jeacinona naimaci faionocaiñenia, Jusiñamui illanomo marañede rafuena finocabidino, aima dine jaicabidino, añede riño diga icabitino, iniñede iima diga icabitino, cominina meinotino, jiraraina sedacabidino, tainona llocabitino duiñeitimaci. <sup>16</sup> Creyentiana bie rafuena uifnotallena, cue jaienici o dine jai oretaticue. David micori ie jitudicue. Monairaicudu bairia isoi, Jusiñamui jitaillacinona cue finollena, baireiticue — llote.

<sup>17</sup> Bie facaise Jusiñamui Joreñodi, Cristo jai oga ai railla comini diga, naimiena nia inoñedinona uaidote:



—Bie rafuena mai cacarei. Iena mai ñno. Iena bu ñnoia, jiaimiemo iena lluai: Iena mai cacarei. Iena mai ñno.

Jiroacadimiemo lloticue:

—Mai jiruaibi. Bie jinua raifiñede. Biena o jiroacania, jaca iitio. Iese lloticue; ia ie comecina ñaiticue. Bie rafue ñnuana ñaiticue. <sup>18</sup> Bie ñco suille rafue ite rabenicono bu facajia, naimiemo rafuena lloiacadicue. Bie rafue baifemo bu lloia, bie rafuena bu meidoia, bie rabenicomio ite duere finuacino isoi, Jusiñamui naimiena duere finoite. <sup>19</sup> Bie rafuena bu jamaia, Jusiñamui naimiena duere finoite. Jaca illena Jusiñamui ie mamecina ie rabenicono jaca cueñeite. Comue Jerusalémo jaca duiñeite. Naiena jai lloticue.

<sup>20</sup> Cristo raite:

—Bie rafue jaca suite. Ua raire biiticue.

Iena raire suillena jiai jitaidicue. Cai Nama Jesús raire billena eo jitaidicue. <sup>21</sup> Naimie due-naillacinona nana Jesucristona ñnotino uiñocana jaillana jitaidicue. Macaibaite. Juandicue.